


Yesu Kiristito  
Wu-Zoᅓᅓᅓᅓ (Ghana)



Sisaala-Tumulung NT Ghana

# **Yesu Kiristito Wu-Zɔŋŋɔɔ (Ghana)** **Sisaala-Tumulung NT Ghana**

copyright © 2014 Wycliffe Bible Translators, Inc.

Language: (Sisaala, Tumulung)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 22 Feb 2024 from source files dated 29 Jan 2022

b3eb8618-120f-5a96-8c1c-1dbc16914330

## Contents

MATIU . . . . .	1
MAAK . . . . .	64
LUUK . . . . .	102
JƆƆƆ . . . . .	170
YESU NANZƆƆBA	
TINƆINƆAA . . .	217
ROM TINƆAA . .	279
1 KƆRINƆTI NIAA	308
2 KƆRINƆTI NIAA	336
GALIISIA NIAA .	354
EFESIS NIAA . .	364
FILIPA NIAA . .	373
KƆLƆSI NIAA . .	380
1 TESALONAAKA	
NIAA . . . . .	386
2 TESALONAAKA	
NIAA . . . . .	392
1 TIMOTI . . . .	395
2 TIMOTI . . . .	404
TAATIS . . . . .	410
FALIIMƆƆ . . . .	414
HIIBURU	
TINƆAA . . . . .	416
JEEMS . . . . .	439
1 PIITA . . . . .	447
2 PIITA . . . . .	455
1 JƆƆƆ . . . . .	460
2 JƆƆƆ . . . . .	467
3 JƆƆƆ . . . . .	468
JUUD . . . . .	470
WIALIN WIA SI	
JONO DAGE JƆƆƆ	473

## WU-ZOMO-LA MATIU SI NMUNSA

*Yesu doho niaa  
Luuk 3.23-28*

<sup>1</sup> Yesu doho niaa ne nla. U naabalimaba ne fa nja Abiraham ari Devit.

<sup>2</sup> Abiraham ne fa lul Aizik. Aizik ma sii lul Jekob. Jekob ma sii lul Juda ari u naanbiirin.

<sup>3</sup> Juda ma sii lul Peres ari Zera. (Ba naan yirin ne fa Tama.) Peres ma bira sii lul Hezuron. Hezuron ma sii lul Ram. <sup>4</sup> Ram ma sii lul Amiinadab. Amiinadab ma sii lul Naasun. Naasun ma sii lul Salimon. <sup>5</sup> Salimon ma sii lul Buas. (Buas naan yirin ne fa Rehab.) Buas ma sii lul Obed. (Obed ma naan yirin ne fa Rut.) Obed ma sii lul Jesi. <sup>6</sup> Jesi ma bira sii lul kuoro Devit. Devit ma fa lul Solomon (Solomon ma naan fa nja Uraya haala ne. Uraya suu an ka Devit jono jaa.) <sup>7</sup> Solomon ma

sii lul Rihabam, Rihabam ma sii lul Abaaja, Abaaja ma sii lul Asa. <sup>8</sup> Asa ma sii lul Jihosafat, Jihosafat ma sii lul Joram, Joram ma sii lul Uzaya. <sup>9</sup> Uzaya ma sii lul Jotam, Jotam ma sii lul Ehas, Ehas ma sii lul Hizikaya. <sup>10</sup> Hizikaya ma sii lul Manaasi, Manaasi ma sii lul Emon, Emon ma sii lul Jusaya. <sup>11</sup> Jusaya ma sii lul Jekonaya ari u naanbiirin.

Bua-la le ne ba ken Iziral tinjaa mu Babilon.

<sup>12</sup> Ba fa si ken Iziral tinjaa kaa mu Babilon nii, u nii harin le ne Jekonaya lul Sialitel, Sialitel ma sii lul Zerubabil. <sup>13</sup> Zerubabil ma sii lul Abayat, Abayat ma sii lul Elayakim, Elayakim ma sii lul Azo. <sup>14</sup> Azo ma sii lul Zadok, Zadok ma sii lul Akim, Akim ma sii lul Elayat. <sup>15</sup> Elayat ma sii lul Eliyeza, Eliyeza ma sii lul Matan, Matan ma bira sii lul Jekob. <sup>16</sup> Jekob ma sii lul Josef, Josef ne saa jaa Meeri. U ne lul Yesu, nii-la ba sii yire Kirisito.

<sup>17</sup> A suomi Abiraham si he u miisin le a kaa kuko Devit si he u miisin le, ba di u nihiliereba kala fa nja fii ari banese ne. Devit si he u miisin le a kaa kuko bua-la le ba fa si kese Iziral tinjaa kaa mu Babilon, Devit nihiliereba kala ma fa nja fii ari banese ne, a bira chin bua-la le ba si kese Iziral tinjaa kaa mu Babilon a kaa kuko bua-la le ba si lul Kirisito, nialin ba si kese kaa mu Babilon nihiliereba ma fa nja fii ari banese ne.

*Yesu lulluj bua le  
Luuk 2.1-7*

<sup>18</sup> Nla ne ba nja a lul Yesu Kirisito. Josef ne fa suge u naan Meeri duu jaa. Ka di ba-na jaa donjo, Meeri na duu ken luoron ne. Wia Dinzon-la ne he pu. <sup>19</sup> Josef fa nja ni-pula ne. U fa bi che duu hiise Meeri niaa tuon. Nii ne u ken u tuon le duu viau. <sup>20</sup> U fa sii biine nii, Wia

tinđara dɔŋɔ kɔ u teen ari duosoo tuɔŋ a bula pu a bul, "Josef, Devit doho nuu, sɪ leŋe di fawulluŋ kenin ɲ sɪi che di ɲ jaa Mɛeri, bɛɛ wiaa luoru-la u si kenɛ ɲaa Wia Diŋ-zɔŋ-la nɛ hɛ pu. <sup>21</sup> U jaŋ lul baal, ɲ jaŋ hɛ u yirin Yesu, bɛɛ wiaa u nɛ jaŋ laa u niaa haacheba ta." <sup>22</sup> Wiin deen kala ɲaa di wialin la Tiina Wia fa si bula ku ɲaa wutitii. U fa to u nialin sɪi bul wiaa, Wia Diŋ-zɔŋ-la doluŋ lɛ nɛ a bul ɲii. <sup>23</sup> Wialin u fa si bula nɛ ɲla: "Ha-tolo kubala ha si bi baal jin jaŋ ken luoruŋ a lul bie. Ba jaŋ hɛ u yirin Imanuel." (U yiri-la bubuɔŋ nɛ Wia hɛ la teen.) <sup>24</sup> Josef si sɪi dɔŋ lɛ, u ɲaa ɲii Wia tinđari-la si bula pu a jaa Mɛeri. <sup>25</sup> U si jaau ɲii, ba duu bi dɔŋɔ jin, ka u lul u ha-toli-bie. ɲii nɛ Josef hɛ u yirin Yesu.

## 2

### *Wu-jinnaa mu na Yesu*

<sup>1-2</sup> Ba lul Yesu Betilehem lɛ nɛ. Ta-bie-la fa hɛ Judiya tinteen lɛ nɛ. Bua deen lɛ baal kubala baa yire Herɔd nɛ fa ɲaa tintee-la kuoro. Ba si lul Yesu, wu-jinnaa lii taŋ-bubuɔŋ a kɔ Jerusalem a piese, "Juu tinŋaa kuorula ba si lula hɛ nii nɛ? La na u cheŋwuluŋ taŋ-bubuɔŋ nɛ a kɔ di la chuɔlu." <sup>3</sup> Kuoro Herɔd fa si nii wiin deen, fawulluŋ ken jaŋ ba di Jerusalem niaa kala kinken kinken. <sup>4</sup> ɲii nɛ u yire nialin

si kpu pusun pipi Wia kuhi-asin ari Wia tenin kerichibala ba ku hilimi. U pieseba a bul, "Nii nɛ ba jaŋ lul Kirisito, nii-la Wia si liisa?" <sup>5</sup> ɲii nɛ ba bula pu a bul, "Ba jaŋ lulu Betilehem, Judiya tinteen lɛ. ɲla nɛ nialin sɪi bul wiaa, Wia Diŋ-zɔŋ-la doluŋ lɛ ɲmuŋse: <sup>6</sup> Wia si,

'Betilehem ɲaa ta-bie nɛ Judiya tinteen lɛ.

Ama Judiya tinteen kala lɛ, Betilehem niaa nɛ ɲaa ni-balaa,

bɛɛ wiaa ba tuɔŋ nɛ Iziral kuoro jaŋ lii, nii-la si jaŋ beŋ mi niaa, Iziral tinŋaa.' "

<sup>7</sup> ɲii nɛ Herɔd luora yire wu-jinna-la si lii taŋ-bubuɔŋ a kaa mu faa a pieseba di ba dagu bua-la titia lɛ cheŋwul-la si lia. Ba daga pu. <sup>8</sup> ɲii nɛ Herɔd taba di ba mu Betilehem, aŋ bula piba a bul, "Má mu che bile ari siifesiŋ. 'Di ma nɛ nau, má leŋ di mi ma jin ɲii niin lɛ, a ma mu chuɔlu." <sup>9</sup> Ba si nii ɲii, ba lii joŋ wonbiin aa mu. Cheŋwul-la ba fa si na taŋ-bubuɔŋ bira laa ba sipaan. <sup>10</sup> Ba bira si na cheŋwul-la, ba tuɔŋ kala tɔre, ba jujuɔse. <sup>11</sup> Ba si mu yi lee-la bii-mulo-la si hɛ, cheŋwul-la chin dia-la nyun. Ba mu juu dia-la a na bii-mulo-la ari Mɛeri, u naan. Ba tuu kpirimi u sipaan a chuɔlu. ɲii nɛ ba puri ba chugusun a liise kiaa pu: Selime, tii-keli-zɔŋ baa yire frankinsens ari tii-keli-zɔŋ dɔŋɔ baa yire mɛɛ. <sup>12</sup> ɲii

ne titanij Wia bula piba duosoo tuonj ari ba sí miira mu Herod teenj. Nii ne ba sii a to wonjbii-wogo a miira mu ba janj.

*Josef ari Mæeri fá mu Ijipiti tinteenj*

<sup>13-14</sup> Ba si miira jonj ba wonjbiinj a viiri, Josef pinj donj a duosi a na Wia tinjdaara di u kɔ u teenj a bula pu, "Sii a jonj bii-mulo-la ari u naanj a fá mu Ijipiti tinteenj a he dime see di mi bira bula pinj di η lii dime, bæe wiaa Herod che di u kpu bii-mulo-la ne." Nii ne u sii a jonj bii-mulo-la ari u naanj a mu Ijipiti tinteenj titanij. U he dime ne deenj deenj Herod ku suu. <sup>15</sup> Wiinj deenj ηaa di wiila Wia fa si to nialinj síi bul wiaa, Wia Dinj-zonj-la dolunj le ku ηaa wutitii. U fa bula ari u janj yire u bie duu lii Ijipiti tinteenj kɔ.

*Ba kpu hanjbolibiisi-la Betlehem le*

<sup>16</sup> Herod si na ari wujinna-la nyisu ne, u faasa na baaninj. Wu-jinna-la fa si dagu bua-la le ba si lul Yesu, u jinj nii. Nii ne u ta u laaliyuoroo di ba mu Betlehem ta-biisi-la kala si gollu chu a kpu hanjbolibiisi-la kala si ha bi jisinj balia kiele. <sup>17</sup> A tinj ηla wiaa wii-la Jerimaya fa si bula ku ηaa wutitii ne. U fa ηaa nialinj síi bul wiaa, Wia Dinj-zonj-la dolunj le donjɔ ne. <sup>18</sup> Wialinj u fa si bula ne ηla: U si, "Niaa níi yel Rama le, niaa faasa yel ne.

Haal kubala ba síi yire Rechil yel u

hanjbiisinj wiaa ne.

U yele, u bi torɔ,  
bæe wiaa ba kala suba ne."

*Josef ari Mæeri mu Nazaret*

<sup>19-21</sup> Nii ne Herod ku suu. U si suba ηii, Josef bira duoso a na Wia tinjdaara di u kɔ u teenj a bula pu, "Sii a keñj bii-mulo-la ari u naanj a miira mu Iziral tinteenj. Nialaa fa síi che di ba kpu bii-mulo-la, ba suba ne." Nii ne u keñj bile ari u naanj a kaa mu Iziral tinteenj a he dime. <sup>22</sup> Ama Josef si nia ari Herod suba, ka u bie Akiliyas dii kuorunj Judiya tinteenj le, fawullunj fa kenu ari u si janj honj dime. Nii ne Wia bira bula pu duosoo tuonj duu mu honj Galilii tinteenj le. <sup>23</sup> U si mu Galilii tinteenj, u mu honj tanj kubala le baa yire Nazaret. U ηaa ηii di wialinj nialinj fa síi bul wiaa, Wia Dinj-zonj-la dolunj le ηaa wutitii ne. Ba fa bula a bul, "Ba janj kenu yire Nazaret tiina."

### 3

*Jɔonj Wia lii-foori-la bul Wia wiaa*  
*Maak 1.1-8; Luuk 3.1-18;*  
*Jɔonj 1.19-28*

<sup>1</sup> Bua-la le Jɔonj Wia lii-foori-la sii kɔ Judiya tinteenj a juu giri-bine tuonj a suomo bubul Wia wiaa pipi niaa. <sup>2</sup> U bula piba a bul, "Má birima lii ma haacheba le, bæe wiaa Wia kuorii-la kpage

ne!”<sup>3</sup> Nialinj fa sii bul wiaa, Wia Diŋ-zoŋ-la doluŋ le doŋo ma fa bul Joŋ wiaa ne. U yirinj ne fa Azaaya. U fa si,

“Nuu ne chinj giri-bine tuŋ aa heele bul,

‘Má kɔ a wase wonbiinj bil di la Tiina kɔ a tuto.

Má ŋaa ŋii duu ne kɔ, u di-veninj jan pin woruŋ.’ ”

<sup>4</sup> Joŋ genninj fa ŋaa bunŋanŋa punaa ne ba kaa sua, a keŋ tenbiinj voo u tiŋa, u kudilee ma ne fa nyanŋirikɛba ari tuuŋ.

<sup>5</sup> Niaa lii Jerusalem ari Judiya tinŋeen kala ari tasi-la kala si golli Joŋdanj fuo-la a kɔ u teenj. <sup>6</sup> Ba dage ba haacheba aŋ tuu Joŋdanj fuo-la, u foba Wii-chuoŋe liinj.

<sup>7</sup> Joŋ na Farisii tinŋaa ari Sadiusii tinŋaa di ba yuga a kuko u teenj duu foba Wii-chuoŋe liinj. U si naba, u bula piba a bul, “Ma niaa deenba wu-ŋaalaa nage diŋŋaa ne. Ma biina ma janj wuo fá lel chee-la Wia si janj dii nuu-kala sariyaa?” <sup>8</sup> Máa ŋaa wialinj si janj dage ari ma birima lii ma haacheba le ne <sup>9</sup> aŋ sí biina a bul Abiraham si ŋaa ma naabalima ŋii, Wia bi janj doŋisema. Mi janj bula pima ari Wia paala janj wuo ŋaa di tabiaa deenba ma si na birime Abiraham doho niaa. <sup>10</sup> Na ba keŋ saanj jee ne a ŋaa siri di ba kerii tiisinj lo. Tia-la kala si bi neŋ-zoŋŋoo ka neŋ, ba janj kere lo a he nyininj.

<sup>11</sup> Mi-na foma Wii-chuoŋe liinj a dage ari ma birima lii ma haacheba le ne, ama nii-la si janj to mi harinj kɔ, u ne janj joŋ Wia Diŋ-zoŋ-la a he ma doŋsuŋ le aŋ joŋ nyininj he doŋsuŋ ma le. U ne yuga kiimi. U paala bi maga di mi kori u neŋteŋŋee maa. <sup>12</sup> U janj kori mii-chaari-gbaŋa duu ŋmoo u miaa kala dere, u janj keŋ gbaŋa-la a kaa chaare a liise mii-biinj a he u vire le aŋ joŋ joŋuŋ a he nyininj le. Nyinj-la bi janj dise.”

*Joŋ fo Yesu Wii-chuoŋe liinj*

*Maak 1.9-11; Luuk 3.21-22*

<sup>13</sup> Bua-la le Joŋ fa sii bul Wia wiaa aŋ fufo niaa Wii-chuoŋe liinj ŋii, Yesu sii lii Galilii tinŋeenj a kɔ Joŋ teenj duu fou Wii-chuoŋe liinj Joŋdanj fuo-la le. <sup>14</sup> Ama Joŋ si nii ŋii, u wiwalime di Yesu keŋ u tuobiinaa birime. Nii ne Joŋ bula pu a bul, “Ŋ ne maga di ŋ fomi Wii-chuoŋe liinj, aŋ ka ŋ kɔ di mi ne foŋ Wii-chuoŋe liinj ŋii.” <sup>15</sup> Nii ne Yesu bula pu a bul, “Ŋaa ŋii mi si bula pinj. Ŋla ne la janj wuo to a ŋaa wii-la kala Wia sii cho.” Nii ne Joŋ sei a fou Wii-chuoŋe liinj. <sup>16</sup> Joŋ si fo Yesu Wii-chuoŋe liinj dere, u guu lii lii-la tuŋ ku lii di wia nyuŋ kpaa balia. U na Wia Diŋ-zoŋ-la duu ku tuu a nage kokomo a togiliu le. <sup>17</sup> Ka u nii nuu yiikoro wia nyuŋ a bul, “Mi Bii-chooluŋ ne ŋla, mi tuŋ tɔre u nyuŋ.”

## 4

*Sitaani magise Yesu*

*Maak 1.12-13; Luuk 4.1-13*

1 Wia Din-zon-la si ku togili Yesu le nii, u kenu kaa juu giri-bine tuon di Sitaani magisu. 2 Yesu fa si he giri-bine tuon nii, u voo niin titanin ari wiiheye kala tapulaa mahin balia, nii ne losun kenu worun. 3 Nii ne

Sitaani ko u teen a bula pu a bul, "Di n ne naa Wia Bie, naa di tabiaa deenba birime boroboro di n dii." 4 Nii ne Yesu bula pu a bul, "Ba nmunse Wia tenin tuon a bul,

'Kudiilee dunduja dee bi nuhuobiine miisin ka pa,

ama Wia niin wialin u sii bul ni pi nuhuobiine miisin.' "

5 Nii ne Sitaani ken Yesu a kaa mu Jerusalem a kaa mu jil Wia-dia nyu-gbana 6 an bula pu a bul, "Di n ne naa Wia Bie, jon n titia a yuo daha a tuu chigisi tinteen. Ba nmunse Wia tenin tuon ari

'Wia jan bul n wiaa a pi u tinjaaraa

di ba ku cheme kenin, di n si jon n naan nmoo tabiaa a keru.' "

7 Nii ne Yesu bula pu a bul, "Ba bira nmunse Wia tenin seme donjo a bul,

'U bi maga di n mimagise n Tiina Wia.' "

8 Nii ne Sitaani bira ken Yesu a kaa jil peel-bal kubala nyun a dagu dunia kuorun fine ari u zomun 9 an bula

pu a bul, "Mi jan jon kiaa deenba kala pin di n ne jan tuu kpirimi a chuolemi."

10 Nii ne Yesu bula pu a bul, "Sitaani, mu dime, Wia tenin tuon ba nmunsa di ba chuchule la Tiina Wia dunduja ne a timaa pu."

11 Nii ne Sitaani viiri an ka Yesu. Nii ne Wia tinjaaraa ku tima pu.

*Yesu suomi u tintinnaa Galilii le*

*Maak 1.14-15; Luuk 4.14-15*

12 Bua deen le ba ken Jon Wia lii-foori-la kaa mu to dia. Yesu si nii nii, u sii Judiya le a mu Galilii tinteen. 13 U bira bi Nazaret le hono an sii a mu hon tan kubala baa yire Kapenam le. Tan-la kpage Galilii mugibal-la ne a he Zebulun ari Nafitali tinteen. 14 Wiin deen naa di wialin Azaaya fa si bula ku naa wutitiiba ne. 15 Azaaya fa naa nii-la sii bul wiaa, Wia Din-zon-la dolun le ne. U fa bul wiaa a pi Zebulun ari Nafitali doho niaa le a chaase mugibalin diiraa, Jodan seme, a he Galilii tinteen le. Ba naa nialin si bi juu tinnaa naa ne. 16 U bula piba a bul,

"Nialin si he birinin tuon, ba jan na pulun-bal. Tintee-la ma le niaa si bi Wia chuole, pulumun jan pose piba."

17 Yesu si he Kapenam le, u suomi u tintinnaa a bul Wia wiaa pi niaa a bul, "Ma birima lii ma haacheba le, bee



wiaa, Wia kuorii-la kpage nɛ.”

*Yesu yire chenɣili-kpuuraa banese*

*Maak 1.16-20; Luuk 5.1-11*

<sup>18</sup> Yesu fa si jon Galilii mugi-bal-la niin a viven, u na naanɣiirin balia. Ba fa ɲaa chenɣili-kpuuraa nɛ. Dɔŋɔ yirin nɛ fa Saamɔŋ. U yirin dɔŋɔ ma nɛ fa Pi-ita. U naanɣie ma yirin nɛ Anɣuru. U naba di baa kpu chenfilee fuo-la ɛ ari ba jonɣa. <sup>19</sup> Nii nɛ Yesu bula piba a bul, “Má kɔ mi teen a to mi harin. Mi jan dagema nii ma si jan kikese niaa.” <sup>20</sup> Lima lima ba jon ba jonɣa ta aŋ to u harin. <sup>21</sup> Nii nɛ u bira ven a mu na naanɣiirin balia, ba yiraa nɛ Jeems ari Jɔɔŋ. Ba fa ɲaa Zebidii biirin nɛ. U naba di ba di ba nyimma fa hɛ ba liin daboro tuɔŋ nɛ. Ba ken ba jonɣa ɲaa siri di ba yuo. <sup>22</sup> Nii nɛ Yesu yireba. Ba guu sii a leŋ ba liin daboro ari ba nyimma aŋ to Yesu harin.

*Yesu bul Wia wiaa pi niaa aŋ pɛ vaareba*

*Luuk 6.17-19*

<sup>23</sup> Nii nɛ Yesu gɔlle Galilii tinteen kala a didage niaa ba Wii-chuoɛ diisin ɛ a bubul Wia wu-zomɔ-la wiaa ari Wia kuorii-la wiaa a pi niaa aŋ pɛ vivaare niaa nyanyal-yiriba kala. <sup>24</sup> Yesu wiaa teeli Siiria tinteen kala. Nii nɛ niaa ken ba nyanyal tinɲaa kala kɔ u teen. Ba ken nyanyal-yiriba kala, jin-bɔŋŋɔɔ fa

ken dɔŋsun, nialin dɔŋsun faa tel kunɣunɣun, dɔŋsun ma fa ɲaa gberikɛɛ nɛ a kɔ. Yesu vaareba kala. <sup>25</sup> Ni-dan to Yesu harin. Ba dɔŋsun lii Galilii tinteen ari ta-gentisin fii tintheyee. Dɔŋsun ma lii Jerusalem si hɛ Judiya tinteen ɛ, dɔŋsun ma lii Jɔɔdan fuon cholo seme dɔŋɔ.

## 5

*Nii la si jan ɲaa a ken tuɔtorun*

*Luuk 6.20-23*

<sup>1-2</sup> Yesu si na di niaa yuga nii, u jil peelin nyun a hɔŋ dime. U si hɔŋɔ, u hari-tooro kɔ u teen. U suomo bul wiaa a didageba aa bul, <sup>3</sup> “Wia jan pɛ nialin si bi Wia jin worun ɛ.

Ba nɛ jan dii Wia kuorii-la.

<sup>4</sup> Wia jan pɛ nialin sii yel ɛ.

U jan leŋ di ba tuɔsaa pin di-bala.

<sup>5</sup> Wia jan pɛ nialin si bi ba titia ka dage.

Ba jan dii Wia kuorii-la tintee-falii-la ɛ.

<sup>6</sup> Wia jan pɛ nialin si faasa che tuɔ-pula a nage losun koo lii-nyuasun si ken niaa ɲ chiche kudiilee koo liin nii.

Wia jan ɲaa di ba ken tuɔ-pula.

<sup>7</sup> Wia jan pɛ nialin sii fá niaa nennige ɛ.

U ma jan fába nennige.

<sup>8</sup> Wia jan pɛ nialin si ken tuɔ-pula ɛ.

Ba jan na Wia.

<sup>9</sup> Wia jan pɛ nanjejeeree ɛ.

U jaŋ keŋba yire u bi-  
irin.

<sup>10</sup> Wia jaŋ pe nialin ba sii  
dogisu le a tin wutitii  
ari tuo-pula wiaa.

Ba jaŋ he Wia kuorii-la  
tuon.

<sup>11</sup> Di niaa ne tuusema an  
pe to ma naasin dudogisema  
an nyia wu-nyiarin pipima a  
tin ma si nja mi haritooro  
wiaa, Wia ma jaŋ pema le.

<sup>12</sup> Má leŋ di ma tuon tɔre,  
di ma juuɔse, bee wiaa ma  
time jaŋ yuge Wia-jaŋ le. Ba  
si to ma naasin dudogisema  
nii, nii titia ne ba fa dogise  
nialin si laa sipaan bubul  
wiaa, Wia Din-zon-la dolun  
le.

*Ma nage yisin a nage  
chaanin maa*

*Maak 9.50; Luuk 14.34-35*

<sup>13</sup> Ma nage yisin ne nuu-  
kala teen. Yisin sima, ama di  
u ne sebise, n bira bi jaŋ wuo  
njaa duu sin. U nja ku-tɔ  
ne. Ba jonɔ ta niaa nunuɔse.

<sup>14</sup> Ma ma nage chaanin ne  
dunia niaa kala teen. Tan  
kala si chin peelin nyun, u  
bi wuo faa. <sup>15</sup> Nuu-kala sii  
che pulumun u dia le, u bi  
jaŋ nyige chaanin bil u dia le  
a keŋ gbanja a chu tɔ, koo u  
bi jaŋ jon chaan-la he godo  
bubuon maa. U yie jonɔ  
bil kua nyun ne, di nuu-kala  
si he dia-la tuon nina pulu-  
mun. <sup>16</sup> Nii titia ne ma ma  
maga di ma chaane niaa teen  
di ba wuo na wu-zomɔ-la ma  
sii nja di ba wuo denne ma  
Nyimma si he Wia-jaŋ le.

*Yesu dage niaa wii-la ba si  
nmuŋsa bil di ba tuto*

<sup>17</sup> Ma biina mi ko di mi jon  
wialin Moosis fa si nmuŋsa  
bil di niaa tuto ta nee? Koo  
ma biina mi ko di mi jon  
wialin niaa si dagema Wia  
Din-zon-la dolun le ta nee?  
Ai, mi bi ko di mi jonba ta,  
ama mi ko di mi dage ba  
bubuon titia ne. <sup>18</sup> Wutitii  
ne mi bulaa pima, dunia ari  
wia nyun si jaŋ he dime nii  
a dieni, wialin Moosis fa si  
nmuŋsa bil di niaa tuto, ba  
bi jaŋ keriba mua ma ta see  
di kun-kala si he dunia le  
dere. <sup>19</sup> Nii wiaa nii-la kala  
si keru wialin mua ma ta an  
dage u donsun tinjaa di ba  
to nii, u tiina ne jaŋ nja ni-  
bie Wia kuorii-la tuon. Nii-la  
ma kala sii to wialin a dage  
u donsun tinjaa di ba ma  
to nii titia, u tiina jaŋ yuge  
Wia kuorii-la tuon. <sup>20</sup> Mi  
jaŋ bula pima, see di ma  
keŋ tuo-pula a kii Wia tenin  
kerichiba ari Farisii timma-  
la a ninjaa wialin Wia sii che,  
di nii dee, ma bi jaŋ wuo juu  
Wia kuorii-la tuon.”

*Yesu bul wiaa a tige  
baanin nanin le*

<sup>21</sup> Nii ne Yesu bira dage u  
haritooro a bul, “Ma nia ari  
faafa kala ne Moosis bula pi  
niaa a bul di ba si niaa kpu.  
U fa bula di nii-la kala ne  
kpu nuu, ba jaŋ kenu kaa mu  
dii u sariya. <sup>22</sup> Ama leele mi  
jaŋ bula pima, nii-la kala si  
na baanin u naanbie nyun,  
ba jaŋ kenu kaa ku dii u  
sariya. Nii-la ma kala si yire

u naanɓie a bul di u ɗaa ni-  
 peɪpei, ba jaŋ kenu kaa mu  
 nialin si hilime vuure wiaa  
 teenj. Nii-la ma kala si yire  
 u naanɓie a bul di u ɗaa ni-  
 too ne, u tiina jaŋ mu juu  
 Wia nyininj. <sup>23</sup> Di ɗ ne keŋ  
 puna mu Wia koruŋ di ɗ kpu  
 a nyiga pu aŋ liise mu yi  
 ari ɗ naanɓie tuɔŋ cheye ɗ  
 nyuŋ, <sup>24</sup> leŋ puna-la koru-la  
 nyuŋ aŋ miira mu ma di ɗ  
 naanɓie sinj, ka di ɗ-na miira  
 mu di ba kpu puna-la a pi  
 Wia. <sup>25</sup> Di nuu ne saminj a  
 keninj kaa mu sariya didiilinj,  
 ɗ ɗaa kukeri a bul wii-la  
 wase wonɓiin le lima lima  
 aŋ-na mu. Di ɗii dee, u jaŋ  
 keninj kaa he sariya didiire  
 nisinj le. Sariya didiire ma  
 jaŋ keninj kaa he porisiba  
 nisinj le. Ba ne jaŋ keninj mu  
 to dia. <sup>26</sup> Di ba keninj mu to  
 dia, ɗ bi jaŋ wuo lii see ɗ tinj  
 chinj-la kala ba si kere pinj.

*Yesu bul wiaa a tige  
 haalaa cheninj le*

<sup>27</sup> Ma nia di ba dagema  
 di ma si niaa haalaa che.  
<sup>28</sup> Ama mi jaŋ bula pima,  
 nuu-kala si na haala a cho  
 duu kenu pinj, u tiina juu  
 Wia haache le ne u tuɔŋ le.  
<sup>29</sup> Di ɗ na-diinj siinj nii che  
 duu keninj he haache le, liisa  
 ta. N si jaŋ juu Wia kuorii-la  
 tuɔŋ ari sii-togo, u ne kpia ba  
 si jonuŋ yuo he Wia nyininj  
 le ari siaa balia. <sup>30</sup> Di ɗ na-  
 diinj nisinj nii che duu keninj  
 he haache le, kere ta. N si  
 jaŋ juu Wia kuorii-la tuɔŋ  
 ari na-kuuŋ, u ne kpia ɗ si

keŋ ɗ yaraa kala aŋ juu Wia  
 nyininj.

*Yesu dage niaa haala  
 vianinj wiaa*

*Mat. 19.9; Maak 10.11-12;  
 Luuk 16.18*

<sup>31</sup> Ba bira dagema a bul,  
 'Di nuu nii che duu via  
 u haala, u maga duu  
 ɗmuŋse teninj pi haal-  
 la ari u jaŋ viau.'

<sup>32</sup> Ama leele mi jaŋ bula  
 pima a bul, baal-na kala si  
 via u haala, u ɗaa haal-la  
 juu Wia haache le ne, see  
 di haal-la ka ɗaa ha-choruŋ  
 wu-ɗaalaa, ka u bala-na  
 viau. Di haal-la ne bira mu  
 jaa baal doŋ, baal-la si jaau,  
 u ma juu Wia haache le ne.

*Yesu bula pi niaa di ba si  
 ɗmiesu*

<sup>33</sup> Ma bira nia di ba bula pi  
 la naabalimaba a bul,  
 'Di ɗ ne ɗmiesa ari ɗ jaŋ ɗaa  
 wii pi Wia,  
 si leje di wii-la ta,  
 ama ɗaa wii-la ɗ si si ɗ jaŋ  
 ɗaa a pi Wia.'

<sup>34</sup> Ama leele mi jaŋ bula  
 pima, di ma ne che di ma  
 ɗaa wii, ma si ɗmiesu. Ma si  
 Wia ɗmiesu, bee wiaa u nii  
 beŋ dunia kuŋ-kala. <sup>35</sup> Koo  
 ma si tinteenj ma ɗmiesu,  
 bee wiaa Wia naasinj di-  
 wiesinj ne ɗii. Koo ma si  
 Jerusalem ma ɗmiesu, bee  
 wiaa kuori-balinj jaŋ ne ɗii.  
<sup>36</sup> Ma paala si ma nyuŋ ma  
 ɗmiesu, bee wiaa ma paala  
 bi jaŋ wuo ɗaa di ma nyu-  
 punaa biri koo ba pulle.  
<sup>37</sup> Ama ma-na yaa bul, 'Oo'  
 koo 'Ai' duŋduŋa a lii ɗii

harinj. Di η ne seyε, leη u sene ηaa wutitii. Di η bira bi seyε maa, leη duu ηaa wutitii. Di ηii dunđunja dee, u lii Sitaani ne.

*Di nuu ne ηaa wu-bon η le, si wu-bon-la jonjo timu*

*Luuk 6.29-30*

<sup>38</sup> Ma nia ari Moosis fa bula a bul,

'Di nuu ne too η siinj pure, η ma too u siinj pure, di nuu ne ηmoo η nyilin churi, η ma ηmoo u nyilin churi.'

<sup>39</sup> Ama leεε mi jan bula pima a bul, di nuu ne ηaa wu-bon η le, si wu-bon-la jonjo timu. Di nuu ne falle η na-diiη chan̄kpan̄inj le, keη η na-gua chan̄kpan̄inj ma kaa birima pu duu falle. <sup>40</sup> Di nuu ne samin̄ kaa juu kooti duu laa η geri-balin̄, wuri η geri-bie ma pe pu. <sup>41</sup> Di nuu ne fugun̄ di ma duu ven̄ meel-daa, leη di ma ven̄ meel-daasin̄ balia. <sup>42</sup> Di η ne keη kun̄, di nuu piεε chiche, jonjo pu. Di nuu ne ko η teen̄ a chiche kun̄ duu chin̄, di η ne keεε, jonjo chimu.

*Yesu bula ari la cho la dindon̄ηoo*

*Luuk 6.27-28, 32-36*

<sup>43</sup> Ma nia ari Moosis fa si di ma cho ma don̄sun̄ tin̄ηaa an̄ bere ma dindon̄ηoo. <sup>44</sup> Ama leεε mi jan bula pima, ma cho ma dindon̄ηoo a chuole Wia pipi nialinj si to naasin̄ dogisema. <sup>45</sup> Di ma ne ηaa ηii, ma jan̄ wuo ηaa ma Nyimma Wia si he Wia-jan̄ biirin̄. U leηe Wia p̄ose

hihe ni-bon̄ηoo ari ni-zon̄ηoo kala le ne a leη duonun̄ nii pipi ni-zon̄ηoo ari ni-bon̄ηoo kala. <sup>46</sup> Di η ne cho nialinj si chon̄ dunđunja, η bi jan̄ keη time Wia-jan̄ le. Lan̄poo lilaaraa ma paala ηin̄aa ηii ne. <sup>47</sup> Di η ne tuose η naan̄biirin̄ dunđunja chuchuoε, η bi worun̄ ka ηaa. Nialinj si bi Wia jin̄ ma paala ηin̄aa ηii ne. <sup>48</sup> U maga di ma ηaa tuo-pul timma ne a si kun̄-kala che ka, ari ma Nyimma si he Wia-jan̄ si ηaa Tuo-pul Tiina ηii."

## 6

*Yesu dagela ηii la si jan̄ ηaa a jon̄ kiaa pi niaa*

<sup>1</sup> Yesu bira dage u hari-tooroo a bul, "Di η nii che di η ηaa wu-zon̄ a pe η don̄o tiina le, si wu-zon̄-la jonjo ηaau le niaa tuon̄. Di η ne ηaa ηii, η bi time keεε η Nyimma si he Wia-jan̄ le teen̄. <sup>2</sup> Di η ne jon̄ kun̄ pe nuu le, si leηe di niaa jin̄. Nialinj sii dage ba titia yie ηaa ηii Wii-chuoε diisin̄ le ari won̄bii-porunun̄ le. Ba ηaa ηii di niaa besεba le ne. Wutitii ne mi bulaa pima, ba laa ba time ne. <sup>3</sup> Di η nii jon̄ kun̄ a pe nuu le, si leηe di η nan̄don̄-fiemin̄ paala jin̄. <sup>4</sup> Leη duu ηaa wu-faali. Di η ne ηaa ηii, η Nyimma Wia jan̄ timin̄. U nii na wii-la η si ηaa."

*Yesu dage ηii la si jan̄ chuchuoε Wia*  
*Luuk 11.2-4*

<sup>5</sup> Nii ne Yesu bira bul, “Di ma ní chuɔle Wia, ma sí nialinj síi dage ba titia nagu. Ba yie cho di ba chinj Wii-chuɔle diisinj le ari wonjbiee seme a chuchuɔle Wia di nuu-kala naba. Wutitii ne mi bulaa pima, ba paala laa ba time ne. <sup>6</sup> Ama di ma ní che di ma chuɔle Wia, má juu ma diisinj a kenj borusunj to anj sul ma Nyimma-la ma si buu na. U-na na wii-la ma si faa njɔna ne, u janj tinjma.

<sup>7</sup> Di ma ní chuɔle Wia, ma sí faasa bul wiaa yuge, ari nialinj si bi Wia jinj síi njaa nii. Ba biina ari ba síi chuɔle Wia deenj deenj nii, Wia janj nii. <sup>8</sup> Ma síba nagu. Ma Nyimma paala jinj kialinj ma síi che ne, ka ma-na pipiesu nii. <sup>9</sup> Nla ne u maga di ma chuɔle Wia: Má bul, ‘La Nyimma Wia si he Wia-  
janj,

lenj di η yirinj yire.

<sup>10</sup> Lenj di η kuorii-la kɔ.

Lenj di niaa sei η niinj tinteenj deenj le ari ba si sei Wia-janj le nii.

<sup>11</sup> Pila la jininj niinj kudiilinj

<sup>12</sup> anj jonj la haacheba chela, ari la ma si jonj la dɔnsunj tinjɔna haacheba cheba nii.

<sup>13</sup> Liisela wii-la si janj kenla he haache tuɔnj le,

liisela wu-bɔnjɔɔ le, [bɛe wiaa kuorii-la ari dolunj ari yiri-la nja η kiaa ne, læle a kaa mu deenj deenj. Ami.]’

<sup>14</sup> Di ma dɔnsunj tinjɔna ne njaa wiaa cheima le anj ka

ma jonj cheba, ma Nyimma Wia si he Wia-janj le ma janj jonj wialinj ma si njaa chei a chema. <sup>15</sup> Ama di ma ne bi wialinj ma dɔnsunj tinjɔna si njaa cheima le jonj cheba, ma Nyimma Wia ma bi janj jonj wialinj ma si njaa chei a chema.”

*Yesu dage niaa nii-vɔbunj wiaa*

<sup>16</sup> Nii ne Yesu si, “Di ma ne vɔɔ niinj, ma sí siaa kaa chei a nage nialinj síi dage ba titia. Ba yie gugolle ari losunj a kenj siaa kala chei di nuu-kala na a jinj ari baa vɔɔ niinj ne. Wutitii ne, mi bulaa pima, ba-na paala laa ba time kala dere ne. <sup>17</sup> Di ma ne vɔɔ niinj, má sɔnj ma siaa a chaase ma nyunj, <sup>18</sup> di niaa sí wuo jinj ari maa vɔɔ niinj ne see ma Nyimma Wia dunjɔnja, Nii-la ma si bi na. U-na na wii-la ma si faa njaa ne, u janj tinjma.”

*Yesu dage nii la si janj njaa a kenj kuorunj Wia-janj le*

*Luuk 12.33-34*

<sup>19</sup> Yesu bira bula, “Ma sí kiaa che bil ma titia le dunia deenj le. Dunia le pugumaa janj dii dɔnsunj anj ka dɔnsunj ma su, gaaraa ma janj juu gaa dɔnsunj. <sup>20</sup> Ama má che kiaa bil ma titia le Wia-janj le, lee-la pugumaa si bi janj wuo dii. Ba bi janj su maa, gaaraa ma bi janj wuo gaaba. <sup>21</sup> Ma tuɔbiinaa yie he lee-la ma kiaa si he ne.

*Yesu dage niaa a tige pulunj-la le*

*Luuk 11.34-36*

<sup>22</sup> N sīaa nē ŋaa ŋ yaraa pulumuŋ. Di ŋ sīaa nē zomō, ŋ yaraa kala keŋ pulumuŋ nē, <sup>23</sup> ama di ŋ sīaa bi zōŋ, ŋ yaraa kala hē birimiŋ tuōŋ nē. Di puluŋ-la nē kō birime birimiŋ, birimiŋ lim lē nē ŋ hē ŋii.

*Yesu dage nīaa di ba sí ba titia walimu a tige kudiilee ari genniŋ wīaa lē*

*Luuk 16.13; 12.22-31*

<sup>24</sup> Nuu-kala bi jaŋ wuo tiŋ tiŋtiŋŋaa a pi kuhiasin balia. U jaŋ cho dōŋō aŋ bēre dōŋō. U jaŋ tuto dōŋō niin wīaa woruŋ aŋ via dōŋō niin wīaa. N ma saa bi jaŋ wuo to Wīa aŋ bira cho dunia kiaa maa.

<sup>25</sup> Mi bulaa pīma, ma sí ma titia walimu a tige kudiile-la ma si jaŋ dii a keŋ doluŋ koo kialin ma si jaŋ nyunyua. Ma sí ma titia ma walimu a tige genni-la lē ma síi che di ma lilaale. Ma miisin nē kii kudiilee, ma yaraa ma kii genniŋ. <sup>26</sup> Má bee na diibiisin si hē wīa nyuŋ a fiŋil. Ba bi pēre, ba bi kiaa kuŋ, ba ma bi kiaa ka tuole virisin lē, ka la Nyimma Wīa si hē Wīa-jaŋ lē pipiba kudiilee. Ma nē paala keŋ liiba a kii diibiisin. <sup>27</sup> Di ma ní walimē ma titia kiaa deenba wīaa, bua-la lē ma miisin si jaŋ dēre, u bi jaŋ keŋ tapul-bala ma pē pīma. <sup>28</sup> Di ma nē saa bi tapul-bala ma wuo kaa pē ma miisin lē tapulii-la ma si jaŋ suu, bēe nē saa tii kiaa deenba wīaa wiwalimema? Má bee na tiifilaa si hē girin lē. Ba bi

tiŋ, ba bi genniŋ ma yere a lilaale, <sup>29</sup> ama ba zomō nē woruŋ. Kuoru kubala nē fa hē dimē. Baa yire Solomōŋ. U fa si hē u miisin lē, u keŋ kiaa nē woruŋ. Ama u genniŋ fa bi zomō mage tiifilaa deenba. <sup>30</sup> Wīa nē yie ŋaa yaŋ nyu a waa a zōŋ, ka u bi dieni aŋ hihil. Di u nē hila, ba yie nyige nyinin. Di Wīa nē wuo ŋaa yaŋ zōŋ ŋii, bēe nē tii ma biine ari u bi jaŋ wuo pīma kudiilee ari genniŋ? Ma yarida bi yuge. <sup>31</sup> Ma saa sí leŋe di ma walimē ma titia kudiile-la ma si jaŋ dii ari ku-la ma si jaŋ nyua ari ku-la ma si jaŋ laale wīaa. <sup>32</sup> Nialin si bi Wīa jin dunia deen lē, ba nē yie walima chiche kiaa deenba. Ma Nyimma si hē Wīa-jaŋ lē jīma ari maa che kiaa deenba kala nē. <sup>33</sup> Nii wīaa má laa sipaan a che kialin si hē Wīa kuorii-la tuōŋ a che ŋii ma si jaŋ ŋaa a keŋ tuopula u sipaan. U jaŋ joŋ kuŋkala si ka a pē pīma. <sup>34</sup> Ma saa sí ma titia walimu a tiŋ chiemiŋ wīaa. Chee kala keŋ u wiwalimia nē. Ma sí wii dōŋ kala kaa pē chee kala wiwalimii lē.

## 7

*Yesu si di la sí la dōŋsuŋ tiŋŋaa wīaa laa jin*

*Luuk 6.37-38, 41-42*

<sup>1</sup> Ma sí ma dōŋsuŋ tiŋŋaa wīaa laa jin. Di ma nē ŋaa ŋii, Wīa ma bi jaŋ joŋ cheerin pīma. <sup>2</sup> Wīa jaŋ dii ma sariya ari ŋii titia ma síi ŋaa ma dōŋsuŋ tiŋŋaa

le. Nii titia ma si jono to ma dɔnsun tinɔaa le, nii titia ne Wia ma jan jono toma le. <sup>3</sup> Ee ne η jan wuo na daa-bie si tel η naanbie siin le an bi daa-bal-la si tel η titia siin le ka na? <sup>4</sup> N bi jan wuo bula pi η naanbie a bul duu len di η liise daa-bie-la si he u siin le, an ka daa-bal-la si he η titia siin le. <sup>5</sup> N-na kanfugi tiina, laa sipaan liise daa-bal-la si he η titia siin le, ka η siaa wuo na, nii ne η ma jan wuo pe η naanbie le a liise daa-bie-la si he u siin le a pu.

<sup>6</sup> Ma si ku-zɔnɔɔ jono pi vahin, ma ma si ma ku-zɔnɔɔ jono bil toonun sipaan. Di ma ηaa nii, ba jan nuose ari ba naasin an toma harin a dinma.

*Má che kiaa, ma jan na*

*Luuk 11.9-13*

<sup>7</sup> Sul kiaa, η jan laa. <sup>8</sup> Che kiaa, η jan na. Du boro, ba jan kaa suro pin. Nii-la kala si sul kiaa Wia teen, u yie laa ne. Nii-la sii che kiaa, u yie na ne. Nii-la ma si du boro, ba yie kaa suro pu ne. <sup>9</sup> Di η bie ne piase a chiche boroboro, η jan sii a jon tabiin puu? <sup>10</sup> Koo duu ka che chenfilin, η jan jon dimin a puu? Ai, ma bi jan ηaa nii. <sup>11</sup> Di la ne bomo an jon ku-zɔnɔɔ aa pi la biirin, ee ne la Nyimma si he Wia-jan a ken wu-zɔnɔɔ bi jan jon ku-zɔnɔɔ a pi nialaa si sula chichee? <sup>12</sup> Wii-la η si cho di niaa jono njinaan le, η ma ηaa kukeri a jon nii titia a njinaaba le. Wialin

Moosis fa si ηmunsa bil di niaa tuto ari nialin fa sii bul wiaa, Wia Din-zɔn-la dolun le, wu-nyun ne wiin deen.”

*Má to boi-bie a mu Wia-jan*

*Luuk 13.24*

<sup>13</sup> Yesu bira bul, “Má to boi-bie a mu Wia-jan. Boi-la ba si to aa mu Wia nyinin, u jalia ne, wonbii-la ma venin bi hei. Niaa yuga ne a tuto wonbii-la. <sup>14</sup> Ama Wia-jan boinini muuro ne, wonbii-la ma sii mu leela, u venin heye. Niaa banmene dunɔun ne yie wuo na wonbii-la a to.

*Yesu bul wiaa a tin nialin si nyia wiaa a bul di ba ηaa nialin sii bul wiaa, Wia Din-zɔn-la dolun le*

*Luuk 6.43-44*

<sup>15</sup> Má po ma titia le ari nialin si nyia wiaa a bul di ba ηaa nialin sii bul wiaa, Wia Din-zɔn-la dolun le ne. Ba jan ko ma teen ari nizomo ba siaa le, ama ba tuon le, ba ηaa ni-bomo ne a nage gunɔun si yie kese kiaa chichan. <sup>16</sup> Ma jan to ba wu-ηaalaa le ne a jinba. Sojaamin bi chichuen ka nen, sogun-gbene ma bi tutogo nanbilaa ka nen. <sup>17</sup> Tia-la kala si ken yarifielaa, uu nen nen-zɔnɔɔ ne, ama tia-la si bi yarifielaa kene nii nen nen-lorunun. <sup>18</sup> Tia-la si ken yarifielaa bi nen-lorunun wuo nen, tia-la si bi yarifielaa kene ma bi nen-zɔnɔɔ wuo nen. <sup>19</sup> Tia-la kala si bi nen-zɔnɔɔ ka nen,

ba jaŋ kere ta a joŋo yuo he nyiniŋ tuoŋ. <sup>20</sup> Nii ne ma jaŋ to a jiŋ nialiŋ sii nyia wiaa a bul di ba ne ŋaa nialiŋ sii bul wiaa, Wia Diŋ-zoŋ-la doluŋ le.

*Nuu-kala dee bi jaŋ juu Wia kuorii-la tuoŋ*

*Luuk 13.25-27*

<sup>21</sup> Nuu-kala si yiremi, 'mi Tiina, mi Tiina,' dee bi jaŋ juu Wia kuorii-la tuoŋ, see nialiŋ sii ŋaa wialiŋ mi Nyimma si he Wia-jaŋ si daga. <sup>22</sup> Di Wia sariya che-diiliŋ ne yie, niaa jaŋ yuge a bul, 'La Tiina, la Tiina, la bul Wia wiaa a pi niaa ŋ doluŋ le aŋ kiri jiŋsiŋ niaa le ŋ doluŋ le, la ŋaa wu-magilaa ma a yuge ŋ doluŋ le.' <sup>23</sup> Ama mi jaŋ bula piba a bul, 'Mi paala bima jiŋ. Ma wu-boŋ ŋiŋaaraa, má surisa lii mi teenj!' "

*Yesu mage namaga a tige di-saaraa balia le*

*Luuk 6.47-49*

<sup>24</sup> Yesu bira si, "Nii-la kala si ko mi teenj a jegile nii mi niinŋ wiaa deenba mi si bula pima a tutoba, mi jaŋ dagema nii u si naga. U nage wu-jinna si saa u dia ne. U saau kpaginyiliŋ nyuŋ ne. <sup>25</sup> Nii ne duonuŋ nii. Liin su lerinŋ kala, pelinŋ ma lu a ŋmoo lii-la a yage dia-la, ka dia-la bi tele, beɛ wiaa ba saau woruŋ ne kpaginyiliŋ nyuŋ. <sup>26</sup> Ama nii-la ma kala si jegile nii mi niinŋ wiaa deenba mi si bula pima aŋ biba to, u nage ni-yaarinŋ si

saa u dia ne. U saau hagilibuŋbugulo tuoŋ ne. <sup>27</sup> Nii ne duonuŋ nii. Liin su lerinŋ kala, pelinŋ ma lu a ŋmoo lii-la yage dia-la, dia-la kala tel wuru."

<sup>28</sup> Yesu si bul wiaa deenba deɛ, ba ŋaa ni-dan-la kala wu-kpuŋkpere. <sup>29</sup> U biba daga a nage ba Wia teninŋ kerichiba sii dageba nii. U si dageba nii, u keŋ wii-la doluŋ ne.

## 8

*Yesu vaare gbege*

*Maak 1.40-45; Luuk 5.12-16*

<sup>1</sup> Yesu si bul wiaa deenba deɛ, u lii peelinŋ nyuŋ a ku tuu. Nii ne ni-danŋ tuto u harinŋ. <sup>2</sup> Gbege kubala ma ko u teenj a tuu kpirimi u sipaanŋ aŋ sul Yesu a bul, "Kuhianŋ, di ŋ ne cho, ŋ jaŋ wuo ŋaa di mi duori." <sup>3</sup> Nii ne Yesu liise u nisinŋ a digu aŋ bul, "Mi cho ne. Duori." Nii ne yawiil-la guu leŋ baal-la. <sup>4</sup> Nii ne Yesu bula pu a bul, "Sí wiinŋ deen bula pi nuu-kala. Ama keŋ ŋ titia mu dage nii-la si kpu pusunŋ pipi Wia duu kpu pusunŋ a pi Wia a pinŋ ari Moosis fa si dagema nii. Di ŋ ne ŋaa nii, niaa jaŋ na ari ŋ bira bi disinninŋ keɛɛ."

*Yesu vaare Rom kuhianŋ dia tiŋtinna*

*Luuk 7.1-10*

<sup>5</sup> Nii ne Yesu sii mu Kapenam di Rom laali-yuoroo kuhianŋ ku chemu a sulu duu peɛ le a bul, <sup>6</sup> "Mi kuhianŋ, mi dia tiŋtinna nii



wiilu a piŋ dia le. U bi wuo veŋ a nina heeŋ woruŋ.”

<sup>7</sup> Nii ne Yesu bula pu a bul, “Mi jaŋ ku ŋaa duu duori.”

<sup>8</sup> Ama baal-la bula pu a bul, “Mi Tiina, mi bi maga di ŋ ku juu mi dia. Ŋ-na yaa suri ŋ niin dunduŋa a bul di mi tiŋtinni-la duori, u jaŋ duori. <sup>9</sup> Mi ma paala to mi laali-yuoroo nihiasin niin ne. Laali-yuoroo doŋsuŋ ma tuto mi ma niin. Di mi ne bul di nia deen mu daha, u yie mu ne. Di mi ma ne si di nia deen ko daha, u yie ko ne. Di mi ne bula pi mi yomo duu ŋaa deen, u yie ŋaa ne.”

<sup>10</sup> Yesu si nii wiaa deenba, u ŋaau wu-kpuŋkpere. Nii ne u bula pi ni-dan-la fa sii to u hariŋ a bul, “Wutitii ne mi bulaa pima, mi ha bi yarida deen doho na Iziral tiŋteen niaa tuon. <sup>11</sup> Mi bulaa pima, niaa jaŋ yuge a lii taŋ-bubuon ari taŋ-seme kala a ko a hon Wia kuorii-la tuon di ba di Abiraham ari Aizik ari Jekob dii kudiilee,

<sup>12</sup> ama nialin fa si maga di ba he Wia kuorii-la le an bi jua, ba jaŋ jonba yuo ta jeen hariŋ di ba he birimin tuon a pina yiyel an didin ba nyilaa.” <sup>13</sup> Nii ne Yesu bula pi laali-yuori-hian-la a bul, “Mu dia, ŋ si ŋaa yarida ari wii-la, u jaŋ ŋaa.” Bua-la titia le laali-yuori-hian-la tiŋtinni-la duori.

*Yesu vaare niaa yuge*

*Maak 1.29-34; Luuk 4.38-*

<sup>14</sup> Nii ne Yesu mu Piita dia. U si jua, u na di u hiili-haala pina a wiile, u yaraa kala lin.

<sup>15</sup> Nii ne Yesu digi u nisin le. U yaraa fa si lima nii, u fiele. U sii ŋaa kudiilee piba ba dii. <sup>16</sup> Didaanin si yie, ba keŋ niaa yuge a kaa ko Yesu teen. Jiŋsin ne keŋ niaa doŋsuŋ. Yesu bul wiaa a kiri jin-bomo-la ta an vaare nialin kala fa sii wiilu. <sup>17</sup> U ŋaa wiin deen di wialin Azaaya fa si bula ku ŋaa wutitii. Azaaya fa ŋaa nii-la sii bul wiaa, Wia Din-zon-la dolun le ne. U fa bula a bul,

“U ne laa la nyanyalaa kala a chuŋ a kaa mu ta.”

*Nialin si maga di ba to Yesu hariŋ*

*Luuk 9.57-62*

<sup>18</sup> Yesu si na di ni-dan-la ku gollu, u ŋaa ba di u hari-tooroo chol fuon cholo dono.

<sup>19</sup> Nii ne Wia tenin kerichi kubala ko u teen a bula pu a bul, “Mi kuhian, mi ŋaa siri di mi to ŋ hariŋ a mu lee-na kala ŋ sii mu ne.” <sup>20</sup> Nii ne Yesu bula pu a bul, “Jollun keŋ buasuŋ ne a juuu, di-ibiisin ma keŋ dellin a juuu, ama mi-na Nuhuobiine Bie bi di-pinin kene di mi pina wiesi.” <sup>21</sup> Niaa doŋsuŋ ma fa sii to Yesu hariŋ, ba tuon kubala ma bula pu a bul, “Kuhian, len mi laa sipaan mu hugi mi nyimma.” <sup>22</sup> Nii ne Yesu bula pu a bul, “To mi hariŋ an len di suunan huhugi ba titia suunun.”

*Yesu ɲaa lii-peliŋ kere*

*Maak 4.35-41; Luuk 8.22-25*

<sup>23</sup> Nii ne Yesu juu liiŋ daboro. U haritooroo to u harin a ma mu juu, <sup>24</sup> di pel-duo kubala suomo a lulu nii a ku ɲmoo liiŋ. Nii ne lii-peliŋ to liiŋ daboro-la. Liŋ daboro-la faa che duu tuu liiŋ bubuɔŋ. Ama Yesu fa piŋ doŋ ne. <sup>25</sup> Nii ne u haritooroo mu chisu a bula pu a bul, "La Tiina, laala ta, laa che di la suu ne." <sup>26</sup> Nii ne Yesu pieseba a bul, "Bee ne tii fawulluŋ keŋma? Ma yarida bi yuge." Nii ne u sii kpia pel-la le aŋ bula pi fuo-la maa duu fiela piŋ, lerin kala guu ɲaa fuii. <sup>27</sup> U ɲaa nuu-kala wu-kpunkpere. Nii ne ba pipiese doŋɔ, "Ni-bee ne ɲla? Peliŋ ari lii-peliŋ kala tuto u niŋ."

*Yesu kiri jinsin baalaa balia le*

*Maak 5.1-20; Luuk 8.26-39*

<sup>28</sup> Nii ne Yesu sii mu tintee kubala baa yire Gadara. Lee-la fa he fuoŋ cholo ne. Di baalaa balia lii vaamaa tuoŋ a ku chemu. Jinsin ne fa keŋ baala-la. Ba nyinyaase. Nuukala fa bi wonbii-la wuo to. <sup>29</sup> Ba si na Yesu, ba guu ɲmoo niŋ a piesu, "Bee ne ɲ chiche di ɲ ɲaala le Wia Bii? N ko di ɲ dogisela nee, ka bua-la ha bi yiee?" <sup>30</sup> Di toonuŋ ma he lee-la a yuge a gollo didii kiaa. <sup>31</sup> Nii ne jinsi-la sul Yesu a bul, "Di ɲ nfi che di ɲ kirila di la lii, leŋ di la mu juu toonuŋ

deenba." <sup>32</sup> Nii ne Yesu bula piba a bul, "Ma lii." Nii ne ba lii baala-la le a mu juu toonula. Nii ne toonu-la kala sii fa a lii peel-la nyuŋ a tuu tel muga tuoŋ a suu. <sup>33</sup> Toodaara-la fa a juu taŋ-la tuoŋ a bul wii-la kala si ɲaa a pi niaa ari wii-la si ɲaa baala-la fa si keŋ jinsin le. <sup>34</sup> Nii ne nuu-kala si he taŋ-la le lii a mu duu na Yesu. Ba si mu nau, ba sulu duu lii ba tinteen le.

## 9

*Yesu vaare gberike*

*Maak 2.1-12; Luuk 5.17-26*

<sup>1</sup> Nii ne Yesu sii juu liiŋ daboro a miira chol a mu u jaŋ, <sup>2</sup> di niaa chuŋ gberiku kubala si piŋ u boɔɔ nyuŋ a kaa ko Yesu teen. Yesu si na ari ba ɲaa yarida woruŋ, u bula pi gberiku-la a bul, "Si fawulluŋ fa mi bii, mi joŋ ɲ haacheba cheŋ ne." <sup>3</sup> Nii ne Wia tenin kerichibala doŋsuŋ pipiese doŋɔ a bul, "Baala deen tuuse Wia joŋɲoo ne." <sup>4</sup> Ama Yesu jin wii-la ba fa sii biinu a pieseba a bul, "Bee ne tii maa biine wu-bomuŋ deen?" <sup>5</sup> Mi si jaŋ bul di mi joŋ u haacheba cheu ne koo mi si jaŋ bul duu sii a chuoli u boɔɔ a viiri, ba tuoŋ kubee ne ɲaa moli? <sup>6</sup> Mi jaŋ dagema ari mi-na Nuhuobine Bie keŋ doluŋ dunia le di mi wuo joŋ haacheba che niaa." Nii ne u bula pi gberiku-la a bul, "Sii a joŋ ɲ boɔɔ a mu dia." <sup>7</sup> Baal-la guu

duori a sii a mu dia. <sup>8</sup> Nidaŋ-la si na nii, fawulluŋ keŋba. Ba denne Wia ari u si wuo joŋ doluŋ nii a pi nuhuobiinee.

*Yesu yire Matiu*

*Maak 2.13-17; Luuk 5.27-*

<sup>32</sup> <sup>9</sup> Yesu si lii lee-la aa veŋ, u na lanpoo lilaaru kubala baa yire Matiu. U fa hoŋ u tiŋtinni-dia le ne. Nii ne Yesu yiru a bula pu duu sii to u hariŋ. U sii a to u hariŋ.

<sup>10</sup> Nii ne Yesu juu Matiu dia, ba di u haritooroo kala, a hoŋo didii kiaa. Lanpoo lilaaraa yuga ari haache diiree ma a ko, ba kala didii kialin. <sup>11</sup> Farisii tiŋŋaa doŋsuŋ naba a pieŋe Yesu haritooroo a bul, "Bee ne tii ma kuhian ari lanpoo lilaaraa ari haache diiree kala hoŋo didii kiaa?"

<sup>12</sup> Yesu nii wii-la ba si bula a miira bula piba a bul, "Nialin si keŋ yarifielaa, ba bi daalusuŋ njaara ka che, see nialin sii wiilu. <sup>13</sup> Ma mu a beŋ Wia tenin tuoŋ a na wii-la ba si nmuŋsa bubuoŋ. Ba nmuŋsa,

'Wia si, mi cho di ma fifa niaa nennige ne a kii ma si kpu pusun pipimi.'

Mi ko di mi yire haache diiree ne di ba leŋ ba haacheba. Nialin si keŋ tuopula mi sipaan dee mi ko di mi yire."

*Yesu dage nii-voŋbuŋ wiaa*

*Maak 2.18-22; Luuk 5.33-*

<sup>39</sup> <sup>14</sup> Nii ne Joŋ Wia lii-foori-la haritooroo ko Yesu teen

a piesu a bul, "Bee ne tii la di Farisii tiŋŋaa vuvoo niin aŋ ka ŋ haritooroo-na bi niin voo?" <sup>15</sup> Nii ne Yesu pieŋeba a bul, "Di nuu ne mu jaa haal kaa ko, ka ba duu nanŋoŋsuŋ hoŋ, u nanŋoŋsu-la tuoŋ jaŋ chei? Ai. Ama chee doŋ ne he dime, ba jaŋ keŋ baal-la kaa mu lee, aŋ ka di u nanŋoŋsu-la voo niin."

<sup>16</sup> Nii ne u bira mage namaga a piba a bul, "Nuu-kala bi jaŋ joŋ geripe-falin a kaa to geri-binin. N ne ŋaa nii, ŋ jaŋ chei geri-falii-la. <sup>17</sup> Nii titia ne nuu ma bi jaŋ joŋ si-huoŋ a he pupoi-kpaan le. N ne ŋaa nii, pupoi-la jaŋ yere, di siŋ-la kala bisa ta. Si-huoŋ maga di ŋ joŋu he pupoi-zomun le ne, di siŋ-la ari pupoi-la kala zoŋ."

*Yesu chise Juu tiŋŋaa kuhian tolo suun le aŋ pe vaare haal kubala*

*Maak 5.21-43; Luuk 8.40-56*

<sup>18</sup> Yesu fa sii bul wiaa nii, Juu tiŋŋaa kuhian kubala ko u teen a tuu kpirimi u sipaan aŋ bula pu a bul, "Mi tolo ne yie suu leele, ama ku joŋ ŋ nisin danu le duu duori."

<sup>19</sup> Nii ne Yesu to u hariŋ, ba di u haritooroo kala. <sup>20</sup> Ba sii mu nii, di haal kubala ma he dime. U fa keŋ tiŋa jisun fii ari balia ne, ka u po u bi dere. Nii ne u ko a bal Yesu hariŋ a digi u gerin niipinin le <sup>21</sup> aŋ bul u titia le, "Di mi ne digi u gerin maa, mi jaŋ duori." <sup>22</sup> Nii ne Yesu miira daase a nau a bula pu

a bul, "Mi tolo, sí fawullun fá, η yarida ne ηaa η duori." Haal-la guu duori bua-la titia le.

<sup>23</sup> Nii ne ka Yesu-na juu juu tinjaa kuhian-la dia. U jua di yo-daaraa china aa yel. <sup>24</sup> Nii ne Yesu bula piba di nuu-kala lii, di tolo-la bi suba, di u ta pin don ne. Nii ne ba kala mumomu. <sup>25</sup> Ama ba si kiri nialin kala ba lii, Yesu mu juu tolo-la dia a ken u nisin le, u sii. <sup>26</sup> Wiin deen Yesu si ηaa, u teeli tintee-la kala.

*Yesu vaare nyulimaa balia*

<sup>27</sup> Yesu si lii juu tinjaa kuhian-la dia-la le aa ven, nii ne nyulimaa balia sii a tuto u harin an faasa yire a bula pu a bul, "Yesu, Devit nihin, fála nennige." <sup>28</sup> Yesu si mu dia, nyulima-la baliamin ma to u harin juu dia-la. Nii ne u pieseba a bul, "Ma ηaa yarida ari mi jan wuo ηaa di ma duorii?" Nii ne ba bul, "Oo, la Tiina, la ηaa yarida." <sup>29</sup> Nii ne Yesu digi ba sias le an bul, "Ma si ηaa yarida ari nii jan ηaa, mi jan len duu ηaa." <sup>30</sup> Nii ne ba sias suri, ka Yesu bula piba ari siifiesin a bul, "Ma sí wiin deen bula pi nuu-kala." <sup>31</sup> Ama ba lii Yesu teen a bul wii-la kala Yesu si ηaa a teeli lerin kala.

*Yesu vaare tanin*

<sup>32</sup> Nyulima-la balia si lii dia-la le Yesu fa si he, niaa ken baal kubala si bi wiaa wuo bul a kaa ko u teen. <sup>33</sup> Nii ne Yesu kiri jimala baal-la le, baal-la suomo

bubul wiaa. U ηaa nuu-kala wu-kpunkpere. Nii ne ba bul di ba ha bi wiin deen yiri na Iziral le. <sup>34</sup> Ama Farisii tinjaa bul ari jinjin kuoro ne pu dolun duu kikiri jin-bonjon nii.

*Yesu fá niaa nennige.*

<sup>35</sup> Nii ne Yesu sii golle ta-balaa ari ta-biisin kala a dage niaa Wii-chuole diisin le a bul Wia wu-zomo-la a tige Wia kuorii-la le an pe vaare niaa nyanyal-yiriba kala. <sup>36</sup> U fa si na ni-dan-la, nennige kala kenu. U na di wiaa ne faa walimeba. Ba bi ba titia le wuo pe, a nage piesee si bi pie-daara kene. <sup>37</sup> Nii ne u bula pi u haritooro a bul, "Kukumaa yuga ne baga le di ba kun, ama tintinnaa bi yuge di ba kun kialin. <sup>38</sup> Má saa sul baga-la tiina duu he tintinnaa yuge di ba tin tintimii-la."

## 10

*Yesu yire u haritooro fii ari balia*

*Maak 3.13-19; Luuk 6.12-16*

<sup>1</sup> Nii ne Yesu yire u haritooro fii ari balia a he donjo le a piba dolun di ba wuo kikiri jinjin an pe vivaare niaa nyanyal-yiriba kala. <sup>2</sup> Nialin u si liisa yiraa ne ηla: Saamon, ba fa kenu yiyire Piita ma ne, ari u naanbie Anjuru, ari Jeems, si ηaa Zebidii bie, ari Jon. Jon fa ηaa Jeems ηaana ne. <sup>3</sup> U bira liise Filip, ari Batolomi, ari Tomas,

ari Matiu lanpoo lilaari-la, ari Alifiyas bie Jeems, ari Tadiyas, <sup>4</sup> ari Saamōŋ Zēlot, ari Judas Isikarōt, nii-la si ku ŋaa zēŋbe tiina a yallē Yesu.

*Yesu tiŋ u haritooroo fii ari balia*

*Maak 6.7-13; Luuk 9.1-6*

<sup>5</sup> Nīaa deenba fii ari balia, Yesu nē tiŋba ba lii. Ŋla nē u bula piba aŋ ka ba lii: “Ma sí nialin si bi Juu tiŋŋaa ŋaa tiŋteen mu. Ma sí Samaria tiŋteen ma mu. <sup>6</sup> Ama má mu Iziral nīaa teen, nīaa deenba lele nage piesee si lele nē a bira bi dia wenin jin. <sup>7</sup> Má mu a bul Wia kuorii-la wīaa piba a bul duu kpaŋa nē. <sup>8</sup> Má vaare nyanyal tiŋŋaa a chise sunun ŋa vaare gbeŋis ŋa kiri jin-bōŋŋo nīaa le. Ma nē ŋaa ŋii, ma sí time kala laa, bēe wīaa ma ma bi kuŋ-kala time aŋ laa. <sup>9</sup> Ma sí moribee ma joŋo hē ma gerifesiŋ le. <sup>10</sup> Ma ma sí sulli-gbaŋsin koru a kaa veŋ wonbii-la a sí genniŋ tuŋ-bulia koo nēŋtēŋŋe tuŋ-bulia laalu, ma sí daantiga ma koru. Di tiŋtinna nē tima, u maga di ba timu nē. <sup>11</sup> Di ma nē mu yi ta-bal koo ta-bie, má juu taŋ-la tuōŋ a bee che niila si jaŋ wuo laama bil a chuchua dii-bala-la le hali di bua-la ma si jaŋ lii taŋ-la le yi. <sup>12</sup> Di ma nē mu juu dia kala, má laa sipaŋ chuole dia-la nīaa a bul, ‘Dia deen nīaa jaŋ hōŋ ari yarifiēlaa.’ <sup>13</sup> Di ba nē laama, ba jaŋ keŋ yarifiēlaa. Di ba nē bima laa,

yarifiēla-la jaŋ miira ko ma teen. <sup>14</sup> Di ma mu nuu-kala teen, duu po di ma sí juu a bi ma wialin ma jegilee nii, má lii dia-la le koo taŋ-la le a kpesi ma naasin hagila ta. Ba jaŋ jin ari ba ŋaa wii nē a cheima le. <sup>15</sup> Mi bulaa pima ari sariya che-diilin, Wia jaŋ dogise taŋ-la nīaa a kii bua-la le u si dogise Sōdōm nīaa ŋii.”

*Hēe-la si jaŋ ko*

*Maak 13.9-13; Luuk 21.12-17*

<sup>16</sup> Nii nē Yesu bira bul, “Má jegile nii, ma nage pie-biisin nē. Mii tiŋma di ma guoli gungurusun tuōŋ. Má saa keŋ wu-jimin a nage diŋŋaa si keŋ wu-jimin ŋii a leŋ di ma siaa fiele a nage kokosun siaa si fiele ŋii. <sup>17</sup> Má keŋ ma titia worun ni-bōŋŋo deenba teen. Ba jaŋ keŋma kaa mu nialin si yie hilime vuvuure wīaa teen di ba dii ma sariya. Ba jaŋ viirima Wii-chuole diisin le. <sup>18</sup> A tiŋ mi wīaa, ba jaŋ keŋma kaa mu kuoroo ari taŋ kuhiasin sipaŋ di ma dii mi dāŋsia, ba di nialin si bi Juu tiŋŋaa ŋaa kala teen. <sup>19</sup> Di ba nē keŋma kaa mu di ba dii ma sariya, ma sí leŋe di ma bōisin joŋ wialin ma si jaŋ bul le a laa ma titia. Bua-la le Wia jaŋ joŋ wu-jimin a hē ma nyun le. <sup>20</sup> Wialin ma si jaŋ bul, ma dee bi jaŋ bul. Ma Nyimma Wia jaŋ leŋ di u Diŋ-zōŋ-la toma le a bul wīaa pima. <sup>21</sup> Naanbiirin jaŋ keŋ dōŋo a kaa mu tia di

ba kpu. Nyimmaba ma jan ɲaa ɲii ba biirin ɛ. Biirin ma jan ɲaa ɲii a ma keɛɛ ba nyimmaba ari ba naanɓa a kaa mu pa di ba kpu. <sup>22</sup> Nuu-kala jan berema a tin mi wiaa. Ama nii-la kala si nyalime a mu dere, Wia jan laau ta. <sup>23</sup> Di ba nii dogisema tan-la ɛ, má lii a fá mu tan donɔ. Mi bulaa pima ari ma bi jan wuo tin tintimii-la dere Iziral tasin kala ɛ, ka di mi-na Nuhuobiine Bie-na kɔ.

<sup>24</sup> Sukuuri bie bi u kerichi ka kii, nii-la sii tin tintinɲaa nuu don teen ma bi yuga kii nii-la teen u sii tin tintimii-la. Tintinna bi u kuhian ka kii. <sup>25</sup> Ama di nii-la ne gunne tintimii-la dere, u maga di ba di nii-la si dagu kala mage donɔ ne. Di ba ne saa ken dia tiina kaa yire Belizibul, ɲii-na ba jan he yiri-bonɲon a pi u dia niaa kala.

### *Nii-la si maga di la fá*

#### *Luuk 12.2-9*

<sup>26</sup> Nii wiaa, ma sí nuhuobiinee fá. Wii-kala si faa jan ku lii pulumun, niaa ma jan nii wii-la si ɲaa wu-faali. <sup>27</sup> Wii-kala mi si bula pima birimin tuon, u maga di ma bulu pulumun tuon. Wii-kala bira ba si munso bula pima birimin tuon, má heele bulu lusun nyun.” <sup>28</sup> Nii ne Yesu bira bul, “Ma sí nialin si jan wuo kpu ma yaaraa fá, niaa deenba bi ma dima wuo kpu. Ama má fá Wia. U ne ken dolun duu wuo jon ma yaraa ari ma dinɲin kala a he Wia nyinin tuon. Mi bula pima,

má fifáu. <sup>29</sup> Zaarikokobiisin balia dee ba yie jonɔ yalle kɔbu koo? Ama ba tuon kubala ma bi jan tel tin teen, see ma Nyimma Wia seye. <sup>30</sup> Wia paala jin ma nyupunaa kala ma niin ne. <sup>31</sup> Nii wiaa, ma sí leɲe di fawulun kenma. Ma ne paala kii zaarikokobiisin a yuge. <sup>32</sup> Nii-la kala si jan wuo bul niaa tuon ari u ɲaa mi nuu ne, mi ma jan bul ɲii a tigeu ɛ mi Nyimma Wia si he Wia-jan ɛ sipaan. <sup>33</sup> Ama nii-la kala si viami niaa tuon, mi ma jan viau mi Nyimma Wia si he Wia-jan ɛ sipaan.

*Yesu si duu bi dunia kɔ di niaa sin, see di ba yuo donɔ.*

*Luuk 12.51-53; 14.26-27*

<sup>34</sup> Ma fa biina di mi kɔ dunia di niaa sin neɛ? Ai, yuosun ne mi kaa kɔ. <sup>35</sup> Mi kɔ di niaa pore donɔ ɛ ne. Bie jan ken u nyimma di ba yuo donɔ. Tolo ma jan ken u naan di ba guraa yuo donɔ. Bii-haala ma jan ken u bala naan di ba guraa yuo donɔ. <sup>36</sup> Nuu dinɲonɲon paala jan he u dia-niaa tuon. <sup>37</sup> Nii-la kala si cho u nyimma ari u naan a kiimi, u bi maga duu ɲaa mi haritooru. Nii-la kala ma si cho u bie koo u tolo a kiimi, u bi maga duu ɲaa mi haritooru. <sup>38</sup> Nii-la kala si bi u titia daa-geseɛ baase a to mi harin, u bi maga duu ɲaa mi haritooru. <sup>39</sup> Nii-la kala sii che u titia miisin, u jan jon u miisin ta. Ama nii-la kala si via u miisin ta a tin mi wiaa, u jan ken miisin.

*Time-la Wia si jan jono tinla.*

**Maak 9.41**

<sup>40</sup> Nii-la kala si kenma woruḡ, u tiina kenmi ma woruḡ ne. Nii-la ma kala si kenmi woruḡ, u ken Tiina ma si tinmi woruḡ ne. <sup>41</sup> Nii-la kala si laa Wia tintinna doḡo a kenu woruḡ u dia le a tin u si ḡaa Wia tintinnu wiaa, u jan laa u time. Time-la Wia si jan jono timu, u jan mage time-la Wia si jan tin u tintinni-la. Nii-la kala ma si laa tuo-pul tiina bil a tin u si ḡaa tuo-pul tiina wiaa, time-la Wia si jan jono timu, u jan mage time-la u si jan jono tin tuo-pul tiina-la. <sup>42</sup> Nii-la ma kala si ḡaa lii-fiela pi mi haritooro deḡba tuoḡ kubie a tin u si to mi hariḡ wiaa, u tiina ma jan laa u time."

## 11

*Jooḡ Wia lii-foori-la tin niaa ba ko Yesu teen*

**Luuk 7.18-35**

<sup>1</sup> Yesu si bul wiaa deḡba a pi u haritooro fii ari bali-la deḡe, u lii lee-la a mu duu dage niaa aḡ pe bul Wia wiaa tasi-la si kpage lee-la.

<sup>2</sup> Jooḡ Wia lii-foori-la fa si he sarika le a nii wialiḡ Kirisito fa si ḡaa, u tin u haritooro doḡsuḡ Yesu teen <sup>3</sup> di ba mu pieḡe Yesu a bul, "Bula pila, ḡ ne nii-la Jooḡ fa si si u jan ko, koo la haa gberḡe nuu ma doḡ neḡ?" Nii ne ba mu pieḡe. <sup>4</sup> Ba si pieḡe deḡe, Yesu bula piba a bul, "Ma miira mu Jooḡ teen a

bula pu wialiḡ kala ma si na a nii maa. <sup>5</sup> Ma bula pu di nyulimaa siaa suri ne, gberikeḡe viverḡ, gbegisiḡ ma duduori. Tanḡaa ninii wiaa, nialiḡ si suba sisii suuḡ le. Summoo ma wuo ninii Wia wu-zoḡḡo. <sup>6</sup> Nialiḡ si bi kaa lere ari mi ne ḡaa nii-la Wia si tima, ba tuoḡ jan toḡe."

<sup>7</sup> Nii ne Jooḡ haritooro-la viiri. Nii ne Yesu suomo bul Jooḡ wiaa a pipi ni-dan-la. U pieḡeba, "Ma si mu Jooḡ teen tintee-hilii-la le, beḡ ne ma fa gberḡe di ma na? Ma mu di ma na yan peliḡ si kaa viviisi neḡ? Ai. <sup>8</sup> Beḡ ne saa ma lii di ma na? Ma lia di ma na nuu si laale geri-zoḡḡo neḡ? Ai. Bee na nialiḡ si yie laale genniḡ deḡba, ba yie juu kuori-diisiḡ ne aa nii sima. <sup>9</sup> Ma saa dagemi ku-la ma si mua di ma na. Ma mua di ma na nii-la si bul wiaa, Wia Diḡ-zoḡ-la doluḡ le neḡ? Oo, mi jan bula pima ari ma na nuu duu kii nii-la si bul wiaa, Wia Diḡ-zoḡ-la doluḡ le ne. <sup>10</sup> U-na Jooḡ wiaa ne ba ḡmuḡsa bil Wia teniḡ tuoḡ a bul di Wia si, 'Ma jegile nii mi teen, mi jan tin mi tinḡaara duu laa ḡ sipaanḡ a mu a wase wonḡbiḡ bilinḡ le.'"

<sup>11</sup> Nii ne Yesu bira bula pi niaa a bul, "Wutitii, mi bulaa pima, Jooḡ, Wia lii-foori-la ne kii nuu-kala ba si lula. Ama nii-la si ḡaa ni-bie Wia kuorii-la tuoḡ, u ne yuga kii Jooḡ. <sup>12</sup> A chinḡ bua-la le Jooḡ si suomo bubul Wia wiaa a kaa kuko tapuluḡ

deen, niaa ken Wia kuorii-la wiaa yuyuo dɔŋɔ ne, nii ne ni-duorun wiwalime di ba kaa loriko laa. <sup>13</sup> Ka di Jɔɔŋ-na kɔ, nialin fa sii bul wiaa, Wia Din-zɔŋ-la dolun le fa bul Wia kuorii-la wiaa ne. Wialin Wia si lenje ba ŋmunsa bil di niaa tuto ma dage nii ne. <sup>14</sup> Di ma ne ŋaa yarida, ma sei wialin ba si bula. Jɔɔŋ ne ŋaa Ilaaja, niila wiaa ba fa si bula duu jan kɔ. <sup>15</sup> Digilaa tinŋaa, má wuoli ma digilaa a nii wiaa deenba.”

<sup>16</sup> Nii ne Yesu bira bul, “Bee ne mi jan ken jinin niaa kaa magise? Ba nage hanbiisin sii gbieli yɔbo tuɔŋ ne. Dɔŋsun yie kpia dɔŋɔ le a bula piba a bul, <sup>17</sup> ‘La yii yiilaa ne pima, an ka ma bi gua, la yel yoho pima, an ka ma bi yel.’ <sup>18</sup> Bua-la le Jɔɔŋ si kɔ ma teen, uu vɔɔ niin ne a bi sinin ma nyua. Nii ne ba si di jin-bɔŋ ne kenu. <sup>19</sup> An ka mi-na Nuhuobiine Bie kɔ ma teen a didii kiaa an pe nyunyua sinin maa. Nii ne ba bula pi dɔŋɔ a bul, ‘Baala deen ŋaa luobii tiina ne a ŋaa si-nyuaru maa an pe ken lanpoo lilaaraa ari haache diiree kala ma kaa dii nanɔdɔŋsun.’ Nialin si sei wu-jimii-la si lii Wia teen, ba wu-ŋaalaa daga ari ba sene sei ne.”

*Tasi-la si bi Yesu wiaa laa dii*

*Luuk 10.13-15*

<sup>20</sup> Tasi-la le Yesu si ŋaa wu-magilaa yuge, ba niaa bi u wiaa laa dii, nii wiaa ba bi

birima lii ba haacheba le. Nii ne u kpiaba le a bul, <sup>21</sup> “Ma Korazin tinŋaa, ma jan na heen. Betisaada tinŋaa maa, ma ma jan na heen. Wu-magila-la ba si ŋaa ma teen, di ba ne fa ŋaaba Taya ari Saadɔŋ niaa teen ŋla, ba fa bi jan dieni an hɔɔɔ telle naasin a ŋaa tuɔrun buge ba titia, a didage nii ari ba birima lii ba haacheba le ne. <sup>22</sup> Mi bulaa pima, sariya che-diilin, Wia jan dɔgise Korazin ari Betisaada tinŋaa a kii Taya ari Saadɔŋ tinŋaa. <sup>23</sup> Ma-na Kapenam tinŋaa, ma ne paala chiche di ma ken ma titia a kaa jil Wia-jan. Wia jan jonma yuo ta ne di ma tuu juu u nyinin. Wu-magilaa deenba kala mi si ŋaa ma teen, di mi fa ŋaaba Sɔdɔm le ne, ba fa jan he dime a kaa kuko jinin. <sup>24</sup> Mi bulaa pima, sariya che-diilin Wia jan fá Sɔdɔm niaa nennige a kii Kapenam niaa.”

*Yesu bula pi niaa di ba kɔ u teen a na wiese*

*Luuk 10.21-22*

<sup>25</sup> Bua-la titia le Yesu guu yire, “Mi Nyimma, ŋ ne ŋaa wia nyun ari tinteen kala Tiina. Mii lollun ari ŋ si ken wialin ŋ si jonɔ faa a dage nialin si bi wiaa jin, an bi jonɔ dage nialin si ken wu-jimin. <sup>26</sup> Mi Nyimma, mii lollun. N titia tuɔɔrun le ne ŋ ŋaa nii.” <sup>27</sup> Nii ne u bira bul, “Mi Nyimma jon kun-kala dolun ne pimi. Mi Nyimma dunɔɔna ne jin nii mi si naga. Mi ma dunɔɔna



ne jin̄ nii mi Nyimma ma si naga. Nuu-kala bira buu jin̄, see nialin̄ dun̄dūna mi s̄ii cho di mi daga.”<sup>28</sup> Nii ne Yesu bira bula pi niaa, “Má k̄o mi teen̄, ma nialin̄ kala si l̄olo, an̄ ka wiaa nyagema bil. Mi jan̄ pima wiese.<sup>29</sup> Má laa mi chuga a chun̄ an̄ gunne mi teen̄, bæe wiaa mi ken̄ mi titia muuri ne, mi siaa ma fiele. Di ma n̄aa nii, ma jan̄ na wiese.<sup>30</sup> Chuga-la mi si jan̄ j̄ojo chun̄ma jan̄ n̄aa chugi-m̄oli, u bi yun̄.”

## 12

*Ba piẽe Yesu che-wiesii-la wiaa.*

*Maak 2.23-28; Luuk 6.1-5*

<sup>1</sup> U bi diene an̄ ka Yesu ari u haritooro s̄ii to nyon̄so бага tuon̄ che-wiesii-la cheen̄. Losun̄ fa ken̄ Yesu haritooro. Nii ne ba suomo kiile nyon̄so-la aa chan̄.  
<sup>2</sup> Farisii tin̄naa si na wiin̄ deen̄ nii, ba piẽe Yesu a bul, “N̄ bi naa? Che-wiesii-la kisin̄ ne ba chichei nii.”  
<sup>3</sup> Nii ne Yesu piẽeba a bul, “Ma bi wii-la Devit fa si n̄aa karimaa? Losun̄ fa si kenu ba di u harin̄ niaa,  
<sup>4</sup> u mu juu Wia-dia a jon̄ boroboro-la ba fa si kaa ku bil Wia sipaan̄ a ch̄oḡo dii, an̄ j̄ojo pi u harin̄ niaa maa, ba ma dii. U fa n̄aa kisin̄ ne di ni-wogo dii boroboro-la, see nialin̄ si kpu pusun̄ pipi Wia dun̄dūna. Nii-na u fa bi maga di Devit ari u harin̄ niaa dii kudiile-la.  
<sup>5</sup> Koo ma ha bi wialin̄ Moosis fa si n̄mun̄sa bil di

la tuto karimaa? Che-wiesii-la cheen̄ kala nialin̄ si kpu pusun̄ pipi Wia kuhiasin̄ fa yie chei la kisin̄ Wia-dia le. Ama ba fa si n̄aa nii che-wiesii-la cheen̄, u bi haache n̄aa.  
<sup>6</sup> Mi bulaa pima ari kun̄ ne he ma tuon̄ læle a yuga kii Wia-dia.  
<sup>7</sup> Wia tenin̄ tuon̄, ba n̄mun̄sa di Wia si, ‘Mi cho di ma fifá niaa nennige ne a kii ma si kpu pusun̄ pipimi.’

Di ma ne fa sene jin̄ wiin̄ deen̄ bubuon̄, ma fa bi jan̄ jon̄ cheerin̄ pi nialin̄ si bi wii cheye.  
<sup>8</sup> bæe wiaa mi-na Nuhuobiine Bie ne n̄aa che-wiesii-la Tiina nii.”

*Yesu vaare baal kubala nisin̄ si suba*

*Maak 3.1-6; Luuk 6.6-11*

<sup>9</sup> Nii ne Yesu lii lee-la a mu juu Wii-chuole dia,  
<sup>10</sup> di baal kubala ne nii. U nisin̄ suba ne. Niaa don̄sun̄ ma fa he dime a chiche di ba bul Yesu teen̄ ari u cheye ne. Nii ne ba piẽe a bul, “U ken̄ won̄biin̄ nee di la vaare nyanyal tin̄naa che-wiesii-la cheen̄ koo?”  
<sup>11</sup> Nii ne Yesu piẽeba a bul, “Di ma kun̄ ne ken̄ piẽe duu tel vilīn̄ le che-wiesii-la cheen̄, n̄ jan̄ liisu koo n̄ jan̄ len̄u dime duu suu? Ma jan̄ liise.  
<sup>12</sup> Nuhuobiine ne paala kii piẽe. Di la ne saa n̄aa wuz̄on̄n̄o che-wiesii-la cheen̄, la bi che-wiesii-la kisin̄-la cheye.”  
<sup>13</sup> Nii ne u bula pi na-suu-la tiina a bul, “Ken̄ n̄ nisin̄ tiene.” U kaa tiene. U fiela a nage u nisi-la don̄o.

<sup>14</sup> Nii ne Farisii tinjaa lii lee-la a mu vuure nii ba si jan njaa a kpu Yesu.

*Yesu bul wiaa a tige u titia le*

<sup>15</sup> Yesu si nia di ba vuure di ba kpuu nii, u lii lee-la. Ni-dan to u harin. Nii ne u vaare nialin fa sii wiilu kala <sup>16</sup> an bula piba di ba si lej di wiin deen teeli lerin kala. <sup>17</sup> U njaa wiin deen di wialin Azaaya fa si bula ku njaa wutitii. Azaaya fa njaa nii-la sii bul wiaa, Wia Din-zon-la dolun le ne. <sup>18</sup> U fa si, "Mi Tinjinna ne nla, nii-la mi si liisa, nii-la mi si cho, mi tuon tere u nyun.

Mi jan jon mi Din-zon-la heu le.

U jan bul mi sariya dinin wiaa a pi dunia niaa kala.

<sup>19</sup> U bi jan kaa lere, u bi jan kpia gon maa.

U bi jan njaa gon wonbiee le di niaa ninii.

<sup>20</sup> U siaa jan fiele nialin si njaa puwuoloo teen, a ken zile ni-pugunun ma teen.

U jan pese halii, see wutitii-la Wia sii che yuo dii lerin kala.

<sup>21</sup> U le ne dunia niaa kala jan jon ba yielaa he."

*Yesu ari Belizibul*

*Maak 3.20-30; Luuk 11.14-*

<sup>23</sup>

Nii ne niaa donsun ken baal kubala kaa ko Yesu teen. Jinsin ne fa ken baal-la. U fa nyulima an pe tan. Yesu vaare baal-la. Nii

ne u wuo wiaa bubul an nina maa. <sup>23</sup> Yesu si njaa nii, u fa njaa ni-dan-la kala wu-kpunkpere. Nii ne ba pipiese donjo a bul, "Devit bie ne nlaa?" <sup>24</sup> Farisii tinjaa fa si nii nii, ba bul, di jinsin kuoro Belizibul ne pu dolun, nii ne tii u wuo kikiri jinsin nii. <sup>25</sup> Yesu wuo jin ba tuobiinaa a bula piba a bul, "Di tan niaa ne he dime a bi nii-bala kene, ba tan-la jan tel. Di jan niaa koo naanbiirin ma ne bi nii-bala kene, ba dia jan tel. <sup>26</sup> Nii ne di Sitaani kiri Sitaani, u ma tan bi jan wuo chin." <sup>27</sup> Nii ne Yesu bira pieseba a bul, "Di Belizibul ne pimi dolun mi kaa kiri jin-bonjo niaa le, kubee ne saa jon dolun pi niaa deenba sii to ma harin ba ma kikiri jin-bonjo niaa le? Niaa deenba titia daga ari maa nyia ne. Ba jima ari Sitaani bi u titia wuo guraa yuo. <sup>28</sup> Wia dolun ne mi kaa kiri jin-bonjo niaa le. Wiin deen ne daga ari Wia kuorii-la paala ko ma teen ne. <sup>29</sup> Nuu tuo si jan juu ni-duon dia a gaa u kiaa, see duu ken ni-duo-la voo, an-na juu paa u kiaa. <sup>30</sup> Nuu-kala si bi mi nuu njaa, u lii mi harin ne. Nii-la kala si bi mi le pe di la kiri kiaa hihe donjo le, u kaa pisa tita ne. <sup>31</sup> Mi bulaa pima ari Wia jan jon niaa haacheba ari wu-bomola ba sii bul a cheba, ama nii-la kala si tuuse Wia Din-zon-la jonjo, Wia bi jan jonjo che u tiina. <sup>32</sup> Nii-la kala si bul wu-bonjo a mu

tige mi-na Nuhuobiine Bie le, Wia jan jonjo cheu, ama niila kala si tuuse Wia Diŋ-zoŋ-la jonŋoo, Wia bi jan jonjo che u tiina leele a kaa mu wuu."

*Tia ari u nenene.*

*Luuk 6.43-45*

<sup>33</sup> Nii ne Yesu bira bul, "Di ŋ nii che tia neŋ neŋ-zoŋŋoo, see di ŋ keŋ tia-la si keŋ yarifielaa. Di ŋ ne keŋ tia-la si bi yarifielaa kene, see duu nineŋ neŋ-lorunŋ. Tia-la nenene ne yie dage tia-la yiri u si ŋaa. <sup>34</sup> Ma ni-boŋŋoo deenba, di ma ne boŋo, ee ne ma jan wuo ŋaa a bubul wu-zoŋŋoo? N tuobiinaa si keŋ wii-la ne, u ne ŋ niin bubul. <sup>35</sup> Ni-zomun keŋ tuobiin-zoŋŋoo ne aa ŋaa wu-zom-la u sii biinu. Ni-boŋmun ma keŋ tuobiin-boŋŋoo a maa ŋaa wu-boŋo-la u sii biinu u tuoŋ le. <sup>36</sup> Mi bulaa pima ari sariya che-diilin nuu-kala paala jan dage wu-boŋo-la u niin si bula. <sup>37</sup> Wialin titia ma si bula ne jan dii ma sariya a dage di ma keŋ tuopulaa koo ma bi tuopulaa kene."

*Nialin che di Yesu ŋaa wu-magilaa*

*Maak 8.11-12; Luuk 11.29-32*

<sup>38</sup> Nii ne Wia tenin kerichiba doŋsun ari Farisii tinŋaa doŋsun ma ko Yesu teen a bula pu a bul, "La kuhian, laa che di ŋ ŋaa wu-magil ne di la na." <sup>39</sup> Nii ne Yesu bul, "Jinin niaa ŋaa ni-boŋo ne, ba bi Wia ka

fa. Ma si di mi ŋaa wu-magilin. Ai, mi bi ŋaa. Wu-magilin ma sii che, ma bi jan wuo nau, see wu-magil-la Wia fa si ŋaa a tige Jona le. <sup>40</sup> Jona fa si he chenfilibal-la tuoŋ tapulaa batori wiiheye ari titanin kala, nii titia ne mi-na Nuhuobiine Bie ma jan he vaamin tuoŋ tapulaa batori, wiiheye ari titanin kala. <sup>41</sup> Sariya che-diilin, Ninive niaa ma jan sii a jon cheerin pima worun. Bua-la le Jona ma fa si mu bul Wia wiaa pi Ninive niaa, ba birima lii ba haacheba le ne a to Wia. Mi jan bula pima ari nuu ne he ma tuoŋ a yuga kii Jona, ka ma bi sei di ma jegile nii u wiaa."

<sup>42</sup> Nii ne Yesu bira bul, "Haal kubala ne fa he dime. U dii kuorun tintee kubala le baa yire Siiba. U sii lii u jan le a mu di-bolii duu jegile nii kuoru kubala wu-jimin. U yirin ne fa Solomon. U fa keŋ wu-jimin kinkeŋ kinkeŋ. Sariya che-diilin haal-la jan sii a jon cheerin a pi jinin niaa worun. Mi jan bula pima ari nuu ne he ma tuoŋ, u yuga kii Solomon, ka ma bi sei di ma jegile nii u wiaa."

*Yesu bul wiaa a tige jin-boŋŋoo le*

*Luuk 11.24-26*

<sup>43</sup> Nii ne Yesu bira bula pi niaa a bul, "Di jin-boŋ ne lii nuu le, u yie gollo tintee-hilin le ne a chiche di-wiesin, an bi na. <sup>44</sup> U si bi lee na nii, u yie bul u titia le a bul, 'Mi jan miira mu lee-la mi si lia.' U jan miira mumu,

di disinnij tuo dia-la ɛ, ba wase u kala zɔŋ. <sup>45</sup> Nii ne u jaŋ miira lii a keŋ jin-bɔŋŋɔ balipe, kialinj si bɔmɔ kiiu, ba ma ku juu a peu ɛ. Nii harinj ɛ ne baal-la yie kperi a kii bunɓun-la. Nii titia ne u ma jaŋ ŋaa ma jiniŋ ni-bɔŋŋɔ deenba ɛ.”

*Yesu bul wiaa a tige u naaŋ ari u naaŋbiirinj ɛ*

*Maak 3.31-35; Luuk 8.19-21*

<sup>46</sup> Yesu fa si bul wiaa pipi nialinj nii, u naaŋ ari u ŋaanaa kɔ u teenj a ku chin jeen harinj a chiche di ba nau. [ <sup>47</sup> Nii ne nuu bula pu a bul, “Bee na, ŋ naaŋ ari ŋ ŋaanaa ne chin jeen harinj a chiche di ba naŋ.”

<sup>48</sup> Nii ne Yesu miira pieŋeba a bul, “Kubee ne ŋaa mi naaŋ ari mi ŋaanaa?” ] <sup>49</sup> Nii ne u liise u nisiŋ a dage u haritooroo aŋ bul, “Mi naaŋ ari mi naaŋbiirinj ne ŋla: <sup>50</sup> Nii-la kala si ŋaa wii-la mi Nyimma Wia si he Wia-jaŋ ɛ si cho, u ne ŋaa mi ŋaana ari mi dihaala ari mi naaŋ.”

## 13

*Yesu mage namaga a tige baal-la si dyu kias ɛ*

*Maak 4.1-9; Luuk 8.4-8*

<sup>1</sup> Tapulii-la titia Yesu lii dia-la ɛ ba di u haritooroo fa si hoŋɔ, a sii mu mugi-balin niinj a hoŋ dime duu dage niaa. <sup>2-3</sup> Niaa yuge a ku gollu chu. Ba si yuga nii, u sii mu juu liinj daboro tuɔŋ a hoŋ liinj tuɔŋ, ka ni-dan-la chin

muga niinj. Nii ne u mage namagaba a dageba wiaa yuge. U namagaba-la doŋɔ ne ŋla: Yesu si, “Baal kubala ne sie a keŋ u ku-doho kaa lii duu mise. <sup>4</sup> U sii mise nii, ku-doho-la doŋsun tel wonbiinj tuɔŋ. Diibiisinj ku tuɔsa dii. <sup>5</sup> Doŋsun ma tuu tel kpaginy-ilin nyun. Hagila si bi yuge nii, ka ba guu nyu. <sup>6</sup> Ba naapoloo bi tinteenj jua. Wia poŋe a kpuba, ba suu, bee wiaa ba naapoloo bi tinteenj jua. <sup>7</sup> Ku-doho-la doŋsun ma tel soŋsun tuɔŋ. Ba nyu, soŋsu-la ma nyu a nyaga kpu. Ba bi wasa. <sup>8</sup> Ama ku-doho-la doŋsun ma lii tel tintee-zomun ɛ a nyu a waa a wase worun. Doŋsun he biee zɔɔ zɔɔ, doŋsun ma mahinj batori batori, doŋsun ma mara ari fii fii.” <sup>9</sup> Yesu si mage namaga-la dere, nii ne u bul, “Digilaa tinŋaa, má wuoli ma digilaa a nii wiaa deenba.”

*Yesu dage u haritooroo wii-la si tii u yie mimage namagaba*

*Maak 4.10-12; Luuk 8.9-10*

<sup>10</sup> Nii ne Yesu haritooroo kɔ u teenj a piesu a bul, “Bee ne tii ŋ yie keŋ namagaba a didage niaa?” <sup>11</sup> Nii ne Yesu bula piba a bul, “Ma niaa deenba ne Wia dage u kuorii-la wiaa bubuɔŋ pa, wialinj fa si faa, ama ni-dan kala dee. <sup>12</sup> Nii-la kala si to Wia niinj wiaa, Wia jaŋ faasa peu ɛ worun. Nii-la ma si bi Wia niinj wiaa ka to, Wia bi jaŋ peu ɛ. U si peu ɛ mua-la maa, u jaŋ laa u kua.

13 Wii-la si tii mi yie mimage namagaba ne ɲla: Ba yie nyilimi nyilimi ne aɲ bi kuɲ-kala wuo na, a jjegili wiaa aɲ bi wii-kala ka nii aɲ bi wialin bubuɔɲ ma wuo jin. 14 Wia si to Azaaya le a bul wialin, ba wiaa ne u bul nii. Ba ku ɲaa wutitii. Azaaya fa ɲaa nii-la sii bul wiaa, Wia Din-zɔɲ-la dolun le ne. U fa bula a bul,

‘Niaa deenba jan jegili jegili wiaa aɲ bi wii-kala bubuɔɲ wuo jin,  
ba jan nyilimi nyilimi aɲ bi kuɲ-kala wuo na,

15 beɛ wiaa ba bi wu-jimin kene Wia teen, ba via Wia niin wiaa ne,  
ba to ba digilaa ma ne di ba si wii-kala nii a ken ba siaa ma to di ba si kuɲ-kala na.

Wia si di nii dee, ba fa jan nina,  
ba digilaa ma fa ninii wiaa.  
Ba fa jan jin wiaa bubuɔɲ

a birima ko mi teen di mi vaareba.’

16 Ma-na, ma tuɔɲ toɔ ari ma wuo nina wialin kala ma sii na a wuo nii wialin maa.

17 Mi bulaa pima ari nialin fa sii bul wiaa, Wia Din-zɔɲ-la dolun le, ari nialin doɲsun fa sii to Wia, ba yuga a cho di ba nina wialin ma sii na aɲ bi wuo na, a ma fa cho di baa nii wialin ma sii nii, aɲ ka ba bi wuo nii.

*Yesu dage ku-duuro namaga-la bubuɔɲ*

*Maak 4.13-20; Luuk 8.11-15*

18 Má jegili a nii ku-duuro namaga-la bubuɔɲ. 19 Nialin si yie nii Wia niin wialin a mu tige Wia kuorii-la le aɲ bi ba bubuɔɲ jin, ba nage ku-doho-la si tel wonɲiin le ne. Sitaani yie guu ko a ken wialin a liiri ba tuɔsaa le.

20 Kialin ma si tel kpaginyilin nyun ma ne ɲaa nialin si yie guu a laa Wia niin wialin dii ari tuɔtoɔrun. 21 Ama ba bi boye kene a nage naapoloo si bi tinteen jua. Ba jan sei wii-la a tou mu mage nii. Di heɛɲ ne juuba, koo di ba to naasin dudogiseba a tin wii-la wiaa, ba tuɔɲ guu lii wii-la le. Ba joɲo ta.

22 Kialin si tel soɔsun tuɔɲ ma ne ɲaa nialin si yie nii Wia niin wialin, ama dunia kiaa wiaa walimeba, ba cho di ba jigi aa che kuɲ-kala. A tin wiaa deenba, ba bi sei di ba to wialin. Wialin bi doho kene ba teen. 23 Kialin si tel tintee-zomun le ma ne ɲaa nialin si yie nii Wia niin wialin a jin ba bubuɔɲ, wialin ken doho kinken kinken ba teen, doɲsun neɲ zolo zolo, doɲsun mahin batori batori, doɲsun ma mara ari fii fii.”

*Yesu mage namaga a tige бага si ken yan le.*

24 Nii ne Yesu bira mage namaga doɲo a piba a bul, “Wia kuorii-la nage baala si sie ne a duu miirin u бага

13:25 Titan kubala niaa kala si piŋ doŋ, u diŋdɔmɔ keŋ yaŋ kaa mu dɔu he baga-la ɛ aŋ viiri. 26 Miiri-la si suomo nyu a ninen, yaŋ-la ma nyu. 27 Nii ne baal-la tiŋtinnaa mu a na baga-la a miira ku bula pi baal-la a bul, 'La kuhian, ŋ dɔu ku-zɔŋŋɔɔ ne ŋ baga-la ɛ, ka nii ne yaŋ-la ma nyu baga-la ɛ?' 28 Nii ne ba kuhian-la bula piba a bul, 'U naga ari mi diŋdɔŋ ne ŋaa ŋii.' Nii ne u tiŋtinna-la piɛsu a bul, 'Nŋ che di la mu a churi yaŋ-la ta neɛ?' 29 Nii ne baal-la bul, 'Ai, má leŋ di miiri-la bii. Di ma ne mua di ma churi yaŋ-la leɛle, ma jaŋ pe churi miiri-la dɔŋsuŋ ma ta. 30 Di miiri-la ne bia, mi jaŋ leŋ di nialin sii mu baga di ba laa sipaan churi yaŋ-la a vɔɔ a nyige, aŋ-na kuŋ miiri-la kaa ku he mi vire ɛ.' "

*Yesu mage namaga a mu tige ku-doho kubala baa yire masitad ɛ*

*Maak 4.30-32; Luuk 13.18-19*

31 Nii ne Yesu bira mage namaga dɔŋɔ a bul di Wia kuorii-la nage baal kubala ne si joŋ ku-doho kubala baa yire masitad a dɔu u baga ɛ. 32 Ku-doho-la bi wii maga. U ne muuro kii ku-doho-na kala si he dime. Ama duu ne nyua, u yie waa a birime tia ne a yuga kii baga ku-duuloo kala kala. Nii ne diibiisin yie sageu ɛ a sua ba dellin u naakelee ɛ.

*Yesu mage namaga a mu tige si-burun ɛ*

*Luuk 13.20-21*

33 Yesu bira mage namaga dɔŋɔ a piba a bul, "Wia kuorii-la nage si-burun ne ba si kaa hihe munun ɛ. Haala joŋ munun a he tasi-gbaŋa tuɔŋ a joŋ si-burun a kaa kuosi. U dieni mua, ka mun-la sii puɔra sɔ tasi-gbaŋa-la kala."

*Yesu dage niaa namagaba Maak 4.33-34*

34 Di Yesu ne fa bul wii-kala pipi ni-dan-la, namaga ne u yie mage. U bi jaŋ bul wii di u bi namaga maga. 35 U ŋaa ŋii di wialin nuu fa si bula, Wia Diŋ-zɔŋ-la dolun ɛ, ku ŋaa wutitii ne. U fa si, "Di mi ne bul wiaa pipi niaa, mi jaŋ mage namagaba, mi jaŋ bul wialin si ŋaa wu-faalaa a chin dunia di-suomun a piba."

*Yesu dage namaga-la u si maga a tige yaŋ ɛ bubuɔŋ*

36 Yesu si ta ni-dan-la, ba viiri, ka u sii juu dia. Nii ne u haritooro ko u teen a piɛsu a bul, "Dagela namaga-la ŋ si maga a tige baga yaŋ ɛ bubuɔŋ." 37 Nii ne Yesu bul, "Nii-la si dɔu miiri-la ne ŋaa mi-na Nuhuobiine Bie. 38 Baga-la ɛ u si dɔu miiri-la, u ne ŋaa dunia. Miiri-la ma ne ŋaa nialin si jaŋ juu Wia kuorii-la tuɔŋ. Yaŋ-la ma si nyu baga-la ɛ ne ŋaa Sitaani niaa. 39 Diŋdɔŋ-la si dɔu yaŋ-la ne ŋaa Sitaani. Miiri-la ma kumun ne ŋaa dunia diderin. Nialin ma

si kuŋ miiri-la ne ŋaa Wia tinɗaaraa. <sup>40</sup> Nii ba si hiesi yan-la a nyige, nii titia ne jan ŋaa dunia diderinj. <sup>41</sup> Mi-na Nuhuobiine Bie, mi jan tin mi tinɗaaraa di ba juu Wia kuorii-la tuɗŋ a tuɗse nialinj si ŋaa haache tinŋaa, ari nialinj kala si ŋaa wu-bɔŋŋɔɔ <sup>42</sup> a joŋo yuo a he Wia nyininj tuɗŋ. Lee-la ne ba jan yel an pe didinj ba nyilaa. <sup>43</sup> Ka di tuɗpul tinŋaa tutul ari wii-pɔsunj sii tul nii la Nyimma Wia kuorii-la tuɗŋ. Digilaa tinŋaa, má wuoli ma digilaa a nii wiaa deenba.”

*Baal-la si pere baga a mol kias*

<sup>44</sup> Yesu bira bul, “Wia kuorii-la nage ŋla ne: Baal kubala ne mu a pipere baga a na di selime he baga-la le. U si na selime-la, u gbaa to, u tuɗŋ kala faasa tore kinkeŋ. Nii ne u mu yalle u kias kala a keŋ moribie-la a kaa mu yoo baga-la.”

*Yesu bira mage namaga a mu tige busiinj le*

<sup>45</sup> Yesu bira si di Wia kuorii-la nage bayala si mua di u yoo busiaa ne. <sup>46</sup> U si na doŋo duu faasa zɔŋ kinkeŋ, u miira mu joŋ u kias kala u si kene a yalle a yoo busii-la.

*Yesu mage namaga a tige joŋ le*

<sup>47</sup> Yesu bira si di Wia kuorii-la nage joŋ ne, ba si joŋo yuo he mugi-balinj tuɗŋ. U keŋe cheŋfili-yiriba kala. <sup>48</sup> Di cheŋfilee ne suo, cheŋfili-kpuura-la yie

kaa lere lii mugi-balinj niinj ne a tuɗse cheŋfilee-la. Ba yie tuɗse ku-zɔŋŋɔɔ he ba kias le an joŋ kialinj si bi zɔŋ a yuo ta. <sup>49</sup> Nla ne saa u jan nage dunia diderinj. Wia tinɗaaraa jan lii a tuɗse ni-bɔŋŋɔɔ ni-zɔŋŋɔɔ tuɗŋ <sup>50</sup> a joŋba yuo he Wia nyininj le. Dime ne ba jan yel an didinj ba nyilaa.

*Yesu mage namaga a tige baal-la si keŋ kias u vire le*

<sup>51</sup> Nii ne Yesu piɛse u haritooro a bul, “Ma jin wiaa deenba kala bubuɗŋ neŋ?” Nii ne ba si, “Oo.” <sup>52</sup> Nii ne Yesu bula piba a bul, “Wiinj deen daga ari nii-la kala si gunne Wia teninj woruŋ a ku ŋaa Yesu haritooru a ŋaa siri duu juu Wia kuorii-la tuɗŋ, u tiina nage dia tiina si yie chaare mii-binaa ari miifalaa ne u vire le.”

*Ba via Yesu Nazaret le  
Maak 6.1-6; Luuk 4.16-30*

<sup>53</sup> Yesu si mage namaga deenba dere, u sii Kapenam le <sup>54</sup> a miira mu Nazaret. Nii ne u mu dage niaa Wiichuɔle dia le. Nialinj kala si nii wialinj u si bula, ba hiriki. Nii ne ba pipiɛse doŋo, “Nii ne baala deen na wu-jiminj deen ari wu-duoruŋ deenba kala ŋaaninj? <sup>55</sup> Josef, kapinta-la bie dee nii? Meeri dee bi u naan ŋaa? Jeems ari Josef ari Saamonj ari Judas u naanbiirinj dee nii? <sup>56</sup> Ba di u dihaalaa kala dee daha nii? Nii le ne saa u na wiaa deenba kala?” <sup>57</sup> Nii ne ba na baaninj u nyuŋ. Nii

ne Yesu bula piba a bul, "Nii-la sii bul wiaa, Wia Diŋ-zoŋ-la doluŋ le, duu ne mu lee-kala, ba yie zizilu ne, aŋ ka u jaŋ-niaa siin buu ka su." <sup>58</sup> A tin ba si bi yarida keŋe wiaa, u bi wu-duoruŋ wuo ŋaa yuge lee-la.

## 14

*Jooŋ Wia lii-foori-la suba  
Maak 6.14-29; Luuk 9.7-9*

<sup>1</sup> Bua-la le ne Galilii kuoro Herod nii Yesu wiaa. <sup>2</sup> U bula pi u nanzooba ari Jooŋ Wia lii-foori-la ne nii. Wia ne chisu suuŋ le, nii ne tii u keŋ doluŋ a wuo ŋŋaa wu-magilaa deenba. <sup>3</sup> Herod-la fa sie a mu jaa haal kubala. U yiriŋ ne Herodias. U fa ŋaa u ŋaana Filip haala ne. U laa jaa. <sup>4</sup> Nii ne Jooŋ bula pi Herod a bul, "Ŋ si keŋ ŋ ŋaana haala laa jaa nii, u bi wonbiin ŋaa." <sup>5</sup> Nii ne Herod faa che duu kpu Jooŋ, ama u faa fá Juu tinŋaa ne. Nii wiaa u ŋaa ba keŋu to dia. Juu tinŋaa fa si di Jooŋ ŋaa nii-la sii bul wiaa, Wia Diŋ-zoŋ-la doluŋ le ne. <sup>6</sup> Nii ne Herod che-lulluŋ tapuluŋ bira yi. U yire u niaa di ba ku gbieli. Herodias tolo ma ko a gua ba kala sipaan, Herod beŋ a chou. <sup>7</sup> Nii ne u bula pi tolo-la a bul, "Mi ŋmiesa, mi jaŋ piŋ kuŋ-kala ŋ sii che." <sup>8</sup> Nii ne tolo-la mu bul wiin deen a pi u naan aŋ piesu, "Mi bul di mii che beŋ kuŋ ne?" Nii ne u naan bula pu duu bul duu che duu keri Jooŋ Wia lii-foori-la nyuŋ a he pirata le ne a pu. Tolo-la

bul nii. <sup>9</sup> Kuoro si nii wii-la, u tuoŋ kala chei. Ama u si ŋmiesa nii, niaa kala nii. Nii ne u bul di ba ŋaa nii tolo-la sii che. <sup>10</sup> U ŋaa ba mu keri Jooŋ nyuŋ sarika le, <sup>11</sup> a he pirata le a kaa ku pi tolo-la. Nii ne u laa a kaa mu pi u naan. <sup>12</sup> Jooŋ haritooro-la si nii wii-la, ba sii ku laa u ku-suun a kaa mu hugi. Nii ne ba mu bula pi Yesu wialin si ŋaa.

*Yesu pi niaa bui banon  
kudiilee*

*Maak 6.30-44; Luuk 9.10-17; Jooŋ 6.1-14*

<sup>13</sup> Yesu si nii Jooŋ wiaa, u sii lee-la u fa si he a juu liin daboro a mumu niaa si tuo lee-la, u dunduŋa. Ama niaa nii Yesu wiaa a lii ba jaŋ le a ven naasin le a kiri u hariŋ. <sup>14</sup> Yesu si mu lii liin daboro-la le, u na ni-dan di ba hono gberu. Nennige kala keŋu. Nii ne u vaare nialin sii wiilu. <sup>15</sup> Didaanin ku yi, u haritooro ko u teen a bula pu a bul, "Tan bire ne. Lerin deen ŋaa girin ne. Ta nialin di ba mu tasi-la si kpage daha a yoo kudiilee a dii." <sup>16</sup> Nii ne Yesu bul, "Ma si leŋe di ba viiri. Má-na mu che kudiilee piba di ba dii." <sup>17</sup> Nii ne u haritooro-la bul, "Ku-la kala la si keŋe ne boroboroba banon ari cheŋfilee balia." <sup>18</sup> Nii ne Yesu bul, "Má kaa ko pimi." <sup>19</sup> U ŋaa nialin tuu hon yan nyuŋ. Nii ne u laa boroboroba banon-la ari cheŋfilie-la balia a wula beŋ wia nyuŋ aŋ lolle Wia



an̄ kaa chõge chõge a pi u haritooroo. U haritooroo laa kpa a nialinj. <sup>20</sup> Nuu-kala dii a võge. Ka u haritooro-la paa ku-kaan̄-biisin̄ a sũ sin̄sin̄ fii ari balia. <sup>21</sup> Nialinj fa si dii boroboro-la, ba tuõnj baalaa fa ñaa bui banõnj ne.

*Yesu ven̄ lij nyun̄*

*Maak 6.45-52; Jõõnj 6.15-21*

<sup>22</sup> Nii ne Yesu len̄ u haritooroo laa sipaan̄ mu juu lijn̄ daboro a duoro chol muga cholo, an̄ ka duu ta ni-dan̄-la di ba viiri. <sup>23</sup> U si ta ni-dan̄-la ba viiri, u mu jil peelin̄ nyun̄ duu chuõle Wia. Nii ne wia tuu juu, duu dun̄dun̄a ne ha he peel-la nyun̄. <sup>24</sup> Bua-la le di lijn̄ daboro-la yi lijn̄ tutuõbaaninj. Lii-pelin̄ kaa viviisi, ba fa chaase pel-la ne. <sup>25</sup> Siipuuraa, Yesu sii ven̄ lijn̄ nyun̄ a mumu u haritooro-la teen̄. <sup>26</sup> Ba si nau duu ven̄ lijn̄ nyun̄, fawullun̄ ken̄ba. Ba bul di ni-dima ne. Fawullun̄ si ken̄ba ñii, ba ñmun̄moo niinj. <sup>27</sup> Nii ne Yesu guu bula piba a bul, "Má nyire ma bõye. Mi-na ne. Ma sí leje di fawullun̄ ken̄ma."

<sup>28</sup> Nii ne Piita bul, "Mi Tiina, di ñ ne, bul di mi lii kõ ñ teen̄ lii-la nyun̄." <sup>29</sup> Nii ne Yesu bul duu kõ. U si bul ñii, Piita lii lijn̄ daboro-la tuõnj a ven̄ lijn̄ nyun̄ aa mu Yesu teen̄. <sup>30</sup> Ama Piita si bee na lii-pel-la, fawullun̄ ken̄u. U suomo tutuu lii-la bubuõnj. Nii ne u faasa ñmoo niinj a bul, "Mi Tiina,

laami ta." <sup>31</sup> Yesu guu liise u nisin̄ a yia a kenu an̄ bula pu, "Ñ yarida bi yuge. Bëe ne tii ñ bi mi wiaa laa dii?" <sup>32</sup> Ba si mu juu lijn̄ daboro-la dëre, pel-la kere. <sup>33</sup> Nialinj kala si he lijn̄ daboro-la tuõnj tuu kpirimi a chuõle Yesu an̄ bul, "Wutitii, ñ ne ñaa Wia Bie."

*Yesu vaare nyanyal tiina Genezaret le*

*Maak 6.53-56*

<sup>34</sup> Nii ne ba chol a ku yi tan̄ kubala baa yire Genezaret. <sup>35</sup> Nii ne nialinj si he lee-la yie jin̄ Yesu. Nii ne ba mu paa ba nyanyal tin̄jaa kala si he tasi-la si golli Genezaret a kaa kõ Yesu teen̄. <sup>36</sup> Ba sulu duu len̄ di nialinj sí wiilu digi u gerinj niipinin̄ le. Di ba ne dige, ba yie duori.

## 15

*Yesu bul wiaa a tige niaa naabalimaba won̄biinj le*

*Maak 7.1-13*

<sup>1</sup> Nii ne Farisii tin̄jaa dõnsun̄ ari Wia teninj kerichiba lii Jerusalem a kõ Yesu teen̄ a piesu a bul, <sup>2</sup> "Bëe ne tii ñ haritooroo chichei la naabalimaba kisinninj le? Bëe ne tii ba bi ba nisaa ka sõnj ñii la naabalimaba si dagela an̄ didii kudiilee?" <sup>3</sup> Nii ne Yesu ma pieseba a bul, "Bëe ne tii ma yie via Wia won̄biinj an̄ tuto ma naabalimaba won̄biinj? <sup>4</sup> Wia bula di ma fifá ma nyimmaba ari ma naan̄ba, a bira bul di nuu ne sii a bul wu-bõnj a tige

u nyimma ari u naan̄ lɛ, di ba kpu tiina. <sup>5</sup> Ama ma-na daga ari nuu nɛ kɛŋ kuŋ a mage duu joŋo pɛ u nyimma koo u naan̄ lɛ, tiina mu a bula piba duu jaŋ joŋ ku-la pi Wia. <sup>6</sup> U si ŋaa ŋii, u bira bi maga duu pɛ u nyimma ari u naan̄ lɛ. A tiŋ ŋii wiaa, ma via Wia niin̄ wiaa aŋ to ma naabalimaba won̄biin̄ nɛ. <sup>7</sup> Ma ŋaa kan̄fugi timma nɛ. Azaaya kiaa sima nɛ, wialin̄ u si bula a tigema lɛ. Azaaya fa ŋaa nii-la sii bul wiaa, Wia Diŋ-zɔŋ-la dolun̄ lɛ nɛ. <sup>8</sup> U fa si,

‘Wia si, niaa deen̄ba kɛŋ niin̄ nɛ a pipimi zile,  
ka ba tuɔŋ liimi.

<sup>9</sup> Ba yie chuɔlemi pei nɛ aa dage nuhuobiine wenin̄ aŋ bul di Wia nɛ bula.  
Nuhuobiine wenin̄ nɛ baa to aŋ via Wia niin̄ wiaa.’ ”

*Kialin̄ si yie ŋaa nuhuobiine kɛŋ disinnin̄*

*Maak 7.14-23*

<sup>10</sup> Nii nɛ Yesu yire niaa ba kɔ. U bula piba a bul, “Má jegile nii worun̄. <sup>11</sup> U bi naga ku-la si yie to nuhuobiine niin̄ tuu nɛ yie ŋaa u kɛŋ disinnin̄, ama ku-la si yie to u niin̄ lii nɛ kɛŋ disinnin̄.” <sup>12</sup> Nii nɛ Yesu haritooro kɔ u teen̄ a bula pu a bul, “N̄ jima ari ŋ chei Farisii timma-la tuɔŋ nɛ ŋ si bul ŋii?” <sup>13</sup> Nii nɛ u bula piba a bul, “Tia-la kala mi Nyimma si hɛ Wia-jaŋ si yie bi chɔŋsɔ, ba jaŋ kaa churo

ta. <sup>14</sup> Ma sí len̄e di ba wiaa wiima, ba ŋaa nyulimaa nɛ a laa nyulimaa sipaan̄. Di nyulima nɛ saa kɛŋ u nyulun̄ dɔŋɔ daan̄ lɛ, ba kala balia jaŋ tuu buɔtuon̄.” <sup>15</sup> Nii nɛ Piita bul, “Dagela namagala bubuɔŋ.” <sup>16</sup> Nii nɛ Yesu bul, “Ma ma ha bi wu-jimin̄ kenɛɛ? <sup>17</sup> Ma bi wiin̄ deen̄ bubuɔŋ jin̄? Kuŋ-na kala si juu nuhuobiine niin̄, u yie juu u luorun̄ nɛ a bira to u yaraa lii. <sup>18</sup> Ama wialin̄ si yie to ŋ niin̄ lii, ba yie lii ŋ tuɔŋ lɛ nɛ. Wiaa deen̄ba nɛ yie ŋaa niaa kɛŋ disinnin̄. <sup>19</sup> N̄ tuɔŋ lɛ nɛ ŋ yie biine wu-bɔŋŋɔŋ ŋaanin̄ a mu kpu niaa, a mu che niaa haalaa, a ŋaa ba-chɔrun̄ ari ha-chɔrun̄ wu-ŋaalaa, aa gaa, aa nyia wiaa a tige niaa lɛ, a chichei niaa yirin̄. <sup>20</sup> Wiaa deen̄ba nɛ yie ŋaa niaa kɛŋ disinnin̄. Ama di nuu nɛ dii kiaa aŋ bi u nisin̄ somɔ ari ma naabalimaba si dage ŋii, ŋii bi jaŋ wuo ŋaa di tiina kɛŋ disinnin̄.”

*Yesu vaare Keenan̄ tiina*  
*Maak 7.24-30*

<sup>21</sup> Nii nɛ Yesu sii lee-la a mu Taya ari Saadɔŋ tin̄teen̄. <sup>22</sup> Di haal kubala si hɛ lee-la kɔ u teen̄. U fa ŋaa Keenan̄ tiina nɛ. U si kɔ u teen̄, ŋii nɛ u bul, “Mi Tiina Devit bii, fámi nennige. Jirsin̄ nɛ kɛŋ mi tolo. U nina hɛɛŋ worun̄.” <sup>23</sup> Ama Yesu bi wii-kala bula u teen̄. Nii nɛ u haritooro kɔ u teen̄ a bula pu duu len̄ di haal-la viiri, di u to ba harin̄ a ŋiŋaa gon̄

ne. <sup>24</sup> Nii ne Yesu bula piba a bul, "Wia tin̄mi di mi k̄o che keŋe pieŋe-la si lele ne Iziral tin̄ŋaa dūndūŋ ne nii." <sup>25</sup> Nii ne haal-la ku tel u naasiŋ le aŋ bul, "Mi Tiina, p̄emi le." <sup>26</sup> Nii ne Yesu bula pu a bul, "N̄ ne keŋ haŋbiisiŋ, ŋ bi jaŋ joŋ ba kudiilee a yuo pi vahiŋ." <sup>27</sup> Nii ne haal-la bul, "Mi Tiina, u ŋaa wutitii ne, ama vahi-la tin̄ŋaa s̄ii dii kialiŋ, kialiŋ si tel tin̄teen ne, ba ma jaŋ paa didii." <sup>28</sup> Nii ne Yesu bula pu a bul, "N̄ ŋaa haal-la si keŋ yarida kin̄keŋ ne. Wii-la ŋ s̄ii che, mi jaŋ ŋaa piŋ." Bua-la titia le u tolo-la duori.

*Yesu vaare niaa yuge*

<sup>29</sup> Nii ne Yesu bira s̄ii lee-la a to Galilii muga-la diiriŋ mu. U jil peeliŋ nyuŋ a hoŋ dime. <sup>30</sup> Nii ne ni-dan̄ k̄o u teen̄ a keŋ gberikee ari nyulimaa ari tan̄ŋaa ari nyanyal tin̄ŋaa doŋsuŋ a kaa k̄o bil Yesu naasiŋ le. U vaareba. <sup>31</sup> Ni-dan̄-la si na tan̄ŋaa di ba bul wiaa ari gberikee s̄ii veŋ, ari nyulimaa siaa di ba bira suro, u ŋaaba wu-kpuŋkpere. Nii ne ba didenne Iziral tin̄ŋaa Wia.

*Yesu pi niaa bui banese kudiilee*

*Maak 8.1-10*

<sup>32</sup> Nii ne Yesu yire u haritooro a bula piba a bul, "Mi si beŋ niaa deŋba, nennige keŋmi ne. Ba he mi teen̄ tapulaa batori ne ŋla aŋ bi kudiilee na di ba dii. Mi bi sei di ba viiri di ba ne bi kuŋ-kala die. Di mi ŋaa

nii, ba jaŋ mu yiegi woŋbiin le." <sup>33</sup> Nii ne u haritooro pieŋe, "Ee ne la jaŋ ŋaa a na kudiilee di ni-dan̄-la kala dii giriŋ deŋ tuoŋ?" <sup>34</sup> U pieŋeba, "Boroboro baŋm̄ee ne he dime?" Ba si, "Kiaa balipe ne ari cheŋfili-biisiŋ ma mua." <sup>35</sup> Nii ne u ŋaa nialiŋ tuu hoŋ tin̄teen. <sup>36</sup> Ka u joŋ boroboroba-la balipe ari cheŋfilie-la a lolle Wia aŋ kaa choŋe choŋe a pi u haritooro di ba laa kpaani-dan̄-la. Ba laa kpaaba. <sup>37</sup> Nuu-kala dii a voŋe. Ka ba paa ku-kaŋ-biisiŋ a su siŋsiŋ balipe. <sup>38</sup> Nialiŋ fa si dii kialiŋ, ba yi baalaa bui banese, ka haalaa ari haŋbiisiŋ ma he dime. <sup>39</sup> Nii ne u ta ni-dan̄-la aŋ mu juu liiŋ daboro aŋ mu Magadan tin̄teen.

## 16

*Nialiŋ che di Yesu ŋaa wu-magilin*

*Maak 8.11-13; Luuk 12.54-56*

<sup>1</sup> Nii ne Farisii tin̄ŋaa ari Sadiusii tin̄ŋaa doŋsuŋ k̄o Yesu teen̄ di ba magisu. Ba bula pu duu ŋaa wu-magilin di ba na a jin̄ ari u dol-lai Wia ne. <sup>2</sup> Nii ne u bula piba a bul, "Di wia n̄ii juu, ka ma na wii-muluŋ siin̄ duu fiŋsa, ma yie bul di lerin̄ jaŋ fiŋle. <sup>3</sup> Chichuo-fiŋla maa, di lerin̄ ne bire, ma yie bul ari duonuŋ jaŋ nii. Ma yie wuo beŋ wia nyuŋ a wuo jin̄ wii-la si jaŋ ŋaa, ama ma bi wuo jin̄ wialiŋ s̄ii ŋaa dunia deŋ

le leele. <sup>4</sup> Jiniŋ niaa ŋaa ni-bomɔ ne, ba bi Wia ka fá. Ma si di mi ŋaa wu-magiliŋ. Ai, mi bi ŋaa. Wu-magil-la ma síi che, ma bi jaŋ wuo nau, see Wia fa si ŋaa a tige Jona le." Nii ne Yesu lenba aŋ viiri.

*Yesu bul wiaa a tige Farisii tinŋaa ari Sadusii tinŋaa wu-bulaa le*

*Maak 8.14-21*

<sup>5</sup> Yesu haritooro-la si juu liiŋ daboro a duoro chol fuoŋ cholo ŋii, ba yua ba bi kudiilee koro mu. <sup>6</sup> Nii ne Yesu bula piba di ba pɔ ba titia le woruŋ ari Farisii tinŋaa ari Sadusii tinŋaa, di ba nage si-buruŋ ba si joŋo he boroboro le duu puore. <sup>7</sup> Nii ne ba suomo bula pipi doŋɔ, "La bi kudiilee koro kɔ, ŋii ne tii u bul wiinŋ deenŋ." <sup>8</sup> Nii ne Yesu jiiŋ wii-la ba síi bul a bula piba, "Ma yarida bi yuge. Bɛɛ ne tii ma hɔnɔ vuure ari ma bi kudiilee kene? Ma ha bi wu-jimiŋ keneɛ? <sup>9</sup> Ma ha bi wiaa bubuɔŋ jiiŋ? Ma bi biina yi bua-la le mi si joŋ boroboroba banɔŋ kaa choŋɛ a pi niaa bui banɔŋ ba dii? Ba si die a voŋɛ, siŋsiŋ banmɛɛ ne ma paa ku-kaanaa su? <sup>10</sup> Aŋ ka boroboro balipe-la mi si kaa choŋɛ a pi niaa bui banɛɛ-laa? Ku-kaanaa siŋsiŋ banmɛɛ ne ma paa su? <sup>11</sup> Bɛɛ ne ma biine ari ma teenŋ ne mii bul kudiilee wiaa? Má pɔ ma titia le ari Farisii tinŋaa ari Sadusii tinŋaa le. Ba nage si-buruŋ

ne." <sup>12</sup> Nii ne u haritooro jiiŋ ari u bi si di ba pɔ ba titia le ari si-buru-la ba si kaa hihe boroboro le ne, ama u si ba pɔ ba titia le Farisii tinŋaa ari Sadusii tinŋaa wu-bulaa le ne.

*Piita dage nii-la Yesu si ŋaa*

*Maak 8.27-30; Luuk 9.18-21*

<sup>13</sup> Nii ne Yesu sii mu Sizariya, Filipa tinŋeen. Nii ne u piɛɛ u haritooro-la a bul, "Kubɛɛ ne niaa si di mi-na Nuhuobiine Bie ŋaa?" <sup>14</sup> Nii ne ba bul, "Doŋsuŋ si di ŋ ne ŋaa Joɔŋ, Wia lii-foori-la. Doŋsuŋ ma si ŋ ne ŋaa Ilaaja. Doŋsuŋ ma si ŋ ne ŋaa Jerimaya, koo nii-la síi bul wiaa, Wia Diŋ-zɔŋ-la doluŋ le doŋɔ ne." <sup>15</sup> Nii ne Yesu bira piɛɛ u haritooro-la maa, "Ka ma maa, ma si mi ŋaa kubɛɛ ne?" <sup>16</sup> Nii ne Saamɔŋ Piita bul, "Ŋ ne ŋaa Kirisito, Wia-la si weye Bie." <sup>17</sup> Nii ne Yesu bul, "Saamɔŋ, Joɔŋ bie, Wia jaŋ pɛŋ le, wu-jimiŋ deenŋ u bi naga nuhuobiine ne piŋ. Mi Nyimma si he Wia-jaŋ ne piŋ. <sup>18</sup> Nii wiaa Piita, mi bulaa piŋ ari ŋ nage buŋ ne. Buŋ-la nyuŋ ne mi jaŋ saa nialiŋ si laa mi wiaa dii dia. Suuŋ ma bi jaŋ wuo yigi dia-la lo. <sup>19</sup> Mi jaŋ joŋ Wia kuorii-la boribiee piŋ. Wii-la ŋ si via dunia le, ba jaŋ viau Wia-jaŋ maa. Wii-la ma ŋ si seyɛ dunia le, ba ma jaŋ seyɛ Wia-jaŋ." <sup>20</sup> Nii ne Yesu bula pi u haritooro-la ari siifesiŋ di ba síi bula pi nuu-kala ari

u ne ɲaa Kirisito, nii-la Wia si liisa.

*Yesu bul u hɛɛɲ nanin ari u suunun wiaa*

*Maak 8.31-9.1; Luuk 9.22-27*

<sup>21</sup> A suomi bua-la le Yesu chaasa bula pi u haritooro a bul, "U maga di mi mu Jerusalem a na hɛɛɲ woruɲ juu tinɲaa nihiasin ari nialin si kpu pusun pipi Wia kuhiasin ari Wia tenin kerichiba nisin le. Ba jan kpumi, ama mi jan sii suun le tapulaa batori chɛɛɲ." <sup>22</sup> Nii ne Piita kenu kaa suusa lii a kpiau le a bul, "Wia bi jan sei, mi Tiina. Wii-la bi jan ko duu ɲaan le." <sup>23</sup> Nii ne Yesu miira chaase Piita a bula pu a bul, "Sitaani, mu dime! Nɲ che ɲ nyisemi di mi juu haache le ne. Wialin ɲ sii bul, nuhuobiine wonɲiin ne. Wia wonɲiin dee."

<sup>24</sup> Nii ne u bula pi u haritooro a bul, "Di nuu-kala nii che duu tomi, see duu via u titia wonɲiin an jon u daa-gesee baase tapulii-na kala a to mi harin." <sup>25</sup> Nii-la kala sii che duu laa u titia miisin, u jan jon u miisin ta, ama nii-la si via u miisin ta a tin mi wiaa, u jan sene laa u miisin." <sup>26</sup> Di ɲ ne dii dunia kala an bi miisin kene, bee kun nyuurii ne ɲ na? Dunia deen le, bee kun ne saa ɲ jan wuo kaa yoo ɲ miisin? <sup>27</sup> Mi-na Nuhuobiine Bie, mi jan ko a chaane ari mi Nyimma kuoruɲ. La di Wia tinɲaaraa ne jan ko. Di

la ne ko, Wia jan tin nuu-kala a mage nii u si tima. <sup>28</sup> Wutitii ne, mi bulaa pima ari niaa donsun he dime, ba bi jan suu see di ba na mi-na Nuhuobiine Bie di mi ko ari mi kuorii-la."

## 17

*Yesu birima*

*Maak 9.2-13; Luuk 9.28-36*

<sup>1</sup> Tapulaa balidu si ku bal, Yesu ken Piita ari Jeems ari u naanɲie Joɔɲ, ba dunɲa a kaa mu peel-bal kubala nyun. <sup>2</sup> Ba ben ba sipaan a na Yesu duu birima. U siala kala tutul a nage wiiposun sii tul nii. U gennin ma pulle a tutul. <sup>3</sup> Nii ne Moosis ari Ilaaja ku lii ba sipaan. Ba china bubul wiaa Yesu teen. <sup>4</sup> Nii ne Piita bula pi Yesu a bul, "La Tiina, u ɲaa wu-zon ne ari la si he daha. Di ɲ nii che la jan he lenɲee batori daha, di ɲ ken donɲo, di Moosis ma ken donɲo, di Ilaaja ma ken donɲo." <sup>5</sup> Piita ha fa sii bul wiaa nii di duonɲilinbaanin ku toba, ka yiikoro kubala lii duonɲilinbaani-la tuon a bubul, "Mi Bii-choolun ne ɲla. Mi tuon tore u nyun. Má jegile nii u teen." <sup>6</sup> Yesu haritooro-la si nii nii-la yiikoro, fawullun kenɲa, ba tuu tel tinɲeen. <sup>7</sup> Nii ne Yesu ko ba teen a digiba an bula piba di ba sii an si fawullun fá. <sup>8</sup> Ba si sie, ba ben, ba bi nuu-kala na see Yesu dunɲa.

<sup>9</sup> Ba si lii peel-la nyun ku tuu, Yesu bula piba a bul,

“Mi bi che di ma bul wii-la ma si naa a pi nuu-kala, see tapulii-la mi-na Nuhuobiine Bie si sii suunɛ ɛ.”<sup>10</sup> Nii ne Yesu haritooro-la piesu a bul, “Bee ne tii Wia tenin kerichiba bul di Ilaaja ne laa sipaan, an ka di Wia Bie-na ko?”<sup>11</sup> Nii ne Yesu bul, “Wutitii, Ilaaja jan sene laa sipaan ko a kenɛ kun-kala wasa bil.<sup>12</sup> Ama mi bulaa pima ari Ilaaja paala ko ne, ama niaa bi wuo jimu. Ba naau nii kala ba sii che. Nii titia ne ba ma jan dogise mi-na Nuhuobiine Bie.”<sup>13</sup> Nii ne u haritooro-la jin ari Joon Wia lii-foori-la wiaa ne u bul nii.

*Yesu kiri jin-bonɛ bie le*

*Maak 9.14-29; Luuk 9.37-43*

<sup>14</sup> Nii ne Yesu ari u haritooro batori-la sii lii peella nyun a ku tuu ni-dan-la teen. Di baal kubala ko Yesu teen a kpirimi u sipaan<sup>15</sup> an bula pu a bul, “Mi Tiina, fa mi bie nennige, uu tel kpunɛkpusunɛ. Nyanyalii-la kenu ne worun, u yie titel nyininɛ koo liinɛ ɛ.”<sup>16</sup> Mi kenu kaa ko n haritooro teen, ama ba bi wuo vaaru.”<sup>17</sup> Nii ne Yesu bul, “Ma leeɛ niaa deenba, ma bi yarida kene, ma naa ni-bomɔ ne. Ee ne mi jan nyalime a dieni ma teen?” Nii ne u bula pi baalla duu kenɛ u bile ko u teen.<sup>18</sup> Nii ne Yesu bul jin-bonɛ-la le duu lii bile le. Nii ne u lii. Bile guu duori.<sup>19</sup> Nii ne Yesu haritooro-la ko u teen a luora piesu a bul, “Bee ne

tii la-na bi jin-bonɛ-la wuo kiri?”<sup>20</sup> Nii ne Yesu bula piba a bul, “Ma yarida bi yuge, nii ne tii. Wutitii, mi bulaa pima, di ma yarida ne fa mage kunɛ biinɛ ba sii yire masitad, ma fa jan wuo bul peelinɛ le duu sii daha a mu seme donɔ. U jan sii mu. Wii-kala tuo ma fa bi jan wuo naa. [<sup>21</sup> Ama Wia bi jan pima dolunɛ di ma wuo kikiri jin-yiri deenba, see ma voo ninɛ an pe chuchuoɛ Wia.]”

*Yesu bira bul u suunɛ wiaa*

*Maak 9.30-32; Luuk 9.43-45*

<sup>22</sup> Nii ne Yesu ari u haritooro kala ku hilimi Galilii le. Nii ne u bula piba di ba jan kenɛ u-na Nuhuobiine Bie a he niaa nisinɛ le<sup>23</sup> di ba kpuu, ama u harinɛ le u jan sii suunɛ le tapulaa batori cheen a kenɛ miisinɛ. Yesu si bul nii, u haritooro tuonɛ chei.

*Wia-dia time*

<sup>24</sup> Yesu ari u haritooro ko Kapenam, nalinɛ sii laa Wia-dia time ko Piita teen a piesu a bul, “Ma kuhianɛ ka tinɛ Wia-dia time nee?”<sup>25</sup> Nii ne Piita bul duu tinɛ ne. Piita si bul nii an miira juu dia, Yesu laa sipaan a piesu a bul, “Kubee ne tinɛ moribiee koo lanpoo a pipi dunia deen kuoro? U tan-la niaa koo nuhuɔraa nee? Bee ne n biine?”<sup>26</sup> Nii ne Piita bul di nuhuɔraa ne. Yesu bira bul, “Nii-na u tan-la niaa bi kun-kala tinɛ.”<sup>27</sup> Ama la-na bi che di la maase niaa deenba, nii wiaa kenɛ gbianɛ tuu he fuon

le a keɛɛ cheŋfilee. Gbian-la si keŋ cheŋfili-buŋbuŋ-la, keŋ u niin suri. N jaŋ na moribiin u niin le. Joŋ moribie-la a tiŋ ma ari mi nyun time.”

## 18

*Yesu dage nii-la si yuga Wia kuorii-la tuɔŋ*

*Maak 9.33-37; Luuk 9.46-48*

<sup>1</sup> Yesu si bul nii a pi Piita dɛɛɛ, u haritooroo ko u teen a ku piesu a bul, “La tuɔŋ kubɛɛ nɛ kii u doŋɔ tiina Wia kuorii-la tuɔŋ?” <sup>2</sup> Nii nɛ Yesu yire bii-bie kubala a kii ba tutuɔbaanin <sup>3</sup> aŋ bula piba a bul, “Wutitii nɛ mi bulaa pima, see di ma keŋ ma titia muuri a nage haŋbiisin, di nii dee, ma bi jaŋ wuo juu Wia kuorii-la tuɔŋ. <sup>4</sup> Nii-la si keŋ u titia muuri a nage haŋbie, u nɛ ŋaa ma tuɔŋ kuhian Wia kuorii-la tuɔŋ. <sup>5</sup> Di nuu nɛ keŋ bii-bie doŋɔ woruŋ a tiŋ mi wiaa, mi nɛ u keŋ woruŋ nii.

*Yesu bul wiaa a tige niaa si jaŋ leŋ di niaa juu haache le*

*Maak 9.42-48; Luuk 17.1-2*

<sup>6</sup> Nii-la kala si na haŋbiisi-la sii tomi doŋɔ a nyisu duu ŋaa wu-bɔmuŋ, u maga di ba joŋ nɔmuŋ a vɔɔ laale u banŋa le a joŋu yuo hɛ muga tuɔŋ uu nyua liin u suu. Di ba nɛ ŋaa nii, u nɛ jaŋ kpia u si weye.

<sup>7</sup> U jaŋ lɔɛ pi nialin si jaŋ ŋaa di niaa juu haache le. U maga di wialin ku bal. Ama

nii-la si ŋaa ba juu haache le, u jaŋ na hɛɛŋ. <sup>8</sup> Di ŋ nisin koo ŋ naan nii che duu kenin hɛ haache le, kere ta. N si juu Wia kuorii-la tuɔŋ ari naa-kuuŋ koo na-kuuŋ, u nɛ kpia ŋ si jaŋ keŋ na-pilimee koo naa-pilimee a juu Wia nyinin. <sup>9</sup> Di ŋ siin nii che duu kenin hɛ haache le, liisa ta. N si jaŋ juu Wia kuorii-la tuɔŋ ari sii-togo, u nɛ kpia ba si joŋuŋ yuo hɛ Wia nyinin ari sii-pilimee.”

*Yesu mage namaga a mu tige pie-lelin le*

*Luuk 15.3-7*

<sup>10</sup> Nii nɛ Yesu bira si, “Má fiele di ma sí haŋbiisin deenba kuŋ-kala kaa gbesi. Mi bulaa pima di Wia ta u tinɔdaaraa nɛ di ba bibenba. Ba hɛ Wia-jaŋ bua-na kala le, mi Nyimma si hɛ lee-la. [<sup>11</sup> Mi-na Nuhuobiine Bie ko di mi che a laa nialin si lele nɛ a ta.”]

<sup>12</sup> Nii nɛ Yesu mage namaga a bul, “Nuu nɛ fa hɛ dime a keŋ piesee zɔɔɔ, nii nɛ ba tuɔŋ doŋɔ lel.” Nii nɛ Yesu piese, “Eɛ nɛ ma biine ari u jaŋ ŋaa? U bi jaŋ leŋ piesee mahin banese ari fii ari nibi-la a ta peelee nyun aŋ lii gollo chiche pielelii-laa? <sup>13</sup> Duu nɛ nau, mi jaŋ bula pima ari u tuɔŋ jaŋ toɛ u pie-bala-la nyun a kii piesee mahin banese ari fii ari nibi-la si bi lele. <sup>14</sup> Nii titia nɛ saa mi Nyimma si hɛ Wia-jaŋ bi che di haŋbiisin deenba kuŋ lel.”

*Yesu dage nii la si jan n̄aa di la naanbie ne n̄aa wii a cheila le*

<sup>15</sup> Nii ne Yesu si, “Di n̄ naanbie ne n̄aa wii chein le, mu a bula pu wii-la u si n̄aa chei, ama n̄aa nii ma duu dunḁun̄a balia p̄eḡe. Di u ne jegile nii wii-la n̄ s̄ii bul, ma di n̄ naanbie bira sima ne.

<sup>16</sup> Ama duu ne bi jegile nii n̄ teen, ken̄ nuu ḁon̄ koo n̄aa balia p̄e n̄ titia le di ma mu u teen a bul wii-la u si n̄aa chei duu was̄e. N̄ si n̄aa nii, n̄ jan̄ ken̄ n̄aa di ba n̄aa n̄ ḁansia. <sup>17</sup> Ama di u ne via duu jegile nii ma teen, n̄-na bul wii-la pi n̄ialin̄ kala si laa Yesu wiaa dii aa hilimi. Duu ne via duu jegile nii ba teen maa, ḁogisu ari n̄ buu jin̄ a nage nii-la si bi Wia jin̄ koo a nage lan̄poo lilaaru ne.

*N̄ si via wii-la ari n̄ si sei wii-la*

<sup>18</sup> Wutitii ne, mi bulaa pima ari wii-la ma si via dunia le, ba jan̄ viau Wia-jan̄ maa. Wii-la ma n̄ si sei dunia le, ba ma jan̄ seȳu Wia-jan̄. <sup>19</sup> Mi jan̄ wasa bula pima ari ma n̄aa balia ne he dime a ken̄ nii-bala a chuchuōle Wia a chichē kun̄, mi Nyimma si he Wia-jan̄, u jan̄ jon̄o pima. <sup>20</sup> Lee-la n̄aa balia koo batori si hilime mi ḁolun̄ le, mi jan̄ he ba teen.”

*Tintinni-la si bi chimin̄ jon̄o che u ḁon̄o tiina*

<sup>21</sup> Nii ne Piita k̄o Yesu teen a piesu a bul, “Mi Tiina, di mi naanbie ne n̄aa wii a cheimi le, naan̄siin̄ bun̄m̄ē

ne mi jan̄ jon̄o cheu? Mi jon̄o cheu naan̄siin̄ bulipe koo?” <sup>22</sup> Nii ne Yesu bira bul, “Ai, naan̄siin̄ bulipe dunḁun̄a dee. Jon̄o cheu naan̄siin̄ mahin̄ batori ari fii leree bulipe.”

<sup>23</sup> Nii ne Yesu mage na-maga a ken̄ Wia kuorii-la a kaa mimagise kuoro ari u tintinnaa a bul, “Kuoru kubala ne sie a chichē duu piēse u tintinnaa u chin̄n̄aa.

<sup>24</sup> U si suomo duu piēse, ba ken̄ u tintinna ḁon̄o k̄o u teen. U dii u chimin̄ siidi bui bui bui ne. <sup>25</sup> U bi wuō tin̄.

Nii ne u kuhian̄-la bul di ba kenu ari u haala ari u biirin̄ ari kialin̄ kala u si kenē a kaa mu yalle a tin̄ chin̄-la bua le. <sup>26</sup> Nii ne tintinni-

la tuu kpirimi u naadusun̄ nyun̄ a sulu, ‘Mi kuhian̄, n̄aa kenyiri. Mi jan̄ tin̄ n̄ chimin̄ kala.’ <sup>27</sup> U kuhian̄-

la f̄aū n̄isusun̄ worun̄ a jon̄ chin̄-la cheu a n̄aa u mu.

<sup>28</sup> Nii ne chin̄ tiina-la kuoru-la si jon̄ chin̄-la cheu, u lii a ma na u tintinni ḁon̄o tiina si dii u chimin̄ siidi bui. U ken̄ u gerin̄ ban̄na le a bul duu tin̄ u chimin̄.

<sup>29</sup> U tintinni-ḁon̄-la ma tuu kpirimi u naadusun̄ nyun̄ a sulu a bul, ‘N̄aa kenyiri, mi jan̄ tin̄in̄.’ <sup>30</sup> U via an̄ kenu mu t̄o dia, an̄ bul see duu tin̄

chin̄-la. <sup>31</sup> U tintinni-ḁon̄sun̄ si na wii-la u si n̄aa, ba tuon̄ kala chei. Ba mu bula pi ba kuhian̄ wii-la kala si n̄aa. <sup>32</sup> Nii ne kuoru-la yiru a piesu a bul, ‘N̄-na tintinna



deen, η ηaa ni-bon̄ ne. N̄ si sulmi, mi jon̄ chin̄-la kala η si die a chen̄ ne. <sup>33</sup> Bεε ne tii η-na bi wuo fá η don̄o tiina-la nennige ari mi si fán̄ nennige ηii?" <sup>34</sup> Kuoru-la na baaniη woruη u nyuη a ηaa ba kenu to dia see duu tin̄ chin̄-la kala." <sup>35</sup> Nii ne Yesu si, "Di ma bi sei di ma jon̄ ma don̄sun̄ tin̄ηaa haacheba cheba ari ma tuon̄ kala, mi Nyimma Wia si he Wia-jan̄ le ma jan̄ dogisema ηii."

## 19

*Yesu dage niaa di ba sí ba haalaa via*

*Maak 10.1-12*

<sup>1</sup> Yesu si bul wiaa deenba dεε, u lii Galilii tin̄teen̄ a mu Judiya tin̄teen̄ a chol Joodan̄ fuo-la. <sup>2</sup> Ni-dan̄ bira to u harin̄. Nii ne u vaare nialin̄ sí wiilu dime.

<sup>3</sup> Nii ne Farisii tin̄ηaa don̄sun̄ ma sii kō u teen̄ a chiche di ba magisu a piesu a bul, "Di η ken̄ wii a tige η haala le a chiche η viau, u ken̄ won̄bii neε?" <sup>4</sup> Yesu mi-ira pieseba, "Ma bi karima ari bua-la le Wia si bugumo ηaa dunia, nialin̄ u si ηaa, ba fa ηaa baal ari haal neε?"

<sup>5</sup> Yesu bira si, "Nii ne tii baal-la jan̄ len̄ u nyimma ari u naan̄ dia an̄ ka ba di u haala mere don̄o le. Niaa deenba balia jan̄ ken̄ chal-bala. <sup>6</sup> Ba bira bi jan̄ ηaa niaa balia, see kubala. Nialin̄ saa Wia si kaa mere don̄o le, u bi maga di nuhuobiine ken̄ba pōε don̄o le." <sup>7</sup> Nii ne u

haritooro-la bira piesu wiin̄ deen̄ a bul, "Bεε ne tii saa Moosis fa si di baala n̄ii che u via u haala, duu laa sipaan̄ a ηmun̄se tenin̄ a pi haal-la an̄-na viau?" <sup>8</sup> Nii ne Yesu bira bula piba a bul, "Ma tuon̄ dolie. Nii ne tii Moosis fa sei di ma via ma haalaa. Ama dunia di-suomun̄, ba fa bi ηii ηaa. <sup>9</sup> Mi bulaa pima, baala-na kala si via u haala an̄ bira jaa don̄o, u tiina juu haal-la haache le ne, see di haal-la ka ηaa ha-chorun̄ wu-ηaalaa."

<sup>10</sup> Nii ne Yesu haritooro-la bula pu ari ηii-na ne he dime, u bi maga di nuu jaa haal. <sup>11</sup> Nii ne Yesu miira bula piba a bul, "Wiin̄ deen̄ bi naga ari nuu-kala jan̄ wuo ηaa. Nialin̄ Wia si jon̄ dolun̄ pa, ba dun̄dun̄a ne jan̄ wuo ηaa ηii. <sup>12</sup> Wii-la si tii baalaa bi haalaa ka jaa, ba yuga ne. Ba lul don̄sun̄, ba paala bi haalaa wuo pin̄. Don̄sun̄ ma, nuhuobiinee ne ηaaba ηii, don̄sun̄ ma bi haalaa jaa a tin̄ Wia kuorii-la wiaa. Nii-la si jan̄ wuo laa wiin̄ deen̄ dii, u sei."

*Yesu jon̄ nisin̄ dan̄ han̄biisin̄ le*

*Maak 10.13-16; Luuk 18.15-17*

<sup>13</sup> Nii ne niaa sii kō Yesu teen̄ a ken̄ ba han̄biisin̄ kaa kō duu jon̄ u nisin̄ dan̄ba le a chuole Wia piba. Nii ne u haritooro-la kpiaba le. <sup>14</sup> Yesu si na ηii, u bula piba a bul, "Má len̄ di han̄biisi-la kō mi teen̄. Ma síba kiru! Niaa deen̄ba yiri ne he Wia

kuorii-la tuonj." <sup>15</sup> Nii ne u jonj u nisinj danjba le anj viiri.

*Ku-kenni-la ko Yesu teenj*

*Maak 10.17-31; Luuk 18.18-30*

<sup>16</sup> Baal kubala ne ma sie a ko Yesu teenj. Baal-la kenj kiaa kinjenj. Nii ne u piese Yesu a bul, "Mi kuhianj, wuzonj bee ne mi janj njaa a kenj miisi-la si bi dere?" <sup>17</sup> Nii ne Yesu piesu a bul, "Bee ne tii nj piesemi wu-zomol-la nj si janj njjaa wiaa? Ni-bala dunjduja ne zomol. Di nj nii che di nj kenj miisi-la si bi dere, tuto wialinj Wia si leje ba njmunja bil di maa to."

<sup>18</sup> Nii ne baal-la piesu, "Wubeeba ne?" Nii ne Yesu si, "Si niaa kpu, si nj donjo tiina haala che, si gaa, di nj njaa danjsia wii le, si wiaa nyia pe.

<sup>19</sup> Fifa nj nyimma ari nj naanj, a cho nj donjo tiina ari nj si cho nj titia nii." <sup>20</sup> Nii ne baal-la bula pi Yesu, "Mi kuhianj, mi to wiaa deenjba kala ne. Bee ne saa ka?" <sup>21</sup> Nii ne Yesu bula pu, "Di nj nii che nj njaa ni-zonj a si wii-kala kenj, jonj nj kiaa kala yalle a jonj moribie-la a pi summoo anj ku tomi. Nj ne njaa nii, nj janj kenj kiaa Wia-janj le." <sup>22</sup> Yesu si bul nii, baal-la tuonj chei, u sii viiri, bee wiaa u kenj kiaa ne worunj.

<sup>23</sup> Nii ne Yesu bula pi u haritooro-la a bul, "Wutitii, mi bulaa pima, u njaa wu-duo ne ari nii-la si kenj kiaa si janj wuo juu Wia kuorii-la tuonj. <sup>24</sup> Mi bira bulaa pima, u bi hei ari

bunjanja si janj wuo to geriheminj buonj lii ari u si heye nii nii-la si kenj kiaa si janj wuo juu Wia kuorii-la tuonj."

<sup>25</sup> U haritooro-la si nii wiaa deenja, ba faasa hiriki a piese Yesu a bul, "U ne nage nii, kubee ne saa Wia janj laa ta?" <sup>26</sup> Yesu miira benja anj bul, "Wii-la si janj kperi nuhuobiine, u bi Wia wuo kperi. Wia wuo wii-kala njaa ne." <sup>27</sup> Nii ne Piita bula pu a bul, "Na, la-na lenj la kunj-kala ne anj tuto nj harinj. Bee ne saa la janj na?" <sup>28</sup> Nii ne Yesu bula pi u haritooro-la a bul, "Wutitii ne mi bulaa pima, di dunia falii-la ne yie, mi-na Nuhuobiine Bie janj honj mi kuori-kpasa nyunj Wia pulumunj tuonj. Buala le, ma haritooro-la fii ari balia-la si to mi harinj, ma ma janj honj kuori-kpasinninj fii ari balia nyunj a bibenj Iziral ta-gentisinj fii ari balia-la a dii ba sariya. <sup>29</sup> Bira nii-la kala si lenj u diisinj koo u naanjiirinj koo u nyimma koo u naanj koo u biirinj koo u bagisinj a tinj mi wiaa, u tiina janj bira na kiaa deenjba naanjiinj zolol anj pe kenj miisi-la si bi dere. <sup>30</sup> Ama kuhiasinj yuga si janj birime hanjiisinj. Hanjiisinj ma yuga si janj birime kuhiasinj."

## 20

*Yesu mage namaga a tige baga tintinnaa le*

<sup>1</sup> Nii ne Yesu bira mage namaga a piba a bul di Wia

kuorii-la nage baal kubala si keŋ u бага ne chichuo-fiela. U lii chiche niaa di ba mu pere u бага-la le. <sup>2</sup> Ba sei ari ba jaŋ mu pere, ka u tɪŋba che-bala time. Nii ne u leŋ ba mu u бага-la pipere. <sup>3</sup> U ku mage kerifi nibi, u bira lii a na niaa doŋsuŋ di ba chin yobo tuoŋ pei. Ba bi tin̄timii kala ka tin̄. <sup>4</sup> Nii ne u bula piba di ba ma mu a pere u бага-la le, ka di u tɪŋba, duu jaŋ piba nii kala si maga. Nii ne ba ma mu. <sup>5</sup> Kerifi fii ari balia yi, u bira lii a na niaa doŋsuŋ a ŋaa ba ma mu u бага-la. U bira lii kerifi batori bua-la le a bira na niaa doŋsuŋ a ŋaa ba ma mu u бага-la. <sup>6</sup> U bira ku kpage kerifi banon̄, u bira lii yobo tuoŋ a na niaa doŋsuŋ ma di ba ha chin dime. Nii ne u pieseba, "Be ne tii ma chin daha pei chichuoŋ ari wiiheye kala, ma bi tin̄timii kala ka tin̄?" <sup>7</sup> Nii ne ba bula pu ari ba bi tin̄tin̄ŋaa na di ba tin̄. Nii ne u bula piba di ba ma mu a tin̄ u бага le. Ba ma mu. <sup>8</sup> Didaanin̄ si yie, nii ne бага-la tiina yire niila sii beŋ u бага-la duu yire nialin̄ si tin̄ u бага-la le a tɪŋba, duu suomi nialin̄ si to harin̄ mu бага-la a tɪŋba an̄-na mu yi nialin̄ si laa sipaan̄ mu бага-la. <sup>9</sup> Nialin̄ si to harin̄ mu бага-la, u tɪŋba che-bala time. <sup>10</sup> Nii ne u si, ka nialin̄ si laa sipaan̄ mu бага-la, di ba ku laa ba time. Ba fa biina ari ba jaŋ laa kii haritooro-la, ama ba tɪŋba ma mage nii ne.

<sup>11</sup> Ba ma laa moribie-la an̄ gugurime wiaa nii-la бага-la le ba si pere teen̄. <sup>12</sup> Nii ne ba bula pu a bul, "Niaa deen̄ba si to harin̄ ko, ba tin̄ hawa kubala dun̄duŋ ne, an̄ ka la-na tin̄ chichuoŋ ari wiiheye kala, an̄ ka ŋ tɪŋla kala maga doŋo." <sup>13</sup> Nii ne бага-la tiina bula pi ba doŋo a bul, "Jegile nii, mi bima gura. Ma seye ari ma jaŋ tin̄ di wia juu ne an̄ laa che-bala time. <sup>14</sup> Má laa ma moribiee a viiri. Mii che di mi tɪŋ baalaa deen̄ba si to harin̄ ko nii titia mi si tɪŋma ne. <sup>15</sup> Mi bi won̄biin̄ kene di mi keŋ mi moribiee tɪŋ mi tuotoŋe wiaa? Koo ma yaraa bieru a tin̄ mi si keŋ zile wiaa nee?" <sup>16</sup> Nii ne Yesu bula dere, "Kuhiasin̄ jaŋ birime han̄biisin̄, han̄biisin̄ ma jaŋ birime kuhiasin̄."

*Yesu bul u suuŋ wiaa*

*Maak 10.32-34; Luuk 18.31-34*

<sup>17</sup> Yesu si bul nii di ba he won̄biin̄ le ne aa mu Jerusalem. Nii ne u keŋ u haritooro fii ari balia dun̄duŋa a suusa lii a bula piba won̄biin̄ le, <sup>18</sup> "Má jegili mi teen̄. Laa mu Jerusalem ne. Di la ne yi dime, ba jaŋ keŋ mi-na Nuhuobiine Bie a kaa mu pi nialin̄ si kpu pusun̄ pipi Wia kuhiasin̄ ari Wia tenin̄ kerichiba. Ba jaŋ dii mi sariya a ŋaa di ba kpumi <sup>19</sup> an̄ keŋmi kaa mu he nialin̄ si bi juu tin̄ŋaa ŋaa nisin̄ le. Ba jaŋ moŋmi. Ba jaŋ viiremi maa an̄ kpaasemi mere daa-gese ne nyun̄, ka di

mi sii suun ɛ tapulaa batori cheɛŋ.”

*Zɛbidii haala sul Yesu a chiche di-hɔnunɔ duu pi u bi-irinɔ balia*

*Maak 10.35-45*

<sup>20</sup> Nii nɛ Zɛbidii haala kɛŋ u biirinɔ balia kɔ Yesu teen a kpirimi u sipaanɔ an sulu duu pɛu ɛ. <sup>21</sup> Nii nɛ Yesu piesu, “Wu-bɛɛ nɛ nɔ che di mi nɔa pin?” Nii nɛ u bul, “N si janɔ dii Wia kuorii-la a hɔŋ nɔ kuori-kpasa nyunɔ, leŋ di mi biirinɔ balia nɔa nɔ bubuɔŋ huhɔnnɔ, di dɔŋɔ hɔŋ nɔ na-diinɔ, di dɔŋɔ ma hɔŋ nɔ na-gua.” <sup>22</sup> Nii nɛ Yesu bula pi u biirinɔ a bul, “Ma bi jinɔ ku-la ma sii che. Ma janɔ wuo nyalima na hɛɛ-la mi si janɔ na? Ma janɔ wuo fo Wii-chuɔɛ liinɔ ari ba si janɔ fomi nii, koo?” Ba si, “Oo, la janɔ wuo.” <sup>23</sup> Nii nɛ Yesu bula piba a bul, “Wutitii nɛ ma bul. Hɛɛ-la mi si janɔ na, u-na ma ma janɔ na. Ama mi na-diinɔ ari mi na-gua huhɔnnɔ-la, mi dee bi janɔ tuɔseba. Wia nɛ janɔ liiseba di ba hɔŋ dime.” <sup>24</sup> Yesu haritooro fii-la si nii Jeems ari Jɔɔŋ si bul wii-la, ba na baaninɔ ba nyunɔ. <sup>25</sup> Nii nɛ Yesu yire u haritooro kala. Ba mu u teenɔ. U bula piba a bul, “Ma jinɔ nialinɔ si bi Juu tinɔa nɔa, ba hɔŋ niaa nyunɔ nɛ. Ba kuhiasinɔ ma kɛnba dolunɔ. <sup>26</sup> Ama u bi maga di ma ninɔa nii. Ma tuɔŋ nii-la sii che u nɔa ma kuhianɔ, u maga duu nɛ tinɔ tinɔnɔa pipima. <sup>27</sup> Ma tuɔŋ

nii-la ma sii che u nɔa ma tuɔŋ kuoro, u maga duu nɛ nɔa ma tuɔŋ yomo. <sup>28</sup> Mi-na Nuhuobiine Bie, mi bi kɔ di mi che niaa di ba tima pimi, mi kɔ di mi-na tima piba nɛ a suu a laa niaa miisaa yuge ta a piba.”

*Yesu vaare nyulimaa balia*  
*Maak 10.26-52; Luuk 18.35-43*

<sup>29</sup> Yesu ari u haritooro si lii Jeriko ɛ, ni-danɔ nɛ to ba harinɔ. <sup>30</sup> Di nyulimaa balia hɔŋ wonɔbiinɔ niinɔ a nii di Yesu nii bal. Nii nɛ ba faasa yire a bula pu a bul, “Yesu, Devit nihii, fála nennige.” <sup>31</sup> Nii nɛ ni-danɔ-la kpiaba ɛ di ba kɛŋ goŋ. Ama ba faasa yire a kii nii a bul, “La Tiina, Devit nihii, fála nennige.” <sup>32</sup> Nii nɛ Yesu chinɔ an yireba a pieseba, “Bɛɛ kunɔ nɛ ma che mi nɔa pima?” <sup>33</sup> Nii nɛ ba bul, “La Tiina, laa che di nɔ suri la siaa nɛ.” <sup>34</sup> Nii nɛ Yesu fába nennige a digi ba siaa ɛ. Ba siaa guu suri, ba tuto u harinɔ.

## 21

*Yesu juu Jerusalem*  
*Maak 11.1-11; Luuk 19.28-40; Jɔɔŋ 12.12-19*

<sup>1</sup> Nii nɛ Yesu ari u haritooro sii mu Jerusalem. Ba ku yi Betifagi a ku yi peel kubala baa yire Oliv. Nii nɛ Yesu liise u haritooro balia a tinɔba a bula piba a bul, “Má mu tanɔ-la si hɛ ma sipaanɔ. <sup>2</sup> Di ma nɛ mua, ma janɔ na kakumo ari u bie di ba vɔbɔ a kii. Má puri a kaa kɔ pimi. <sup>3</sup> Di nuu nɛ piesema,

má bula pu ari ma Tiina níi che. U jaŋ leŋ di ma kaa kó lima.” <sup>4</sup> Wiinj deenj ŋaa di wii-la nii-la fa síi bul wiaa, Wia Diŋ-zoŋ-la doluŋ le ku ŋaa wutitii ne. <sup>5</sup> U fa si, “Má bulaa pi Zaayoŋ niaa di ba bee na, di ba kuoro níi kó ba teenj.

U keŋ u titia muuri ne a jil kakumo a bira jil kakumo bie.”

<sup>6</sup> Nii ne Yesu haritooro-la mu a ŋaa wii-la Yesu si bula piba di ba ŋaa. <sup>7</sup> Ba keŋ kakumola ari u bie kaa kó a joŋ ba genninj daŋ kakumola ari u bie nyuŋ, Yesu jil. <sup>8</sup> Ni-daŋ-la jesinj joŋ ba genninj a jere woŋbiinj le, ka doŋsuŋ ma kerí pipaariŋ a ma kaa jere woŋbiinj le. <sup>9</sup> Ni-daŋ-la si laa Yesu sipaan ari nialinj síi to u hariŋ suomo ŋijaa goŋ a bul, “Tabarikala Devit nihinj! Wia jaŋ pe nii-la síi kó la Tiina doluŋ le. Má leŋ di la denne Wia!” <sup>10</sup> Yesu si muu juu Jerusalem, taŋ-la kala zigili. Nii ne niaa piése a bul, “Kubee ne ŋla?” <sup>11</sup> Nii ne ni-daŋ-la bul, “Yesu si líi Nazaret si he Galilii tinteenj le, nii-la síi bul wiaa, Wia Diŋ-zoŋ-la doluŋ le, u ne nii.”

*Yesu juu Wia-dia*

*Maak 11.15-19; Luuk 19.45-48; Joŋ 2.13-22*

<sup>12</sup> Nii ne Yesu juu Wia-dia. Nialinj doŋsuŋ he dime a yiyalle kiaa, doŋsuŋ ma yuyoo kiaa. Yesu kiriba kala ta ba líi. Baalaa ma he dime a yiyere moribee. Yesu ŋmoo ba teebulba lo. Baalaa

doŋsuŋ ma yalle kokosuŋ. U ŋmoo ba ma kpasinninj a lo. <sup>13</sup> Nii ne Yesu bula piba a bul, “Ba ŋmuŋsa di Wia si, u dia jaŋ ŋaa lee-la niaa si jaŋ chuchuo le Wia, aŋ ka ma-na miira kaa birime gaari-dia.”

<sup>14</sup> Nii ne nyulimaa ari gbe-gisinj kó Yesu teenj Wia-dia le. U vaareba. <sup>15</sup> Ama nialinj si kpu pusuj pipi Wia kuhiasinj ari Wia teninj kerichiba si na wu-magila-la u síi ŋaa a bira na haŋbiisinj síi ŋaa goŋ ŋii Wia-dia le, ba na baaninj. Haŋbiisila fa yire, “Tabarikala Devit nihinj.” <sup>16</sup> Nii ne nialinj si kpu pusuj pipi Wia ari Wia teninj kerichiba piése Yesu a bul, “Ŋ nii wialinj ba síi bul nee?” Yesu bul, “Mi nia ne.” Nii ne Yesu ma piéseba, “Ma bi Wia teninj karimaa? Ba ŋmuŋse Wia teninj tuoŋ a bul, ‘Wia jaŋ leŋ di bii-mulluŋ didenne Wia.’ ”

<sup>17</sup> Nii ne Yesu leŋba aŋ síi mu Betani a chua dime.

*Yesu kaliba he tutogo le  
Maak 11.12-14, 20-24*

<sup>18</sup> Taŋ si pula, Yesu miira mu Jerusalem. U síi mu, losuŋ kenu woŋbiinj le. <sup>19</sup> U na tutogo duu chinj u sipaan woŋbiinj niinj. U mu yi tutogo-la bubuoŋ a wula ben di nenene tuo, see pipaariŋ. Nii ne u bul tia-la le a bul, “A líi jiniŋ a kaa mumu, ŋ bira bi jaŋ neŋ.” Tia-la guu suu. <sup>20</sup> U haritooro si na wiinj deenj, u ŋaaba wukpuŋkpere. Ba pipiése doŋo a bul, “Ee ne tia-la guu suu

lima nii?" <sup>21</sup> Nii ne Yesu bula piba a bul, "Wutitii ne mi bulaa pima, di ma ne ken yarida a bi tuosaa balia kene, ma ma jan wuo naa wii-la si naa tutogo-la le. Nla ma dunɗunɗa dee, ama ma jan wuo paala bul peelin deen le duu sii a mu tel muga tuɗɗɗɗ. U jan naa pima. <sup>22</sup> Kialin-na kala ma si chuɗle Wia a susul, di ma ne ken yarida, ma jan naba."

*Niaa piɛɛɛ Yesu u dolun wiaa*

*Maak 11.27-33; Luuk 20.1-8*

<sup>23</sup> Ba si mu Jerusalem, Yesu mu juu Wia-dia. U si juu Wia-dia-la nii a didage niaa, nialin si kpu pusun pipi Wia kuhiasin ari Wia tenin kerichiba ari Juu tinjaa kuhiasin, ba kala sii ko u teen a piɛsu a bul, "Dol beɛ ne η ken a ninjaa wiaa deenba? Kubɛɛ ne pin dolun η kaa ninjaa nii?" <sup>24</sup> Nii ne Yesu bula piba a bul, "Mi ma jan piɛɛɛma wu-bala. Di ma ne dagemi u bubuɗɗɗ, mi ma jan dagema dol-la mi si kene bubuɗɗɗ." <sup>25</sup> Nii ne u piɛɛɛba a bul, "Jɗɗɗɗ, Wia lii-foori-la dolun, u lii nii ne? U lii Wia teen neɛ koo u lii nuhuobiine teen neɛ? Má dagemi." Ba suomo ken wii-la lilere dɗɗɗɗ le aa bul, "Wu-beɛ ne laa che di la bul? Di la ne bula pu a bul di Wia teen ne u lii, u jan piɛɛɛla a bul, 'Beɛ ne saa tii ma bi wialin u si bula laa dii?' <sup>26</sup> Di la ne saa si u lii nuhuobiine teen ne, fawullun jan kenla

a tin ni-dan-la si chin dime wiaa. Niaa bula ari Jɗɗɗɗ fa sene nja nialin sii bul wiaa, Wia Din-zɗɗɗɗ-la dolun le dɗɗɗɗ ne." <sup>27</sup> Nii ne ba bula pi Yesu a bul, "La bi jin." Nii ne Yesu ma bula piba a bul, "Tɗɗɗ, mi ma bi jan dagema dol-la mi si kene bubuɗɗɗ."

<sup>28</sup> Nii ne Yesu mage namaga a pi nialin si kpu pusun pipi Wia kuhiasin ari Juu tinjaa a bul, "Baal kubala ne he dime a ken hanbolibiisin balia. U sii mu u bii-hian teen a bula pu a bul, 'Mi bii, mu бага jinin a tin.' <sup>29</sup> Nii ne bile bul, 'Mi bi jan mu бага jinin.' U nii hariɗ le, u tuɗɗɗ chei wii-la u si bula pi u nyimma le an sii mu бага-la. Nii ne ba nyimma bira mu a bul u bii-bie-la ma le a bul duu mu бага. Nii ne bile bul duu jan mu an via. <sup>30-31</sup> Hanbiisin deenba balia tuɗɗɗ, kubɛɛ ne to ba nyimma niin le? Beɛ ne ma biine?" Nii ne ba bula pu di u bii-hian-la ne. Nii ne Yesu bula piba a bul, "Wutitii, mi bulaa pima ari lanpoo lilaaraa ari jagumu-loba jan laa sipaan ma le a juu Wia kuorii-la tuɗɗɗ. <sup>32</sup> Beɛ wiaa Jɗɗɗɗ Wia lii-foori-la ko a dagema wonbii-titii-la ne ma si jan to, an ka ma bi u wiaa laa dii, ama lanpoo lilaaraa ari jagumu-loba, ba laa u wiaa dii. Ma si paala na ba si laa u wiaa dii nii, an ka ma ha bi birima di ma laa u wiaa dii."

*Yesu mage namaga a tige*

*nialinj sii tij tintinjnaa бага ле*  
*Maak 12.1-12; Luuk 20.9-19*

<sup>33</sup> Nii ne Yesu bira mage namaga donjo a bul, "Baal kubala ne bil бага a chonse kiasa si ken nenene yuge a nage chichuene. Ba yiyire gireps. U saa lige бага-la gollu ne. U lu bua бага-la tuon di ba chage tii-nene-la liinj hihe. U ma saa lusun nyun dia a hono po. Nii ne u paa niaa a he u бага-la tuon di ba titinj. Ka u mu tan donjo.

<sup>34</sup> Tii-nene-la biininj si yie, u tij u dia tintinnaa di ba mu tintinna-la teenj di ba mu laa tii-nene-la kaa ko. Ba mu. <sup>35</sup> Ba ken donjo a nmobu, a kpu donjo, a yage donjo ari tabiaa a kpuu. <sup>36</sup> Nii ne u tij niaa donsunj a wasa kii bunbun-la. Ba naa nii titia nialinj ma le. <sup>37</sup> Nii harinj le ne u tij u bie. U biina duu bie ne mua, ba jan zilu. U ma bira mu. <sup>38</sup> Tintinna-la si na bile, ba bula pi donjo a bul, 'Di бага-la tiina ne suba, bie deenj ne jan dii u kiasa. Ma ko di la kpuu. Di la ne kpuu, la ne jan miira tii u kialinj.'

<sup>39</sup> Ba ken bile a jonu yuo ta бага-la harinj a kpuu." <sup>40</sup> Nii ne Yesu pieseba, "Di бага-la tiina ne ko, ee ne u jan naa бага tintinna-la le?" <sup>41</sup> Nii ne ba bula pu a bul, "U jan ko a kpu ni-bomo-la an jon бага-la a pi ni-tania. Di tii-nenene-la biininj ne yi, ba jan kenj tii-nene-la kaa mu pu."

<sup>42</sup> Nii ne Yesu piese nialinj si nii namaga-la, "Ma bi Wia

tenj-la karimaa? a mu yi leela ba si bul nla:

'Tiebi-la dii-saaraa si via, u ne miira ku naa tiebi-duonj ba si jonjo bil dia gentine.

La Tiina Wia tintinjnaa ne nii.

U naala wu-kpunkpere ne.' "

<sup>43</sup> Nii ne Yesu bula pi nialinj a bul, "Wia jan kenj u kuorii-la laa ma teenj, a jonjo pi nialinj si jan to Wia niinj worunj a njnaa wialinj si jan dage ari ba birima lii ba haacheba le ne. [ <sup>44</sup> Nii-la si tel tiebi-la nyun, u tiina jan yere muno muno. Di tiebi-la ma ne tel nuu-kala nyun, u jan yere u tiina muno muno.]"

<sup>45</sup> Nialinj si kpu pusun pipi Wia kuhiasinj ari Farisii tintjnaa nii Yesu si mage namaga-la a jinj ari ba wiaa ne u bubul nii. <sup>46</sup> Nii ne ba wiwalime di ba kenu kaa mu to dia. Ama ba faa fa ni-danj-la si he dime, bee wiaa ni-danj-la jon Yesu ari u naa nialinj sii bul wiaa, Wia Din-zonj-la dolun le donjo ne.

## 22

*Yesu mage namaga a tige ha-jaari gbiele kudiilee le*

*Luuk 14.15-24*

<sup>1</sup> Nii ne Yesu bira mage namaga donjo a didage niaa.

<sup>2</sup> U si, "Wia kuorii-la nage kuoru kubala ne. U bie jaa haala. Nii ne u naa ba gbig-bieli ha-jaari gbiele a naa ba yire niaa di ba ko gbiele-la.

<sup>3</sup> Ba si naa kudiile-la dere, u tij u tintinnaa di ba mu yire nialinj u si yira, ari ba

ɲaa siri di ba gbieli gbiele-la nɛ. Ba si mu yireba, ba via. <sup>4</sup> Nii nɛ u bira tiɲ u tiɲtinnaa dɔɲsuɲ di ba mu bula pi nialiɲ u si yira di ba kpu nɛ-belliɲ ari nɛ-niiniɲ kala nɛ a ɲaa kudiile-la dɛrɛ, di ba kɔ ha-jaari gbiele-la. <sup>5</sup> Nii nɛ nialiɲ u si yira bira via di ba mu aɲ titiɲ ba tiɲtiɲɲaa. Dɔɲɔ sii mu u бага, dɔɲɔ ma sii mu u kiaa di-yalliɲ. <sup>6</sup> Ka dɔɲsuɲ ma kɛsɛ kuoro dia tiɲtinna-la a ɲmooba aɲ kpuba. <sup>7</sup> Nii nɛ kuoru-la na baaniɲ a ta u laali-yuoroo. Ba mu kpu nialiɲ si kpu u dia tiɲtinna-la aɲ nyigɛ ba taɲ kala. <sup>8</sup> Nii nɛ u yirɛ u tiɲtinnaa dɔɲsuɲ a bira bula piba, 'Mi gbiele kudiile-la ɲaa siri nɛ, ama nialiɲ mi si yira bi maga di ba kɔ gbiele-la. <sup>9</sup> Má saa lii mu wonbii-porunuɲ a yirɛ nialiɲ kala ma si na dime a bula piba di ba kɔ a dii kudiile-la.' <sup>10</sup> Nii nɛ tiɲtinna-la lii wonbii-porunu-la a yirɛ nialiɲ kala ba si na lee-la, ni-zɔɲɲɔ ari ni-bɔɲɲɔ kala. Nii nɛ ba kala ku juu sɹ dia-la lɛ ba fa sii gbieli gbiele-la.

<sup>11</sup> Nii nɛ kuoru-la juu duu na nialiɲ si kɔ a na baal kubala duu bi ha-jaari gbiele gerin laala. <sup>12</sup> U piɛsu a bul, 'Mi nanɔɲ, ɛɛ nɛ ɲ ɲaa ku juu daha aɲ bi ha-jaari gbiele gerin laala?' Baal-la toɛ u niin. <sup>13</sup> Nii nɛ kuoru-la bula pi u tiɲtinnaa a bul, 'Má kɛɲ baala deɲ a vɔɔ u nisaa ari u naasiɲ a joɲu yuo ta jeɲ hariɲ birimiɲ tuɔɲ

duu pina yiyel aɲ didiɲ u nyilaa.' " <sup>14</sup> Nii nɛ Yesu bula dɛrɛ aɲ bul, "Ba yie yirɛ niaa yugɛ nɛ, ama ba tuɔɲ ba yie tuɔsɛ niaa banmɛnɛ nɛ."

*Ba bul lanpoo timin wiaa  
Maak 12.13-17; Luuk  
20.20-26*

<sup>15</sup> Nii nɛ Farisii tiɲɲaa sii lii a vuurɛ ɲii ba si jaɲ magisɛ Yesu a bɛrɛ kɛnu ari wu-piɛsaa. Nii nɛ ba tiɲ ba haritooroo dɔɲsuɲ ari Herɔd ma haritooroo dɔɲsuɲ di ba mu Yesu teen. <sup>16</sup> Nii nɛ ba kɔ u teen a piɛsu a bul, "La kuhian, la jima di ɲ kɛɲ wu-titii nɛ a didagɛ Wia tonuɲ wonbii-titii-la. N sipaan tuo nuu lɛ. N bi ni-bal sii ka fá. <sup>17</sup> Saa bula pila ari u ɲaa wonbii nɛɛ di la tiɲ lanpoo a pi Rom tiɲteen kuori-balin ba sii yirɛ Siiza? ɛɛ nɛ ɲ ma biinɛ?" <sup>18</sup> Yesu fa jin ba tuɔbiin-bɔmɔ-la nɛ a bula piba a bul, "Ma kanfugi timma! Bɛɛ nɛ tii maa magisemi? <sup>19</sup> Má kɛɲ ma lanpo-la moribiin kaa kɔ di mi bee na." <sup>20</sup> Ba kɛɲ dɔɲɔ kaa kɔ. Nii nɛ u piɛseba, "Kubɛɛ nyuɲ nɛ hɛ dime? Kubɛɛ yirin ma nɛ ba tuuro hɛ moribii-la lɛ?" <sup>21</sup> Nii nɛ ba bul di Siiza yirin nɛ. U bula piba a bul, "Tɔɔ, má joɲ Rom tiɲteen kuori-bal-la kiaa pu aɲ joɲ Wia ma kiaa pu." <sup>22</sup> Yesu si bul ɲii, u ɲaaba wu-kpuɲkpere ba sii viiri.

*Ba piɛsɛ Yesu a tige nialiɲ  
si suba lɛ.*

*Maak 12.18-27; Luuk*



## 20.27-40

<sup>23</sup> Chεε-la titia nialin dɔŋsuŋ ba sii yire Sadusii tinŋaa, ba kɔ u teen. Sadusii tinŋaa yie si di nuu ne suba, u bira bi sii. Ba piesu wiaa a bul, <sup>24</sup> “La kuhian, Moosis fa si di baala ne jaa haala, di haal-la ari baal-la ne bi bii lula, aŋ ka di baal-la suu, u maga di u ŋaana jon yo-haal-la jaa ne. Di u lul biirin pi u maala-la si suba, biiri-la jan chin u nyun le. <sup>25</sup> Naanbiirin balipe ne fa he dime. Ba kala ŋaa baalaa. Ba naan kubala, ba nyimma kubala. Ba kuhian jaa haala. Ba di haal-la bi bii lula, aŋ ka u suu. U si suba, u ka haal-la a pi u ŋaana dɔŋɔ ne. <sup>26</sup> Liamin ma suu. Torimun tiina ma jon haal-la jaa. U ma nii titia ne. Naanbiiri-la balipe kala ne jaa haal-la. U bi lula. <sup>27</sup> Nii hariŋ le ne haal-la ma titia suu. <sup>28</sup> Tapulii-la niaa si jan sii suun le, baalaa deenba balipe tuon, kubee ne jan tii haal-la? Ba kala balipe ne jaau.”

<sup>29</sup> Nii ne Yesu bula piba a bul, “Ma bi Wia tenin jin. Ma ma bi Wia dolun jin. Nii ne tii ma yenŋi. <sup>30</sup> Tapulii-la niaa si jan sii suun le, baalaa bira bi jan jaa haalaa, haalaa ma bira bi jan jaa balaba. Ba kala jan nage Wia tinɗaraa si he Wia-jan le.”

<sup>31</sup> Nii ne Yesu bula piba a bul, “Na ma piesemi nialin si jan sii suun le wiaa ne. Ma bi karime wialin Wia fa si bula pi niaa u tenin lee? <sup>32</sup> U

fa si duu ne ŋaa Abiraham Wia ari Aizik Wia ari Jekob kala Wia. (Bua-la le u si bul nii di Abiraham ari Aizik ari Jekob fa suba ne.) Wiaa deenba u si bula, ba bubuon ne di Abiraham ari Aizik ari Jekob bira sii suun le ne a he Wia kuorii-la tuon. Wia bi jan wuo ŋaa nialin si suba Wia, u ŋaa ni-weyee Wia ne.” <sup>33</sup> Ni-dan-la si nii nii u sii dage niaa, u ŋaaba wu-kpunkpere.

*Wialin si maga di la  
ŋinŋaa, ba tuon wu-balin*

*Maak 12.28-34; Luuk  
10.25-28*

<sup>34</sup> Farisii tinŋaa si nia ari Yesu bul wiaa lo Sadusii tinŋaa ba ŋaa fuii, ba kala ku pe dɔŋɔ le. <sup>35</sup> Nii ne Wia tenin kerichiba dɔŋɔ wi-walime duu magise Yesu a pipiesu wiaa. <sup>36</sup> U piese Yesu a bul, “Kuhian, wialin Wia si dage niaa baa to, kubee ne ŋaa ba tuon siifian wiin?” <sup>37</sup> Nii ne Yesu bul, “‘Ken ŋ tuon kala ari ŋ tuobiinaa kala ari ŋ wii-wii-kala a cho ŋ Tiina Wia.’ <sup>38</sup> Wialin Wia si dage niaa baa to, ba tuon wu-balin ari ba tuon bunbun ne nii ari ba tuon siifian wiin ne nii. <sup>39</sup> Wu-liamin ma ne ŋla: ‘Cho ŋ dɔŋɔ tiina ari ŋ si cho ŋ titia nii.’ <sup>40</sup> Wialin Moosis fa si ŋmunsa bil di niaa tuto ari wialin kala nialin sii bul wiaa, Wia Din-zon-la dolun le, ba kala lii wiaa deenba baliamin tuon ne.”

*Ba piεε nii-la Wia si liisa wiaa.*

*Maak 12.35-37; Luuk 20.41-44*

<sup>41</sup> Farisii tinjaa ha si hilimi nii, Yesu ma piεεba a bul, <sup>42</sup> "Bεε ne ma biine Kirisito, nii-la Wia si liisa wiaa? Kubεε doho nuu ne u njaa?" Nii ne ba bul duu njaa Devit doho nuu ne. <sup>43</sup> Nii ne Yesu bira piεεba a bul, "Bεε ne saa tii Wia Diη-zonj-la fa dage Devit duu kenu yire u Tiina?" <sup>44</sup> Nla ne u bul:

'Mi Tiina Wia bula pi mi Tiina  
duu honj u seme, ni-duonj di-honuj,  
see duu yuo dii u diηdohonoo kala dere.'

<sup>45</sup> Devit titia si yire nia deen u Tiina, εε ne saa u janj wuo njaa u nihinj dundunja?"

<sup>46</sup> Yesu si bul nii, nuu-kala bira bi wii wuo bul. A chinj tapulii-la kala a kaa mu, nuu-kala ma bira bi nyu-duonj kene duu piesu wii-kala.

## 23

*Yesu bul wiaa, Wia tenij kerichiba ari Farisii tinjaa teenj*

*Maak 12.38-40; Luuk 11.39-44, 46, 52; 20.45-47*

<sup>1</sup> Nii ne Yesu bula pi nidaη-la ari u haritooroo a bul, <sup>2</sup> "Wia tenij kerichiba-la ari Farisii timma-la, ba ne njaa nialinj sii dage wialinj Moosis fa si bile di niaa tuto. <sup>3</sup> Nii wiaa ma maga di ma to wialinj kala ba si bula pima di ma njaa, ama ma si ba wu-njaalaa chesu, bεε wiaa

ba titia bi wialinj ba sii dagu ka to. <sup>4</sup> Ba yie voo chugiyunoo ne a kaa chuj niaa, ama ba titia bi che di ba peba le a laa chuga-la. <sup>5</sup> Ba yie njaa wii-kala di niaa naba ne. Ba yie ηmunse Wia niinj wiaa a he tenj-jalaa le a kaa vuvoo ba genninj nisaa le ari ba nyun-chuulunj le anj lenj ba genninj juosaa ma duomi duomi. <sup>6</sup> Di niaa ne yireba di ba ku dii kiaa, ba cho di ba honj ni-balaa di-honoo. Ba ne juu Wii-chuole diisinj maa, ba cho di ba honj ni-balaa di-honoo. <sup>7</sup> Ba yie chiche di niaa chuchuoleba anj jujonjba jirima niaa tuonj anj yiyireba kerichiba. <sup>8</sup> Ama ma-na si lenje di niaa kenma kaa yire kerichiba. Ma kala njaa naanbiirinj ne. Ma kala kerichi njaa kubala ne. <sup>9</sup> U saa bi maga di ma yire nuu-kala ma nyimma dunia deenj le, bεε wiaa ma Nyimma njaa kubala ne a he Wia-janj. <sup>10</sup> Ma bira si nuu-kala yire ma kuhianj, bεε wiaa ma kuhianj ne njaa Kirisito, nii-la Wia si liisa. <sup>11</sup> U maga di ma tuonj kuhianj ne birime hanjbie a tinj tinjinjaa pipima. <sup>12</sup> Nii-la kala sii bigisi u titia le, Wia janj kenu muuri, ka nii-la ma si kenj u titia muuri, Wia janj njaa duu yuge.

<sup>13</sup> Ma Wia teninj kerichiba ari ma Farisii tinjaa, ma kanfugi timma-la, ma janj na heenj. Ma kenj Wia kuorii-la dia-boro yage ne di niaa si juu, bεε wiaa ma titia bi che di ma juu, anj bira po

di nialin sii walime di ba juu, di ba ma si juu. [ <sup>14</sup> Ma Wia tenin kerichiba-la ari ma Farisii timma-la, ma kanfugi timma-la, ma jan na heen. Ma yie ken yo-haalaa kiaa laa didii a yie fugo chuole Wia didieni. Bua-la le Wia si jan dii ma sariya, ma ne jan na heen a kii nuu-kala.]

<sup>15-16</sup> Ma Wia tenin kerichiba ari ma Farisii tinjaa, ma kanfugi timma-la, ma jan na heen. Ma yie sii a duori liin a mu tintheyee donsun a bul Wia wiaa dime. Di ni-bala ne laa dii, ma yie len u wasa bon a nage ma si nage nii ne. Wia ma jan jonu he nyinin le ari u si jan jonma he nii. Ma nyulun sipaa-laaraa, ma jan na heen. Ma yie bul, 'Di nuu ne nmiese Wia-dia, u bi nmian jaa, ama duu ne nmiese selime kialin si he Wia-dia tuon, u chaasa nmiese nmian ne.' <sup>17</sup> Ma nyulun-toon ne! Selime kialin si he Wia-dia tuon ari dia-la si jaa selime-la bi disinnin kene, deenba balia tuon kubee ne yuga? <sup>18</sup> Ma bira bula di nuu ne nmiese koru-la le ba si kpu pusun pipi Wia, u bi chaasa nmiese nmian, ama duu ne nmiese ku-la ba si yie jonon dan koru-la nyun a pi Wia, u chaasa nmiese nmian ne. <sup>19</sup> Ma nyulimaa, ku-la ba si yie jonon dan koru-la nyun ari koru-la si jaa di ku-la bi disinnin kene, kiaa deenba balia tuon kubee ne yuga?

<sup>20</sup> Nii wiaa di nuu ne nmiese koru-la le ba si yie kpu pusun pipi Wia, u yie nmiese ba di ku-la kala ne ba si yie jonon dan u nyun a pi Wia. <sup>21</sup> Di nuu ne bira nmiese Wia-dia, u nmiese Wia dia-la ari Wia kala ne, bee wiaa Wia he dia-la le ne. <sup>22</sup> Di nuu ne bira nmiese Wia-jan, u nmiese Wia kuori-kpasa-la ari nii-la si hon u le ma ne.

<sup>23</sup> Ma Wia tenin kerichiba ari ma Farisii tinjaa, ma kanfugi timma-la, ma jan na heen. Di ma jaa pipaari-la suora si sima, ari pipaari-la si heye, ari pipaa-diilee, ma yie kenba kala kaa kpaa leree fii a jon ba kun-kala lerin donon a pi Wia an via di ma to siifan wialin Moosis fa si bile pima di ma tuto. Ba ne nla: Ma to wutitii wonbiin a fa niaa nennige a laa Wia dii. U maga di ma kpaa ma kialin leree fii fii ne a jon kubala pi Wia, ama u bi maga di ma via wutitii wonbiin. <sup>24</sup> Ma nyulun sipaa-laaraa! Ma yie chuori ma sinin a liise nanchuosun kala ta an bi buntanjaba na an lilin.

<sup>25</sup> Ma Wia tenin kerichiba ari ma Farisii tinjaa, ma kanfugi timma-la, ma jan na heen. Ma yie chese ma nyunyualusun ari ma gbanjin harin worun di ba zon an bi ba tuon ka tisi, ka ba tuon kala birisi. Ma nage nyunyulun ari gbanjin deenba ne. Ma yaraa ne zom, ama ma tuon le ma to ma tuoton le a gi-

gaa niaa kiaa. <sup>26</sup> Ma nyulun Farisii tinjaa, má laa sipaan tiisi ma nyunyualun tuon an-na tiisi hariñ ma duu zon.

<sup>27</sup> Ma Wia tenin kerichiba ari ma Farisii tinjaa, ma kanfugi timma-la, ma jan na heen. Ma nage vaamaa ba si ken tuorun bugen. Ba hariñ zon, an ka ba tuon kala su ari hanjbelee ari nisunun. <sup>28</sup> Nii titia ne ma ma nage niaa teen. Di ba nama, ba yie biine di ma nja nizomō ne, ka ma tuon su ari wu-bonjoo ari kanfugi wu-naalaa.

*Yesu bul niaa dogisun wiaa.*

*Luuk 11.47-51*

<sup>29</sup> Ma Wia tenin kerichiba ari ma Farisii tinjaa, ma jan na heen. Ma kpu nialin fa sii bul wiaa, Wia Din-zon-la dolun le, an ka ma saa ba vaamaa. <sup>30</sup> Ma si, 'Di la ne fa he dime bua-la le la naabalimaba fa si he ba miisin le, la fa bi jan nja nii ba si nja a kpu nialin.'

<sup>31</sup> Ama ma si yireba ma naabalimaba nii, ma sene sei ari ma nja nialin si kpu nialin fa sii bul wiaa, Wia Din-zon-la dolun le, ba doho niaa ne. <sup>32</sup> Má saa mu a dere wialin ma naabalimaba fa si suomo a njjaa. <sup>33</sup> Ma ni-bonjoo ari ma ni-bonjoo biirin, ma biina ari ma jan wuo fá kage Wia nyin-la lee? Ai. <sup>34</sup> Nii wiaa, mi jan bira tin nialin sii bul wiaa, Wia Din-zon-la dolun le ari wu-jinnaa ari kerichiba.

Ma jan kpu donsun a ken

donsun kpaasa mere daagee nyun, a viire donsun maa, ma Wii-chuole diisin le, a to naasin dogise donsun maa tasin donsun le. <sup>35</sup> Wia jan dogise jinin niaa a tin ba si kpu niaa, a chin bua-la le ba si kpu nialin si bi wii cheye, a suomi Ebil le a kaa ko bua-la le ba si kpu Zekaraya, Berakia bie. Ba kpuu Wia-dia tuon a kpage koru-la nyun ba si yie nyige pusun pipi Wia ne. Ba cheerin jan he ba nyun. <sup>36</sup> Wutitii ne mi bulaa pima, dogisunu-la Wia si jan dogise ni-kpuuraa deenba, u jan jonjo dogise jinin niaa.

*Yesu bul wiaa a tige Jerusalem niaa le*

*Luuk 13.34-35*

<sup>37</sup> Ma Jerusalem niaa, ma kpu nialin sii bul wiaa, Wia Din-zon-la dolun le a jon tabiaa a yage tinjaara-la Wia si tima di ba ko ma teen. Naansiin yuga ne mi fa cho di mi chu to ma niaa kala ari jimin si yie chu to u biirin nii, ka ma bi seye. <sup>38</sup> Bee na, Wia jan lej ma tan pima. <sup>39</sup> Ma bira bi jan nami see bua-la le ma si jan chuolemi a bul, 'Wia jan pe nii-la sii ko la Tiina Wia dolun le.' "

## 24

*Yesu bul Wia-dia nmlonun wiaa*

*Maak 13.1-2; Luuk 21.5-6*

<sup>1</sup> Nii ne Yesu sii lii Wia-dia-la le a viiri. Nii ne u haritooro ko a bula pu duu bee na Wia-dia-la si zomo nii, u jan kala ma saa zomo

ñii nɛ. <sup>2</sup> Nii nɛ Yesu si, “Oo, ma bee na u si zɔmɔ ñii nɛ. Wutitii, mi bulaa pima, ba jaŋ ñmoo jaŋ-la kala lo. Ba bi jaŋ leŋ di tiebii-bala ma ka daŋ u dɔŋɔ lɛ.”

*Dɔgisuŋ ari wiwalimaa.*

*Maak 13.3-13; Luuk 21.7-19*

<sup>3</sup> Nii nɛ Yesu mu hoŋ Oliv peel-la nyuŋ. U haritooro luɔra kɔ u teen a bira piɛsu a bul, “Bua bɛɛ lɛ nɛ wiaa deenba jaŋ ñaa? Bɛɛ kiaa nɛ la jaŋ na a jin bua-la lɛ ŋ si jaŋ kɔ, ari bua-la lɛ dunia si jaŋ dɛrɛ?” <sup>4</sup> Nii nɛ Yesu bula piba a bul, “Má keŋ ma titia woruŋ di nuu-kala síma nyisu. <sup>5</sup> Niaa jaŋ yuge a kɔ a joŋ mi yirin he ari ba nɛ ñaa Kirisito, a nyise niaa yuge. <sup>6</sup> Ma jaŋ nii ari laalin he daha a he di-bolii. Di ma nɛ ku nii ñii, ma sí leŋe di ma boye joŋ. Wiaa deenba kala jaŋ ñaa bal, ama dunia diderin ha dee ñii. <sup>7</sup> Tinteen dɔŋɔ niaa jaŋ sii a mu a yuo tinteen dɔŋɔ niaa. Taŋ kuoro ari u niaa jaŋ sii giri a mu yuo kuoro dɔŋɔ ari u niaa. Losuŋ ma jaŋ juu. Tinteen jaŋ zigili leree yuge. <sup>8</sup> Hɛɛŋ di-suomuŋ nɛ ñla.

<sup>9</sup> Ba jaŋ kesema a joŋma he niaa nisin lɛ di ba dɔgisema aŋ kpu ma dɔŋsuŋ. <sup>10</sup> Tintee dɔŋsuŋ niaa kala jaŋ berema a tin mi wiaa. Bua-la lɛ niaa jaŋ yuge a joŋ ba yarida ta, ba jaŋ joŋ dɔŋɔ yiyalle, a bere dɔŋɔ maa. <sup>11</sup> Nialin si nyia wiaa a

bul di baa bul wiaa, Wia Diŋ-zɔŋ-la doluŋ lɛ, ba jaŋ yuge a kɔ a nyise niaa yuge. <sup>12</sup> Wubɔŋɔɔ jaŋ purike. A tin ñii wiaa niaa fa si cho niaa ñii, ba chonu-la jaŋ dɛrɛ. <sup>13</sup> Ama nii-la kala si nyalime a mu dɛrɛ, Wia jaŋ laau ta. <sup>14</sup> Ba jaŋ laa sipaŋ bul Wia wuzɔmɔ-la a tige Wia kuorii-la lɛ lee-na kala di dunia nuu-kala nii, ka di dunia diderin-na yi.

*Yesu bul wiaa a tige ku-lɔru-la si jaŋ he dime*

*Maak 13.14-23; Luuk 21.20-24*

<sup>15</sup> Ma jaŋ na ku-lɔru-la, u wiaa Daniel fa si bula. Daniel fa ñaa nii-la sii bul wiaa, Wia Diŋ-zɔŋ-la doluŋ lɛ nɛ. Ba jaŋ joŋ ku-la bil Wia-dia lɛ, lee-la si bi disinnin kene (lee-la nii-la si keŋ disinnin si bi maga duu mu). Ma nialin si karime wiaa deenba, ma jaŋ jin ba bubuɔsaa. <sup>16</sup> Di ma na ñii, má leŋ di nialin si he Judiya lɛ, di ba fá jil peelee nyuŋ a faa. <sup>17</sup> Di nuu nɛ he u lusun nyuŋ a nii wiaa deenba, di u nɛ ku tuu, duu sí u dia juu a chiche duu paa u kiaa dia lɛ. <sup>18</sup> Di nuu-kala nɛ he u baga lɛ a nii wiaa deenba, duu sí miira mu dia a chiche duu paa u gennin. <sup>19</sup> Nialin si keŋ luoroo ari nialin si noŋe biirin, oi, ba jaŋ na hɛɛŋ woruŋ. <sup>20</sup> Má sul Wia di wiin deen sí yibiinin koo che-wiesin ñaa. <sup>21</sup> Wia si ñaa dunia a kuu lii jinin, nuu-kala ha bi hɛɛ-yiri deen na a nage ñii, ba bira bi jaŋ

na heeη nii a kaa mu wuu.  
<sup>22</sup> Di Wia fa bi tapulia-la kere ta, ni-bala ma fa bi jaη ka. Ama nialin Wia si liisa di baa tou, ba wiaa ne tii u keritapulia-la ta. <sup>23</sup> Di nuu-kala ne bula pin di η beη daha a na Kirisito-la, koo di η beη dime a nau, siu yarida ηaa.  
<sup>24</sup> Niaa doηsun jaη sii fugo bul di ba ne ηaa Kirisito, nii-la Wia si liisa. Doηsun ma jaη sii fugo bul di ba ηaa nialin sii bul wiaa, Wia Diη-zoη-la doluη le ne. Ba jaη ηaa wu-magilaa ari wukpuηkperisin kala a chiche di ba nyise nialin Wia si liisa di baa toba. <sup>25</sup> Wiaa deenba kala mi laa sipaη bula pima ne, ka di bua-la-na yi. <sup>26</sup> Má bee na, di niaa ne bula pima ari nii-la Wia si liisa ne he giri-bine tuoη, ma si dime mu, koo di ba ne bula pima ari u ne faa daha, ma si laa dii, <sup>27</sup> bee wiaa bua-la le mi-na Nuhuobiine Bie si jaη miira ko, u jaη nage duonuη si ligisa, pulumuη chaane wia nyuη nii a lii wii-posuη a tuu wii-juuluη. <sup>28</sup> Lee-la kala kupua si pina, duunoo ma yie hihilimi ne.”

*Nuhuobiine Bie koηnuη wiaa*

*Maak 13.24-27; Luuk 21.25-28*

<sup>29</sup> Nii ne Yesu bira bula piba a bul, “Tapulia-la heeη deeη si jaη dere, u bira bi jaη dieni, di taη ne pula maa, lerin jaη biri, chene ma bira bi jaη pose. Chenwulaa jaη lii wia nyuη ku tuu titel. Ba jaη kiri wia nyuη

kialin kala si keη doluη di ba lii ba leree. <sup>30</sup> Nii ne ma jaη na mi-na Nuhuobiine Bie magilin wia nyuη. Di dunia niaa ne nau, ba kala jaη yel. Nii le ne ma jaη na mi-na Nuhuobiine Bie, di mi to duoηbilingbaanaa tuoη ku tuu. Mi jaη keη doluη yuge a chaane. <sup>31</sup> Nii ne ba jaη ηmuu nyil-balin, a tin Wia tindaaraa di ba mu dunia seme-na kala a keη nialin kala Wia si liisa di baa tou a hilimi.

*Yesu bul tutogo wiaa*

*Maak 13.28-31; Luuk 21.29-33*

<sup>32</sup> Di ma na sojaamin ne kuu tose, ma jima ari linbaηa yie ne. <sup>33</sup> Namaga deeη dagema wu-jimin ne. Di ma na wiaa deenba kala di baa ηaa, ma jin di mi-na Nuhuobiine Bie kpaga ne. <sup>34</sup> Wutitii mi bulaa pima, ma leele niaa deenba si he misin le bi jaη suu, ka wiaa deenba ηaa bal. <sup>35</sup> Wia nyuη ari tinteen kala jaη dere, ama wialin mi si bula bi jaη lel.

*Yesu bul duu jaη ko bua-la le la si buu yiele*

*Maak 13.32-37; Luuk 17.26-30, 34-36*

<sup>36</sup> Ama nuu-kala bi jaη jin chee-la wiaa deenba si jaη ηaa. Wia tindaaraa si he Wia-jaη ma paala bi jaη jin, see mi Nyimma dunduηa. <sup>37</sup> Bua-la le mi-na Nuhuobiine Bie si jaη miira ko, u jaη nage bua-la le Nowa fa si he u miisin le ne. <sup>38</sup> Ka di duonuη nii a su dunia,

nialinj dii kudiilee a nyunyua sininj. Baalaa ari haalaa ma jijaa dɔŋɔ a mu yi tapulii-la Nowa fa si juu liinj daboro-la tuɔŋ. <sup>39</sup> Ba fa bi jinj wiila kala si ŋaa see bua-la le lii-la si ku pɛlle paa ba kala, ba suu. Nii titia ne jan ŋaa bua-la le mi-na Nuhuobiine Bie si jan kɔ. <sup>40</sup> Bua-la le baalaa balia jan pipere бага le. Wia jan jon dɔŋɔ an len dɔŋɔ ta. <sup>41</sup> Haalaa balia ma jan nunɔŋ munun nɔmun le. Wia jan jon dɔŋɔ an len dɔŋɔ ta. <sup>42</sup> Má saa kenj ma titia worun, bee wiaa ma bi jinj tapulii-la ma Tiina si jan kɔ. <sup>43</sup> Di nuu ne fa jinj bua-la le gaara si jan ku gaa u kiaa u dia le, u fa jan honɔ pɔ u dia. U fa bi jan pinj donj. U jan wei a pɔ di gaaru-la si ku juu a gaa u kiaa. <sup>44</sup> Má ma saa ŋaa siri, bee wiaa mi-na Nuhuobiine Bie jan kɔ bua-la le ma si buu yiele.”

*Nii-la si ŋaa tintinni-titii ari nii-la si bi tintinni-titii ŋaa*

*Luuk 12.41-48*

<sup>45</sup> Nii ne la Tiina Yesu miira pieseba a bul, “Kubee ne saa ŋaa tintinni-titii-la si jinj wiaa? U ne nii-la u kuhianj si yie liise duu bibenj u dia, an pe pipi u tintinni-dɔŋsunj ma kudiilee. <sup>46</sup> Di tintinni-la ŋaa wialinj u kuhianj si dagu duu ŋaa, u tuɔŋ jan tɔre bua-la le u kuhianj-la si jan miira kɔ. <sup>47</sup> Wutitii, mi bulaa pima, u kuhianj-la jan jonj u kiaa kala he tintinna deenj nisinj le duu bibenj. <sup>48</sup> Ama

di tintinni-bɔmɔ-la ne bula pi u titia ari u kuhianj-la jan dieni <sup>49</sup> an suomo ŋmunmoo u tintinni-dɔŋsu-la, baalaa ari haalaa, an faasa didii kudiilee a nyua sininj bubugi, <sup>50</sup> duu ŋaa nii, u bi siri ŋaa gberɛ u kuhianj-la. U kuhianj-la jan kɔ tapulii-la le u si bi yiele. <sup>51</sup> U jan dɔgisu worun an kenu kaa mu he lee-la kanfugi timma-la si he. Lee-la ne niaa jan yel an didinj ba nyilaa.”

## 25

*Yesu mage namaga a tige haalaa fii le*

<sup>1</sup> Nii ne Yesu bira mage namaga. U si, “Bua kubala le Wia kuorii-la jan nage ŋla: Haalaa fii ne fa he dime. Ba sii a paa ba chaanaa a mu di ba chej hafalinj bala, ha-jaari gbiele-la le. <sup>2</sup> Haala-la deenba tuɔŋ banɔŋ yaare, ka banɔŋ ma kenj wu-jiminj. <sup>3</sup> Banɔŋ-la si yaara, ba bi nuunj logɔ kori, di ba chaanaa ne disa, di ba jonɔ he. <sup>4</sup> Ama banɔŋ-la si kenj wu-jiminj, ba loge nuunj kori. <sup>5</sup> Ha-falinj bala-la bi lima kɔ. Ba gberɛ gberɛ lol an jonɔ pinj donj. <sup>6</sup> Tita-siesee niaa yire, ‘Má bee na baalla ní kɔ, má ku lii chemu.’ <sup>7</sup> Nii ne haala-la kala sii a kenj ba chaanaa milima ta di ba jil. <sup>8</sup> Nii ne ni-yaara-la bula pi wu-jinna-la a bul, ‘La chaanaa che di ba dise ne, má pila nuunj mua.’ <sup>9</sup> Nii ne wu-jinna-la bula piba a bul, ‘Ai, ŋ bi pɔɔ nuu-la bi

janj yi la kala. Má mu yoo ma titia nuuj.’<sup>10</sup> Nii ne ba mu di ba yoo. Ba si mua di ba yoo nuu-la, ha-falinj bala-la ko. Haala-la banonj fa si nja siri, ba to u harinj a juu ha-jaari gbiele-la lerinj, ka ba kenj boinj to.<sup>11</sup> U nii harinj le haalaa banonj-la ku-kaanaa ma ko a bul, ‘La Tiina, la Tiina, kenj boro suro pila.’<sup>12</sup> Nii ne u bul, ‘Wutitii, mi bulaa pima, mi bima jinj.’<sup>13</sup> Nii wiaa má po ma titia le worunj. Ma bi jinj tapulii-la la Tiina Yesu si janj ko.”

*Yesu mage namaga a tige tintinnaa batori le.*

*Luuk 19.11-27*

<sup>14</sup> Nii ne Yesu bira mage namaga a tige Wia kuorii-la le. U si, “Bua kubala le Wia kuorii-la janj nage baal kubala si kenj u tintinnaa ne. Tapulii kubala u sii duu venj wonjbiinj. Nii ne u yire u tintinna-la ba ko. U jonj u kiaa he ba nisinj le di ba bibenj.<sup>15</sup> U kenj kialinj kaa kpaaba nii nuu-kala si wuo bibenj. U jonj siidi bui zo-balia a pi donjo duu bibenj, a jonj siidi bui mahinj banese a pi donjo maa anj jonj siidi bui mahinj balia a pi donjo-la maa. Nii ne ka u venj u wonjbii-la.<sup>16</sup> Tintinni-la si laa siidi bui zo-balia-la, u kaa mu a yoo kiaa a yalle a na siidi bui zo-balia nyuurunj.<sup>17</sup> Tintinni-la ma si laa siidi bui mahinj banese-la, u ma kenj u kiaa bibirime, a ma na siidi bui mahinj banese nyuurunj.<sup>18</sup> Ama tintinni-la si laa

siidi bui mahinj balia-la, u-na kaa mu lu bua a jonj moribie-la a hugi.<sup>19</sup> U diene worunj, ka tintinna-la batori kuhianj-la ko a yireba duu na ba kunj-kala si na nyuurunj mage nii.<sup>20</sup> Tintinni-la si laa siidi bui zo-balia-la kenj u kiaa ku juu anj bula pi u kuhianj a bul, ‘Nj pimi siidi bui zo-balia ne, mi ma na siidi bui zo-balia ne pe.’<sup>21</sup> Nii ne u kuhianj-la bula pu a bul, ‘Nj nja tintinni-titii ne. Nj he dolunj ne a wuo benj kubii-bie-la nyunj worunj, mi janj lenj di nj bibenj ku-kenee. Ku juu di la di nj kala ninii sima.’<sup>22</sup> Nii ne tintinni-la ma si laa siidi bui mahinj banese-la ma kenj u kiaa kaa ku juu a bula pi u kuhianj a bul, ‘Nj pimi siidi bui mahinj banese ne. Mi ma na siidi bui mahinj banese ne a pe.’<sup>23</sup> Nii ne u bula pu maa, ‘Nj ma nja tintinni-titii ne, nj ma he dolunj ne a wuo benj kubii-bie-la nyunj worunj, mi ma janj lenj di nj bibenj ku-kenee. Ku juu di la di nj kala nii sima.’<sup>24</sup> Nii ne tintinni-la u si jonj siidi bui mahinj balia pa, u ma ku juu a bul, ‘Mi kuhianj, mi jima ari nj nja ni-tere ne, nj yie kukunj kialinj nj si bi duo ne anj pipaa kialinj lee-la nj si bi tima.<sup>25</sup> Nii ne tii mi fifanj a jonj moribie-la a hugi tinteen di nj ko. Laa nj moribiee.’<sup>26</sup> Nii ne u kuhianj-la bula pu a bul, ‘Nj nja tintinni-bonj ne a kenj yariwiinj. Nj jima ari mi yie kukunj kialinj mi si bi duo ne a paa kiaa lee-la mi si bi



tima. <sup>27</sup> N si jinŋ ɲla ɛ, u fa maga di ɲ jonŋ mi moribiee bil lee-la ba sii bil moribiee nɛ. Mi fa si miira kɔ ɲla, mi fa janŋ laa moribie-la ari mi nyuurunŋ kala. <sup>28</sup> Nii-na má laa moribie-la u teenŋ a jonŋ pi nii-la si kenŋ siidi bui zɔ-banɛɛ-la.' " <sup>29</sup> Nii nɛ Yesu bula piba a bul, "Nii-la si paala kenŋ kiaa yuge nɛ, Wia janŋ wasa che a pɛ pu duu kaa yuge kinŋkenŋ, ama nii-la si bi faasa kenŋ kiaa yuge, muapilii-la ma u si kenɛ, Wia janŋ kaa laa u teenŋ. <sup>30</sup> Má kenŋ tiŋtinni-bɔmɔ-la a jonŋ yuo ta biriminŋ tuɔŋ. Lee-la nɛ nialinŋ janŋ yel aŋ didinŋ ba nyilaa.

*Sariya che-diili-la si janŋ yi*

<sup>31</sup> Di mi-na Nuhuobiine Bie nɛ dii mi kuoronŋ a kɔ, mi di Wia tinŋdaaraa kala janŋ kɔ. Nii nɛ mi janŋ hɔŋ mi kuori-kpasa nyunŋ a chaanɛ. <sup>32</sup> Dunia nuu-kala janŋ ku hilimi mi sipaanŋ. Mi janŋ kenŋba kaa kpaa leree balia, ari pie-daara si yie kenŋ u piesee pɔrɛ buunaa ɛ ɲii. <sup>33</sup> Mi janŋ lenŋ di tuɔ-pul tinŋjaa chinŋ mi na-diinŋ, ka di tuɔ-bɔŋ tinŋjaa ma chinŋ mi na-gua. <sup>34</sup> Nii nɛ kuoro janŋ bula pi nialinŋ si chinŋ u na-diinŋ a bul, 'Má kɔ. Mi Nyimma Wia nɛ pɛma ɛ. Má ku dii Wia kuorii-la ba si wasa bilma ɛ dunia di-suomunŋ. <sup>35</sup> Bɛɛ wiaa, bua-la ɛ losunŋ fa si kenŋmi, ma ɲaa kudiilee pimi mi dii, bua-la ɛ lii-nyuasunŋ ma fa si kenŋmi, ma ɲaa liinŋ pimi mi nyua nɛ. Bua-la ɛ mi fa

si ɲaa nuhuɔru, ma kenŋmi worunŋ nɛ. <sup>36</sup> Bua-la ɛ mi fa kenŋ yaribiree nɛ, ma jonŋ gerinŋ laalɛmi. Bua-la ɛ mi fa sii wiilu, ma beŋ mi nyunŋ nɛ, bua-la ɛ ba si kenŋmi tɔ dia, ma ku nami nɛ.' <sup>37</sup> Tuɔ-pul timma-la janŋ piesemi a bul, 'La Tiina, che bɛɛ nɛ la nanŋ di losunŋ keninŋ la jonŋ kudiilee pinŋ, che bɛɛ nɛ lii-nyuasunŋ keninŋ la ɲaa liinŋ pinŋ? <sup>38</sup> Che bɛɛ nɛ la nanŋ di ɲ ɲaa nuhuɔru la keninŋ worunŋ, koo che bɛɛ nɛ la ma nanŋ di ɲ kenŋ yaribiree la jonŋ gerinŋ laalinŋ? <sup>39</sup> Che bɛɛ ma nɛ la nanŋ di ɲ wiilu, koo di ba keninŋ tɔ dia la ku nanŋ?' <sup>40</sup> Kuoru-la janŋ bula piba a bul, 'Wutitii nɛ mi bulaa pima, bua-la kala ɛ ma si ɲaa wu-zɔmunŋ a pi mi naanŋbiirinŋ deenŋba tuɔŋ nii-la si bi lee kenɛ, ma ɲaa ɲii pimi nɛ.' <sup>41</sup> Nii nɛ u janŋ bula pi nialinŋ si he u na-gua a bul, 'Má surise mi semɛ, Wia via ma wiaa nɛ. Má mu a juu nyinŋ-la si bi dise. Wia he nyinŋ-la bil Sitaani ari u tinŋdaara-la nɛ di ba ku juu. <sup>42</sup> Bɛɛ wiaa bua-la ɛ losunŋ fa si kenŋmi, ma bi kudiilee ɲaa pimi, bua-la lii-nyuasunŋ fa si kenŋmi, ma bi liinŋ ɲaa pimi. <sup>43</sup> Bua-la ɛ mi fa si ɲaa nuhuɔru, ma bimi kenɛ worunŋ. Bua-la ɛ mi fa si kenŋ yaribiree maa, ma bi gerinŋ jonŋ laalɛmi. Bua-la ɛ mi fa sii wiilu maa, ma bi ku nami. Bua-la ɛ ba si kenŋmi tɔ dia maa, ma bi ku nami.' <sup>44</sup> Nii nɛ ba janŋ piese kuorula a bul, 'La Tiina, che bɛɛ nɛ

losun kenin koo lii-nyuasun kenin koo η fa ηaa nuhuoru koo, η fa kenj yaribiree koo, η fa wiilu koo, ba kenin to dia anj ka la bi η le pe?’<sup>45</sup> Kuorula jan bul, ‘Wutitii ne, bua-la kala le ma si via di ma pe niila si bi lee kene mi niaa tuon, ma via di ma pemi ma le ne nii.’<sup>46</sup> Nii ne ba jan juu leela hεε-la si bi dεre, anj ka di tuo-pul tinjaa ma juu lee-la miisi-la si bi dεre.”

## 26

*Ba vuura di ba kpu Yesu  
Maak 14.1-2; Luuk 22.1-2;  
Jooη 11.45-53*

<sup>1</sup> Yesu si dage niaa dεre, u bula pi u haritooroo a bul, “Ma jima,<sup>2</sup> tapulaa balia ne ka, ka di diisin kielin gbiele-la yi. Bua-la le ba jan kenj mi-na Nuhuobiine Bie a jonmi he niaa nisin le di ba kpaasemi daa-gεseε nyun.”

<sup>3</sup> Nii ne nialin si kpu pusun pipi Wia kuhiasin ari Juu tinjaa kuhiasin, ba hilimi Kayafas dia le. Bua-la le u fa ηaa nii-la si kpu pusun pipi Wia kuhian ne. <sup>4</sup> Ba hilimi a vuvuure ba si jan to wonbii-la a luora kenj Yesu a kpu. <sup>5</sup> Ama ba bul di ba siu kenj ba che-bal-la, di ba ne ηaa nii, niaa jan ηaa taawei.

*Ba kenj nuun tise Yesu  
Maak 14.3-9; Jooη 12.1-8*

<sup>6</sup> Yesu fa si he Betani le nii, u mu honj baal kubala dia le baa yire Saamonj. Saamonj fa ηaa gbege ne anj duori. <sup>7</sup> Yesu fa si dii kiaa Saamonj dia le, haal kubala ko u teenj

a kenj tulaali ari lonj a jonj bise he u nyun le. Tulaalii-la yallin heyε. <sup>8</sup> U haritooro-la si na nii, ba baanin sii. Ba gurima pipiese donjo a bul, “Bεε ne tii haala deenj kenj nuu-la kaa chei ηla?” <sup>9</sup> Ba fa jan wuo jonj tulaalii-la a yalle a na moribiee yuge a jonj pi summoo.” <sup>10</sup> Ama Yesu fa jin wii-la ba sii bul. Nii ne u pieseba a bul, “Bεε ne tii ma wiwalime haala deenj? Wuzonj ne u ηaami le. <sup>11</sup> Ma di summoo jan he dime bua-na kala le, ama la di ma bi jan he dime deenj deenj. <sup>12</sup> U bise tulaalii-la hemi le a ηaa siri di mi ne suba, di ba jonmi hugi. <sup>13</sup> Wutitii ne mi bulaa pima, dunia seme-na kala ba si jan wuo mu a bul Wia wuzomola, ba jan liisi haala deenj ma wiaa a bul.”

*Judas seye duu jonj Yesu  
yalle*

*Maak 14.10-11; Luuk 22.3-6*

<sup>14</sup> Nii ne Yesu haritooro-la fii ari balia donjo mu nialin si kpu pusun pipi Wia kuhiasin teenj. U yirin ne fa Judas Isikarot. U pieseba a bul, <sup>15</sup> “Di mi ne kenj Yesu yalle a pima, bεε ne ma jan pimi?” Nii ne ba diise moribii-biinj mara ari fii a jonj pu. <sup>16</sup> A chinj bua-la le Judas suomo chiche wonbii-la u si jan to a kenj Yesu yalle a piba.

*Yesu ari u haritooroo dii  
diisin kielin gbiele-la kudiilee  
Maak 14.12-21; Luuk 22.7-13, 21-23; Jooη 13.21-30*

17 Gbiele-la ɛ ba si yie dii boroboro-la si bi si-burun kenɛ, ba chɛ-bunɔun, Yesu haritooroo kɔ u teenɔ a piɛsu a bul, "Nii nɛ ɲ cho di la mu ɲaa diisɲ kielɲ gbiele-la kudiilee di ɲ ku dii?" 18 Nii nɛ Yesu bula piba a bul, "Má mu juu taɲ-la tuɔɲ. Má mu baal kubala teenɔ. Má mu bula pu a bul, 'La kuhianɲ si, bua-la ɛ u síi chɛ di ba di u haritooroo dii diisɲ kielɲ gbiele-la kudiilee yie nɛ, laa chɛ di la dii kia-la ɲ dia ɛ nɛ.'" 19 Nii nɛ Yesu haritooro-la ɲaa ɲii ari Yesu si dageba a ɲaa diisɲ kielɲ gbiele-la kudiilee ba dii.

20 Wia si jua, Yesu ari u haritooro-la fii ari balia-la ku juu hɔɲ a didii kudiile-la. 21 Ba síi dii kiaa ɲii, ɲii nɛ Yesu bula piba a bul, "Wutitii nɛ mi bulaa pima, ma dɔɲɔ jaɲ jɔɲmi yallɛ." 22 Nii nɛ u haritooro-la tuɔɲ chei. Ba suomo pipiɛsu, kuɲ kuɲ. Dɔɲɔ yie piɛsɛ, "Mi Tiina, mi nɛɛ?" 23 Nii nɛ Yesu bula piba a bul, "La di nii-la si chala kenɲ boroboro tuu yuu gbaɲa tuɔɲ nɛ jaɲ jɔɲmi yallɛ. 24 Mi-na Nuhuobiine Bie jaɲ suu ari ba si ɲmunɲɛ ɲii a tigemi ɛ. Ama nii-la si jaɲ jɔɲ mi-na Nuhuobiine Bie yallɛ, aa, u jaɲ na hɛɛɲ yugɛ. Ba fa si buu lula nɛ kpia." 25 Nii nɛ Judas zɛɲbe tiina-la piɛsɛ Yesu a bul, "Mi nɛ ɲ didageɛ?" Nii nɛ Yesu bula pu a bul, "Oo, ɲ nɛ."

*Kudiile-la Yesu si si di ba dii a liliisi u wiaa*

*Maak 14.22-26; Luuk*

*22.14-20; 1 Kɔr. 11.23-25*

26 Ba si hɔnɔ didii kiaa, ɲii nɛ Yesu sii a jɔɲ boroboro a lɔllɛ Wia aɲ kaa chɔgɛ chɔgɛ a jɔɲɔ pi u haritooroo a bula piba a bul, "Má laa. Mi yaraa namia nɛ ɲii." 27 Nii nɛ u bira jɔɲ nyunyuala maa ari sinɲ. U lɔllɛ Wia aɲ jɔɲɔ piba a bul, "Má kala nyua nyunyual-bala-la tuɔɲ, 28 bɛɛ wiaa mi chaliɲ nɛ ɲii. Chaliɲ deenɲ wiaa nɛ tii Wia ta niɲ ma teenɲ. Mi chaliɲ jaɲ jaasɛ ni-kenɛ wiaa, di Wia jɔɲ ba haacheba cheba. 29 Mi bulaa pima, mi bira bi jaɲ kɔ di mi nyua sinɲ deenɲ, see tapuli-la mi si jaɲ kɔ, ɲii nɛ mi jaɲ nyua si-faliɲ mi Nyimma Wia kuorii-la tuɔɲ."

30 Nii nɛ ba yii Wii-chuɔle yiiliɲ aɲ sii lii a mu peel kubala baa yire Oliv. 31 Nii nɛ Yesu bula piba a bul, "Titaɲɲ deenɲ titia ma kala jaɲ fá viiri a tiɲ mi wiaa. Ba ɲmunɲɛ Wia tenɲ tuɔɲ di ba jaɲ kpu pie-daara aɲ ka piɛsɛ fá piɛsɛ. 32 Ama Wia jaɲ chisemi suunɲ ɛ. U nɛ chisemi, mi jaɲ laa ma sipaanɲ a mu Galilii."

*Yesu bula pi Piita ari u jaɲ bul u buu jɲɲ.*

*Maak 14.27-31; Luuk 22.31-34; Jɔɔɲ 13.36-38*

33 Nii nɛ Piita bula pi Yesu a bul, "Di ba kala fá maa aɲ lenɲ, mi-na bi jaɲ miire ɲ harɲ da." 34 Nii nɛ Yesu bula pu a bul, "Wutitii nɛ, jiniɲ titaɲɲ deenɲ ɲ-na Piita, ɲ jaɲ bul naaɲsiɲ butori ari ɲ bimi jɲɲ, ka di ji-bele-na

yel.” <sup>35</sup> Nii ne Piita bula pu a bul, “La diŋ paala susuu maa, mi bi jaŋ bul ari mi biŋ jiŋ.” Ku-kaana-la ma kala bul nii.

*Yesu chuɔle Wia  
Getisemani le  
Maak 14.32-42; Luuk  
22.39-46*

<sup>36</sup> Nii ne Yesu ari u haritooroo mu juu lee kubala baa yire Getisemani. Yesu bula pi u haritooroo di ba hɔŋ daha, ka u mu chuɔle Wia aŋ kɔ. <sup>37</sup> U keŋ Piita ari Zebidii biirinŋ balia a kaa mu dime. U tuɔŋ faasa chei woruŋ. U tuɔŋ bi pina. <sup>38</sup> U bula pi u haritooroo a bul, “Mi tuɔŋ kala ne cheye a mage di mi suu. Má hɔŋ di la kala pɔ na.” <sup>39</sup> Ba hɔŋ. Ka u surisa mu sipaanŋ mua a tuu pina chigi tinŋteenŋ a sul Wia a bul duu ne keŋ worŋbiinŋ, duu sí leŋe di wii-la juu-u le a bira bul, “Mi Nyimma, di ŋ níi che, liise hee-la síi kɔ mi le. Ama mi-na ŋla tuɔtɔruŋ le dee, ŋ-na tuɔtɔruŋ le ne.” <sup>40</sup> U chuɔla dere aŋ síi kɔ u haritooroo teenŋ di ba piŋ doŋ. Nii ne u piése Piita a bul, “N pina nee? N bi doŋ muapilii ma wuo beree a diene yi hawa kubalaa? <sup>41</sup> Má chuɔle Wia a pupɔ di Sitaani sí wuo nyisema. Ma tuɔŋ le ma cho di ma ŋaa wu-zɔŋŋɔɔ, aŋ ka ma bi doluŋ kene.” <sup>42</sup> U bira mu a chuɔle Wia liaminŋ le a bira bul, <sup>43</sup> “Mi Nyimma, di ŋ ne bi sei di ŋ laa heeŋ deenŋ mi nisinŋ le, leŋ di wii-la ŋ síi che, duu ŋaa.” U miira kɔ di ba

bira piŋ doŋ, bee wiaa doŋ keŋba ne woruŋ. <sup>44</sup> Nii ne Yesu mu chuɔle Wia torimuŋ le a bira bul nii titia. <sup>45</sup> Nii ne u miira kɔ u haritooroo teenŋ a piéseba, “Ma ha pinaa wiesi nee? Má bee na, bua-la yie ne. Ba jaŋ keŋ mi-na, Nuhuobiine Bie a pi haache diiree. <sup>46</sup> Má sii la mu. Nii-la si jaŋ jonŋmi yalle ka kɔ ne.”

*Ba keŋ Yesu  
Maak 14.43-50; Luuk  
22.47-53; Joŋŋ 18.3-12*

<sup>47</sup> Yesu ha bi wiaa bula dere, di Judas níi kɔ nii. U fa ŋaa Yesu haritooro-la fii ari balia doŋɔ ne. Niaa yuge a tuto u hariŋ. Doŋsuŋ kori tokobiee ari tanguloo. Nialinŋ si kpu pusunŋ pipi Wia kuhiasinŋ ari ba taŋ kuhiasinŋ ne tinŋba, ba kɔ. <sup>48</sup> Zeŋbe tiina-la fa pi nialinŋ magil ne a bul, “Nii-la mi si mu guori, u ne nii. Má kenu.” <sup>49</sup> Nii ne Judas venŋ tegi a mu Yesu teenŋ a bula pu, “Mi kuhianŋ, mii chuɔluŋ”, aŋ guoru. <sup>50</sup> Nii ne Yesu bula pu a bul, “Mi nanŋdoŋɔ, bee ne tii ŋ he daha?” Nii ne ba kala guriku a kenu. <sup>51</sup> Yesu haritooro-la doŋɔ liise u tokobii a ta nuu digilinŋ keri. Nii-la fa ŋaa nialinŋ si kpu pusunŋ pipi Wia kuhianŋ dia-yomo ne. <sup>52</sup> Nii ne Yesu bula pu a bul, “Joŋ ŋ tokobii a he u di-heelinŋ. Nii-la si liise tokobii, tokobii ne ba jaŋ kaa kpuu. <sup>53</sup> N bi jiŋ ari mi fa jaŋ wuo yire mi Nyimma duu pemi lee? Di mi ne fa yiru, u fa jaŋ ta u tinŋdaaraa bui buiba di ba ku

pemi le. <sup>54</sup> Ama duu ne fa saa n̄aa n̄ii, ee ne wialin̄ ba fa si n̄mun̄sa Wia tenin̄ tuon̄ jan̄ ku n̄aa wutitiiba?" <sup>55</sup> Nii ne Yesu pīese ni-dan̄-la a bul, "Mi n̄aa gaaru nee? Ma si ken̄ tokobiee ari tanguloo a kuko di ma ken̄mii? Ma na tapulii-na kala la di ma ne yie hon̄ Wia-dia le mi didage wiaa a pipima. An̄ ka ma bi walima di ma ken̄mi dime. <sup>56</sup> Ama wiin̄ deen̄ kala n̄aa di wialin̄ nialin̄ fa si bula, Wia Din̄-zon̄-la dolun̄ le ku n̄aa wutitii." Nii ne Yesu haritooro-la kala viau an̄ fá.

*Yesu chin̄ nialin̄ si hilime vuvuure wiaa sipaan̄*

*Maak 14.53-65; Luuk 22.54-55, 63-71; Joon̄ 18.13-14, 19-24*

<sup>57</sup> Nii ne nialin̄ si ken̄ Yesu, ba kenu kaa mu Kayafas dia. U ne fa n̄aa nialin̄ si kpu pusun̄ pipi Wia kuhian̄. Di Wia tenin̄ kerichiba ari ba tan̄ kuhiasin̄ kala hilimi dime. <sup>58</sup> Piita daa tuto ba harin̄ a to juu nialin̄ si kpu pusun̄ pipi Wia kuhian̄ kaala. U juu kaala-la a mu hon̄ nialin̄ s̄ii p̄o kaala-la teen̄ duu na wii-la si jan̄ n̄aa Yesu le. <sup>59</sup> Nii ne nialin̄ si kpu pusun̄ pipi Wia kuhiasin̄ ari nialin̄ kala si yie hilime vuvuure wiaa chiche di ba nyia wiaa a tige Yesu le di ba kpuu. Ba che che wii ka. <sup>60</sup> Niaa paala yuge ne a ku nyia wiaa pu, ama ba fa bi wuo na wii-kala u si n̄aa chei. <sup>61</sup> Nii ne niaa balia ku lii a bul, "Baala deen̄, u si u jan̄ wuo n̄moo

Wia-dia-la lo an̄ bira saau tapulaa batori p̄ege." <sup>62</sup> Nii ne nialin̄ si kpu pusun̄ pipi Wia kuhian̄ sii chin̄ a pīese Yesu a bul, "N̄ bi nia niaa deen̄ba si bul wialin̄ a tigen̄ lee? N̄-na bi wii kenē n̄ si jan̄ bul?" <sup>63</sup> Yesu t̄ore u niin̄. Nii ne nialin̄ si kpu pusun̄ pipi Wia kuhian̄ bula pu a bul, "Wia-la si weye yirin̄ le, bula pila, n̄ ne n̄aa Kirisito, nii-la Wia si liisaa? N̄ ne Wia Biee?" <sup>64</sup> Nii ne Yesu bula pu a bul, "Mi-na ne, ama mi bulaa pima kala, a lii bua deen̄ le a kaa mu, ma jan̄ na mi-na Nuhuobiine Bie di mi hon̄ Wia seme, ni-duon̄ di-honun̄ a to duon̄bilingbaanaa tuon̄ ku tuu." <sup>65</sup> Yesu si bul nii, nialin̄ si kpu pusun̄ pipi Wia kuhian̄ ken̄ u gennin̄ kiēse an̄ bul, "N̄ chei Wia yirin̄. U bi maga di la bira che dan̄siaba. Ma kala bi nia u si chei Wia yirin̄ nii? <sup>66</sup> Bee ne ma biine?" Nii ne ba bul, "U cheye ne. U maga di ba kpuu ne." <sup>67</sup> Nii ne ba tu nan̄tuoron̄ he u siaa le a n̄mobu. Nialin̄ don̄sun̄ s̄ii n̄mobu n̄la ne, ba bula pu a bul, <sup>68</sup> "N̄-na Kirisito, nii-la s̄ii bul wiaa, Wia Din̄-zon̄-la dolun̄ le, dage nii-la si n̄mobun̄."

*Piita si u bi Yesu jin̄*

*Maak 14.66-72; Luuk 22.56-62; Joon̄ 18.15-18, 25-27*

<sup>69</sup> Piita si hon̄ kaala-la le, nii ne nialin̄ si kpu pusun̄ pipi Wia kuhian̄ dia tintinni-tolo kubala ku lii a bul, "N̄

ma faa to Yesu harinj ne, baal-la si lii Galilii." <sup>70</sup> Nii ne Piita nyia wiaa a bul ba kala nii, "Mi bi Yesu jin. Mi bi wiila n si paala bubul jin," an sii lii chinj zawura tuonj. <sup>71</sup> Piita si chinj dime, nii ne tintinnitolo donjo ma bira nau a bula pi nialinj si china kpagu a bul, "Baala deenj ma nja Yesu si lii Nazaret haritoorola donjo ne." <sup>72</sup> Piita bira nyia wiaa an nmiesa bul duu dee. <sup>73</sup> Muasuaa nialinj si chinj dime ma bula pu a bul, "Wutitii ne, n ma nja ba donjo ne, n yiikoro ne dage nii." <sup>74</sup> Nii ne Piita nmiese a bul, "Mi bi baala deenj jin." U si bul nii dere di ji-bele yele. <sup>75</sup> Nii ne Piita liisi wiila Yesu si bula pu ari u jan nyia wiaa a pu naansii butori, nii ne u lii a faasa yel.

## 27

*Ba kenj Yesu mu Paalit teenj*

*Maak 15.1; Luuk 23.1-2; Joon 18.28-32*

<sup>1</sup> Tan-pul nialinj si kpu pusunj pipi Wia kuhiasinj kala ari juu tinjaa kuhiasinj hilimi a vuure. Ba kala vuura di ba kpu Yesu. <sup>2</sup> Ba kenu a vobu a kenu kaa mu Paalit teenj. U ne fa hon Rom kuori-balinj nyun Judiya tinjteen le.

*Judas suba*

*Yesu nanjz. tintinjaa 1.18-19*

<sup>3</sup> Judas zenbe tiina-la si nia di baa che di ba kpu Yesu ne, u tuonj chei ari u si yalle Yesu nii. U miira

kenj moribii-biinj mara ari fii a kaa mu nialinj si kpu pusunj pipi Wia kuhiasinj ari juu tinjaa kuhiasi-la teenj a bul, <sup>4</sup> "Mi nja haache ne. Mi jonj nii-la si bi wii cheye yalle di ba kpuu." Nii ne nialinj bul di ba sipaa kala tuo dime. Di u wii ne. <sup>5</sup> Nii ne Judas jonj moribie-la a yuo ta Wia-dia tinjteenj an lii a mu yuo nmeninj. <sup>6</sup> Nialinj si kpu pusunj pipi Wia kuhiasinj paa moribie-la an bul, "Chalinj moribiee ne nja. La kisinj ne la jonba he Wia-dia moribiee le." <sup>7</sup> Nii ne ba vuure di ba jinj wiila ba si jan jonj moribie-la a nja. Ba jonj moribie-la yoo tinjteenj. Lee-la ne ba huhugi nuhuora. Ba laa tinjee-la yoo pupoi-meere teenj ne. <sup>8</sup> Nii ne ba kenj lee-la yiyire chalinj tinjteenj ari jininj kala. <sup>9</sup> Ba si nja nii, wialinj Jerimaya fa si bul, Wia Din-zonj-la dolunj le ku nja wutitii. U fa si,

"Iziral doho niaa donsun sei di ba tinj moribii-biinj mara ari fii an kenj Wia Tuo-pul Tiina-la.

<sup>10</sup> Ba jonj moribie-la ba si miira laa a yoo tinjteenj pupoi-meere teenj.

Mi Tiina Wia ne fa bula di mi nja nii."

*Paalit piese Yesu wiaa*

*Maak 15.2-5; Luuk 23.3-5; Joon 18.33-38*

<sup>11</sup> Yesu si chinj nii-la si hon kuori-balinj nyun sipaan Judiya tinjteenj le, nii ne kuoru-la piesu a bul, "N ne

ɲaa Juu tinɲaa kuoro koo?" Nii ne Yesu bula pu a bul, "Oo, mi ne." <sup>12</sup> Ama nialin fa si kpu pusun pipi Wia kuhiasin ari Juu tinɲaa kuhiasin si jon cheerin pu nii, u bi wii bula. <sup>13</sup> Nii ne Paalit piesu, "N bi wiaa deenba kala nia ba si bula a tigen lee?" <sup>14</sup> Ama Yesu bi u niin suro, u bi wu-bala ma bula. Wii-la kperi Paalit worun.

*Ba si di ba kpu Yesu*

*Maak 15.6-15; Luuk 23.13-25; Joon 18.39-19.16*

<sup>15</sup> Di diisin kielin gbiele ne yie-na kala, Paalit fa yie len ba liise nialin ba si kaa to dia donɔ ne, nii-la niaa si cho. <sup>16</sup> Bua-la le di ba ken baal kubala baa yire Barabas a to dia. <sup>17</sup> Ni-dan-la si hilime, nii ne Paalit pieseba, "Ni-bee ne ma cho di mi liisa pima? Barabas koo Kirisito, nii-la Wia si liisaa?" <sup>18</sup> Paalit fa jima worun ari Juu tinɲaa kuhiasin yaraa faa bieru ne, nii ne tii ba ken Yesu kaa ko u teen. <sup>19</sup> Paalit fa si hon sariya didiilin nii, u haala tin tinɲaarin a len di ba bula pu a bul, "Si baala deen wii-kala ɲaa. U ɲaa tuɔ-pul tiina ne. Diamin titanin mi duosi wiaa a tigeu le ne. U wiaa wiimi worun ne." <sup>20</sup> Nii ne nialin si kpu pusun pipi Wia kuhiasin ari Juu tinɲaa kuhiasi-la nyise ni-dan-la he di ba bul di Paalit liise Barabas ta an ka di ba kpu Yesu. <sup>21</sup> Nii ne Paalit piese ni-dan-la a bul, "Niaa deenba baliamin

tuon, kubee ne ma che di mi liisa pima?" Nii ne ba bul, "Barabas!" <sup>22</sup> Nii ne Paalit piese nialin a bul, "An ka Yesu ba sii yiru Kirisito, bee ne ma si mi kenu kaa ɲaa?" Nii ne ba kala bul, "Len di ba kenu kpaasa mere daa-geese nyun." <sup>23</sup> Nii ne Paalit pieseba a bul, "Wu-bon bee ne u ɲaa?" Nii ne ba kpia a kii bunbun-la a bul, "Len di ba kenu kpaase daa-geese nyun."

<sup>24</sup> Nii ne Paalit na ari gon-la yuga kinken, ari yuosun jan juu. Nii wiaa u bi wii-kala wuo ɲaa. Di liin chin u seme. U ɲaa a son u nisaa nialin sipaan an bul, "Mi sipaa tuo baala deen suunun le. U he ma teen." <sup>25</sup> Nii ne ni-dan-la kala bul, "Di la ne cheye wiin deen le, len di Wia dogisela ari la biirin a tin la si kpuu." <sup>26</sup> Nii ne Paalit liise Barabas ta a piba an ɲaa ba viire Yesu an jonu piba di ba kaa mu kpaasa mere daa-geese nyun.

*Laali-yuoroo mon Yesu le*  
*Maak 15.16-20; Joon 19.2-*

3

<sup>27</sup> Nii ne Paalit laali-yuoroo donsun ken Yesu kaa juu Paalit dia kaala tuon. Laali-yuoro-la ku-kaanaa kala ma ku peba le a hilimi. <sup>28</sup> Ba wuri Yesu gennin kala an jon geri-fian laalu <sup>29</sup> a che sosun a kaa sua nyunchuulo a nage kuoro nyunchuulo a jonu chuu a jon daantiga he u na-diin le an tuu kpirimi u sipaan a

mōmu le a bul, "Juu tinḡaa kuoro, laa chuolun." <sup>30</sup> Ba tu nanṡuorun a heu le a laa daa-la a ḡmoo u nyun le. <sup>31</sup> Ba si mōmu le dēre, ba wuri geri-fian-la an paa u titia gennin a laalu an kenu kaa lii wonḡiin di ba kpaasu mēre daa-geseē nyun.

*Ba kpaase Yesu daa-geseē nyun*

*Maak 15.21-32; Luuk 23.26-43; Jōḡḡ 19.17-27*

<sup>32</sup> Ba si kenu kaa lilii di ba kpaasu daa-geseē nyun ḡii, ba cheḡ baal kubala baa yiru Saamōḡ. U jāḡ yirin ne Sariini. Nii ne laali-yuoro-la fugu u laa Yesu daa-gese-la a baase. <sup>33</sup> Nii ne ba ku yi lee kubala baa yire Gōligōta. Yiri-la bubuōḡ ne nyu-kunḡogulo. <sup>34</sup> Ba si yi dime, ba jōḡ sinin a guoli ku-haarin le a jōḡo pi Yesu duu nyua. U si lenne di u heye, u via. <sup>35</sup> Nii ne ba kpaasu mēre daa-geseē nyun an tōḡse Yesu gennin wiaa, di ba paa kpaā dōḡo a jin geri bēe ne nuu-kala jan laa. <sup>36</sup> Nii ne ba hōḡ dime a bibenu. <sup>37</sup> Ba si si Yesu ḡaa wialin chei, ba ḡmunṡa he daa-gese-la le a bul, "Juu tinḡaa kuoro Yesu ne ḡla." <sup>38</sup> Nii ne ba kpaase gaaraa balia ma a pe Yesu le. Dōḡo he u na-diin, dōḡo ma he u na-gua. <sup>39</sup> Ba si kpaasu mēre daa-gese-la nyun ḡii, nialin si to dime bibal, ba tutuusu an keḡ ba nyun chuchugisi <sup>40</sup> a bul, "Oi, ḡ ne ḡaa nii-la si si ḡ jan ḡmoo la Wia-dia lo an bira wuo saau tapulaa

batori peḡe. N si ḡaa Wia Bie, lii daa-gese-la nyun a laa ḡ titia ta." <sup>41</sup> Nialin si kpu pusun pipi Wia kuhiasi-la ari Wia tenin kerichiba ari tan-la kuhiasin ma sisieri Yesu le a bula pipi dōḡo, <sup>42</sup> "U wuo niaa laa tita ne an bi u titia wuo laa ta. U si si u ne ḡaa Kirisito, Juu tinḡaa kuoro, leḡ duu lii daa-gese-la nyun ku tuu di la na a laa u wiaa dii. <sup>43</sup> U laa Wia dii ne a bula duu ḡaa Wia Bie ne. Tōḡ, má leḡ di la na di Wia ne jan laau ta leele." <sup>44</sup> Gaara-la balia ma ba si kpaasa a pe Yesu le, ba ma tuusu ḡii titia.

*Yesu suba*

*Maak 15.33-41; Luuk 23.44-49; Jōḡḡ 19.28-30*

<sup>45</sup> Wia ku mage nyu-gbaḡa, lerin kala biri lim a mu yi didaanin, ka lerin bira pulle. <sup>46</sup> Nii ne Yesu faasa yire u yiikoro le a bul, "Eloi, Eloi, lama sabakitani." U bubuōḡ ne: "Mi Tiina Wia, bēe ne tii ḡ jōḡmi ta?" <sup>47</sup> Di niaa dōḡsun chin dime a jegile nii wialin u si bula. Nii ne ba bula pi dōḡo a bul, "Ilaaja ne baal-la yiyire ḡii." <sup>48</sup> Nialin dōḡo fa si chin dime fá mu jōḡ suosuo a kaa mu yuu sinin si nyala a jōḡo tuu sakelin le a kaa mu he u niin le duu nyua. <sup>49</sup> Nii ne nialin dōḡsun fa si he dime bul, "Má leḡ la gberē a na ari Ilaaja jan ku soru daa-gese-la nyun koo." <sup>50</sup> Nii ne Yesu faasa yel an wiesi u wiesi kati.

<sup>51</sup> Patiisa ne fa he Wia-dia tuōḡ. Ba kaa kere. U



kiése balia a chinj nyu-gbanja a kiesa ku tuu. Nii ne tinteen zigili, busun ma yere a kpa kpa. <sup>52</sup> Vaamaa ma suri suri. Nialin Wia si liisa, ba yuga a sii suun le a lii vaama-la le. <sup>53</sup> Yesu si sii suun le, ba mu Jerusalem. Niaa yuga a naba lee-la. <sup>54</sup> Laali-yuoroo zolo kuhian ari laali-yuoro-la fa si chinj dime a biben Yesu a na tinteen si zigili nii ari wialin kala si nja, fawullun kenba. Nii ne ba bul, "Wutitii, baala deen sen nja Wia Bii ne."

<sup>55</sup> Haalaa yuga a ma fa chinj di-bolii a bibenu. Haala-la fa to Yesu harin ne a lii Galilii tinteen a pipeu le. <sup>56</sup> Ba tuon Mæri Magidalin ari Mæri donjo. U fa nja Jeems ari Josef naan ne. Zebidii haala ma peba le.

### *Ba hugi Yesu*

*Maak 15.42-47; Luuk 23.50-56; Joon 19.38-42*

<sup>57</sup> Didaanin si yie, baal kubala a lii tanj kubala baa yire Arimatiya ma ko. U fa nja kiaa tiina ne. U yirin ne fa Josef. U ma fa nja Yesu haritooro-la donjo ne. <sup>58</sup> U mu Paalit teen a sul Yesu kusuun. Nii ne Paalit bul di ba mu jonjo pu. <sup>59</sup> Nii ne Josef laa a kenj geripe-pulfalin a beu <sup>60</sup> a jonjo hugi u titia bua falii-la le u fa si loko bunj nyun. U bilimi tabii-balin kaa ko to bua-la niin an viiri. <sup>61</sup> Ka Mæri Magidalin ari Mæri donjo-la faa honj a chaase bua-la lerin.

### *Laali-yuoroo po vaan-la*

<sup>62</sup> U tanj si pula, che-wiesii-la cheen, nialin si kpu pusun pipi Wia kuhian ari Farisii tinja-la, ba mu Paalit teen a bula pu a bul, <sup>63</sup> "Kuhian, la liisi wii ne. Bua-la le wunyarula si he u miisin le, u fa bula ari u ne suba, u jan sii suun le tapulaa batori cheen. <sup>64</sup> Nii wiaa len di niaa mu a po u vaan-la worun di tapulaa batori-la yi, di u haritooro si wuo mu a gaa kuusi an bula pi niaa ari u sii suun le ne. Di ba ne nja wiin deen, u ne jan paala kii wialin kala u si nya." <sup>65</sup> Nii ne Paalit bula piba di ba kenj laali-yuoroo mu di ba po vaan-la niin worun. <sup>66</sup> Nii ne ba laali-yuoro-la mu a jon bunj a to bua-la niin an len niaa po lee-la.

## 28

### *Yesu sii suun le*

*Maak 16.1-10; Luuk 24.1-12; Joon 20.1-10*

<sup>1</sup> Ba che-wiesii-la cheen si dere, Lahadi cheen siipura, Mæri Magidalin ari Mæri-la donjo mu bua-la niin di ba na lee-la ba si hugi Yesu. <sup>2</sup> Ba si yi lee-la, muusaa di lerin guu zigili. Di Wia tinjaara lii wia nyun ku tuu a bilimi tabii-la ta an honj u nyun. <sup>3</sup> U siaa nage duonun si ligisa ne, an ka u gennin pulle kpul kpul. <sup>4</sup> Laali-yuoro-la fa si po bua-la, fawullun kenba. Ba chichel a nage di ba suba. <sup>5</sup> Nii ne Wia tinjaari-la bula pi haala-la si he dime a bul, "Ma si fawullun fa. Mi jima

ari Yesu ne maa che, nii-la ba si kpaasa mere daa-gesee nyuŋ. <sup>6</sup> U tuo daha, u sie ne ari u fa si bul nii pima. Má ku na lee-la ba fa si joŋu hugi. <sup>7</sup> Má mu lima lima a bula pi u haritooroo ari u sii suuŋ le ne. Má bee na, u laa ma sipaan a mu Galilii. Di ma ne mu dime, ma jaŋ nau. Mi paala bula pima.” <sup>8</sup> Nii ne ba lii vaan-la lerin aa tuosi. Fawulluŋ fa keŋba ne, ama ba tuon ma tɔre. Ba fá mu di ba bula pi Yesu haritooroo wii-la si ŋaa. <sup>9</sup> Nii ne Yesu guu cheŋba a bula piba a bul, “Ma jaŋ hoŋ ari yarifielaa.” Ba mu u teen a keŋ u naan le a chuolu. <sup>10</sup> Nii ne Yesu bula piba a bul, “Ma sí leŋe di fawulluŋ keŋma. Má mu bula pi mi haritooroo di ba mu Galilii. Ba jaŋ nami dime.”

*Nialin si pɔ vaan-la nyia wiaa a tige Yesu le*

<sup>11</sup> Haala-la si miira viiri, laali-yuoro-la fa si pɔ bua-la, ba doŋsuŋ miira mu taŋ tuon a bula pi nialin si kpu pusun pipi Wia kuhiasin wii-la si ŋaa. <sup>12</sup> Nii ne nialin si kpu pusun pipi Wia kuhiasin ari Juu tinŋaa kuhiasin hoŋ a vuure wii-la ba si jaŋ ŋaa. Ba vuura di ba jaŋ joŋ moribii-dan a kpal laali-yuoro-la fa si pɔ bua-la an bula piba a bul, <sup>13</sup> “Má bula pi niaa ari ma pin don ne, an ka u haritooroo ku gaa a kuusi Yesu. <sup>14</sup> Di nii-la si hoŋ kuori-balin nyuŋ ne nii wiin deen, la jaŋ bula

pema le ari ma bi wii cheye. Wii-kala bi jaŋ walimema.” <sup>15</sup> Nii ne laali-yuoro-la fa si pɔ vaan-la laa moribie-la an nyia wiaa ari nialin si kpu pusun pipi Wia kuhiasin fa si bula piba di ba ŋaa. Wii-la Juu tinŋaa fa si nyia teeli lerin kala a kaa ko ari jinin.

*Yesu keŋ u titia ku dage u haritooroo*

*Maak 16.14-18; Luuk 24.36-49; Joŋ 20.19-23; Yesu nanz. tinŋaa 1.6-8*

<sup>16</sup> Nii ne Yesu haritooroo la fii ari kubala-la mu Galilii tinŋeen a jil peel-la nyuŋ, ari Yesu fa si bul nii piba. <sup>17</sup> Nii ne ba nau dime a chuolu, ama doŋsuŋ bi laa dii. <sup>18</sup> Nii ne Yesu ku kpageba a bula piba a bul, “Wia joŋ doluŋ kala a pimi ne Wia-jaŋ ari dunia kala le. <sup>19</sup> Má saa mu dunia seme-na kala a bul mi wiaa pi niaa a len di ba ŋaa mi haritooroo a foba Wii-chuole liin mi Nyimma ari u Bie ari u Diŋ-zon-la doluŋ le. <sup>20</sup> Má dageba a len di ba to wialin kala mi si bula pima di ma to. Mi jaŋ he ma teen bua-na kala le a kaa mumu dunia diderin.”

**WIA WU-ZOMO-LA  
MAAK  
SI NMUNSA**

*Jooŋ Wia lii-foori-la bul Wia wiaa pipi niaa*

*Mat. 3.1-12; Luuk 3.1-18; Jooŋ 1.19-28*

<sup>1</sup> Wia wu-zoŋŋoo di-suomun ne ŋla. Wiaa deenba ŋaa Wia Bie Yesu Kirisito wu-zoŋŋoo wiaa ne.

<sup>2</sup> Nii-la sii bul wiaa, Wia Diŋ-zoŋ-la dolun le ba sii yire Azaaya fa ŋmunsa ari Wia si,

“Bee na, mi jaŋ tin mi tinɗaara duu laa ŋ sipaan mu a wase woŋbiin bilin le di ŋ ko.”

<sup>3</sup> U bira si, “Nuu ne chin giri-bine tuoŋ a heele bul,

‘Má ko a wase woŋbiin bil di ma Tiina ko a tuto.

Ma ŋaa nii, duu ne ko, u di-venin jaŋ pin worun.’ ”

<sup>4</sup> Nii ne baala deen sii. Baa yiru Jooŋ, Wia lii-fooro. U sii ku lii giri-bine tuoŋ a heele bul, “Má birime a lii ma haacheba le, ka di mi foma Wii-chuoŋe liin. Di ma ne ŋaa nii, Wia jaŋ joŋ ma haacheba a chema.”

<sup>5</sup> U si bul nii, Judiya tinŋaa ari Jerusalem tinŋaa kala lii a mu u teen a dage ba haacheba aŋ tuu Jooɗan fuo-la u foba Wii-chuoŋe liin.

<sup>6</sup> Bunɗanŋa puna gennin ne

Jooŋ fa laale a keŋ tenbiin voo u tinɗa. Nyangirikeba ari tuuŋ ne fa ŋaa u kudiilee. <sup>7</sup> U yie bul Wia wiaa pipi niaa a bul, “Nuu doŋ jaŋ to mi harin ko. U ne jaŋ kiimi. Mi paala bi maga di mi kpagu a keŋ u nenɗenɗee ŋmesin ma kaa puri. <sup>8</sup> Liin dunɗunɗa ne mi-na kaa fufoma, ama u-na jaŋ joŋ Wia Diŋ-zoŋ-la hema le.”

*Jooŋ fo Yesu Wii-chuoŋe liin*

*Mat. 3.13-4.11; Luuk 3.21-22; 4.1-13*

<sup>9</sup> Bua-la le Yesu sii a lii taŋ-la ba sii yire Nazaret a he Galilii tinɗeen le a ko lee-la Jooŋ fa si he. U ku juu fuo-la. Jooŋ fou Wii-chuoŋe liin.

<sup>10</sup> U miira lii fuo-la tuoŋ ku lii a wula beŋ, di wia nyun guu kpaa balia. Nii ne ka Wia Diŋ-zoŋ-la ku tuu heu le a nage kokomo. <sup>11</sup> Ka u nii nuu yiikoro duu lii wia nyun a bula pu a bul, “Mi Bii-choolun ne ŋla. Mi tuoŋ toŋe ŋ nyun.”

*Sitaani ku magise Yesu*

<sup>12</sup> U bi diene ka Wia Diŋ-zoŋ-la kenu juu girin. <sup>13</sup> U he dime nii halii tapulaa mahin balia, ba di girin tuoŋ kiaa dunɗunɗa. Sitaani yie ko a magisu. Yesu bi seye. Nii ne Wia tinɗaaraa ku tuu tima pu.

*Yesu yire chenfilikpuuraa banese*

*Mat. 4.12-22; Luuk 4.14-15; 5.1-11*

<sup>14</sup> U bi diene, ka ba keŋ Jooŋ to dia. Nii ne Yesu sii

a mu Galilii tinteen a bubul Wia wu-zomɔ-la aa pi niaa <sup>15</sup> a bul, "Bua-la yie nɛ. Wia kuorii-la kɔ nɛ. Má birima lii ma haacheba ɛ a laa Wia wu-zomɔ-la dii."

<sup>16</sup> Nii nɛ u yi Galilii muga a mu to muga-la niin a na Saamon ari u naana Anɔuru. Ba naa chenfilikpuuraa nɛ. Uu mu, di ba ken ba jonba a kaa kikese chenfilee. <sup>17</sup> U yireba a bul, "Má sii to mi harij. Mi jan naa di ma kese niaa pe ma titia ɛ ari ma sii kese chenfilee nii." <sup>18</sup> Ba sii a jon ba jonba ta an guu to u harij. <sup>19</sup> U jon nii baa mu, di baalaa balia nɛ nii. Baa yire Jeems ari Jɔɔɔ. Ba fa naa Zebidii biirin nɛ. Ba hon ba liin daboro ɛ a tuto ba jonba buasun. <sup>20</sup> U si naba, u yireba. Ba lej ba nyimma ari nialin kala ba fa si naa ba tima pipiba an lii liin daboro-la tuon an mu to u harij.

*Yesu vaare baal kubala fa si ken jin-bomun*

*Luuk 4.31-37*

<sup>21</sup> Ba jon nii aa mu a ku yi Kapenam. Nii nɛ chɛ-wiesii-la chɛɛn, Yesu sii a mu juu Wii-chuɔɛ dia a didage niaa. <sup>22</sup> U sii dageba nii, u naaba wu-kpunkpere. U bi baa daga ari Wia tenin kerichiba si yie didageba nii. U bul wiaa ari u nɛ ken wiila dolun.

<sup>23</sup> Nii nɛ di baal nɛ nii. Jin-bomun kenu. U ku juu aa chiire, <sup>24</sup> "Yesu, n si lii Nazaret, bɛɛ nɛ n chiche n

naala? N kɔ di n kpula nɛɛ? Mi jimin nɛ, n nɛ naa Wia Tuɔ-pul Tiina." <sup>25</sup> Yesu si nii wialin baal-la si bula, u kpia jin-bon-la ɛ a bul, "Ken gon an ku lii baal-la ɛ." <sup>26</sup> Jin-bon-la ken baal-la teriki an faasa chiire kinken a lii baal-la ɛ. <sup>27</sup> Nialin kala miira hiriki a pipiese donɔ, "Bɛɛ nɛ nlaa? Wu-falii nɛ uu dage. U paala ken dolun a wuo jin-bonɔɔ a bul wiaa piba, ba tuto u niin."

<sup>28</sup> A lii nii ɛ nɛ, u yirin guu teeli Galilii tinteen kala.

*Yesu vaare niaa yuge*

*Mat. 8.14-17; Luuk 4.38-41*

<sup>29</sup> Nii nɛ Yesu guu sii a lii Wii-chuɔɛ dia-la ɛ, ba di Jeems ari Jɔɔɔ, a mu juu Saamon ari Anɔuru dia. <sup>30</sup> Ba mua di Saamon hiilhaala pina wiwiile. U yaraa kala lin. Yesu si kɔ nii, ba bula pu. <sup>31</sup> Nii nɛ u ku juu a ken haal-la nisin ɛ a kaa chuule. U yaraa fa si lima nii, u fiɛɛ. U sii naa kudiilee piba ba dii.

<sup>32</sup> U didaanin si yie, ba ken nialin kala sii wiilu ari jinsin si ken nialin kala a kaa kɔ Yesu teen. <sup>33</sup> Tan tinnaa kala gire kɔ a hilimi Saamon dia boininiin. <sup>34</sup> Yesu vaare nialin yuge sii wiilu a kiri jin-bomɔ-la ma a yuge a ta niaa ɛ. Jinsi-la jin Yesu. Nii nɛ tii u biba wonbiin pa di ba bul wiaa.

*Yesu bul wiaa Galilii tinteen ɛ*

*Luuk 4.42-44*

<sup>35</sup> Siipuuraa Yesu sii lii dia-la le a mu lee-la niaa si tuo a chuchuole Wia. <sup>36</sup> Ka Saamon ari u nanjonsun ma sii ko a chicheu. <sup>37</sup> Ba si nau, ba bula pu ari nuu-kala ne ko a chicheu. <sup>38</sup> Nii ne Yesu bula piba a bul, "Ma lej la mu tasinj dongsun di mi bul Wia wiaa dime maa. Nii wiaa ne mi ko."

<sup>39</sup> U saa sii a mu duure Galilii tinteen kala a juu Wii-chuole diisinj aa bul Wia wiaa an pe kiri jinjinj ma niaa le a ta.

*Yesu vaare gbege*

*Mat. 8.1-4; Luuk 5.12-16*

<sup>40</sup> Nii ne gbege kubala ma sii ko Yesu teenj a tuu kpirimi a sulu a bul, "Di n ne cho, n jan wuo naa di mi duori." <sup>41</sup> Nisusun kenj Yesu. U liise u nisinj a digu an bul, "Mi cho ne, duori." <sup>42</sup> Nii ne yawiilla guu lej baal-la. U duori. <sup>43</sup> Nii ne Yesu bula pu ari siifjesinj a bul, <sup>44</sup> "Viiri an si wii bula pi nuu-kala. Ama kenj n titia kaa mu dage niila si kpu pusunj pipi Wia duu kpu pusunj pi Wia a piise n disinninj ta ari Moosis fa si dagema nii. Di n ne naa nii, niaa jan na ari n bira bi disinninj kene."

<sup>45</sup> Ama baal-la kenj wii-la kaa lii a bula gaare lerinj kala. Nii ne Yesu bira bi wuo chaasa juu tanj kala tuonj, ama u yie honj girinj tuonj ne, ka niaa lii lee-na kala a kuko u teenj.

**2**

*Yesu vaare gberike*

*Mat. 9.1-8; Luuk 5.17-26*

<sup>1</sup> Tapulaa banmene, Yesu miira mu Kapenam. Niaa nii duu miira ko a he dia le. <sup>2</sup> Nii ne ba yuge a gire ko a to lee-la kala a to boinjinj maa. Ka u bul Wia wiaa pipiba. <sup>3</sup> Nii ne di niaa dongsun ne nii. Ba banese jonj gberiku kubala kaa ko. U pinj u bosole. <sup>4</sup> Niaa si to lerinj kala nii, ba bi jinj lee-la ba si jan to a juu. Nii ne ba jil lusunj nyunj a ta luri a jonj bosole ari gberiku-la kala a to bua-la ta u tuu Yesu sipaanj. <sup>5</sup> Nii ne Yesu jinj ari ba naau yarida ne worunj a bul gberiku-la le a bul, "Mi bii, mi jonj n haacheba a chej ne."

<sup>6</sup> Di Wia teninj kerichiba dongsun ma honj dime a kenj ba tuosaa pipiese ba titia, <sup>7</sup> "Bee ne tii baala deenj bubul nii? Uu tuuse Wia jonjoo nla. Kubee ne jan wuo jonj haacheba che nuu, di Wia dunjuna dee?" <sup>8</sup> Yesu wuo jinj ba tuobiinaa a pipieseba, "Bee ne tii ma bibiine wiaa deenba?" <sup>9</sup> Mi si jan bul gberiku-la le di mi jonj u haacheba cheu ne, koo mi si jan bul duu sii chuoli u bosole a viiri, ba tuonj kubee ne naa moli? <sup>10</sup> Mi jan dagema ari mi-na, Nuhuobine Bie, kenj dolunj dunia le di mi jonj haacheba che niaa." <sup>11</sup> Nii ne u bula pi gberiku-la a bul, "Sii a jonj n bosole a mu dia." <sup>12</sup> Baal-la guu sii a jonj u bosole a vene lii ba sipaanj.

Ba kala hiriki a denne Wia yirin a bul, "La ha bi wiin deen dono naa."

*Yesu yire Liivai*

*Mat. 9.9-13; Luuk 5.27-32*

<sup>13</sup> Nii ne Yesu sii dime a miira tuu muga niin. Niaa yuge a ku hilimi, u didageba. <sup>14</sup> U si kiele mu sipaan, u na baal kubala baa yire Liivai. U nyimma yirin ne Alifiyas. U fa naa lanpoo lilaaru ne a hono u tintinjaa dia le. Nii ne u yiru a bula pu duu sii a tuto u harin. U sii to.

<sup>15</sup> Nii ne Yesu mu juu Liivai dia, ba di u haritooro kala, a hono didii kiaa. Lanpoo laara-la donsun ari haache diiree ma ko, ba kala didii kialin. Ba fa yuga worun a tuto Yesu harin. <sup>16</sup> Wia tenin kerichiba ari Farisii tinjaa naba a ku piese Yesu haritooro a bul, "Bee ne tii Yesu ari haache diiree ari lanpoo laaraa, ba kala hono didii kiaa?" <sup>17</sup> Yesu si nii wii-la ba sii bul, u bula piba a bul, "Nialin si ken yarifielaa, ba bi daalun njaaaru ka che, see nialin sii wiilu. Mi ko di mi yire haache diiree ne di ba len ba haacheba. Nialin si ken tuo-pula mi sipaan dee mi ko di mi yire."

*Ba bul nii-vobun wiaa*

*Mat. 9.14-17; Luuk 5.33-39*

<sup>18</sup> Chee don Joon, Wia lii-foori-la haritooro ari Farisii tinjaa haritooro, baa voo niin. Nii ne niaa sii ku piese Yesu, "Bee ne tii Joon haritooro ari Farisii tinjaa haritooro-naa voo

niin, an ka n haritooro-na bi niin voo?" <sup>19</sup> Nii ne Yesu pieseba a bul, "Di nuu mu jaa haal kaa ko, ka ba duu nanjonsun hon, u nanjonsu-la jan voo niin? Ai, di baal-la ari u nanjonsun ne hono, ba bi niin ka voo. <sup>20</sup> Ama chee don ne he dime, ba jan ken baal-la kaa mu lee, an ka di u nanjonsu-la voo niin." <sup>21</sup> Nii ne u bira bula piba a bul, "Di n ne ken geri-binin duu luri, n jan jon geripe-falin a too? Ai, n naa nii, kufalii-la jan kuure di geri-la wasa kiesee kii nii. <sup>22</sup> Di n ne ken pupoi-kpaan, n jan naa si-huon a he duu yel? Ai, n ne naa nii, pupoi-la jan yere, di sin-la kala ta. N yie jon si-huon a he pupoi-zomun le ne."

*Ba bul che-wiesii-la wiaa*

*Mat. 12.1-8; Luuk 6.1-5*

<sup>23</sup> Che-wiesin chee kubala Yesu ari u haritooro sii a mu nyonso tuon. Baa mu nii, u haritooro-la kille nyonso-la a chichan. <sup>24</sup> Nii ne Farisii tinjaa piesu a bul, "N bi naa? Che-wiesii-la cheen kisin ne ba chichei nii. Bee ne tii?" <sup>25</sup> Nii ne Yesu miira pieseba a bul, "Ma ha bi wii-la Devit fa si naa karimaa? Losun fa si kenu ba di u harin niaa, u mu juu Wia-dia a jon boroboroba-la ba fa si kaa ku bil Wia sipaan a chogo dii an jono pi u niaa maa, ba ma dii. <sup>26</sup> U fa naa kisin ne ari ni-wogo si jan jon boroboro-la dii, see nii-la si kpu pusun pipi

Wia dunđuna. Ka u jono dii nii. Bua-la le Abiata ne fa nja nialin si kpu pusun pipi Wia kuhian.” <sup>27</sup> Nii ne Yesu bira bula piba a bul, “Wia liise che-wiesii-la pi niaa ne di ba tiu. U bi si di che-wiesii-la ne tii niaa. <sup>28</sup> Mi-na Nuhuobiine Bie ne saa nja che-wiesii-la tiina nii.”

### 3

*Yesu vaare baala u nisinj si suba*

*Mat. 12.9-14; Luuk 6.6-11*

<sup>1</sup> Yesu sii a miira mu juu Wii-chuole dia, di baal kubala ne nii. U nisinj suu. <sup>2</sup> Ba si na Yesu duu jua, ba kala chaare siaa bibenu di ba na ari u jan vaare baala che-wiesii-la cheen. Baa che di ba na wii ne a to nii le a ken Yesu a bul u teen duu chei ba kisinj le ne. <sup>3</sup> Nii ne Yesu bul na-suu-la tiina le duu sii ko ba tutubaanin. U sii mu. <sup>4</sup> Nii ne Yesu piese nialin a bul, “Ee ne la naabalimaba kisinnin bul di la njana che-wiesii-la cheen? Di la pipe niaa le koo di la dudogiseba? Di la laa niaa miisinj koo di la kpukpuba?” U si piese nii, ba nja fuu. <sup>5</sup> Nii ne Yesu na baanin ba nyun. U tuon chei a tin ba digilaa si bi nii wiaa. Nii ne u bula pi na-suu-la tiina a bul, “Ken nj nisinj tiene.” U kaa tiene. U nisi-la fiele a nage u nagin.

<sup>6</sup> Nii ne Farisii tinjaa sii lii. Ba di Herod niaa mu vuure nii ba si jan wuo nja a ken Yesu a kpu.

*Yesu bul wiaa a pi niaa an pe vaare niaa mugi-balin niin*

<sup>7</sup> Yesu ari u haritooro sii a mu mugi-balin niin. Niaa yuge a lii Galilii tinteen a tuto ba harin. Donsun ma lii Judiya tinteen, <sup>8</sup> donsun ma lii Jerusalem ari Idumiya tinteen. Donsun ma lii Jodan fuo-la cholo. Donsun ma lii Taya ari Saadon tinteen. Niaa deenba kala fa nii Yesu wiaa a lii ba tasin a kuko u teen. <sup>9</sup> Nii ne u bula pi u haritooro-la di ba mu jon linj daboro a kaa ku kii linj niin duu juu, di nialin siu kaa yigi. <sup>10</sup> Yesu fa vaare niaa a yuge. Nii wiaa nyanyal tinjaa kala ku ken u banja le aa che di ba digu. <sup>11</sup> Di jin-bonjoo ken niaa donsun nialin tuon. Di ba ne na Yesu kala, ba yie ku tel u naasinj le ne a chichiire ari u ne nja Wia Bie. <sup>12</sup> U bula piba ari siifisinj di ba si leje di wiin deen teeli lerin kala.

*Yesu tuose u haritooro fii ari balia*

*Mat. 10.1-4; Luuk 6.12-16*

<sup>13</sup> Yesu sii a mu lee-la si ken peelee a yire u si cho nialin kala, ba mu u teen. <sup>14</sup> U bira liise ba tuon niaa fii ari balia di ba ne he u teen. U liiseba nii di ba ma mu bul Wia wiaa. <sup>15</sup> U piba dolun maa di ba wuo kikiri jinjin niaa le. <sup>16</sup> Nialin fii ari balia yiraa ne nja: Saamon, Yesu ne he Piita pu, <sup>17</sup> Zebidii bie Jeems ari Jon. Jon fa nja Jeems njaana ne.

Yesu ken̄ba kaa yire Buanaa-  
jis. Yiri-la bubuon̄ ne baanin̄  
tin̄jaa. <sup>18</sup> Ba ku-kaanaa ma  
ne n̄la: An̄duru ari Filip  
ari Batolomi ari Matiu ari  
Tomas ari Jeems Alifiyas bie,  
ari Tadiyas ari Saamon̄ Zelot  
<sup>19</sup> ari Judas Isikarot, nii-la si  
ku n̄aa zen̄be tiina a yalle  
Yesu. U liise nialin̄ dere an̄  
miira mu dia.

*Yesu mage namaga a mu  
tige Sitaani le*

*Mat. 12.22-32; Luuk  
11.14-23; 12.10*

<sup>20</sup> Nii ne niaa bira ku  
hilimi. U di u haritooro  
paala bi chinin̄ na di ba dii  
kudiilee. <sup>21</sup> Nii ne u tan̄ niaa  
nii a sii lii di ba kenu an̄ bul,  
“Uu che u nyaase ne.” <sup>22</sup> Wia  
tenin̄ kerichiba don̄sun̄ ma  
he dime. Ba lii Jerusalem  
ne a ko. Ba ma bul di jin̄-  
bon̄n̄oo kala kuoro ba sii yire  
Belizibul ne kenu. U ne pu  
dolun̄ u kikiri jin̄sin̄ niaa le  
nii. <sup>23</sup> Nii ne Yesu yireba a  
mage namagaba a pipiba a  
bul, “Ee ne Sitaani jan̄ wuo  
n̄aa a kiri u titia? <sup>24</sup> Di tan̄  
niaa ne he dime an̄ bi nii-  
bala kene, ba tan̄ jan̄ tel.  
<sup>25</sup> Di niaa ne bira bi nii-bala  
kene, ba dia jan̄ tel. <sup>26</sup> Di  
Sitaani niaa saa bi nii-bala  
kene, ba tan̄ bi jan̄ chin̄. U  
jan̄ tele dere. <sup>27</sup> Nu u  
si jan̄ juu ni-duon̄ dia a gaa  
u kiaa see duu ken̄ ni-duo-  
la voo bil an̄-na juu paa u  
kiaa.”

<sup>28</sup> Nii ne Yesu bira bula  
pi niaa a bul, “Wutitii ne  
mi bulaa pima, di niaa ne  
n̄aa haacheba kala an̄ pe

tuuse Wia jon̄n̄oo maa, Wia  
jan̄ wuo jon̄ba kala cheba.  
<sup>29</sup> Ama di nuu ne tuuse Wia  
Din̄-zon̄-la jon̄n̄oo, Wia bi  
jan̄ jon̄o cheu da. U tiina n̄aa  
haache-la si maga di u suu  
ne. Wia jan̄ laa wii-la he u  
tuon̄ le.” <sup>30</sup> Nialin̄ don̄sun̄  
fa bula ari jin̄-bomun̄ ne ken̄  
Yesu. Nii ne tii u bul nii.

*Yesu naan̄ ari u n̄aanaa ko  
u teen̄.*

*Mat. 12.46-50; Luuk 8.19-  
21*

<sup>31</sup> Muapilii Yesu naan̄ ari u  
n̄aanaa ko a chin̄ di-jalin̄ an̄  
tin̄ niaa di ba yiru. <sup>32</sup> Di ni-  
dan̄ hon̄o gollu chu. Nii ne  
ba bula pu a bul, “N̄ naan̄ ari  
n̄ n̄aanaa ne chin̄ jeen̄ harin̄  
aa chen̄.”

<sup>33</sup> Nii ne Yesu miira  
pieseba, “Kubee ne n̄aa mi  
naan̄ ari mi naan̄biirin̄?”  
<sup>34</sup> U miira ben̄ nialin̄ si hon̄o  
gollu chu an̄ bula piba a bul,  
“Mi naan̄ ari mi naan̄biirin̄  
ne n̄la. <sup>35</sup> Nii-la kala sii n̄aa  
wialin̄ Wia si cho, u ne n̄aa  
mi n̄aana ari mi dihaala ari  
mi naan̄.”

## 4

*Yesu mage namaga a mu  
tige baal-la si duu kiaa le*

*Mat. 13.1-9; Luuk 8.4-8*

<sup>1</sup> Nii ne Yesu miira mu hon̄  
Galilii muga-la niin̄ a didage  
niaa. Niaa yuge a ku gollu  
chu. Ba si yuga nii ne, u sii  
mu juu liin̄ daboro tuon̄ a  
hon̄ liin̄ tuon̄. Ka nialin̄ hon̄  
muga niin̄. <sup>2</sup> Nii ne u mage  
namagaba a dageba wiaa  
yuge. U namagaba-la don̄o



ne nla: U si, <sup>3</sup> “Má jegile nii mi teen. Baal kubala ne sie a ken u ku-doho kaa lii duu mise. <sup>4</sup> U síi mise nii, ku-doho-la dɔɔsun tel wonbiin tuɔɔ. Diibiisin ku tuɔsa dii. <sup>5-6</sup> Dɔɔsun ma tuu tel kpaginyilin nyun. Hagila bi yuga, ka ba guu nyu. Ba naapoloo bi tinteen jua. Wia pɔse a nmooba ba suu, a tin bɛɛ wiaa ba naapoloo bi tinteen jua. <sup>7</sup> Ku-doho-la dɔɔsun ma tuu tel sɔsun tuɔɔ a nyu. Sɔsu-la ma nyu a nyageba kpu. Ba bi wasa. <sup>8</sup> Ku-doho-la dɔɔsun ma lii tel tintee-zɔmun lɛ a nyu a waa a wase worun. Dɔɔsun he biee mara ari fii fii, dɔɔsun ma mahin bator bator, dɔɔsun ma zɔɔ zɔɔ.” <sup>9</sup> Yesu mage namagala dɛɛ, nii ne u bul, “Digilaa tinnaa, má wuoli ma digilaa a nii wiaa deenba.”

*Yesu dage namaga-la bubuɔɔ*

*Mat. 13.10-17; Luuk 8.9-10*

<sup>10</sup> Nii ne nialin viiri. An ka Yesu dunɔɔna hɔɔ. U haritooroo ari nialin si kpage dime, ba ku piese namagabala bubuɔsa. <sup>11</sup> Nii ne u bula piba a bul, “Ma niaa deenba ne Wia dage u kuorii-la bubuɔɔ pa. Ama ni-kaanaa-kala, namagaba ne u yie kaa didageba. <sup>12</sup> Nii ne ba yie jegili jegili an bi ba bubuɔsa wuo jin, a bira nyilimi nyilimi an bi kun-kala ma wuo na. Di ba ne fa jin ba bubuɔsa, ba fa jan

birima to Wia, di u jon ba haacheba cheba.”

*Yesu dage namaga-la bubuɔɔ*

*Mat. 13.18-22; Luuk 8.11-15*

<sup>13</sup> Nii ne Yesu pieseba a bul, “Ma bi namaga deen bubuɔɔ jin? Eɛ ne saa ma jan naa a jin namagaba kala bubuɔsa?” an dage namaga-la bubuɔɔ. U si, <sup>14</sup> “Baal-la síi duu kiaa, u nage Wia niin wiaa ne u kaa lii di u duu nii. <sup>15</sup> Kialin si tel wonbiin lɛ ne naa nialin si yie nii Wia niin wialin. Di ba nii wialin dɛɛ, Sitaani yie guu ko a ken wii-la a liiri ba tuɔsa lɛ. <sup>16</sup> Kialin ma si tel kpaginyilin nyun ne naa nialin si yie nii Wia niin wialin a guu laa wialin dii ari tuɔɔrun. <sup>17</sup> Ama ba bi boye kene a nage kialin naapoloo si bi tinteen jua. Ba jan sei wii-la a tou mu mage nii. Di heen ne ju-uba, koo di ba to naasin dudɔgisɛba a tin wii-la wiaa, ba tuɔɔ lii wii-la lɛ. Ba jono ta. <sup>18-19</sup> Kialin ma si tel sɔsun tuɔɔ ma ne naa nialin si yie nii Wia niin wialin, ama dunia kiaa wiaa wiwalimeba, ba cho di ba jigi aa che kun-kala. A tin kiaa deenba wiaa ba bi sei di ba to wialin. Wialin bi doho kene ba teen. <sup>20</sup> Kialin ma si tel tintee-zɔmun lɛ ma ne naa nialin si yie nii Wia niin wialin. Ba nii wialin a laa he ba tuɔsa lɛ a ken doho, dɔɔsun mara ari fii fii,

dɔŋsuŋ mahiŋ batori batori,  
dɔŋsuŋ zɔɔ zɔɔ.”

*Yesu mage namaga a mu  
tige chaaniŋ le*

*Luuk 8.16-18*

21 Nii ne Yesu bira bul,  
“N nii che pulumuŋ a chol  
chaaniŋ ku juu dia, ŋ jaŋ keŋ  
gbaŋa a chu tɔɔ? Koo ŋ jaŋ  
joŋo kii godo bubuɔŋ? Ai,  
ŋ jaŋ joŋo kii kua nyuŋ duu  
chaane. 22 Wu-faali tuo, see  
duu ku lii di-jaliŋ. Wii-kala  
si he birimiŋ tuɔŋ ma jaŋ  
ku lii pulumuŋ. 23 Digilaa  
tiŋŋaa, má wuoli ma digilaa  
a nii.” 24 U bira bula piba a  
bul, “Má fiele ma siaa woruŋ  
ari wialiŋ ma sii nii. Nii titia  
ma si to ma dɔŋsuŋ tiŋŋaa  
le, nii titia ne Wia ma jaŋ  
joŋo toma le. 25 Nii-la kala  
sii to Wia niŋ wiaa, Wia jaŋ  
faasa peu le duu to woruŋ.  
Nii-la ma si bi Wia niŋ wiaa  
ka to, Wia bi jaŋ peu le. U si  
peu le mua-la maa, u jaŋ laa  
u kua.”

*Yesu mage namaga a tige  
kiaa duunurŋ le*

26 U bira bula piba a bul,  
“Wia kuorii-la nage ari nia  
si sie a mu di u duu kiaa  
baga le ne. 27 Taŋ biri u  
miira mu piŋ. Taŋ pul u bira  
sii. Tapulaa banmene u sie  
di kialinŋ nyua a waa, ka u bi  
jinŋ ba si ŋaa nii a nyu. 28 Ba  
yie nyu ba titia le a waa a he  
nyuŋ a bii ba titia le. 29 Ba  
bia, u ŋaa ba joŋ sia a kaa  
mu kuŋ.”

*Yesu mage namaga a mu  
tige ku-doho kubala ba sii  
yire Masitad le*

*Mat. 13.31-32, 34; Luuk  
13.18-19*

30 Nii ne Yesu bira piɛɛba  
a bul, “Bee ne la jaŋ joŋ Wia  
kuorii-la a magise? Wu-bee  
ne la jaŋ kaa dage u bubuɔŋ?  
31 U nage ku-doho kubala ba  
sii yire masitad ne, ba yie  
joŋ a duu. Baa duu, di u bi  
wii maga. U ne muuro kii  
ku-doho-na kala si he dime.  
32 Ba ne duu dere, u nyu. U  
yie sii waa a ŋaa tia a kii  
baga ku-duuloo kala kala. U  
naakelee yuge. Diibiisiŋ yie  
ku sageu le a saa ba dellinŋ  
dime.”

33 Yesu mage namagaba a  
yuge a didage niaa. U yie  
didageba a mage nii ba si jaŋ  
wuo laa a he ba nyuŋ le ne.  
34 U yie bi sei duu bul wii-  
kala polli see u mage nam-  
aga. Ama ba di u haritooroo  
dunɔŋna ne hoŋo, u yie dage  
namagaba-la bubuɔŋ a piba  
ne.

*Yesu ŋaa lii-peliŋ kere*

*Mat. 8.23-27; Luuk 8.22-  
25*

35 Chee-la titia didaaninŋ u  
bula pi u haritooro-la a bul,  
“Má lenŋ di la chol muga  
cholo.” 36 Ba ta ni-danŋ-la  
kala ba viiri, aŋ ku juu liinŋ  
daboro-la u fa si hoŋo a kenu  
baa mu. Liinŋ daborusuŋ  
dɔŋsuŋ ma ne he dime a  
mumu. 37 Nii ne di pel-duo  
kubala suomo ŋiŋaa a ku  
ŋmoo liinŋ he liinŋ daboro-la  
le u chiche duu su. 38 Ama  
Yesu fa piŋ donŋ ne daboro-  
la hariŋ a yelli nyu-yelle. Ba

ku chisu a bula pu a bul, “La kuhian, η bi jin di laa che la suu nεε?” <sup>39</sup> Nii ne u sii don le a kpia pel-la le a bula pi muga-la maa duu fiela pin. Pel-la kere, ka lerin kala naa fuii. <sup>40</sup> Nii ne Yesu piese u haritooro-la a bul, “Bεε ne tii fawullun kenma? Ma ha bi yarida naa?” <sup>41</sup> Nii ne fawullun kenba worun, ba pipiese dono, “Kubeε ne saa paala naa nia deen? Peliη ari mugisun kala tuto u niin.”

**5**

*Yesu vaare baal-la jin-bomun si kene*

*Mat. 8.28-34; Luuk 8.26-39*

<sup>1</sup> Nii ne ba sii chol muga cholo a ku yi Gerasa tinjaa tinteen a lii liin daboro le. <sup>2</sup> Ba lia di ba chin, di baal ne nii, jin-bomun kenu. <sup>3</sup> U lii vaamaa tuon a ko. <sup>4</sup> Ba fa yie ken chorumoɔ vobu a lol. Ba vobu u kaa kere. Ba yie kenu he kurun maa, u ta kuru-la yere an sii mu hon vaamaa tuon. Nuukala bi dolun kene duu wuo kenu. <sup>5</sup> Wiiheye ari titanin kala u yie he vaamaa tuon ari peelee nyun a yie sii a duduure. U duure vaama-la tuon a chichiire a ken tabiaa pipaase u titia. <sup>6</sup> U si na Yesu duu he di-bolii, u fa mu a chemu a kpirimi a chuolu. <sup>7-8</sup> Nii ne Yesu bula pi jin-bon-la duu lii baal-la le. Baal-la chiire a bul, “Yesu, Wii-balin Bie, bεε ne η che di η njaami le? Mi jon Wia chunun di η simi dogisu!”

<sup>9</sup> Nii ne Yesu piesu a bul, “N yirin ne bεε?” U si, “Mi yirin ne ku-kene, bεε wiaa la yuga ne.” <sup>10</sup> Nii ne u sulu kinken a bul duu si lene di jinji-la lii tintee-la le. <sup>11</sup> Di toonun ma he lee-la a yuge a didii kiaa peel-la nyun. <sup>12</sup> Jinji-la sul Yesu duu len di ba mu juu toonu-la. <sup>13</sup> U sei. Nii ne ba lii baal-la le a mu juu toonula. Toonu-la kala sii a fa lii peel-la nyun tuu. Ba tuu tel muga tuon a nyua liin a suu. Toonu-la fa yi bui balia.

<sup>14</sup> Nii ne too-daara-la fa mu a ken doworo mu bula pi bagi-daaraa ari tan-la niaa kala. Ba sii ku lii Yesu teen. <sup>15</sup> Baa ko, di baal-la jin-bomun fa si kene, duu hono a laale gerin a ken yarifielaa. Ba si na nii, fawullun kenba. <sup>16</sup> Nialin fa si he dime a na wii-la si naa baal-la ari toonu-la le, ba bul wii-la pi nialin. <sup>17</sup> Ba si nii nii, ba ku sul Yesu a bul duu lii ba tinteen le. <sup>18</sup> Nii ne Yesu mu duu juu liin daboro. Baal-la jinjin fa si kene sulu a bul duu len duu ko di ba mu. <sup>19</sup> Yesu bi seye an bula pu duu miira mu dia a bula pi u dia niaa wii-la kala la Tiina Wia si njaau le, ari u si fau nennige nii. <sup>20</sup> Baal-la miira mu Dekapolis tinteen a bul wii-la kala Yesu si njaau le. Niaa nii, u njaaba wukpunkpere.

*Yesu chise Jaaris tolo suun le an pe vaare haal kubala*

*Mat. 9.18-26; Luuk 8.40-56*

21 Nii ne Yesu miira mu juu liinj daboro a chol muga cholo a mu honj muga niinj. Niaa gire ku chu.

22 Nii ne baal kubala he dime. Baa yire Jaaris. U fa n̄aa Wii-chuole dia kuhian ne. Nii ne u na Yesu a tuu tel u naasinj le 23 a sulu a bul, "Mi tolo n̄i wiilu a pina kikiiki duu suu. Mii che di n̄ ko a jonj n̄ nisinj danju le, duu duori ne."

24 Yesu sii to u harinj, ba mumu. Niaa ma sii tuto u harinj a gollu chu. 25 Baa mu di haal ne nii. Nyanyalii kubala ne kenu. U fa kenj tinja ne deenj deenj jisinj fii ari balia. 26 U fa gollo n̄aa daalusunj kinkenj a na heenj worunj a paala chei u moribee kala pei. Ka u nyanyalii-la wasa juu-u le. 27-28 U si nii Yesu wiaa ne, u ku to niaa tuonj a biina u tuonj le, "Di mi digi u gerinj maa, mi janj duori." Nii ne u piege nialinj a mu chinj Yesu harinj a kenj nisinj a digi u gerinj le. 29 U si digi u gerinj le nii, u tinjala guu dere. Nii ne u titia jinj ari u tinja-la dere ne. 30 Ka Yesu ma jinj u tuonj le ari dol kubala ne liu le. U birime nialinj teenj a pieseba a bul, "Kubee ne digi mi gerinj le nii?" 31 Nii ne u haritooroo bul, "N̄ bi na niaa si yuga nii a gollunj chuu? Ka n̄ pipiese di kubee ne digi n̄ gerinj le." 32-33 Anj ka Yesu ha bibenj duu na nii-la si digu. Ama haal-la jinj wii-la si n̄aa le ne. Nii ne u ko a chichel a tuu tel Yesu naasinj le a bul wii-la

kala pu. 34 Nii ne Yesu miira bula pu a bul, "Mi tolo, n̄ yarida ne n̄aa n̄ duori. Mu ari yarifielaa. Nyanyalii-la bira bi janj keninj."

35 Yesu haa bul wiaa nii haal-la teenj di tinjaaraa lii kuhianj Jaaris dia ko a bula pi Jaaris a bul, "N̄ tolo-la suba ne, bira si la kuhianj-la walimu." 36 Yesu nii ba si bul nii a bula pi Wii-chuole dia kuhianj Jaaris a bul, "Si leje di n̄ boye jonj. N̄aa mi yarida." 37 Nii ne Yesu sii a bi leje nuu-kala to u harinj see Piita ari Jeems ari u n̄aana Joonj. Ba dunjuna ne to u harinj. 38 Nii ne ba ku yi Wii-chuole dia kuhianj-la dia. Baa ko di baa n̄aa gonj aa nmoo niinj bage bage a yiyel. 39 U mu juu a pieseba, "Bee ne tii maa n̄aa gonj deenj kala? Bile bi suba. U pinj donj ne." 40 Ba kala miira china mumomu. Nii ne u kiriba ta ba lii, anj ka u kenj bile nyimma ari u naanj ari u harinj niaa ba juu dia-la bile si pina. 41 Ba si juu dia-la nii, Yesu mu kenj bile nisinj le anj bul, "Talita kumi." U bubuonj ne: Hanjolibie, mi si di n̄ sii! 42 Bile guu sii aa venj. Bile fa n̄aa jisinj fii ari balia ne. U n̄aa wukpunjperere ba le. 43 Nii ne Yesu bul ari siifiesinj di ba si leje di nuu-kala nii wii-la, anj bul di ba n̄aa kudiilee pi bile duu dii.

*Nazarēt niaa via Yesu  
Mat. 13.53-58; Luuk 4.16-*

30

<sup>1</sup> Nii ne u lii dime a mu u tinjeen. U haritooroo ma to mu. <sup>2</sup> Che-wiesii-la cheen u mu juu Wii-chuoɔɔe dia a didage niaa. Ba si nii, ba jesin kala hiriki a bul, “Ee ne u ŋaa a jin wiaa deenba? Kubee ne pu wu-jimin deen? Ee ne u wuo ŋiŋaa wu-duorun deenba?” <sup>3</sup> La jimu, kapinta dee nii? Mæri ne u naan. Jeems ari Joozis ari Judas ari Saamon, ba ŋaa u ŋaanaa ne. U dihaalaa ma ne he daha ŋla.” Nii ne ba na baaniŋ u nyun. <sup>4</sup> Yesu bula piba a bul, “Nii-la sii bul wiaa, Wia Din-zon-la dolun le, u yie mu lee-kala, ba zizilu ne, an ka u jan-niaa ari u dia-niaa siin buu ka su.” <sup>5</sup> A tin ba si bi yarida kene wiaa, u bi wu-duo kala wuo ŋaa lee-la, u ta jon u nisin ne dan nyanyal tinŋaa banmene le ne ba duori.

*Yesu tin u haritooroo fii  
ari balia*

*Mat. 10.5-15; Luuk 9.1-6*

<sup>6</sup> U kperi Yesu ari ba si buu yarida ŋaa. Nii ne u sii a mu golle tasin a didage niaa. <sup>7</sup> U yire u haritooroo fii ari balia a hilimi a tinba balia balia a piba dolun di ba wuo jin-bonŋoo. Nii ne u bula piba a bul, <sup>8</sup> “Ma si kun-kala kaa pe ven wonbii-la, see ma daantigisin dunduna. Ma si kudiilee kaa mu. Ma bira si sulli-gbana ma koru. Ma si moribiee ma jono he ma geri-fesinin le. Ma si gennin

tin bulia ma laalu. <sup>9</sup> Ama ma paa ma nenŋenŋee he a laale geri-bala-bala aa ven.” <sup>10</sup> U bira bula piba a bul, “Di ma ne mua a juu tan kala, ma juu dia-la niaa si cho ma wiaa a he dii-bala le hali di bua-la le ma si jan lii tan-la le yi. <sup>11</sup> Di ma mu tan kala, di ba po di ma si juu a bi ma walin jegile nii, ma kiele mu. Di ma lia, ma kpesi ma naasin hagila ta. Ba jan jin ari ba ŋaa wii ne a cheima.” <sup>12</sup> U tinba nii, ba lii a mu bul niaa le di ba birime a lii ba haacheba le. <sup>13</sup> Ba kiri jinŋin ma a yuge niaa le, ba lii. Ba jon nuun mua ma a bisa he nyanyal tinŋaa le ba duori.

*Joon Wia lii-foori-la suba  
Mat. 14.1-12; Luuk 9.7-9*

<sup>14</sup> Nii ne Yesu yirin teeli lee-na kala. Kuoro Herod ma nii u wiaa. Niaa donsun si, “U ne ŋaa Joon, Wia lii-foori-la. Wia chisu suun le ne. Nii ne tii u ken dolun a ŋiŋaa wu-magilaa deenba.” <sup>15</sup> Ka donsun ma si u nage Ilaaja ne. Donsun ma si, “U ŋaa nii-la sii bul wiaa, Wia Din-zon-la dolun le ne ari faafaa nalin sii bul wiaa, Wia Din-zon-la dolun le nii.”

<sup>16</sup> Kuoro Herod si nii u wiaa u bul, “Joon ne nii. U ne nii-la mi si ŋaa ba keri u nyun. U ne sii suun le nii.” Wii-la si tii u ŋaa ba keri u nyun ne ŋla: <sup>17</sup> Herod fa sie a mu jaa haal kubala. U yirin ne Herodias. U fa ŋaa u ŋaana Filip haala ne. U laa jaa. <sup>18</sup> Nii ne Joon fa bula pi Herod, “N si ken j

naana haala laa jaa nii, u bi wonjbiinj naa.”<sup>19</sup> U si bul nii, Herodias na baaniŋ u nyuŋ a chiche di ba kpu Jooŋ.<sup>20</sup> Nii ne Herod naa ba kenu to dia. Ama u na Jooŋ duu naa tuɔ-pul tiina a njinaa wialinj sfi to wonjbiinj. Nii ne tii u fifau a bibenu woruŋ a bi che di ba kpuu. Wialinj kala Jooŋ si bula kperu ne, ari nii kala u ha cho duu jegile nii wialinj u sfi bul.<sup>21</sup> Kuoro Herod che-lulluŋ tapuluŋ ne bira yie. Nii ne u sii a naa kudiilee yuge a keŋ u kuori-biisinj ari u laali-yuoro-hiasinj ari Galilii kuhiasinj kala, ba kala ko a hono didii kiaa.<sup>22</sup> Ba hono di Herodias tolo ne nii. U ku juu gugua. Herod ari nialinj kala bibeŋ a chou. Nii ne Herod bula pu di ku-la-na kala u sfi che, u jan pu.<sup>23</sup> U paala nmiese a bul, “N sfi che ku-la-na kala, mi jan pinj. N nfi che mi tinteenj senpeenj doŋo a yi lebi maa, mi jan poi a pinj.”<sup>24</sup> Hanfolibie-la sii lii a piese u naan, “Mi bul mii che be keŋ?” Nii ne Herodias si, “Bula pu a bul nj che Jooŋ Wia lii-foori-la nyuŋ ne.”

<sup>25</sup> Tolo-la miire lima lima a mu kuoru-la teenj a bula pu a bul, “Mii che di nj keri Jooŋ Wia lii-foori-la nyuŋ a he pirata le a kaa ku pimi.”<sup>26</sup> Kuoro si nii wii-la, u tuonj kala chei. Ama u si nmiesa nii, niaa kala nii. U bira bi u niinj wuo birime.<sup>27-28</sup> Nii ne di laali-yuoro china a po ba kuoro. U yire ba doŋo duu mu keri Jooŋ nyuŋ kaa ko.

Laali-yuori-la sii a mu lee-la ba si kenu mu to a keri u nyuŋ a he pirata le a kaa ko pi tolo-la. U laa a kaa mu pi u naan.<sup>29</sup> Jooŋ haritooro-la si nii wii-la, ba sii ko a laa u ku-suunj a kaa mu hugi.

*Yesu pi niaa bui banonj kudiilee*

*Mat. 14.13-21; Luuk 9.10-17; Jooŋ 6.1-14*

<sup>30</sup> Yesu nanzooba saa sii a miira ko Yesu teenj a bula pu wialinj kala ba si naa ari wialinj kala ba si daga.<sup>31</sup> Niaa doŋsuŋ yie lillii, ka doŋsuŋ ku jujuu. Yesu ari u haritooro paala bi chininj na di ba dii kiaa. Nii ne u bula piba a bul, “Ma lenj di la mu lee-la niaa si tuo di ma wiesi mua.”<sup>32</sup> Ba sii a juu liinj daboro a mumu niaa si tuo lee-la.<sup>33</sup> Niaa yuge a naba a wuo jinj di ba ne. Nii ne niaa lii tasinj yuge a fa mu lee-la Yesu fa sfi mu a laa sipaanj yi dime.<sup>34</sup> Ba ma ko a lii liinj daboro le. Yesu si mu lii liinj daboro-la le, u na ni-dan di ba hono gberu. Nennige kala kenu. Nialinj nage piesee si bi pie-daara kene ne. U sii a dageba wiaa yuge.

<sup>35-36</sup> Didaaninj ku yi, u haritooro ko u teenj a bula pu a bul, “Lerinj deenj naa girinj ne. Ka wia fiela nla. Ta nialinj di ba mu tasinj ari bagisinj si kpage daha a mu yoo kudiilee a dii.”<sup>37</sup> Di u si, “Ma mu che kudiilee piba ba dii.” Ba piesu a bul, “Nj che di la keŋ siidi bui balia a kaa mu yoo kudiilee a kaa ko

piba di ba dii?" <sup>38</sup> U pieseba a bul, "Boroboro banmεε ne he dime? Má mu na." Ba mu an miira ku bul, "Banon ne ari chenfilee balia." <sup>39</sup> Nii ne u bul di nialin kala tuu gulimo hon hon ya-fielin nyun. <sup>40</sup> Donsun hon zolo zolo, donsun ma mahin balia ari fii fii. <sup>41</sup> Nii ne u jon boroboro-la banon ari chenfilee balia-la a wula ben wia nyun an lolle Wia an kaa choge a pi u haritooro. Ba laa a kaa mu kpaa nialin. U saa jon chenfilee balia-la maa a kaa choge nii, ba kala dii. <sup>42-43</sup> Nu-kala dii a voge. Ka ba mu paa ku-kaanaa, boroboroba ari chenfilee-la si ka, a paa su sinsin fii ari balia. <sup>44</sup> Nialin si dii kialin, ba tuon baalaa fa naa bui banon ne.

*Yesu ven liin nyun*

*Mat. 14.22-33; Jooj 6.15-*

21

<sup>45</sup> Nii ne u len u haritooro mu juu daboro a laa sipaan duoro chol muga cholo a mu Betisaada. Ka u ta ni-dan-la ba viiri. <sup>46</sup> U haritooro mua, u mu jil peel kubala nyun duu chuole Wia dime. <sup>47</sup> Wia tuu juu di liin daboro-la he liin tutubaanin. An ka u dunduja ha he muga niin. <sup>48</sup> Nii ne Yesu bee na di pelin ka lu a po di liin daboro-la si mu. Ba duori duori liin daboro-la lol. Siipuraa u sii a ven liin nyun a mumu a ku kpageba a chiche duu kieliba. <sup>49</sup> Ba nau duu ven liin nyun. Ba si nau, ba

biina di ni-dima ne. Fawullun kenba, ba nmoo niin. <sup>50</sup> Nii ne u guu bula piba a bul, "Má nyire ma boye. Mi-na ne. Ma si lenje di fawullun kenma." <sup>51</sup> U saa ku juu ba teen liin daboro-la le. Pel-la kere. U naaba wukpunkpere. <sup>52</sup> Ba fa na Yesu duu ken boroboro banon a kpaa niaa bui banon, ka ba ha bi u dolun jin. Ba siaa ha bi suro.

*Yesu vaare nyanyal tinjaa*

*Genezaret le*

*Mat. 14.34-36*

<sup>53</sup> Nii ne ba chol a ku yi tan kubala baa yire Genezaret a lii liin daboro-la le an kaa voo liin niin. <sup>54</sup> Ba lii didere, di niaa jima ari Yesu ne. <sup>55</sup> Ba mu duure ba tinteen kala a paa nyanyal tinjaa ari ba bosunun a kaa mu lee-na kala ba si nia di Yesu he. <sup>56</sup> Lee-na kala Yesu si mua, ta-balaa koo ta-biisin koo bagisin, niaa yie paa ba nyanyal tinjaa kaa juu yosun tuon a sulu duu len ba digi u gerin niipinin le. Di ba ne dige, ba yie duori ne.

## 7

*Farisii tinjaa ari Wia tenin kerichiba bul ba nyimmaba wonbiin tonun wiaa*

*Mat. 15.1-9*

<sup>1</sup> Nii ne chee kubala nialin ba sii yire Farisii tinjaa ari Wia tenin kerichiba donsun si lii Jerusalem ko, ba kala sii gire ko Yesu teen. <sup>2</sup> Ba ko di Yesu haritooro donsun hono didii kiaa an bi liin somo. Ba si u nii naa disin

ne. <sup>3</sup> Farisii tinḡaa ari Juu tinḡaa kala, ba bi kuḡ-kala ka dii, see di ba soḡ liiḡ, ari ba naabalimaba si dageba ḡii. <sup>4</sup> Di ba ne yoo kiaa lii yooḡ ma kaa ko, ba bi dii, see di ba soḡ liiḡ. Ba kisinniiḡ yuga. Ba keḡ woḡbii doḡ ne ba sii tiisi ba nyunyualusuḡ ari ba gbaḡsiḡ ari ba hoḡḡ pupoyee kala maa.

<sup>5</sup> Nii ne ba ku pieḡe Yesu a bul, “Beḡ ne tii ḡ haritooroo chichei la naabalimaba kisinniiḡ le? Beḡ ne tii ba bi liiḡ soḡo aḡ didii kiaa?” <sup>6</sup> Nii ne u miira bula piba a bul, “Ma ḡaa kaḡfugi timma ne. Wialiiḡ kala Azaya fa sii bul, Wia Diḡ-zoḡ-la doluḡ le a tigema le ḡaa wutitii ne. Ba ḡmuḡḡe Wia teniiḡ tuoḡ ari u bul di Wia si,

‘Niaa deenba keḡ niinḡ ne a pipimi zile,  
ka ba tuoḡ liimi.

<sup>7</sup> Ba yie chuolemi pei ne  
aa dage nuhuobiine  
weniiḡ  
aḡ bul di Wia ne bula.’

<sup>8</sup> Nuhuobiine weniiḡ ne maa to aḡ via Wia niinḡ wiaa.”

<sup>9</sup> U bira si, “Ma keḡ wu-jimiḡ a via Wia weniiḡ aḡ tuto ma naabalimaba woḡbiinḡ. Ma sii ḡaa ḡii, ma kiaa simaa? <sup>10</sup> Moosis fa ḡmuḡḡa a bul ari Wia si di ḡ fá ḡ nyimma ari ḡ naaḡ, a bira ḡmuḡḡe di nuu ne sii a bul wu-boḡmuḡ a tige u nyimma koo u naaḡ le, di ba kpu tiina. <sup>11</sup> Moosis fa ḡmuḡḡe ḡii ne. Ama ma-na si di nuu ne keḡ kuḡ a mage

duu joḡo pe u nyimma koo u naaḡ le, tiina mu a bula piba, ku-la u fa si jaḡ joḡo peba le ḡaa kuḡ ne baa yire ‘Koobaḡ’. U bubuoḡ ne: Wia ne tiuu. Nii wiaa u bi jaḡ joḡo piba.” <sup>12</sup> Nii ne Yesu bira bula piba a bul, “Ma bira bi sei di nuu ḡaa wii-kala pe u nyimma ari u naaḡ le. <sup>13</sup> Ma yie ḡaa ḡii a via Wia niinḡ wiaa aḡ tuto ma naabalimaba woḡbiinḡ a bira joḡoo dage ma haḡbiisinḡ maa. Wu-yiriba-la yuga ne ma sii ḡaa.”

*Kialiiḡ si keḡ disinniiḡ  
Mat. 15.10-20*

<sup>14</sup> Nii ne Yesu bira yire niaa ba ko. Ba si ko, u bula piba a bul, “Ma kala jegili a nii woruḡ. <sup>15</sup> Kuḡ-kala sii tuu ḡ tuoḡ bi disinniiḡ keḡe. Ama wialiiḡ si he ḡ tuoḡ a kuu lii, ba ne keḡ disinniiḡ. [ <sup>16</sup> Digilaa tinḡaa, ma wuoli ma digilaa a nii.”]

<sup>17</sup> U si bul ḡii dere, u mu juu dia aḡ leḡ nialiiḡ. Nii ne u haritooroo ku pieḡu namaga-la bubuoḡ. <sup>18</sup> Nii ne u pieḡeba, “Ma ha bi wu-jimiḡ keḡeḡ? Ma bi jiiḡ ari nuu ne dii kuḡ, u bi jaḡ wuo ḡaa u keḡ disinniiḡ? <sup>19</sup> N ne dii kuḡ ḡii, u bi ḡ tuoḡ ka tuu see ḡ luoruḡ, a bira to ḡ yaraa lii.” (U dageba ḡii ari kudiilee kisiḡ bira tuo.) <sup>20</sup> Nii ne u bul, “Wialiiḡ kala si he ḡ tuoḡ a kuu lii, ba ne keḡ disinniiḡ. <sup>21</sup> N tuoḡ le ne ḡ yie biine wu-boḡḡoo ḡaaniiḡ



a nɨŋaa ba-chorun ari ha-chorun wu-ŋaalaa, a gigaa niaa kiaa, a bira kpukpu niaa, a chiche niaa haalaa, <sup>22</sup> a bira cho ɨ ken niaa kiaa lilaa, a nɨŋaa wu-bɔŋ-na kala, a ɨmunmoo niaa puo, a ɨaa wialɨŋ kala si bi maga di ɨ ɨaa. N yaraa ma bibieri niaa ɛ. N yie chichei niaa yirin maa, a bibigisi ɨ titia ɛ, a ɨaa ni-yaari. <sup>23</sup> Wu-bɔŋŋɔɔ deenba kala yie lii ɨ tuɔŋ nɛ a ken disinnɨŋ.”

<sup>24</sup> Nii nɛ Yesu sii a lii dime a mu Taya ari Saadɔŋ tinteen ɛ a mu juu faa dia kubala ɛ a bi che di nuu-kala jin u wiaa, ka ba via aŋ jin.

*Siiria tinŋaa haala ɨaa yarida*

*Mat. 15.21-28*

<sup>25-26</sup> Haal kubala nɛ he dime. U ɨaa nuhuɔru nɛ a lii Fɔniisia taŋ-la si he Siiria tinteen ɛ. U yiikoro ɨaa Giriik. Jin-bɔŋ nɛ fa ken u tolo. Nii nɛ u nii Yesu wiaa a sii ko a tuu tel u naasin ɛ a sulu duu kiri jin-bɔŋ-la u bie ɛ. <sup>27</sup> Yesu piesu, “N nɛ ken hanbiisin, ɨ jan jon ba kudiilee a pi vabiisin? Ai, ɨ laa sipaan ɨaa kudiilee pi ɨ hanbiisin nɛ di ba dii. Ba nɛ die aŋ ka, ɨ saa jono pi vahin.” <sup>28</sup> Haal-la si, “Wutitii nɛ, mi Tiina. N bi jan jon hanbiisin kudiilee a pi vahin. Ama hanbiisila sɨ dii kialin, kialin si tel tinteen nɛ, vahi-la ma jan paa dii.” <sup>29</sup> Nii nɛ Yesu bula pi haal-la a bul, “A tin ɨ si

bul wiin deen wiaa, jin-bɔŋ-la lii ɨ tolo ɛ nɛ. Mu dia.” <sup>30</sup> Haal-la viiri. U mua di u bile pina. Jin-bɔŋ-la liiu ɛ.

*Yesu vaare tanɨŋ*

<sup>31</sup> Nii nɛ Yesu miira lii Taya tinteen ɛ a mu to Saadɔŋ ari tasin fii tinteen a mu yi Galilii muga. <sup>32</sup> Nii nɛ di tanɨŋ he dime. Ba kenu kaa ko a sul Yesu duu jon u nisin danu ɛ. <sup>33</sup> Yesu kenu kaa lii niaa tuɔŋ. Ba dunɔŋa balia hoŋ. Nii nɛ u jon u neniee a kaa mu tuu u digilaa ɛ a tu nanɔtuɔrun he u nenɔdelimin ɛ, <sup>34</sup> aŋ beŋ wia nyun aŋ faasa wiesi fir aŋ bul baal-la ɛ, “Efata.” Efata bubuɔŋ nɛ: Kaa suri. <sup>35</sup> Baal-la digilaa suri. U nenɔdelimin ma birime. U bubul wiaa worun. <sup>36</sup> Nii nɛ Yesu bula pi nialin ari siifiesin di ba si wiin deen bula pi nuu-kala. Nii titia u sisi di ba si wiila bula pi niaa, ɨii titia nɛ ba ma fiɛɛɛ sii a bul wii-la gaara bal. <sup>37</sup> Nialin kala si nii wii-la, ba hiriki a bul, “Wii-na kala nɛ u nɨŋaa worun. U paala ɨaa tanɨŋ digilaa suri nɛ u ninii wiaa a bubul wiaa.”

## 8

*Yesu pi niaa bui banɛɛɛ kudiilee*

*Mat. 15.32-39*

<sup>1</sup> Ni-dan bira ku hilimi bua kubala ɛ. Tapulii kubala, ba bira bi kudiilee kenɛ di ba dii. Nii nɛ Yesu yire u haritooro a bula piba, <sup>2</sup> “Mi beŋ niaa deenba, nennige kenmi nɛ. Ba he mi teen

tapulaa batori ne nla, ba bi kudiilee na di ba dii. <sup>3</sup> Di ba ne bi kuŋ-kala die, ka di mi bul di ba viiri, ba jaŋ mu yiegi wonbiin le. Ba doŋsun ma lii di-bolii ne." <sup>4</sup> Nii ne u haritooro pieŋsu, "Ee ne n jaŋ naa a na kudiilee di niaa deenba kala dii girin deen tuon?" <sup>5</sup> U pieŋseba, "Boroboroba banme ne he dime?" Ba si, "Kiaa balipe ne." <sup>6</sup> Nii ne u naa nialin tuu hon tinteen. Ka u jon boroboroba-la balipe a lolle Wia, an kaa choge choge, a pi u haritooro di ba laa kpaa nialin. Ba laa kpaaba. <sup>7</sup> Di ba ken chenfil-biisin ma mua. U jonba maa a chuole Wia an naa u haritooro laa kpaa nialin. <sup>8</sup> Nuu-kala dii a voge. Ka ba paa ku-kaan-biisin a su sinŋin balipe. <sup>9</sup> Nialin fa si dii kialin, ba yi bui banese. <sup>10</sup> Nii ne u taba an ken u haritooro ba mu juu liin daboro a mu Dalimanuuta tinteen.

*Farisii tinjaa ka che di Yesu dage u dolun*

*Mat. 16.1-4*

<sup>11</sup> Nii ne Farisii tinjaa doŋsun sii ko aa che di ba magise Yesu a ku ken wiaa lilere a bul, "N si ken dolun, naa wu-magil di la na a jin ari n dol-la lii Wia ne." <sup>12</sup> Yesu tuon chei. U faasa wiesi. Nii ne u pieŋseba, "Ma leele niaa deenba, bee ne tii ma yie chiche di mi dage mi dolun? Wutitii, mi bulaa pima, mi bi jaŋ naa wu-magil kala di ma leele niaa

deenba na." <sup>13</sup> Nii ne u lenba an miira juu liin daboro a duoro chol muga cholo.

*Yesu bul wiaa a mu tige Farisii tinjaa ari Herod le.*

*Mat. 16.5-12*

<sup>14</sup> Yesu ari u haritooro si duoro chol muga cholo nii, u haritooro liisi ari ba yu ba kudiilee ta, an ka boroboro kubala, u he liin daboro le. <sup>15</sup> Nii ne Yesu bul ari si-ifiesin di ba po ba titia le ari Farisii tinjaa ari Herod le. U di ba nage si-burun ne. Di n jonho he kuŋ-kala le, u yie puore ne. <sup>16</sup> U si bul nii, ba hono vuure a bul, "La bi boroboro kene, nii ne tii u bul nii." <sup>17</sup> Yesu jin ba sii vuure wii-la a pieŋseba, "Bee ne tii ma hono vuure a bul, 'La bi boroboro kene?' Ma ha bi wu-jimin kene? Ee ne ma tuon dol nii? <sup>18</sup> Ma ken siao ne, ba bi naa? Ma ken digilaa ne, ba bi nii? Ma bi wii-la liisee? <sup>19</sup> Mi jon boroboroba banon a chogo kpaa baalaa bui banon. Ma si paa ku-kaanaa, sinŋin banme ne ma paa su?" Ba si, "Sinŋin fii ari balia." <sup>20</sup> U bira pieŋseba, "Mi si jon boroboroba balipe a chogo kpaa niaa bui banese, ma si paa ku-kaanaa, sinŋin banme ne ma paa su?" Ba si sinŋin balipe ne. <sup>21</sup> Nii ne u pieŋseba, "Ma saa ha bi wu-jimin kene?"

*Yesu vaare nyulima Betisaada le*

<sup>22</sup> Yesu ari u haritooro bira ku yi tan kubala baa

yire Betisaada. Nii ne niaa dɔŋsunj sii a keŋ nyulunj kubala a kaa kɔ a sul Yesu duu jonj u nisinj a digu. <sup>23</sup> U keŋ nyulunj-la nisinj le a lɛru lii taŋ-la tuɔŋ a tu nanɗuɔrunj he u siaa le a jonj u nisaa danj le aŋ piɛsu di uu na lerinj neɛ? <sup>24</sup> U beŋ lerinj aŋ bul, "Mii na niaa ne, ama ba nage tiisinj ne aa gollɛ." <sup>25</sup> Nii ne Yesu miira keŋ u nisaa danj u siaa le. Baal-la faasa chaare siaa worunj a na kuŋ-kuŋ-kala worunj. U siaa bira nina. <sup>26</sup> Nii ne Yesu bula pu duu bira sí taŋ-la tuɔŋ juu, duu mu u janj.

*Piita si di Yesu ne ŋaa Kirisito*  
*Mat. 16.13-20; Luuk 9.18-21*

<sup>27</sup> Yesu ari u haritooroo bira sii lee-la a mumu Sizariya Filipa tinteenj. Ba sí mu ŋii, Yesu piɛɛ u haritooroo a bul, "Kubɛɛ ne niaa si di mi ŋaa?" <sup>28</sup> Ba si, "Dɔŋsunj si di ŋ ŋaa Jɔɔŋ ne, Wia lii-foori-la. Dɔŋsunj ma si di ŋ ne ŋaa Ilaaja, nii-la fa síi bul wiaa, Wia Diŋ-zɔŋ-la dolunj le ne. Dɔŋsunj ma si di ŋ ne ŋaa nialinj síi bul wiaa, Wia Diŋ-zɔŋ-la dolunj le dɔŋɔ ne." <sup>29</sup> Nii ne Yesu bira piɛɛ u haritooroo maa a bul, "Ka ma maa, ma si mi ŋaa kubɛɛ ne?" Piita si, "Ŋ ne ŋaa Kirisito, nii-la Wia si liisa." <sup>30</sup> Piita si bul ŋii, Yesu bula piba ari siiflesinj di ba pɔ di ba sí wii-la bula pi nuu-kala.

*Yesu bul ŋii u si janj na heɛŋ aŋ pɛ suu*  
*Mat. 16.21-28; Luuk 9.22-29*

<sup>31</sup> Nii ne Yesu didage u haritooro-la a bul, "Mi-na, Nuhuobiine Bie, mi janj na heɛŋ worunj. Kuhiasinj ari nialinj si kpu pusunj pipi Wia kuhiasinj ari Wia teninj kerichiba, ba kala janj viami aŋ ŋaa di ba kpumi. Di ba ne kpumi, mi janj ŋaa tapulaa batori aŋ bira sii suunj le." <sup>32</sup> U chaasa bul wiinj deenj ne piba. Nii ne Piita kenu kaa suusa lii, a kpiau le, a bul u teenj ari u sí ŋii bul, u bi worunj bula. <sup>33</sup> Nii ne Yesu birime u haritooroo teenj aŋ kpia Piita le a bul, "Sitaani, mu dime. Wialinj ŋ síi bul, nuhuobiine wonɓiinj ne, Wia wonɓiinj dee."

<sup>34</sup> Nii ne u yire u haritooroo ari nialinj kala di ba kɔ a bula piba a bul, "Di nuu-kala níi che duu tomi, see duu via u titia wonɓiinj aŋ jonj u daa-gɛɛɛ baase a tomi. <sup>35</sup> Nii-la kala síi che duu laa u miisinj, u janj via u miisinj ta. Ama nii-la si via u miisinj ta a tinj mi wiaa ari Wia wu-zɔmɔ-la wiaa, u janj sene laa u miisinj. <sup>36</sup> Di ŋ ne dii dunia kala aŋ bi miisinj kene, beɛ kuŋ nyuurii ne ŋ na? <sup>37</sup> Dunia deenj le, beɛ kuŋ ne saa ŋ janj wuo kaa yɔɔ laa ŋ miisinj? <sup>38</sup> Ma leeɛ ni-bɔŋŋɔɔ deenba, ma yie fifá hiisinj a tinj mi wiaa ari mi wu-bulaa le. Ama cheɛ kubala mi-na Nuhuobiine Bie, mi janj kɔ a chaane,

ari mi Nyimma si chaane nii. Mi jaŋ keŋ Wia tinɗaaraa di la kala kɔ. Bua-la le ne, nii-la si fá mi hiisin, mi ma jaŋ fáu hiisin.”

**9**

1 Nii ne Yesu bira bula pi u haritooro-la a bul, “Wutitii ne mi bulaa pima, niaa dɔŋsuŋ he dime, ba bi jaŋ suu, see di ba na Wia kuorii-la china dere ari doluŋ, ka di ba-na suu.”

*Yesu birima*

*Mat. 17.1-13; Luuk 9.28-*

36

2 Tapulaa balidu si ku bal, Yesu keŋ Piita ari Jeems ari Joŋ, ba dunɗuŋa, a kaa mu jil peel-bal kubala nyuŋ. Ba beŋ ba sipaan a na Yesu duu birima. 3 U gennin kala pulle kinkeŋ a tutul. Geri-cheseru kala bi jaŋ wuo chese gennin di ba pulla nage nii. 4 Ilaaja ari Moosis ku lii ba sipaan a china bubul wiaa Yesu teen. 5 Nii ne Piita bula pi Yesu a bul, “La kuhian, u ŋaa wu-zɔŋ ne ari la si he daha. Leŋ di la he leŋŋe batori, di ŋ keŋ dɔŋɔ, di Moosis ma keŋ dɔŋɔ, di Ilaaja ma keŋ dɔŋɔ.” 6 Fawulluŋ fa keŋba ne woruŋ. Nii ne tii u bul nii. U bi jin wii-la kala u si jaŋ bul.

7 Nii ne duoŋbilingbaanin ku toba. Ka yiikoro kubala lii duoŋbilingbaan-la tuɔŋ a bubul, “Mi Bii-chooluŋ ne ŋla. Má jegile nii u teen.”

8 Ba nii yiikoro deen a miira daase. Ba bi nuu-kala na see Yesu dunɗuŋa.

9 Ba si lii peel-la nyuŋ kuu tuu, nii ne Yesu bula piba a bul, “Mi bí che di ma bul wii-la ma si na, see di mi-na, Nuhuobiine Bie sii suuŋ le.”

10 Nii ne ba sei a keŋ wii-la ba tuɔŋ aŋ pipiese dɔŋɔ, “U si jaŋ sii suuŋ le, u bubuɔŋ ne beɛ?” 11 Nii ne ba piese Yesu, “Beɛ ne tii Wia tenin kerichiba bul ari Ilaaja ne jaŋ laa sipaan kɔ, aŋ ka di Wia Bie-na kɔ?” 12 U bula piba a bul, “Wutitii, Ilaaja jaŋ sene laa sipaan kɔ a keŋ kuŋ-kala wasa bil. Ba saa ŋmuŋsa bil Wia tenin tuɔŋ a mu tige Nuhuobiine Bie le duu jaŋ na heeŋ kinkeŋ, di ba jaŋ benu a nage ni-pei. Beɛ ne tii ba ŋmuŋse nii? 13 Leɛle mi jaŋ bula pima ari Ilaaja paala kɔ ne. Ba ŋaaŋ nii kala ba sí che. Ba fa ŋmuŋse nii ne a tigeu le Wia tenin tuɔŋ.”

*Yesu kiri jin-bomun bie le*

*Mat. 17.14-21; Luuk 9.37-*

43

14 Ba si ku yi haritooroo ku-kaana-la di niaa yuga a hilimi dime. Ba di Wia tenin kerichiba keŋ wiaa lilere. 15 Nialin si na Yesu duu kɔ, ba guu hiriki a sii fá a mu chemu a chuɔlu. 16 Nii ne u pieseba, “Wu-beɛ ne ma hilimi nii a kaa lilere?” 17 Nialin dɔŋɔ bul, “La kuhian, mi bie ne mi kaa kɔ ŋ teen. Jin-boŋ ne kenu. U birime tanj. 18 U yie ku kenu u tuu tel tinteen, nanɗuɔ-funfuga to u niin, u chichan u nyilaa a teriki. La saa sul ŋ haritooroo di ba

kiri jin-bon-la u le, ama ba bi wuo kiri.”<sup>19</sup> Nii ne Yesu bula piba a bul, “Ma leele niaa, ma bi yarida kene. Ee ne mi jan nyalime a dieni ma teenj? Má kenj bile kaa ko mi teenj.”<sup>20</sup> Nii ne ba kenj bile kaa ko u teenj. Jin-bon-la si ku na Yesu, u kenj bile teriki, u tuu tel tinteenj a bibilimi, nanɲuo-funfuga-la ku to u niinj.<sup>21</sup> Nii ne Yesu piɛɛ u nyimma, “Che beɛ ne u suomi le?” U si, “U hanbiirinj kala le ne u suomi.”<sup>22</sup> Bua donjo u yie jonu a lulo nyininj le ari liinj le a chiche duu kpuu. N-na si wuo wii-na kala ninjaa, fála nennige anj pela le.”<sup>23</sup> Nii ne Yesu si di nii-la kala si nja yarida, u jan wuo nja wii-na kala.<sup>24</sup> Nii ne bile nyimma sii chinj a faasa bubunsi, “Mi nja yarida, ama u bi yuge. Pemi le di mi yarida yuge.”<sup>25</sup> Ba si china bubul nii, niaa yuga a fá ku hilimi. Yesu ku na a bula pi jin-bon-la ari siifiesinj a bul, “Jin-tanj, mi ne bula di nj lenj bile. Pupo di nj maachie bira suu kenj.”<sup>26</sup> Jin-bon-la chiire anj kenu teriki a ku lenj, ka bile nage duu suba. Nialinj jesinj kala bul di bile suba ne.<sup>27</sup> Ama Yesu mu kenj u nisinj le u sii chinj.<sup>28</sup> Nii ne Yesu ari u haritooro juu dia. Ba luora piɛɛ, “Beɛ ne tii la-na bi jin-bon-la wuo kiri?”<sup>29</sup> U bula piba, “Nuu-kala bi jin-bon-la si nage nii wuo kire tita, see u chuɔle Wia worunj.”

*Yesu bira bul u suunj wiaa.*  
*Mat. 17.22-23; Luuk 9.43-45*

<sup>30</sup> Nii ne ba sii lii lee-la a mu to Galilii tinteenj. Yesu bi cho di nuu-kala jin lee-la u si he,<sup>31</sup> beɛ wiaa uu dage u haritooro ne ari ba jan kenj u-na, Nuhuobiine Bie a he niaa nisinj le di ba kpuu, ka duu sii suunj le tapulaa batori cheenj a kenj miisinj.<sup>32</sup> Ama ba fa bi jin wii-la u si bula bubunj anj fifá fawullunj di ba piɛɛ.

*Yesu haritooro che di ba jin ba tuonj kuhianj*

*Mat. 18.1-5; Luuk 9.46-48*

<sup>33</sup> Nii ne ba sii ko Kapenam. Ba si juu dia, Yesu piɛɛ u haritooro-la a bul, “Beɛ kunj ne ma fa kaa lilere wonbiinj le nii?”<sup>34</sup> Nii ne ba tore ba niinj, beɛ wiaa ba fa kenj ba tuonj kuhianj wiaa ne lilere wonbiinj le.<sup>35</sup> Nii ne Yesu honj anj yire u haritooro-la fii ari balia a bula piba, “Nii-la sii che duu nja ma tuonj kuhianj, see duu ku nja ma tuonj hanbie a timaa pi ma kala!”<sup>36</sup> Nii ne u kenj bii-bie a kaa ku bil ba tutuobaaninj a guoru anj bula piba a bul,<sup>37</sup> “Di nuu ne kenj bii-bie deenj donjo worunj a tinj mi wiaa, mi ne u kenj worunj nii. Nii-la ma kala si kenmi worunj, mi dunɲunja dee u kenj worunj nii. Nii-la si tinmi ma ne u kenj worunj nii.”

*Baala kiri jin-bonjo Yesu dolunj le*  
*Luuk 9.49-50*

38 Nii ne Jooη bula pi Yesu a bul, "La kuhian, la na baal kubala duu kiri jin-bonηoo niaa le η dolun le. La kiru duu si ηii ηaa, bee wiaa u bi la donηo ηaa." 39 Ama Yesu bula piba a bul, "Duu nii ηaa ηii, má bira síu kiru. Di nuu ne ηaa wu-kpunkpere kala mi dolun le, u chie bira bi jan chei mi yirin. 40 Nii-la kala si bi la harin lia, u ηaa la donηo ne. 41 Wutitii mi bulaa pima, nii-la kala si jon gbanηa ari liin a pima a tin ma síi tomi wiaa, u jan laa u time.

η siin nii che duu kenin he haache le, liisa ta. N si jan juu Wia kuorii-la tuon ari siitogo, u ne kpia ba si jonun yuo he Wia nyinin le ari siaa balia. 48 Lee-la nanchuolaa jan dii η yaraa deen deen a bi jan suu, ka nyin-la ma bi jan dise. 49 Wia jan len di η na heen an-na na wuzomun. 50 Yisin sima, ama di u ne sebise, η bira bi jan wuo ηaa duu sin. Má len di ma tuosaa sin, ari yisin si sima ηii, an len di ma kala ken nii-bala."

*Wialin si jan kenin he haache le*

*Mat. 18.6-9; Luuk 17.1-2*

42 Nii-la kala si na hanbiisi-la síi tomi donηo a nyisu duu ηaa wu-bomun, u maga di ba jon nomun a voo laale u banηa le a jonu yuo he muga tuon. Di ba ne ηaa ηii, u ne jan kpia u si weye. 43 Di η nisin nii che duu kenin he haache le, kere ta. N si jan juu Wia kuorii-la tuon ari na-kuun, u ne kpia η si ken na-pilimee an juu Wia nyinin. Lee-la nyin-la bi jan dise. [ 44 Lee-la nanchuolaa jan dii η yaraa deen deen a bi jan suu, ka nyin-la ma bi jan dise.] 45 Di η naan nii che u kenin he haache le, kere ta. N si jan juu Wia kuorii-la tuon ari naa-kuun, u ne kpia ba si jan jonun yuo he Wia nyinin le ari naa-pilimee. [ 46 Lee-la nanchuolaa jan dii η yaraa deen deen a bi jan suu, ka nyin-la ma bi jan dise.] 47 Di

**10**

*Yesu dage niaa di ba si ba haalaa via*

*Mat. 19.1-12; Luuk 16.18*

1 Nii ne Yesu sii a lii dime a mu Judiya tinteen a chol Joodan fuo-la. Ni-dan bira hilimi u teen. U bira dageba ari u si yie dageba ηii.

2 Nii ne Farisii tinηaa donsun ma sii ko u teen a chiche di ba magisu a piesu a bul, "N si via η haala, u ken wonbiin nee?"

3 Yesu miira pieseba, "Ee ne Moosis dagema di ma tuto?"

4 Ba bul, "Moosis si di baala nii che u via u haala, duu laa sipaan a ηmunse tenin a pi haal-la an-na viau."

5 Yesu bula piba a bul, "Ma tuon dolie, ηii ne tii Moosis ηmunse ηii pima. 6 Ama Wia si bugumo ηaa dunia, nialin u si ηaa, ba ηaa baal ari haal ne. 7 Nii ne baal-la jan len u nyimma ari u naan dia [an ka ba di u haala mere

dɔŋɔ lɛ]. <sup>8</sup> Niaa deenba balia jan ken chal-bala. Ba bira bi jan ŋaa niaa balia, see kubala. <sup>9</sup> Nialin saa Wia si kaa mere dɔŋɔ lɛ, u bi maga di nuhuobiine kaa pɔrɛ.”

<sup>10</sup> Yesu ari u haritooro miira sii juu dia. Nii nɛ ba bira piesu wiin deen. <sup>11</sup> U bula piba, “Baal-la-na kala si via u haala an bira jaa dɔŋɔ, u tiina ŋaa haal-la juu Wia haache lɛ nɛ. <sup>12</sup> Di haala ma nɛ via u bala an ma bira mu jaa baal dɔŋ, u ma ŋaa baal-la juu Wia haache lɛ nɛ.”

*Yesu jon nisin dan hanbiisin lɛ*

*Mat. 19.13-15; Luuk 18.15-17*

<sup>13</sup> Niaa sii kɔ Yesu teen a ken ba hanbiisin kaa kɔ, duu jon u nisin danba lɛ di Wia peba lɛ. Nii nɛ u haritooro-la kpiaba lɛ. <sup>14</sup> Yesu si na nii, u na baanin u haritooro-la nyun a bula piba a bul, “Má len di hanbiisi-la kɔ mi teen. Ma síba kiru. Niaa deenba yiri nɛ hɛ Wia kuorii-la tuɔŋ. <sup>15</sup> Wutitii nɛ, mi bulaa pima, di ŋ bi Wia to a nage hanbie si yie to u nyimma ari u naan nii, ŋ bi jan wuo juu Wia kuorii-la tuɔŋ.” <sup>16</sup> Nii nɛ u jon hanbiisi-la a nɔgɛ, a jon u nisin danba lɛ, a chuɔlɛ Wia pipiba di Wia peba lɛ.

*Baal-la si ken kiaa kɔ Yesu teen*

*Mat. 19.16-30; Luuk 18.18-30*

<sup>17</sup> Yesu bira sie duu ven wonbiin. Baal kubala fá ku kpirimi u sipaan a piesu, “Mi kuhia-zomun, ɛɛ nɛ mi

jan ŋaa a ken miisi-la si bi dɛrɛ?” <sup>18</sup> Yesu piesu, “Bɛɛ nɛ tii ŋ yiremi kuhia-zomun? Nu-kala bi zɔŋ see Wia dunɔŋa. <sup>19</sup> Na ŋ jin wialin Wia si lenɛ ba ŋmunsa bil di niaa tuto. Ba nɛ ŋla: Sí niaa kpu, sí ŋ dɔŋɔ tiina haala chɛ, sí gaa, di ŋ ŋaa dansia wii lɛ, sí wiaa nyia. Sí nu-kala kun girima laa. Fífá ŋ nyimma ari ŋ naan.” <sup>20</sup> Nii nɛ baal-la bula pi Yesu, “Mi kuhian, mi to wiaa deenba kala mi hanbiirin lɛ nɛ.” <sup>21</sup> Nii nɛ Yesu nyilimi u siaa lɛ a chou an bula pu, “Wu-bala nɛ ka, ŋ ha bi ŋaa. Jon ŋ kiaa kala yalle a jon moribie-la a pi summoo an ku tomi. N nɛ ŋaa nii, ŋ jan ken kiaa Wia-jan lɛ.” <sup>22</sup> Yesu si bul nii, u ŋaa baal-la siaa biri, bɛɛ wiaa u ken kiaa nɛ worun. U tuɔŋ chei, u sii viiri. <sup>23</sup> Nii nɛ Yesu ben niaa an miira bula pi u haritooro-la a bul, “U ŋaa wu-duo nɛ ari nialin si ken kiaa si jan wuo juu Wia kuorii-la tuɔŋ.” <sup>24</sup> U bul nii, u haritooro-la hiriki. U saa miira bula piba a bul, “Mi nanɔŋsun, u ŋaa wu-duo nɛ ari nialin si ken kiaa si jan juu Wia kuorii-la tuɔŋ. <sup>25</sup> U bi hei ari bunɔŋa si jan wuo to geri-hemin buɔŋ lii ari u si heyɛ nii nii-la si ken kiaa si jan wuo juu Wia kuorii-la tuɔŋ.”

<sup>26</sup> Yesu si bul nii, u haritooro-la faasa hiriki a pipiese dɔŋɔ, “U nɛ nage nii, kubɛɛ nɛ saa Wia jan

laa ta?" <sup>27</sup> Yesu miira benba an bul, "Wii-la si jan kperi nuhuobiine, u bi Wia wuo kperi. Wia wuo wii-kala n̄aa n̄e." <sup>28</sup> N̄ii n̄e Piita bula pu a bul, "Na, la-na leŋ la kuŋ-kala n̄e an tuto ŋ harin̄." <sup>29</sup> Yesu bula pu a bul, "Wutitii n̄e, ma leŋ ma kiaa kala n̄e an tutomi. Mi saa jan bula pima, ni-la kala si jan wuo leŋ u dia koo u naan̄biirin̄ koo u naan̄ koo u nyimma koo u biirin̄ koo u bagisin̄ mi wiaa ari Wia wu-zom̄o-la wiaa, <sup>30</sup> u tiina jan bira na diisin̄ ari naan̄biirin̄ ari naan̄ba ari biirin̄ ari bagisin̄ naan̄siin̄ zolo dunia deen̄ le. Ba ma jan to u naasin̄ dudogisu. Di u n̄e ku suu, u ma jan na miisi-la si bi der̄e. <sup>31</sup> Ama kuhiasin̄ yuga si jan birime han̄biisin̄. Han̄biisin̄ ma yuga si jan birime kuhiasin̄."

*Yesu bira bul u suun̄ wiaa.*

*Mat. 20.17-19; Luuk 18.31-34*

<sup>32</sup> Yesu si bul nii di ba he won̄biin̄ le n̄e aa mu Jerusalem. Yesu laa ba sipaan̄. U haritooroo hiriki, fawullun̄ ma keŋ nialin̄ doŋsun̄ sii to ba harin̄. Nii n̄e Yesu keŋ u haritooroo dun̄dun̄a a suusa lii, a bula piba wii-la kala niaa si jan n̄aau le a bul, <sup>33</sup> "Má jegili mi teen̄. Laa mu Jerusalem n̄e. Di la n̄e yi dime, ba jan keŋ mi-na Nuhuobiine Bie kaa mu pi nialin̄ si kpu pusun̄ pipi Wia kuhiasin̄ ari Wia tenin̄ kerichiba. Ba jan dii mi sariya a bul di u maga

di mi suu n̄e, an keŋmi kaa mu he nialin̄ si bi Juu tin̄n̄aa n̄aa nisin̄ le di ba kpumi. <sup>34</sup> Ba jan moŋmi a jan tu nan̄tuorun̄ ma hemi le. Ba jan viiremi an kpumi maa, ka di mi sii suun̄ le tapulaa batori cheeŋ."

*Jeems ari Joŋŋ sul Yesu aa che di-honun̄ Wia teen̄*

*Mat. 20.20-28*

<sup>35</sup> Nii n̄e Jeems ari Joŋŋ sii. Ba fa n̄aa Zebidii biirin̄ n̄e a mu Yesu teen̄ a bula pu a bul, "La kuhian̄, laa sulun̄ di ŋ n̄aa wii n̄e a pila." <sup>36</sup> Nii n̄e Yesu pieseba a bul, "Wu-bee n̄e maa che di mi n̄aa pima?" <sup>37</sup> Ba bul, "N̄ si jan dii Wia kuorii-la a keŋ yirin̄ a hoŋ ŋ kuori-kpasa nyun̄, leŋ la n̄aa ŋ bubuon̄ huhon̄noo, di doŋo hoŋ ŋ na-diin̄, di doŋo ma hoŋ ŋ na-gua."

<sup>38</sup> Nii n̄e Yesu bula piba a bul, "Ma bi jin̄ ku-la ma sii che. Ma jan wuo nyalima na hee-la mi si jan naa? Ma jan wuo fo Wii-chuoŋe liin̄ ari ba si jan fomi nii koo?" <sup>39</sup> Ba si, "Oo, la jan wuo." Nii n̄e Yesu bula piba a bul, "Wutitii n̄e ma bul. Hee-la mi si jan na, u-na ma ma jan na. Ba si jan fomi Wii-chuoŋe liin̄ nii, ba jan foma ma nii. <sup>40</sup> Ama mi na-diin̄ ari mi na-gua huhon̄noo-la, mi dee bi jan tuoseba. Wia n̄e jan liiseba di ba hoŋ dime."

<sup>41</sup> Yesu haritooroo fii-la si ka nii Jeems ari Joŋŋ si bul wii-la, ba na baaniŋ ba nyun̄. <sup>42</sup> Nii n̄e Yesu yire u haritooroo kala. Ba mu u teen̄. U bula piba a bul,



“Ma jin nialin si n̄aa nialin si bi Juu tin̄n̄aa n̄aa kuoroo, a fa mage di ba beŋ n̄aa woruŋ, aŋ ka ba via aŋ hoŋ ba nyuŋ. Ba kuhiasin ma keŋba doluŋ. <sup>43</sup> Ama u bi maga di ma n̄in̄aa n̄ii. Ma tuoŋ nii-la s̄ii che u n̄aa ma kuhian, u maga duu ne tin̄ tin̄in̄n̄aa pipima. <sup>44</sup> Ma tuoŋ nii-la s̄ii che u n̄aa ma tuoŋ kuoro, u maga duu ne n̄aa ma tuoŋ yomo. <sup>45</sup> Mi-na Nuhuobiine Bie, mi bi ko di mi che n̄aa di ba tima pimi, mi ko di mi-na tima piba, a suu, a laa n̄aa miisaa yuge ta a piba ne.”

*Yesu vaare nyulima*

*Mat. 20.29-34; Luuk 18.35-43*

<sup>46</sup> Nii ne ba ku yi taŋ kubala baa yire Jeriko. Nidaŋ ku hilimi a toba. Ba kala kuu lii dime di nyulima hoŋ woŋbiin̄ niin̄. U n̄aa sully ne. U yirin̄ ne Batimeyas a n̄aa Timeyas bie. <sup>47</sup> U n̄aa di Yesu si lii Nazaret n̄ii ko. U si nii n̄ii, u faasa yire a bula pu a bul, “Yesu, Devit nihin̄, f̄ami nennige.” <sup>48</sup> N̄aa yuga a kpiau le duu keŋ goŋ, ama u faasa yire a kii n̄ii a bul, “Yesu, Devit nihin̄, f̄ami nennige.” <sup>49</sup> Nii ne Yesu chin̄ aŋ bul di ba yiru duu ko. Nii ne ba yire nyuluŋ-la a bula pu a bul, “Nyire ŋ boye aŋ sii ko. Uu yirin̄ ne.” <sup>50</sup> U si nii n̄ii, u wuri u geri-balin̄ ta aŋ sii fula mu yi Yesu. <sup>51</sup> Nii ne Yesu piesu, “Bee kuŋ ne ŋ che mi n̄aa a pin̄?” Nii ne

u bula pu, “Mi kuhian, leŋ di mi siaa suri di mi nina.” <sup>52</sup> Nii ne Yesu bula pu a bul, “N̄ yarida ne n̄aa ŋ duori. Mumu.”

Nii ne u siaa guu suri, u tuto Yesu hariŋ.

## 11

*Yesu juu Jerusalem*

*Mat. 21.1-11; Luuk 19.28-40; Joŋ 12.12-19*

<sup>1</sup> Nii ne Yesu ari u haritooro-la sii mumu Jerusalem. Ba ku yi Betifagi ari Betani diirin̄, a ku yi peel kubala baa yire Oliv. <sup>2</sup> Nii ne Yesu liise u haritooroo balia a tin̄ba a bula piba a bul, “Má mu taŋ-la si he ma sipaan. Di ma ne mua, ma jaŋ na kaku-bie di ba voo bil. Nu-kala ha buu jila. Má puri a kaa ko. <sup>3</sup> Di ma n̄ii puru, di ba piesema a bul di bee ne tii maa puri, má bul di ‘la Tiina n̄ii che. U ne si la puro kaa ko. La jaŋ miira kenu kaa ko leele.’ ”

<sup>4</sup> Ba to woŋbiin̄ bibal di ba voo kaku-bie a kii dia kubala boin̄niin̄. Ba mu di ba puri. <sup>5</sup> Ba s̄ii puri kaku-bie-la, di n̄aa doŋsuŋ chin̄ dime a pieseba, “Bee ne tii maa puri kaku-bie-la?” <sup>6</sup> Nii ne ba bul wialin̄ kala Yesu si si di ba bul. Ba si bul n̄ii, ba leŋ ba puro mu. <sup>7</sup> Ba keŋ kaku-bie-la kaa mu pi Yesu a wuri ba gennin̄ a daŋ kaku-bie-la nyuŋ. Yesu jila hoŋ. <sup>8</sup> Doŋsuŋ ma joŋ ba gennin̄ a jere woŋbiin̄ le. Doŋsuŋ ma keru pipaarin̄ a ma kaa lii jere woŋbiin̄ le duu viven̄. <sup>9</sup> N̄aa doŋsuŋ he

u sipaan. Dɔnsun maa to u harin. Ba kala faasaa ŋaa goŋ a bubul, “Tabarikala! Wia jan pe baala deen sii ko la Tiina Wia dolun le. <sup>10</sup> La naabalima Devit kuorii-la sii ko. Wia jan pe u le duu ko. Má len di la denne Wia.”

<sup>11</sup> Nii ne Yesu mu Jerusalem a mu juu Wia-dia a beŋ kialiŋ kala si he dime. U bene dere di taŋ bire. Nii ne ba di u haritooro-la fii ari balia miira mu Betani a mu chua dime.

*Yesu kaliba he tutogo le*  
*Mat. 21.18-19*

<sup>12</sup> Taŋ si pula, ba sii lii Betani a jon wonbiin mumu. Losun ken Yesu. <sup>13</sup> U na tutogo duu mu chin sipaan a ken pipaarin. U mu yi u bubuon a biine ari nene he dime ne. U mu wula beŋ, di nene tuo see pipaarin, bee wiaa ba neni ha bi yie. <sup>14</sup> Nii ne Yesu bul tia-la le a bul, “A lii jiniŋ a kaa mumu, nuu-kala bira bi jan dii ŋ nene.” U haritooro nii Yesu si bul nii.

*Yesu kiri nialiŋ sii yalle kiaa Wia-dia le*

*Mat. 21.12-17; Luuk 19.45-48; Joŋ 2.13-22*

<sup>15</sup> Nii ne ba mu yi Jerusalem. Ba si yie, Yesu juu Wia-dia. Nialiŋ dɔnsun he dime a yiyalle kiaa, dɔnsun ma yuyoo kiaa. Yesu kiriba kala ta ba lii. Baalaa ma he dime a yiyere moribiee. Yesu nmoo ba teebulba lo. Baalaa dɔnsun ma yalle kokosun. U nmoo ba ma kpasinniŋ a lo. <sup>16</sup> U

bi seye di nuu-kala ken kiaa kaa ku to Wia-dia-la tuon. <sup>17</sup> Nii ne Yesu dageba a bula piba a bul, “Ma bi liise wialiŋ ba si nmunsa Wia teniŋ le? Ba nmunsa di Wia si, u dia jan ŋaa lee-la niaa si jan chuchuole Wia, an ka ma-na miira kaa birime gaari-dia.”

<sup>18</sup> Nialiŋ si kpu pusun pipi Wia kuhiasin ari Wia teniŋ kerichiba, ba kala nii wii-la u si bula. Nii ne baa che wonbiin di ba to kpuu.

Wialiŋ Yesu si daga, niaa yuga a jegile nii, u naaba wu-kpunkpere. Nii ne tii fawullun ken nialiŋ si kpu pusun pipi Wia kuhiasin ari Wia teniŋ kerichiba. Ba chiche di ba kpuu. <sup>19</sup> Didaaniŋ si yie, Yesu ari u haritooro lii taŋ-la le di ba mu pin.

*Yesu dage tutogo-la suun bubuon*

*Mat. 21.20-22*

<sup>20</sup> Chichuo-fie la ba jon wonbiin aa ven, a bira na tutogo-la duu kala suba a tuu ken u naapoloo pe. <sup>21</sup> Nii ne Piita liisi wii-la Yesu si bul tia-la le a bula pi Yesu a bul, “La kuhian, bee na tia-la le ŋ si kaliba he, u suba ne.”

<sup>22</sup> Nii ne Yesu bula piba a bul, “Má ŋaa yarida ari Wia.

<sup>23</sup> Wutitii ne mi bulaa pima, di ma ne ŋaa Wia yarida a bi tuosaa balia kene, ma jan bul di peeliŋ sii mu tel muga tuon. U jan ŋaa a pima.

<sup>24</sup> Nii wiaa kialiŋ-na kala ma si chuole Wia a susul, di ma ne ken yarida, ma jan naba.

25 Bua-na kala di η ne sii chin a chuchuole Wia, biina na di ma di nuu ken wii. Di u cho duu nage ηii ma kala, η jono cheu. N ne ηaa ηii, Wia si he Wia-jan le, u ma jan jon η haacheba cheη. [ 26 Ama di η ne bi wiaa jono che η dɔnsun tinηaa, η Nyimma Wia si he Wia-jan le, u ma bi jan jon η haacheba cheη. ]

*Niaa piese Yesu u dolun wiaa*

*Mat. 21.23-27; Luuk 20.1-8*

27 Ba bira ko Jerusalem a mu juu Wia-dia. Yesu sii ven Wia-dia tuon ηii, nialin si kpu pusun pipi Wia kuhiasin ari Wia tenin kerichiba ari Juu tinηaa kuhiasin, ba kala sii ko u teen 28 a piesu a bul, "Dol bee ne η ken a ηināa wiaa deenba? Kubee ne pin dolun η ηināa ηii?" 29 Nii ne Yesu bula piba a bul, "Mi ma jan piesema wu-bala. Di ma ne dagemi u bubuon, mi ma jan dagema dol-la mi si kene bubuon." 30 Nii ne u pieseba a bul, "Joon, Wia lii-foori-la dolun, u lii Wia teen nee koo u lii nuhuobiine teen nee? Má dagemi."

31 Ba suomo ken wii-la lilere dono le aa bul, "Wu-bee ne laa che di la bul? Di la ne bula pu a bul di Wia teen ne u lii, u jan piesela a bul, 'Bee ne saa tii ma bi wialin u si bula laa dii?' 32 La saa jan wuo bul u lii nuhuobiinee teen nee? Ai." Fawullun kenba a tin nialin si chin dime wiaa. Niaa bula ari Joon fa sene ηaa nii-la sii bul

wiaa, Wia Din-zon-la dolun le ne. 33 Nii ne ba bula pi Yesu a bul, "La bi jin." Yesu ma bula piba a bul, "Too, mi ma bi jan dagema dol-la mi si kene bubuon."

## 12

*Yesu mage namaga a tige nialin sii tin tinηaa бага le Mat. 21.33-46; Luuk 20.9-19*

1 Yesu bira mage namaga a piba a bul, "Baal kubala ne bil бага a chonse kiaa si ken nene yuge a nage chichuen. Ba yiyire gireps. U saa lige бага-la golli ne. U lu bua бага-la tuon di ba chage tii-nene-la liin hihe, a saa lusun nyun dia ma a hono po. U paa niaa a he u бага-la tuon di ba titin. Ka u mu tan don. 2 Tii-nene-la bii, u tin u dia tintinnaa dono duu mu tintinna-la teen a laa tii-nene kaa ko. U mu. 3 Ba kenu a ηmobu an len u ken na-hillin miira mu бага tiina teen. 4 U bira miira tin tintinna-la dono. U ma bira mu. Ba kenu a ηmobu a yage u nyun luri a jolimu. 5 U bira tin tori, u bira mu. Ba kpuu. U tin niaa yuge. Ba ηaa ηii titia nialin ma le. Ba ηmoo donsun an kpu donsun maa. 6 Nii-la si ka, u bii-schoolun ne ηii. Nii harin le ne u timu. U biina u bie ne mua, ba jan zilu. U ma bira mu. 7 Tintinna-la si na bile, ba bula pi dono a bul, 'Di бага-la tiina ne suba, bie deen ne jan dii u kiaa. Má ko di la kpuu. Di la ne kpuu, la ne

janj miira tii u kialinj.' <sup>8</sup> Ba kenj bile a kpuu a jonj yuo ta baga-la harinj."

<sup>9</sup> Nii ne Yesu pieseba, "Ee ne baga-la tiina janj naa? U janj ko a kpu tintinna-la kala, anj jonj baga-la a pi ni-tania."

<sup>10</sup> Nii ne Yesu piese nialinj si nii namaga-la, "Ma bi Wia tenj-la karimaa a mu yi lee-la ba si bul njlaa?"

"Tiebi-la dii-saaraa si via, u ne miira ku naa tiebi-duonj ba si jonj bil dia gentine.

<sup>11</sup> La Tiina Wia tintinjnaa ne nii.

U naala wu-kpunkpere ne.' "

<sup>12</sup> Yesu si bul nii, Juu tinjnaa kuhiasinj chiche di ba kenu kaa mu to dia, bee wiaa ba jima ari u mage namagala a tigeba le ne. Ama ba fa nialinj si he dime. Nii ne tii ba lenj anj viiri.

*Ba piese Yesu lanpoo wiaa*

*Mat. 22.15-22; Luuk 20.20-26*

<sup>13</sup> Ba miira mu anj tinj Farisii tinjnaa donsunj ari Herod haritooroo donsunj di ba bira mu Yesu teenj a magisu a bere kenu. <sup>14</sup> Ba ko u teenj a bula pu a bul, "La kuhianj, la jima di nj kenj wutitii ne. Nj sipaanj tuo nuu le. Nj bi ni-bal sii ka fa. Nj dage Wia wonjbii-titii ne. U naa wonjbiinj ne di la tinj lanpoo a pi Rom tinteenj kuori-balinj ba sii yire Siiza koo? Dage la. <sup>15</sup> La time pu koo la si pa?" Yesu jima ne di ba fugoo bul ne, nii ne u pieseba a bul,

"Bee ne tii maa magisemi? Ma kenj moribii-biinj kaa ko di mi bee na." <sup>16</sup> Ba kenj donj kaa ko. Nii ne u pieseba, "Kubee nyunj ne he dime? Kubee yirinj ma ne ba tuuro he moribii-la le?" Nii ne ba bul di Siiza yirinj ne. <sup>17</sup> U bula piba a bul, "Too, ma jonj Rom tinteenj kuori-bal-la kiaa pu anj jonj Wia ma kiaa pu." Yesu si bul nii, ba niirinj kala maa. Ba lenj anj viiri.

*Ba piese Yesu a tige nialinj si suba le*

*Mat. 22.23-33; Luuk 20.27-40*

<sup>18</sup> Nii ne nialinj donsunj ba sii yire Sadiusii tinjnaa, ba ko u teenj. Sadiusii tinjnaa yie si di nuu ne suba, u bira bi sii. Ba piesu wiaa a bul, <sup>19</sup> "La kuhianj, Moosis dagela Wia teninj tuonj ari baala ne jaa haala, di haal-la ari baal-la ne bi bii lula, anj ka di baal-la suu, u maga di u naana jonj haal-la jaa ne. Di u lul biirinj pi u maala-la si suba, biiri-la janj chinj u nyunj le. <sup>20</sup> Naanjbiirinj balipe ne fa he dime. Ba kala naa baalaa ne. Ba naanj kubala, ba nyimma ma kubala. Ba kuhianj jaa haala. Ba di haal-la bi bii lula, anj ka u suu. <sup>21</sup> Liaminj tiina jonj haal-la jaa. Ba duu ma bi bii lula. Ka u ma suu. Torimunj tiina ma jonj haal-la jaa. U ma nii titia ne. <sup>22</sup> Naanjbiiri-la balipe kala ne jaa haal-la. U bi lula. Nii harinj le ne haal-la ma titia suu. <sup>23</sup> Tapulii-la niaa si janj sii suunj le, baalaa deenja balipe tuonj, kubee ne janj tii

haal-la? Ba kala balipe ne jaau."

24 Nii ne Yesu bula piba a bul, "Ma bi Wia tenin jin. Ma ma bi Wia dolun jin. Nii ne tii ma yenji. 25 Tapullila niaa si jan sii suun le, baalaa bira bi jan jaa haalaa, haalaa ma bira bi jan jaa balaba. Ba kala jan nage Wia tin্দaaraa si he Wia-jan le."

26 Nii ne Yesu bula piba a bul, "Na ma piesemi nialin si jan sii suun le wiaa. Ma bi karime wialin Moosis si bula Wia tenin tuon, lee-la u fa si bul wiaa a tige tii-bie sii dii nyinin leε? Wia ne bula pu duu ne n̄aa Abiraham Wia ari Aizik Wia ari Jekob Wia. (Bua-la le u si bul nii di Abiraham ari Aizik ari Jekob fa suba ne.) 27 Wiaa deenba u si bula, ba bubuosa ne di Abiraham ari Aizik ari Jekob bira sii suun le ne a he Wia kuorii-la tuon. Wia bi jan wuo n̄aa nialin si suba Wia. U n̄aa ni-weyee Wia ne. Ma bi wii-kala jin."

*Yesu dage Wia wiaa tuon ku-balin*

*Mat. 22.34-40; Luuk 10.25-28*

28 Wia tenin kerichiba donjo nia ba si ken wii-la lilere. U ko ba teen. U si na di Yesu chaare wiaa siaa worun, u piesu a bul, "Wialin Wia si dage niaa baa to, kubee ne n̄aa ba tuon wu-balin?" 29 U bula piba a bul, "Ba bula pi Iziral niaa a bul, 'Iziral niaa, ma jegile nii mi teen. La Tiina Wia dunđuna

ne he dime. 30 N̄ ken η tuon kala ari η tuobiinaa kala ari η wii-wii-kala a cho η Tiina Wia.' Ba tuon ku-balin ne nii. 31 Wu-liamin ma ne n̄la: 'Cho η donjo tiina ari η si cho η titia nii.' Wialin Wia si bula, wii-kala tuo a kii wiaa deenba baliamin." 32 Nii ne Wia tenin kerichi-la bula pu a bul, "La kuhian, wutitii ne η bul nii. Wia dunđuna ne he dime, kun-kala bira tuo see Wia dunđuna. 33 N̄ si jan ken η tuon kala ari η tuobiinaa kala ari η wii-wii-kala a cho Wia, a cho η donjo tiina ari η si cho η titia nii, u ne kpia η si jon pusun kpu a nyiga pi Wia, koo η si jon kiaa donsun a bile pi Wia." 34 Yesu na di baal-la ken wujimin. Nii ne u bula pu a bul, "Ma di Wia kuorii-la bi bol." U si bul nii dere, nuu-kala bira bi nyu-duon kene duu piesu wii-kala.

*Yesu dage niaa a tige Kirisito, nii-la Wia si liisa le*

*Mat. 22.41-46; Luuk 20.41-44*

35 Yesu bira dage niaa Wia-dia tuon a pieseba, "Eε ne Wia tenin kerichiba jan wuo bul ari Kirisito, nii-la Wia si liisa, jan n̄aa Devit nihi dunđun ne? 36 Wia Din-zon-la ne fa dage Devit duu bul wiaa a tige Kirisito le. N̄la ne u bul,

'La Tiina Wia bula pi mi  
Tiina  
duu hon u seme, ni-duon  
di-honun,  
see duu yuo dii u dinđonjo  
kala dere.'

37 Devit titia yire nia deen u Tiina. Eε ne saa u jan wuo n̄aa u nihi dun̄duŋ?” Yesu s̄ii bul wiaa, niaa yuga a jegile nii u teenj ari tuot̄orun̄.

*Yesu dage niaa di ba kenj ba titia worunj Wia kerichiba le*  
*Mat. 23.1-36; Luuk 20.45-47*

38 Yesu bira dageba a bul, “Má kenj ma titia worunj Wia tenin̄ kerichiba le. Ba yie gugolle yob̄o le ari ba geriduduosun̄ aa che di niaa jujon̄ba jirima a chuchuōleba. 39 Ba yie chiche ni-balaa dihonun̄ Wii-chuōle diisin̄ le. Di ba ne yireba di ba ku dii kiaa, ba cho di ba hon̄ ni-balaa di-hon̄o maa. 40 Ba yie fugo chuole Wia didieni a kenj yo-haalaa kiaa laa didii. Bua-la le Wia si jan̄ dii ba sariya, ba ne jan̄ na heen̄ a kii ba don̄sun̄ tin̄n̄aa kala.”

*Yo-haala jonj u moribiin̄ kala a pi Wia*

*Luuk 21.1-4*

41 Yesu mu hon̄ lee-la niaa si jon̄ ba moribiee bil a pipi Wia a nina nii ba s̄ii he. Nialin̄ si kenj kiaa, ba faasa hihe moribiee. 42 Nii ne yo-haal kubala ma ko. U n̄aa summu ne a mu jon̄ amisin̄ba balia a ma he. Kobu ne nii. 43 Nii ne Yesu yire u haritooroo a bula piba a bul, “Wutitii ne mi bulaa pima, yo-haala deen̄ moribii-bie-la u si jon̄o he, u ne kii nialin̄ moribie-la kala. 44 Nialin̄ kala si jon̄ moribiee a pi Wia, ba liisa an̄ ka ne. An̄ ka u-na

jon̄ u summu moribiin̄ kala a he, ku-la kala u si kene ne nii.”

## 13

*Yesu bul nii ba si jan̄ nmoo Wia-dia lo.*

*Mat. 24.1-2; Luuk 21.5-6*

1 Yesu si lii Wia-dia ku lii, nii ne u haritooroo don̄o bula pu a bul, “Mi kuhian̄, na tiebie-la ba si kaa saa diala, ba zom̄o kin̄ken̄, jan̄-la ma kala zon̄.” 2 Nii ne Yesu bula pu a bul, “N̄ na ja-balin̄ deen̄? Ba jan̄ nmoo jan̄-la kala lo. Ba bi jan̄ len̄ di tiebii-bala ma ka dan̄ u don̄o le.”

*Heε-la si jan̄ ko*

*Mat. 24.3-14; Luuk 21.7-19*

3 Ba mu jil peel kubala baa yire Oliv, a hon̄ u nyun̄, a bee nina ja-bal-la. Piita ari Jeems ari Jon̄ ari Anduru luora piesu, 4 “Bua bee le ne wiaa deen̄ba jan̄ n̄aa? Bee kiaa ne la jan̄ na, ka wiaa deen̄ba-na n̄aa?” 5 Nii ne Yesu bula piba a bul, “Má kenj ma titia worun̄ di nuu-kala sí ma nyisu. 6 Niaa jan̄ yuge a ko a jon̄ mi yirin̄ he ari ba ne n̄aa Kirisito, a nyise niaa yuge. 7 Ma jan̄ nii ari laalin̄ he daha a he di-bolon̄ maa. Di ma ne ku nii nii, ma sí len̄e di ma boye jon̄. Wiaa deen̄ba kala jan̄ n̄aa bal, ama dunia diderin̄ ha dee nii. 8 Tin̄teen̄ don̄o niaa jan̄ sii a mu a yuo tin̄teen̄ don̄o niaa. Tan̄ kuoro ari u niaa jan̄ sii giri a mu yuo kuoro don̄o ari u niaa. Tin̄teen̄ jan̄ zigili leree yuge. Losun̄

ma jaŋ juu. Hɛɛŋ di-suomuŋ nɛ ŋla. <sup>9</sup> Ama má kɛŋ ma titia woruŋ. Ba jaŋ kɛŋma kaa mu nialin si yie hilime vuvuure wiaa teen di ba dii ma sariya. Ba jaŋ ŋmooma Wii-chuoɔɛ diisinj ɛ. Ma ma jaŋ chinj kuoroo ari taŋ kuhiasinj sipaanj a tinj mi wiaa a dii mi dansia. <sup>10</sup> Ba jaŋ laa sipaanj bul Wia wu-zɔŋŋɔɔ a pi niaa lerinj kala aŋ ka di wiaa deenba-na ŋaa. <sup>11</sup> Di ba nɛ kɛŋma kaa mu di ba dii ma sariya, ma sí leŋe di ma boisinj jonj wialinj ma si jaŋ bul ɛ a laa ma titia. Bua-la ɛ Wia jaŋ jonj wu-jiminj a hɛ ma nyuŋ ɛ. Wii-la kala si kɔ ma nyuŋ, má bul. Ma dee bi jaŋ bul, Wia Din-zɔŋ-la nɛ jaŋ jonjo hɛ ma nyuŋ ɛ.

<sup>12</sup> Naanbiirinj jaŋ kɛŋ doŋɔ a kaa mu pa di ba kpu. Nyimmaba ma jaŋ ŋaa ŋii ba biirinj ɛ. Biirinj ma jaŋ ŋaa ŋii a ma kese ba nyimmaba ari ba naanba, a ma kaa mu pa di ba kpu. <sup>13</sup> Nuukala jaŋ berema a tinj mi wiaa. Ama nuukala si nyalime a mu dere, Wia jaŋ laau ta.

*Yesu bul wiaa a tige kuloru-la ɛ si jaŋ hɛ dime*

*Mat. 24.15-28; Luuk 21.20-24*

<sup>14</sup> Ma jaŋ na di ba jonj ku-loruŋ a bil lee-la u si bi maga u hɛ. Kua deen jaŋ ŋaa wu-boŋŋɔɔ. U jaŋ chei Wia yirinj. (Ma si jaŋ karime wiaa deenba, ma jaŋ jinj ba bubuɔsaa.) Di ma na ŋii, má leŋ di nialinj si hɛ Judiya ɛ, di ba fá jil peelee nyuŋ a faa.

<sup>15</sup> Di nuukala hɛ lusunj nyuŋ a nii wiaa deenba, di u nɛ ku tuu, duu sí u dia juu a chiche u paa u kiaa. <sup>16</sup> Di nuu nɛ hɛ бага ɛ a nii wiaa deenba, duu sí miira mu dia a chiche duu jonj u gerinj.

<sup>17</sup> Nialinj si kɛŋ luoroo ari nialinj si nɔge biirinj, oi, ba jaŋ na hɛɛŋ yuge. <sup>18</sup> Máa sul Wia di wiinj deenj sí yibiininj ŋaa. <sup>19</sup> Wia si ŋaa dunia a ku lii jininj, nuukala ha bi hɛɛŋ deen na a nage ŋii, nuu bira bi jaŋ na hɛɛŋ ŋii a kaa mu wuu. <sup>20</sup> Di Wia fa bi tapulia-la kere ta, ni-bala ma fa bi jaŋ ka. Ama nialinj Wia si liisa di baa tou, ba wiaa nɛ tii u keru tapulia-la ta.

<sup>21</sup> Di nuukala nɛ bula pinj di ŋ beŋ daha a na Kirisito-la, koo di ŋ beŋ dime a nau, síu yarida ŋaa. <sup>22</sup> Niaa doŋsuŋ jaŋ sii fugo bul di ba nɛ ŋaa Kirisito, nii-la Wia si liisa. Doŋsuŋ ma jaŋ sii fugo bul di ba ŋaa nialinj sii bul wiaa, Wia Din-zɔŋ-la doluŋ ɛ nɛ. Ba jaŋ ŋaa wu-magilaa ari wukpuŋkperisinj a chiche di ba nyise nialinj Wia si liisa di baa tou. <sup>23</sup> Wiaa deenba kala mi laa sipaanj bula pima, ka di bua-la-na yi. Má kɛŋ ma titia woruŋ.”

*Yesu bula pi niaa duu jaŋ miira ko*

*Mat. 24.29-31; Luuk 21.25-28*

<sup>24</sup> Nii nɛ Yesu bira bula piba a bul, “Tapulia-la hɛɛŋ deen si kiele, taŋ jaŋ biri di taŋ nɛ pula maa. Chene ma bira bi jaŋ pose.

25 Chenwulaa jan lii wia nyun ku tuu a titel. Ba jan kiri wia nyun kialiŋ kala si keŋ dolun di ba lii ba leree. 26 Nii le ne ma jan na mi-na Nuhuobiine Bie, di mi to duonbilingbaanaa tuon ku tuu. Mi jan keŋ dolun yuge a chaane. 27 Nii le ne mi jan tin Wia tin daaraa di ba mu dunia seme-na kala a keŋ nialiŋ kala Wia si liisa di baa tou a hilimi.

*Yesu bul tutogo wiaa*

*Mat. 24.32-35; Luuk 21.24-33*

28 Di ma na sojaamin duu kuu tase, ma jima ari linbaŋa yie ne. 29 Namaga deen le ma jan gunne wiaa. Di ma na wiaa deenba kala di baa ŋaa, ma jin di mi-na Nuhuobiine Bie kpaga ne. 30 Wutitii mi bulaa pima, ma leele niaa deenba si he ma miisin deen le bi jan suu, ka wiaa deenba ŋaa bal. 31 Wia nyun ari tin teen kala jan dere, ama wialiŋ mi si bula bi jan lel.

*Nuu-kala bi jan jin chee-la wiaa deenba si jan ŋaa*

*Mat. 24.36-44*

32 Ama nuu-kala bi jan jin chee-la wiaa deenba si jan ŋaa. Wia tin daaraa si he Wia-jan ma paala bi jan jin. Mi-na Wia Bie ma bi jan jin, see mi Nyimma dun duna. 33 Ma keŋ ma titia worun a po, bee wiaa ma bi wialiŋ si jan ŋaa chee-la jin. 34 U nage baala si sie aa che u ven wonbiin ne. Di u lii dia le, u jan dage u tininnaa ba

tin tin ŋaa an bula pi nii-la sfi beŋ u dia maa duu po worun duu miira ko.

35 Ma saa po worun, bee wiaa ma bi jin chee-la dia-la tiina si jan ko, di didaanin nee, di tita-siesee nee, di siipuura nee, koo chichuon nee, ma bi jin. 36 Ma biben a po worun, di nii dee, u jan guu ko di ma pin don. 37 Wii-la mi si bulaa pima, u ne mi bulaa pi nuu-kala, ma po worun."

## 14

*Niaa ka che ba kpu Yesu*

*Mat. 26.1-5; Luuk 22.1-2; Joon 11.45-53*

1 Tapulaa balia ne ka duu yi ba che-bal-la: Diisin kielin gbiele-la. Tapulii-la ne ba yie dii boroboro si bi si-burun ken. Nii ne nialiŋ si kpu pusun pipi Wia ari Wia tenin kerichiba, baa che wonbiin di ba luora keŋ Yesu a kpu. 2 Ba bula di ba siu keŋ ba che-bal-la cheen, di ba ne ŋaa nii, niaa jan ŋaa taawei.

*Haala jon nuun a bisa he Yesu nyun le*

*Mat. 26.6-13; Joon 12.1-8*

3 U mu Betani a hon Saamon dia le a didii kias. Saamon fa ŋaa gbege ne an ku duori. Uu dii kias di haal kubala ku juu a keŋ tulaali ari lon. U suora sima, u yalliŋ ma heye. U keŋ lon-la suri a liise nuu-la a bisa he Yesu nyun le. 4 Ka nialiŋ donsun hono gugurime a pipiese dono a bul, "Bee ne tii haala deen keŋ nuu-la a



kaa chei nja? <sup>5</sup> Di ba ne fa yaara jon nuu-la a yalle, u fa jan kii siidi bui balia di ba fa jonjo pi summoo.” Ba sii tutuuse haal-la. <sup>6</sup> Nii ne Yesu bula piba a bul, “Má leŋ haal-la. BEE ne tii ma wiwalimu? Wu-zoŋ ne u ŋaami le. <sup>7</sup> Ma di summoo jan he dime bua-na kala le. Bua-na kala le ne ma chiche ma ŋaa wu-zomun a pi summola, ma jan wuo ŋaa, ama la di ma bi jan he dime deen deen. <sup>8</sup> Haal-la ŋaa kukeri ne. U ŋaa wii-la kala u si jan wuo ŋaa ne. U tise mi yaraa di ba hugi ne, ka mi ha bi suba. <sup>9</sup> Wutitii ne mi bulaa pima, dunia seme-na kala ba si jan wuo mu a bul Wia wu-zomola, ba jan liisi haala deen ma wiaa a bul.”

*Judas seye ari u jan jon Yesu yalla piba*

*Mat. 26.14-16; Luuk 22.3-*

<sup>6</sup> <sup>10</sup> Nii ne Judas Isikarot sii. U ŋaa Yesu haritooro-la fii ari balia doŋo ne. U sii mumu nialin si kpu pusun pipi Wia kuhiasin teen duu keŋ Yesu yalla piba.

<sup>11</sup> Ba si nii nii, ba tuon tɔre. Ba bul ba jan jon moribee pu. A chin bua-la le u suomo chiche wonbii-la u si jan to a keŋ Yesu yalla piba.

*Yesu ari u haritooro dii diisin kielin gbiele kudiilee*

*Mat. 26.17-25; Luuk 22.7-14, 21-23; Jooŋ 13.21-30*

<sup>12</sup> Ba che-bal-la tapul-bunbun ba si yie dii boroboro-la si bi si-burun kene an kpu piese-la ba si yie

kaa ŋaa gbiele-la kudiilee, Yesu haritooro-la sii a piesu, “Nii ne ŋ cho di la mu ŋaa diisin kielin gbiele-la kudiilee di ŋ ku dii?” <sup>13</sup> Nii ne u tin u haritooro balia a bula piba a bul, “Má mu juu tan-la tuon. Di ma ne mua, ma jan cheŋ baal kubala duu chun nyuvie ari liin. Má to u harin. <sup>14</sup> Dia-na kala u si jua, má to juu bula pi dia-la tiina a bul, ‘La kuhian si, la piesin di nii le ne nuhura dia he di ba di u haritooro juu a hono dii diisin kielin gbiele kudiilee?’ <sup>15</sup> U jan dagema dii-bal kubala. U ŋaa lusun nyun dia ne. Ba wasu kala. Lee-la ne ma jan ŋaa kudiilela.” <sup>16</sup> Nii ne u haritooro-la sii lii a mu tan tuon a na wialin kala Yesu si bula piba di ba ŋaa wutitii a ŋaa diisin kielin gbiele-la kudiilee ba dii.

<sup>17</sup> Wia si jua, Yesu ari u haritooro ku juu a hon a didii kialin. <sup>18</sup> Ba sii dii kiaa nii, nii ne Yesu bula piba a bul, “Wutitii, mi bulaa pima, ma niaa deenba sii dii kialin, ma doŋo jan jonmi yalle. La duu ne pe doŋo a didii kiaa leele.” <sup>19</sup> Ba si nii wii-la, ba tuon chei. Ba kala pipiese kun kun. Doŋo yie piese, “Mi nee?” <sup>20</sup> Yesu bula piba a bul, “Ma fii ari balia deenba tuon kubala ne, la kala ne chala keŋ boroboro tutuu gbanja-la tuon. <sup>21</sup> Mina, Nuhuobiine Bie, mi jan suu ari ba si ŋmunse nii a tigemi le. Ama nii-la si jon mi-na Nuhuobiine Bie yalle,

aa, u jaŋ na heeŋ yuge. Ba fa si buu lula, u ne kpia.”

*Kudiile-la Yesu si si di ba dii a liliisi u wiaa*

*Mat. 26.26-30; Luuk 22.14-20; 1 Kōr. 11.23-25*

<sup>22</sup> Ba si hōno didii kiaa, ŋii ne Yesu sii a joŋ boroboro a lolle Wia aŋ kaa choŋe choŋe, a joŋo pi u haritooroo, a bula piba a bul, “Má laa. Mi yaraa namia ne ŋii.”

<sup>23</sup> Ŋii ne u bira joŋ nyunyuala maa ari siniŋ a lolle Wia aŋ joŋo piba. Ba kala nyua nyunyual-bala-la tuoŋ.

<sup>24</sup> Ŋii ne Yesu bula piba, “Mi chaliŋ ne ŋii. Chaliŋ deen wiaa ne tii Wia ta niŋ ma teenj. Mi chaliŋ jaŋ jaase ni-kene wiaa, di Wia joŋ ba haacheba cheba. <sup>25</sup> Wutitii ne mi bulaa pima, mi bira bi jaŋ kō di mi nyua siniŋ deen, see tapulii-la mi si jaŋ kō ne, mi jaŋ nyua si-faliŋ Wia kuorii-la tuoŋ.”

*Yesu bula pi Piita ari u jaŋ bul u buu jin*

*Mat. 26.31-35; Luuk 22.31-34; Jōoŋ 13.36-38*

<sup>26</sup> Ŋii ne ba yii Wii-chuoŋe yiiliŋ a dere aŋ sii lii a mu peel kubala baa yire Oliv.

<sup>27</sup> Ŋii ne Yesu bula piba a bul, “Ma kala jaŋ fá viiri. Ba ŋmunŋse Wia teniŋ tuoŋ di Wia jaŋ kpu pie-daara, aŋ ka piesee fá piŋe. Ba si ŋmunŋse ŋii Wia tenj-la, wii-la jaŋ ŋaa. Ma kala jaŋ fá mi teenj aŋ lenmi. <sup>28</sup> Wia jaŋ chisemi suuŋ le. U ne chisemi, mi jaŋ laa ma sipaanj a mu Galilii.”

<sup>29</sup> Ŋii ne Piita bula pi Yesu a

bul, “Di ba kala fá maa aŋ leniŋ, mi-na bi jaŋ miire ŋ hariŋ.” <sup>30</sup> Ŋii ne Yesu bula pu a bul, “Wutitii ne, jiniŋ titaŋiŋ deen, ŋ-na Piita, ŋ jaŋ bul naansiŋ butori ari ŋ bimi jin, ka di ji-bele-na yel naansiŋ bulia.” <sup>31</sup> Ŋii ne Piita bul ari siifiesiŋ a bul, “La diŋ paala susu maa, mi bi jaŋ bul ari mi biŋ jin.” Ku-kaanaa ma kala bul ŋii.

*Yesu chuŋle Wia Getisemani le*

*Mat. 26.36-46; Luuk 22.39-46*

<sup>32</sup> Ŋii ne ba mu juu lee kubala baa yire Getisemani. Yesu bula pi u haritooroo di ba hōŋ daha, ka u mu chuŋle Wia aŋ kō. <sup>33</sup> U keŋ Piita ari Jeems ari Jōoŋ a kaa mu dime. Yesu tuoŋ kala chei. U tuoŋ bi pina. <sup>34</sup> U bula pi u haritooroo a bul, “Mi tuoŋ kala ne cheye a mage di mi suu. Má hōno pō daha.” <sup>35</sup> Ba hōŋ. Ka u suusa mu sipaanj mua a tuu kpirimi tinteenj a sul Wia a bul duu ne keŋ wonjiŋ, duu sí leŋe di wii-la juu-u le <sup>36</sup> a bira bul, “Mi Nyimma, ŋ jaŋ wuo ŋaa wii-kala. Liise hee-la sii kōmi le. Ama mi-na ŋla tuōtoruŋ le dee, ŋ-na tuōtoruŋ le ne.”

<sup>37</sup> U chuŋla dere aŋ sii kō u haritooroo teenj di ba piŋ doŋ. Ŋii ne u piese Piita a bul, “Ŋ pina nee? Ŋ bi doŋ muapilii ma wuo berēe a diene yi hawa kubalaa? <sup>38</sup> Má chuŋle Wia a pupō di Sitaani sí wuo nyisema. Ma tuoŋ le ma cho di ma

ηαα wu-zṓḡḡṓ, aḡ ka ma bi doluḡ keḡe.”<sup>39</sup> U bira mu a chuṓe Wia a bira bul ḡii titia.<sup>40</sup> U miira kṓ di ba bira piḡ doḡ, bεε wiaa doḡ keḡba ne woruḡ. Ba bi jii ba si jaḡ bul wii-la kala a pu.<sup>41</sup> U miira mu torimuḡ aḡ ku piεεba, “Ma ha pinaa wiesi neε? Má sii, bua-la yie ne. Ba jaḡ keḡ mi-na, Nuhuobiine Bie a pi haache diiree.<sup>42</sup> Má sii, la mu. Nii-la si jaḡ joḡmi yalle ka kṓ ne.”

*Ba keḡ Yesu*

*Mat. 26.47-56; Luuk 22.47-53; Jṓṓḡ 18.3-12*

<sup>43</sup> Yesu ha bi wiaa bula dεε, di Judas nii kṓ ḡii. U fa ḡaa Yesu haritooro-la fii ari balia dṓḡṓ ne. Niaa yuḡe a tuto u harinḡ. Dṓḡsuḡ kori tokobiee ari tanguloo. Nialinḡ si kpu pusunḡ pipi Wia kuhiasinḡ ari Wia teninḡ kerichiba ari ba taḡ kuhiasinḡ ne tinḡba, ba kṓ.<sup>44</sup> Zεḡbe tiina-la fa pi nialinḡ magil ne a bul, “Nii-la mi si mu guori, u ne ḡii. Má kenu.”<sup>45</sup> Judas si yi lee-la Yesu si he, u mu u teenḡ tegi tegi aḡ bul, “La kuhianḡ!” aḡ guoru.<sup>46</sup> Ba kala guriku a kenu.<sup>47</sup> Ka niaa china bibenḡ. Ba tuṓḡ dṓḡṓ liise u tokobiinḡ, a ta nuu digilinḡ keri. Nii-la fa ḡaa nialinḡ si kpu pusunḡ pipi Wia kuhianḡ dia-yoḡ ne.<sup>48</sup> ḡii ne Yesu piεεba a bul, “Mi ḡaa gaaru neε? Ma si kori tokobiee ari tanguloo a kukṓ di ma keḡmii?”<sup>49</sup> Na, tapulii-na kala la di ma ne yie he Wia-dia le, mi dage

Wia wiaa a pipima. Aḡ ka ma bi walima di ma keḡmi dime. Ama wialinḡ kala ba si ḡmuḡsa Wia teninḡ tuṓḡ a tigemi le, ba kala jaḡ ḡaa.”<sup>50</sup> ḡii ne u haritooro kala viau aḡ fá.

<sup>51</sup> Ka bapuṓsi kubala baage geri-bṓṓṓ a tuto Yesu harinḡ a mumu. Baa walime di ba kenu.<sup>52</sup> Ama u wuri geri-bṓṓṓ-la a ta aḡ keḡ yaribiree a fá viiri.

*Ba keḡ Yesu kaa mu nialinḡ si kpu pusunḡ pipi Wia kuhianḡ dia*

*Mat. 26.57-68; Luuk 22.54-55, 63-71; Jṓṓḡ 18.13-14, 19-24*

<sup>53</sup> Ba saa keḡ Yesu a kaa mu nialinḡ si kpu pusunḡ pipi Wia kuhianḡ teenḡ. Ba kṓ dime di nialinḡ si kpu pusunḡ pipi Wia kuhiasinḡ ari ba Wii-chuṓe hiasinḡ ari Wia teninḡ kerichiba kala hilime.<sup>54</sup> Ba kenu mumu ḡii, ka Piita daa tuto ba harinḡ a mu juu nialinḡ si kpu pusunḡ pipi Wia kuhianḡ kaala. U jua di nialinḡ sii pṓ kaala-la hṓṓṓ wiwieni nyininḡ. U mu pεba le.

<sup>55</sup> ḡii ne nialinḡ si kpu pusunḡ pipi Wia kuhiasi-la ari nialinḡ kala si yie hilime vuvuure wiaa chiche di ba na Yesu si ḡaa wii-la chei di ba kpuu a che che wii ka.<sup>56</sup> Niaa yuga a nyia wiaa pu. Ama ba bul nii-lierinḡ ne, ba bi nii-bala bula.<sup>57</sup> ḡii ne niaa dṓḡsuḡ sii chinḡ a nyia wiaa pupu a bul,<sup>58</sup> “La nia ari Yesu si u jaḡ ḡmoo Wia-dia-la niaa si saa a lo aḡ bira wuo saa u dṓḡṓ tapulaa

batori chεεη, di niaa dee bi jaη saa dia-la-na.”<sup>59</sup> Ama ba wialin kala bi kubala ηaa.<sup>60</sup> Nii ne nialin si kpu pusun pipi Wia kuhian sii lii chin nialin tutuobaanin a pieεε Yesu a bul, “N bi nia niaa deenba si bul wialin a tigeη lee? N-na bi wii kene η jaη bul?”<sup>61</sup> Nii ne Yesu tōre u niin. U bi wii-kala bula. Nii ne baal-la bira piesu, “N ne ηaa Kirisito, nii-la Wia si liisa? N ne Wia Biee?”<sup>62</sup> Nii ne Yesu bul, “Mi-na ne. Ma jaη na mi-na Nuhuo-biine Bie di mi hōη Wia seme, ni-duon di-hōnun, a to duonbilingbaanaa tuon a kuu tuu.”<sup>63</sup> U bul nii, baal-la keη u genniη kaa kieε aη bul, “U bi maga di la bira che danjsiaba.”<sup>64</sup> Ma kala bi nia u si chei Wia yirin nii? Bεε ne ma biine?” Nii ne nialin kala bul di u cheye ne, u maga di ba kpuu ne.<sup>65</sup> Dōηsun ma sii a tu nanjuorun a he u siaa le aη voo u siaa to a ηmobu aη bula pu duu dage nii-la si ηmobu. Nii ne ka ba kenu kaa mu pi laali-yuoroo. Ba falle u chanjkanηaa le.

*Piita bula ari u bi Yesu jin  
Mat. 26.69-75; Luuk  
22.56-62; Jooη 18.15-18, 25-27*

<sup>66</sup> Piita si hōη kaala-la le, nii ne nialin si kpu pusun pipi Wia kuhian dia tintinni-tolo kubala ku lii<sup>67</sup> a na Piita duu hōnō wiwieni nyinin. U benu worun aη bula pu a bul, “N ma faa to Yesu hariη ne, baal-la si lii Nazaret.”<sup>68</sup> Nii ne Piita nyia wiaa a

bul, “Mi bi Yesu jin. Mi bi wii-la η si paala bubul jin,” aη sii lii chin zawura tuon.<sup>69</sup> Piita si chin dime, nii ne tintinni-tolo dōη bira nau a bula pi nialin si china kpagu a bul, “Baala deen ma ηaa Yesu haritooro-la dōη ne.”<sup>70</sup> Piita bira nyia wiaa a bul duu dee. Muasuaa nialin si chin dime ma bula pu a bul, “Wutitii ne, η ma ηaa ba dōη ne, η lii Galilii ne.”<sup>71</sup> Nii ne Piita ηmieε a bul, “Mi bi baala deen jin.”<sup>72</sup> U si bul nii dεre di ji-bele yele liamin le. Piita liisi wii-la Yesu si bula pu ari u jaη nyia wiaa a pu naanjiin butori, ka di ji-bele-na yel naanjiin bulia. U saa keη nyun gure a yiyel.

## 15

*Ba keη Yesu kaa mu Paalit teenj*

*Mat. 27.1-2, 11-14; Luuk 23.1-5; Jooη 18.28-38*

<sup>1</sup> Nii ne taη-pul. Nialin si kpu pusun pipi Wia kuhiasin ari ba taη kuhiasin ari Wia tenin kerichiba ari nialin kala si yie hilimi aa vuure wiaa, ba kala ku hilimi a vuure. Ba keη Yesu a vobu a kenu kaa mu Paalit teenj.<sup>2</sup> Nii ne Paalit pieεε Yesu a bul, “N ne ηaa Juu tinηaa kuoro, koo?” Yesu bula pu a bul, “Oo, mi ne.”<sup>3</sup> Nii ne nialin si kpu pusun pipi Wia kuhiasin bul wiaa yuge Yesu si ηaa chei, ka u bi wii bula.<sup>4</sup> Nii ne Paalit bira pieεε Yesu a bul, “N bi wii kene η si jaη

bula pibaa? Bee na wiaa si mage nii ba bul di η cheye.”

<sup>5</sup> Yesu bira bi u niinj suro. Wii-la kperi Paalit.

*Ba seye ari ba jan kpu Yesu*

*Mat. 27.15-26; Luuk 23.13-25; Jooη 18.39-19.16*

<sup>6</sup> Ba gbieli-bal-la ne yie-na kala Paalit yie liise nialinj ba si kaa to dia doηo ne a ta, nii-la niaa si sula laa ta.

<sup>7</sup> Di nialinj doηsun ma fa he sarika le. Ba fa ηaa taawei ne a kpu niaa. Ba kenba kaa mu to dia. Ba doηo yirin ne Barabas.

<sup>8</sup> Nii ne niaa yuge a gire mu Paalit teenj a bul duu ηaa nii u si venee ηaa piba.

<sup>9-10</sup> Paalit jima ari nialinj si kpu pusunj pipi Wia kuhiasinj yaraa bieri ne, nii ne tii ba ken Yesu a ko u teenj. Nii ne u piесе nialinj a bul, “Ma cho di mi liise Juu tinηaa kuorula ne a pimaa?” <sup>11</sup> Nii ne nialinj si kpu pusunj pipi Wia kuhiasinj nyise niaa he di ba sei di ba liise Barabas a ta an leη Yesu.

<sup>12</sup> Nii ne Paalit bira piесе nialinj a bul, “An ka baal-la ma sii yire Juu tinηaa kuoro, bee ne ma si mi kenu kaa ηaa?” <sup>13</sup> Nii ne ba kala faasa kpia a bul, “Leη di ba kenu kaa kpaasa mere daa-geseē nyun.” <sup>14</sup> Nii ne Paalit piесеba a bul, “Wu-boη bee ne u ηaa?” Nii ne ba faasa kpia a kii bunbun-la a bul, “Leη di ba kenu kpaasa mere daa-geseē nyun.” <sup>15</sup> Paalit che duu ηaa di nialinj tuon tore. U liise Barabas an leη ba viire Yesu an bul ba kenu

kaa mu kpaasa mere daa-geseē nyun.

*Laali-yuoroo moη Yesu*

*Mat. 27.27-31; Jooη 19.2-3*

<sup>16</sup> Nii ne laali-yuoroo kenu kaa lii ba kuori-balinj dia kaala tuonj a yire ba laali-yuoroo doηsunj kala. Ba kala ku hilimi. <sup>17</sup> Nii ne ba jon geri-fianj a laalu a che sosunj a kaa sua nyun-chuulo a nage kuoro nyun-chuulo a jono chuu. <sup>18</sup> Ba saa tuu kpirimi u sipaanj a zilu a bul, “Juu tinηaa kuoro, laa chuolun.” <sup>19</sup> Ba jon seke-linj a viire u nyun le, a tu nanuorun ma a heu le a tuu kpirimi a zilu. <sup>20</sup> Ba si momu le a dere, ba wuri geri-fianj-la an paa u titia genninj a laalu, a kenu kaa lii wonbiinj di ba kenu kaa mu kpaase daa-geseē nyun.

*Ba kpaase Yesu daa-geseē nyun*

*Mat. 27.32-44; Luuk 23.26-43; Jooη 19.17-27*

<sup>21</sup> Ba si ku lii nii di ba cheη baal kubala baa yire Saamonj. U jan yirin ne Siriini. U ne fa ηaa Alekizanda ari Rufas nyimma. U lii бага a juuu tan-la tuonj. Uu ko nii, ba kenu a fugu u jon daa-gese-la a baase. <sup>22</sup> Ba ken Yesu kaa mu lee kubala, baa yire Goligota. Yiri-la bubuonj ne nyu-kunskogulo. <sup>23</sup> Ba si yi dime, ba jon sininj a guoli tii-kelinj kubala baa yire mee le a jono pu duu nyua. U via. <sup>24-25</sup> Di wia mage ji-loolun, ba kenu kpaase a mere daa-la nyun. Nii ne ba tonse Yesu

gennin wiaa di ba kpaá, a jin geri bæe ne nuu-kala jan laa. <sup>26</sup> Ba si si Yesu ñaa wialin chei, ba ñmunsa mere daagese-la le a bul, "Juu tinjaa kuoro ne ñla."

<sup>27</sup> Gaaraa balia ma ne ba kpaase a pe Yesu le. Dɔɔɔ he Yesu na-diin, dɔɔɔ ma he u na-gua. [ <sup>28</sup> Ba fa ñmunsa bil Wia tenin tuɔɔ a bul di ba jan kenu kaa pe haache diiree le. Læle wiaa deenba kala sene ñaa.] <sup>29</sup> Ba si kpaasu mere daagese-la nyun ñii, nialin si to dime bibal, ba tutuusu an ken ba nyun chuchugisi a bul, "Oi, ñ ne ñaa nii-la si si ñ jan ñmoo la Wia dia lo an bira wuo saau tapulaa batori pege. <sup>30</sup> Lii daa-la nyun a laa ñ titia ta." <sup>31</sup> Nialin si kpu pusun pipi Wia kuhiasila ari Wia tenin kerichiba, ba ma sisieri Yesu le a bulaa pi dɔɔɔ, "U wuo niaa laa tita ne an bi u titia wuo laa ta. <sup>32</sup> U si si u ne ñaa Kirisito, Juu tinjaa kuoro, len duu lii daa-la nyun ku tuu di la na a laa u wiaa dii." Nialin balia ma ba si kpaasa a pe Kirisito le, ba ma tuusu.

*Yesu suba*

*Mat. 27.45-56; Luuk 23.44-49; Jɔɔɔ 19.28-30*

<sup>33</sup> Wia ku mage nyugbanja, lerin kala biri lim a mu yi didaanin, ka lerin bira pulle. <sup>34</sup> Nii ne Yesu faasa yire u yikoro le a bul, "Eloi, Eloi, lama sabakitani." U bubuɔɔ ne: "Mi Tiina Wia, bæe ne tii ñ jonmi ta?" <sup>35</sup> Di

niaa dɔɔɔsun chin dime a jegile nii wialin u si bula. Nii ne ba bula pi dɔɔɔ a bul, "Na Ilaaja ne u yiyire ñii." <sup>36</sup> Nialin dɔɔɔ fa si chin dime mu jon suosuo a kaa mu yuu sinin si nyala a jonjo tuu sekelin le, a kaa mu he u niin le duu nyua. U si ñaa ñii, u bul, "Má len la gberɛ a na ari Ilaaja jan ku soru daa-la nyun koo." <sup>37</sup> Nii ne Yesu faasa yire an wiesi u wiesi kati. <sup>38</sup> Patiisa ne fa he Wia-dia tuɔɔ. Ba kaa kere. U kiesɛ balia a chin nyu-gbanja a kiesa ku tuu. <sup>39</sup> Nii ne di laali-yuoroo zɔɔɔ kuhian kubala fa chin Yesu sipaan a pɔu. U si na Yesu duu wiesi u wiesi kati ñii, u bul, "Wutitii, baala deen sene ñaa Wia Bii ne."

<sup>40</sup> Haalaa dɔɔɔsun ma fa chin di-bolii a bibenu. Ba tuɔɔ Mæri Magidalin ari Sa-loomi ma fa he dime. Jeems ari Joozis naan ma he dime. Ba fa ken Jeems kaa yire bapuoɔsun ne. <sup>41</sup> Haalaa deenba kala faa to Yesu harin ne a pipeu le Galilii le. Haala-la ma fa si to Yesu harin a kɔ Jerusalem, ba jesin ma fa he dime.

*Ba hugi Yesu*

*Mat. 27.57-61; Luuk 23.50-56; Jɔɔɔ 19.38-42*

<sup>42-43</sup> Tapulii-la di ba ñaa siri didaanin a gberɛ ba chwiesii-la, baal kubala ma fa he dime. U yirin ne Josef. U lii Arimatiya ne. U fa ñaa nialin si yie hilimi a wuvuure wiaa dɔɔɔ ne. Niaa juɔɔɔ

jirima. U ma fa gberε Wia kuorii-la nε duu kō. Nii nε didaanij si yie, u kenj nyu-duonj a mu Paalit teenj a sul Yesu ku-suunj. <sup>44</sup> Nii nε Paalit guu hiriki a pipiεε u titia, "Yesu danja suba nεε?" Nii nε u yire laali-yuoroo zolo kuhianj-la a piεsu, "Yesu danja suba nεε?" <sup>45</sup> U bul, "Oo, u suba nε." U si nii njii, u pi Josef wonjbiinj duu mu sori Yesu ku-suunj a kaa ku tuu tinteenj. <sup>46</sup> Nii nε Josef mu yoo geripe-pula a kaa beu a jonu hugi. U kenu kaa mu hugi bunj ba si lōso lε. U bilimi tabii-balinj nε a tō bua-la niinj. <sup>47</sup> Mεeri Magidalinj ari Joozis naanj Mεeri ma hε dime a na lee-la ba si jonu hugi.

## 16

*Yesu sii suunj lε*

*Mat. 28.1-8; Luuk 24.1-12; Jooj 20.1-10*

<sup>1</sup> Ba chε-wiesii-la si dεrε, Lahadi chεenj siipuuraa, Mεeri Magidalinj ari Jeems naanj Mεeri ari Saloomi mu yoo tulaali di ba kaa mu a tise Yesu ku-suunj. <sup>2</sup> Lahadi chεenj chichuonj, wia si pōso, ba sii mu Yesu bua-la lerinj. <sup>3</sup> Ba sii mu njii, ba pipiεε dōjō, "Kubεε nε janj wuo bilimi tabii-la ta bua-la niinj?" <sup>4</sup> Nii nε ba mu kpage bua-la lerinj di ba kenj tabii-la suri bua-la niinj a bilime ta. Tabii-la fa yuga nε worunj. <sup>5</sup> Nii nε ba mu juu bua-la a na bapuo-si-bie duu hōj bua-la tuonj na-dii

a laalε geri-pula. Ba hiriki. <sup>6</sup> Nii nε u bula piba a bul, "Ma sí fawullunj fá. Mi jima ari Yesu si lii Nazaret nε maa chε, nii-la ba si kpaasa mere daa-la lε. U tuo daha. U sie nε. Má ku na lee-la ba si jonu hugi." <sup>7</sup> Má mu a bula pi Piita ari Yesu haritooroo, ari Yesu janj laa ma sipaanj a mu Galilii. Di ma nε mu dime, ma janj nau dime ari u si bul njii pima." <sup>8</sup> Ba hiriki a chichel a sii lii bua-la lε a fá. Fawullunj kenjba, ba bi wii wuo bula pipi nuu-kala.

[ <sup>9</sup> Yesu sii suunj lε Lahadi chεenj siipuuraa nε. U si sie, u lenj Mεeri Magidalinj nε laa sipaanj nau, nii-la lε u si kiri jin-bōnjō balipe ta. <sup>10</sup> Nii nε Mεeri sii a mu bula pi Yesu haritooroo wii-la si nja. U mua di ba hōnō yiyel. <sup>11</sup> Nii nε u bula piba ari Yesu sii suunj lε a hε u miisij lε, di u-na nau. Ba si nii wii-la, ba bi laa dii.

<sup>12</sup> Nii harinj baalaa balia sii lii a jonj wonjbiinj aa mu tanj dōjō. Ba síi mu njii, Yesu bira to wonjbiinj dōjō a kenj u titia ku dageba. <sup>13</sup> Nii nε ba miira ku bula pi Yesu haritooro-la ku-kaanaa wii-la si nja. Ba bi laa dii.

<sup>14</sup> Nii harinj nε Yesu haritooro-la fii ari kubala hōnō didii kiaa. Baa dii di Yesu nε njii. U kpiaba lε a tinj ba tuonj si dolie wiaa ari ba si bi laa dii ari nialinj si si ba nau duu sii suunj lε, di ba bul wutitii nε. <sup>15</sup> Nii nε u bula piba a bul, "Má mu dunia semε-na kala a bul

Wia wu-zomɔ-la a pi nuu-na kala. <sup>16</sup> Nii-la kala si laa mi wiaa dii a len̄ ba fou Wii-chuoɛ liin, Wia jan̄ laau ta, ama nii-la si bi mi wiaa laa dii, Wia jan̄ jon̄ cheerin̄ pu chɛɛ-la u si jan̄ dii dunia niaa kala sariya.

<sup>17</sup> Wu-magilaa deen̄ba ne ma jan̄ wuo na a jin̄ nialin̄ si laa mi wiaa dii. Ba ne ŋla: Ba jan̄ wuo kikiri jin̄-bɔŋŋɔɔ mi dolun̄ ɛ. Ba jan̄ wuo bubul yiikori-yiriba. <sup>18</sup> Ba jan̄ wuo kukori din̄ŋaa, a nyua daalusun̄ sii kpu niaa, ka u bi jan̄ ŋaaba wii-kala. Ba jan̄ wuo jon̄ ba nisaa a dan̄ nyanyal tin̄ŋaa ɛ di ba duori."

<sup>19</sup> La Tiina Yesu si bul wialin̄ dɛɛ, Wia jon̄u a kaa mu Wia-jan̄, u hɔŋ Wia sɛmɛ, ni-duon̄ di-hɔnun̄.

<sup>20</sup> Nii ne u haritooroo sii lii a mu lee-na kala a bubul Wia wiaa. La Tiina Wia peba ɛ ba mu a ŋin̄aa wu-magilaa, di nialin̄ jin̄ wialin̄ ba sii bul ŋaa wutitii ne. Ami.]



## WIA WU-ZOMŌ-LA LUUK SI NŌMUNSA

<sup>1-2</sup> Mi-na Luuk ne ŋmunse teniŋ deen a pipi ŋ-na mi nanɔɔɔ Tiafilas. Niaa yuga a he ba dolun a ŋmunse wialin kala si ŋaala le. Ba ŋmunse wialin kala niaa si bula pila. Ba ne na wiaa deenba kala a suomi bunbun kala, a ma bul Wia niin wiaa a pipi niaa.

<sup>3</sup> Mi kuhian, mi jegile nii wiaa deenba worun a gunne ba kala ma worun. U ŋaa wu-zon ne di mi ŋmunse wialin kala a pin. <sup>4</sup> Mi ŋmunsa pin di ŋ wuo jin ari wialin kala ba si dagine ŋaa wutitiiba ne.

*Ba bul Joon Wia lii-foori-la lullun wiaa*

<sup>5</sup> Baal kubala ne fa he dime. Baa yire Zakaraya. U fa ŋaa nialin si kpu pusun pipi Wia don ne. Bua-la le di ba ken nialin si kpu pusun pipi Wia kala kaa kpa leree mara ari banese ne. Baal kubala ma fa he dime. U fa ŋaa kuhian lee-la Zakaraya fa si he ne. U yirin ne Abija. Zakaraya haala ma yirin ne Elizabet. U ma fa lii nialin si kpu pusun pipi Wia doho niaa tuon ne. Aaron fa ŋaa u nihiliere. Bua-la le di Herod ne fa ŋaa Judiya tinteen kuoro. <sup>6</sup> Zakaraya ari u haala kala fa ŋaa tuopul timma ne. Ba kala balia fa to Wia niin wialin kala ne

worun. <sup>7</sup> Elizabet fa ŋaa hapiri ne, ba bi bii kala lula, an ka ba di u bala Zakaraya ma kala hiese.

<sup>8-9</sup> Nii ne Zakaraya ari u niaa tapulun yi di ba tin tintinŋaa nialin si kpu pusun pipi Wia si venese ŋaa. Ba sii tin ba tintinŋaa nii, ba yie tonse di ba jin nii-la ba si jan liise duu juu Wia-dia. Ba si ŋaa nii, Zakaraya dii a juu Wia-dia. Nii ne u he nyinin a nyige tii-kelin tulaali a pi Wia, Wia korun le. <sup>10</sup> U si jua nii, nialin si ka, ba he kaala le a chuchuele Wia.

<sup>11</sup> Zakaraya si nyige nyinin nii, di Wia tinɔɔara kubala ko u teen a chin koru-la seme na-diin. <sup>12</sup> Zakaraya nau a chichel. Fawullun kenu. <sup>13</sup> Nii ne Wia tinɔɔari-la bula pu a bul, "Zakaraya, si leɔe di fawullun kenin. Wialin ŋ si sul Wia teen, u jono pin ne. Ŋ haala Elizabet jan lul baal. Ŋ jan he u yirin Joon. <sup>14</sup> Ŋ tuon jan faasa tore. Nidan ma tuon jan tore u lullun wiaa. <sup>15</sup> U jan ŋaa ni-bal Wia teen. U bi jan nyunyua si-duorun. Ba si lulu bua-la le, Wia Din-zon-la jan heu le worun a kaa mu deen deen. <sup>16</sup> U jan wuo ŋaa di Iziral tinŋaa yuge a birima to ba Tiina Wia. <sup>17</sup> U jan ŋaa Wia tintinnu a ken dolun ari Ilaaja fa si ken dolun nii. (Ilaaja fa ŋaa nii-la sii bul wiaa, Wia Din-zon-la dolun le ne.) U jan wuo ŋaa di biirin ari ba nyimmaba kala miira sin. U ma jan wuo ŋaa di nialin si bi Wia niin wiaa

ka to, di ba birime a to tuo-pul tinḡaa wonḡiin a len di niaa ḡaa siri di ba Tiina ko di ba tou."

<sup>18</sup> Nii ne Zakaraya piēē Wia tinḡaari-la a bul, "Ee ne mi jan wuo ḡaa, a jin di wialin ḡ si bula ḡaa wuti-tii? Mi ḡaa ba-nihian ne, mi haala ma ḡaa ha-nihian."

<sup>19</sup> Nii ne Wia tinḡaari-la bula pu a bul, "Mi yirin ne Gebiral a hoḡ Wia semē. U ne tinmi di mi ku bul wuzomun deen a pin. <sup>20</sup> Wialin mi si bula pin jan ku ḡaa, an ka ḡ bi laa dii. Nii wiaa ḡ bira bi wiaa jan wuo bul, see tapulii-la si yie di wiaa deenba mi si bula pin ḡaa."

<sup>21</sup> Wia tinḡaari-la sii bul wiaa Zakaraya teen ḡii, nialin si gberē Zakaraya kaala tuon bi jin wii-la si tii u didieni ḡii Wia dia-la tuon. U kperiba. <sup>22</sup> Nii ne Wia tinḡaari-la viiri, an ka Zakaraya ku lii kaala nialin teen. U bi wiaa wuo bula piba. Nii ne u ken u nisaa a bul wiaa ba teen. U si bi wiaa wuo bubul ḡii, ba jin ari u na wiaa ari duosoo tuon Wia-dia-la tuon ne. <sup>23</sup> Nii ne Zakaraya tintinḡaa tapulaa dere Wia-dia-la le. U miira mu u dia.

<sup>24</sup> U bi diene, ka u haala Elizabet ken luorun. U si ken luorun ḡii, u bi dia le lia cheḡsin banon <sup>25</sup> a bul, "Wia diene an lele pemi le ḡla. U to mi hiisin ne dunia le."

*Ba bul Yesu lullun wiaa.*

<sup>26</sup> Elizabet si ken luorun u cheḡsin balidu le, Wia bira

tin u tinḡaara Gebiral duu mu Galilii tinḡeen tan kubala baa yire Nazaret. <sup>27</sup> U timu duu ken tinḡaarin a kaa mu pi tolo kubala ha si bi baal jin baa yire Meeri. U faa che duu jaa baal kubala ne baa yire Josef. Josef fa ḡaa kuoro Devit doho nuu ne.

<sup>28</sup> Nii ne Wia tinḡaari-la ko u teen a chuolu an bula pu a bul, "Wia cho ḡ wiaa a pen le worun."

<sup>29</sup> Meeri si nii wialin Wia tinḡaari-la si bula pu, fawullun kenu. U ken wialin u si bula bubuon bibiine. <sup>30</sup> Nii ne Wia tinḡaari-la bula pu a bul, "Meeri, Wia cho ḡ wiaa, si lenē di fawullun kenin. <sup>31</sup> N jan ken luorun a lul baal. N jan he u yirin Yesu. <sup>32</sup> U jan ḡaa ni-bal. Ba jan kenu yire Wii-balin Bie. Wia jan ḡaa duu dii kuorun ari u naabalima Devit fa si dii kuorun ḡii. <sup>33</sup> U jan dii kuorun Jekob doho niaa tuon a kaa mu wuu. U bi jan dere da."

<sup>34</sup> Nii ne Meeri bula pi Wia tinḡaari-la a bul, "Mi ha bi baal jin. Ee ne saa wiin deen jan wuo ḡaa?"

<sup>35</sup> Nii ne Wia tinḡaari-la bula pu a bul, "Wia Din-zon-la jan hen le. N jan ken luorun Wia dolun le. Nii wiaa bile jan ḡaa Tuo-pul Tiina. Ba kenu yiyire Wia Bie. <sup>36</sup> Na ḡ naanḡbie Elizabet si hiesa ḡii. Ba si u bi bii wuo lul, an ka u ken luorun u cheḡsin balidu ne ḡla. <sup>37</sup> Wia ken dolun. U jan wuo ḡaa wii-kala." <sup>38</sup> Nii ne Meeri bula pu a bul, "Mi ḡaa Wia tintinnu ne. Len di

wialinj η si bula pimi, di ba ηaa.” Nii ne Wia tinjdaari-la tau anj viiri.

*Mæeri mu chuõle Elizabet*

39 Nii ne Mæeri sii lima lima a mu duu chuõle Elizabet u janj le. U fa he Judiya tinteenj le ne. Peelee ne golli lee-la chu. 40 U si yi dime, u mu juu Zakaraya dia a mu chuõle u haala Elizabet. 41 U laa Mæeri chuõlaa. U si laa ηii, bile si he u luorunj le sii birime. Nii ne Wia Dinj-zõj-la ku he Elizabet le worunj. 42 U faasa bula pi Mæeri a bul, “Wia penj le a kii haalaa kala. Wia ma janj pe bile η si janj lul le. 43 Mi ma ηaa kubee ne, Wia Bie naanj kõ duu chuõlemi? 44 Mi si laa η chuõlaa ηii, bile si he mi luorunj le tuõj ma tõre. U sii fuful. 45 Nj ma laa dii ari wialinj Wia si bula pinj janj ηaa wutitiiba. Nii wiaa η tuõj janj tõre.”

*Mæeri denne Wia*

46 Nii ne Mæeri bula pu a bul,

“Mi tuõj tõrõ ne. Mi didenne Wia.

47 Wia ne ηaa mi Laataara. Nii ne tii mi jujuõse.

48 Mi ηaa u tintinni-bii ne, u liisi mi wiaa.

A lii læle a kaa mu, nuu-kala janj kenmi yiyire tuõtõre tiina.

49 Wia ηaa Wii-bal ne a ηaa wu-kpunjkerisin mi le.

U ηaa Tuõ-pul Tiina ne.

50 Uu fá nialinj kala síu fáu, nennige,

doho-na kala le ne.

51 U kenj u na-duo-la kaa tiene a ηmoo babii-balaa a ηaa ba wu-ηaala-la kala pugi.

52 U kiri ni-balaa ba kuorikpasinninj nyunj anj ka ni-biisinj hõj.

53 U jonj ku-zõjηõõ a pi sum-moo anj kiri nialinj si kenj kiaa ba kenj na-hillinj miire.

54 U fa bil niinj ne a pi la naabalimaba duu janj pe u tintinnaa Iziral tinηaa le. Wii-la u fa si bula ku ηaa wutitii. U peba le.

55 U fa fá Abiraham nennige. U saa janj fá u doho niaa kala ma nennige a kaa mu wuu.”

56 Mæeri si bul wialinj dere, u hõj Elizabet teenj a yi chejsinj batori ne, anj-na miira mu dia.

*Ba lul Jõõj Wia lii-foori-la*

57 Nii ne Elizabet lullunj yi. U lul baal. 58 U si lul ηii, u dõjsunj tinηaa ari u naanjbiirinj nii ηii Wia si fáu nennige. Ba tuõj kala tõre, ba jujuõse.

59 Bile si yi tapulaa chori di ba keri u peninj anj he u yirinj. Ba faa che di ba jonj u nyimma Zakaraya yirinj ne he pu. 60 Nii ne u naanj via anj bul di ba he Jõõj pu.

61 Nihiasi-la bula pu ari ba bi naanjbii kala kene u yirinj dii Jõõj. 62 Nii ne ba kenj nisaa bul wiaa pi u nyimma a piesu di yiri bee ne uu che duu he pu.

63 Zakaraya ɲaa ba keŋ daa-bori-bie kaa kɔ duu ɲmuŋse bile yiriŋ a piba. Ba joŋo pu. U ɲmuŋse daa-boro-la ɛ di bile yiriŋ ne ʒɔɔŋ. Ba karime. Ba si karime a na bile yiriŋ, u ɲaaba wu-kpuŋkpere. 64 Zakaraya si ɲaa ɲii dere, u bira suomi a bubul wiaa a didenne Wia.

65 Nialiŋ fa si he dime a na wii-la si ɲaa, fawulluŋ keŋba. Ba keŋ wii-la lii a bula gaare Judiya tinteen semɛ-na kala, lee-la peelee si gollo chu. 66 Nialiŋ kala si nii ɲii, ba keŋ wii-la bibiine ba tuɔsaa ɛ aa bul, “Bie deen saa jaŋ ɲaa kubee ne?” Ba na ari Wia doluŋ heu ɛ ne. ɲii ne tii ba bul ɲii.

*Zakaraya bul wiaa, Wia Diŋ-zɔŋ-la doluŋ ɛ*

67 ɲii ne Wia Diŋ-zɔŋ-la ku he Zakaraya ɛ, u bul wiaa, Wia Diŋ-zɔŋ-la doluŋ ɛ a bul,

68 “Má leŋ di la denne Wia, Wia-la Iziral tinŋaa sii to.

U kɔ duu pe u niaa ɛ ne a laaba ta.

69 U liise ni-duoŋ ne pila duu kɔ laala ta.

U lii Devit doho niaa tuoŋ ne.

70 Faafaa kala ne Wia to u nialiŋ fa sii bul wiaa u Diŋ-zɔŋ-la doluŋ ɛ, a bula pila

71 ari u jaŋ laala ta la diŋɔŋɔŋɔ

ari nialiŋ kala si berela nisiŋ ɛ.

72 U ma bula ari u jaŋ fá la doho niaa nennige,

a liise yi wii-la u fa si bula pi la naabalimaba.

73-74 U fa bula pi la naabalima Abiraham a ɲmieɛ

ari u jaŋ laala ta la diŋɔŋɔŋɔ nisiŋ ɛ

a pila woŋbiin di la keŋ nyu-duoŋ a tima pu.

75 ɲii ɛ ne la jaŋ wuo to a keŋ tuo-pula u teen, la miisiŋ kala ɛ.”

76 Zakaraya si bul wiaa deenba dere, u bul wiaa a pi u bie ma a bul,

“ɲ-na mi bii, ɲ jaŋ ɲaa nii-la sii bul wiaa, Wii-baliŋ Diŋ-zɔŋ-la doluŋ ɛ.

ɲ jaŋ laa la Tiina-la si jaŋ kɔ sipaan

a wase woŋbiin bilu ɛ.

77 ɲ ma jaŋ bula pi nialiŋ si ɲaa siri di ba tou, di Wia joŋ ba haacheba cheba aŋ laaba ta.

78 Wia keŋ zile aŋ fifá niaa nennige.

U jaŋ laala ta a leŋ di la hoŋ pulumuŋ tuoŋ.

79 Puluŋ-la jaŋ lii Wia-jaŋ a poɛ he nialiŋ kala si hoŋ birimiŋ tuoŋ a faa che di ba suu.

U jaŋ dagela woŋbii-la si keŋ yarifielaa di la to.”

80 ɲii ne bile sii waa a he yaraa a keŋ doluŋ ari wu-jimiŋ. U mu he giri-bine tuoŋ a mu yi tapulii-la u si keŋ u titia kaa ku lii dage Iziral tinŋaa.

## 2

*Ba lul Yesu*  
*Mat. 1.18-25*

<sup>1</sup> Baal kubala ne fa he dime, baa yire Ogasitas. U ne fa nna Rom tinnaa kuoribalin. Bua-la le u bul di ba diise u tinteen niaa. Ba ha bi nii nna, see lese ne ba nna nii. <sup>2</sup> Ba si bugumo diise niaa nii, baal kubala ne fa chin kuori-balin nyun Siiria tinteen le. Baa yire Kiriinias.

<sup>3</sup> Nii ne nuu-kala mu u jan di ba diisu dime. <sup>4</sup> Josef ma sii Nazaret Galilii tinteen le a mu Judiya tinteen, a mu juu tan kubala baa yire Betilehem. Lee-la ne ba fa lul kuoro Devit. Josef fa nna kuoro Devit doho nuu ne. Nii ne tii u mu dime. <sup>5</sup> Ba di Meeri kala mu dime. Meeri fa nna nii-la si si u jan jaau ne, ka u ken luorun.

<sup>6</sup> Ba si yi Betilehem, ba hon dime. Nii ne Meeri lullun yi, <sup>7</sup> an ka ba bi lerin na nuuora dia-la le di ba juu. Nii ne tii ba mu juu jadia. Dime ne Meeri lul u biibunun, baal, a ken gerin a beu a jonu bil yan nyun.

*Pie-daaraa nii bile lullun wiaa.*

<sup>8</sup> Bua-la le pie-daaraa ne fa he tintee-la seme donjo a he yan tuon a chua dime titanin aa ben ba piesee.

<sup>9</sup> Nii ne Wia tindaara kubala ko ba teen. U si ko nii, Wia pulumun chaana heba le. Fawullun kenba. <sup>10</sup> Nii ne Wia tindaari-la bula piba a bul, "Ma si leje di fawullun kenma. Mi ken

wu-zonnon ne ko di mi bula pima. Nii-la kala si nii wuzomola, u tuon jan tore. <sup>11</sup> Titanin deen ba lul ma Laataara ne Devit jan le. Baa yiru la Tiina Kirisito, nii-la Wia si liisa. <sup>12</sup> Nla ne ma jan wuo to jin. Di ma mu dime, ma jan na bile di ba ken gennin beu a jonu bil yan nyun."

<sup>13</sup> Nii ne Wia tindaaraa yuge a guu lii a pe Wia tindaari-la le a yii yiilaa a denne Wia a bul,

<sup>14</sup> "Ma len di la denne Wia si he Wia-jan le.

Wia ma tuon tore nialin si he tinteen le ne. Ba ma jan na yarifielaa."

<sup>15</sup> Nii ne Wia tindaara-la miira mu Wia-jan. Ka pie-daara-la bula pi donjo a bul, "Ma len di la mu Betilehem a na wii-la la Tiina Wia si to u tindaaraa le a bula pila."

<sup>16</sup> Ba sii fa lima lima a mu na Meeri ari Josef. Ba naba an na bile maa di u pin yan nyun. <sup>17</sup> Nii ne pie-daara-la bula pi bile naan ari u nyimma wialin Wia tindaara-la si bula piba a tige bile le. <sup>18</sup> Nialin kala si nii nii, u naba wu-kpunkpere. <sup>19</sup> Meeri laa wiaa deenba kala a he u nyun le a kaa bibiine.

<sup>20</sup> Nii ne pie-daara-la miira mu ba pie-daalin. Baa mu a yiyii yiilaa a didenne Wia. Wialin kala Wia tindaara-la si bula piba, ba naba.

*Ba he Yesu yirin*

21 Bile si yi tapulaa chori, ba keru u peniŋ aŋ he u yiriŋ. Ba he Yesu pu, yiri-la Wia tiŋdaari-la fa si daga bua-la le Mæeri fa ha si bi luoruŋ keŋe.

*Ba keŋ Yesu juu Wia-dia.*

22-23 Wialin Moosis fa si ŋmuŋsa bil di niaa tuto doŋo ne ŋla:

“Di baal ari u haal ne lul ba bii-buŋbuŋ, duu ne ŋaa baal, u maga di ba mu piise ba disinniŋ ta ne.”

Moosis fa bira ŋmuŋsa bil Wia teniŋ tuoŋ di nuu-na kala ne lul u bii-buŋbuŋ, di bile ne ŋaa baal, duu joŋo pi Wia. Nii ne Josef ari Mæeri ŋaa ŋii. Ba sii joŋ bile a kaa mu Jerusalem a joŋu pi Wia. 24 Ba bira ŋmuŋsa di ba kpu kokosuŋ balia maa a pi Wia. Nii ne Josef ari Mæeri sii mu Wia-dia di ba ŋaa ŋii.

25 Bua-la le baal kubala ne fa he Jerusalem le, baa yire Simiaŋ. U fa ŋaa ni-zoŋ ne a fifá Wia a fa gbigbere di Wia laa Iziral tiŋŋaa ta. Wia Diŋ-zoŋ-la ma heu le woruŋ.

26 Wia Diŋ-zoŋ-la fa bula pu ari u bi jaŋ suu see duu na Kirisito, nii-la Wia si jaŋ liise duu ko. 27 Nii ne Yesu nyimma ari u naaŋ juu Wia-dia a joŋu pi Wia aŋ pe ŋaa ŋii Wia niŋ wiaa si bula ŋii ne. Di Wia Diŋ-zoŋ-la keŋ Simiaŋ ma ku juu Wia-dia. 28 Simiaŋ na bile a laau a he u nisaa le aŋ denne Wia a bul,

29 “Mi Tiina, ŋ len di wialin ŋ si bula pimi sene ku ŋaa.

Ŋ si ŋaa ŋii, len di mi-na ŋ tiŋtinna na woŋbiin a suu ari yarifielaa.

30 Mi sene na nii-la si ko duu laa dunia niaa ta ne.

31 Ŋ timu duu ko nuu-kala teen ne, di nuu-kala nau.

32 Bie deen jaŋ nage pulumuŋ a dage nialin si bi Juu tiŋŋaa ŋaa woŋbiin, ka di ŋ niaa Iziral tiŋŋaa ma na.”

33 Simiaŋ si bul ŋii dere, wialin u fa si bula a tige bile le ŋaa bile nyimma ari u naaŋ wu-kpuŋkperere.

34 Nii ne Simiaŋ chuole Wia piba duu peba le aŋ bula pi u naaŋ a bul, “Wia liise ŋ bie deen duu ku dogise nialin si bi u wiaa laa dii, aŋ ma laa nialin si laa u wiaa dii ta Iziral tiŋŋaa tuoŋ. Wia ta bie deen duu ŋaa magil ne. Niaa yuge jaŋ joŋ ba harin yiau. 35 Ka ba tuobiinaa jaŋ lii di-jalin.” Nii ne u bira bula pi Mæeri a bul, “Ŋ titia tuoŋ jaŋ chei woruŋ ŋ bile wiaa a nage ba si joŋ sia tobuŋ.”

36 Haal kubala ma ne fa he dime. U yiriŋ ne Ana. U fa ŋaa nii-la sii bul wiaa, Wia Diŋ-zoŋ-la doluŋ le ne. U nyimma ma yiriŋ ne fa Fanuwel a lii Asa doho niaa tuoŋ. U fa ŋaa ha-nihian ne. U fa jaa bala jisiiŋ balipe ne ka u suu. 37 U bala si suba, u hoŋo a ŋaa yo-haal ne jisiiŋ mahin banese ari banese. Bua-na kala le u yie

venεε mu Wia-dia wiiheye ari titanj̄n kala. U yie voo niinj̄ dime aŋ pε chuole Wia. <sup>38</sup> Simianj̄ fa s̄ii bul wiaa pipi Mεeri njii, di Ana ma ku juu. U na bile a denne Wia aŋ bul wiaa a tige bile lε a pi nialinj̄ kala fa si gberε di Wia laa Jerusalem niaa ta.

### *Ba miira mu Nazaret*

<sup>39</sup> Mεeri ari Josef si ŋaa wialinj̄ kala Wia si si di ba ŋaa Jerusalem lε a dεrε, ba miira mu Galilii tinteenj̄ a mu ba janj̄ Nazaret. <sup>40</sup> Bile waa a kenj̄ dolunj̄ a kala ŋaa wu-jimii. Wia pεu lε.

### *Yesu mu Wia-dia*

<sup>41</sup> Jina-na kala Yesu nyimma ari u naanj̄ yie mu Jerusalem di ba gbieli diisinj̄ kielinj̄ gbiele. <sup>42</sup> Yesu si ŋaa jisinj̄ fii ari balia, ba di u nyimma ari u naanj̄ mu diisinj̄ kielinj̄ gbiele-la Jerusalem lε, ari ba si venεε ŋaa njii. <sup>43</sup> Gbiele-la si dεrε, ba miraa mu dia, ka Yesu ha hε hariinj̄. U naanj̄ ari u nyimma bi jinj̄. <sup>44</sup> Ba fa biina ari u hε ba nialinj̄ si miira mu ba janj̄ tuonj̄ nε. Ba suomo chicheu ba naanbiirinj̄ ari ba nanjonjonj̄ tuonj̄. Ba venj̄ deenj̄ deenj̄ wia tuu juu a cheu ka. <sup>45</sup> Ba si cheu ka, ba miira mu Jerusalem a bene chicheu dime.

<sup>46</sup> U tapulaa batori cheenj̄ nε ba nau Wia-dia lε, di ba di juu tinj̄naa kerichiba hɔnɔ. Uu jegili wialinj̄ ba s̄ii bul aŋ pε pipiesεba wiaa maa. <sup>47</sup> Nialinj̄ kala si hε dime a nii u s̄ii chaare wiaa siaa ari

wu-jiminj̄ njii, u ŋaaba wu-kpunjkperε. <sup>48</sup> U nyimma ari u naanj̄ si nau, u ŋaaba ma wu-kpunjkperε. Njii nε u naanj̄ piesu, "Mi bii, bεε nε tii ŋ ŋaala ŋla? La di ŋ nyimma gollo cheŋ ka nε." <sup>49</sup> Njii nε u piesεba a bul, "Bεε nε tii ma golloo chemi? Ma bi jinj̄ ari mi janj̄ hε mi Nyimma dia lεε?" <sup>50</sup> Ama ba fa bi wii-la u si bula piba bubuonj̄ jinj̄.

<sup>51</sup> Njii nε Yesu ari u nyimma ari u naanj̄ miira mu Nazaret a hε dime. Ba si hε dime, u to ba niinj̄ worunj̄. U naanj̄ laa wialinj̄ kala si ŋaa a hε u tuonj̄ lε aa biine.

<sup>52</sup> Njii nε Yesu waa, u wu-jiminj̄ ma punj̄a pε. Wia chou, niaa ma zizilu worunj̄.

## 3

*Joonj̄ Wia lii-foori-la bul Wia wiaa*

*Mat. 3.1-12; Maak 1.1-8; Joonj̄ 1.19-28*

<sup>1-2</sup> Njii nε Wia ta Zakaraya bie Joonj̄ duu mu bul Wia wiaa pi niaa giribine tuonj̄. U si suomo njii, Rom tinteenj̄ kuori-balinj̄ Tabiiras dii kuoronj̄ u jisinj̄ fii ari banonj̄ nε njii. Pɔŋsɔs Paalit ma fa chinj̄ kuori-balinj̄ nyunj̄ Judiya tinteenj̄ lε. Herod ma fa bibenj̄ Galilii tinteenj̄. U naanbie Filip ma fa bibenj̄ Ituriya ari Takonaatis tinteenj̄. Baal-la ba s̄ii yire Lasiinias ma n̄ii benj̄ Abiliini tinteenj̄. Anas ari Kayafas ma nε fa ŋaa nialinj̄ si kpu pusunj̄ pipi Wia kuhiasinj̄ Jerusalem lε. <sup>3</sup> Njii nε Joonj̄ golle Joodanj̄ fuo-la

kala nyun a bubul Wia wiaa pi niaa a bul, "Má birima lii ma haacheba le an leŋ di mi foma Wii-chuoŋe liin, di Wia jon ma haacheba chema."

<sup>4</sup> Azaaya fa ŋmunŋe nii Wia tenin seme doŋo. U fa ŋaa nii-la sii bul wiaa, Wia Din-zoŋ-la dolun le ne. Wialin u fa si ŋmunŋa ne ŋla:

"Nuu ní heeli girin tuon a bul,  
 'Má wase Wia wonbiiŋ bilu le;  
 má leŋ di wonbii-la ŋaa tegi tegi duu to.

<sup>5</sup> Má to buotuonun kala.  
 Má keru peelee ari dunŋollun ari tinŋeen a kaa jere di ba mage doŋo,  
 wonbii-la si golibo, má kaa tuule.

Má to wonbii-la si keŋ buotuonun di ba ŋaa mula mula.

<sup>6</sup> Di ma ŋaa nii, dunia niaa kala jan na nii Wia si laa niaa tita.' "

<sup>7</sup> Nii ne niaa yuge a ko Joŋ teen duu foba Wii-chuoŋe liin. U bula piba a bul, "Ma nialin wu-ŋaalaa nage dinŋaa ne. Ma biina ma jan wuo fá a lel chee-la Wia si jan dii nuu-kala sariyaa? <sup>8</sup> Má leŋ ma wu-ŋaalaa nage ari ma birima lii ma haacheba le ne, an sí bula bul di ma ŋaa Abiraham doho niaa ne. Mi jan bula piba ari Wia paala jan wuo ŋaa di tabiaa deenba ma si na birime Abiraham doho niaa a pi Abiraham.

<sup>9</sup> Na ba keŋ saan jee ne a ŋaa siri di ba keru tiisin lo. Tia-la kala si bi neŋ-zoŋŋo keŋe, ba jan keru ta a jonjo yuo he nyinin tuon."

<sup>10</sup> Nialin doŋsun si nii wialin u si bula piesu a bul, "Bee ne la saa jan ŋaa?" <sup>11</sup> U bula piba a bul, "Di ŋ keŋ gennin balia, u maga di ŋ jon doŋo a pi nii-la si bi kun keŋe. Nii-la si keŋ kudiilee maa, u maga duu ŋaa kpaa nialin si bi kudiilee keŋe ne."

<sup>12</sup> Nii ne lanpoo lilaaraa doŋsun ma ko duu foba Wii-chuoŋe liin a piesu a bul, "La kuhian, bee ne la ma jan ŋaa?" <sup>13</sup> U bula piba a bul, "Ma sí moribee laa kii nii ba si daga di maa laa." <sup>14</sup> Laali-yuoroo doŋsun ma piesu a bul, "Ka la maa, bee ne la ma jan ŋaa?" U bula piba a bul, "Ma sí nuu-kala moribee kaa laa ari dolun, ma ma sí wu-nyiarin nyia a laa moribee. Má leŋ di ma tuon toŋe ari time-la ma sí laa."

<sup>15</sup> Niaa fa si gberu Kirisito duu ko, ba biina ari u naga ari u ne ŋaa Kirisito. <sup>16</sup> Nii ne Joŋ bula piba a bul, "Mi dee. Liin dunŋa ne mi-na kaa foma. Ama nii-la si jan ko, u ne yuga kiimi. Mi paala bi maga di mi kpaga a keŋ u neŋteŋŋee ŋmenin ma kaa puri. U ne jan jon Wia Din-zoŋ-la he ma doŋsun le an jon nyinin ma he doŋsun le. <sup>17</sup> U jan kori u mii-chaarigbanja. Duu ŋmoo u miaa kala dere, u jan keŋ gbanja-la a kaa chaare a liise mii-biin



a he u vire le an jon jorun a he nyiniŋ le. Nyin-la bi jan dise.”<sup>18</sup> Joon to wonbiee yuge a bul Wia wu-zomɔ-la a pi nialin a didageba.

<sup>19</sup> Ama Joon bul wiaa juu kuori-balin Herod le. U fa jaa u naanbie Filip haala baa yire Herodias. Joon bula pu duu bi maga duu jaa u naanbie haala. Wu-bonjoo donsun yuga Herod fa ŋaa.<sup>20</sup> Nii ne u paala wasa ŋaa wu-bonjoo a pe bunbun wu-bomɔ-la le a ken Joon to dia.

*Joon fo Yesu Wii-chuole liin*

*Mat. 3.13-17; Maak 1.9-11*

<sup>21</sup> Bua-la Joon sii fo niaa kala Wii-chuole liin, u fo Yesu Wii-chuole liin maa. Ba si fou liin dere, u chuole Wia, di wia nyun kpaa balia.<sup>22</sup> Nii ne Wia Din-zon-la ku tuu heu le a nage kokomo. U nii nuu yiikoro si lii wia nyun a bula pu a bul, “N ne ŋaa mi Bii-choolun. Mi tuon tore ŋ nyun.”

*Yesu doho niaa*

*Mat. 1.1-17*

<sup>23</sup> Yesu fa si suomo a titin u tinŋinŋaa, u fa yi jisin mara ari fii ne. U doho niaa ne ŋla: Josef fa ŋaa u nyimma. U ne niaa fa biine ari u ne lul Yesu. Josef nyimma yirin ne fa Heli.<sup>24</sup> Heli nyimma ma yirin ne fa Matat. Matat ma nyimma yirin ne fa Liivai. Liivai ma nyimma yirin ne fa Meliki. Meliki nyimma ma yirin ne fa Jana. Jana nyimma ma yirin ne fa Josef.<sup>25</sup> Josef nyimma ma yirin ne

fa Matatayas. Matatayas nyimma ma yirin ne fa Emos. Emos nyimma ma yirin ne fa Neham. Neham nyimma ma yirin ne fa Ezili. Ezili nyimma ma yirin ne fa Nagai.<sup>26</sup> Nagai nyimma ma yirin ne fa Maat. Maat nyimma ma yirin ne fa Matatayas. Matatayas nyimma ma yirin ne fa Semeen. Semeen nyimma ma yirin ne fa Josek. Josek nyimma ma yirin ne fa Joda.<sup>27</sup> Joda nyimma ma yirin ne fa Juanan. Juanan nyimma ma yirin ne fa Riisa. Riisa nyimma ma yirin ne fa Zerubabil. Zerubabil nyimma ma yirin ne fa Sialitel. Sialitel nyimma ma yirin ne fa Neeri.<sup>28</sup> Neeri nyimma ma yirin ne fa Meliki. Meliki nyimma ma yirin ne fa Adi. Adi nyimma ma yirin ne fa Kosam. Kosam nyimma ma yirin ne fa Elimadam. Elimadam nyimma ma yirin ne fa Eri.<sup>29</sup> Eri nyimma ma yirin ne fa Josua. Josua nyimma ma yirin ne fa Eliyiiza. Eliyiiza nyimma ma yirin ne fa Jorim. Jorim nyimma ma yirin ne fa Matat. Matat nyimma ma yirin ne fa Liivai.<sup>30</sup> Liivai nyimma ma yirin ne fa Simian. Simian nyimma ma yirin ne fa Juda. Juda nyimma ma yirin ne fa Josef. Josef nyimma ma yirin ne fa Jonam. Jonam nyimma ma yirin ne fa Elayakim.<sup>31</sup> Elayakim nyimma ma yirin ne fa Meliya. Meliya nyimma ma yirin ne fa Mena. Mena nyimma

ma yiriŋ ne fa Mataata. Mataata nyimma ma yiriŋ ne fa Neetiŋ. Neetiŋ nyimma ma yiriŋ ne fa Devit. <sup>32</sup> Devit nyimma ma yiriŋ ne fa Jesi. Jesi nyimma ma yiriŋ ne fa Obed. Obed nyimma ma yiriŋ ne fa Buas. Buas nyimma ma yiriŋ ne fa Salimɔŋ. Salimɔŋ nyimma ma yiriŋ ne fa Naasun. <sup>33</sup> Naasun nyimma ma yiriŋ ne fa Amiinadab. Amiinadab nyimma ma yiriŋ ne fa Adimiŋ. Adimiŋ nyimma ma yiriŋ ne fa Aani. Aani nyimma ma yiriŋ ne fa Hezurɔŋ. Hezurɔŋ nyimma ma yiriŋ ne fa Peres. Peres nyimma ma yiriŋ ne fa Juda. <sup>34</sup> Juda nyimma ma yiriŋ ne fa Jekɔb. Jekɔb nyimma ma yiriŋ ne fa Aizik. Aizik nyimma ma yiriŋ ne fa Abiraham. Abiraham nyimma ma yiriŋ ne fa Teera. Teera nyimma ma yiriŋ ne fa Nehɔ. <sup>35</sup> Nehɔ nyimma ma yiriŋ ne fa Serug. Serug nyimma ma yiriŋ ne fa Riu. Riu nyimma ma yiriŋ ne fa Peleg. Peleg nyimma ma yiriŋ ne fa Iba. Iba nyimma ma yiriŋ ne fa Sela. <sup>36</sup> Sela nyimma ma yiriŋ ne fa Keenan. Keenan nyimma ma yiriŋ ne fa Afakizat. Afakizat nyimma ma yiriŋ ne fa Sem. Sem nyimma ma yiriŋ ne fa Nowa. Nowa nyimma ma yiriŋ ne fa Lameki. <sup>37</sup> Lameki nyimma ma yiriŋ ne fa Metuusila. Metuusila nyimma ma yiriŋ ne fa Inok. Inok nyimma ma yiriŋ ne

fa Jarid. Jarid nyimma ma yiriŋ ne fa Mahalalil. Mahalalil nyimma ma yiriŋ ne fa Keenan. <sup>38</sup> Keenan nyimma ma yiriŋ ne fa Inos. Inos nyimma ma yiriŋ ne fa Set. Set nyimma ma yiriŋ ne fa Adam. Wia ne ta Adam.

## 4

*Sitaani ku magise Yesu*

*Mat. 4.1-11; Maak 1.12-13*

<sup>1</sup> Nii ne Yesu miira lii Joɔdan fuo-la e ku lii di Wia Diŋ-zɔŋ-la heu e woruŋ. Nii ne u kenu kaa juu giri-bine tuɔŋ tapulaa mahiŋ balia. Sitaani yie ko a mimagisu. (U bi seyɛ.) <sup>2</sup> Tapulaa mahiŋ balia deenba kala pege u bi kuŋ-kala die. Nii ne losuŋ kpuu. <sup>3</sup> Nii ne Sitaani ku bula pu a bul, "Di ŋ ne ŋaa Wia Bie, leŋ di tabiiŋ deen ŋ si na birime boroboro." <sup>4</sup> Nii ne Yesu miira bula pu a bul, "Ba ŋmuŋse Wia teniŋ tuɔŋ ari 'Kudiilee dunɔŋa dee bi nuhuobiine miisiŋ ka pa.' "

<sup>5</sup> Nii hariŋ Sitaani bira kenu kaa jila dage dunia kuoruŋ fine <sup>6</sup> aŋ bul, "Kuoruŋ deen kala ŋaa mi kua ne. Mi jaŋ ŋaa di ŋ keŋ ba kala doluŋ a tii ba kala a nii ba sima. Mi-na jaŋ wuo joŋo pi nuu-kala mi sii che. <sup>7</sup> Di ŋ ne tuu kpirimi mi sipaan a chuɔlemi, kiaa deenba kala jaŋ ŋaa ŋ kiaa." <sup>8</sup> Nii ne Yesu bira bula pu a bul, "Ba ŋmuŋse Wia teniŋ tuɔŋ ari,

'U maga di laa chuole la Tiina Wia dunđuna ne an pe timaa pu.' "

<sup>9</sup> Nii ne Sitaani bira kenu kaa mu Jerusalem a kenu kaa jil Wia-dia nyu-gbaŋa an bula pu a bul, "Di η ne ŋaa Wia Bie, jon η titia yuo daha a tuu chigisi tinteenj. <sup>10</sup> Na ba ŋmuŋse Wia teninj tuonj ari Wia jaŋ leŋ di u tinđaraa ku cheme keninj. <sup>11</sup> Ba bira ŋmuŋsa ari

'Ba jaŋ kere keninj di η si η naan jonjo ŋmoo tabiin.' "

<sup>12</sup> Nii ne Yesu bira bula pu a bul, "Ba ma bul Wia teninj tuonj ari u bi maga di η mimagise η Tiina Wia."

<sup>13</sup> Sitaani si magise Yesu ŋii a dɛɛ, u leŋu, ka di tapulii donj bira yi.

*Yesu suomi u tinťinŋaa Galilii tinťeenj le*

*Mat. 4.12-17; Maak 1.14-15*

<sup>14</sup> Nii ne Yesu lii giri-bine-la tuonj Wia Diŋ-zonj-la dolun le a mu Galilii tinťeenj. Yesu wiaa teeli Galilii tinťeenj kala. <sup>15</sup> Nii ne u dage niaa Wii-chuole diisin le. Ba kala bibeseu le.

*Ba via Yesu Nazaret le*

*Mat. 13.53-58; Maak 6.1-6*

<sup>16-17</sup> Nii ne Yesu mu Nazaret, lee-la ba si lulu. Che-wiesii-la cheenj u mu juu Wii-chuole dia ari u si venee ŋaa ŋii. Nii ne u sii duu karime Wia teninj a pi niaa. Ba jon Wia teninj tuonj seme donjo pu, tenj-la Azaaya si ŋmuŋsa, nii-la fa sii bul

wiaa, Wia Diŋ-zonj-la dolun le. U suri a na lee-la ba si ŋmuŋse ŋla a karime a bul,

<sup>18</sup> "Wia Diŋ-zonj-la hemi le ne.

U ne liisemi di mi bul Wia wu-zomɔ-la a pi summoo.

U ne tinmi di mi bula pi yosun ari Wia jaŋ jonba ta,

a bira bula pi nyulimaa di ba siaa jaŋ suri.

U bira tinmi di mi laa niaa ba si nyaga bil a ta

<sup>19</sup> a bula piba di jina jaŋ yi

di la Tiina Wia jaŋ laa u niaa ta."

<sup>20</sup> Yesu si karime tenj-la dɛɛ, u kaa to an jonjo pi nii-la sii bil tenj-la an tuu honj. Nialinj kala si he Wii-chuole dia-la le chaare ba siaa a peu le. <sup>21</sup> Nii ne Yesu bula piba a bul, "Tenj-la mi si karima pima, jininj u sene ku ŋaa wutitii ne." <sup>22</sup> Nii ne niaa

kala tuonj tore u nyun. Wu-zonjɔɔ kala u si bula piba ŋaaba wu-kpunkpere. Ba pipiese donjo, "Josef bile dee ŋlaa?"

<sup>23</sup> Nii ne Yesu bira bula piba a bul, "Mi laa dii ari ma jaŋ mage namaga a pimi. U ne ŋla: 'Daalusunj tina, mu vaare η titia.' Ma jaŋ bira bula pimi a bul di wialinj

kala mi si ŋaa Kapenam le, di mi ŋaaba mi titia jaŋ le maa." <sup>24</sup> Nii ne Yesu bira bul, "Wutitii, mi bulaa pima ari nii-la sii bul wiaa, Wia Diŋ-zonj-la dolun le ne, duu

ne ko u titia jaŋ, u niaa buu cho." <sup>25</sup> Nii ne Yesu bira bul, "Má jegili, wutitii mi bulaa

"Má jegili, wutitii mi bulaa

pima. Ilaaja fa si he u miisinj le, duonunj bi nia jisinj batori ari lebi. Ilaaja fa nnaa nii-la sii bul wiaa, Wia Din-zon-la dolunj le ne. Losun juu Iziral tinteenj worun. Bua-la le yo-haalaa yuga a fa he dime. <sup>26</sup> Ama Wia bi leje Ilaaja mu pe juu tinnaa yo-haalaa kun-kala le. U timu u mu pe yo-haal kubala dunduna le a lii Saadonj tinteenj le, tanj kubala baa yire Zarefat. <sup>27</sup> Bua-la le Ilaasa ma fa si he u miisinj le, gbejisinj ma yuga ne a he Iziral tinteenj le, ama Wia bi leje Ilaasa vaare ba kun-kala see baal kubala baa yire Neyemanj. U lii Siiria tinteenj ne."

<sup>28</sup> Nialinj kala fa si he Wii-chuole dia-la le a nii wiinj deenj, ba baaninj sii u nyun. <sup>29</sup> Ba sii a kenj Yesu lere lii ba tanj tuonj a kenu kaa jil dundolo-la nyun ba fa si saa ba jan. Ba kenu kaa jil dundolo-la nyun di-bolii aa che di ba jonu yuo ta duu tuu tel tinteenj. Ba cheu ka. <sup>30</sup> Ka u to nialinj tuonj a lii viiri.

*Baala si kenj jin-bomunj  
Maak 1.21-28*

<sup>31</sup> Nii ne Yesu lii Nazaret le a mu Kapenam si he Galilii tinteenj. Che-wiesii-la cheenj u mu juu Wii-chuole dia a didageba. <sup>32</sup> U si dageba nii, u naaba wu-kpunkpere, bee wiaa uu bul wiaa ari dolunj ne. <sup>33</sup> Di baal kubala ne fa he Wii-chuole dia-la le. Jin-bomunj ne fa kenu. Nii ne u faasa chiire <sup>34</sup> a bul, "Yesu nj si lii Nazaret, bee kunj ne nj

che nj naala le? Nj ko di nj kpula nee? Mi jiminj ne. Nj nnaa Wia Tuo-pul Tiina ne." <sup>35</sup> Yesu si nii wialinj baal-la si bula, u kpia jin-bon-la le a bul, "Kenj gonj anj ku lii baal-la le." Jin-bon-la nnaa baal-la tel ba kala sipaanj anj lii baal-la le. U bi wu-bonj kala naau le. <sup>36</sup> Ba si na nii, u nnaa nuu-kala wu-kpunkpere. Nii ne ba pipiese donj a bul, "Ee ne u si wuo bul nla? Baal-la deenj kenj dolunj a wuo jin-bonjon, a bul wiaa piba ba lii niaa le." <sup>37</sup> Nii ne Yesu wiaa teeli lee-la kala.

*Yesu vaare niaa yuge*

*Mat. 8.14-17; Maak 1.29-34*

<sup>38</sup> Nii ne Yesu lii Wii-chuole dia-la le a mu baal kubala dia baa yire Saamonj. U mua di Saamonj hiili-haala pina aa wiile. U yaraa kala linj. Ba si bul u wiaa pu, <sup>39</sup> Yesu mu chinj u seme anj kpia nyanyalii-la le duu leju. Nyanyalii-la le haalla, anj ka u guu sii a nnaa kudiilee piba ba dii.

<sup>40</sup> Di niaa donsunj ma ne nii, ba nandonsunj wi-wiile. Nyanyal-yiriba kala ne kenba. Wia si jua, ba kenba kaa ko Yesu teenj. U jonj u nisaa a danj ba kun-kala le, ba duori. <sup>41</sup> Jin-bonjon ma lii niaa le a yuge aa chiire, a bula pi Yesu a bul, "Nj ne nnaa Wia Bie." Nii ne Yesu kpiaba le di ba si u wiaa bul, bee wiaa ba jima ari u ne nnaa Kirisito.

*Yesu bul Wia wiaa Judiya tinjeen le*

*Maak 1.35-39*

<sup>42</sup> Siipuura a Yesu lii taŋ-la le a mu lee-la niaa si tuo dime. Nii ne nialin suomo chicheu. Ba si mu nau, ba wiwalime di ba kenu bil duu si viiru. <sup>43</sup> Nii ne Yesu bula piba a bul, "U maga di mi mu tasin dɔŋsun maa a bul Wia kuorii-la wiaa dime. Nii ne Wia tinmi di mi ku ŋaa." <sup>44</sup> Nii ne u bul Wia wiaa Judiya tinjeen, Wii-chuole diisin le.

## 5

*Yesu yire u bunbun hari-tooro*

*Mat. 4.18-22; Maak 1.16-20*

<sup>1</sup> Bua kubala Yesu chin muga kubala niin baa yire Genezaret. Niaa yuge a yigi dɔŋɔ a kuko u teen di ba nii Wia wiaa. <sup>2</sup> Nii ne Yesu na liin daborusun balia di ba chin liin niin. Ba tinŋaa kaa ku bil ne an mu di ba chese ba jonba. Saamon ne tii dɔŋɔ. <sup>3</sup> Nii ne Yesu juu Saamon liin daboro an bul duu yigu duu juu liin tuon mua. U mu yigu. Nii ne Yesu hon liin daboro-la tuon an didage ni-dan-la kala. <sup>4</sup> U si bul wiaa pi nialin dere, u bula pi Saamon a bul, "Kuosi liin daboro-la duu mu lee-la liin si lunje mua, di ma di n nanɔŋsun yuo ma jonba a kese chenfilee." <sup>5</sup> Nii ne Saamon bula pu a bul, "Mi kuhian, la yuo jonba titanin kala kala ne an bi kun-kala

kenɛ. Ama n-na si bul nii pimi, mi jan yuo." <sup>6</sup> Nii ne ba ŋaa nii a kese chenfilee yuge kinken. Ba si kese yuge nii, ba jonba chiche di ba kiese. <sup>7</sup> Di ba nanɔŋsun he liin daboro dɔŋɔ tuon. Nii ne ba yireba di ba ku peba le. Ba ko a chaare chenfilee-la a su liin daborusu-la baliamin kala. Ba paala chiche di ba tuu liin bubuon. <sup>8</sup> Saamon yirin dɔŋɔ ma ne fa ŋaa Piita. Saamon Piita si na wi-la si ŋaa, u tuu kpirimi u naadusun nyun Yesu sipaan an bul, "Mi Tiina, sii lii mi teen. Mi ŋaa haache tiina ne." <sup>9</sup> Ba si kese chenfilee-la yuge nii, u ŋaa Piita ari nialin kala wu-kpunkpere. <sup>10</sup> Saamon nanɔŋsun Jeems ari Jon ma fa he dime. Ba fa ŋaa Zebidii biirin ne. Wialin ba si na ma ŋaaba wu-kpunkpere. Nii ne Yesu bula pi Saamon a bul, "Si fawullun fa. A suomi jinin, n jan che kikese niaa ari n sii kese chenfilee nii."

<sup>11</sup> Nii harin ba sii a ken liin dabori-biisi-la kaa ku lii liin niin. Ba len kun-kala ta dime an sii to Yesu harin.

*Yesu vaare gbege*

*Mat. 8.1-4; Maak 1.40-45*

<sup>12</sup> Nii ne Yesu mu taŋ kubala di baal kubala ne nii. U ŋaa gbege ne. U na Yesu a tuu kpirimi u sipaan an sulu a bul, "Mi kuhian, di n ne cho, n jan wuo ŋaa di mi duori." <sup>13</sup> Nii ne Yesu liise u nisin a digu an bul, "Mi cho ne. Duori." Yawiil-la guu len

baal-la. <sup>14</sup> Nii ne Yesu bula pu a bul, "Sii wiinj deenj bula pi nuu-kala. Ama kenj η titia mu dage nii-la si kpu pusunj pipi Wia, a piise η disinninj ta ari Moosis fa si dagema nii. Di η ne ηaa nii, niaa jan na ari η bira bi disinninj kenε." <sup>15</sup> An ka wii-la ha faasa teeli lerinj kala a mu. Niaa yuga a ko u teenj di ba nii u wiaa, an ka duu pe vaare ba nyanyalaa maa. <sup>16</sup> Ka Yesu yie sii mu girinj duu chuole Wia.

*Yesu vaare gberike*

*Mat. 9.1-8; Maak 2.1-12*

<sup>17</sup> Tapulii kubala Yesu didage niaa, di Wia dolunj heu le u kaa vivaare nyanyal tinjaa. Farisii tinjaa ari Wia teninj kerichiba si lii Galilii tinteenj ari Judiya tinteenj ari Jerusalem kala ma fa honj dime.

<sup>18</sup> Nii ne niaa chunj gberiku kubala ari u bosɔ kala a kaa ko a wiwalime di ba kenu kaa juu dia-la le Yesu si he a bil u sipaanj. <sup>19</sup> Ama niaa fa si yuga nii, ba bi wonjiinj na di ba kenu juu. Nii ne ba kenu kaa jil lusunj nyunj a ta luri a jonu ta. U to dime a tuu nialinj tutuobaaninj Yesu sipaanj. <sup>20</sup> Yesu si na ari niaa deenba ηaau yarida worunj, u bula pi gberiku-la a bul, "Mi nanɔɔnj, mi jonj η haacheba chej ne." <sup>21</sup> Nii ne Farisii tinjaa ari Wia teninj kerichiba-la suomo pipiese dɔnjɔ a bul, "Kubεε ne nia deenj sii tuuse Wia jonjoo ηla? Nuukala bi jan wuo

jonj haacheba che nuu see Wia dunɔɔnja." <sup>22</sup> Nii ne Yesu wuo jinj ba tuobiinaa a pieseba a bul, "Bεε ne tii ma biine wiaa deenba ma tuonj le?" <sup>23</sup> Mi si janj bul di mi jonj u haacheba cheu ne koo mi si janj bul duu sii a chuoli u bosɔ a viviiri, ba tuonj kubεε ne ηaa moli? <sup>24</sup> Mi janj dagema ari mi-na Nuhuobiine Bie kenj dolunj dunia le di mi jonj haacheba che niaa." Nii ne u bula pi gberiku-la a bul, "Sii a jonj η bosɔ a mu dia." <sup>25</sup> U guu duori a sii a jonj u bosɔ-la u fa si pinj u nyunj a mu dia anj didenne Wia. <sup>26</sup> U ηaa nialinj kala fa si he dime wu-kpunjɔpere. Fawullunj kenba. Ba denne Wia a bul, "La na wu-kpunjɔpere jininj."

*Yesu yire Liivai*

*Mat. 9.9-13; Maak 2.13-17*

<sup>27</sup> Nii harinj Yesu bira sii a lii a na lanpoo lilaara kubala baa yire Liivai duu honj u tinjinni dia le. Nii ne Yesu yiru a bula pu duu sii a tuto u harinj. <sup>28</sup> Nii ne Liivai sii anj lej u kunj-kala ta anj to u harinj.

<sup>29</sup> Nii ne Liivai ηaa di ba gbieli gbiele u dia le. Yesu ari u haritooroo ari lanpoo lilaaraa dɔnsunj yuge, ari niaa dɔnsunj ma fa he dime.

<sup>30</sup> Nii ne Farisii tinjaa dɔnsunj ari Wia teninj kerichiba ari ba nanɔɔnsunj sii a pipiese Yesu haritooroo a bul, "Bεε ne tii ma di lanpoo lilaaraa ari haache

diiree kala hõno didii kudiilee?" <sup>31</sup> Yesu nii ba sii bul nii. Nii ne u bula piba a bul, "Nialinj si ken yarifielaa bi daaluj njaara ka che, see nialinj sii wiilu. <sup>32</sup> Mi ko di mi yire haache diiree ne di ba len ba haacheba. Nialinj si ken tuo-pula mi sipaan dee mi ko mi yire."

*Ba piесе Yesu nii-võbur wiaa*

*Mat. 9.14-17; Maak 2.18-22*

<sup>33</sup> Nii ne niaa dõnsun ku piесе Yesu a bul, "Jõõn Wia lii-foori-la haritooroo yie vuvõõ niinj ne an pe chuchuoõ Wia bua-na kala le. Farisii tinjaa haritooroo ma njjaa nii titia. Ama n-na haritooroo bi niinj ka võõ." <sup>34</sup> Nii ne Yesu ma piесеba a bul, "Di nuu ne mu jaa haala kaa ko, di ba duu nanõõnsun gbigbieli ha-jaari gbiele, u nanõõnsun jan võõ niinj koo? Ai, ba bi niinj ka võõ. <sup>35</sup> Ama chee dõn ne he dime, ba jan ken baal-la kaa mu lee, an ka di u nanõõnsu-la võõ niinj."

<sup>36</sup> Nii ne u bira mage na-maga a piba a bul, "Nuu-kala bi jan kerri geripe-falinj a kaa to geri-biniinj. N ne njaa nii, n jan chei geri-falii-la. Geripe-falii-la ma n si kere to geri-kõsu-la ma bi jan challe.

<sup>37</sup> Nii titia ne nuu ma bi jan jon si-huon a he pupoi-kpaanj le. N ne njaa nii, pupoi-la jan yere, di sin-la kala bisa ta. <sup>38</sup> Si-huon maga di n jonu he pupoi-zõmun le ne. <sup>39</sup> Di nuu ne nyua si-yele, u bira bi che duu nyua si-huon, bee wiaa

nuu-kala jima ari si-yele ne zõmo kii si-huon."

## 6

*Ba piесе Yesu che-wiesii-la cheen wiaa*

*Mat. 12.1-8; Maak 2.23-28*

<sup>1</sup> Bua kubala, che-wiesii-la cheen, Yesu ari u haritooroo to nyõõso бага tuon bibal. Nii ne u haritooro-la bori nyõõso-la a chichanj.

<sup>2</sup> Di Farisii tinjaa dõnsun ma he dime a naba. Ba si naba nii, ba piесеba a bul, "Bee ne tii ma njaa nla? Maa chei la che-wiesii-la cheen kisinj ne nii." <sup>3</sup> Nii ne Yesu piесеba a bul, "Ma bi wiila Devit fa si njaa karimaa? Losun fa si kenu ba di u harinj niaa, <sup>4</sup> u mu juu Wia-dia a jon boroboroba-la ba fa si kaa ku bil Wia sipaan a chõõõ dii an jonõõ pi u harinj niaa maa, ba ma laa dii. U fa njaa kisinj ne ari ni-wogo si jan jonõõ dii, see nii-la si kpu pusun pipi Wia dundunja, ka Devit ari u niaa dii." <sup>5</sup> Nii ne Yesu bira bula piba a bul, "Mi-na Nuhuobiine Bie ne njaa che-wiesii-la tiina nii."

*Yesu vaare baala u nisinj si suba*

*Mat. 12.9-14; Maak 3.1-6*

<sup>6</sup> Che-wiesii-la cheen dõnõõ Yesu bira juu Wii-chuoõõ dia a didage niaa, di baal kubala ma fa he dime. U na-diin nisinj suba ne. <sup>7</sup> Wia teninj kerichiba ari Farisii tinjaa dõnsun ma fa he dime. Baa che di ba na wii ne a to nii le a ken Yesu, a bul duu chei ba

kisiin le ne. Ba kala chaare siaa bibenu di ba na ari u jan vaare baal-la che-wiesii-la cheen. <sup>8</sup> Ama Yesu fa jin ba tuobiinaa kala ne. Nii ne u bula pi na-suu-la tiina a bul duu sii a ku chin ba tutuobaanin. Nii ne baal-la sii a mu chin dime. <sup>9</sup> Nii ne Yesu bira pieseba a bul, "Ee ne la naabalimaba kisin bul di la ninjaa che-wiesii-la cheen? Di la pipe niaa le koo di la dudogiseba? Di la lilaa niaa miisin koo di la kpukpuba?" <sup>10</sup> Yesu si bul nii, u ben nialin kala fa si hon dime golli an bula pi na-suu-la tiina duu ken u nisin tiene. U kaa tiene. U nisin bira nage u nagin. <sup>11</sup> Yesu fa si naa nii, baanin faasa ken Farisii tinjaa ari Wia tenin kerichiba-la. Ba vuvuure nii ba si jan naau le.

*Yesu liise u haritooroo fii ari balia*

*Mat. 10.1-4; Maak 3.13-19*

<sup>12</sup> Tapulii kubala Yesu jil peelin nyun duu chuole Wia. U chuole Wia nii deen deen tan-pul. <sup>13</sup> Tan si pula, u yire u haritooroo ba ko u teen. Nii ne u liise ba tuon niaa fii ari balia a kenba kaa yire u nanzooba maa. <sup>14</sup> Nialin u si liisa ne nla: Saamon (Yesu fa kenu yiyire Piita ne) ari u naanbie Anduru, ari Jeems ari Jon ari Filip ari Batolomi <sup>15</sup> ari Matiu ari Tomas ari Alifyas bie Jeems, ari Saamon Zelot, <sup>16</sup> ari Jeems bie Judas, ari Judas Isikarot, nii-la si ku naa zenbe tiina.

*Yesu dage niaa an pe vaare ba dongsun maa*

*Mat. 4.23-25*

<sup>17</sup> Nii ne Yesu ari u nanzooba-la lii peel-la nyun ku tuu a chin tinteen, di u haritooroo dongsun ma he dime a yuge. Niaa dongsun ma yuga a he dime a lii Judiya tinteen, dongsun lii Jerusalem, dongsun ma lii Taya ari Saadon tinteen a kpage mugi-balin nin. <sup>18</sup> Niaa deenba kala ko di ba jegile nii wialin Yesu sii bul ne an ka duu vaareba. Nialin dongsun ma he dime, jin-bonhon kenba. Yesu naa ba duori. <sup>19</sup> Wia dolun ne heu le u vivaare niaa. Nii wiaa ne nialin kala ninerike di ba digu. Di ba ne digu, dol-la liiu le, u naa ba duori.

*Nii la si jan naa a ken tuotonun*

*Mat. 5.1-12*

<sup>20</sup> Yesu si vaare nialin dere, u miira ben u haritooroo an bul,

"Ma nialin si naa summoo, Wia jan pema le.

Ma ne jan dii Wia kuorii-la.

<sup>21</sup> Ma ma nialin losun sii kpu leele, Wia jan pema le.

U jan pima kudiilee di ma dii a voge.

Ma nialin sii yel leele, Wia ma jan pema le,

bee wiaa Wia jan naa ma mon.

<sup>22</sup> Di niaa ne berema a liisema ta ba tuon a tutuusema a chichei ma yirin a bul di ma naa ni-bomo ne, di ba ne bul nii a tin



ma síi to mi-na Nuhuobiine Bie hariŋ wiaa, Wia ma jaŋ pema le. <sup>23</sup> Di ɲii ne ku chinma le, má leŋ di ma gugua ari tuotɔruŋ, bee wiaa ma time jaŋ yuge Wia-jaŋ le. La naabalimaba ma dogise nialin fa síi bul wiaa, Wia Diŋ-zɔŋ-la doluŋ le ɲii ne.

<sup>24</sup> Ama ma nialin si keŋ kiaa leele, ma jaŋ na heeŋ, bee wiaa ma laa sipaan dii ma sima dere ne.

<sup>25</sup> Ma nialin si vɔgo leele, ma ma jaŋ na heeŋ. Losuŋ jaŋ keŋma.

Ma nialin síi mɔŋ leele, ma jaŋ na heeŋ.

Ma tuɔŋ jaŋ chei, di ma yel.

<sup>26</sup> Di niaa kala yie besema le, ma ma jaŋ na heeŋ, bee wiaa la naabalimaba juu tinjaa ma bese nialin fa si nyia wiaa a bul di baa bul wiaa, Wia Diŋ-zɔŋ-la doluŋ le ne."

*Yesu dage niaa di ba cho ba diŋdɔŋɔɔ*

*Mat. 5:38-48; 7:12*

<sup>27</sup> ɲii ne Yesu bira dage niaa a bula piba a bul, "Ma nialin síi jegili mi teen, mi bulaa pima di ma cho ma diŋdɔŋɔɔ aa ɲaa wu-zɔŋɔɔ nialin si berema le. <sup>28</sup> U maga di maa sul Wia duu pe nialin síi bul wu-bɔŋɔɔ ma le a chuole Wia pi nialin síi dogisema. <sup>29</sup> Di nuu ne falle ɲ na-gua chanƙpaŋin le, keŋ ɲ na-diin chanƙpaŋin ma birima pu duu falle. Di nuu ne keŋ ɲ

geri-balin laa, wuri ɲ geri-bie ma pe pu. <sup>30</sup> Di ɲ ne keŋ kuŋ, di nuu piese chiche, joŋo pu. Di nuu ne joŋ ɲ kuŋ maa, bira síi piesa laa. <sup>31</sup> Ma síi che di niaa ɲinaa ɲii ma le, má ma joŋ ɲii ɲinaba le.

<sup>32</sup> Di ma ne cho nialin si choma dundun, u bi maga di ma keŋ time, bee wiaa haache diiree ma cho dɔŋɔ ne. <sup>33</sup> Di maa ɲaa wu-zɔŋɔɔ nialin síi ɲaa wu-zɔŋɔɔ ma le, ma bi time keŋe, bee wiaa haache diiree ma ɲaa ɲii ne. <sup>34</sup> Di ma ne joŋ kiaa a chin nialin ma si biina ba jaŋ wuo time pima aŋ vɔŋ niaa dɔŋsuŋ, ma bira bi time keŋe, bee wiaa haache diiree ma joŋ kiaa chichin haache diiree dɔŋsuŋ ne aŋ gberɛ di ba bira tinba ɲii titia. <sup>35</sup> Ama wialin mi síi che di ma ɲaa ne ɲla: Má cho ma diŋdɔŋɔɔ aa ɲaa wu-zɔŋɔɔ ba le, a joŋ kiaa chinba aŋ síi gberɛ di ba tinma. Di ma ne ɲaa ɲii, Wia jaŋ leŋ di ma ɲaa u-na Wii-balin biirin, duu joŋ kubal-bal tinma. Wia yie pe ni-bɔŋɔɔ ari nialin ma kala si keŋ siin le ne. <sup>36</sup> Má fifá niaa nennige ari ma Nyimma Wia síi fá niaa nennige ɲii.

*Ma síi ma dɔŋsuŋ tinjaa wiaa laa jijin*

*Mat. 7:1-5*

<sup>37</sup> Ma síi ma dɔŋsuŋ tinjaa wiaa laa jijin a ma síi cheerin joŋo piba. Di ma ne ɲaa ɲii, Wia ma bi jaŋ joŋ cheerin pima. Má joŋ wiaa che ma dɔŋsuŋ tinjaa. Di ma ne

ηαα ηii, Wia ma jaη joη ma wiaa chema. <sup>38</sup> Má ηαα kiaa pipi ma dɔηsun tiηηaa. Di ma ηαα ηii, Wia ma jaη ηαα kiaa a pima a ma jaη keη zile ma teen. U jaη magise kiaa chuɔɛ a pima. Ku-la η si kaa magisa pi η dɔηsun tiηηaa, u titia ne Wia ma jaη kaa magisa piη.”

<sup>39</sup> Nii ne Yesu bira mage namaga piba a bul, “Nyulima bi jaη wuo a keη nyulima dɔηɔ daη le. Di u ne ηαα ηii, ba kala balia jaη tel buɔtuon le. <sup>40</sup> Sukuuri-bie bi u kerichi ka kii, ama di kerichi-la dage bile dɛɛ, u jaη wuo mage u kerichi-la. <sup>41</sup> Eɛ ne η jaη wuo na daa-bie si tel η naaηbie siη le aη bi daa-bal-la si tel η titia siη le ka na? <sup>42</sup> N bi jaη wuo bula pi η naaηbie a bul duu leη di η liise daa-bie-la si he u siη le, aη paala bi daa-bal-la si he η titia siη le ka na. N-na kaηfugi tiina, laa sipaη liise daa-bal-la si he η titia siη le, ka η siaa wuo na, ηii ne η ma jaη wuo pe η naaηbie le a liise daa-bie-la si he u siη le a pu.”

*Yesu mage namaga a tige tia ari u nenɛɛ le*

*Mat. 7.16-20; 12.33-35*

<sup>43</sup> Nii ne Yesu mage namaga a pi niaa a bul, “Tia-la si keη yarifielaa bi jaη neη neη-lɔrunuη, aη ka tia-la si bi yarifielaa keɛ ma bi jaη neη neη-zɔηηɔɔ. <sup>44</sup> Tia-la nenɛɛ ne yie dage tia-la yiri. Sojaamin bi tutogo naηbilaa ka neη, sɔguη-gbeηe ma

bi chichueη ka neη. <sup>45</sup> Ni-zɔmun keη tuɔbiη-zɔηηɔɔ ne u tuon le aa ηαα wu-zɔmɔ-la u sii biinu. Ni-bɔmun ma keη tuɔbiη-bɔηηɔɔ ne u tuon le a maa ηαα wu-bɔmɔ-la u sii biinu u tuon le. N tuɔbiinaa si keη wii-la ne, u ne η niη bubul.”

*Yesu mage namaga a tige di-saaraa balia le*

*Mat. 7.24-27*

<sup>46</sup> Nii ne Yesu bira bul, “Bɛɛ ne tii ma keηmi yiyire ‘La Tiina, la Tiina,’ aη bi wialin mi sii bula pima ka ηαα? <sup>47</sup> Nii-la kala si kɔ mi teen a jegile nii mi niη wiaa a tutoba, mi jaη dagema ηii u si naga. <sup>48</sup> U nage baala si saa dia ne a lu dia-la gentine, u faasa tuu kpaginyilin nyun. Nii ne duonuη nii, fuon su a pelle yage dia-la, ka dia-la bi jigise maa, bɛɛ wiaa u saau woruη ne. <sup>49</sup> Ama nii-la si jegile nii wialin mi si bula aη biba to, u nage baal-la si saa u dia tiηteen aη bi gentine luo u tuu ne. Nii ne duonuη nii, fuon su, liη pelle yage dia-la, dia-la kala tel wuru.”

## 7

*Yesu vaare laali-yuoroo kuhian yomo*

*Mat. 8.5-13*

<sup>1</sup> Yesu si bul wiaa deenba kala a pi nialin dɛɛ, u sii mu taη kubala baa yire Kapenam.

<sup>2</sup> Baal kubala ne fa he dime. U fa ηαα Rom laali-yuoroo kuhian ne a fa keη u yomo ne a chou woruη.

Yomo-la wiwiile a pina kiki-iki. <sup>3</sup> Nii ne laali-yuoroo kuhian-la nii Yesu wiaa. U si nii nii, u liise Juu tinjaa kuhiasin di ba mu sulu duu ku vaare u yomo-la. <sup>4</sup> Ba sii a mu Yesu teen a sulu kinken kinken a bul, "Baala deen nna ni-zon ne. U maga di n pɛu le. <sup>5</sup> U cho la niaa woruŋ. U titia ne saa Wii-chuole dia a pila."

<sup>6</sup> Nii ne Yesu to ba harin mu. Ba si mu kpage laali-yuoroo kuhian dia, baal-la tin u nanɔŋsun di ba ku lii bula pi Yesu a bul, "Mi Tiina, si n titia walimu a ko mi dia. Mi bi maga di n ku juu mi dia. <sup>7</sup> Nii ne tii mi paala bi n teen ko. N-na yaa suri n niin a bul di mi yomo-la duori, u jan duori. <sup>8</sup> Mi ma paala to mi laali-yuoroo nihiasin niin ne. Laali-yuoroo donsun tuto mi niin maa. Di mi ne bul di niaa deenba mu daha, ba yie mu ne. Di mi bira si di nia deen ko daha, u yie ko ne. Di mi ne bula pi mi yomo duu nna deen, u yie nna ne."

<sup>9</sup> Yesu si nii wiaa deenba, u naau wu-kpunkpere. U miira daase harin a bula pi ni-dan-la fa sii to u harin a bul, "Mi ha bi yarida deen doho na Iziral tinteen niaa tuon."

<sup>10</sup> Nii ne nialin laali-yuoroo kuhian-la fa si tima, ba miira mu u dia, di u yomo-la duoro.

*Yesu chise yo-haala bie*

<sup>11</sup> Yesu si vaare Rom laali-yuoroo kuhian yomo-la, u bi diene ka u mu tan kubala baa yire Neen. Ni-dan ari u haritooroo ne to u harin mu. <sup>12</sup> U si mu kpage tan-la niin di baa yel yoho. Baal kubala ne suba. U ne fa nna u naan bie kala. U naan ma fa nna yo-haal ne. Niaa yuga a lii tan-la a ku chigi haal-la. <sup>13</sup> Yesu si na haal-la, nennige kala kenu. U bula pu a bul duu si yel. <sup>14</sup> Nii ne u mu a digi daga-la ba fa si jon suu-la he. Nialin fa si chun daga-la a kaa mu di ba hugi, ba chin. Nii ne Yesu bula pi suu-la a bul, "Bapuosi-bie, mi bula pin di n sii suun le." <sup>15</sup> Baal-la sii suun le a suomo bubul wiaa. Nii ne Yesu jonu pi u naan. <sup>16</sup> Fawullun ken nuu-kala. Ba denne Wia a bul, "Nialin sii bul wiaa, Wia Din-zon-la dolun le, ba tuon ku-bal ne ku tuu la tuon. Wia ko duu laa u niaa ta ne." <sup>17</sup> Nii ne wiin deen Yesu si nna, teeli Judiya tinteen kala ari ta-biisi-la si golli Judiya tinteen.

*Joon, Wia lii-foori-la tin tindaaraa*

*Mat. 11.2-19*

<sup>18</sup> Joon haritooroo bul wiaa deenba kala Yesu si nna a pu. <sup>19</sup> Nii ne Joon, Wia lii-foori-la yire ba tuon niaa balia, a tinba di ba mu Yesu teen a piesu a bul, "N ne nii-la Joon si si u jan ko, koo la gberɛ nuu ma don nee?" Nii ne ba mu Yesu teen. <sup>20</sup> Ba si mu u teen, ba piesu a bul, "Joon, Wia lii-foori-la

ne tinla di la ku piesinj ari η ne nii-la u si si u jan kɔ koo la gbigbere nuu dɔŋ nɛɛ?"

<sup>21</sup> Bua-la titia le Yesu vaare nyanyal tinŋaa a yuge, a kiri jin-bɔŋŋɔ niaa le, aŋ suri nyulimaa ma siaa. <sup>22</sup> Nii ne u bula pi Jɔŋ haritooro-la a bul, "Má miira mu a bula pi Jɔŋ wialinj kala ma si nia aŋ na maa. Nyulimaa siaa susuri, gberikee viven, gbegisinj duduori. Tanŋaa ninii wiaa. Nialinj si suba sisii suuj le. Summoo ma wuo ninii Wia wu-zɔŋŋɔ.

<sup>23</sup> Nialinj si bi kaa lere ari mi ne ŋaa nii-la Wia si tima, ba tuɔŋ jan tɔre."

<sup>24</sup> Nii ne Jɔŋ haritooro-la viiri. Ka Yesu suomo bul Jɔŋ wiaa a pipi ni-dan-la. U pieseba, "Ma si mu Jɔŋ teenj giri-bine le, bee ne ma fa gbere di ma na? Ma mu di ma na yan pelinj si kaa viviisi nɛɛ? Ai. <sup>25</sup> Bee ne saa ma lii di ma na? Ma lia di ma na nuu si laale geri-zɔŋŋɔ nɛɛ? Ai. Bee na nialinj si yie laale genninj deenba, ba yie juu kuori-diisinj ne aa nii sima. <sup>26</sup> Má saa dagemi ku-la ma si mua di ma na. Ma mu di ma na nii-la síi bul wiaa, Wia Din-zɔŋ-la doluj le nɛɛ? Oo, mi jan bula pima ari ma na nuu duu kii nii-la síi bul wiaa, Wia Din-zɔŋ-la doluj le. <sup>27</sup> U-na Jɔŋ wiaa ne ba ŋmunsa bil Wia teninj tuɔŋ, a bul di Wia si,

'Má jegile nii mi teenj, mi jan tinj mi tinɔaara duu laa η sipaanj a mu a wase wonbiinj bilinj le.'

"

<sup>28</sup> Nii ne Yesu bira bula pi niaa a bul, "Jɔŋ ne kii nuu-kala ba si lula. Ama nii-la si ŋaa ni-bie Wia kuorii-la tuɔŋ, u ne yuga kii Jɔŋ."

<sup>29</sup> (Nialinj ari ba tuɔŋ lanpoo lilaaraa fa si nii wialinj Jɔŋ si bula, ba laa dii a to Wia. Ba ne ku ŋaa tuɔ-pul timma. Jɔŋ foba Wii-chuɔle liinj maa. <sup>30</sup> Ama Farisii tinŋaa ari Wia teninj kerichiba via Wia niinj wialinj Jɔŋ si bula. Ba ne bi seye di Jɔŋ foba Wii-chuɔle liinj.)

<sup>31</sup> Nii ne Yesu bira bul, "Bee ne mi jan kenj jininj niaa kaa magise? Ee ne ba nage?"

<sup>32</sup> Ba nage hanbiisinj síi gbieli yɔbɔ tuɔŋ ne. Dɔŋsunj yie kpia dɔŋɔ le, a bula piba a bul, 'La yii yiilaa ne pima, aŋ ka ma bi gua, la yel yoho pima, aŋ ka ma bi yel.'

<sup>33</sup> Bua-la le Jɔŋ Wia lii-foorila si kɔ ma teenj, uu vɔɔ niinj ne a bi sininj ma nyua. Nii ne ma si di jin-bɔŋ ne kenu.

<sup>34</sup> Aŋ ka mi-na Nuhuobiine Bie kɔ ma teenj a didii kiaa aŋ pe nyunyua sininj maa. Nii ne ma bula pi dɔŋɔ a bul baala deenj ŋaa luobii tiina ne a ŋaa si-nyuaru maa, aŋ pe kenj lanpoo lilaaraa ari haache diiree kala kaa dii nanɔŋsunj. <sup>35</sup> Nialinj si sei wu-jimii-la si lii Wia teenj, ba wu-ŋaalaa daga ari ba sene lii Wia teenj ne."

*Yesu juu Farisii kubala dia baa yire Saamɔŋ*

<sup>36</sup> Tapulii kubala Farisii tinŋaa tuɔŋ dɔŋɔ yire Yesu

duu kɔ u dia di ba dii kudi-ilee. Yesu mu a hɔŋ di ba dii kiaa. <sup>37</sup> Di haal kubala he taŋ-la le a ŋaa haache diiru. Haal-la nii Yesu wiaa ari u he Farisii tiina-la dia le aa dii kiaa. Nii ne u sii jon tulaali loŋ a kaa mu juu dia-la. <sup>38</sup> U si juu dia-la, u chin Yesu naasiŋ sɛmɛ a yiyel siiliiriŋ a hihe Yesu naasiŋ le. Sii-liiriŋ si he Yesu naasiŋ le nii, u keŋ u nyu-punaa kaa tiike aŋ guori Yesu naasiŋ, a bise tulaalii-la he u naasiŋ le. <sup>39</sup> Farisii tiina-la si yire Yesu duu ku dii kiaa na wiin deen a bibiine u tuɔŋ le, "Di baala deen sene ŋaa nii-la sii bul wiaa, Wia Diŋ-zɔŋ-la dolun le ne, u fa jan jin ari haala deen si digu ŋaa haache di-iru ne." <sup>40</sup> Nii ne Yesu bula pi Saamɔŋ a bul, "Saamɔŋ, mi keŋ wii ne di mi bula piŋ." Nii ne Saamɔŋ bula pu a bul, "Mi kuhian, bula pimi." Nii ne Yesu bula pu a bul, <sup>41</sup> "Baalaa balia ne he dime a sii mu chin moribee kiaa tiina teen. Dɔŋɔ chin siidi bui banese, dɔŋɔ ma chin siidi zɔ-banese. <sup>42</sup> Niaa deenba balia tuɔŋ, kuŋ-kala bi u chimin wuo tin. Nii ne kiaa tiina-la jon chin-la a che ba kala. Niaa deenba baliamin tuɔŋ, kubee ne jan cho baal-la woruŋ?" <sup>43</sup> Nii ne Saamɔŋ bula pu duu bina ari nii-la chimin si yuga ne. Nii ne Yesu bula pu di wutitii ne.

<sup>44</sup> Nii ne u miira beŋ haal-la aŋ piere Saamɔŋ a bul, "N na haal-la deen nee? Mi kɔ ŋ

dia, aŋ ka ŋ bi liin ŋaa pimi di mi sɔŋ mi naasiŋ, aŋ ka u-na keŋ u sii-liiriŋ kaa sɔŋ mi naasiŋ aŋ keŋ u nyu-punaa ma tiike. <sup>45</sup> Mi sii kɔ ŋ dia, ŋ bimi guoro, ka u-na guori mi naasiŋ. <sup>46</sup> N bi nuun ŋaa tise mi nyun, ka u-na ŋaa tulaali tise mi naasiŋ. <sup>47</sup> Mi bula piŋ ari mi jon u haacheba yuge ne a cheu, nii ne tii u chomi woruŋ nii. Ama nii-la ma mi si jon u haacheba muapilii cheu, u tiina ma chomi muapilii ne." <sup>48</sup> Nii ne Yesu bula pi haal-la niaa tuɔŋ ari u jon u haacheba a cheu ne. <sup>49</sup> Nii ne nialiŋ ku-kaanaa fa si hɔŋɔ didii kudiile-la bibiine ba tuɔŋ le a bul, "Kubee ne nia deen si paala jon haacheba che niaa?" <sup>50</sup> Ama Yesu bula pi haal-la a bul, "N yarida ne laan ta. Mu ari yarifielaa."

## 8

### *Haala-la sii to Yesu harin*

<sup>1</sup> Nii harin Yesu gollo to ta-balaa ari ta-biisiŋ a bubul Wia wu-zomɔ-la a tige Wia kuorii-la le. U haritooro-la fii ari balia to u harin mu, <sup>2</sup> ari haalaa dɔŋsun maa. Ba tuɔŋ dɔŋsun faa wiile ne, jin-bɔŋɔɔ ma fa keŋ dɔŋsun. Yesu vaare ba kala. Ba tuɔŋ dɔŋɔ yirin ne Meeri Magidalin. Yesu fa kiri jin-bɔŋɔɔ balipe ne u le. <sup>3</sup> Dɔŋɔ ma yirin ne Juana. U bala ma yirin ne Kusa. Kusa fa ŋaa nihian ne kuoro Herod dia le. Haal-la ba sii yire Suzana ma he dime a

pe haalaa dɔŋsun yuge ma le. Ba peba le ari kialin kala Yesu ari u haritooroo sii che.

*Yesu mage namaga a tige baal-la sii dyu kiasa le*

*Mat. 13.1-9; Maak 4.1-9*

<sup>4</sup> Nii ne niaa lii tasin a kuko Yesu teen. Ni-dan-la si ku hilime dere, Yesu mage namaga a piba a bul, <sup>5</sup> "Baal kubala ne sie a mu u dyu u kiasa. U jon u ku-doho aa mise ne. U sii mise nii, dɔŋsun tel wonbiin tuon. Niaa vene nuose, ka diibiisin tuosa dii. <sup>6</sup> Dɔŋsun ma tel kpaginyilin nyun a nyu an suu, bee wiaa liin tuo dime. <sup>7</sup> Dɔŋsun ma tuu tel sosun tuon a nyu, ba di sosun kala waa he dono le. Sosu-la wulimin ken kialin, ba suu. <sup>8</sup> Ku-doho-la dɔŋsun ma tel tintee-zomun le. Ba nyu a waa a wase kinken a he biee zolo zolo." Nii ne Yesu mage namaga-la dere an bul, "Digilaa tinnaa, ma wuoli ma digilaa nii."

*Yesu dage namaga-la bubuon*

*Mat. 13.10-23; Maak 4.10-20*

<sup>9</sup> Nii ne Yesu haritooroo piase namaga-la bubuon. <sup>10</sup> Yesu bula piba a bul, "Ma niaa deenba ne Wia dage u kuorii-la bubuon pa. Ama ni-dan kala, namagaba ne u yie kaa didageba. Ba yie jegili jegili an bi ba bubuon jin a bira nyilimi nyilimi an bi kun-kala ma wuo na.

<sup>11</sup> Namaga-la bubuon ne nla: Wia niin wiaa ne nja ku-doho-la. <sup>12</sup> Kialin si tel

wonbiin tuon ne nja nialin si yie nii Wia niin wialin, ka Sitaani ku liiri wialin ba tuon, di ba si wialin laa dii di Wia laaba ta. <sup>13</sup> Kialin si tel kpaginyilin nyun ma ne nja nialin si yie nii Wia niin wialin a sei ari tuotorun. Ama u bi ba tuon tibe. Ba yie sei wii-la a mu mage nii an via. Di wiaa ne juuba, ba jono ta. <sup>14</sup> Kialin si tel sosun tuon ma ne nja nialin si yie nii Wia niin wialin, ama dunia kiasa wiaa wiwalimeba, ba cho di ba jigi a chiche dunia tuotore wunjaalaa. A tin kiasa deenba wiaa ba yie to mu mage nii an bira via wialin. Wialin lel ba tuon. <sup>15</sup> Kialin si tel tintee-zomun tuon ma ne nja nialin si nii Wia niin wialin a laaba he ba tuosaa le a tutoba, a pese wialin le halii, ba ken doho."

*Yesu mage namaga a mu tige chaanin le*

*Maak 4.21-25*

<sup>16</sup> Nii ne Yesu bira dage niaa a bul, "Nuu-kala sii che pulumun u dia le, u bi jan nyige chaanin bil u dia le a ken gbanja a chu to, u bira bi jan jon chaan-la he godo bubuon maa. U yie jono bil kua nyun ne di niaa ne kuu juu u dia, di ba na pulumun. <sup>17</sup> Wu-faali tuo see duu ku lii di-jalin. Wii-kala si he birimin tuon ma jan ku lii pulumun. <sup>18</sup> Ma fiele ma siaa worun ari wialin ma sii nii le. Nii-la kala sii to Wia niin wiaa, Wia jan faasa peu le duu to worun. Nii-la ma si bi

Wia niinj wiaa ka to, Wia bi jaŋ pɛu lɛ. U si pɛu lɛ mua-la maa, u jaŋ laau kaa viiri.”

*Yesu naan ari u naanbiirin kɔ Yesu teen*

*Mat. 12.46-50; Maak 3.31-35*

<sup>19</sup> Nii nɛ Yesu naan ari u ŋaanaa kɔ lee-la Yesu si hɛ di ba nau. Niaa si yuga nii, ba buu wuo na. <sup>20</sup> Nii nɛ nuu bula pi Yesu a bul, “N naan ari ŋ ŋaanaa nɛ chin jeen hariŋ a chichɛ di ba nanj.” <sup>21</sup> Nii nɛ Yesu bula pi ba kala a bul, “Nialin si nii Wia niinj wiaa a tutoba, ba nɛ ŋaa mi naan ari mi naanbiirin.”

*Yesu ŋaa pelin chin*

*Mat. 8.23-27; Maak 4.35-41*

<sup>22</sup> Tapulii kubala Yesu ari u haritooro sii juu liinj daboro. Nii nɛ Yesu bul di ba chol muga cholo dɔŋɔ. Nii nɛ ba juu liinj daboro-la a duoro mu. <sup>23</sup> Ba fa si duoro mu nii, Yesu pinj donj. Nii nɛ pel-duo kubala suomo ŋinaa, a ku ŋmoo liinj a hɛ liinj daboro-la tuɔŋ u chichɛ u sɔ. U fa ka mua di ba tuu liinj bubuɔŋ.

<sup>24</sup> Nii nɛ Yesu haritooro-la mu lee-la u fa si pina, a chisu a bula pu a bul, “La kuhianj, laa chɛ di la suu nɛ.” Nii nɛ Yesu sii donj lɛ a kpia pel-la lɛ anj bul lii-pel-la ma lɛ duu fiela pinj. Pel-la kɛrɛ, ka lerinj kala ŋaa fuui. <sup>25</sup> Nii nɛ Yesu piesɛ u haritooro a bul, “Ma bi yarida ŋaa?” U ŋaa nuu-kala wu-kpunj kperɛ. Fawul-lun ma kɛnba.

Nii nɛ ba pipiesɛ dɔŋɔ a bul, “Kubɛɛ nɛ saa paala ŋaa nia deenj? U bul wiaa a pi pelinj ari lii-pelinj, ba kala to u niinj.”

*Yesu vaare baal kubala, jin-bɔŋŋɔɔ fa si kɛnɛ*

*Mat. 8.28-34; Maak 5.1-20*

<sup>26</sup> Nii nɛ ba duoro kɔ Gerasinj tinteenj. Gerasinj ari Galilii tinteenj kpage dɔŋɔ nɛ. <sup>27</sup> Ba si mu yi lee-la, Yesu lii liinj niinj. U si lia, di baal kubala ma lii tan-la a ku chemu. Jin-bɔŋŋɔɔ kɛnu. U kɛŋ yaribiree nɛ aa gollɛ a dieni. U bi dia maa juu. Vaamaa lerinj nɛ u yie hɛ. <sup>28</sup> U si na Yesu, u ŋmoo niinj anj tuu tel u sipaanj, anj bula pu a bul, “Yesu, Wiibalinj Bie, bɛɛ nɛ ŋ chɛ ŋ ŋaami lɛ? Mii sulunj, sɔ mi dɔgisu.” <sup>29</sup> Yesu fa bula pi jin-bɔŋ-la duu lii baal-la lɛ, nii nɛ tii u bul nii. Jinsi-la fa venɛ kɛnu a yuge nɛ. Niaa kɛnu kaa tɔ dia a hɛu kurunj a kɛŋ chɔrumɔɔ vɔbu anj hɛ niaa ba bibenu. U yie kɛŋ chɔrumɔ-la kaa kɛrɛ, ka jinsi-la kɛnu kaa lii juu girinj. <sup>30</sup> Nii nɛ Yesu piesu a bul, “N yirinj nɛ bɛɛ?” Nii nɛ baal-la bul duu yirinj nɛ kɛnɛ, bɛɛ wiaa jinsinj fa yuga nɛ a kɛnu. <sup>31</sup> Nii nɛ jinsi-la sul Yesu di ba nɛ lenj baal-la, duu sɔ lenj di ba tuu buɔtuolu-lun.

<sup>32</sup> Di toonunj ma hɛ lee-la a yuge a didii kiaa peelinj nyun. Nii nɛ jinsi-la sul Yesu duu lenj di ba mu juu toonula. U sei. <sup>33</sup> Ba lii baal-la lɛ

a mu juu toonu-la. Nii ne toonu-la kala sii a fá lii peel-la nyuŋ a tuu tel muga tuoŋ a nyua liiŋ a suu.

<sup>34</sup> Too-daara-la si na wii-la si ŋaa, ba fá mu a keŋ doworo mu bula pi bagidaaraa ari taŋ-la niaa kala.

<sup>35</sup> Niaa sii lii mu di ba na wii-la si ŋaa a kɔ Yesu teenj. Baa kɔ di baal-la Yesu si kiri jinsinj u ɛ, duu hoŋ Yesu seme a laale gerinj a keŋ yarifielaa. Ba si na nii, fawulluŋ keŋba.

<sup>36</sup> Nialinj si he dime aa beŋ, ka Yesu vaare baal-la, ba bula pi ba doŋsuŋ tinŋaa nii u si ŋaa a vaare baal-la. <sup>37</sup> Ba si nii wialinj, fawulluŋ keŋba woruŋ. Nii ne taŋ-la niaa kala ku bula pi Yesu duu lii ba jaŋ ɛ. Nii ne Yesu sii juu liiŋ daboro. Ba di u haritooroo duoro viiri. <sup>38</sup> Nii ne baal-la Yesu si kiri jinboŋŋɔɔ u le ma sulu duu leŋ duu kɔ di ba mu. U bi seye aŋ bula pu a bul, <sup>39</sup> "Mu dia a bula pi ŋ dia niaa, Wia si ŋaa wii-la ŋ ɛ." Nii ne baal-la gollɛ jaŋ tuoŋ kala a bul wii-la Yesu si ŋaa u ɛ.

*Yesu vaare Jaaris tolo*

*Mat. 9.18-26; Maak 5.21-*

43

<sup>40</sup> Nii ne Yesu miira mu juu liiŋ daboro a duoro chol muga. Ba cholo nii di ni-dan hilime a hoŋo gberu.

<sup>41-42</sup> Di baal kubala ma kɔ dime. Baa yire Jaaris. U fa ŋaa Wii-chuoɔɔ dia kuhianj ne. U fa keŋ toli-bala ne. Tolo-la fa yi jisinj fii ari balia ne. Nii ne baal-la kɔ Yesu

teenj a tuu tel u naasinj ɛ a sulu duu kɔ u dia. U bula pu ari u tolo ne pina kikiiki. Nii ne Yesu sii duu mu baal-la dia. U síi mu nii, di niaa gollu chu seme-na kala.

<sup>43</sup> Haal kubala ma fa he ba tuoŋ. U fa keŋ tinja ne jisinj fii ari balia, u pɔ u bi dere. [U gollo ŋaa daalusuŋ kinkeŋ a chei u moribiee kala, ka daalusu-la buu laa.] <sup>44</sup> Nii ne u lugisi nialinj tuoŋ a ku chinj Yesu hariŋ a digi u gerinj nipiniŋ ɛ. U tinja-la guu dere.

<sup>45</sup> Nii ne Yesu piase a bul di kubee ne digu. Nuukala bul duu-na dee. Nii ne Piita bula pi Yesu a bul, "Kuhianj, ka ŋ na niaa si yuga nii ne a golluŋ chu a yiyigi doŋo."

<sup>46</sup> Ama Yesu ha bul di nuu ne digu. U jima ari doluŋ ne liiu ɛ. <sup>47</sup> Haal-la si na ari wii-la u si ŋaa bi wu-faali ŋaa, u ku kpirimi Yesu sipaanj a chichel, a bul nialinj tuoŋ wii-la si tii u digu, a dage nii u si digu a duori lima. <sup>48</sup> Nii ne Yesu bula pu a bul, "Mi tolo, ŋ yarida ne tii ŋ duori, mu ari yarifielaa."

<sup>49</sup> Yesu fa síi bul wiaa nii, di tinjaara kɔ. U lii Jaaris dia ne a kɔ. U si kɔ, u bula pi Jaaris a bul, "Ŋ tolo-la suba ne, bira sí la kuhianj-la walimu." <sup>50</sup> Yesu síi nii nii, u bula pi Jaaris a bul, "Sí leŋe di fawulluŋ keninj. Di ŋ ŋaa yarida, u jaŋ sii."

<sup>51</sup> Yesu si mu yi baal-la dia, u bi leŋe di nuu-kala to u hariŋ juu dia-la, see Piita ari Joŋŋ ari Jeems, a pe bile nyimma ari u naan ɛ. <sup>52</sup> Ba



ku juu dia-la di nialinj kala si he dime china yel bile yoho. Nii ne Yesu bula piba a bul, "Ma sí yel, bile bi suba, donj ne u pinj." <sup>53</sup> Nii ne ba kala momu, beε wiaa ba jima ari u suba ne. <sup>54</sup> Nii ne Yesu guu mu kenj bile nisinj le anj yiru a bul, "Sii mi bii." <sup>55</sup> Nii ne u dima miira ku juu. U sii lima lima. Nii ne u bul di ba nja kudiilee pu duu dii. <sup>56</sup> Wii-la nja bile nyimma ari u naanj wu-kpunkpere. Nii ne Yesu bula piba di ba sí wiinj deenj si nja bula pi nuu-kala.

## 9

*Yesu tinj u haritooro fii ari balia*

*Mat. 10.5-15; Maak 6.7-13*

<sup>1</sup> Nii ne Yesu yire u haritooro fii ari balia a he donjo le, a piba dolunj di ba wuo jin-bonjoo anj vivaare nyanyal tinjaa maa. <sup>2</sup> Nii ne u tinba di ba lii a bul Wia kuorii-la wiaa anj pe vaare nyanyal tinjaa. <sup>3</sup> U bula piba di ba sí kunj-kala kaa pe venj wonjbii-la, di ba sí daantigisinj koru, di ba sí luogaba ma koru, di ba sí kudiilee ma koru, di ba sí moribiee ma koru, a sí genninj balia ma paa. <sup>4</sup> U bira bula piba a bul, "Di ma ne mu a juu tanj kala, má juu dia-la niaa si cho ma wiaa, a he dii-bala le halii a mu lii tanj-la le. <sup>5</sup> Di ma mu tanj kala, di ba po di ma sí juu, má kiele mu. Di ma mua, má kpesi ma naasinj hagila ta. Nii jan nja di ba jinj ari ba nja wii ne a cheima."

<sup>6</sup> Nii ne Yesu haritooro-la sii a gollo to tasinj aa bul Wia wu-zomō-la wiaa anj pe vaare niaa lee-na kala ba si mua.

*Herod tuobiinaa vugima*

*Mat. 14.1-12; Maak 6.14-29*

<sup>7</sup> Galilii tinjaa kuoro Herod si nii wialinj Yesu haritooro-la fa si gollo nja, u tuonj kala vugima, beε wiaa niaa donsunj bula ari Joonj Wia lii-foori-la ne sii suunj le. <sup>8</sup> Niaa donsunj ma si Ilaaja ne sii suunj le, donsunj ma si nialinj fa síi bul wiaa, Wia Din-zonj-la dolunj le faafaa donjo ne sii suunj le. <sup>9</sup> Nii ne Herod bul, "Mi nja ba kpu Joonj a keru u nyunj ne, ka kubee wiaa ne saa mi biraa nii nja?" Nii ne u ninerike duu na Yesu.

*Yesu pi niaa bui banonj kudiilee*

*Mat. 14.13-21; Maak 6.30-44; Joonj 6.1-14*

<sup>10</sup> Nii ne Yesu nanzōōba-la miira ko u teenj a bul wialinj kala ba si nja pu. Nii ne u kenj ba dunjuna mu tanj kubala baa yire Betisaada. <sup>11</sup> Nialinj si nii Yesu wiaa duu mu Betisaada, ba to u harinj mu. U kenjba worunj a bul Wia kuorii-la wiaa piba, anj vaare nialinj síi wiilu.

<sup>12</sup> Wia si suomo duu juu, u haritooro-la fii ari balia-la ko u teenj a bula pu a bul, "Lenj di niaa deenba viiri a mu tanj tuonj ari bagisinj si kpage daha a che kudiilee ari di-pininj, beε wiaa kunj-kala tuo daha." <sup>13</sup> Nii ne

Yesu bula piba a bul, "Má mu che kudiilee a piba di ba dii." Nii ne ba bula pu a bul, "Kula la si kene ne boroboroba banon ari chenfilee balia. Nj che di la mu yoo kudiilee kaa ko pi ni-dan deen kala nee?" <sup>14</sup> Baalaa fa si he nialin tuon yi bui banon ne. Nii ne Yesu bula pi u haritooro a bul, "Má len di nialin gulimo hon hon mahin balia ari fii fii leree." <sup>15</sup> Nii ne u haritooro-la naa nialin kala tuu hon. <sup>16</sup> Yesu laa boroboroba banon-la ari chenfilee balia-la a wula ben wia nyun an chuole Wia, an kaa choge choge a pi u haritooro. Ba laa kaa mu kpa nialin. <sup>17</sup> Ba kala dii a voge an ka. U haritooro-la paa ku-kaan-biisin a su sinjin fii ari balia.

*Piita dage Yesu si naa nii-la*  
*Mat. 16.13-19; Maak 8.27-29*

<sup>18</sup> Tapulii kubala Yesu dun dunja chuchuele Wia. U haritooro ma he u teen. Nii ne u pieseba a bul, "Kubee ne niaa si mi naa?" <sup>19</sup> Nii ne u haritooro-la bul, "Don sun si n naa Jon ne, Wia liifoori-la. Don sun ma si di n naa Ilaaja ne. Don sun ma si n naa nialin fa sii bul wiaa, Wia Din-zon-la dolun le faafaa don ne si sii suun le." <sup>20</sup> Nii ne Yesu miira piese u haritooro maa a bul, "Ka ma maa, ma si mi naa kubee ne?" Piita si, "N ne naa Kirisito, nii-la Wia si liisa."

*Yesu bul nii u si jan na heen an pe suu*  
*Mat. 16.20-28; Maak 8.30-9.1*

<sup>21</sup> Nii ne Yesu bula piba ari siifiesin di ba po di ba si wii-la bula pi nuu-kala. <sup>22</sup> U bira bula piba a bul, "Mi-na Nuhuobiine Bie jan na heen kin ken. Juu tinjaa nihiasin ari nialin si kpu pusun pipi Wia kuhiasin ari Wia tenin kerichiba kala jan viami. Ba jan kpumi, ka di mi sii suun le tapul-torimun cheen."

<sup>23</sup> Nii ne u bula pi nialin kala a bul, "Di nuu-kala nii che duu tomi, see duu via u titia wonbiin an jon u daageese baase tapulii-na kala a to mi harin. <sup>24</sup> Nii-la kala sii che duu laa u miisin, u jan jon u miisin ta, ama nii-la si via u miisin ta a tin mi wiaa, u jan sene laa u miisin. <sup>25</sup> Di n ne tii dunia kala an bi miisin kene, bee kun nyuurii ne n na? <sup>26</sup> Mi-na Nuhuobiine Bie jan mu Wia-jan an miira ko, a chaane ari mi Nyimma si chaane nii. Wia tin daaraa ma jan to mi harin ko a ma chaane. Ba-na bi disin kene. Nialin hiisin si kene a tin mi wiaa ari wialin mi si bula wiaa, mi ma jan faba hiisin bua-la le mi si jan miira ko. <sup>27</sup> Wutitii ne mi bulaa pima, niaa don sun he daha, ba bi jan suu see di Wia kuorii-la ko."

*Yesu birima*

*Mat. 17.1-8; Maak 9.2-8*

<sup>28</sup> Yesu si bul wiaa deenba kala dere, u tapulaa chori cheen ne u sii jil peelin nyun

duu chuole Wia. U ken Piita ari Joon ari Jeems ba jil. <sup>29</sup> U fa sii chuole Wia nii, u siaa birime. U gerin ma pulle a tutul. <sup>30</sup> Niaa balia guu ko u teen a kalaa tul. Moosis ari Ilaaja ne. <sup>31</sup> Ba chin aa bul wiaa. Baa bul nii Yesu si jan suu Jerusalem le. U tinjinaa diderin ne nii.

<sup>32</sup> Piita ari u nanjonsun fa pin don ne, ama ba hirike sii a na Yesu sii tul nii, a na nialin balia ma si chin u teen. <sup>33</sup> Nii ne nialin ta Yesu an viviiri. Ba si viire nii, Piita bula pu, "Kuhian, u naa wu-zon ne la si he daha. La jan he lenne batori, di n ken don, di Moosis ma ken don, di Ilaaja ma ken don." U sii bul wiaa deeba kala, u fa paala bi jin wii-la kala u sii bul.

<sup>34</sup> Piita ha sii bul wiaa nii, duonbilingaanin ku tuu toba. U si toba nii, fawullun ken Yesu haritoorola. <sup>35</sup> Ka nuu yikoro lii duonbilingaanin-la tuon aa bul, "Mi Bie ne nla. U ne naa nii-la mi si liisa. Ma jegile nii u teen." <sup>36</sup> Yikori-la si bul wiaa dere, u-na Yesu dunduja ne he dime. Nii ne u haritooro-la tore ba niin. Ba bi wii-la ba si na bula pi nuu-kala.

*Yesu kiri jin-bomun bie le*  
*Mat. 17.14-18; Maak 9.14-27*

<sup>37</sup> U tan si pula, ba lii peel-la nyun tuu, nii ne ni-dan ku chej Yesu. <sup>38</sup> Di baal kubala lii ni-dan-la tuon a faasa yire, "La kuhian, bee

na mii sulun di n pe mi bie le. U ne mi bie kala. <sup>39</sup> Jin-bomun ne kenu, u chichiire a teriki. Nanju-funfuga yie to u niin. Uu walimu a po u buu ka len. <sup>40</sup> Mi mu sul n haritooro di ba kiri jin-bon-la u le, ama ba bi wuo kiri." <sup>41</sup> Nii ne Yesu bula piba a bul, "Ma lele niaa deeba, ma bi yarida kene. Ma naa ni-bom ne. Ee ne mi jan nyalime a dieni ma teen?" Nii ne u bula pi baal-la a bul, "Ken n bile kaa ko mi teen." <sup>42</sup> Nii ne bile sii mu. Bile sii mu nii, nii ne jin-bon-la nmobu lo tinteen u teriki. Nii ne Yesu bul jin-bon-la le duu lii bile le. U lii, ka bile duori, an ka Yesu jonu pi u nyimma.

<sup>43</sup> U naa nialin kala wukpunkpere. Ba si di Wia ken dolun worun.

*Yesu bira bul u suun wiaa*  
*Mat. 17.22-23; Maak 9.30-32*

Nialin kala haa biine wukpunkperisi-la Yesu si naa le. Nii ne u bula pi u haritooro-la a bul, <sup>44</sup> "Ma si wii-la mi si jan bula pima yu. U ne nla: Ba jan jon mi-na, Nuhuobiine Bie a he niaa nisi le." <sup>45</sup> Ama u haritooro-la bi wii-la u si bula bubun jin. U naa wu-faali ne ba teen. Nii ne tii ba bi u bubun wuo jin. Ama ba fifa fawullun di ba piere wii-la bubun.

*Yesu haritooro ken ba tuon kuhian wiaa lile*  
*Mat. 18.1-5; Maak 9.33-37*

46 Nii ne Yesu haritooroo keŋ ba tuon kuhian wiaa lilere. 47 Yesu fa jin wiila ba sii biinu a keŋ biibie kaa ko kii u seme, 48 an bula piba a bul, "Di nuu-kala ne keŋ biibie don woruŋ a tin mi wiaa, mi ne u keŋ woruŋ nii. Nii-la ma kala si keŋmi woruŋ, mi dunduŋa dee u keŋ woruŋ nii. Nii-la si tinmi ma ne u keŋ woruŋ nii. Nii-la si ŋaa ni-bie ma tuon, u ne ŋaa ma tuon kuhian."

*Nii-la kala si bin bere, u choŋ ne*

*Maak 9.38-40*

49 Nii ne Joon bula pi Yesu a bul, "Kuhian, la na baal kubala duu yire ŋ yirin aa kiri jin-bononoo niaa le. La kiru duu si nii ŋaa, bee wiaa u bi la don ŋaa." 50 Nii ne Yesu bula pi Joon ari u haritooroo ku-kaanaa a bul, "Ma siu kiru, bee wiaa nii-la kala si bi ma harin lia, u ŋaa ma don ne."

*Samaria tinteen seme don niaa via Yesu*

51 Nii ne tapulii-la kpage di ba jon Yesu a kaa jil Wia-jaŋ. U ŋaa siri a sii, a jon wonbin a mumu Jerusalem. 52 U tin tinɗaraa di ba laa u sipaan a mu Samaria tinteen ta-bie kubala, a che lerin a bilu le. 53 Ka nialin bi siri ŋaa di ba laau, bee wiaa ba jima duu mu Jerusalem ne.

54 U haritooroo Jeems ari Joon si na nii, ba piŋe Yesu a bul, "La Tiina, ŋ jaŋ leŋ di la sul nyinin duu lii wia nyuŋ ku tuu a diiba koo?" 55 Nii ne

Yesu daase harin an kpiaba le [a bul, "Ma bi jin dima-la yiri Wia si jon pima. Mi-na Nuhuobiine Bie bi ko di mi kpu niaa, ama di mi laa niaa ta ne."] 56 Nii ne ka ba kiele mu tan don.

*Nialin si maga di ba to Yesu harin*

*Mat. 8.19-22*

57 Ba si lii jon ba wonbin, baal kubala bula pi Yesu a bul, "Mi ŋaa siri di mi to ŋ harin a mu lee-na kala ŋ sii mu." 58 Nii ne Yesu bula pu a bul, "Jollun keŋ buasun ne a jujuu, diibiisin ma keŋ dellin ne a jujuu, ama mi-na Nuhuobiine Bie bi di-pinin kene di mi pina wiesi." 59 Nii ne u bula pi nuu don maa a bul, "To mi harin." U bula pu a bul, "Mi Tiina, leŋ di mi laa sipaan mu hugi mi nyimma." 60 Nii ne Yesu bula pu a bul, "Leŋ di suunun tinŋaa mu hugi ba suunun, an ka di ŋ ma mu bul Wia kuorii-la wiaa a pi niaa."

61 Nuu ma don bira bula pu a bul, "Mi Tiina, mi jaŋ to ŋ harin, ama leŋ di mi mu ta mi dia niaa an ko." 62 Nii ne Yesu bula pu a bul, "Nuu-na kala si suomo duu pere an didaase u harin, u bi tintimii kala kene Wia kuorii-la le."

## 10

*Yesu tin u nanɗɗɗɗa mahin batori ari fii*

1 Yesu si bul wiaa deenba dere, u liise niaa mahin batori ari fii a keŋba kaa kpaa balia balia, a tinba di ba laa

sipaan mu lee-kala u titia si jaŋ mu. <sup>2</sup> U bula piba a bul, "Kiaa yuga baga le di ba ŋaa, ama tiŋtinnaa bi yuge di ba tiŋ. Má sul baga-la tiina duu he niaa di ba tiŋ tiŋtimii-la. <sup>3</sup> Má sii mu. Ma nage pie-biisin ne. Mii tiŋma di ma guoli gunḡurusuŋ tuoŋ. <sup>4</sup> Ma sí moribiee koru, ma sí sulligbaŋsiŋ koru a sí neŋteŋŋee tuŋ bulia bulia ma koru a sí china chuole niaa ma dieni woŋbiin le. <sup>5</sup> Di ma ne mu juu dia kala, má laa sipaan bula pi dia-la niaa a bul, 'Dia deen niaa jaŋ hoŋ ari yarifielaa.' <sup>6</sup> Di nuu ne he dime si cho yarifiela-la, má leŋ duu hoŋ ari yarifielaa ari ma si sul ŋii. Di nuu tuo dia-la le a cho yarifiela-la, yarifiela-la ma si sula jaŋ miira ko ma teen. <sup>7</sup> Di ba ne pima di-piniŋ, má he diibala le halii aa dii kudiile-la ba si ŋaa pima aa nyua liin ma dime. Di tiŋtinna ne tima, u maga di ba tiŋmu ne. Ma sí goŋo pipiŋ niaa diisin le. <sup>8</sup> Di ma ne mu taŋ kala, di ba ne pima di-piniŋ, máa dii kialin kala ba si ŋaa pima lee-la. <sup>9</sup> Má vaare nyanyal tiŋŋaa ma kala si he taŋ-la le aŋ bula piba a bul, 'Wia kuorii-la ku kpagema ne.' <sup>10</sup> Ama di ma ne mu taŋ kala, di ba ne bima di-piniŋ pa, má lii chin woŋbiin le aŋ bula piba a bul, <sup>11</sup> 'Ma taŋ-la hagila si mere la naasiŋ le, ba ne la kpesee hema le ŋla. Ama u maga di ma jin ari Wia kuorii-la ku

kpagema ne.' <sup>12</sup> Mi bulaa pima ari sariya che-diilin, Wia jaŋ doḡise taŋ-la niaa a kii bua-la le u si doḡise Soḍom niaa ŋii."

*Tasi-la niaa si bi Yesu wiaa laa dii*

*Mat. 11.20-24*

<sup>13</sup> Ŋii ne Yesu bula pi taŋ-la niaa si bi u wiaa laa dii a bul, "Ma Kozaŋin tiŋŋaa, ma jaŋ na heeŋ. Betisaada tiŋŋaa maa, ma ma jaŋ na heeŋ. Wu-magila-la ba si ŋaa ma teen, di ba ne fa ŋaaba Taya ari Saadoŋ niaa teen ŋla, ba fa bi jaŋ dieni aŋ hoŋo telle telle naasiŋ a ŋaa tuorun bubuge ba titia, a didage ŋii ari ba birima lii ba haacheba le ne. <sup>14</sup> Sariya che-diilin, Wia jaŋ doḡise Kozaŋin ari Betisaada tiŋŋaa a kii Taya ari Saadoŋ tiŋŋaa. <sup>15</sup> Mana Kapenam tiŋŋaa, ma ne paala chiche di ma keŋ ma titia a kaa jil Wia-jaŋ. Ama Wia jaŋ joŋma yuo ta di ma tuu juu Wia nyiniŋ."

<sup>16</sup> Ŋii ne aŋ ka u bira bula pi u haritooro-la a bul, "Nii-la kala si jegile nii ma teen, u jegile nii mi ma teen ne. Nu-kala si viama, u viami ma ne. Nii-la kala ma si viami, u ma via nii-la si tiŋmi ne."

*Yesu nanḡooba-la mahin batori ari fii miira ko Yesu teen*

<sup>17</sup> Ŋii ne Yesu nanḡooba-la mahin batori ari fii-la miira ko Yesu teen. Ba tuoŋ tore kinkeŋ a bula pi Yesu a bul, "La Tiina, di la ne yire ŋ yirin, jin-boŋŋoɔ ma yie

paala to la niinj ne." 18 Nii ne Yesu bula piba a bul, "Mi na Sitaani duu lii wia nyun ku tuu tel a nage duonun sii ligise nii." 19 Nii ne Yesu bira bula piba a bul, "Má jegile nii mi teenj. Mi pima dolun di ma wuo vivenj dinnaa ari nuomaa tuonj, ka ba bima wuo dinj. Mi pima dolun di ma wuo Sitaani maa. U bi janj wuo kenjma walime. 20 Ama ma sí lenje di ma tuonj tõe ari jinj-bonjoo sii to ma niinj le, má miira lenj di ma tuonj tõe a tinj ba si njmunse ma yiraa he Wia-janj le."

*Yesu tuonj tõe Wia Dinj-zonj-la dolun le*

*Mat. 11.25-27; 13.16-17*

21 Bua-la titia le Yesu tuonj tõe Wia Dinj-zonj-la dolun le a bul, "Mi Nyimma, nj ne njaa wia nyun ari tinteenj kala Tiina. Mii lollun ari nj si kenj wialinj nj si jonjo faa a dage nialinj si bi wiaa jinj, anj bi jonjo dage nialinj si kenj wu-jiminj. Mi Nyimma, mii lollun. Nj titia tuotõrunj le ne nj njaa nii." 22 Nii ne u bira bul, "Mi Nyimma jonj kunj-kala dolun ne pimi. Mi Nyimma dunjuna ne jinj nii mi si naga. Mi ma dunjuna ne jinj nii mi Nyimma ma si naga. Nuu-kala bira buu jinj, see nialinj dunjuna mi sii cho di mi dage."

23 Nii ne Yesu miira daase u haritooro-la anj bula piba ba dunjuna a bul, "Ma tuonj tõe ari ma wuo nina wialinj kala ma sii na. 24 Mi janj bula pima ari bunbun nialinj

fa sii bul wiaa, Wia Dinj-zonj-la dolun le ari faafaa kuoroo paala yuga a faa cho di ba na wialinj ma sii na anj bi wuo na, a ma faa cho di ba nii wialinj maa ma sii nii, anj ka ba bi wuo nii."

*Yesu dage niaa ba si janj njaa nii a cho ba donsun tinjaa*

25 Nii ne Wia teninj kerichi kubala ko a wiwalime duu magise Yesu a piesu a bul, "Kuhianj, bæe kunj ne mi janj njaa a kenj miisi-la si bi dere?" 26 Nii ne Yesu piesu a bul, "Bæe ne ba njmunse Wia teninj tuonj? Ee ne nj yie karime?" 27 Nii ne baal-la bula pu a bul, "Ba si di nj kenj nj tuonj kala ari nj kunj-kala ari nj tuobiinaa ma kala a cho nj Tiina Wia, a cho nj donjo tiina maa ari nj si cho nj titia nii." 28 Nii ne Yesu bula pu a bul, "Wialinj kala nj si bula njaa wutitii ne. Nj ne njaa nii, nj janj kenj miisinj."

29 Nii ne Wia teninj kerichi-la chiche duu dage ari u kenj wutitii. Nii ne u piese Yesu a bul, "Kubæe ne njaa mi donjo tiina?" 30 Nii ne Yesu mage namaga a bul, "Baal kubala ne sie a lii tanj kubala baa yire Jerusalem a mumu Jeriko. U fa njaa juu tiina ne. U si mu nii, u mu juu gaaraa tuonj. Ba wuri u genninj kala anj njmobu a bolimu anj fá lel, ka u pinj dime a chiche duu suu. 31 Nii ne di nialinj si kpu pusunj pipi Wia, ba tuonj kubala ma jonj wonjbii-la aa venj. U si ku a nau, u to seme

dɔŋ nɛ a kɔpɛɛ bal. <sup>32</sup> Nii nɛ Wia-dia nanɔɔ kubala ma kɔ lee-la a ma kɔpɛɛ bal. <sup>33</sup> Ka Samaria tinɔaa baal kubala ma fa jon wonɔbii-la a venɛɛ kɔ. U si nau, nennige kɛnu. <sup>34</sup> U mu u teenɔ a chɛɛ u naawiilaa a vɔɔ, aɲ jonu hɛ u titia kakumo lɛ a kɛnu kaa mu nuhuɔraa dia kubala aa benu. <sup>35</sup> Tan-pul u jon siidi zɔɔ a pi dia tiina aɲ bula pu duu bibenɔ u nyun worunɔ. Duu nɛ miira kɔ, u jan tinɔ u si nɔmoo chiminɔ mage nii kala.” <sup>36</sup> Nii nɛ Yesu piɛɛ Wia teninɔ kerichila a bul, “Niaa deenɔba batorimunɔ tuɔnɔ, kubɛɛ nɛ nɔaa baal-la si juu gaaraa tuɔnɔ dɔnɔ tiina? Bɛɛ nɛ nɔ biine nɔ tuɔnɔ lɛ?” <sup>37</sup> Nii nɛ Wia teninɔ kerichila bul, “Baal-la si fɔu nisusunɔ.” Nii nɛ Yesu bula pu, “Tɔɔ, nɔ ma mu nɔaa nii titia.”

*Yesu mu Maata ari Mɛeri dia*

<sup>38</sup> Yesu ari u haritooroo si jon wonɔbiinɔ mumu nii, ba kɔ tan kubala, di haal kubala ma hɛ dime. Baa yirɛ Maata. U kɛnɔ Yesu kaa juu u dia. <sup>39</sup> U nɔana ma fa hɛ dime. Baa yiru Mɛeri. Yesu si hɔnɔ dia-la tuɔnɔ, u ku hɔnɔ Yesu sɛmɛ a jegilee nii wialinɔ u sii bul, <sup>40</sup> ka Maata fiɛɛ sii a nɔnɔaa kudiilee duu pi Yesu a kala lɔl. Nii nɛ u na baaninɔ Mɛeri nyunɔ a ku lii, a bula pi Yesu a bul, “Mi Tiina, nɔ biina u zɔmɔ nɛ mi nɔana si lenɔ tinɔtinɔaa kala pimi mi titinɔ? Lenɔ duu ku pɛmi lɛ.” <sup>41</sup> Nii nɛ Yesu bula pu

a bul, “Maata, wiaa yuga nɛ hɛ dime a wiwaliminɔ. <sup>42</sup> U maga di nɔ chɛ wu-bala dunɔdunɔ nɛ. Wii-la titia nɛ Mɛeri liise nii. Wii-la ba bi jan wuo kaa laa u teenɔ.”

## 11

*Yesu dage niaa ba si nɔaa nii aa chuɔlɛ Wia*

*Mat. 6.9-13; 7.7-11*

<sup>1</sup> Tapulii kubala Yesu sii a mu chuɔlɛ Wia lee kubala. U si chuɔlɛ Wia dɛrɛ, u haritooroo tuɔnɔ kubala kɔ u teenɔ a bula pu a bul, “La Tiina, dagɛla nii la si jan nɔaa a chuɔlɛ Wia, ari Jonɔnɔ fa si dage u haritooroo ba si nɔaa nii aa chuɔlɛ Wia.” <sup>2</sup> Nii nɛ Yesu bula piba a bul, “Nla nɛ ma jan chuchuɔlɛ Wia: Má bul,

‘La Nyimma Wia,  
lenɔ di nɔ yirinɔ yirɛ,  
lenɔ di nɔ kuorii-la kɔ.

<sup>3</sup> Pila la niinɔ kudiilinɔ tapulii-na kala.

<sup>4</sup> Jonɔnɔ la haacheba chɛla ari la ma si jonɔnɔ la dɔnsunɔ tinɔnɔaa haacheba cheba nii,  
a liisɛla wii-la si jan kɛnɔla hɛ haache tuɔnɔ lɛ.’ ”

<sup>5</sup> Nii nɛ Yesu bula pi u haritooroo a bul, “Má lenɔ di la jonɔnɔ ari ma kunɔ nɛ mu u nanɔdɔnɔ dia tita-siesee, a bula pu a bul, ‘Mi nanɔdɔnɔ, chinɔmi boroboro batori. <sup>6</sup> Mi nanɔdɔnɔ nɛ lii wonɔbiinɔ a kɔ mi teenɔ titanɔnɔ deenɔ, ka mi bi kunɔ kɛnɛ di mi nɔaa pu duu dii.’ <sup>7</sup> Nɔ biina ari nɔ nanɔdɔnɔ-la nɛ hɛ dia tuɔnɔ

an̄ bula piñ a bul, ‘Sí mi walimu, boin̄ yaga ne. Ka la di mi biirin̄ piñ don̄. Mi bi jañ wuo sii a piñ kuñ-kala.’ Ai, u bi jañ bul nii. <sup>8</sup> BEE ne u jañ ñaa? Mi jañ bula pima, di ñ ne china pese, ma nan̄don̄sun̄ wiaa dee u jañ sii don̄ le a piñ kudiile-la. Ama ñ si pese nii an̄ bi hiisin̄ fá ne tii u jañ sii a piñ ku-la kala ñ sii che. <sup>9</sup> Nii wiaa mi jañ bula pima, Má sul kiaa, ma jañ laa, má che kiaa, ma ma jañ na. Má dū boro, ba jañ kaa suro pima. <sup>10</sup> Nii-la kala si sul kiaa Wia teen̄, u yie laa ne. Nii-la kala sii che kiaa, u yie na ne. Nii-la ma kala si dū boro, ba yie kaa suro pu ne. <sup>11</sup> Nyin̄ bee ne ma tuon̄ si jañ jon̄ dimin̄ a pi u bie duu ne piesa chiche cheñfilin̄? <sup>12</sup> Koo duu ka che ji-halin̄, ma tuon̄ nyin̄ bee ne jañ jon̄ nuomun̄ pi u bie? Ma tuon̄ nuu-kala bi jañ ñaa nii. <sup>13</sup> Ma nialin̄ ñaa ni-bon̄hon̄ ne, ka ma wuo jon̄ ku-zon̄hon̄ a pi ma biirin̄. Ama mi Nyimma si he Wia-jañ, u keñ wu-zon̄hon̄ a ki-ima, nii ne tii u bi jañ via duu jon̄ u Din̄-zon̄-la a pi nii-la si sulu chiche.”

*Yesu ari Belizibul*

*Mat. 12.22-30, 43-45;*

*Maak 3.20-27*

<sup>14</sup> Baal kubala ma ne fa kō Yesu teen̄. Jin̄-bomun̄ kenu a ñaa u tañ. Nii ne Yesu ñaa jin̄-bon̄-la lii baal-la le, ka baal-la wuo bubul wiaa. Ni-dañ-la si he dime a na wii-la, u ñaaba wu-kpun̄kpere. <sup>15</sup> Nii ne niaa

don̄sun̄ ma si di jin̄-bon̄hon̄ kuoro ba sii yie Belizibul ne pu dolun̄ duu kikiri jin̄-bon̄hon̄ nii. <sup>16</sup> Niaa don̄sun̄ ma chiche di ba magisu. Nii ne ba si duu ñaa wu-magilin̄ di ba na a jin̄ ari Wia dolun̄ ne u kaa ññaa nii. <sup>17</sup> Yesu wuo jin̄ ba tuobiinaa a bula piba a bul, “Di tañ niaa ne he dime a bi nii-bala kene, ba tañ jañ tel. Di naan̄biirin̄ ma ne bi nii-bala kene, ba dia jañ tel. <sup>18</sup> Di Sitaani niaa ne bi nii-bala kene, ba tañ bi jañ wuo chin̄.” <sup>19</sup> Nii ne Yesu bira bula piba, “Ma bula ari Belizibul ne pimi dolun̄ mi kaa kiri jin̄-bon̄hon̄ niaa le. Kubee ne saa jon̄ dolun̄ pi niaa deen̄ba sii to ma harin̄ ba ma kikiri jin̄-bon̄hon̄ niaa le? Niaa deen̄ba titia daga ari maa nyia ne. Ba jima ari Sitaani bi u titia wuo guraa yuo. <sup>20</sup> Wia dolun̄ ne mi kaa kiri jin̄-bon̄hon̄ niaa le. Wiin̄ deen̄ ne daga ari Wia kuorii-la paala kō ma teen̄ ne. <sup>21</sup> Di ni-duon̄ ne vō u tuonun̄ a hon̄ pō u dia, nuu-kala bi u dia kuñ-kala wuo juu jon̄. <sup>22</sup> Ama nii-la ma si keñ dolun̄ a kiiu duu wuo ku keñ baal-la, an̄ keñ u tuonun̄ kala u si kaa pō u kiaa a kaa laa u teen̄, u jañ wuo paa u kialin̄ kala kaa viiri. <sup>23</sup> Nuu-kala si bi mi nuu ñaa, u lii mi harin̄ ne. Nii-la ma kala si bi mi le pe di la kiri kiaa hihe don̄ le, u kaa pisa tita ne.”

<sup>24</sup> Nii ne Yesu bira bula pi niaa a bul, “Di jin̄-bon̄ ne lii nuu le, u yie golle tin̄tee-hilin̄ le a chiche di-wiesin̄.



Di u ne bi lee na, u yie bul u titia le a bul, 'Mi jan miira mu lee-la mi si lia.' <sup>25</sup> U jan miira mumu, di disinnij tuo dia-la le, ba wasa u kala zon. <sup>26</sup> Nii ne u jan miira lii, a ken jin-bonhon balipe, kialin si bomo kiuu, ba ma ku juu a peu le. Nii harin le ne baal-la yie kperi a kii bunbun-la."

*Nii la si jan naa a ken tuoturon kinken*

<sup>27</sup> Yesu si bul nii dere, di haal kubala he ni-dan-la tuon a faasa bula pu a bul, "Wia jan pe haal-la si lulun le a diesin ari yilin. U jan lejan duu tuon tore." <sup>28</sup> Nii ne Yesu miira bula pu a bul, "Nii-la si nii Wia nin wiaa a tutoba, u-na tiina tuon ne jan tore."

*Nialin che di Yesu naa wu-magilaa*

*Mat. 12.38-42*

<sup>29</sup> Nialin si golli Yesu nii, u bula piba a bul, "Bee na, jinin naa deenba bomo ne. Ba si di mi naa wu-magilin di ba na a jin ari mi dol-la lii Wia teen ne. Ai, mi bi naa. Wu-magilin ma sii che, ma bi jan wuo na, see wu-magil-la Wia fa si naa a tige Jona le. <sup>30</sup> Wia jon Jona a kenu naa wu-magilin Ninive naa teen. Nii titia ne u jan jon mi-na Nuhuobiine Bie ma a kenmi naa wu-magilin jinin naa teen."

<sup>31</sup> Nii ne Yesu bira bul, "Haal kubala ne fa he dime. U dii kuoron tintee kubala le baa yire Siiba. U sii lii u jan le a mu di-bolii duu jegile

nii kuoru kubala wu-jimin. U yirin ne fa Solomon. U fa ken wu-jimin kinken kinken. Sariya che-diilin, haal-la jan sii a jon cheerin a pi jinin naa worun. Mi jan bula pima ari nuu ne he dime, u yuga a kii Solomon, ka ma bi sei di ma jegile nii u wiaa. <sup>32</sup> Sariya che-diilin, Ninive naa ma jan sii a jon cheerin a pima worun. Bua-la le Jona ma fa si mu bul Wia wiaa pi Ninive naa, ba birima lii ba haacheba le ne an to Wia. Mi jan bula pima ari nuu ne he ma tuon a yuga kii Jona, ka ma bi sei di ma jegile nii u wiaa."

*Yesu dage naa a tige pulun-la le*

*Mat. 5.15; 6.22-23*

<sup>33</sup> Nii ne Yesu bira dage naa a bul, "Di n ne nyige chaanin aa che di pulumun he dia tuon, n bi jan ken kua kere. N bira bi jan jon gbanja ma a chu to. N yie jon dan kun nyun ne, di nuu-kala ne ku juu n dia, duu wuo na pulumun a ku juu diala. <sup>34</sup> N siaa ne naa n yaraa pulumun. Di n siaa ne zomo, n yaraa kala ken pulumun ne, ama di n siaa ne bi zon, n yaraa kala he birimin tuon ne. <sup>35</sup> Ma po di pulun-la ma si kene si birimin birimu. <sup>36</sup> Di n yaraa kala ne ken pulumun an ka n lee-kala bi birimin kene, u jan chaane lee-kala, ari chaanin si yie chaane nii."

*Yesu bul Farisii tinjaa ari Wia teniḡ kerichiba teen woruḡ*

*Mat. 23.1-36; Maak 12.38-40*

<sup>37</sup> Yesu si bul wiaa deenba dɛɛɛ, Farisii tiina kubala yiru duu kɔ u dia a dii kudiilee. Nii nɛ Yesu mu hɔḡ duu dii kudiile-la. U bi liiḡ sɔmɔ aḡ didii kudiile-la.

<sup>38</sup> Farisii tiina-la si na nii, u ḡaau wu-kpunḡkperɛ. <sup>39</sup> Nii nɛ la Tiina Yesu bula pu a bul, “Ma-na Farisii tinjaa, ma yie chɛɛɛ ma gbansin ari ma nyunyualuḡ hariḡ woruḡ di ba zɔḡ aḡ bi ba tuɔḡ ka tiisi, ka ba tuɔḡ kala birisi. Ma nage nyunyualuḡ ari gbansin deenba nɛ. Ma yaraa nɛ zɔmɔ, ama ma tuɔḡ lɛ ma kɛḡ yaribierin ari tuɔ-bɔmuḡ. <sup>40</sup> Ma ḡaa ni-yaaraa nɛ. Wia-la si ḡaa ma hariḡ, u nɛ ḡaa ma tuɔḡ maa. <sup>41</sup> Di ma nii chɛ di ma tuɔḡ pullɛ, má kɛḡ ma tuɔḡ a cho sum-moo a fifába nennige.

<sup>42</sup> Ma Farisii tinjaa, ma jaḡ na hɛɛḡ. Ku-biisin, ma yie kaa kpa a lereɛ fii fii, a joḡ lerin kubala a pi Wia. Di ma nɛ jaa pipaari-la suɔra si sima ari pipaari-la suɔra si bi sin ari pipaa-diilee maa, ma yie kɛḡba kaa kpa a lereɛ fii fii, a joḡ ba kuḡ-kala lerin dɔḡɔ a pi Wia, ama ma via wutitii wonḡbiin a bi Wia cho. U maga di ma kpa a ma kialin lereɛ fii fii, a joḡ lerin kubala a pi Wia, ama u bi maga di ma via wutitii wonḡbiin.

<sup>43</sup> Ma Farisii tinjaa, ma jaḡ na hɛɛḡ. Di ma nɛ juu Wii-

chuoɛ diisin, ma yie cho ni-balaa di-hɔnuḡ nɛ. Di ma nii ḡolle yɔbɔ lɛ maa, ma yie cho di nuu-kala nɛ pima jirima a chuchuoɛma. <sup>44</sup> Ma jaḡ na hɛɛḡ kinḡen kinḡen. Ma nage vaamaa ba si kaa jɛɛɛ, di ba di tinḡeen kala mage dɔḡɔ nɛ, ka niaa bi jin aḡ vivenḡ ba nyuḡ.”

<sup>45</sup> Yesu si bul nii dɛɛɛ, di Wia teniḡ kerichi dɔḡɔ bula pu a bul, “Kuhian, ḡ si bul ḡla, ḡ tuusɛla ma nɛ.” <sup>46</sup> Nii nɛ Yesu bira bul, “Ma-na Wia teniḡ kerichiba, ma jaḡ na hɛɛḡ. Ma yie joḡ chuga a daḡ niaa hariḡ lɛ, ka ba bi wuo chuḡ. Aḡ ka ma titia bi jaḡ pɛba lɛ a laa chuga-la. <sup>47</sup> Ma jaḡ na hɛɛḡ kinḡen. Ma naabalimaba bi woruḡ ḡaa a kpu nialin fa sii bul wiaa, Wia Diḡ-zɔḡ-la doluḡ lɛ. Ma nɛ paala saa ba vaama-la. <sup>48</sup> Ma nɛ sei wialin ma naabalimaba si ḡaa a bul di ba ḡaa wutitii nɛ. Ba kpu nialin fa sii bul wiaa, Wia Diḡ-zɔḡ-la doluḡ lɛ, ma ma nɛ saa ba vaamaa. <sup>49</sup> A tin wiin deen wiaa, ba ḡmuḡsɛ Wia teniḡ sɛmɛ dɔḡɔ ba sii yire Wia wu-jimin a bul, ‘Mi jaḡ ta nialin sii bul wiaa, Wia Diḡ-zɔḡ-la doluḡ lɛ ari mi tinḡaaraa di ba mu ba teen. Ba jaḡ kpu dɔḡsuḡ aḡ to dɔḡsuḡ naasin a dɔḡisɛba.’

<sup>50</sup> Wia jaḡ dɔḡisɛ jinin niaa a tin ba si kpu nialin fa sii bul wiaa, Wia Diḡ-zɔḡ-la doluḡ lɛ a lii dunia di-suomuḡ, <sup>51</sup> a chinḡ bua-la lɛ ba si kpu Ebil a kaa mu yi bua-la lɛ ba si

kpu Zakaraya. Ba kpuu Wia-dia tuon̄ ne a kpage koru-la nyun̄ ba si yie nyige pusun̄ pipi Wia ne. Wutitii, mi jan̄ bula pima, Wia jan̄ dogise jin̄ niaa kala kin̄ken̄ a tin̄ wiaa deen̄ba kala le. <sup>52</sup> Ma Wia ten̄in̄ kerichiba, ma ma jan̄ na heen̄ kin̄ken̄. Ma to won̄bii-la nialin̄ sii to a yi lee-la ba si jan̄ na wu-jimin̄ ne. Ma titia bi che di ma to won̄biin̄ deen̄, an̄ pō di nialin̄ ma sii walime di ba to, di ba sí to.”

<sup>53</sup> Yesu si lii lee-la, Wia ten̄in̄ kerichiba-la ari Farisii tin̄ŋa-la suomo bul wiaa a lilii u hariŋ a piesu wiaa yuge. <sup>54</sup> Baa walime di ba ber̄e kenu di u ne bul wii chei.

## 12

*Yesu bula pi niaa di ba sí kan̄fugi tin̄ŋaa naga*

*Mat. 10.26-27*

<sup>1</sup> Nialin̄ fa si kō Yesu teen̄, ba yi niaa bui bui bui a yiyigi don̄o. Nii ne Yesu laa sipaan̄ a bula pi u haritooro a bul, “Má pō ma titia le ari Farisii tin̄ŋaa. Ba ŋaa kan̄fugi timma ne. Ba nage si-burun̄ ne. Di ŋ ne jon̄o he kun̄-kala le, u yie puore ne. <sup>2</sup> Wii-kala si faa, u jan̄ ku lii pulumun̄, niaa ma jan̄ nii wii-la si ŋaa wu-faali. <sup>3</sup> Wii-kala maa ŋ si bul birimin̄ tuon̄, ba jan̄ niu pulumun̄ le. Wii-kala bira ŋ si mun̄so bul a he nuu dun̄dun̄ digilin̄ le dia tuon̄, ba jan̄ faasa heele bulu lusun̄ nyun̄.”

*Nii-la si maga di ŋ fá*

*Mat. 10.28-33; 12.32; 10.19-20*

<sup>4</sup> Nii ne Yesu bira bul, “Mi nan̄don̄sun̄, mi jan̄ bula pima, ma sí nialin̄ si jan̄ wuo kpu ma yaraa le fá. Ba bira bi jan̄ wuo ŋaa wu-bon̄ kala ma le. <sup>5</sup> Mi jan̄ dagema nii-la si maga di ma fá. Má fá Wia. U ne jan̄ wuo kpuma an̄ bira ken̄ dolun̄ duu wuo jon̄ma he Wia nyinin̄ tuon̄. Mi bulaa pima, ma fifáu. <sup>6</sup> Zaarikokobiisin̄ ban̄on̄ dee ba yie jon̄o yalle kōbu balia koo? Ama Wia bi ba tuon̄ kubala ma wiaa yua. <sup>7</sup> Wia paala jin̄ ma nyu-punaa kala ma niin̄ ne. Nii wiaa, ma sí leŋe di fawullun̄ ken̄ma. Ma ne paala kii zaarikokobiisin̄ a yuge.

<sup>8</sup> Mi bulaa pima, nii-la kala si jan̄ wuo bul niaa tuon̄ ari u ŋaa mi nuu ne, mi-na Nuhuobiine Bie ma jan̄ bul ŋii a tigeu le Wia tin̄daaraa sipaan̄. <sup>9</sup> Ama nii-la kala si viami niaa tuon̄, mi-na Nuhuobiine Bie ma jan̄ viau Wia tin̄daaraa sipaan̄. <sup>10</sup> Nii-la kala si bul wu-bon̄on̄o a mu tige mi-na Nuhuobiine Bie le, Wia jan̄ jon̄o cheu, ama nii-la kala si tuuse Wia Din̄-zon̄-la jon̄on̄o, Wia bi jan̄ jon̄o che u tiina.

<sup>11</sup> Di ba ne ken̄ma kaa juu Wii-chuole diisin̄ koo kuoro ari kuhiasin̄ teen̄ di ba dii ma sariya, ma sí leŋe di ma boisin̄ jon̄ ŋii ma si jan̄ ŋaa a laa ma titia, koo wii-na kala ma si jan̄ bul. <sup>12</sup> Bua-

la titia le Wia Din-zon-la jan dagema wii-la ma si jan bul.”

*Yesu mage namaga a tige bagi-daari tuolun tiina le*

<sup>13</sup> Yesu fa si bul wiaa pipi ni-dan-la nii, baal kubala lii ba tuon a bula pu a bul, “Mi kuhian, la nyimma suba an ka kiaa. Mii sulun di n bula pi mi naanbie duu kaa kpaapimi.” <sup>14</sup> Nii ne Yesu bula pu a bul, “Mi nanjon, mi tinjtimii dee di mi laa ma sariya dii pima koo di mi ken ma kiaa kaa kpaama.” <sup>15</sup> Nii ne u bira bula pi niaa a bul, “Ma fiele ma siaa a si tuolunun ken. Di nuhuobiine ne ken kiaa kinken, kialin bi jan wuo len duu ken miisin.”

<sup>16</sup> Nii ne Yesu bira mage namaga a bul, “Baal kubala ne fa he dime a ken kiaa worun a bil u бага. U bagala kiaa wase worun. <sup>17</sup> Nii ne u bibiine u tuon le a bul, ‘Ee ne mi jan naa? Mi bira bi lerin kene di mi tuole mi kiaa.’ <sup>18</sup> Nii ne u bul, ‘Mi jan nmoo mi virisin deenba mi si kene a ta an wasa saa ku-balaa. Mi jan jon mi kuorimiaa ari mi kiaa kala a tuole dime <sup>19</sup> an bula pi mi titia a bul, Mi tuole kiaa yuge ne. Mi jan dii jisi ari jisi. Mina jan ta jia a dii kiaa ari tuotorun.’ <sup>20</sup> Nii ne Wia bula pu, ‘Ni-yaari, titanin deen mi jan len di n suu. Kialin saa n si che bil, kubee ne jan dii?’” <sup>21</sup> Nii ne Yesu bula pi niaa a bul, “Nii-la kala si yie che kiaa bil u titia le an bi kuoru

naa Wia teen, u nage baala deen ne.”

*Yesu dage niaa di ba si ba titia walimu a tige kudiilee ari gennin wiaa le*

*Mat. 6.25-34*

<sup>22</sup> Nii wiaa Yesu bula pi u haritooroo a bul, “Mi bulaa pima, ma si ma titia walimu a tige kudiile-la ma si jan dii a ken dolun, koo ma si ma titia ma walimu a tige genni-la le ma sii che di ma lilaale. <sup>23</sup> Ma miisin ne kii kudiilee, ma yaraa ma kii gennin. <sup>24</sup> Ma bee na diibiisin, ba bi pere, ba bi kiaa ka tuole virisin le, ka Wia pipiba kudiilee. Ma ne paala ken nyuurun a kii diibiisin. <sup>25</sup> Di ma ni walime ma titia kiaa deenba wiaa, bua-la le ma miisin si jan dere, u bi jan ken tapul-bala ma pe pima. <sup>26</sup> Di ma ne saa bi tapul-bala ma wuo kaa pe ma miisin le tapulila ma ma si jan suu, bee ne saa tii kiaa deenba wiaa wiwalimema? <sup>27</sup> Ma bee na tii-filaa. Ba bi tin, ba bi gennin ma yere a lilaale, ama ba zomwo worun. Kuoru kubala ne fa he dime. Baa yire Solomon. U fa si he u miisin le, u ken kiaa ne worun. Ama u gennin fa bi zomwo mage tii-filaa deenba. <sup>28</sup> Wia ne yie naa yan nyu a waa a zon, ka u bi dieni an hil. Di u ne hila, ba yie nyige nyinin. Di Wia ne wuo naa yan zon nii, bee ne tii ma bibiine ari u bi jan wuo pima kudiilee ari gennin? Ma yarida bi yuge.

29 Ma sí leŋe di ma walime ma titia kudiile-la ma si jaŋ dii ari ku-la ma si jaŋ nyua wiaa. 30 Nialin si bi Wia jin dunia deen le, ba ne yie walima chiche kiaa deenba. Ma Nyimma jima ari ma che kiaa deenba ne. 31 Nii wiaa, má laa sipaan a che kialin si he Wia kuorii-la tuon. U jaŋ jon kun-kala si ka a pe pima.”

*Nii la si jaŋ ŋaa a keŋ kiaa Wia-jaŋ le*

*Mat. 6.19-21*

32 Nii ne Yesu bira bul, “Ma nialin síi tomi, ma bi yuge. Ma sí leŋe di fawulun keŋma. Ma Nyimma tuon tɔre ne duu jon kuorii-la pima. 33 Má jon ma kiaa kala yalle a jon morobie-la a pi summoo. Má che kialin si bi chei a bil ma titia le, a jon ma kiaa bil Wia-jaŋ le. Dime ba bi jaŋ dɛre, gaaru kala bi jaŋ wuo paaba dime, pugumaa ma bi jaŋ diiba. 34 Ma tuobiinaa jaŋ pin lee-la ma kiaa si he.

35 Má voo ma damerisin worun ma tinjin le a nyige ma chaanaa di ba chaane, di ma ŋaa siri ari wii-na kala si jaŋ ŋaama le. 36 Má len di ma nage dia tintinni-zonŋoo. Di ba kuhian mu ha-jaari gbiele an ko, ba hono gberu. Ba ŋaa siri di bua-la le u si miira ko a du boro, ba jaŋ suro pu lima lima. 37 Di ba kuhian ne miira ko a na di ba weye a ŋaa siri, ba tuon jaŋ tɔre. Wutitii, mi jaŋ bula pima, u jaŋ voo u damere

worun an ŋaa di u tintinna-la hon, a jon kudiilee piba di ba dii. 38 Duu ne miira ko tita-siesee maa, koo duu ne paala kieli nii maa, ba tuon jaŋ tɔre worun. 39 Di nuu ne fa jima bua-la le gaara si jaŋ ku gaa u kiaa u dia le, u fa jaŋ hono po u dia. Di u ne weye, u bi jaŋ sei di gaara juu gaa u kiaa. Má liisi wiin deen. 40 Má ma saa ŋaa siri, bee wiaa, mi-na Nuhuobiine Bie jaŋ ko bua-la le ma si buu yiele.”

*Nii-la si ŋaa tintinni-titii ari nii-la si bi tintinni-titii ŋaa*

*Mat. 24.45-51*

41 Nii ne Piita piese Yesu a bul, “La Tiina, ŋ mage namaga deen pipila ne koo ŋ bula pi nuu-kala nee?” 42 Nii ne la Tiina Yesu miira pieseba a bul, “Kube ne saa ŋaa tintinni-titii-la si jin wiaa? U ne nii-la u kuhian si yie liise duu biben u dia, an pe pipi u tintinni-donsun ma kudiilee. 43 Di tintinna-la ŋaa wialin u kuhian si dagu duu ŋaa, u tuon jaŋ tɔre bua-la le u kuhian-la si jaŋ miira ko. 44 Wutitii mi bulaa pima, u kuhian-la jaŋ jon u kiaa kala he tintinna deen nisij le duu biben. 45 Ama di tintinni-la ne bula pi u titia ari u kuhian-la jaŋ dieni ne an suomo ŋmuŋmoo u tintinni-donsu-la, baalaa ari haalaa kala, a he dono le, an faasa didii kudiilee a nyunyua sinin bubugi, 46 duu ŋaa nii, u bi siri ŋaa gberu u kuhian-la. U kuhian-la jaŋ



keninj mu to dia, η bi janj wuo lii, see di η tinj chinj-la kala ba si kere pinj.”

## 13

*Yesu bula pi niaa di ba birima lii ba haacheba le*

<sup>1</sup> Bua-la le Yesu fa si bul wiaa pipi niaa, nialinj dɔɔnsun fa si he dime bul wiaa pu a mu tige Paalit le, u fa si kpu Galilii tinjaa dɔɔnsun nii. U kpuba bua-la le ba sii kpu pusun pipi Wia ne. <sup>2</sup> Nii ne Yesu pieseba a bul, “Ma biina ari Galilii tinjaa deenba Paalit si kpua ne ηaa haache a kii Galilii tinjaa dɔɔnsun kalaa? <sup>3</sup> Ai, nii dee. Di ma ne bi birima lii ma haacheba le, ma kala janj suu ari niaa deenba si suu nii. <sup>4</sup> Nialinj fii ari chori ma fa si he dime, dii-duduonj tele ηmooba kpu Siloom le. Ma biina ari ba ne ηaa haache a kii nialinj dɔɔnsun kala fa si he Jerusalem le koo? <sup>5</sup> Ai, nii dee. Mi bulaa pima, di ma kala bi birima lii ma haacheba le, ma kala janj suu niaa deenba fa si suu nii.”

*Yesu mage namaga a tige tia-la si bi neη le*

<sup>6</sup> Nii ne Yesu mage namaga a pi niaa a bul, “Baal kubala ne fa he dime. U fa kenj tutogo ne u baga le. Tutogola neninj yi, u mu a chiche neneε tutogo-la le. U bi neη kala na. <sup>7</sup> Nii ne u bula pi u bagi-paara a bul, ‘Jisinj batori ne ηla tia-la si bi neneε, u maga di η kere ta ne. U

china to lerinj ne.’ <sup>8</sup> Nii ne bagi-paari-la bula pu a bul, ‘Mi kuhianj, lenj duu chinj jina deenj ma le di la na. Mi janj huro golli u bubuonj a he nabininj. <sup>9</sup> Di u ne neneε harinj jina-la le, u janj zɔɔj. Di u ne bi neneε, kere ta.’ ”

*Yesu vaare guma tiina*

<sup>10</sup> Che-wiesii-la cheenj kubala Yesu juu Wii-chuole dia a didage niaa Wia wiaa. <sup>11</sup> Di haal kubala he dime. Jinj-bonj kubala ne kenu a ηaa uu wiile. U wiile nii a yi jisinj fii ari chori. U fa kenu bori ne. U bi wuo tienaa chinj. <sup>12</sup> Yesu si na haal-la, u yiru a bul, “Haal, η duoro ne. N nyanyalii-la lii-η le ne.” <sup>13</sup> Nii ne u jonj u nisaa a danj haal-la le. Haal-la guu tiene u titia a denne Wia. <sup>14</sup> Nii ne Wii-chuole dia-la kuhianj na baaninj ari Yesu si vaare niaa che-wiesii-la cheenj. U bula pi nialinj a bul, “Tapulaa balidu ne he dime. U maga di la tinj tintinjaa tapulaa deenba pege di ba vaarema, ama che-wiesii-la cheenj dee.” <sup>15</sup> Nii ne la Tiina Yesu bula piba a bul, “Ma kanfugi tinjaa deenba, ma tuonj kubee ne bi neenj koo u kakumo puro kaa lii u nyunyua liinj che-wiesii-la cheenj? <sup>16</sup> Haala deenj ηaa Abiraham doho nuu ne. Sitaani kenu voo bil jisinj fii ari chori. U saa bi maga di la laau ta che-wiesii-la cheenj koo?” <sup>17</sup> U si bul nii, hiisinj kenj u diɔɔmɔ-la kala, anj ka nialinj ku-kaanaa tuonj

tore ari Yesu si n̄aa wu-  
kpuṅkpere-la.

*Yesu mage namaga a mu  
tixe ku-doho kubala le baa  
yire masitad*

*Mat. 13.31-32; Maak 4.30-  
32*

<sup>18</sup> N̄ii ne Yesu piese nialin̄ a  
bul, “Bee kuṅ ne mi jaṅ keṅ  
Wia kuorii-la kaa magise?  
Ee ne Wia kuorii-la nage?  
<sup>19</sup> U nage ku-doho kubala ba  
kaa yire masitad ne. Baal  
kubala joṅo duu u baga le. U  
nyu a waa a birime tia. N̄ii  
ne diibiisin̄ ku sua ba dellin̄  
u naakelee le.”

*Yesu mage namaga a mu  
tixe si-burun̄ le*

*Mat. 13.33*

<sup>20</sup> N̄ii ne Yesu bira pieseba  
a bul, “Bee kuṅ ne mi bira  
jaṅ keṅ Wia kuorii-la a kaa  
magise? <sup>21</sup> Wia kuorii-la  
nage si-burun̄ ba si kaa he  
munun̄ le, u sii a puore ne.  
Haala joṅ munun̄ a he tasi-  
gban̄a tuon̄, a joṅ si-burun̄  
a kaa kuosi. U dieni mua,  
ka muṅ-la sii su tasi-gban̄a-  
la kala.”

*Yesu bula pi niaa di ba to  
boi-la si bi jal*

*Mat. 7.13-14, 21-23*

<sup>22</sup> N̄ii ne Yesu mu  
Jerusalem diirin̄. U sii mu  
n̄ii, u golle ta-balaa ari ta-  
biisin̄ a didage niaa. <sup>23</sup> N̄ii ne  
nuu kubala ku piesu a bul,  
“La Tiina, nialin̄ Wia si laa  
ta, ba jaṅ n̄aa niaa muapilii  
dun̄dun̄ koo?” <sup>24</sup> N̄ii ne Yesu  
bula pi niaa a bul, “Di ma n̄i  
che di ma juu Wia kuorii-  
la tuon̄, u maga ari ma to

boi-la si bi jal ne. Má he  
dolon̄ a to boi-la a juu. Mi  
jaṅ bula pima, niaa jaṅ yuge  
a wiwalime di ba to lee-la  
juu aṅ walima lol. <sup>25</sup> Tapulii  
kubala dia-la tiina jaṅ sii a  
keṅ u boin̄ to. Ka n̄-na jaṅ  
he harin̄ a suomo du boro-  
la a bul, ‘La Tiina, keṅ boi-  
la suri a pila.’ N̄ii ne u jaṅ  
bula pima a bul, ‘Mi bi lee-  
la ma si lia jin̄.’ <sup>26</sup> Ma ma  
jaṅ bula pu a bul, ‘La di ma  
kala ne fa hon̄ di-bala a dii  
kiaa. N̄ dagela n̄ wiaa la  
jaṅ ma le.’ <sup>27</sup> N̄ii ne u jaṅ  
bira bula pima a bul, ‘Mi  
bi lee-la ma si lia jin̄. Má  
suusa lii mi teen̄. Ma kala  
n̄aa ni-bon̄on̄o ne.’ <sup>28</sup> Tapulii  
kubala ma jaṅ na Abiraham  
ari Aizik ari Jekob, ari nialin̄  
kala sii bul wiaa, Wia Din̄-  
zon̄-la dolon̄ le di ba hon̄  
Wia kuorii-la tuon̄, ka ma-na  
jaṅ he jeen̄ harin̄ a na baanin̄  
a yiyel aṅ didin̄ ma nyilaa,  
aṅ bi wuo juu. <sup>29</sup> Niaa jaṅ  
lii dunia seme-na kala a  
hon̄ Wia kuorii-la tuon̄ aa  
gbieli. <sup>30</sup> Ama kuhiasin̄ yuga  
a jaṅ ku birime han̄biisin̄.  
Han̄biisin̄ yuga a ma jaṅ ku  
birime kuhiasin̄.”

*Yesu cho Jerusalem niaa*

*Mat. 23.37-39*

<sup>31</sup> Bua-la titia le ne Farisii  
tin̄n̄aa don̄sun̄ ko Yesu teen̄  
a bula pu a bul, “Lii daha,  
bee wiaa Herod̄ ka che duu  
kpuṅ ne.” <sup>32</sup> N̄ii ne Yesu bula  
piba a bul, “Má mu bula pi  
nyinyiseri-la, mi jaṅ kiri jin̄-  
bon̄on̄o aṅ vaare niaa jin̄in̄  
ari chie. Chieto mi jaṅ tin̄  
mi tin̄tin̄n̄aa dere. <sup>33</sup> Ari n̄ii



kala, u maga di mi ha he mi wonbiiŋ ɛ jiniŋ ari chie ari chieto kala. U bi wonbii kene di ba kpu nialiŋ sii bul wiaa, Wia Diŋ-zoŋ-la doluŋ ɛ lee-kala see Jerusalem ɛ. <sup>34</sup> Ma Jerusalem niaa, ma yie kpu nialiŋ sii bul wiaa, Wia Diŋ-zoŋ-la doluŋ ɛ, a joŋ tabiaa a yage tinɗaara-la Wia si tima di ba ko ma teenj. Naanjiŋ yuga ne mi fa cho di mi chu to ma niaa kala, ari jimŋ si yie chu to u biiriŋ nii, ka ma bi seye. <sup>35</sup> Bee na, Wia jaŋ lenj ma jaŋ pima. Ma bira bi jaŋ nami, see bua-la ɛ ma si jaŋ chuɔlemi a bul, 'Wia jaŋ pe nii-la sii ko la Tiina Wia doluŋ ɛ.' "

## 14

*Yesu vaare baala sii wiilu*

<sup>1</sup> Che-wiesii-la chee kubala, Yesu mu duu dii kudiilee Farisii tinjaa kuhianj kubala dia ɛ. Nii ne niaa faasa bibenu woruŋ. <sup>2</sup> Di baal kubala ne he dime a ko Yesu teenj. U yaraa kala fa nmere ne. <sup>3</sup> Nii ne Yesu piесе Wia tenj kerichiba ari Farisii tinjaa a bul, "U kenj wonbiiŋ nee di la vaare nyanyal tinjaa che-wiesii-la cheeŋ koo?" <sup>4</sup> Ba bi wii-kala bula. Nii ne Yesu kenj baalla a vaaru aŋ tau u mu dia. <sup>5</sup> Nii ne u bira piесеba a bul, "Di η bie koo η neeŋ ne tel viliŋ ɛ che-wiesii-la cheeŋ, ma tuoŋ kubee ne bi jaŋ lere liisu?" <sup>6</sup> Ba bi wii-kala wuo bula pu.

*Yesu bula pi niaa di ba kenj ba titia muuri, a kenj zile, a huhuore niaa*

<sup>7</sup> Yesu si beŋ nialiŋ ba si yira baa juu dia nii, u na di ba juu chiche ba hoŋ ni-balaa di-honoo. Nii ne u mage namaga a piba a bul, <sup>8</sup> "Di nuu ne yiriŋ di η ko u ha-jaari gbiele a dii kudiilee, si mu bagisa joŋ ni-balaa di-honoŋ a hoŋ. Dia tiina jaŋ wuo yire nuu ma si kiŋj bira duu hoŋ dime. <sup>9</sup> Nii-la si yirema jaŋ wuo ku bula piŋ a bul, 'Suusa mu, ka di η doŋo tiina hoŋ η di-honoŋ.' Nii ne η jaŋ sii a mu hoŋ ni-biisiŋ di-honoŋ. Hiisiŋ jaŋ kenŋj woruŋ. <sup>10</sup> Nii ne saa di ba ne yiriŋ di η ku dii kudiilee, di η ne mua, hoŋ ni-biisiŋ di-honoŋ. Di nii-la si yiriŋ ne ko nanj, u jaŋ bula piŋ a bul, 'Mi nanɗoŋ, sii hoŋ di-hoŋ-zomuŋ.' U ne ηaa nii, u jaŋ piŋ jirima nialiŋ kala si he dime teenj. <sup>11</sup> Nii-la kala sii bigisi u titia ɛ, Wia jaŋ kenu muuri. Ka nii-la ma si kenj u titia muuri, Wia jaŋ ηaa duu yuge." <sup>12</sup> Nii ne Yesu bula pi nii-la si yiru duu ku dii kudiilee a bul, "Di η ne ηaa kudiilee, si η nanɗoŋsuŋ koo η naanjiiriŋ yiru, si η dia niaa koo η doŋsuŋ tinjaa si kenj kiaa ma yiru. Ba ma jaŋ wuo yiriŋ maachie di η ku dii kudiilee ba teenj a tinj η chimiŋ. <sup>13</sup> Di η nii yire niaa di ba ku gbieli gbiele a dii kudiilee, yire summoo ari nialiŋ naasiŋ koo nisaa si suba ari nyulimaa kala. <sup>14</sup> Di

η ne ηaa ηii, Wia ma jan pen λε, bee wiaa ba-na bi jan wuo tin η chimin. Wia jan tin η chimin tapulii-la tuo-pul tinηaa si jan sii suun λε.”

*Yesu mage namaga a tige baal-la si ηaa ba gbieli gbiele λε*

*Mat. 22.1-10*

<sup>15</sup> Yesu si bul wiin deen, ηii ne nialin si honoo dii kialin dono bula pi Yesu a bul, “Nialin si jan dii kiaa Wia kuorii-la tuon, ba tuon jan tere.”

<sup>16</sup> Nii ne Yesu mage namaga a bul, “Baal kubala ne fa he dime. U ηaa ba gbieli gbieli-bal. Nii ne u yire niaa yuge di ba ko di ba gbieli.

<sup>17</sup> Gbiele-la si ηaa siri, u tin u tintinna duu mu bula pi nialin u si yira ari ba ηaa siri ne di ba gbieli gbiele-la. <sup>18</sup> U si mu yireba, ba kala via. Nibunbun si duu yoo бага ne a chiche duu mu na, ηii wiaa u bi jan wuo ko. <sup>19</sup> Dono ma si duu ma yoo ne-bellin fi ne a ma kaa lii duu kaa mu pere na. Nii wiaa u ma bi jan wuo ko. <sup>20</sup> Dono tiina ma si di leele ne u jaa haala. A tin ηii wiaa u ma bi jan wuo ko. <sup>21</sup> Nii ne tintinni-la miira mu bula pi u kuhian-la. U si nii ηii, u baanin sii kinken. Nii ne u bira bula pu a bul, ‘Lii mu wonbiin niin lima ari jan tuon wonbii-biisin a yire summoo ari gberikee ari nyulimaa, ari nialin naasin ari nisaa si suba.’ <sup>22</sup> Lima lima di baal-la u si tima lia a yire nialin ba ku juu, ka u juu bula pi u kuhian-la

ari nialin ko ne, ama ba ha bi yuge. <sup>23</sup> Nii ne baal-la bira bula pi u tintinni-la a bul, ‘Bira lii bagisin wonbiee ari wonbii-biisin kala a yire niaa di ba ku juu di mi dia su.’ <sup>24</sup> Mi jan bula pima ari nialin mi si yira, ba kun-kala bi jan dii kudiilee deenba.”

*Wii-la η si jan ηaa an-na ku ηaa Yesu haritooro*

*Mat. 10.37-38*

<sup>25</sup> Yesu fa sii mu wonbiin ηii, ni-dan to u harin. Nii ne u daase harin a bula piba a bul, <sup>26</sup> “Di nuu-kala ne ko mi teen, u bi jan wuo ηaa mi haritooro, see u bere u nyimma ari u naan ari u haala ari u biirin ari u naanbiirin ari u titia wu-ηaalaa kala. <sup>27</sup> Nii-la kala si bi u titia daagesee baase an to mi harin, u bi maga duu ηaa mi haritooro. <sup>28</sup> Di ma kun nii che di η saa dii-dudun, η jan laa sipaan hon a biine a na di moribiee maga di η kaa saa dia-la dere. <sup>29</sup> Di η ne bi ηii ηaa an suomo bil dia-la gertine an bira bi moribiee kene di η saa dia-la dere, niaa jan na wii-la η si ηaa. Ba jan mumomun. <sup>30</sup> Ba jan bul, ‘Baala deen suomo duu saa dia ne an bi wuo saa dere.’ ”

<sup>31</sup> Nii ne Yesu bira mage namaga dono a bul, “Kuoro ne sie a ken niaa bui fi a kaa mu duu yuo u kuoru dono. Ka kuoru-la ma ken niaa bui mara ne. U jan laa sipaan hon a biina na duu ne

jan wuo yuo dii kuoru-la an-na mu yuou. <sup>32</sup> Di u ne bi jan wuo dii kuoru-la, u jan tinjindaaraa di ba mu chen kuoru-la donjo di ba he dibolii, a len di ba sulu di ba sinj." <sup>33</sup> Nii ne Yesu bira bula piba a bul, "Nii titia ne ma kun-kala bi jan wuo nja mi haritooro, see n via kun-kala n si kene ta.

*Yesu bul wiaa a tige yisin le*

*Mat. 5.13; Maak 9.50*

<sup>34</sup> Yisinj sima, ama di u ne sebise, n bira bi jan wuo nja duu sinj. <sup>35</sup> N bira bi jan wuo jonjo he baga le duu len di kiaa wase. U bira bi nyuurun kala kene. Ba yie jonjo yuo ta ne. Ma digilaa tinjaa, ma wuoli ma digilaa a nii wiaa deenba."

## 15

*Yesu mage namaga a tige piesi-la si lele le*

*Mat. 18.12-14*

<sup>1</sup> Tapulii kubala lanpoo lilaaraa ari haache diiree yuga ko Yesu teen di ba jegile nii u wiaa. <sup>2</sup> Nii ne Farisii tinjaa ari Wia tenin kerichiba suomo gugurime wiaa a bul, "Baala deen leje haache diiree kuko u teen ne an pe len ba di ba kala didii kiaa."

<sup>3</sup> Yesu si nii nii, u mage namaga piba a bul, <sup>4</sup> "Baal kubala ne he dime a kenj piesee zolo. Nii ne ba tuon donjo lel. U lenj piesee mahin banese ari fii ari nibi-la ta girin tuon an gollo chiche pie-lelii-la a bul di see duu

che nau. <sup>5</sup> U si nau, u jonjo baase a kaa mu dia. <sup>6</sup> U si kaa mu dia, u yire u nanjonsun ari u naanbiirin a bula piba, 'Ma len di la kala tuon tore. Mi na mi piesi-la si lele ne.' Ma tuon kubee ne bi jan nja wii-la baal-la si nja?"

<sup>7</sup> Yesu dage namaga-la bubun a bul, "Di haache diire kubala ma ne birima lii u haacheba le, nialin si he Wia-jan le, ba tuon jan tore. Ba tuon jan tore nia deen nyun a kii niaa mahin banese ari fii ari nibi-la si kenj tuo-pula a biine u bi maga di ba birima lii ba haacheba le.

*Haal-la moribiee si lele*

<sup>8</sup> Len la jon ari haal kubala ne he dime a kenj selime moribii-biin fii. Di donjo ne lele, ee ne u jan nja? U jan nyige nyinin a tii u dia kala a ben worun see duu nau. <sup>9</sup> U si nau, u yire u tanjonsun ari u naanbiirin kala a he donjo a bula piba a bul, 'Ma len di la kala tuon tore. Mi moribii-la si lele, mi nau ne.' " <sup>10</sup> Nii ne Yesu bul, "Mi jan bula pima ari nii titia ne, di haache diire kubala ne birima lii u haacheba le, Wia tinjaaraa tuon yie tore ne."

*Yesu mage namaga a tige bile si lele le*

<sup>11</sup> Yesu bira mage namaga donjo a bul, "Baal kubala ne he dime a kenj u hanbiisin balia. Ba fa nja baalaa ne. <sup>12</sup> Nii ne ba tuon ku-bie sii mu bula pi ba nyimma a bul, 'Mi nyimma, kialin n

si jaŋ suu aŋ ka pila, joŋ mi toruŋ pimi.' Nii ne u keŋ kialinŋ kaa kpa. <sup>13</sup> U bi diene, ka ba tuoŋ ku-bie sii paa u toruŋ kala u si laa a he doŋo le, a sii mu tabolii kubala. Dime u keŋ kialinŋ kala kaa mu ŋaa wu-toonunŋ, ba kala dere. <sup>14</sup> U si dii kialinŋ kala dere nii, di losuŋ juu taŋ-la woruŋ. U che kudiilee ka. <sup>15</sup> Nii ne u mu che tintinŋaa. Taŋ-la nuu sei duu bibenŋ u toonuŋ. U keŋ u titia kaa mu mere nii-la le a didaa u toonu-la. <sup>16</sup> U sii daa toonu-la, nuu-kala buu kudiilee ka pa. U fa chiche duu dii toonu-la kudiilee. <sup>17</sup> Nii ne u biine u tuoŋ le a mu yi u nyimma le a bul, 'Mi nyimma ma keŋ tintinnaa yuge ne. Ba kala nina kudiilee didii aŋ kika, aŋ ka mi-na he daha a susuu losuŋ. <sup>18</sup> Mi jaŋ sii a miira mu mi nyimma teenŋ. Di mi ne mua, mi jaŋ bula pu, Mi nyimma, mi ŋaa haache ari Wia ariŋ kala. <sup>19</sup> U bira bi maga di mi ŋaa ŋ bii. Joŋmi di mi pe ŋ tintinnaa le di la titinŋ.' Nii ne u sii a kuko u nyimma teenŋ. <sup>20</sup> U si ko u nyimma teenŋ, u fa ha he di-bolii ne, ka u nyimma nau. Nennige kenu woruŋ. U fa mu a guoru. <sup>21</sup> Nii ne bile bula pi u nyimma a bul, 'Mi ŋaa haache ari Wia ariŋ kala. U bira bi maga di mi ŋaa ŋ bii.' <sup>22</sup> Ama u nyimma ha bula pi u tintinnaa a bul, 'Ma mu lima a joŋ gerizomuŋ a kaa ko laalu. Ma joŋ nenii-pirinŋ maa a he u

nisinŋ aŋ joŋ nenŋenŋee ma a heu. <sup>23</sup> Ma mu keŋ neŋ-la ma si nere a kaa ku kpu di la kala dii, di la tuoŋ tore. <sup>24</sup> U naga mi bie deenŋ fa suba ne aŋ sisele sii. U fa lele ne, ka la leele nau. Nii ne ba dii kiaa ari tuotoŋuŋ.'

<sup>25</sup> Bua-la le di bile malima he бага le. Nii ne u ko dia. U si ku kpage u dia, u nia di baa du kiaa a gugua. <sup>26</sup> Nii ne u yire u nyimma tintinna-la doŋo a piesu a bul, 'Bee ne baa ŋaa nii?' <sup>27</sup> Nii ne u bula pu a bul, 'Ŋ ŋaana ne miira ko. Nii ne ŋ nyimma keŋ ne-fere a kpu a pu, bee wiaa u miira ko dia ari yarifielaa ne.' <sup>28</sup> Nii ne bile malima-la na baaninŋ kinŋenŋ. U bi dia jua. U nyimma ku lii a sulu duu ku juu dia. <sup>29</sup> Bile bula pi u nyimma a bul, 'Jisinŋ deenba kala le mi faasa tinŋ tintinŋaa woruŋ a pinŋ. Mi ha bi ŋ niinŋ wiaa via che-bala maa. Bee kuŋ ne ŋ saa pimi? Ŋ ha bi buu-bie ma kaa pimi di mi kpu la di ma nanŋoŋsuŋ gbieli gbiele aŋ chanŋ. <sup>30</sup> Ka ŋ bie deen-na keŋ ŋ kiaa kala chei ha-chorumuŋ le. Ka u si miira ko dia nii, ŋ kpu ne-fere a pu.' <sup>31</sup> Nii ne bile nyimma bula pu a bul, 'Mi bii, ŋ yie he dia le bua-na kala le ne. Kuŋ-kala mi si kene, ŋ ma ne tiuu. <sup>32</sup> Ama u maga di la gbieli gbiele a lenŋ di la tuoŋ tore ne, bee wiaa u nage ŋ ŋaana deenŋ fa suba ne aŋ sii. U fa lele ne, ka la leele nau.' "

## 16

*Yesu mage namaga a tige tiɲtinni-la si keɲ wu-jimiɲ le*

<sup>1</sup> Yesu mage namaga doɲo a pi u haritooroo a bul, “Baal kubala ne fa he dime. U fa ɲaa kiaa tiina ne. U fa keɲ tiɲtinnu. U ne faa beɲ u kialij. Nii ne niaa ku bula pi kiaa tiina-la, ari u tiɲtinni-la keɲ u kialij chichei ne.

<sup>2</sup> U si nii ɲii, u mu yiru a piesu, ‘Bee na wialij mi sii nii a tigeɲ le. Leɲ di mi jij nialij ɲ si yalle mi kialij ba yoo. ɲ bira bi jaɲ wuo ɲaa mi tiɲtinnu.’ <sup>3</sup> Nii ne baal-la bul u titia le a bul, ‘Mi kuhianj ka che duu kirimi ne mi tiɲtiɲɲaa le. Bee ne mi jaɲ ɲaa? Mi bi doluɲ kene di mi pere. Mi bira bi jaɲ wuo gollo susul kiaa ma. Mi jaɲ fifa hiisij. <sup>4</sup> Di mi tiɲtiɲɲaa ne cheye, mi jij ɲii mi si jaɲ ɲaa a wuo keɲ naɲdoɲsunj, a ɲaa di ba keɲmi woruɲ ba diisij le.’

<sup>5</sup> Nii ne u yire nialij kala si dii u kuhianj chimij. U yireba kubala kubala ne. Nii ne u yire buɲbuɲ nia a piesu, ‘Chimij ɲ si dii mi kuhianj teen ɲaa baɲmeɛ ne?’ <sup>6</sup> Nii ne u si di nuuɲ ne u chimu aɲkura zolo. Nii ne tiɲtinni-la joɲ teɲ-la si dage chin-la a pu aɲ bul, ‘Teɲ-la si dage ɲ chimij ne ɲla. ɲ chimij ɲaa aɲkuraba ari nuuɲ zolo ne. Birima ɲmuɲse aɲkuraba mahij balia ari fii.’ <sup>7</sup> Nii ne u yire doɲo tiina ma a piesu, ‘Ka ɲ maa?’ U ma si di chimij u si die ɲaa

miaa botoba bui ne. Nii ne tiɲtinni-la bula pu a bul, ‘Tenij tuɲ ba ɲmuɲsa he ari ɲ chimij mage ɲla ne, ama birima ɲmuɲse boto zolo chori.’ <sup>8</sup> Nii ne kiaa tiina-la bese singirij tiina-la le a bul duu ɲaa kukeri aɲ keɲ wu-jimij u si ɲaa wu-bɔɲɲoo ɲii.” Nii ne Yesu bira bul, ‘Bee na nialij si cho dunia kiaa kinkeɲ keɲ wu-jimij a pipe doɲo le a kii nialij sii to Wia.’

<sup>9</sup> Nii ne Yesu bira bula pi u haritooro-la a bul, ‘Mi bulaa pima, ma joɲ moribiee a kaa dii naɲdoɲsunj. Di moribie-la dere, Wia jaɲ keɲma kaa mu u jaɲ a joɲ miisi-la si bi dere a pima.

<sup>10</sup> Di ɲ joɲ kiaa mua a pi nuu duu beɲ, ɲii ne u beɲ ba nyuɲ woruɲ, u tiina ma jaɲ wuo beɲ kiaa si yuga nyuɲ woruɲ. Di nuu ma ne keɲ kiaa mua aɲ bi ba nyuɲ woruɲ ka beɲ, duu ne keɲ kiaa woruɲ, u biba ma nyuɲ wuo beɲ woruɲ. <sup>11</sup> Di ɲ ne bi dunia kiaa wuo beɲ ari wutitii, nuu-kala bi jaɲ wuo joɲ kialij si faasa keɲ nyuuruɲ a he ɲ nisij le di ɲ bibenj. <sup>12</sup> Di ɲ ne bi niaa kiaa wuo beɲ ari wutitii, ba jaɲ wuo joɲ ɲ titia kiaa pin di ɲ beɲɲ? Ai. <sup>13</sup> Yoɲ-bala bi jaɲ wuo tiɲ tiɲtiɲɲaa a pi kuhiasij balia. U jaɲ cho doɲo aɲ bere doɲo. U jaɲ tuto doɲo niɲ wiaa woruɲ aɲ via doɲo niɲ wiaa. ɲ ma saa bi jaɲ wuo to Wia aɲ bira cho dunia kiaa maa.”

*Yesu bul wiaa a pi Farisii tinjaa*

*Mat. 11.12-13; 5.31-32; Maak 10.11-12*

<sup>14</sup> Farisii tinjaa nii wiinj deenj Yesu si bula. Ba fa cho dunia kiaa kinkeņ ne. Nii ne tii ba sisieru le. <sup>15</sup> Nii ne Yesu bula piba a bul, "Ma nialinj, ma yie che di niaa biine ma keņ wutitii, ama Wia jinj ma tuosaa. Kialinj si njaa ku-zoņņo nuhuobiinee teenj, ba ne njaa ku-lorunuj Wia teenj."

<sup>16</sup> Nii ne Yesu bira bul, "Nialinj faa to wialinj Moosis fa si bile. Ba ma to tennila le nialinj fa sii bul wiaa, Wia Din-zoņ-la doluj le, fa si njmunsa a kaa mu bua-la le Joņj si ko, nii-la fa sii fo niaa Wii-chuo le liinj. Joņj si ko nii, ba suomo bubul Wia wuzom-la a tige Wia kuorii-la le aa pi niaa. Nii ne nuu-kala fiese siinj a wiwalime duu juu Wia kuorii-la tuoj. <sup>17</sup> Di wia nyuj ari tinteenj kala ne fa dere, u fa bi jaņ hei. U fa bi jaņ hei ari Moosis niinj wialinj tuoj ku-bie bira si bi bubuoj kene.

<sup>18</sup> Baal-na kala si via u haala aņ bira mu jaa doņo, u tiina juu Wia haache le ne. Baal-la ma si jaa haala si via u bala, u ma juu Wia haache le ne."

*Yesu mage namaga a tige kiaa tiina ari Lazoros le*

<sup>19</sup> Nii ne Yesu bira mage namaga a bul, "Kiaa tiina kubala ne fa he dime. U yie lilaale geri-zom-la yallinj si heye, a piņ sima nyuj

woruj tapulii-na kala. <sup>20</sup> Ka summu ma fa he dime. Baa yiru Lazoros. U yaraa kala njaa naawiilaa ne. <sup>21</sup> Vahinj yie ko a lilenni u naawiilala. U yie mu hoņ kiaa tiina-la boiņniinj a chiche di kiaa tiina-la si dii kudiile-la aņ ka, duu ma paa dii. <sup>22</sup> Nii ne summo-la sii suu. Wia tinjaara ku joņu a kaa mu Abiraham teenj. U hoņ u seme Wia-jaņ le aa nii sima. <sup>23</sup> Ka kiaa tiina-la ma suu. Ba joņu hugi. U mu juu Wia nyiniņ a nina heej woruj. Nii ne u bee mu na Abiraham duu hoņ di-bolii, ka Lazoros ma hoņ u seme.

<sup>24</sup> Nii ne u yiru a bul, 'Mi nyimma Abiraham, fāmi nen-nige aņ tinj Lazoros duu keņ u neniinj yuu liinj a kaa ko a fiela mi neņdelimiņ. Mii na heej ne woruj nyiniņ deenj tuoj.' <sup>25</sup> Nii ne Abiraham bula pu a bul, 'Mi bii, liise mu yi nj fa si he nj miisiņ le, nj faa nii sima ne woruj, aņ ka Lazoros fa nina heej. Ama leele Lazoros ma nii sima daha, aņ ka nj ma he heej tuoj. <sup>26</sup> Nii ma dunđuņa dee, buotuo-lunji ne piņ la pege. Di nialinj si he la teenj nii che di ba lii kiele mu ma teenj, ba bi jaņ wuo. Nuu ma bi jaņ wuo lii ma teenj a ku kieli a ko la teenj.' <sup>27</sup> Nii ne kiaa tiina-la bira bula pu a bul, 'Mi nyimma Abiraham, njii ne saa mii suluj di nj tinj Lazoros duu mu mi nyimma dia. <sup>28</sup> Mi keņ naaņbiirin banoj ne dime. Leņ duu kpurise ba digilaa di ba ma

sí hεεη deen lerin kɔ bua-  
la ε ba si jan suu.' 29 Nii  
ne Abiraham bula pu a bul,  
'Wialin Moosis ari nialin fa  
sii bul wiaa, Wia Din-zɔη-la  
dolun ε fa si ηmunsa, ba  
he η naanbiirin teen. Len  
di ba jegile nii wialin ba sii  
bul.' 30 Nii ne kiaa tiina-  
la bira bul, 'Nii ha bi maga,  
mi nyimma. Ama di nuu  
ne fa sii suun ε a mu ba  
teen, ba fa jan wuo birima  
lii ba haacheba ε.' 31 Nii  
ne Abiraham bira bula pu a  
bul, 'Di ba ne bi jan jegile  
nii wialin Moosis ari nialin  
fa sii bul wiaa, Wia Din-zɔη-  
la dolun ε fa si ηmunsa, ba  
ma fa bi jan sei wialin di nuu  
ne paala sii suun ε a mu ba  
teen a dageba.' "

## 17

*Yesu bul wiaa a tige  
haache ε*

*Mat. 18.6-7, 21-22; Maak  
9.42*

<sup>1</sup> Yesu bula pi u haritooro  
a bul, "Wialin si jan ηaa di  
niaa juu haache ε jan he  
dime. Ama nii-la si jan ηaa  
di ba juu haache ε jan na  
hεεη worun. <sup>2</sup> U maga di  
ba jon nɔmun ne a vɔɔ laale  
u banηa ε, a jonu yuo he  
muga tuɔη duu suu. Di ba  
ne ηaa ηii, u ne jan kpia  
u si jan ηaa di hanbiisin  
deenba tuɔη kubala ηaa wu-  
bɔmun. <sup>3</sup> Má pɔ ma titia ε.  
Di η naanbie ne ηaa haache,  
kpiau ε. Di u ne si duu  
cheye ne, jonɔ cheu. <sup>4</sup> Di u  
ne ηaa wii chein ε an ku  
bula pin ari u cheye ne, a

ηaa ηii a yi naansein bulipe  
che-bala, jonɔ cheu."

*Yesu bul wiaa a tige  
yarida ε*

<sup>5</sup> Nii ne Yesu nanzɔɔba-  
la bula pu a bul, "La Ti-  
ina, ηaa di la yarida yuge  
kinkeη." <sup>6</sup> Nii ne la Tiina  
Yesu bula piba a bul, "Di ma  
yarida ne fa mage kun biin  
ba sii yire masitad, ma fa  
jan wuo bula pi tia duu keη  
u naakelee kala churi a jila  
chɔnse muga ε. U fa jan to  
ma niin ε a ηaa ηii."

*Yesu bul tintinnaa  
tintimin wiaa*

<sup>7</sup> Nii ne Yesu bira bul, "Di  
ma kun ne keη tintinnu u  
pipere η бага ε koo u didaa  
η piesee, duu ne lii бага koo  
pie-daalin kɔ, η jan bula pu  
a bul duu ηaa lima a dii  
kudiilee koo? <sup>8</sup> Ai, η ma jan  
bula pu duu ηaa siri a laale u  
gennin ηaa kudiilee pin di  
η dii. Di η ne dii dere, u ma  
jan wuo dii u kudiilee. <sup>9</sup> N  
jan lolle η tintinni-la a tin u  
si ηaa wialin η si dagu wiaa?  
Ai. <sup>10</sup> Ma ma saa nage ηii  
ne. Di ma ne ηaa wialin kala  
ba si si di ma ηaa, u maga  
di ma bul, 'La ηaa tintinnaa  
ne. U bi maga di ba lollela.  
Tintimii-la si maga di la tin  
dunɔnɔ ne la titin.' "

*Yesu vaare gbegisin fii*

<sup>11</sup> Nii ne Yesu bira sii  
mu Jerusalem diirin. U to  
Samaria tinteen ari Galilii  
tinteen ne a mu. <sup>12</sup> Nii  
ne u mu juu tan kubala, di  
gbegisin fii ku chemu. Ba fa

chin di-bolii ne <sup>13</sup> an faasa yire a bul, "Yesu, la kuhian, fála nennige." <sup>14</sup> Nii ne Yesu naba a bul, "Má ken ma titia mu a dage nii-la si kpu pusun pipi Wia." Nii ne ba mu. Ba sí mu nii, ba duori. <sup>15</sup> Ba tuon donjo si na duu duoro, u miire a faasa didenne Wia. <sup>16</sup> U mu Yesu teen a tuu kpirimi tinteen u naasin le a lolu. Baal-la fa naa Samaria tiina ne. <sup>17</sup> Nii ne Yesu piesu, "Niaa fii dee mi vaaree? Nii ne nibi-la he? <sup>18</sup> Bee ne tii nuhura deen dunduna ne miira ko duu lolle Wia?" <sup>19</sup> Nii ne Yesu bula pi baal-la a bul, "Sii a viiri, n yarida ne naa n duori."

*Yesu bul wiaa a tige bua-la le Wia kuorii-la si jan ko  
Mat. 24.23-28, 37-41*

<sup>20</sup> Nii ne Farisii tinjaa piese Yesu di bua bee le ne Wia kuorii-la jan ko? Nii ne u bula piba a bul, "Di Wia kuorii-la ne jan ko, wu-magil dee bi jan naa di niaa jin. <sup>21</sup> Nuu-kala ma bi jan wuo bul, 'Bee na, u he daha koo u he dime.' Má bee na, Wia kuorii-la he ma tuon ne."

<sup>22</sup> Nii ne u bula pi u haritooro-la a bul, "Tapulii jan yi di ma cho di ma na mi-na Nuhuobiine Bie tapu-laa tuon che-bala dunduna maa. Ama ma bi jan wuo nami. <sup>23</sup> Niaa donsun jan bula pima a bul, 'Nau, u ne nla, koo, na u ne he daha.' Di ba ne bul nii, ma

si lii gollo chicheu. <sup>24</sup> Mi-na Nuhuobiine Bie si jan mi-ira ko tapulii-la, u jan nage duonun si ligisa a lii wia nyun seme donjo a ku tuu seme donjo. <sup>25</sup> Ama mi jan laa sipaan na heen. Ma leele niaa, ma jan viami. <sup>26</sup> Bua-la le mi-na Nuhuobiine Bie si jan miira ko, u jan nage bua-la le Nowa fa si he u miisin le ne. <sup>27</sup> Bua-la le nialin fa dii kudiilee, haalaa ari baalaa ma jijaa donjo a mu yi tapulii-la Nowa fa si juu liin daboro-la tuon. Liin ku pelle paa nialin donsun kala, ba suu. <sup>28</sup> U ma jan nage bua-la le Lot fa si he u miisin le. Nuu-kala fa he dime a didii kudiilee a yiyalle kiaa a yuyoo kiaa a duduu kiaa a sisaa diisin. <sup>29</sup> Ka tapulii-la Lot si lii tan kubala ba sí yire Sodom le, nyinin ari jiribiin lii wia nyun, a ku tuu kpu nialin donsun kala. <sup>30</sup> Nii ne u jan nage tapulii-la mi-na Nuhuobiine Bie ma si jan miira ko. <sup>31</sup> Di nuu ne he u lusun nyun tapulii-la le an ken kiaa u dia tuon, ma si leje duu tuu a juu u dia a paa u kiaa. Nii-la ma si he u бага le, duu ma si miira mu dia. <sup>32</sup> Má liise yi wii-la si naa Lot haala le. <sup>33</sup> Nii-la kala sí walime duu laa u miisin, u jan jonjo ta. Nii-la kala ma si jon u miisin ta, u jan laa u miisin. <sup>34</sup> Mi jan bula pima, tapulii-la niaa balia jan pin don godo bala nyun titanin, Wia jan jon donjo an le donjo ta. <sup>35</sup> Haalaa balia ma jan nunon munun. Wia



jan jon dɔŋɔ an len dɔŋɔ ta. <sup>36</sup> Baalaa balia ma jan he baga le a pipere, Wia jan jon dɔŋɔ an len dɔŋɔ ta." <sup>37</sup> Nii ne Yesu haritooro-la piesu a bul, "Nii le ne nii, la Tiina?" Nii ne Yesu bula piba a bul, "Lee-la ku-pua si pina ne, dɔunɔŋ ma hihilimi."

## 18

*Yo-haala mu na sariya di-ire*

<sup>1</sup> Nii ne Yesu bira mage namaga piba a dageba di ba chuchuele Wia bua-na kala le a si len. <sup>2</sup> U si, di sariya di-iru ne fa he dime tan kubala le. U fa bi Wia ka fá. U bi nuhuobiinee ma jirima ka jon. <sup>3</sup> Yo-haal kubala ma ne fa he tan-la le. U yie venee mu sariya diiri-la teen a susulu duu peu le di u wuo dii sariya a lo u dindomɔ. <sup>4</sup> Bunɔun kala baal-la via duu peu le. Ama u si yie venee ko u teen nii, nii ne baal-la bula pi u titia a bul, "Mi paala bi Wia ka fá, mi bi nuhuobiinee ma jirima ka jon. <sup>5</sup> Ama yo-haala deen si venee walimemi nii, mi jan peu le duu dii u sariya. Nii dee u ha jan vene wi-walimemi di mi lol." <sup>6</sup> Nii ne la Tiina Yesu bira bula pi niaa a bul, "Má jegile nii wialin sariya diiri-la si bi wutitii kene si bula. <sup>7</sup> Ma saa biina Wia saa bi jan wuo pe nialin u si liisa le di ba níi laa ku-sinɔŋaa? Di ba níi yel u teen wiiheye ari titaŋin kala, u bi jan dieni an peba le. <sup>8</sup> Mi jan bula pima, u jan peba le

di ba laa ku-sinɔŋaa. U jan ɔŋaa nii lima lima. Ama bua-la le mi-na Nuhuobiine Bie si jan miira ko, mi jan na nialin si ɔŋaa mi yarida, koo?"

<sup>9</sup> Yesu bira mage namaga a pi nialin si biina ba tuon le di ba ken tuo-pula an lilieni ba dɔnsun tinɔŋaa kala. U bula piba a bul, <sup>10</sup> "Baalaa balia ne sii mu Wia-dia di ba chuele Wia. Dɔŋɔ lii nialin ba sii yire Farisii tinɔŋaa tuon ne. Dɔŋɔ-la ma ɔŋaa lanpoo lilaaru ne. <sup>11</sup> Farisii tiina-la sii chin a chuele Wia ɔŋa u tuon le a bul, 'La Tiina Wia, mii lollun ari mi si bi niaa dɔnsun naga, nialin si gollo ken niaa kiaa lila, koo nialin si bi wutitii kene, koo nialin si gollo che niaa haalaa. Mi bi lanpoo lilaara deen ma si he daha naga. <sup>12</sup> Mi yie voo niin bulia ne yobo-na kala le. Ku-la kala mi si na, mi yie kaa kpaa leree fii ne a jon dɔŋɔ pin.' <sup>13</sup> Ka lanpoo lilaari-la chin di-bolii. U paala bi u siaa ma kaa wul wia nyun an paa u nisaa chun u nyun le an bul, 'Wia, fami nisusun. Mi ɔŋaa haache diiru ne.' " <sup>14</sup> Nii ne Yesu bira bul, "Mi jan bula pima ari Wia jon lanpoo lilaari-la haacheba cheu, u mu dia. Ama u bi nii ɔŋaa Farisii tiina-la le. Nii-la kala sii bigisi u titia le, Wia jan kenu muuri. Ama nii-la si ken u titia muuri, Wia jan ɔŋaa duu yuge."

*Yesu chuele Wia duu pe hanbiisin le*

*Mat. 19.13-15; Maak*

## 10.13-16

<sup>15</sup> Niaa dɔnsun ken ba hanbiisin ma kɔ Yesu teen duu jon u nisin danba le di Wia peba le. Yesu haritooro naba a kpiaba le. <sup>16</sup> Ba si kɔ nii, u bula pi u haritooro-la a bul, "Má len di hanbiisi-la kɔ mi teen. Ma siba kiru. Nialin si jan juu Wia kuorii-la tuɔn nage hanbiisin deenba ne." <sup>17</sup> U bira bula pi niaa a bul, "Wutitii, mi bulaa pima, nii-la kala si bi Wia to a nage hanbie si yie to u nyimma ari u naan nii, u bi jan wuo juu Wia kuorii-la tuɔn."

*Kiaa tiina kɔ Yesu teen*

*Mat. 19.16-30; Maak 10.17-31*

<sup>18</sup> Nii ne Juu tinjaa kuhian kubala kɔ Yesu teen a piesu, "Mi kuhia-zɔmun, ee ne mi jan naa a ken miisi-la si bi dere?" <sup>19</sup> Nii ne Yesu piesu a bul, "Bee ne tii n yiremi kuhia-zɔmun? Nuu-kala bi zɔn see Wia. <sup>20</sup> N jin wialin ba si nmunsa bil di ma tuto nee? Ba ne nla: Sí n dɔnɔ tiina haala che. Sí niaa kpu. Sí gaa. Di n naa dansia wii le, sí wiaa nyia, fifá n nyimma ari n naan." <sup>21</sup> Nii ne baalla bul, "Mi to wiaa deenba kala mi hanbiirin le." <sup>22</sup> U si bul nii, Yesu bula pu a bul, "Wu-bala ne ka n ha jan naa. Jon n kaa kala a yalle, a jon moribie-la a pi summoo, an ku tomi. N ne naa nii, n jan ken kaa Wia-jan le." <sup>23</sup> Baalla si nii wiin deen, u tuɔn kala chei, bee wiaa u fa ken

kiaa ne worun. <sup>24</sup> Yesu si na di u tuɔn cheye, u bul, "U naa wu-duo ne ari nialin si ken kaa si jan wuo juu Wia kuorii-la tuɔn. <sup>25</sup> U bi hei ari buntan na si jan wuo to gerihemin buɔn lii ari u si heye nii nii-la si ken kaa si jan wuo juu Wia kuorii-la tuɔn."

<sup>26</sup> Nialin si nii Yesu si bul nii, ba piesu a bul, "Kubee ne saa Wia jan laa ta?" <sup>27</sup> Nii ne Yesu bula piba a bul, "Wii-la si jan kperi nuhuobiine, u bi Wia wuo kperi. Wia wuo wii-kala naa ne." <sup>28</sup> Nii ne Piita bula pu a bul, "Bee na, la len la diisin ne an tuto n harin." <sup>29</sup> Nii ne Yesu bula piba a bul, "Wutitii ne mi bulaa pima, nii-la kala si jan wuo len u dia ari u haala koo u naanbiirin koo u nyimma ari u naan koo u biirin a tin Wia kuorii-la wiaa, <sup>30</sup> u jan bira na kaa yuge a kii kialin u si len ta. Di u ne ku suu, u ma jan na miisi-la si bi dere."

*Yesu bira bul u suun wiaa pi u haritooro*

*Mat. 20.17-19; Maak 10.32-34*

<sup>31</sup> Nii ne Yesu ken u haritooro fii ari balia-la a kaa suusa lii a bula piba, "Má jegile nii mi teen. Laa mu Jerusalem ne. Dime wialin nialin si bula, Wia Din-zɔn-la dolun le a tige mi-na Nuhuobiine Bie le a nmunsa bil, ba jan naa dere. <sup>32</sup> Ba jan jonmi he nialin si bi Juu tinjaa naa nisin le di ba mɔnmi. Ba jan tuusemi an pe tu nanjuɔrun hemi

le. <sup>33</sup> Ba jaŋ viiremi aŋ pe kpumi, ka di mi sii suuŋ le tapulaa batori cheeŋ.”  
<sup>34</sup> Ama Yesu haritooro-la bi wii-la u si bula bubuon jiiŋ. (Wii-la u fa si bula bubuon fa faa ne.)

*Yesu vaare sullu-la si nyulima*

*Mat. 20.29-34; Maak 10.46-52*

<sup>35</sup> Nii ne Yesu ari u haritooro sii di ba mu Jerusalem. Ba mu kpage taŋ kubala baa yire Jeriko, di nyuluŋ kubala fa hon wonjiin niin a susul kiasa. [<sup>36</sup> U si nii ni-dan-la sii bal domo, u piese, “Bee kuŋ ne?”] <sup>37</sup> Nii ne ba bula pu ari Yesu si lii Nazaret nii bal. <sup>38</sup> Nii ne u yire Yesu a bul, “Yesu, Devit nihiliere, fami nennige.” <sup>39</sup> Nialin si laa u sipaan kpiau le duu keŋ goŋ. Ama u faasa yire a kii nii a bul, “Yesu, Devit nihiliere, fami nennige.” <sup>40</sup> Nii ne Yesu chin aŋ bul di ba keŋ nyuluŋ-la kaa ko u teen. Nyuluŋ-la ko. <sup>41</sup> Nii ne Yesu piesu a bul, “Bee kuŋ ne nŋ che di mi naa pin?” U bula pu a bul, “Mi kuhian, leŋ di mi siaa suri di mi nina.” <sup>42</sup> Nii ne Yesu bula pu, “N siaa jaŋ suri, n yarida ne naa n duori.” <sup>43</sup> U siaa guu suri. Nii ne u to Yesu harin a didenne Wia. Ni-dan-la ma kala si na nii, ba ma kala denne Wia.

## 19

*Zakias*

<sup>1</sup> Yesu mu to taŋ kubala baa yire Jeriko. <sup>2</sup> Di baal kubala ne fa he dime. U fa naa lanpoo lilaaraa kuhian ne. U yirin ne fa Zakias. U fa keŋ kiasa ne woruŋ. <sup>3</sup> U faa che duu na Yesu, ama u fa naa ni-kuu ne. A tin ni-dan-la fa si he dime nii, u fa buu wuo na. <sup>4</sup> Nii ne u kieli ni-dan-la, a fa mu jil tia, duu wuo na Yesu. U jima duu jaŋ ku to tia-la bubuon bal. <sup>5</sup> Yesu si ku to tia-la bubuon bibal, u wula beŋ tia-la nyuŋ a nau a bula pi Zakias a bul, “Zakias, ku tuu lima. U maga di mi chua n dia le ne jiniŋ.” <sup>6</sup> Zakias si nii nii, u tuon tore. U tuu lima lima a keŋ Yesu mu u dia. <sup>7</sup> Nialin kala si he dime a na nii, ba suomo gugurime wiaa a bul, “Baala deen mu duu chua haache diiri-la dia le ne.” <sup>8</sup> Yesu si he Zakias dia le nii, Zakias sii chin a bula pi la Tiina Yesu a bul, “Mi kuhian, jegile nii mi teen. Mi jaŋ jon mi kiasa lebi a pi summoo. Di mi ne girime nuu maa, mi jaŋ tin u tiina ari moribee naanjiin bunese.” <sup>9</sup> Nii ne Yesu bula pu a bul, “Wia laan di n dia niaa kala ta ne jiniŋ. Baala deen ma naa Abiraham doho nuu ne, <sup>10</sup> bee wiaa mi-na Nuhuobiine Bie ko di mi che a laa nialin si lele ne a ta.”

*Yesu mage namaga a tige moribiin le*

*Mat. 25.14-30*

<sup>11</sup> Nii ne Yesu mage namaga a pi nialin si nii wialin u si bula. Bua deen le u

ka mua ka duu yi Jerusalem. Nii ne tii nialin biine ari bua-la le Wia kuorii-la si jan ko kpaga ne. <sup>12</sup> Nii ne u bul, "Ni-bal kubala ne sie a mu ta-bolii kubala di ba bil u kuoron, ka di u miira ko u jan a naa kuoro. <sup>13</sup> Ka duu-na mu, u yire u dia tintinnaa fii, a jon siidi bui a pi kun-kala, a bul di ba kaa bibirime duu mu an ko. <sup>14</sup> Ama u tan-la niaa bere ni-bal-la ne. Nii ne ba tin tin daaraa ba kiri u harin mu a bula pi tan-la donjo kuoro ari ba bi cho duu naa ba tan kuoro. <sup>15</sup> Ka baal-la mu dii kuoron an miira ko. U si miira ko, u yire u tintinna-la u fa si jon moribii-la pa duu na ba si na nyuuron mage nii. <sup>16</sup> Nii ne tintinni-bunbun ko u teen a bula pi u kuhian a bul, 'Mi kuhian, n siidi bui-la n si jonjo pimi birime siidi bui fii ne.' <sup>17</sup> Nii ne u kuhian-la bula pu a bul, 'N naa worun. N naa tintinni-titii ne. N si naa nii a ben kubie nyun worun, mi jan len di n biben tasin fii.' <sup>18</sup> Nii ne tintinni-liamin ma ko u teen a bul, 'Mi kuhian, n siidi bui-la n si jonjo pimi, u birime siidi bui banon ne.' <sup>19</sup> Nii ne u kuhian-la bula pu duu jan biben tasin banon. <sup>20</sup> Nii ne tintinni don-la ma ko a bula pu a bul, 'Mi kuhian, na n siidi bui-la n si jonjo pimi, mi jonjo gul geri-kosun le ne a jonjo faa. <sup>21</sup> Mii fan ne. N naa ni-tere ne. N yie ken niaa kiaa lilaa ne an yie kukun kialin n si bi

duo.' <sup>22</sup> Nii ne u kuhian-la bula pu a bul, 'N naa tintinni-bon ne. Wialin titia n si bula ne jan dii n sariya a jon cheerin pin. N jima ari mi naa ni-tere ne a ken niaa kiaa lilaa an pe kukun kialin mi si bi duo. <sup>23</sup> Bee ne saa tii n bi mi moribin jonjo bil lee-la ba sii bil moribiee? Mi fa si miira ko nla, mi fa jan laa moribie-la ari mi nyuurii kala.' <sup>24</sup> Nii ne u bula pi u tintinni donsu-la fa si chin dime a bul, 'Ma laa siidi bui-la u teen a jonjo pi nii-la si ken siidi bui fii-la.' <sup>25</sup> Nii ne ba bula pu a bul, 'La Tiina, bee na, u paala ken siidi bui fii ne, an ka n che di n jon siidi bui-la a pe pu nii.' <sup>26</sup> Nii ne u bula piba a bul, 'Nii-la si paala ken kiaa yuge ne, Wia jan wasa che a pe a pu, ama nii-la si bi faasa ken kiaa yuge, muapilii-la ma u si kene, Wia jan kaa laa u teen. <sup>27</sup> Mi din donjo deenba saa si bi cho di mi naa ba kuoro, ma kenba kaa ko daha di mi naa ba kpuba mi sipaan.' "

*Yesu juu Jerusalem*

*Mat. 21.1-11; Maak 11.1-11; Joon 12.12-19*

<sup>28</sup> Yesu si bul wiaa deenba dere, u jon u wonbin a laa u haritooro sipaan ba mumu Jerusalem. <sup>29</sup> Ba ku yi Betifagi ari Betani diirin a ku yi peel kubala baa yire Oliv. Nii ne Yesu liise u haritooro balia a tinba a bula piba a bul, <sup>30</sup> "Ma mu tan-la si he sipaan. Di ma ne mua, ma

janj na kaku-bie di ba vobɔ a kii. Nuu ha buu jila. Má mu puri a kaa kɔ. <sup>31</sup> Di ma ní puru, di ba piesema a bul di bæe ne tii maa puri, má bul di la Tiina Yesu ní che, duu ne si di ma puro kaa kɔ.” <sup>32</sup> Njii ne ba mu a na wialinj kala Yesu fa si bula piba. <sup>33</sup> Ba sí puri kaku-bie-la, u tiina pieseba a bul, “Bæe ne tii maa puri kaku-bie-la?” <sup>34</sup> Njii ne ba bula pu a bul, “La Tiina ní che.” <sup>35</sup> Njii ne ba kenj kaku-bie-la a kaa mu pi Yesu, a wuri ba genninj a danj kaku-bie-la nyun, an kenj Yesu u jila honj. <sup>36</sup> U si jil kaku-bie-la aa venj njii, ba jonj ba genninj jere wonbiiinj læ. <sup>37</sup> U si mu kpage Jerusalem, lee-la wonbiiinj si lii Oliv peel-la nyun tuu, ni-danj-la fa si to Yesu harinj suomo jujɔse a faasa didenne Wia a tinj u wu-magila-la kala ba si na. <sup>38</sup> Ba bula, “Wia janj pe kuoru-la síi kɔ la Tiina Wia dolunj læ. Ba janj honj ari yarifielaa Wia-janj læ. Wia yirinj ma janj yire.” <sup>39</sup> Njii ne Farisii tinjaa donsunj fa si he ni-danj-la tuonj bula pi Yesu a bul, “La kuhianj, njaa di nj haritooro-la kenj gonj.” <sup>40</sup> Njii ne Yesu bula piba a bul, “Mi janj bula pima, di ba ne fa bi gonj maa njaa, tabiaa ma titia janj njaa gonj.”

### *Yesu yel Jerusalem wiaa*

<sup>41</sup> Yesu síi mu njii, u ku kpage Jerusalem a na tanj-la. U yel a tinj tanj-la niaa wiaa anj bul, <sup>42</sup> “Mi fa cho di ma tanj niaa deenba jinj

njii ma si janj njaa a honj ari yarifielaa ne jininj, ama ma bi wuo na. <sup>43</sup> Tapulii janj yi di ma dinjonjɔɔ saa jebiiinj gollima, di ma sí wuo lii. <sup>44</sup> Ba janj kpu ma nialinj kala si he tanj-la tuonj, ma di ma biirinj kala. Tabii-bie ma bira bi janj danj u donjɔ læ lee-la. Ma bi seyɛ bua-la læ Wia si kɔ duu laama ta. Njii ne tii ba janj njaa njii.”

### *Yesu juu Wia-dia*

*Mat. 21.12-17; Maak 11.15-19; Jonj 2.13-22*

<sup>45</sup> Yesu si mu juu Wia-dia, u suomo kikirin nialinj síi yallɛ kiaa dime <sup>46</sup> anj bula piba a bul, “Ba njmunse Wia teninj tuonj a bul ari Wia si, u dia janj njaa lee-la niaa si janj chuchuoɔ læ Wia, anj ka ma miira kaa birime gaari-dia.”

<sup>47</sup> Tapulii-na kala Yesu yie dage niaa Wia-dia-la tuonj. Njii ne nialinj si kpu pusunj pipi Wia kuhiasinj ari Wia teninj kerichiba ari Juu tinjaa kuhiasinj chiche di ba kpuu. <sup>48</sup> Ama ba bi jinj wonbii-la ba si janj to, bæe wiaa nialinj kala fa si he dime jegile ninii wialinj u síi bul ne ari siifiesinj.

## 20

*Farisii tinjaa piese Yesu u dolunj wiaa*

*Mat. 21.23-27; Maak 11.27-33*

<sup>1</sup> Tapulii kubala Yesu didage niaa Wia-dia læ anj pe bubul Wia wu-zomɔ-la wiaa. Njii ne nialinj si kpu pusunj pipi Wia kuhiasinj ari

Wia teniŋ kerichiba ari Juu tiŋŋaa kuhiasinŋ sii kɔ u teenŋ. <sup>2</sup> Ba piɛsu a bul, “Dol bɛɛ nɛ ŋ kɛŋ a ŋiŋaa wiaa deenba? Kubɛɛ nɛ piŋ doluŋ ŋ ŋiŋaa ŋii?” <sup>3</sup> Nii nɛ Yesu bula piba a bul, “Mi ma jaŋ piɛsɛma wii. Má dagɛmi. <sup>4</sup> Joɔŋ, nii-la fa síi fo niaa Wii-chuoɔle liiŋ, u doluŋ, u lii Wia teen nɛɛ koo nuhuobiine teen nɛɛ?” <sup>5</sup> Nii nɛ ba suomo kɛŋ wii-la lilɛɛ dɔŋɔ lɛ aa bul, “Wu-bɛɛ nɛ laa chɛ di la bul? Di la nɛ bula pu a bul di Wia teen nɛ u lii, u jaŋ piɛsɛla a bul, ‘Bɛɛ nɛ saa tii ma bi wialiŋ u si bula laa dii?’ <sup>6</sup> Di la nɛ bira si nuhuobiine teen nɛ, ni-dan-la kala si hilimi daha, ba jaŋ yagɛla ari tabiaa, bɛɛ wiaa ba sɛyɛ ari Joɔŋ fa ŋaa nii-la síi bul wiaa, Wia Diŋ-zɔŋ-la doluŋ lɛ nɛ.” <sup>7</sup> Nii nɛ ba bula pu a bul, “La bi jiŋ u dol-la si lii lee-la.” <sup>8</sup> Yesu ma bula piba a bul, “Tɔɔ, mi ma bi jaŋ dagɛma dol-la mi si kɛnɛ bubuɔŋ.”

*Yesu mage namaga a tige tiŋtinnaa si hɛ baga lɛ*

*Mat. 21.33-46; Maak 12.1-12*

<sup>9</sup> Nii nɛ Yesu mage namaga a pi nialiŋ si hɛ dimɛ a bul, “Baal kubala nɛ fa hɛ dimɛ a bil baga a choŋsɛ kiaa si kɛŋ nɛnɛɛ yugɛ a nage chichuɛŋ. Ba yiriŋ nɛ gireps. Nii nɛ u paa niaa hɛ baga-la lɛ di ba bibɛŋ, aŋ sii mu tiŋtee dɔŋ a dieni dimɛ. <sup>10</sup> Kialiŋ neniŋ si yie, u tiŋ u tiŋtinnaa dɔŋɔ duu mu tiŋtinna-la teenŋ a laa tii-nɛnɛ-la dɔŋsuŋ kaa

kɔ. U mu ba kɛnu a ŋmobu aŋ kiru, u miira kɛŋ na-hillin a kaa mu baga tiina teenŋ. <sup>11</sup> Nii nɛ u bira tiŋ u tiŋtinna-la dɔŋɔ maa. U ma bira mu. Nialiŋ ŋmobu maa aŋ hiisu aŋ bira kiru maa, u miire ari na-hillin. <sup>12</sup> Nii nɛ u bira tiŋ ni-tori. Nialiŋ piru maa aŋ kiru ta. <sup>13</sup> Nii nɛ baga-la tiina bul, ‘Wu-bɛɛ nɛ mi jaŋ ŋaa? Mi jaŋ tiŋ mi bii-chooluŋ. N bi pɔɔ, ba jaŋ ziluu.’ Nii nɛ u tiŋ bile u mu. <sup>14</sup> Tiŋtinna-la si nau duu kɔ, nii nɛ ba bula pi dɔŋɔ a bul, ‘Baga-la tiina bie nɛ ŋii. Di baga-la tiina nɛ suba, bie deen nɛ jaŋ dii u kiaa. Má lenŋ di la kpuu, ka di baga-la ŋaa la kuŋ.’ <sup>15</sup> Ba kɛnu kaa lii baga-la tuɔŋ a kpuu.” Nii nɛ Yesu piɛsɛ nialiŋ a bul, “ɛɛ nɛ baga-la tiina jaŋ ŋaa? <sup>16</sup> U jaŋ kɔ a kpu tiŋtinna-la kala aŋ joŋ baga-la a pi ni-tania.”

Nialiŋ si nii wialiŋ Yesu si bula, ba si di Wia bi jaŋ sei di ba ŋaa ŋii. <sup>17</sup> Nii nɛ Yesu berɛba aŋ piɛsɛba a bul, “Ba ŋmunɛ Wia teniŋ tuɔŋ ari tiebii-la dii-saaraa si via ta, u nɛ jaŋ ku ŋaa tiebii-duoŋ ba si joŋɔ bil dia gɛŋtine. Wiinŋ deenŋ bubuɔŋ nɛ saa ŋaa bɛɛ? <sup>18</sup> Nii-la kala si tel tiebii-la nyuŋ, u tiina jaŋ yɛɛ muno muno. Di tiebii-la ma nɛ tel nuu-kala nyuŋ, u jaŋ yɛɛ u tiina muno muno.”

*Yesu bul lanpoo tiŋinŋ wiaa*

*Mat. 22.15-22; Maak 12.13-17*

19 Nii ne Wia tenin kerichiba ari nialin si kpu pusun pipi Wia kuhiasin walime di ba ken Yesu naabuasu-la le, bee wiaa ba jima ari u mage namaga-la a tigeba le ne. Ama baa fa nialin si he dime ne. 20 Nii ne ba bee chiche wonbii-la ba si jan to a kenu. Ba kpal niaa a naa di ba fugi ari ba naa ni-titiiba ne. Ba jon moribee piba di ba mu a magise Yesu a piesu wiaa a na duu ne bul wii chei, di ba wuo to nii le a kenu a kaa mu he ba kuori-balin nisin le, duu naau nii kala u si cho. 21 Nii ne nialin ba si he, ba mu Yesu teen, a piesu a bul, "La kuhian, la jima wialin kala n sii bul an didage maa, ba naa wutitiiba ne. La jima ari n jon niaa kala ba naa kubala ne, nj dage Wia wonbii-titii ne. 22 U naa wonbii ne di la tin lanpoo a pi Rom tinteen kuori-balin ba sii yire Siiza koo? Dagea." 23 Ama Yesu jin ba bubun. Nii ne u pieseba a bul, 24 "Ma ken moribii-biin kaa ko mi bee na. Kubee nyun ne he dime? Kubee yirin ma ne ba tuuro he moribie-la le?" Nii ne ba si, "Siiza yirin ne." 25 Nii ne Yesu bul, "Too, ma jon Rom tinteen kuori-bal-la kiaa a pu, an jon Wia ma kiaa pu." 26 U si bul nii, ba bi wiikala na ba si jan wuo to nii le kenu nialin si he dime sipaan. Wialin u si bula naaba wu-kpunkpere, ba niin kala maa.

*Yesu bul wiaa a tige nialin si sii suun le*

*Mat. 22.23-33; Maak 12.18-27*

27 Nii ne Sadiusii tinjaa donsun ma ko Yesu teen. Niaa deenba laa dii ari nialin si suba bira bi jan sii suun le. Nii ne ba piesu a bul, 28 "La kuhian, Moosis dagea Wia tenin tun ari baal ne jaa haala, di haal-la ari baal-la ne bi bii lula, an ka di baal-la suu, duu naana jaa yo-haal-la a lul biirin pi u malima si suba, di biiri-la chin u nyun le. 29 Naanbiirin balipe ne fa he dime bua kubala le. Ba kuhian jaa haala. Ba di haal-la bi bii lula, an ka u suu. 30 Liamin tiina jon haal-la jaa. Ba duu ma bi bii lula, an ka u ma suu. 31 Torimun tiina ma jon haal-la jaa. U ma nii titia ne. Nii ne naanbiiri-la balipe kala jaa haal-la. Ba kala suu an bi bii lula. 32 U nii harin haal-la ma suu. 33 Tapulii-la niaa si jan sii suun le, baalaa deenba balipe tun kubee ne jan tii haal-la? Ba kala balipe ne jaa."

34 Nii ne Yesu bula piba a bul, "Baala-la ari haala-la si he ba miisin le leele, ba nii jaa donjo. 35 Ama bua-la le baala-la ari haala-la si jan sii suun le a ken miisi-la si bi dere, ba bira bi jan jaa donjo. 36 Ba jan nage Wia tinjaaraa a bira bi jan suu. Wia si chiseba suun le nii, ba jan naa Wia biirin. 37 Moosis fa paala chaasa dage ari ba jan chise nialin si suba suun

le di ba wei. U fa bul Wia teniŋ sɛmɛ dɔŋɔ ari la Tiina Wia nɛ ɲaa Abiraham Wia ari Aizik Wia ari Jekɔb ma Wia. Lee-la u fa si bul wiaa a tige tii-bie-la sɪi dii nyiniŋ le nɛ, u fa bul ɲii. <sup>38</sup> U si bul ɲii daga ari u ɲaa ni-weyee Wia nɛ. U bi jaŋ wuo ɲaa nialiŋ si suba Wia.” <sup>39</sup> ɲii nɛ Wia teniŋ kerichiba dɔŋsuŋ bula pu a bul, “La kuhian, ɲ bul woruŋ nɛ.” <sup>40</sup> Ba bira bi nyuduonj kenɛ di ba piɛsɛ Yesu wii-kala.

*Ba piɛsɛ Kirisito, nii-la Wia si liisa, wiaa*

*Mat. 22.41-46; Maak 12.35-37*

<sup>41</sup> ɲii nɛ Yesu piɛsɛba, “ɛɛ nɛ ba jaŋ wuo bul ari Kirisito, nii-la Wia si liisa, jaŋ ɲaa Devit nihiliɛɛ dunduŋa? <sup>42</sup> Devit titia bula Wia teniŋ sɛmɛ dɔŋɔ ba sɪi yire Saams a bul,

‘Mi Tiina Wia bula pi mi Tiina,  
duu hɔŋ u sɛmɛ, ni-duonj di-hɔnuŋ,

<sup>43</sup> see duu yuo dii u diŋdɔŋɔɔ kala dere.’

<sup>44</sup> Devit titia yire nia deen u Tiina. ɛɛ nɛ saa u jaŋ wuo ɲaa Devit nihiliɛɛ dunduŋa?”

*Yesu bul Wia teniŋ kerichiba wiaa*

*Mat. 23.1-36; Maak 12.38-40*

<sup>45</sup> ɲii nɛ Yesu bula pi u haritooroɔ nialiŋ kala sipaanj a bul, <sup>46</sup> “Má keŋ ma titia woruŋ Wia teniŋ kerichiba le. Ba yie gugolle yɔbɔ le ari

ba geri-duduosuŋ, a cho di niaa jujonba jirima a chuchuoɓɓa. Ba yie chiche di-hɔŋ-zɔŋɔɔ Wii-chuoɓɓe diisiŋ le. Di ba nɛ yireba di ba ku dii kiaa, ba cho di ba hɔŋ ni-balaa di-hɔnɔɔ maa. <sup>47</sup> Ba yie fugo chuɓɓe Wia didieni a keŋ yo-haalaa kiaa kaa laa didii. Bua-la le Wia si jaŋ dii ba sariya, ba nɛ jaŋ na heeŋ a kii ba dɔŋsuŋ tinjɲaa kala.”

## 21

*Yo-haala jonj kiaa pi Wia Maak 12.41-44*

<sup>1</sup> Bua kubala Yesu he Wia-dia le a na nialiŋ si keŋ kiaa si jonj ba moribiee bil a pipi Wia. <sup>2</sup> ɲii nɛ u bira na yo-haal ma si jonj amiisiŋba balia a ma he. <sup>3</sup> ɲii nɛ u bula pi nialiŋ a bul, “Wutitii nɛ mi bulaa pima, yo-haala deen moribii-bie-la u si jonj he, u nɛ kii nialiŋ moribie-la kala. <sup>4</sup> Nialiŋ kala si jonj moribiee a pi Wia, ba liisa aŋ ka nɛ. Aŋ ka u-na jonj u summu moribiinj kala a he, ku-la kala u si kenɛ nɛ ɲii.”

*Yesu bul ɲii Wia-dia si jaŋ tel*

*Mat. 24.1-2; Maak 13.1-2*

<sup>5</sup> ɲii nɛ Yesu haritooroɔ dɔŋsuŋ bul wiaa a tige Wia-dia-la le a bul duu zɔmɔ, di u tiebie-la ba si kaa saau ma zɔmɔ, a bira bul ɲii niaa si jonj ku-zɔŋɔɔ a pi Wia ba kaa wase dia-la, ba kala nɛ ɲaa dia-la zɔŋ ɲii. <sup>6</sup> ɲii nɛ Yesu bul, “Bua kubala jaŋ yi, ba jaŋ ɲmoo kiaa deenba kala ma sɪi na a lo. Ba bi jaŋ



lej di tiebii-bala ma dan u dɔŋɔ le.”

*Yesu bul nii ba si jan dogise nialin sii tou*

*Mat. 24.3-14; Maak 13.3-13*

<sup>7</sup> Nii ne ba piɛɛ Yesu a bul, “La kuhian, bua bɛɛ le ne wiaa deenba jan ŋaa? Bɛɛ kiaa ne la jan na, ka di wiaa deenba-na ŋaa?” <sup>8</sup> Nii ne Yesu bula piba a bul, “Má ken ma titia worun di nuu-kala síma nyisu,” a bira bul, “Niaa jan yuge a kɔ a jon mi yirin he ari ba ne ŋaa Kirisito, a bul di bua-la dunia si jan dɛɛ kpaga ne. Ama ma sí ba harin to. <sup>9</sup> Ma jan nii ari laalin ari yuosun he daha a he di-boloo maa. Di ma ne ku nii nii, ma sí leje di ma boisin jon. Wiaa deenba kala jan ŋaa bal, ama u nii saa bi naga ari dunia diderin yie ne.”

<sup>10</sup> Nii ne Yesu bira bul, “Tinteen dɔŋɔ niaa jan sii a mu yuo tinteen dɔŋɔ niaa. Tan kuoro ari u niaa jan sii giri a mu yuo kuoro dɔŋɔ ari u niaa. <sup>11</sup> Tinteen jan zigili worun, losun ma jan juu, nyanyalaa jan juu niaa leree yuge, wu-bal-lorunun ari wu-magilaa kala jan ŋaa wia nyun. <sup>12</sup> Ka di wiaa deenba kala-na ŋaa, ba jan kesema a to naasin dogisema. Ba jan jonma he niaa nisin le di ba dii ma sariya Wii-chuɔle diisin le a kenma tɔ dia. Ba jan kenma kaa mu kuoro ari ni-balaa sipaan a tin mi wiaa. <sup>13</sup> Bua deen le ne

ma jan wuo na wonbiin a bul Wia wu-zomɔ-la. <sup>14</sup> Má ken ma titia he dɔŋɔ le a sí leje duu walimema nii ma si jan bul wiaa a laa ma titia, <sup>15</sup> bɛɛ wiaa mi jan jon wu-jimin a he ma nyun le di ma bul wialin ma dindɔŋɔɔ si bi jan wuo kaa lere ari wutitii dee. <sup>16</sup> Ma nyimmaba ari ma naanbiirin ari ma doho niaa ari ma nanɔŋsun paala jan jonma he ma dindɔŋɔɔ nisin le. Ba jan kpu ma dɔŋsun. <sup>17</sup> Nuu-kala jan berema a tin mi wiaa. <sup>18</sup> Ama ma kun nyu-pun ma bi jan lel. <sup>19</sup> Di ma ne nyalima, ma jan laa ma miisin.”

*Yesu bul ari ba jan ŋmoo Jerusalem lo*

*Mat. 24.15-21; Maak 13.14-19*

<sup>20</sup> Nii ne Yesu bira bul, “Di ma ne na di laali-yuoro gollu Jerusalem, ma jan jin ari tan-la jan tel lele. <sup>21</sup> Nii-na má lej di nialin si he Judiya le fá mu jil peelee nyun. Nialin ma si he tan-la tuɔŋ, u maga di ba lii tan-la tuɔŋ. Nialin ma si he ba bagisin le, ma sí miira juu tan-la tuɔŋ. <sup>22</sup> Tapulii-la Wia jan dogise Iziral niaa, a lej di wialin kala ba si bula Wia tenin tuɔŋ sene ku bal. <sup>23</sup> Haala-la si ken luoro ari haala-la si ken bii-mullun baa wase yilin, tapulia-la le ba jan na heen. Tintee-la kala jan na heen worun. Wia jan na baanin tinteen deen niaa nyun a dogiseba. <sup>24</sup> Ba jan kpu dɔŋsun ari

tokobiee, an kесе dɔɔsun di ba ma ɲaa yosun tintee-dɔɔsun le, ka nialin si bi juu tinɲaa ɲaa yigi Jerusalem tan-la kala lo, see bua-la yie di Wia piba wonɲiin di ba leɲ.”

*Yesu bula pi niaa duu jan miira ko*

*Mat. 24.29-31; Maak 13.24-27*

<sup>25</sup> Nii ne Yesu bira bul, “Niaa jan na wu-magilaa wii-pɔsun ari chene ari chɛɲwulaa le. Dunia kala le, niaa bi jan jin wii-la kala le ba si he. Di mugi-balaa nii huuru, fawullun jan kenba. <sup>26</sup> Fawullun jan ken niaa di ba yenɲi a tin ba sii yiele wii-la si jan ɲaa dunia kala le. Ba jan kiri wia nyun kialin kala si ken dolun di ba lii ba leree. <sup>27</sup> Nii le ne ma jan na mi-na Nuhuobiine Bie di mi to duonɲilinbaanin tuon kuu tuu. Mi jan ken dolun a chaane kinken. <sup>28</sup> Di wiaa deenba suomo a ɲinɲaa, ma sii chin a ken ma digilaa wuoli, bee wiaa bua-la le Wia si jan laama ta yie ne.”

*Yesu bul tutogo wiaa*

*Mat. 24.32-35; Maak 13.28-31*

<sup>29</sup> Nii ne Yesu mage na-maga piba a bul, “Ma bee na tutogo ari tiisin dɔɔsun. <sup>30</sup> Di ma ne na tiisin di ba suomo tutose, ma jima yibinin jua ne. <sup>31</sup> Nii titia ne, di ma ne na wiaa deenba kala mi sii dagema di baa ɲaa, ma jin ari Wia kuorii-la kpaga ne. <sup>32</sup> Wutitii ne, mi bulaa pima, ma leele

niaa deenba si he ma miisin le, ma bi jan suu, ka wiaa deenba ɲaa bal. <sup>33</sup> Wia nyun ari tinteen kala jan dere, ama wialin mi si bula bi jan lel.

<sup>34</sup> Ma ken ma titia, a si wu-fuoloo ɲinɲaa, a si sinin nyua bubugi. Ma si lenje di dunia kiaa wiaa walimema. Di wiaa deenba nii walimema, tapulii-la mi-na Nuhuobiine Bie si jan ko, u jan guu ku di-ma le a nage ba si he beré, kiaa vene mu juu-u le an bi jin nii. <sup>35</sup> Tapulii-la jan ken dunia nuu-kala lee-kala le. <sup>36</sup> Ma po a chuchuele Wia bua-na kala le. Di ma ne ɲaa nii, ma jan ken dolun a lii wialin kala si jan ɲaa le ari yarifielaa a wuo chin mi-na Nuhuobiine Bie sipaan.”

<sup>37</sup> Yesu fa yie he Wia-dia le wiiheye ari chichuon kala a didage niaa. Di didaanin ne yie-na kala, u yie mu Oliv pel-la nyun ne a pin. <sup>38</sup> Siipuuraana-kala saa niaa yie mu Wia-dia di ba jegile nii wialin u sii bul.

## 22

*Ba vuura di ba kpu Yesu*

*Mat. 26.1-5; Maak 14.1-2; Jɔɔɲ 11.45-53*

<sup>1</sup> Tapulaa deenba, diisin kielin gbiele-la kpaga ne, gbiele-la le ba si yie dii boroboro-la si bi si-burun kene. <sup>2</sup> Nii ne nialin si kpu pusun pipi Wia kuhiasin ari Wia tenin kerichiba walime di ba na wonɲii-la ba si jan to a kpu Yesu di

nialinj bi jin, bæe wiaa baa fá nialinj nê.

*Judas seyê duu jon Yesu yalle*

*Mat. 26.14-16; Maak 14.10-11; Jooj 11.45-53*

<sup>3</sup> Nii nê Sitaani ku juu baal kubala. U fa nãa Yesu haritooroo fii ari balia-la dõjõ nê. U yirin nê Judas. Baa yiru Isikarõt ma nê. <sup>4</sup> Nii nê Judas sii mu bula pi nialinj si kpu pusuj pipi Wia kuhiasinj ari Wia-dia kuhiasinj nii u si jan to a kenj Yesu yalla piba. <sup>5</sup> Ba tuõj tõrê. Ba sei ari ba jan pu moribiee. <sup>6</sup> Nii nê Judas sei, a suomo chiche wonjbii-la u si jan to a kenj Yesu yalla piba di nialinj bi jinj.

*Yesu ari u haritooroo dii diisinj kielinj gbiele kudiilee*

*Mat. 26.17-25; Maak 14.12-21; Jooj 13.21-30*

<sup>7</sup> Nii nê gbiele-la ê ba si yie dii boroboro-la si bi siburunj kenê yi, bua-la ê u si maga di ba kpu pie-bie-la ba si jan kaa nãa gbiele-la kudiilee. <sup>8</sup> Nii nê Yesu tinj Piita ari Jooj a bul di ba mu nãa ba diisinj kielinj gbiele kudiilee di ba dii. <sup>9</sup> Nii nê ba piesu a bul, "Nii nê nj che di la nãa kudiile-la?" <sup>10</sup> U bula piba a bul, "Bee na, di ma nê juu tanj tuõj, ma jan chej baal kubala duu kori lonj ari liinj. Má to u harinj juu dia-la u sii juu. <sup>11</sup> Di ma nê mua, má bula pi dia-la tiina a bul, 'La kuhianj si la piesinj di nii ê nê nuhuõraa dia hê, di ba di u haritooroo juu

hõõõ dii diisinj kielinj gbiele-la kudiilee?" <sup>12</sup> U jan dagema dii-bal kubala. U nãa lusunj nyunj dia nê. Ba wasu kala. Lee-la nê ma jan nãa kudiile-la." <sup>13</sup> Nii nê ba mu a na wialinj kala u si bula piba ari ba jan na, a nãa diisinj kielinj gbiele kudiile-la ba dii.

*Kudiile-la la si jan dii a liliisi Yesu wiaa*

*Mat. 26.26-30; Maak 14.22-26; 1 Kor. 11.23-25*

<sup>14</sup> Bua-la si yie di ba dii kudiile-la, Yesu ari u nanzõõba kala hõõõ di ba dii kiaa. <sup>15</sup> Nii nê Yesu bula piba a bul, "Mi fa paala cho di la di ma dii kiaa deenjba, anj ka di mi-na na hêen. <sup>16</sup> Mi jan bula pima ari mi bira bi jan kõ di mi dii kudiilee deenjba, see bua-la ê Wia kuorii-la si jan kõ. Nii ê nê la jan jinj kudiile-la la si die bubuõj."

<sup>17</sup> Nii nê u jonj nyunyuala ari sininj a lõlle Wia anj jonõ pi u nanzõõba-la a bul, "Má laa nyunyuala deenj ari sininj a kaa kpaã ma titia. <sup>18</sup> Mi bulaa pima, mi bira bi jan kõ di mi nyua sininj deenj, see bua-la ê Wia kuorii-la si jan kõ." <sup>19</sup> Nii nê Yesu bira jonj boroboro a lõlle Wia anj kaa chõge chõge, a jonõ piba anj bul, "Mi yaraa nê nii. [Mi jonõ pi Wia a tinj ma wiaa, má laa dii. Má nãa nii a liliisi mi wiaa." Nii nê ba dii. <sup>20</sup> Ba si dii kialinj dẽrê, u bira jonj nyunyuala ari sinjla a piba anj bul, "Nyunyuala ari sininj deenj nãa nji-falii nê Wia ta. Mi chalinj si jan jaase

ma wiaa ne tii Wia ta nji-la.] <sup>21</sup> Má bee na, nii-la si jan kenmi yalle he la tuon ne, la kala didii kiaa. <sup>22</sup> Mi-na Nuhuobiine Bie, mi jan suu ari Wia si dage nii, ama nii-la si jan jonmi yalle, u jan na heen yuge." <sup>23</sup> Nii ne Yesu nanzooba-la suomo pipiese donjo ari ba tuon kubee ne jan naa nii?

*Yesu haritooroo ken ba tuon kuhian wiaa kaa lilere*

<sup>24</sup> Nii ne Yesu haritooroo ken ba tuon kuhian wiaa kaa lilere. <sup>25</sup> Yesu bula piba a bul, "Nialin si bi juu tinjaa naa ken ba dolun kaa hon ba niaa nyun ne. Kuoroo donsun sii ben niaa, ba cho di nialin ba sii ben kenba kaa yiyire ni-zom. <sup>26</sup> Ama u bi maga di ma njjaa nii. U maga di ma tuon kuhian ne birime hanbie, di ma sipaa-laara ma tin tintinjaa pipima. <sup>27</sup> Nuu ne hono, an ka u donjo naa kudiilee pupu u didii. Ba di nii-la si naa kudiile-la pupu, ba tuon kubee ne yuga? Nii-la si hono, ka ba naa kudiilee pupu, u ne yuga. Ama mi-na he ma tuon a tin tintinjaa pipima.

<sup>28</sup> Mi si he ma teen nii, mi na heen worun. An ka ma chin mi seme an bimi via ta. <sup>29</sup> Mi Nyimma pimi dolun ne di mi naa kuoribalin. Nii titia ne mi ma jan pima dolun di ma naa kuoribalaa. <sup>30</sup> La di ma kala jan dii kudiilee Wia kuorii-la tuon. Ma jan hon

kuori-kpasinnin nyun a dii Iziral tinjaa ta-gentisi-la fii ari balia-la sariya."

*Yesu bula pi Piita ari u jan bul duu buu jin*

*Mat. 26.31-35; Maak 14.27-31; Joon 13.36-38*

<sup>31</sup> Nii ne Yesu bula pi Saamon Piita a bul, "Saamon, Sitaani laa wonbiin ne duu magise ma kala, duu pore ni-zonjoo ni-bonjoo le, ari paara si yie chaare mii-jorun ta, an ka mii-biin nii. <sup>32</sup> Ama mi chule Wia pi n-na Saamon ne di n yarida si lel. Di n ne miira ko mi teen, pe n naanbiirin ma le di ba chin ba yarida naan le worun."

<sup>33</sup> Nii ne Piita bula pu a bul, "Mi Tiina, mi sii to n harin nii, di ba ne ton dia maa, mi paala naa siri ne di ba kenmi ma to. Di ba kpun maa, mi ma naa siri ne di mi suu."

<sup>34</sup> Nii ne Yesu bula pi Piita a bul, "Piita, ji-bele bi jan yel, an ka di n bul naansiin butori ari n bimi jin."

*Yesu bula pi u haritoorola moribiee ari tokobiee wiaa*

<sup>35</sup> Nii ne Yesu piese u haritooroo a bul, "Bua-la le mi si tinma, ma lii an bi moribiee koo sulli-gbanjin ma koro, a bi nentennee tun bulia bulia ma koro. Ma si mu nii, ma che kun ne kaa?" Ba bul di ba bi kun-kala che ka. <sup>36</sup> Nii ne Yesu bula piba a bul, "Ama leele ma ku-la kala si ken moribiee koo sulli-gbana, u maga duu jon. Ma ku-la ma kala si bi

tokobii kene, u maga duu jon u geri-balin yalle ne a yoo dɔŋɔ. <sup>37</sup> Nii ne ba ŋmunse Wia tenin tuɔŋ. Ba bula ari ba jan kenu pe wu-bɔŋ ŋjaaraa le. Wiaa deenba ba ŋmunsa a tigemi le ne. Ba kala jan ŋaami le ne, bee wiaa wialin kala ba si ŋmunsa a tigemi le, ba kala jan sene ŋaa a dɛɛ." <sup>38</sup> Nii ne u haritooro bula pu a bul, "La Tiina, bee na, tokobiee balia ne ŋla." Nii ne Yesu bula piba a bul, "Má len di wii-la kala bal."

*Yesu chuɔle Wia pel-la nyun ba sii yire Oliv*

*Mat. 26.36-46; Maak 14.32-42*

<sup>39</sup> Nii ne Yesu lii Jerusalem le a jil peel-la nyun ba sii yire Oliv, ari u si venɛɛ ŋaa nii. Nii ne u haritooro to u harin mu. <sup>40</sup> Ba si yi lee-la, u bula piba a bul, "Má chuɔle Wia, di Sitaani sí wuo nyisema." <sup>41</sup> U si bul nii dɛɛ, u kieli u haritooro-la a mu sipaan muapilii, a tuu kpirimi duu chuɔle Wia. <sup>42</sup> U chuɔle Wia a bul, "Mi Nyimma, di ŋ tuɔɔruŋ le ne, liise hee-la sii kɔmi le. Ama mi-na tuɔɔruŋ le dee ŋ-na tuɔɔruŋ le ne." [<sup>43</sup> Nii ne Wia tinɔara kubala lii wia nyun a ku tuu u teen a pu dolun. <sup>44</sup> U tuɔŋ faasa chei kinken kinken. Nii ne u faasa chuɔle Wia ari sifesiŋ. U suolun paala nage chalin a tutuu tinteen.] <sup>45</sup> U si chuɔle Wia dɛɛ, u sii a miira mu u haritooro teen, di ba pin don, bee wiaa ba

tuɔŋ cheye ne worun. <sup>46</sup> Nii ne u piɛɛba, "Ma sene pin neɛ? Má sii chuɔle Wia, di Sitaani sí wuo nyisema."

*Ba ken Yesu*

*Mat. 26.47-56; Maak 14.43-50; Jɔɔŋ 18.3-11*

<sup>47</sup> Yesu ha sii bul wiaa nii, di ni-dan kɔ. Yesu haritooro-la fii ari balia-la dɔŋɔ ne kenba kaa kɔ lee-la. U yirin ne Judas. Ba si kɔ, Judas mu Yesu teen a guoru. <sup>48</sup> Nii ne Yesu bul, "Judas, ŋ sene guorimi ŋla ne di ŋ jon mi-na Nuhuobiine Bie yalleɛ?" <sup>49</sup> Yesu haritooro-la fa si he dime a na wii-la sii ŋaa, nii ne ba piɛɛ Yesu a bul, "La Tiina, ŋŋ che di la ken la tokobie-la taba neɛ?" <sup>50</sup> Nii ne Yesu haritooro dɔŋɔ jon tokobii, a ta nialin dɔŋɔ na-diin digilin kiese. Baal-la fa ŋaa nii-la si kpu pusun pipi Wia kuhian yomo ne. <sup>51</sup> Nii ne Yesu bul di u maga ne, di ba len. U si bul nii, u digi baal-la digilin le a ŋaa u fiele. <sup>52</sup> Nii ne Yesu piɛɛ nialin si kpu pusun pipi Wia kuhiasin ari Wia-dia kuhiasin ari ba tan kuhiasi-la si kɔ di ba kenu, a bul, "Mi ŋaa gaaru neɛ? Ma sii kori tokobiee ari tanguloo a kuko di ma kenmii?" <sup>53</sup> La di ma kala ne fa he Wia-dia le tapulii-na kala, an ka ma bi walima di ma kenmi dime. Ama bua deen le ne birimin tiina Sitaani pima dolun ma wuo kɔ di ma kenmi."

*Piita si u bi Yesu jin*

*Mat. 26.57-58, 69-75; Maak 14.53-54, 66-72; Jooj 18.12-18, 25-27*

<sup>54</sup> Nii ne ba ken Yesu. Ba kenu kaa mu nii-la si kpu pusun pipi Wia kuhian dia, ka Piita daa tuto ba harin. <sup>55</sup> Di ba he nyinin kaala tuon. Ba si jua, Piita mu pe nialin sii wieni nyin-la le. <sup>56</sup> Tolibie kubala ma he dime. U fa nna dia-la tintinnu ne. U na Piita duu hono aa wieni nyinin. U bul, "Baala deen ma faa to Yesu harin ne." <sup>57</sup> Nii ne Piita si, "Haal, mi paala buu jin." <sup>58</sup> Muapilii di baal kubala ma nau a bul, "N ma nna ba dono ne." Nii ne Piita bira bul duu dee. <sup>59</sup> U bi diene bira di baal don ma ne nii a pese ari Piita nna Yesu haritooro dono ne, bee wiaa u ma nna Galilii tiina ne. <sup>60</sup> Nii ne Piita bira bula pu a bul, "Baal, mi paala bi wii-la n sii bul jin." Piita sii bul nii, u bi bula dere di jibebele yele. <sup>61</sup> Nii ne la Tiina Yesu daase a ben Piita. U liisi wii-la Yesu fa si bula pu ari u jan bul naansiin butori ari u bi u-na Yesu jin, ka di jibebele-na yel. <sup>62</sup> Nii ne Piita lii a faasa yel.

*Ba sieri Yesu le an nmobu*

*Mat. 26.67-68; Maak 14.65*

<sup>63</sup> Nii ne nialin si po Yesu sieru le an nmobu. <sup>64</sup> Ba voo u siaa to a nmobu an piesu duu dage nii-la si nmobu. <sup>65</sup> Ba bul wiaa ma yuge a tuusu.

*Ba ken Yesu ko nialin si yie hilime vuvuure wiaa sipaan*

*Mat. 26.59-66; Maak 14.55-64; Jooj 18.19-24*

<sup>66</sup> Tan si pula, Juu tinnaa tan kuhiasin ari nialin si kpu pusun pipi Wia kuhiasin ari Wia tenin kerichiba, ba hilimi a len ba ken Yesu ko ba sipaan, lee-la ba si yie hilime vuvuure wiaa. <sup>67</sup> Nii ne ba piesu a bul, "Dagela, n ne nna nii-la Wia si liisaa?" Nii ne Yesu bula piba a bul, "Di mi ne bula pima maa, ma bi jan laa dii. <sup>68</sup> Di mi ne saa bira piesema wii maa, ma bi jan bul wii-kala, <sup>69</sup> ama a lii lele a kaa mu mina Nuhuobiine Bie jan hon Wii-balin seme, ni-duon dihonun." <sup>70</sup> Nii ne ba kala piesu a bul, "N ne saa nna Wia Bie koo?" Nii ne Yesu bula piba a bul, "Ma bul worun ne, mi ne sene nna Wia Bie." <sup>71</sup> Nii ne nialin bul, "La bira bi siada tiina kala ka che. La titia nia wii-la u si bula ne."

## 23

*Ba ken Yesu kaa mu Paalit sipaan*

*Mat. 27.1-2, 11-14; Maak 15.1-5; Jooj 18.28-38*

<sup>1</sup> Nii ne niaa deenba kala sii, a ken Yesu a kaa mu Paalit teen. <sup>2</sup> Dime ne ba suomo a bul wialin u si nna chei a bul, "La ken baala deen duu nyise la niaa di ba via la wonbii-la la sii to, an bul di ba si lanpoo ma time pi Rom tinteen kuori-balin. U bira bula a tige u titia le di

u ne ɲaa Kirisito, nii-la Wia si liisa, a bul duu ɲaa kuoro ma.”<sup>3</sup> Nii ne Paalit piɛsu a bul, “N ne ɲaa Juu tinɲaa kuoro koo?” Yesu bula pu a bul, “Oo, mi ne.”<sup>4</sup> Nii ne Paalit bula pi nialin si kpu pusun pipi Wia kuhiasin ari ni-dan-la kala si hilime a bul, “Mi bi wii-la na baala deen si ɲaa chei a mage di ba kpuu.”<sup>5</sup> Nii ne nialin sii bul Yesu teen ha pese a bul, “U dage niaa a ɲaa ba ɲinɲaa taaweɪ ne. U suomi ɲii Galilii le ne, a sii ko Judiya tinteen, a golle lee-la kala aa dageba, a ɲaa ba ɲinɲaa taaweɪ an leele ko Jerusalem ma ɲla.”

*Ba keɲ Yesu mu Herod teen*

<sup>6</sup> Paalit si nii ari Yesu lii Galilii ne, u piɛse nialin sii bul Yesu teen a bul, “Baala deen ɲaa Galilii tiina neɛ?” Nii ne ba bula pu di kuoro Herod ne faa ben tintee-la Yesu si lia.<sup>7</sup> Paalit si nii ɲii, u ɲaa ba kenu kaa mu Herod teen. Bua-la le di Herod he Jerusalem le.<sup>8</sup> Herod tuon kala tore u si na Yesu, bee wiaa u nii u wiaa faafaa kala ne a yie chiche duu nau. U faa che di Yesu ɲaa wu-kpuɲkpuɲ ne duu na.<sup>9</sup> Nii ne Herod piɛse Yesu wiaa yuge, ama u bi wii bula.<sup>10</sup> Nialin si kpu pusun pipi Wia kuhiasin ari Wia tenin kerichiba-la sii tuora mu Yesu le a faasa bul u teen worun.<sup>11</sup> Herod ari u laali-yuoroo sieri Yesu le a dogisu, an leɲ ba jon geribalin ku-zon kubala laalu, an

miira kenu mu Paalit teen.<sup>12</sup> Herod ari Paalit faa yuo donɔ ne. A lii tapulii-la ne, ba sin a dii nanɔɲsunɲ.

*Ba si di ba keɲ Yesu mu kpu*

*Mat. 27.15-26; Maak 15.6-15; Joon 18.39-19.16*

<sup>13</sup> Nii ne Paalit yire nialin si kpu pusun pipi Wia kuhiasin ari Juu tinɲaa kuhiasin ari niaa donsun a bula piba a bul,<sup>14</sup> “Ma keɲ baala deen kaa ko mi teen a bula pimi ari u ɲaa di niaa via wonɲiila la la sii to ne. Mi saa piɛsu ma kala sipaan. Wialin ma sii bul u teen a bul duu cheye, mi bi ba tuon kubala ma na duu ɲaa chei.<sup>15</sup> Herod ma si bi na u si ɲaa wii-la chei, ɲii ne tii u leɲ ba bira kenu kaa ko daha. Má bee na, baala deen bi wii-kala ɲaa chei a mage di ba kpuu.<sup>16</sup> Mi jan leɲ di ba viiru an jonɔ ta.” [<sup>17</sup> Ama diisin kielin gbiele-la ne yiena kala, ba yie leɲ Paalit liise dansarikaba tuon kubala ne a ta, nii-la Juu tinɲaa si cho di ba liisa.]

<sup>18</sup> Nii ne nialin kala kpia gon a bul di ba kpu Yesu an liise Barabas piba.<sup>19</sup> Bua kubala le, niaa sii ɲaa taaweɪ ne ba ta-balin le. Barabas kpu nuu, ɲii ne tii ba kenu mu to dia.<sup>20</sup> Paalit si cho duu jon Yesu ta, ɲii ne u bira suomo bul wiaa pi ni-dan-la.<sup>21</sup> Ama ba faasa kpia gon a bul, “Má kpaasu daageɛɛ nyun, má kpaasu daageɛɛ nyun!”<sup>22</sup> Nii ne Paalit

pieseba naanjiin butorimunj a bul, "Bee ne tii? Bee kunj ne baala deenj naa chei, ka mi-na bi na? Mi-na bi na u si naa wii-la chei a mage di ba kpuu. Mi jan lenj di ba viiru anj jonu ta." <sup>23</sup> Ka ba ha pese, a faasa kpia gonj a bul, "U maga di ba kenj Yesu a kpaase daa-gese nyunj ne." Ba sii naa gonj nii, Paalit ku sei ba kua <sup>24</sup> a bul di ba kenj Yesu kpaase daa-gese nyunj, ari nialinj fa si sul nii. <sup>25</sup> Nii ne Paalit liise nii-la ba fa si cho a ta, nii-la ba fa si kaa to dia a tinj u si naa taawei a kpu niaa le. U jonj Yesu a he ba nisinj le di ba naa wii-la ba si cho.

*Ba kenj Yesu kpaase daa-gese nyunj*

*Mat. 27.32-44; Maak 15.21-32; Jooj 19.17-27*

<sup>26</sup> Nii ne ba kenj Yesu kaa lii di ba kaa mu kpaase daa-gese nyunj. Ba sii mu nii, ba chenj baal kubala baa yire Saamonj a lii Sariini, duu lii бага a jujuu Jerusalem. Ba kenu a jonj daa-gese-la baasu a naa u kaa tuto Yesu harij. <sup>27</sup> Ni-danj-la ma to u harij. Ba tuonj haalaa yuga a yiyel Yesu wiaa. <sup>28</sup> Nii ne Yesu miira daaseba anj bula piba a bul, "Jerusalem haalaa, ma si mi wiaa yel. Ma yel ma titia ari ma biirinj wiaa. <sup>29</sup> Bee na tapulaa ka ko ne, niaa janj bul, 'Hapiraa ari haala-la si bi biirinj lula di ba diese, ba tuonj janj tɔre.'" <sup>30</sup> Bua-la le ne niaa janj bul di peelee tele toba, di dundollunj ma jere toba.

<sup>31</sup> Mi si nage tii-weyin, anj ka ba dogisemi nja, ee ne ba janj naama ma le, ma ma si nage tii-hilia le?"

<sup>32</sup> Ba si kenj Yesu mu nii, ba kenj ni-bomɔ-la balia ma kaa mu di ba kpuba a pe Yesu le.

<sup>33</sup> Nii ne ba mu yi lee kubala baa yire nyu-kunjkogulo. Ba si yi lee-la, ba jonj Yesu ari ni-bomɔ-la balia a kpaaseba daa-gese nyunj. Donjo he daa-gese nyunj si he Yesu na-diinj, donjo ma he daa-gese nyunj si he u na-gua.

<sup>34</sup> Nii ne Yesu chuole Wia a bul, "Mi Nyimma, jonj wii-la ba si naa a cheba, bee wiaa ba bi jinj wii-la kala ba sii naa." Nii ne ba tonse Yesu genninj wiaa di ba kpa, a jinj geri-la nuu-kala si janj laa. <sup>35</sup> Niaa donsunj ma chinj dime a bibenj, anj ka juu tinjaa kuhiasinj sisieru le a bul, "Duu ne naa Kirisito, nii-la Wia si liisa, ma lenj duu laa u titia ta yeii. U wuo laa niaa tita ne." <sup>36</sup> Laali-yuoroo ma sieru le a naa sininj si nyala kaa mu pu duu nyua <sup>37</sup> anj bula pu duu ne naa juu tinjaa kuoro, duu laa u titia ta. <sup>38</sup> Ba ma nmunsa mere u daa-gese-la le a bul, "Juu tinjaa kuoro ne nja."

<sup>39</sup> Nii ne ni-bomɔ-la donjo ma si sage daa-gese nyunj tuuse Yesu a bul, "N ne naa nii-la Wia si liisa koo? Saa laa nj titia ta anj pe laala ma ta." <sup>40</sup> Nii ne ni-bomɔ-la donj-la kpiu le a bula pu a bul, "N bi Wia ka faa? La duu kala ne juu wu-bala. <sup>41</sup> U maga di ba naala-na nii ne,



bεε wiaa la ηaa wu-bon̄ nε, an̄ ka u-na bi wii-kala ηaa chei.” <sup>42</sup> Nii nε an̄ ka u bula pi Yesu a bul, “Yesu, di η nε dii kuoron̄, liisi mi ma wiaa.” <sup>43</sup> Nii nε Yesu bula pu a bul, “Wutitii nε mi bulaa piη, la diη kala jan̄ hε Wia-jan̄ jiniη.”

*Yesu suba*

*Mat. 27.45-56; Maak 15.33-41; Joon̄ 19.28-30*

<sup>44</sup> Wia si ku mage nyugbara, leriη kala biri lim a mu yi didaanin̄, ka leriη bira pulle. <sup>45</sup> Patiisa nε fa hε Wia-dia tuon̄. Ba kaa kεrε. U kiesε balia. <sup>46</sup> Nii nε ka Yesu faasa yirε a bul, “Mi Nyimma, mi jon̄ mi titia a hε η nisiη lε.” U bul nii nε an̄ wiesi u wiesi kati an̄ suu. <sup>47</sup> Nii nε di laali-yuoroo zolo kuhian̄ kubala fa chin̄ dime. U na wii-la si ηaa, a denne Wia a bul, “Wutitii, baala deen̄ fa ηaa tuo-pul tiina nε, u bi wii-kala cheye.” <sup>48</sup> Nialiη kala fa si hilime dime di ba na wii-la si jan̄ ηaa an̄ leele na wii-la si ηaa, ba paa ba nisaa chun̄ ba nyun̄ lε a miira mu dia. <sup>49</sup> Nialiη kala fa si jin̄ Yesu, ari haala-la kala fa sii to u hariη a lii Galilii ko, ba chin̄ di-bolii a na wiaa deen̄ba kala.

*Ba hugi Yesi*

*Mat. 27.57-61; Maak 15.42-47; Joon̄ 19.38-42*

<sup>50-51</sup> Baal kubala ma nε fa hε dime. U yiriη nε Josef. U fa ηaa juu tiina nε a lii Arimatiya. U fa ηaa nialiη

si yie hilimi a vuvuure wiaa don̄o nε. U fa ηaa tuo-pul tiina nε. Niaa ma juon̄u jirima. U ma fa gberε Wia kuorii-la nε duu ko. Ba fa sii vuure di ba kpu Yesu a sene ηaa nii a kpuu, u fa bi seye. <sup>52</sup> Nii nε u sii mu Paalit teen̄ a sul Yesu ku-suun̄. Paalit len̄ u mu sori. <sup>53</sup> U sori Yesu nii, a jon̄ geri-pula a beu, a jon̄u hugi. U kenu kaa mu hugi bun̄ ba si loso lε nε. Ba ha bi nuu-kala hugo dime. <sup>54</sup> Tapulii-la di ba ηaa siri didaanin̄ a gberε ba che-wiesii-la. <sup>55</sup> Haala-la fa si to Yesu hariη a lii Galilii ko, ba to Josef hariη a mu na bun̄-la, a na nii u si hugi Yesu. <sup>56</sup> Nii nε ba miira mu dia a che tulaali di ba kaa mu tise Yesu. Che-wiesii-la cheen̄ ba sii a wiesi. Wialiη Moosis fa si ηmun̄sa bil di niaa tuto bul nii nε.

## 24

*Yesu sii suun̄ lε*

*Mat. 28.1-10; Maak 16.1-8; Joon̄ 20.1-10*

<sup>1</sup> Lahadi cheen̄ siipuuraa, haala-la sii a ken̄ tulaalii-la a kaa mu bua-la leriη. <sup>2</sup> Ba si yi lee-la, ba na di tabii-la ba fa si kaa to bua-la niin̄ suro. <sup>3</sup> Nii nε ba juu bua-la tuon̄, ama ba bi la Tiina Yesu ku-suun̄ na. <sup>4</sup> Ba chin̄ dime a bi jin̄ wii-la kala ba si jan̄ ηaa. Ba ηaa di ba beη, di baalaa balia nε chin̄ ba seme nii. Ba genniη faasa tutul. <sup>5</sup> Fawullun̄ ken̄ haala-la. Ba ken̄ ba nyusun̄ gure. Nii nε baala-la pieseba a bul,

“BEE NE tii ma chiche nii-la si weye ni-suununj tuonj? <sup>6</sup> U tuo daha. U sie ne. Má liise mu yi wii-la u fa si bula pima le, bua-la le u fa si he Galilii le. <sup>7</sup> U fa bula pima ari ba janj jonj u-na Nuhuobiine Bie a he haache diiree nisinj le di ba kpaasu mere daagesee nyunj duu suu, anj ka duu sii suunj le tapulaa batoro cheenj.” <sup>8</sup> Nii ne haalala liise yi wii-la u fa si bula piba. <sup>9</sup> Ba miira lii buala lerinj a mu bula pi Yesu haritooro fii ari kubala-la, ari nialinj donsunj fa sii to u harinj wialinj kala si naa. <sup>10</sup> Haala-la si mu bua-la lerinj ne nja: Mæeri Magidalinj, Juana ari Jeems naanj Mæeri. Ba di haalaa donsunj ne bul wiaa deenba si naa a pi Yesu nanjzoba-la. <sup>11</sup> Ama Yesu nanjzoba-la fa biina ari wii-la haala-la si bula naa wunyarinj ne. Ba bi laa dii. [ <sup>12</sup> Ama Piita sii a fá mu buala lerinj, a mu juu bua-la, a bej a na genni-la ba fa si jonjo be Yesu di ba pina, anj ka u bi kunj-kala na. Nii ne u miira mu dia a kenj wii-la si naa a bibiine. U kperu.]

*Niaa balia fa sii to Yesu harinj mu tanj kubala baa yire Emeyas*

*Maak 16.12-13*

<sup>13</sup> Tapulii-la titia ne niaa balia fa sii to Yesu harinj mumu tanj kubala baa yire Emeyas. Emeyas ari Jerusalem yi ari meel-daasinj balipe ne. <sup>14</sup> Ba sii mu tanj-la nii, ba bula pipi donjo wialinj kala si naa. <sup>15</sup> Ba sii bul

wialinj nii a vuvuure, nii ne Yesu titia ku yiba ba kala vivenj. <sup>16</sup> Ba nau, ama ba bi wuo jinj ari u ne. <sup>17</sup> Nii ne Yesu pieseba a bul, “Wu-bee ne maa bul nii wonbiinj lee?” Nii ne ba chinj, ba tuonj kala chei. <sup>18</sup> Ba tuonj donjo yirinj ne Kiliapas. Nii ne Kiliapas piesu a bul, “Nj dunjuna ne naa nuhuoru a he Jerusalem le a bi wii-la si naa tapulaa deenba niaa?” <sup>19</sup> Nii ne u pieseba a bul, “Wu-bee ne nii?” Nii ne ba bula pu a bul, “Wii-la si naa Yesu si lii Nazaret le. Baala deenj fa naa nii-la fa sii bul wiaa, Wia Dinj-zonj-la dolunj le ne. Wialinj u sii naa ari wialinj u sii bul fa kenj dolunj Wia ari nuhuobiinee kala teenj. <sup>20</sup> Nialinj si kpu pusunj pipi Wia kuhiasinj ari juu tinjaa kuhiasinj jonjo he Paalit nisinj le duu kpuu. Nii ne Paalit naa ba kpaasu mere daagesee nyunj u suu. <sup>21</sup> La faa yiele ari u ne naa nii-la si ko duu laa Iziral tinjaa ta. Ba si kpu Yesu nii, u tapulaa batoro ne jininj. <sup>22</sup> La di haala-la donsunj fa sii to Yesu harinj ku bul wii pila. U kperila. Ba sii mu buala lerinj siipuuraa anj bi Yesu ku-suunj na. <sup>23</sup> Ba ku bul nii pila. Ba bula ari ba na Wia tinjaaraa ari duosoo tuonj. Ba bula piba ari Yesu weye ne. <sup>24</sup> La tuonj donsunj ma mu bua-la lerinj a na ari wii-la haala-la si bula naa wutitii ne. Ba bi Yesu na.” <sup>25</sup> Nii ne Yesu bula piba a bul, “Ni-

yaaraa, ma digilaa yunje, ma bi wialinj nialinj fa sii bul wiaa, Wia Diŋ-zoŋ-la dolun le laa dii. <sup>26</sup> Ma bi jinj ari u maga di nii-la Wia si liisa, na heeŋ ne aŋ-na juu u kuorii-la tuoŋ a laa yirinj?" <sup>27</sup> Nii ne Yesu bula piba wialinj kala ba si ŋmuŋsa Wia teninj tuoŋ a tigeu le, a suomi tenj-la Moosis si ŋmuŋsa a kaa mu tenni-la kala nialinj sii bul wiaa, Wia Diŋ-zoŋ-la dolun le si ŋmuŋsa le. U dageba wialinj kala bubuoŋ.

<sup>28</sup> Ba sii mu nii, ba ku kpage taŋ-la ba sii mu. Nii ne Yesu ŋaa a nage duu ha kiele mu ne. <sup>29</sup> Nii ne ba kenu lere bil di taŋ bire, duu lej di ba chua. Nii ne u juu di ba piŋ. <sup>30</sup> Ba si he dia tuoŋ, ba hoŋ di ba dii kudiilee. Nii ne Yesu joŋ boroboro a chuole Wia aŋ kaa choŋge piba di ba dii. <sup>31</sup> U si ŋaa nii, ba siaa luome ba jinj ari Yesu ne. Ka u lel ba sipaanj. <sup>32</sup> Nii ne ba bula pi doŋo a bul, "La yaraa fa fiela ne woruj u si bul wiaa pipila wonjiinj le, aŋ pe didagela Wia teninj wialinj bubuoŋ." <sup>33</sup> Nii ne ba sii lima lima a miira mu Jerusalem, a na Yesu haritooro-la fii ari kubala, ari nialinj doŋsunj ma fa sii to Yesu harinj. <sup>34</sup> Nii ne Yesu haritooro-la fii ari kubala-la bula piba a bul, "La Tiina Yesu sene sii ne. U keŋ u titia kaa ko dage Saamoŋ ne!" <sup>35</sup> Nii ne nialinj baliaminj ma bul wii-la si ŋaa wonjiinj le, ari nii ba si ku jinj ari la Tiina Yesu ne.

Ba si di bua-la le u si keŋ boroboro choŋge a piba le ne ba jinj ari u ne.

*Yesu keŋ u titia ku dage u haritooro*

*Mat. 28.16-20; Maak 16.14-18; Joŋ 20.19-23; Yesu nanz. tinjinjaa 1.6-8*

<sup>36</sup> Nialinj balia sii bul wialinj nii, di Yesu titia ne chinj ba tutuobaaninj nii [a bula piba a bul, "Ma jan hoŋ ari yarifielaa."] <sup>37</sup> Nii ne fawulluj keŋba, ba biina ari ni-dima ne ba na nii. <sup>38</sup> Nii ne Yesu pieseba a bul, "Be ne tii fawulluj keŋma maa walime ma titia? Be ne tii ma tuobiinaa vugime nii?" <sup>39</sup> Má beŋ a na mi nisaa ari mi naasinj a jinj di mi ne. Má dige na. Ma jima ari ni-dima bi yaraa kene ari mi si keŋ nii." [ <sup>40</sup> U si bul nii, u keŋ u nisaa ari u naasinj kala a dageba di ba na.] <sup>41</sup> Ba ha bi laa dii, ka wii-la sima piba kinkeŋ. U ŋaaba wu-kpuŋkperere. Nii ne u pieseba a bul, "Ma keŋ kudiilee ne?" <sup>42</sup> Nii ne ba joŋ cheŋfilinj ba si wasa a pu. <sup>43</sup> U laa chaŋ ba sipaanj.

<sup>44</sup> Nii ne u bula piba a bul, "Mi fa bula pima ari wii-na kala ba fa si ŋmuŋsa a tigemi le jan ŋaa wutitii. Ba ŋmuŋse wiaa a tigemi le wialinj tuoŋ Moosis fa si ŋmuŋsa bil di niaa tuto ari wialinj tuoŋ nialinj fa sii bul wiaa, Wia Diŋ-zoŋ-la dolun le fa si ŋmuŋsa, ari wialinj tuoŋ ba si ŋmuŋse Wia teninj seme doŋo ba sii yire Saams.

Ba kala ku ɲaa wutitii.”

<sup>45</sup> Nii ne Yesu ɲaa ba keɲ wu-jiminɲ di ba wuo jinɲ Wia teninɲ wiaa bubuɔɲ. <sup>46</sup> Nii ne u bula piba a bul, “Nla ne ba ɲmuɲsa bil:

‘U maga di Kirisito, nii-la  
Wia si liisa na heɲɲ a  
suu  
aɲ sii suuɲ le tapulaa  
batori cheɲɲ.’

<sup>47</sup> Ba bira ɲmuɲsa di niaa jaɲ bul Wia wiaa, nii-la Wia si liisa doluɲ le, dunia lee-na kala, a bula piba di ba bir-ima lii ba haacheba le di Wia joɲ ba haacheba cheba, di ba suomo ɲaa ɲii Jerusalem le.”

<sup>48</sup> Nii ne Yesu bira bula piba a bul, “Ma ɲaa wiaa deenba kala si ɲaa siada, di ma wuo bula pi niaa. <sup>49</sup> Má bee na, mi jaɲ joɲ ku-la mi Nyimma si si u jaɲ joɲo pima a hema le. Ama má gberɛ Jerusalem le, see bua-la yie di doluɲ lii Wia teenɲ a ku tuu hema le.”

*Wia joɲ Yesu jil Wia-jaɲ  
Maak 16.19-20; Yesu  
naɲz. tinɲinɲaa 1.9-11*

<sup>50</sup> Nii ne u keɲ u haritooro-la ba lii ta-bal-la le a joɲ wonɲbiinɲ a mumu Betani di-irinɲ. Dime ne u keɲ u nisaa kaa chu toba le aɲ chuɔle Wia piba di Wia peba le.

<sup>51</sup> U ha si chuɔle Wia pip-iba ɲii a susulu duu peba le, ɲii ne u sii ba teenɲ, [ka Wia joɲu kaa jil Wia-jaɲ.]

<sup>52</sup> Nii ne ba chuɔlu aɲ mi-ira mu Jerusalem. Ba tuɔɲ kala faasa toɛ. <sup>53</sup> Ba yie juu Wia-dia bua-na kala le a chuchuɔle Wia.

## WIA WU-ZOMO-LA JOOŊ SI NMONSA

*Wii-la si pi niaa miisinj*

1 Ka di Wia ne ɲaa dunia, wii-la fa he dime ne, u fa he Wia teen ne. Ba di Wia kala fa ɲaa kubala ne. 2 Bunɓun kala ne u fa he Wia teen. 3 U le ne Wia to a ta kuɗ-kala. Kuɗ-kala si he dunia le, u ne ta. 4 Wii-la fa weye ne a keɗ pulumuɗ kaa ku pi niaa. 5 Pulun-la chaane biriminj tuɗɗ, birin-la bi pulun-la wuo to.

6 Nii ne Wia tinj u tinɗaara kubala baa yire Jooŋ. 7 U ne ko duu bul pulun-la wiaa pi niaa. U ɲaa nii di nuu-kala wuo nii a tou le a laa pulun-la wiaa dii. 8 Jooŋ fa dee bi pulun-la ɲaa, ama u ta ko duu bul pulun-la wiaa ne a pi niaa.

9 Nii ne pulun-la titia ku tuu dunia duu chaana he nuu-kala le. 10 U fa he dunia-la le Wia si tou le ta ne, ama dunia niaa buu jin. 11 U ko u titia jan, ama u jan niaa buu laa. 12 An ka niaa donsun-na laa u laa u wiaa dii. Nii ne u piba wonbiinj di ba wuo ɲaa Wia biirinj. 13 Niaa deenba bi naga baala si jin u haala ba lul biirinj nii ne. Wia titia ne ɲaa ba Nyimma.

14 Nii ne wii-la birime nuhuobiine a ku he la tuɗɗ. U fa he la teen a fifala

nennige woruɗ, a keɗ wu-titii. La na u si keɗ yirinj. Yirinj deen u Nyimma Wia ne joɗo pu, ari u ne ɲaa u Bie kala. 15 Jooŋ bul u wiaa pila. Wialinj u si heele bul ne ɲla: "Nii-la si jan to mi harinj ko, u ne kiimi, bee wiaa u he dime ne, ka ba-na lulmi." 16 Ku-la kala u si kene, la ma na kpaalinj u tuɗɗ ne. U yie fala nennige a pela le buana kala le. 17 Wia to Moosis le ne a bil u niinj pila. Ama Yesu Kirisito le ne Wia to a fala nennige a pela le woruɗ, a dagela wutitii. 18 Nuukala ha bi Wia naa. U Bii-balala si honj u seme ne dagela u wiaa.

*Jooŋ bula ari u dee bi Kirisito ɲaa*

*Mat. 3.1-12; Maak 1.1-8; Luuk 3.1-18*

19 Juu tinɲaa fa si he Jerusalem le tinj nialinj si kpu pusunj pipi Wia ari nialinj ba sii yire Liivai timma, ba ko Jooŋ teen a piesu a bul, "Kubee ne ɲ ɲaa?" 20 Nii ne Jooŋ bi wiaa nyia an chaasa bul ari u dee Kirisito, nii-la Wia si liisa. 21 Nii ne ba bira piesu a bul, "Kubee ne saa ɲ ɲaa? ɲ ne ɲaa Ilaaja?" U bul duu dee. Nii ne ba bira piesu, "ɲ ne ɲaa nii-la sii bul wiaa, Wia Din-zon-la dolun le la sii gberu?" U bira si duu dee. 22 Nii ne ba bira piesu, "Kubee ne saa ɲ ɲaa? U maga di ɲ dagela, di la mu bula pi nialinj si tinla. Wu-bee ne ɲ bul a tige ɲ titia le?" 23 Nii ne Jooŋ bul, "Mi

ne ŋaa yiikori-la si he giri-bine tuoŋ aa bul, 'Má wase wonŋbiin bil di la Tiina kɔ.' Ńla ne Azaaya fa bul di ma ŋaa." Azaaya fa ŋaa nii-la síi bul wiaa, Wia Diŋ-zoŋ-la doluŋ le ne.

<sup>24</sup> Nialin fa si ku piese Jooŋ wiaa deenba, Farisii tinŋaa ne fa tinba. <sup>25</sup> Nii ne ba bira piese Jooŋ a bul, "Ń dee bi Kirisito ŋaa, nii-la Wia si liisa, ŋ dee bi Ilaaja ma ŋaa, ŋ bira bi nii-la síi bul wiaa, Wia Diŋ-zoŋ-la doluŋ le ma ŋaa. Bee ne saa tii ŋ fufo niaa Wii-chuoŋe liin?" <sup>26</sup> Nii ne Jooŋ bul, "Mi síi fo niaa Wii-chuoŋe liin, liin dunɔɔna ne mi kaa fufoba, ama nuu doŋ ne he ma tuoŋ nii, ka ma buu jin. <sup>27</sup> U ne to mi hariŋ kɔ. Mi paala bi maga di mi ken u nenɔtenɔne ŋmenin ma kaa puri." <sup>28</sup> Ba síi bul wiaa deenba kala nii, Betani le ne ba he, Jooɔan fuo-la seme doŋɔ. Lee-la ne Jooŋ faa fo niaa Wii-chuoŋe liin.

*Jooŋ bul Wia piesi-la wiaa*

<sup>29</sup> U taŋ si pula, Jooŋ na Yesu duu kɔ. U si nau, u bul, "Bee na, Wia Pie-bie-la ne nii. U ne laa dunia haache ta. <sup>30</sup> Baala deen wiaa ne mi faa bul nii, mi si bula ari nuu ne jaŋ kɔ mi hariŋ. U ne kiimi, u he dime ne, ka bana lulmi. <sup>31</sup> Mi fa bi jin nii-la kala u si ŋaa. Ama mi ta ku fufo niaa Wii-chuoŋe liin ne, di Iziral tinŋaa ku jimu." <sup>32</sup> Wialin Jooŋ si bula pi niaa a tigeu le ne ŋla: U si, "Mi na

Wia Diŋ-zoŋ-la duu lii wia nyuŋ a nage kokomo, a ku tuu togiliu le. <sup>33</sup> Mi ma titia fa buu jin. Ama Wia si tinmi di mi fo niaa Wii-chuoŋe liin, u ne bula pimi a bul, 'Ń jaŋ na Wia Diŋ-zoŋ-la duu ku tuu a he nuu le, tiina ne jaŋ joŋ Wia Diŋ-zoŋ-la a he niaa le!' " <sup>34</sup> Nii ne Jooŋ bira bul, "Mi sene nau a bulaa pima ari u ne ŋaa Wia Bie."

*Nialin si laa sipaan ku to Yesu hariŋ*

<sup>35</sup> U taŋ si pula, Jooŋ ari u haritooro balia bira chin lee-la a na Yesu. <sup>36</sup> Jooŋ si nau duu bal, nii ne u bul, "Bee na, Wia Pie-bie-la ne ŋla." <sup>37</sup> U haritooro-la balia nii u si bul wiin deen a to Yesu hariŋ. <sup>38</sup> Yesu miira daase, di baa to u hariŋ. U pieseba a bul, "Bee kuŋ ne maa che?" Nii ne ba ma piesu a bul, "La kuhian, nii le ne ŋ jujuu?" <sup>39</sup> Nii ne Yesu bula piba a bul, "Má kɔ na mi síi juu lee-la." Nii ne ba to u hariŋ mu a na lee-la u síi juu. Bua-la le ŋaa didaanin ne. Nii ne ba he u teen wii-kaanin tiire juu. <sup>40</sup> Nialin balia fa si nii wii-la Jooŋ si bula a to Yesu hariŋ, doŋɔ yirin ne Anɔuru. U fa ŋaa Saamoŋ Piita ŋaana ne. <sup>41</sup> Nii ne Anɔuru ma che u malima Saamoŋ lerin, a bula pu a bul, "La na Kirisito, nii-la Wia si liisa." <sup>42</sup> U ken Saamoŋ kaa kɔ Yesu teen. Nii ne Yesu benu an bula pu a bul, "Ń ne Jooŋ bie Saamoŋ. Ba jaŋ kenin

kaa yire Kiifas." Kiifas ari Piita fa ŋaa yiri-bala nɛ. U bubuɔŋ nɛ buŋ.

ku tuu mi-na Nuhuobiine Bie teen, aŋ miira jijil."

## 2

*Yesu yire Filip ari Nataniel*

*Ba gbieli ha-jaari gbiele*

<sup>43</sup> U taŋ si pula Yesu sii duu mu Galilii tinteen. Nii nɛ u na Filip a bula pu a bul, "To mi hariŋ." Nii nɛ Filip to u hariŋ. <sup>44</sup> Filip fa lii Betisaada nɛ, taŋ-la Anɔduru ari Piita ma si lia. <sup>45</sup> Nii nɛ Filip na Nataniel a bula pu, "La na nii-la, u wiaa nɛ Moosis fa ŋmuŋsa bil di niaa tuto nii. Nialin sii bul wiaa, Wia Diŋ-zɔŋ-la doluŋ lɛ ma fa bul u wiaa nɛ, ba ŋmuŋsa bil. Ba fa ŋmuŋsa ari u nɛ Josef bie Yesu a lii Nazaret." <sup>46</sup> Nii nɛ Nataniel piesu a bul, "N ha na ku-zɔŋ duu lii taŋ-la ba sii yire Nazaret?" Nii nɛ Filip bula pu a bul, "Ku nau." <sup>47</sup> Yesu si na Nataniel duu kɔ u teen, u bubul u wiaa a bul, "Nia deen ŋaa Iziral tiina titii nɛ. U keŋ wutitii." <sup>48</sup> Nii nɛ Nataniel piesu a bul, "Ɛɛ nɛ ŋ ŋaa jinmi?" Nii nɛ Yesu bula pu a bul, "Mi naŋ nɛ ŋ si hoŋ tutogo bubuɔŋ, ka Filip-na yirin." <sup>49</sup> Nii nɛ Nataniel bula pu a bul, "Kuhian, ŋ nɛ ŋaa Wia Bie. N nɛ ŋaa Iziral tinŋaa kuoro maa." <sup>50</sup> Nii nɛ Yesu piesu, "Mi si bula bul di mi naŋ di ŋ hoŋ tutogo bubuɔŋ nɛ tii, ŋ laa mi wiaa dii koo? N jaŋ na wu-kpuŋkperisin a kii ŋla." <sup>51</sup> Nii nɛ Yesu bula pu a bul, "Wutitii nɛ mi bulaa pin, ma jaŋ na wia nyuŋ duu suro, di Wia tinɔdaaraa lii dime a

<sup>1</sup> Tapulaa balia si bala, baa che di ba gbieli ha-jaari gbiele taŋ kubala lɛ baa yire Keena. Keena he Galilii tinteen lɛ nɛ. Yesu naan ma fa he dime. <sup>2</sup> Ba fa yire Yesu ari u haritooroo maa ha-jaari gbiele-la lerin. <sup>3</sup> Ba sii gbieli gbiele-la nii, ba nyunyua sinin. Ba si nyua sinin kala dere, Yesu naan bula pu di sin-la dere nɛ. <sup>4</sup> Nii nɛ Yesu bula pu a bul, "U bi maga di ŋ dagemi nii mi si jaŋ ŋaa. Bua-la lɛ mi si jaŋ tin tinŋaa ha bi yie." <sup>5</sup> Yesu naan saa bula pi dia-la tinŋinnaa a bul, "Má ŋaa wiila kala u si bula pima." <sup>6</sup> Juu tinŋaa fa keŋ ba Wii-chuɔle wonbiin nɛ aa sɔŋ liin. Nii wiaa pupoi-balaa balidu ma fa he dime ari liin. Kuŋkala tuɔŋ liin yi galaŋ mara a kaa mu galaŋ mara ari fii. <sup>7</sup> Nii nɛ Yesu bula pi dia-la tinŋinnaa a bul, "Má ŋaa liin a sɔ pupoye-la." Ba ŋaa liin sɔ pupoye-la pilim pilim. <sup>8</sup> Nii nɛ Yesu bira bula piba di ba ŋaa lii-la pupoi-la tuɔŋ a kaa mu pi nii-la sii beŋ gbiele-la. Ba ŋaa mu pu. <sup>9</sup> U laa lii-la nyua a na lii-la, duu birime sinin. U bi jin lee-la ba si na sin-la. Ama dia-la tinŋinnaa-na jin. Nii nɛ u yire haal-la tiina <sup>10</sup> a bula pu a bul, "Gbiele-na kala, lee-na kala ba yie laa sipaan nɛ a keŋ si-zomuŋ a lii ba nyua.

Nuu-kala si nyua vøge, η saa-na keη siη-la si bi siη a kaa to hariη kō. Ka η-na jon si-zomun bil hariη u ku yi bua deen kala le.”

<sup>11</sup> Yesu si ηaa liiη birime sinij Keena le Galilii tinteen ne ηaa u wu-magil-bunηun u si ηaa. Dime ne u dage ηii Wia dolun si heu le. U haritooro si na ηii, ba laa u wiaa dii.

<sup>12</sup> A lii gbiele-la hariη Yesu ari u naan ari u ηaanaa ari u haritooro sii mu Kapenam tinteen a he dime tapulaa banmenē.

*Yesu juu Wia-dia*

*Mat. 21.12-13; Maak 11.15-17; Luuk 19.45-46*

<sup>13</sup> U ka mua, ka di Juu tinηaa diisij kielij gbiele-la yi. Nii ne Yesu sii mu Jerusalem a juu Wia-dia. <sup>14</sup> U si juu dime, u na niaa di baa yalle nesij, piesee ari kokosun. Nialij sii yere moribee ma hōη ba teebulba nyun. <sup>15</sup> Nii ne Yesu keη ηmenij a birime chiba a kiri nialij ari ba piesee ari ba nesij kala ta ba lii Wia-dia-la le, aη keη moribii-yiyerile-la ma teebulba-la kaa birima chu, aη keη ba moribii-biin ma jaase tinteen. <sup>16</sup> Nii ne ka u bula pi nialij ma sii yalle kokosun a bul, “Má kaa lii dia-la tuōη. Ma sí mi Ny-emma dia kaa birime yōbō.” <sup>17</sup> U haritooro liisi wii-la ba si ηmunse Wia tenij tuōη a bul, “Wia-dia wiaa ka diimi ne worun a nage nyiniη.” <sup>18</sup> Nii ne Juu tinηaa miira kō u teen a piesu, “Bee kun

wu-magil ne η jan wuo jono dagela ari η keη dolun di η wuo ηaa wiin deen?” <sup>19</sup> Nii ne Yesu bula piba a bul, “Má ηmoo Wia-dia deen lo, mi jan wuo jon tapulaa batori a bira saau.” <sup>20</sup> Nii ne ba bula pu a bul, “Jisij mahij balia ari balidu ne ba jono saa Wia-dia deen, ka η-na bul di η jan keη tapulaa batori saau koo?” <sup>21</sup> Ama Yesu si bul Wia-dia-la wiaa ηii, u titia yaraa wiaa ne u bubul ηii. <sup>22</sup> Bua-la le u si sii sunη le ne u haritooro liisi a yi wii-la u fa si bula le. Nii ne ba laa wialij ba fa si ηmunsa Wia tenij tuōη dii, a laa wialij ma Yesu si bula dii.

<sup>23</sup> Yesu fa si he Jerusalem le, diisij kielij gbiele-la le, niaa yuga a laa u wiaa dii a tin ba si na wu-magila-la u sii ηaa le. <sup>24</sup> Ama Yesu bi u titia kaa pulle ba teen, bee wiaa u jin nuhuobiinee kala ne worun. <sup>25</sup> U fa bi maga di nuu-kala bira bul nuhuobiinee wiaa pu, bee wiaa u fa jin nuhuobiinee tuōη wu-kenij kala ne.

### 3

*Nikodiimas cheη Yesu*

<sup>1</sup> Baal kubala ne fa he dime. Baa yire Nikodiimas. U fa ηaa Juu tinηaa kuhian ne a he Farisii tinηaa paati tuōη. <sup>2</sup> Titanη kubala u sii kō Yesu teen a bul, “Kuhian, la jima ari η ne ηaa nii-la Wia si ta di η dage niaa. Nuu-kala bi jan wuo ηaa wu-magila-la η sii ηaa, see di



Wia pe tiina le.” <sup>3</sup> Nii ne Yesu bula pu a bul, “Wutitii ne mi bulaa piṅ, nuu-kala bi jaṅ wuo juu Wia kuorii-la tuṅ, see di ba wasa lul tiina.” <sup>4</sup> Nii ne Nikodiimas piesu a bul, “Ee ne ba-nihian jaṅ wuo ṅaa di ba bira wasa lulu? U jaṅ bira wuo juu u naaṅ luoruṅ di u bira wasa lulu koo?” <sup>5</sup> Nii ne Yesu bul, “Wutitii ne mi bulaa piṅ, nuu-kala bi jaṅ wuo juu Wia kuorii-la tuṅ, see di Wia joṅ u Diṅ-zṅ-la he tiina le, di tiina ma pe fo Wii-chuṅle liiṅ. <sup>6</sup> Nuhuobiine yie lul nuhuobiine u keṅ miisiṅ ne tiṅteen deṅ le. Aṅ ka Wia ma yie joṅ u Diṅ-zṅ-la a heu le duu keṅ miisiṅ Wia teen. Nuhuobiine bi Wia Diṅ-zṅ-la jaṅ wuo joṅo he nuu le. <sup>7</sup> Si leṅe duu ṅaa wu-kpuṅkperere ṅ le mi si bula piṅ ari u maga di ba wasa lulun. <sup>8</sup> Pelin yie lu lee-na kala u si cho ne. ṅ ninii u doṃṃ, ama ṅ bi jin lee-la u si lii ko, koo ṅ bira bi jin lee-la u sii mu. U saa nage nii ne nuu-kala le Wia si joṅ u Diṅ-zṅ-la heu le.” <sup>9</sup> Nii ne Nikodiimas pieṣe, “Ee ne wiin deṅ jaṅ wuo ṅaa?” <sup>10</sup> Nii ne Yesu bula pu a bul, “ṅ ṅaa kerichi-bal ne Iziral tiṅteen le, aṅ ka beṣ ne tii ṅ bi wiin deṅ bubuṅ jin? <sup>11</sup> Wutitii ne mi bulaa piṅ, la yie bul wii-la la si jima ne, a ṅaa siada ari wii-la la si na. Ama ma kuṅ-kala bi che di ma sei wii-la la si bula. <sup>12</sup> Mi bul dunia wiaa ne pipin, ka ṅ bi laa dii. Ee ne saa ṅ

jaṅ wuo laa dii di mi ne bul Wia-jaṅ wiaa piṅ? <sup>13</sup> Nuukala ha bi Wia-jaṅ jila, see mi-na Nuhuobiine Bie si lii dime ku tuu. <sup>14</sup> Moosis fa si he giri-bine tuṅ, u fa keṅ hoṅ a libi dimin, a joṅo mere daaṅ le a kaa jee. Nii titia ne ba jaṅ kpaase mi-na Nuhuobiine Bie ma daaṅ le a kaa jee, <sup>15</sup> di nuu-kala si laa mi wiaa dii, u jaṅ wuo keṅ miisi-la si bi dere.

<sup>16</sup> Wia cho dunia niaa a mu kieli, nii ne tii u joṅ u Bii-bala a pila, di nii-la kala si laa u wiaa dii, u bi jaṅ lel, ama u jaṅ keṅ miisi-la si bi dere. <sup>17</sup> Wia bi u Bie ta duu ku tuu laa dunia niaa wiaa jin, ama duu laa dunia niaa ta. <sup>18</sup> Nuuna kala si laa Yesu wiaa dii, u bi jaṅ dii u tiina sariya a joṅ cheerin pu, ama nii-la kala si bi u wiaa laa dii, u paala dii u tiina sariya a joṅ cheerin pu, beṣ wiaa u bi Wia Bii-bala-la wiaa laa dii. <sup>19</sup> Wii-la si tii Wia dii dunia niaa sariya a joṅ cheerin piba ne ṅla: Pulumun ku tuu dunia ne, ama niaa cho birimin ne a kii pulun-la, beṣ wiaa baa ṅaa wu-boṅṅṅṅ ne. <sup>20</sup> Nuuna kala sii ṅaa wu-boṅṅṅṅ bi pulumun cho, u bi pulumun tuṅ lii, beṣ wiaa u bi che di u wu-boṃṃ-la lii pulumun. <sup>21</sup> Ama nuuna kala sii ṅaa wu-zṅṅṅṅ cho pulumun a yie lili pulumun tuṅ, di niaa wuo na ari uu ṅaa wu-zṃṃ-la Wia dolun le ne.”

*Jṅṅ cheṅ Yesu*

<sup>22</sup> Nii hariṅ ne Yesu ari u haritooro lii Jerusalem a

mu Judiya tinṭeen, a dieni mua dime aa fo niaa Wii-chuፊፊ liiṅ. <sup>23</sup> ገጽ ma fa he lee kubala baa yire Aanፊፊ ፊፊ a kpage Seelim aa fo niaa Wii-chuፊፊ liiṅ, beፊፊ wiaa liiṅ fa yuga kinፊፊ dime. Niaa faa mu u teen u fufoba Wii-chuፊፊ liiṅ. <sup>24</sup> (Bua-la ፊፊ di ba ha bi ገጽ kaa tፊፊ dia.)

<sup>25</sup> Nii ne ገጽ haritooroo dፊፊsuṅ ari ገጽ tiina kubala keṅ liiṅ sፊፊmuṅ wiaa a kaa lilere. <sup>26</sup> Ba mu ገጽ teen a piesu a bul, “La kuhian, ፊፊ liisi baal-la fa si he ገጽdan fuo-la seme dፊፊፊ wiaa ne, nii-la ፊፊ si bul u wiaa? Leeፊፊ u maa fo niaa Wii-chuፊፊ liiṅ ne, niaa kala mumu u teen.”

<sup>27</sup> Nii ne ገጽ bul, “Nuu-kala bi jaṅ wuo keṅ kuṅ-kala, see di Wia joፊፊ pu. <sup>28</sup> Ma titia ፊፊa mi dansia, ka mi bul ari mi dee bi Kirisito-la ፊፊa, nii-la Wia si liisa, ama Wia ta tinፊፊ mi ne di mi laa u sipaan. <sup>29</sup> Ha-faliṅ tiina ne tii haala, ama di ha-faliṅ tiina nanፊፊፊ ne chin dime a jijegili wialiṅ ba sii bul, u tuፊፊፊ yie tፊፊፊ ne duu ne nii ha-faliṅ tiina-la yiikoro. Nii titia ne mi tuፊፊፊ ma tፊፊፊ woruṅ Yesu nyuṅ. <sup>30</sup> U maga duu ne miira ku ፊፊa ni-baliṅ mi teen, ka di mi miira ፊፊa ni-bie.”

*Nii-la si lii Wia-jaṅ*

<sup>31</sup> Nii-la si lii Wia-jaṅ ne kii kuṅ-kala. Nii-la si lii tinṭeen ፊፊa tinṭeen kuṅ ne aa bul tinṭeen wiaa. Ama nii-la si lii Wia-jaṅ ne kii kuṅ-kala. <sup>32</sup> Uu bul wialiṅ u si na aṅ

nii ma ne, ama nuu-kala bi u niinፊፊ wiaa seye. <sup>33</sup> Nii-la kala si sei u niinፊፊ wialiṅ jima ari Wia he dime ne a keṅ wutitii. <sup>34</sup> Mi-na nii-la Wia si tima, mii bul Wia niinፊፊ wiaa ne, beፊፊ wiaa Wia joṅ u Diṅ-zፊፊ-la doluṅ kala a pimi ne. <sup>35</sup> Mi Nyimma Wia cho mi-na u Bie, a joṅ u doluṅ kala a he mi nisinፊፊ ፊፊ. <sup>36</sup> Nii-la kala si laa mi-na Wia Bie wiaa dii, u jaṅ keṅ miisi-la si bi dere; ama nii-la kala si bi mi-na Wia Bie wialiṅ ka to, u bi jaṅ kፊፊ duu keṅ miisi-la si bi dere, ama Wia jaṅ na baaniṅ u tiina nyuṅ a kaa mu wuu.

**4**

*Yesu bul wiaa a pi Samaria tinṭaa haala*

<sup>1</sup> Nii ne Farisii tinṭaa nii ari Yesu na niaa yuge a kii ገጽ, baa tou u foba Wii-chuፊፊ liiṅ. <sup>2</sup> (Ama Yesu titia bi nuu-kala Wii-chuፊፊ liiṅ fo, u haritooroo dunፊፊፊ ne.) <sup>3</sup> Yesu si nia di baa bul nii, u sii lii Judiya tinṭeen ፊፊ a miira mu Galilii tinṭeen. <sup>4</sup> U sii mu Galilii nii, u to Samaria tinṭeen <sup>5</sup> a ku yi taṅ kubala Samaria tinṭeen ፊፊ baa yire Sika. Tinṭee-la Jekፊፊb fa si joፊፊ pi u bie Josef fa kpage dime ne. <sup>6</sup> Jekፊፊb fa si lu vil-la he dime. Yesu fa si venፊፊ wonፊፊፊፊ nii a lol, u mu hoṅ vil-la seme.

<sup>7</sup> Di wia jil nyu-gbaṅa, nii ne Samaria tinṭaa haal kubala kፊፊ vil-la duu ፊፊa liiṅ. Nii ne Yesu bula pu a bul, “ፊፊa liiṅ pimi di mi nyua.” <sup>8</sup> Bua-la ፊፊ di

u haritooroo-na mu taŋ-la tuoŋ di ba yoo kudiilee. <sup>9</sup> Nii ne Samaria tinŋaa haal-la piese Yesu a bul, “Bee ne tii ŋ-na Juu tiina chiche di mi-na Samaria tiina ŋaa liiŋ piŋ di ŋ nyua?” Juu tinŋaa ari Samaria tinŋaa bi wii pe. Nii ne tii haal-la bul nii. <sup>10</sup> Nii ne Yesu bula pu a bul, “Di ŋ ne fa jin ku-la Wia si joŋo pi niaa, a fa jin nii-la si suluŋ di ŋ ŋaa liiŋ pu duu nyua, ŋ fa jaŋ sulu duu piŋ lii-la si keŋ miisinj.” <sup>11</sup> Nii ne haal-la piesu a bul, “Kuhian, ŋ bi guga keŋe di ŋ kaa ŋaa liiŋ, ka vil-la ma luŋ. Nii le ne saa ŋ jaŋ na lii-la si keŋ miisinj?” <sup>12</sup> La naabalima Jekob ne joŋ viliŋ deenj pila. Ba di u biirin ari u pusuj kala nyua viliŋ deenj liiŋ ne. N jaŋ bul di ŋ kii Jekob nee?” <sup>13</sup> Nii ne Yesu bula pu a bul, “Nuu-kala si nyua liiŋ deenj, lii-nyuasuj jaŋ bira keŋ tiina. <sup>14</sup> Ama nii-la kala si jaŋ nyua lii-la mi si jaŋ pu, lii-nyuasuj bira bi jaŋ kenu da. Lii-la mi si jaŋ pu jaŋ birime lii-bulo u tuoŋ le a bubul, a pu miisinj si bi dere.” <sup>15</sup> Nii ne haal-la bula pu a bul, “Mi Tiina, pimi liiŋ deenj, di lii-nyuasuj bira simi keŋ, di mi bira si ko di mi ŋaa liiŋ daha.”

<sup>16</sup> Nii ne Yesu bula pu a bul, “Mu yire ŋ bala aŋ miira ko daha.” <sup>17</sup> Haal-la si duu bi bala keŋe. Nii ne Yesu bira bul, “N kiaa sima ŋ si jaŋ bul di ŋ bi bala keŋe, <sup>18</sup> bee wiaa ŋ fa jaa baalaa banonj ne, ama ma di baal-la si he

dime leele sene bi ŋ bal-titii ŋaa. N bul wutitii ne pimi.”

<sup>19</sup> Nii ne haal-la bula pi Yesu a bul, “Mi Tiina, u naga ŋ ŋaa nii-la sii bul wiaa, Wia Diŋ-zonj-la doluj le ne.”

<sup>20</sup> Haal-la bira bula pu a bul, “La-na Samaria tinŋaa naabalimaba, baa chuole Wia peeliŋ deenj nyuj ne, aŋ ka ma Juu tinŋaa si, di Jerusalem ne lee-la la si maga di laa chuole Wia.”

<sup>21</sup> Nii ne Yesu bula pu a bul, “Bua kubala jaŋ yi, niaa si bi jaŋ chuole la Nyimma Wia peeliŋ deenj nyuj koo Jerusalem le. Laa wiin deenj dii. <sup>22</sup> Ma-na Samaria tinŋaa sene bi jin nii-la ma sii chuolu. La-na Juu tinŋaa jin Nii-la la sii chuolu ne. Nii-la le Wia si jaŋ to a laa dunia niaa ta, u lii Juu tinŋaa tuonj ne. <sup>23</sup> Bua kubala jaŋ yi, u paala yi ne, nialiŋ si jaŋ sene chuole Wia, ba jaŋ chuole la Nyimma Wia ari wutitii, Wia Diŋ-zonj-la doluj le. Nii ne Wia che di niaa chuchuolu. <sup>24</sup> Wia ŋaa ni-dima ne, nialiŋ sii che di ba chuolu, u maga di ba chuolu ari wutitii, u Diŋ-zonj-la doluj le.” <sup>25</sup> Nii ne haal-la bula pu di u jima ari nii-la ba sii yire Kirisito, nii-la Wia si liisa, u jaŋ ko. Di u ne ko, u jaŋ dageba wii-na kala. <sup>26</sup> Yesu miira bula pu a bul, “Mi ne nii, mi nii bul wiaa ŋ teenj nii.”

<sup>27</sup> Bua-la di Yesu haritooroo miira ko. U kperiba ba si ku nau, duu bul wiaa haal-la teenj. Ama ba kuŋ-kala bi niinj suro a piesu a

bul, "BEE NE NJ CHE U TEEN?" Koo ba bira bi piɛsa bul, "BEE NE TII NJ BUBUL WIAA HAAL-LA TEEN?"

<sup>28</sup> Nii ne haal-la lenj u pupoinj dime, anj miira mu janj tuɔŋ, a yire niaa a bula piba, <sup>29</sup> "Má kɔ na baal kubala si wuo dage wialinj kala mi si ŋaa. Nia deen ne saa ŋaa Kirisito, nii-la Wia si liisaa, koo?" <sup>30</sup> Niaa si nii wiinj deen, ba lii mu Yesu teenj. <sup>31</sup> Bua-la ɛ di Yesu haritooro ka sulu a bul, "La kuhianj, laa kiaa dii." <sup>32</sup> Nii ne Yesu bula piba a bul, "Mi keŋ kudiilee ne mi dii, ama ma bi kialinj wiaa jinj." <sup>33</sup> Nii ne Yesu haritooro-la miira chinaa piɛse doŋɔ a bul, "Nuu ne saa keŋ kudiilee ku pu koo?" <sup>34</sup> Yesu bula piba a bul, "Mi kudiilee ne di mi sei nii-la si tinji mi niinj, a tinj tinjimii-la u si pimi dɛɛɛ. <sup>35</sup> Ma si u ha ka cheŋsinj banese ne, ka di ma wase бага kiaa he doŋɔ ɛ. Mi janj bula pima, má bee na, kiaa ne bia a gollima njii di ma wasa he doŋɔ ɛ. Ba ne nialinj si ŋaa siri di ba laa mi wiaa dii. <sup>36</sup> Nialinj kala si wase kialinj he doŋɔ ɛ, ba janj laa ba time. Kialinj ma ma si wasa he doŋɔ ɛ, ba ma ne ŋaa nialinj si laa mi wiaa dii. Ba ne janj keŋ miisi-la si bi dɛɛɛ. Nii wiaa nialinj si kese nialinj si laa mi wiaa dii ari nialinj síi bul Wia wiaa pipi niaa, ba kala tuɔŋ janj tɔɛɛ. <sup>37</sup> Wii-la sene ŋaa wutitii ne. Nuu doŋ ne bul

Wia wiaa, nuu doŋ ma kese nialinj si laa mi wiaa dii he doŋɔ ɛ. <sup>38</sup> Mi tinjma ne di ma mu kese nialinj si laa mi wiaa dii. Ma si ŋaa njii, ma nage nialinj si mu wase бага kiaa ne he doŋɔ ɛ, бага-la ɛ ba si bi tima. Niaa doŋsunj ne tinj бага-la ɛ, ka ba pe nii бага-la sima njii."

<sup>39</sup> Nii ne niaa yuga Samaria tinjteenj ɛ a laa Yesu wiaa dii. Haal-la si bul wialinj Yesu si bula a tigeu ɛ ne tii ba laa Yesu wiaa dii njii. <sup>40</sup> Samaria nialinj si kɔ Yesu teenj, ba sulu duu chua ba teenj. Yesu sei a chua dime tapulaa balia. <sup>41</sup> Niaa bira yuga a laa u wiaa dii a tinj wialinj u si dageba wiaa. <sup>42</sup> Nii ne nialinj bula pi haal-la a bul, "Lɛɛɛ la laa u wiaa dii a tinj la titia si nii u niinj wiaa njii ne, u bi naga wii-la nj si bula pila ne tii. La titia wuo jinj ari u ne sene ŋaa dunia Laataara."

*Yesu vaare kerichi-bal kubala bie*

<sup>43</sup> Yesu si chua dime tapulaa balia-la, u sii a bira mu Galilii tinjteenj. <sup>44</sup> Yesu titia fa bula pi niaa ari nii-la síi bul wiaa, Wia Dinj-zɔŋ-la dolunj ɛ, ba buu jirima ka pa u titia janj ɛ. <sup>45</sup> U si mu Galilii tinjteenj njii, ba kenu worunj a tinj wialinj kala u si ŋaa ba-na Juu tinjŋaa gbielele ɛ Jerusalem ɛ. Ba ma fa he dime.

<sup>46</sup> Yesu bira miira mu leela ba síi yire Keena a he Galilii tinjteenj ɛ, lee-la u fa si keŋ liinj birime sininj. Di

kerichi-bal kubala fa he tan kubala le baa yire Kapenam le. U bie fa wiwiile. <sup>47</sup> U si nia di Yesu lii Judiya tinteen a ko Galilii tinteen, u mu Yesu teen a sulu duu ku vaare u bie pu, di u kpage suun ne. <sup>48</sup> Nii ne Yesu bula pu, "See di ma na wu-magilaa ari wu-kpunjkerisin, ma bi jan naa yarida." <sup>49</sup> Nii ne kerichila bula pu, "Mi kuhian, ko lagi di mi bie si suu." <sup>50</sup> Nii ne Yesu bula pu, "Mu dia, na bie duoro ne." Baal-la laa wii-la Yesu si bula pu dii a jon u wonbiin aa ven. <sup>51</sup> Uu mu nii, u tintinna ku chemu a bula pu ari bile duoro ne. <sup>52</sup> U piese duu na bua-la le u si duoro. Ba bula pu ari diamin wiiheye, kerifi kubala le ne waari-la lenu. <sup>53</sup> Nii ne bile nyimma jin ari bua-la le ne Yesu bula pu ari u bie ken miisin ne. Nii ne ba di u dia niaa kala laa u wiaa dii. <sup>54</sup> Wu-liamin ne nii Yesu si naa, u si bira lii Judiya ko Galilii tinteen.

## 5

*Yesu vaare baal kubala fuon le*

<sup>1</sup> Nii harin le ne Juu tinnaa gbiele kubala bira yi Jerusalem le. Nii ne Yesu sii mu lee-la.

<sup>2</sup> Jerusalem le, fuo kubala ne fa he dime. U fa kpage boiniri-la donjo ba fa si to juuu tan-la tuon ne. U yirin ne fa piese boinirin. Hi-iburu yikoro le ba ken fuo-la kaa yire Betizata. Ba he

palaa banon ne a kere fuo-la. <sup>3</sup> Nyanyal tinnaa fa yuga a he pala-la tuon. Donsun nyulime, donsun fa naa naa-suunun ari na-suunun tinnaa. Donsun ma gberike. [Ba fa hono gberere fuo-la di lii-la fa vuugi.] <sup>4</sup> Bua donjo Wia tinnaaru ne fa yie ku tuu fuo-la a ken lii-la kaa vuugi. Di Wia tinnaari-la ne ken lii-la vuugi, nyanyal tiina-la si laa sipaan tuu lii-la, u nyanyalin cho duu nage nii ma kala, u yie duori ne. <sup>5</sup> Baal kubala ma ne fa he nyanyal timma-la tuon. U fa wiila ne a yi jisin mara ari fi ari chori. <sup>6</sup> Yesu si na baal-la duu pin dime, u jin ari baal-la wiila dieni ne. Nii ne u piesu a bul, "Nn che di na duori ne?" <sup>7</sup> Nii ne baal-la bul, "Mi kuhian, mi bi nuu kene dahi u si jan wuo jonmi kaa tuu he fuo-la le di ba ne ken lii-la vuugi. Ba yie ken lii-la vuugi, mi nerike di mi tuu, di nuu laa sipaan tuumi le." <sup>8</sup> Nii ne Yesu bula pi baal-la a bul, "Sii a chuoli na boso a viiri." <sup>9</sup> Baal-la guu duori a sii chuoli u boso a chunaa viiri. Tapulun deen naa che-wiesii-la cheen ne.

<sup>10</sup> Nii ne Juu tinnaa bula pi baal-la Yesu si vaara a bul, "Jinin naa che-wiesii-la cheen ne. Uu kise ne di na chun boso tapulun deen cheen." <sup>11</sup> Nii ne baal-la ma bul, "Nii-la si vaaremi ne bula pimi di mi chuoli mi boso a viiri." <sup>12</sup> Nii ne ba piesu, "Kubee ne baal-la si bula pin di na chuoli na boso

a viiri?" <sup>13</sup> Ama baal-la bi nii-la si vaaru jin. Bua-la le di niaa si yuga nii, Yesu lel. <sup>14</sup> U nii harin ne Yesu na baal-la Wia-dia le a bula pu, "Na, leele η duoro ne, bira si haache ηaa. Di nii dee, wiin jan wasa juun le a kii nii." <sup>15</sup> Nii ne baal-la sii a mu bula pi Juu timma-la ari Yesu ne fa vaaru nii. <sup>16</sup> Yesu si ηaa nii che-wiesii-la cheen, nii ne tii Juu tinηaa suomo to Yesu naasin di ba dogisu. <sup>17</sup> Nii ne Yesu bula piba a bul, "Mi Nyimma ka tin ne, nii ne tii mi maa tin." <sup>18</sup> Yesu si bul nii ηaa Juu timma-la wasa chiche wonbii-la ba si jan to kpuu. Wiaa balia ne ba si duu cheye, u chei ba kisin le che-wiesii-la cheen, an pe bul di Wia ne ηaa u Nyimma, a bul nii di ba di Wia mage donjo ne.

### *Wia Bie si ken dolun nii*

<sup>19</sup> Nii ne Yesu bula pi niaa a bul, "Mi bul wutitii ne aa pima, mi-na Wia Bie bi wii-kala wuo ηaa mi titia dolun le. Mi yie ηinηaa wialin mi si na di mi Nyimma ηaa ne. Wii-na kala u sii ηaa ne, mi ma u Bie ηinηaa, <sup>20</sup> bee wiaa mi Nyimma chomi, mi si ηaa u Bie, aa dagemi wialin kala u titia sii ηaa. U jan dagemi wiaa a kii ηla di mi ηaa, di ba ηaama wu-kpunkpere. <sup>21</sup> Mi Nyimma si chise nialin si suba ba bira ken miisin nii, nii titia ne mi ma u Bie jon miisin a pipi nialin mi sii che. <sup>22</sup> Mi Nyimma-na bi nuu-kala sariya ka dii, ama

u jonba kala he mi-na u Bie nisin le ne. <sup>23</sup> U ηaa nii di nuu-kala to nii le a zizil mi-na u Bie ne, ari ba sii zil mi Nyimma nii. Nii-la-na kala si bi mi-na Wia Bie ka zil, u tiina ma bi mi Nyimma Wia si tinmi ka zil. <sup>24</sup> Wutitii ne mi bula pipima, nii-la kala si jegile nii mi nin wiaa a laa nii-la ma si tinmi wiaa dii, u jan ken miisi-la si bi dere. U tiina, ba bi u-na sariya ka dii, u saa lii suun bua le ne a ken miisin.

<sup>25</sup> Wutitii ne mi bula pipima, bua-la jan yi, u saa yie ma ne, di nialin si suba jan nii mi-na Wia Bie yiikoro. Nialin saa si nii mi yiikoro, ba jan ken miisin. <sup>26</sup> Mi Nyimma si ken dolun duu pi niaa miisin nii, nii ne u ηaa mi ma u Bie ken dolun di mi pi niaa miisin. <sup>27</sup> U saa pi mi-na u Bie dolun ne di mi dii niaa sariya, bee wiaa mi ne ηaa Nuhuobiine Bie. <sup>28</sup> Ma si leye di wiin deen ηaama wu-kpunkpere. Bua-la jan ko di nialin kala si suba a he buasun le jan nii mi yiikoro. <sup>29</sup> Ba saa jan sii ba buasun le. Nialin si ηaa wu-zonηoo jan sii a ken miisin, nialin ma si ηaa wu-bonηoo, di ba ma sii di Wia dii ba sariya a jon cheerin piba."

<sup>30</sup> Nii ne Yesu bira bul, "Mi-na bi wii-kala wuo ηaa mi titia dolun le. Mi yie dii sariya ari Wia si si mi dii nii ne. Nii wiaa mi si yie dii sariya-la nii, u ηaa wutitii ne, bee wiaa mi bi che di mi ηaa wii-la mi sii che, ama

wii-la nii-la si tin̄mi s̄ii ch̄e.  
<sup>31</sup> Di mi dun̄dūŋa n̄e bul mi wiaa, u bi yun̄un̄ jan̄ ken̄.  
<sup>32</sup> Ama nuu ma n̄e h̄e dime a bubul mi wiaa. Mi saa jima wialin̄ u s̄ii bul a tigemi l̄e, ba ŋaa wutitiiba n̄e. <sup>33</sup> Ma tin̄ ma tin̄daaraa ba mu JƆƆŋ teen̄ a pīes̄e mi wiaa. JƆƆŋ bul wutitii n̄e piba a tigemi l̄e. <sup>34</sup> U saa bi naga wialin̄ nuhuobiinee si bula a tigemi l̄e wiaa n̄e mi chil, ama mii bul wiin̄ deen̄ di ma ŋaa siri di Wia wuo laama ta n̄e. <sup>35</sup> JƆƆŋ fa nage chaanin̄ n̄e a chaan̄e, ma fa cho di ma nii u chaan̄-la sima muapilii. <sup>36</sup> Ama wiin̄ d̄on̄ɔ h̄e dime a laa mi nyun̄ a bubul wiaa. U n̄e kii JƆƆŋ. Tin̄timii-la mi s̄ii tin̄ n̄e ŋii, tin̄timii-la mi Nyimma si jon̄o pimi di mi tin̄. Ŋii daga ari mi Nyimma n̄e tin̄mi. <sup>37</sup> Mi Nyimma-la si tin̄mi, u maa bul mi wiaa n̄e. Ma ha bi u yiikoro nia, ma ha buu na ari ma siaa maa. <sup>38</sup> U niin̄ wiaa bima l̄e h̄e, b̄ee wiaa ma bi mina nii-la u si tima wiaa laa dii. <sup>39</sup> Ma yie fīes̄e siin̄ a kikarime Wia tenin̄. Ma bina ari ma n̄ii ŋaa ŋii, ma jan̄ wuo ken̄ miisi-la si bi der̄e. Wia ten̄-la ma s̄ii karimu ma paala bul mi wiaa n̄e. <sup>40</sup> Ka ma via di ma k̄o mi teen̄ a wuo ken̄ miisin̄. <sup>41</sup> Mi b̄i ch̄e di nuhuobiinee besemi l̄e. <sup>42</sup> Mi jima ari ma tuon̄ l̄e ma bi Wia cho. <sup>43</sup> Mi k̄o mi Nyimma dolun̄ l̄e n̄e, ka ma bimi kene worun̄. Di nuu d̄on̄ n̄e fa k̄o u titia dolun̄ l̄e, u n̄e ma fa jan̄ ken̄ worun̄. <sup>44</sup> Ma cho di niaa

besema l̄e n̄e, ama ma bi cho di Wia n̄e besema l̄e. Ɛ̄e n̄e saa ma jan̄ wuo laa mi wiaa dii? <sup>45</sup> Ma s̄i biina bul ari mi jan̄ jon̄ cheerin̄ pima mi Nyimma sipaan̄. Moosis n̄e jan̄ jon̄ cheerin̄ pima. Ma yīelaa kala h̄eu l̄e n̄e. <sup>46</sup> Di ma n̄e s̄ene fa laa Moosis wiaa dii, ma fa jan̄ laa mi ma wiaa dii. Mi wiaa n̄e Moosis fa ŋmun̄se ŋii. <sup>47</sup> Ama di ma bi wialin̄ u si ŋmun̄sa laa dii, Ɛ̄e n̄e ma jan̄ wuo laa wialin̄ mi s̄ii bul dii?"

## 6

*Yesu pi niaa bui ban̄ɔŋ kudiilee*

*Mat. 14.13-21; Maak 6.30-44; Luuk 9.10-17*

<sup>1</sup> U ŋii harin̄ n̄e Yesu mira chol mugi-balin̄ kubala baa yire Galilii mugi-balin̄. U yirin̄ d̄on̄ɔ ma n̄e Tabi-iras. <sup>2</sup> Niaa yuga a tuto u harin̄, b̄ee wiaa ba fa na u si ŋaa wu-magila-la a vaare nyanyal tin̄ŋaa n̄e. <sup>3</sup> Ŋii n̄e Yesu ari u haritooroo mu jil peelin̄ nyun̄ a h̄on̄ dime. <sup>4</sup> Di Juu tin̄ŋaa diisin̄ kielin̄ gbiele-la ma kpaga. <sup>5</sup> Ba si h̄on̄ dime, Yesu bee na di nid̄an̄ n̄ii k̄o u teen̄ ŋii. U pīes̄e Filip a bul, "Nii n̄e la jan̄ na kudiilee a yoo a pi niaa deen̄ba kala di ba dii voge?" <sup>6</sup> Yesu titia fa jin̄ wiila u si jan̄ ŋaa n̄e, ama u ta bul ŋii duu magise Filip n̄e. <sup>7</sup> Ŋii n̄e Filip bula pu a bul, "Di la n̄e yoo boroboro a yi siidi bui balia maa, u bi niaa deen̄ba wii-kala wuo ŋaa, ba d̄on̄sun̄ paala bi mua mua maa na." <sup>8</sup> Ŋii n̄e

di u haritooro dɔŋɔ hɛ dime, baa yire Anɔduru. U fa ŋaa Saamɔŋ Piita naanɔbie nɛ. U bula pi Yesu a bul, <sup>9</sup> “Bii-bie kubala nɛ hɛ la tuɔŋ a kɛŋ boroboroba banɔŋ ari chenɔfilee balia. Ɛɛ nɛ saa kiaa deenɔba jan wuo ŋaa niaa deenɔba?” <sup>10</sup> Nii nɛ Yesu bul di ba len di nialin hɔŋ. Di yan bumo tɔsɛ lee-la. Nii nɛ nialin hɔŋ. Ba tuɔŋ baalaa fa ŋaa bui banɔŋ nɛ. <sup>11</sup> Nii nɛ Yesu laa boroboroba-la a chuɔɛ Wia, an kaa kpaanialin si hɔnɔ. Nii nɛ u kɛŋ chenɔfilee-la ma kpaaba. Ba kuŋ-kala dii a vɔgɛ. <sup>12</sup> Ba si dii a vɔgɛ nii, u bula pi u haritooro di ba mu paa boroboroba-la si ka, di kuŋ-kala sɪ lɛl. <sup>13</sup> Nii nɛ ba paa ku-kaana-la nialin si die an ka, a sɔ siŋsiŋ fii ari balia. <sup>14</sup> Nialin si hɛ dime a na Yesu si ŋaa wu-magilin deen, ba bul di wutitii, baala deen sɛnɛ ŋaa nii-la sɪ bul wiaa, Wia Din-zɔŋ-la dolun ɛ ba si si u jan kɔ dunia nɛ.

<sup>15</sup> Nii nɛ Yesu jin ari ba ŋaa siri nɛ di ba ku fugu duu dii ba kuorun. Nii nɛ u mu faa peelin nyun.

*Yesu ven liin nyun*

*Mat. 14.22-33; Maak 6.45-52*

<sup>16</sup> Didaanin, Yesu haritooro tuu muga <sup>17</sup> a juu liin daboro, a bira duoro chol muga aa mu Kapenam. Tan bire di Yesu ha bi ba teen kɔ. <sup>18</sup> Bua-la ɛ di pel-duo kubala maa lu a kɛŋ liin kala ŋaa

u viviisi. <sup>19</sup> Di u haritooro-la ma duoro a mu yi meel-daasin batori koo banɛsɛ, an na Yesu duu ven liin nyun a kukɔ daboro-la teen. Ba si na nii, fawullun kɛnba. <sup>20</sup> Nii nɛ Yesu bula piba a bul, “Ma sɪ lenɛ di fawullun kɛnma, mi-na nɛ.” <sup>21</sup> Nii nɛ ba tuɔŋ tɔrɛ, ba jonu hɛ liin daboro-la tuɔŋ. Di liin daboro-la guu yi lee-la ba fa sɪ mu.

*Niaa yuga aa che Yesu*

<sup>22</sup> Tan si pula, ni-dan-la bira chin muga-la cholo sɛmɛ dɔŋɔ, lee-la ba si mua. Didaan-la ba fa na liin daboro kubala nɛ duu chin dime. Ba jima ari Yesu haritooro dunɔnɔ nɛ juu liin daboro-la. Yesu tuo ba tuɔŋ. <sup>23</sup> Ba si chin dime nii, liin daborusun dɔŋsun lii Tabiiras kɔ lee-la, a kpage lee-la Yesu fa si chuɔɛ Wia an jon boroboro piba di ba dii. <sup>24</sup> Nialin si na di Yesu tuo, u haritooro ma tuo, ba sɪ juu liin daborusu-la a mu Kapenam aa cheu.

*Yesu si duu nɛ ŋaa boroboro-la si kɛŋ miisin*

<sup>25</sup> Nialin si na Yesu muga-la cholo dɔŋɔ, ba piesu a bul, “La kuhian, bua bɛɛ ɛ nɛ ŋ kɔ daha?” <sup>26</sup> Nii nɛ Yesu bula piba a bul, “Wutitii nɛ mi bulaa pima, maa chemi a tin boroboro-la ma si dii vɔgɛ wiaa nɛ, ama wu-magila-la ma si na di mi ŋaa wiaa dee. <sup>27</sup> Ma sɪ ma dolun kala hɛ a che kudiilee. Kudiile-la jan chei, ama má tima chiche



kudiile-la si jaŋ pima miisi-la si bi dɛɛ. Kudiilee deenba mi-na Nuhuobiine Bie ne jaŋ pima, bɛɛ wiaa mi Nyimma Wia joŋ doluŋ hɛmi lɛ ne di mii ŋaa ŋii.”<sup>28</sup> Nii ne ba piesu, “ɛɛ ne la jaŋ wuo ŋaa a tiŋ Wia tiŋtiŋŋaa?”<sup>29</sup> Nii ne u bul, “Tiŋtimii-la Wia si cho di maa tiŋ ne ŋla: Má laa mi wiaa dii, mi ne nii-la Wia si tima.”<sup>30</sup> Nii ne ba piesu, “Wu-magili bɛɛ ne ŋ jaŋ ŋaa di la na a laa ŋ wiaa dii? Bɛɛ ne ŋ jaŋ ŋaa?”<sup>31</sup> Na la naabalimaba dii kudiilee ne girin tuoŋ baa yire Mana. Wialin ba si ŋmuŋɛ Wia tenin tuoŋ ne ŋla: Ba si,

‘U joŋ boroboro-la si lii wia nyuŋ ne a piba di ba dii.’ ”

<sup>32</sup> Nii ne Yesu bul, “Mi bul wutitii ne aa pima. Kialin Moosis si pima, u dee bima pa, Wia ne pima. Kudiile-la bima miisi-la si bi dɛɛ ka pa. Mi Nyimma nii pi niaa boroboro titii-la si lii Wia-jaŋ. Kudiile-la joŋ miisi-la si bi dɛɛ a pi dunia niaa.”<sup>33</sup> Boroboro-la Wia si ta, u lii Wia-jaŋ ne a ku tuu. U ne pi dunia niaa miisin.”<sup>34</sup> Nii ne ba bul, “La Tiina, ŋii-na vene joŋ boroboro deen pipila.”<sup>35</sup> Nii ne Yesu bula piba a bul, “Mi ne ŋaa kudiile-la sii pi niaa miisin. Nii-la kala si kɔ mi teen, losuŋ bira bi jaŋ keŋ u tiina. Nii-la ma si laa mi wiaa dii, lii-nyuasun ma bira bi jaŋ kɛnu.”<sup>36</sup> Mi bula pipima ari ma nami ne, ama ma bi mi wiaa laa dii.”<sup>37</sup> Nuu-na kala mi Nyimma

si joŋo pimi, u jaŋ kɔ mi teen. Niaa deenba kala si kɔ mi teen, mi bi jaŋ kɔ di mi kiriba ta,<sup>38</sup> bɛɛ wiaa mi lii Wia-jaŋ ku tuu di mi ŋaa wialin nii-la si tiŋmi sii che ne, mi titia tuotɔɛ wiaa dee.<sup>39</sup> Nla ne nii-la si tiŋmi chiche di mii ŋaa: di mi sí leŋe di nialin u si joŋo pimi kuŋ-kala lɛl, ama di mi chuuleba kala dunia diderin di ba keŋ miisin.”<sup>40</sup> Wialin mi Nyimma sii che ne ŋla: Di nuu-na kala si na mi-na u Bie a laa mi wiaa dii, duu jaŋ keŋ miisi-la si bi dɛɛ. Dunia diderin maa, ba ma jaŋ chisu suuŋ lɛ duu keŋ miisin.”

<sup>41</sup> Nii ne Juu timma-la suomo gugurime wiaa. U si si u ne ŋaa kudiile-la si lii Wia-jaŋ ku tuu, ŋii ne tii ba gugurime u wiaa ŋii.”<sup>42</sup> Nii ne ba bul, “Baala deen dee Josef bie Yesuu? La jin u nyimma ari u naan kala ne. ɛɛ ne saa lɛɛɛ u si duu lii Wia-jaŋ ne a ku tuu?”<sup>43</sup> Nii ne Yesu bira bula piba, “Má leŋ ma wialin gurimuŋ.”<sup>44</sup> Nuu-kala bi jaŋ wuo kɔ mi teen, see di mi Nyimma-la si tiŋmi ne keŋ u tiina kaa kɔ mi teen, di mi chisu suuŋ lɛ dunia diderin.”<sup>45</sup> Nialin sii bul wiaa, Wia Diŋ-zoŋ-la doluŋ lɛ, ba ŋmuŋɛ ŋla ne Wia tenin tuoŋ. Ba si, ‘Wia jaŋ dage niaa kala.’ Nuu-kala si ŋaa siri duu jegile nii wialin Wia sii dagu, a gunne u teen, u ne jaŋ kɔ mi teen.”<sup>46</sup> U ŋii ma saa bi nage ari nuu-kala na mi Nyimma Wia ne, see nii-la

si lii Wia teenj. U dunduna ne nau. <sup>47</sup> Wutitii ne mi bulaa pima, nii-la kala si laa mi wiaa dii, u jan keŋ miisi-la si bi dere. <sup>48</sup> Mi ne ŋaa kudiile-la sii pi niaa mi-isin. <sup>49</sup> Ma naabalimaba dii kudiile-la ba sii yire 'Mana' ne girin tuonj. Ari nii kala ba-na ha suba ne. <sup>50</sup> Ama kudiile-la si lii Wia-jan ku tuu, di nuu ne diiba, u bi jan suu. <sup>51</sup> Mi-na ne ŋaa kudiile-la si keŋ miisinj a lii Wia-jan ku tuu. Di nuu ne dii kudiilee deenba, u jan keŋ miisi-la si bi dere. Mi yaraa namia ne ŋaa kudiile-la mi si jan joŋo pi dunia niaa di ba keŋ miisi-la si bi dere."

<sup>52</sup> Yesu si bul nii, Juu tinŋaa suomo keŋ wii-la lilere a bul, "Ee ne baala deen jan wuo ŋaa a jonj u yaraa namia pila di la chanj?" <sup>53</sup> Nii ne Yesu bula piba a bul, "Wutitii ne mi bulaa pima, di ma ne bi mi-na Nuhuobiine Bie yaraa namia chanja, a nyua mi chalinj maa, ma bi jan keŋ miisi-la si bi dere. <sup>54</sup> Nii-la kala si chanj mi yaraa namia, a nyua mi chalinj maa, u jan keŋ miisi-la si bi dere. Di dunia ma ne dere, mi jan chise u tiina suunj le duu keŋ miisinj, <sup>55</sup> bee wiaa mi yaraa namia sene ŋaa kudiilee ne. Mi chalinj ma sene ŋaa lii-nyualun ne. <sup>56</sup> Nii-la kala si chanj mi yaraa namia-la a nyua mi chal-la, u jan he mi teenj a kaa mu wuu, mi ma jan he u teenj a kaa mu wuu. <sup>57</sup> Mi Nyimma-la si keŋ mi-

isinj a tinmi nii, nii ne mi ma keŋ miisinj. Nii titia ne nii-la ma si chanj mi yaraa namia ma jan keŋ miisinj a tinj mi wiaa. <sup>58</sup> Kudiile-la si lii Wia-jan ku tuu ne nii. U bi naga kudiile-la ma naabalimaba si die anj ha suu ne. Nii-la kala si dii kudiilee deenba, u jan keŋ miisi-la si bi dere." <sup>59</sup> Yesu bul wiaa deenba duu he Kapenam tinteenj le ne aa dage niaa Wii-chuole dia le.

*Wialinj si jan pi niaa miisi-la si bi dere*

<sup>60</sup> Niaa yuga a faa to Yesu harinj, a nii wialinj u si bula a bul, "Wiaa deenba u sii dage, ba heye kinkeŋ. Kubee ne jan wuo jegili wiaa deenba?" <sup>61</sup> Ba bi wii-kala bula, ka Yesu jinj ari u haritooro-la ka gurime wiaa ne a tinj wialinj u si bula le. Nii ne u pieseba a bul, "Wiinj deen leŋe ma na baaninj nee? <sup>62</sup> Ka di ma ne saa fa na mi-na Nuhuobiine Bie di mi miiraa mu lee-la mi si liaa? <sup>63</sup> Wia Din-zonj-la ne ku-la si pila miisi-la si bi dere. Nuhuobiine yaraa dolun-na ŋaa pei ne. U bi miisi-la si bi dere wuo pa. Wia Din-zonj-la wiaa ne mi bula pima. Ba jan pima miisi-la si bi dere. <sup>64</sup> Ama ma donsunj bi mi wiaa laa dii." Bunbunj kala Yesu fa jinj nialinj si bi u wiaa laa dii ne ari nii-la si jan jonj yalle. <sup>65</sup> Nii ne Yesu bira bul, "Wiinj deen wiaa ne tii mi bula pima ari nuu-kala bi jan wuo ko mi teenj, see di mi Nyimma pi u tiina wonbiinj duu wuo ko."

<sup>66</sup> A tinj wiinj deenj wiaa ni-dan-la fa si to u harinj, ba miire harinj. <sup>67</sup> Nii ne Yesu piese u haritooroo fii ari balia-la a bul, "Ma ma cho di ma miire mi harinj nee?" <sup>68</sup> Nii ne Saamɔŋ Piita piesu a bul, "La Tiina, kubee teenj ne saa la ma janj mu? Wialinj ŋ sii bul nii pi niaa miisi-la si bi dere. <sup>69</sup> Leele la laa dii a jinj ari ŋ ne ŋaa Wia Tuɔ-pul Tiina." <sup>70</sup> Nii ne Yesu pieseba a bul, "Ma niaa fii ari balia dee mi liisee? Ama ma dɔŋɔ ŋaa diŋdɔŋ ne a ŋaa Sitaani tiina." <sup>71</sup> Judas, Saamɔŋ Isikarɔt bie wiaa ne u faa bul nii. U fa he u haritooro-la fii ari baliaminj tuɔŋ ne, ama u ne fa janj jonj Yesu yalle.

## 7

### *Yesu mu gbieli-balin Jerusalem le*

<sup>1</sup> Nii harinj Yesu gugolle Galilii tinjteenj. U bi cho duu mu golle Judiya tinjteenj le, bee wiaa Juu tinjŋaa fa si he Judiya tinjteenj le ka che di ba kpuu ne. <sup>2</sup> Di Juu tinjŋaa gbieli-bal kubala yie. Gbiele-la le ba yie lej ba diisinj anj he leŋŋee ne a jujuu. Di gbiele-la ne dere, ba bira miira mu a jujuu ba diisinj. <sup>3</sup> Nii ne Yesu ŋaanaa bula pi Yesu a bul, "Sii daha a mu Judiya tinjteenj, di ŋ haritooroo ma wuo na wialinj ŋ sii ŋaa. <sup>4</sup> Nii-la sii che di ba jimuu, u bi faa ŋinŋaa wiaa. Nj sii ŋaa wiaa deenja, lej di dunia niaa kala na." <sup>5</sup> Ba titia paala

bi u wiaa laa dii, nii ne tii ba bul nii. <sup>6</sup> Nii ne Yesu bula piba a bul, "Bua-la si janj yi di mi mu gbiele-la, u ha bi yie. Ma-na teenj bua-na kala maga ne. <sup>7</sup> Dunia niaa bima bere, ama ba bere mi-na ne. Mi venee bula piba ari baa ŋaa wu-bɔŋŋɔɔ ne. <sup>8</sup> Má-na lii mu gbiele-la, mi-na ha bi mu, bee wiaa bua-la si janj yi di mi mu ha bi yie." <sup>9</sup> U bul nii anj hɔŋ Galilii tinjteenj le ne.

<sup>10</sup> Yesu ŋaana-la si mu gbiele-la dere, Yesu ma sii mu. Ama u bi niaa harinj to. U luɔra mu ne. <sup>11</sup> Juu tinjŋaa si he gbiele-la le, ba bee chiche Yesu gbiele-la le, a pipiese di nii le ne u he? <sup>12</sup> Nii ne nialinj si he gbiele-la lerinj, ba jesinj suomo a munsi a bubul Yesu wiaa. Dɔŋsuŋ si duu ŋaa ni-zɔŋ ne. Dɔŋsuŋ ma bi seye anj bul duu nyise niaa ne. <sup>13</sup> Ama ba kala faa fá Juu timma-la ne, nii ne tii nuu-kala bi wuo faasa bul u wiaa.

<sup>14</sup> Gbiele-la si ku kpaamaga dɔŋɔ, Yesu juu Wia-dia a didage niaa. <sup>15</sup> U si dage niaa nii ŋaa Juu timma-la si jegile nii wialinj wu-kpunkpere. Ba si, "Ee ne baala deenj jinj wiaa ŋla kinkeŋ anj bi lee yie?" <sup>16</sup> Nii ne Yesu bula piba a bul, "Wialinj mi sii dagu, mi titia dolun le dee mii dage. Nii-la si tinjmi ne dagemi wialinj. <sup>17</sup> Nii-la kala sii che duu ŋaa wii-la mi si cho, u janj wuo jinj ari wialinj mi sii dagu lii Wia teenj ne, koo mi titia dolun

le ne. <sup>18</sup> Nii-la si yie bubul wiaa u titia doluŋ le yie bula chiche u titia yiriŋ ne. Ama nii-la s̄i che di nii-la si timu laa yiriŋ, u ŋaa ni-titii ne. U bi wiaa ka nyia. <sup>19</sup> Moosis bil niinŋ pima ne di maa to. Ama ma kuŋ-kala bi n̄i-la to. B̄e ne tii maa che di ma kpumi?" <sup>20</sup> Nii ne nialiŋ bula pu a bul, "N̄ŋ nyaase ne. Kub̄e n̄i che di u kpuŋ?" <sup>21</sup> Nii ne Yesu bula piba a bul, "Mi ŋaa wu-bala ne ma che-wiesii-la cheeŋ, u ŋaa ma wu-kpuŋkpere. <sup>22-23</sup> Moosis fa bula pima di ma kikeri ma biiriŋ penee. U dee bi n̄i suomo. U naabalimaba ne suomo ŋaa n̄i. U si ŋaa ma kisiŋ n̄i, ma paala yie keri ma biiriŋ penee che-wiesii-la cheeŋ, di ba lulluŋ ne tel n̄i le. Di ma ne saa jaŋ wuo to Moosis niinŋ aa keri ma biiriŋ penee che-wiesii-la cheeŋ, di ba lulluŋ ne tel che-wiesii-la cheeŋ, b̄e ne saa tii maa na baaniŋ a tiŋ mi si ŋaa puwuoloo duori che-wiesii-la cheeŋ? <sup>24</sup> Di nuu ne ŋaa wii, ma s̄i guu jon taali pu a tiŋ ma si biina ari u bi woruŋ ŋaa wiaa. Má biine wii-la tuoŋ a jin u wutitii, aŋ-na jon taali pu."

<sup>25</sup> Nii ne niaa doŋsuŋ si lii Jerusalem pīese a bul, "Baala deen̄ dee ba chiche di ba kpu n̄i? <sup>26</sup> Na, u ne chin̄ niaa tuoŋ n̄i aa bul wiaa, ka nuu-kala bi wii wuo bul, koo nihiasi-la jima ari u ne ŋaa Kirisito, nii-la Wia si liisaa? <sup>27</sup> Nii-la Wia si jaŋ tiŋ, duu ne k̄o, nuu-kala bi jaŋ jin u

si lii lee-la, ama la kala ne jin lee-la baala deen̄ si lia." <sup>28</sup> Yesu s̄i dage niaa Wia-dia-la tuoŋ n̄i, n̄i ne u faasa pīese, "Ma s̄ene jin̄mi nee, a jin lee-la mi si liaa? Ama mi saa bi mi titia doluŋ le ne k̄o. Nuu ne tiŋmi. Nii-la ma saa si tiŋmi ŋaa Wutitii Tiina ne. Ma buu jin. <sup>29</sup> Mi-na jimu ne, b̄e wiaa mi fa he u teen̄ ne. Nii ne u tiŋmi." <sup>30</sup> Nii ne ba chiche di ba k̄enu, ama bua-la le u si jaŋ suu ha bi yie. Nii ne tii nuu-kala n̄isiŋ buu dige. <sup>31</sup> Ama niaa yuga nialiŋ tuoŋ a laa u wiaa dii a pīese a bul, "Ma biina di Kirisito, nii-la Wia si jaŋ liise ne k̄o, u jaŋ ŋaa wu-magilaa kii nia deen̄?"

### *Ba tiŋ niaa di ba mu keŋ Yesu*

<sup>32</sup> Farisii tiŋŋaa si nia di nialiŋ muŋso bubul Yesu wiaa n̄i, n̄i ne ba di nialiŋ si kpu pusun pipi Wia kuhiasin̄ tiŋ ba tiŋtinni-biisiŋ di ba mu keŋ Yesu. Ba si mu lee-la Yesu fa si he di ba k̄enu, ba nii wialiŋ u si bula pipi niaa. <sup>33</sup> U si, "Mi jaŋ he ma teen̄ tapulaa ban̄mene, aŋ miira mu nii-la si tiŋmi teen̄. <sup>34</sup> Ma jaŋ chemi ka. Lee-la mi si jaŋ he, ma bi jaŋ wuo mu dime." <sup>35</sup> Nii ne Juu timma-la pīese di nii ne uu che duu mu ba bi jaŋ nau? Duu che duu mu Giriik tiŋteen̄, lee-la Juu tiŋŋaa si guoli ba tuoŋ ne, a didagebaa? Ba bira si, <sup>36</sup> "U si di la jaŋ cheu ka, a bira bul di la bira bi jaŋ wuo

mu lee-la u si jan he. U si bul nii, u bubuon ne bee?"

*Yesu bul wiaa a tige lii-la sii pi niaa miisin le*

<sup>37</sup> Gbiele-la che-derin, tapulii-la ne fa naa gbiele-la siifian cheen. Nii ne Yesu sii chin a faasa bul, "Nii-la kala lii-nyuasun si kene, ma len duu ko mi teen a nyua liin. <sup>38</sup> Nii-la kala si laa mi wiaa dii, u jan nage lii-bulo u tuon le a bubul. Ba bul nla ne Wia tenin tuon." <sup>39</sup> Yesu bul wiaa deenba a tige Wia Din-zon-la le ne u si jan jono he nialin si laa u wiaa dii le. Bua-la le di u ha bi Wia Din-zon-la jono heba le, bee wiaa u ha bi suun le sie duu laa yirin.

*Nialin pore donjo le a tin Yesu wiaa*

<sup>40</sup> Ni-dan-la fa si he dime a nii wialin Yesu si bula, nii ne ba donsun bul di nia deen sene naa nii-la sii bul wiaa, Wia Din-zon-la dolun le ne. <sup>41</sup> Donsun ma si, duu ne naa Kirisito, nii-la Wia si liisa. Ama donsun ma si di nii-la Wia si liisa bi jan lii Galilii tinteen. <sup>42</sup> Wia tenin tuon ba bula ari Kirisito, nii-la Wia si liisa, naa Devit doho nuu ne a lii Betlehem. Devit jan ne fa Betlehem. <sup>43</sup> Nii ne nialin ken wiin deen lilere a pore donjo le. <sup>44</sup> Ba donsun chiche di ba ken Yesu, ama nuu-kala bi nisin jono digu.

<sup>45</sup> Nii ne tintinni-biisi-la ba si tima di ba mu ken Yesu, ba miira mu Farisii tinnaa ari nialin si kpu pusun pipi

Wia kuhiasin teen, ari nahillin. Nii ne ba pieseba a bul, "Bee ne tii ma buu kaa ko?" <sup>46</sup> Nii ne ba bul, "Nuu-kala ha bi wiaa bula ari baala deen sii bul nii." <sup>47</sup> Nii ne Farisii kuhiasi-la pieseba a bul, "U nyisema ma nee? <sup>48</sup> Ma nia ari ma kuhiasin tuon koo la Farisii tinnaa tuon kubala ma ha laa u wiaa dii? <sup>49</sup> Ama nidan deen kala si hilime, ba bi wialin Moosis si nmuusa bil jin. Wia jan kpuse ba nyusun." <sup>50</sup> Baal kubala baa yire Nikodiimas, u ma fa naa Farisii tinnaa donjo ne a he ba tuon. U-na fa laa sipaan mu Yesu teen ne an ka. <sup>51</sup> Nii ne u bula piba a bul, "La kisin ne di la jon cheerin a pi nuu duu ne naa wii, see di la laa sipaan nii tiina niin, a jin wii-la u si naa." <sup>52</sup> Nii ne Farisii timma-la piesu a bul, "N ma naa Galilii tiina nee? Karime Wia tenin. Di n naa nii, n jan na ari nialin sii bul wiaa, Wia Din-zon-la dolun le, ba kun bi Galilii tinteen lia." [ <sup>53</sup> Nii ne ba kala sii pise a mu ba diisin.

## 8

*Ba ken haal-la si pin nuu bala*

<sup>1</sup> Nii ne ka Yesu ma lii dime a jil peel kubala baa yire Oliv nyun. <sup>2</sup> Tan si pula chichuofela, u bira miira mu a juu Wia-dia. Niaa ku gbaaru, u hon a bira suomo didageba. <sup>3</sup> Nii ne Wia tenin kerichiba ari Farisii tinnaa ken haal

kubala ku juu. Ba keŋ haalla duu piŋ nuu bala. Ba leŋ u chin ba tutuɔbaaniŋ. <sup>4</sup> Nii ne ka ba bula pi Yesu a bul, "La kuhian, la keŋ haala deen duu hiile nuu bala ne. <sup>5</sup> Wialin Moosis fa si bile di niaa tuto daga ari nuu-kala ne ŋaa nii, di la yaga kpuu ne ari tabiaa. Bee ne ŋ ma bul?" <sup>6</sup> Ba bul nii di ba ŋmoo Yesu fehe le ne, a wuo na wonjiin a bul u teen. Nii ne Yesu keŋ u nyun chugili tinteen aŋ keŋ u neniin tutuuri tinteen. <sup>7</sup> Ka ba ha chin aa piɛse wiaa. Nii ne Yesu keŋ u nyun wul wia nyun a bula piba a bul, "Ma kula kala ha si bi haache wii ŋaa, ma leŋ duu laa sipaan jon tabiin a yage haal-la, di ku-kaanaa ma pe." <sup>8</sup> Nii ne u bira keŋ u nyun chugili a bira keŋ u neniin a tutuuri tinteen. <sup>9</sup> Ba si nii wialin u si bula, ba kala lii kuŋ kuŋ. Ba tuɔŋ nihiasi-la ne laa sipaan lii, ka ku-kaanaa tuto, aŋ ka Yesu ari haal-la dunɔɔŋa lee-la. <sup>10</sup> Nii ne Yesu keŋ u nyun jee a piɛse haal-la a bul, "Nii ne nialin he? Nuukala tuo duu yagin kpuu?" <sup>11</sup> Haal-la si di nuukala tuo. Nii ne Yesu bula pu a bul, "Tɔɔ, mi ma bi jan ŋaan wii-kala. Viiri aŋ bira si haache ŋaa."]

*Yesu si duu ne ŋaa dunia niaa pulumun*

<sup>12</sup> Nii ne Yesu bira suomi a didage niaa. U bula piba a bul, "Mi ne ŋaa dunia niaa pulumun. Nii-la kala

si tomi bi jan ven birimin tuɔŋ. U jan ven pulumun tuɔŋ. Miisi-la mi si jan pu jan chaane." <sup>13</sup> Nii ne Farisii timma-la bula pu a bul, "N titia wiaa ne ŋ bubul nii, wialin saa ŋ si bula bi wutitii kene." <sup>14</sup> Nii ne Yesu bula piba a bul, "Di mi ne bul mi titia wiaa maa, wii-la mi si bula ŋaa wutitii ne, bee wiaa mi jin lee-la mi si lia ne, a jin lee-la mi si jan mu. Ama ma-na bi lee-la mi si lia jin, a bira bi lee-la mi si jan mu ma jin. <sup>15</sup> Ma yie jon cheerin pi nuu a tin ma si biina ari u si bi worun ŋaa wiaa. Mi-na bi nuu-kala cheerin pa. <sup>16</sup> Di mi ne faa jon cheerin pi niaa maa, u fa jan ŋaa wutitii, bee wiaa mi dunɔɔŋa dee bi cheerin jon pi tiina, mi Nyimma-la si tinmi ne pemi le la jon cheerin a pi tiina. <sup>17</sup> Wialin Moosis fa si bile di niaa tuto daga ari niaa balia ne na wiin, a bul duu ŋaa wutitii ne, di wii-la sene ŋaa wutitii ne. <sup>18</sup> Mii bul mi titia wiaa ne, mi Nyimma-la ma si tinmi, u ma bubul mi wiaa." <sup>19</sup> Nii ne ba piɛsu, "Nii ne ŋ Nyimma he?" Nii ne Yesu bul, "Ma bimi jin, nii wiaa ma bi mi Nyimma ma jin. Di ma ne fa jinmi, ma fa jan jin mi Nyimma maa." <sup>20</sup> Yesu bul wiaa deenba kala bua-la le u sii dage niaa Wia-dia le ne, lee-la ba si yie jon kialin bile pipi Wia. Ka nuu-kala buu kene, bee wiaa bua-la le ba si jan kenu ha bi yie.

*Yesu si di niaa bi jan wuo*

*mu lee-la u si jan mu*

21 Nii ne Yesu bira bula pi nialin a bul, "Mi jan viiri, ma jan chemi ka, ma saa jan suu ari ma haacheba. Lee-la mi sii mu, ma bi jan wuo mu dime." 22 Nii ne Juu timma-la piесе donjo a bul, "U si, la bi jan wuo mu lee-la u sii mu. U saa bula magise ari u jan kpu u titia ne koo ee ne u bul nla?" 23 Nii ne Yesu bira bula piba a bul, "Ma lii dunia deen ne, ka mi ma lii Wia-jan. Ma lii dunia ne, an ka mi ma bi dunia lia. 24 Mi laa sipaan bula pima ari ma jan suu ari ma haacheba. Ma sene jan suu ari ma haacheba, see di ma laa mi wiaa dii ari mi si si mi nna nii-la." 25 Nii ne ba piесu a bul, "Kubee ne n nna?" Nii ne Yesu bula piba a bul, "Mi si suomo dage nna, mi dage nii-la mi si nna ne a pima. 26 Mi ken wiaa yuge ne di mi bul a tigema le, a wuo to wialin le a jon cheerin pima. Nii-la si tinmi, u sene nna Wutitii Tiina ne. Wialin mi sii nii, u niin le ne mi saa bula pi dunia nna." 27 U sii bul nii, nialin fa bi jin ari u Nyimma Wia wiaa ne u bulaa piba nii. 28 Nii ne Yesu bula piba, "Di ma ne ken mi-na Nuhuobiine Bie kpaase daa-geее nyun, ma jan jin ari mi ne nna nii-la mi si si mi nna. Nii ma le ne ma jan to jin ari mi bi wii-kala nna mi titia dolun le, ama mi yie bul wialin mi Nyimma si dagemi ne. 29 Nii-la ma saa si tinmi bimi dunduja leje, u

ma he mi teen ne, bee wiaa mi yie nna wialin sii tore u tuon ne." 30 U si bul wiin deen, nna yuga a laa u wiaa dii.

*Nialin si sene nna Abiraham doho nna*

31 Nii ne Yesu bula pi Juu timma-la si laa u wiaa dii a bul, "Di ma ne nii mi niin wialin, ma jan sene nna mi haritooro. 32 Ma jan jin wutitii. Wutitii-la saa jan len di Wia laama ta di ma tii ma titia." 33 Juu timma-la si laa Yesu wiaa dii ma bul, "La paala nna Abiraham doho nna ne. La ha bi nuukala yosu nna. Bee ne saa tii n bul di Wia jan laala ta di la tii la titia?"

34 Nii ne Yesu bula piba a bul, "Wutitii ne mi bulaa pima, nuu-na kala si nna haache, u tiina nna haache yon ne. 35 Di yomo ne he nuu dia le, u bi dia-la le jan he deen deen. Ama di dia-la tiina ne ken bii, u-na jan he dia-la le a kaa mu wuu. 36 Di mi-na Wia Bie ne saa laama ta, mi sene laama ta ne di ma tii ma titia. 37 Mi jima ari ma nna Abiraham doho nna ne, an ka ma chiche di ma kpumi, bee wiaa wialin mi si dagema bi ma digilaa jua. 38 Mi-na yie bul wialin mi Nyimma si dagemi ne, ma ma ninna wialin ma nyimma si dagema di ma ninna."

39 Nii ne ba bula pu a bul, "Abiraham ne nna la nyimma." Nii ne Yesu ma bul, "Di ma ne sene fa nna Abiraham biiri, ma fa jan

ɲiŋaa wialɲ Abiraham fa sɪi ɲaa. <sup>40</sup> Mi bul wutitii ne pima, wialɲ Wia si dagemi. A tiŋ wiɲ deɲ wiaa ne maa che di ma kpumi. Abiraham fa bi ɲii ɲaa. <sup>41</sup> Maa ɲaa wialɲ ma nyimma sɪi ɲaa ne." ɲii ne ba bul, "La bi mangaa-biiri ɲaa. La kala nyimma ne kubala. Wia ne ɲaa la Nyimma." <sup>42</sup> ɲii ne Yesu bula piba a bul, "Di Wia ne sene fa ɲaa ma Nyimma, ma fa jaŋ chomi, beɛ wiaa, Wia teen ne mi lii a ko daha. Mi titia doluŋ le dee mi ko. U ne tiŋmi. <sup>43</sup> Beɛ ne saa tii ma bi wialɲ mi si bula bubuɔŋ jiŋ? Ma bi che di ma jegile nii wialɲ mi sɪi bul. ɲii ne tii ma bi ba bubuɔŋ jiŋ. <sup>44</sup> Ma nyimma ne ɲaa Sitaani. Ma ma saa cho di maa ɲaa u tuɔɔre wiaa ne. Dunia di-suomuŋ kala le ne u ɲaa ni-kpuuru. U titia bi wutitii kene. ɲii ne tii u bi wutitii ka to. Di u ne nyia wiaa maa, u nagisiŋ ne paala ɲii. U ɲaa wu-nyiaru ne, a paala ɲaa wu-nyiaraa kala nyimma maa. <sup>45</sup> Ama a tiŋ mi sɪi bul wutitii wiaa ne ma bi mi wiaa laa dii. <sup>46</sup> Ma kubee ne jaŋ wuo dage ari mi keŋ haache? Di mi nɪi bul wutitii, beɛ ne saa tii ma bi mi wiaa laa dii? <sup>47</sup> Nii-la kala si lii Wia teen yie jegile nii wialɲ Wia sɪi bul ne. Ma bi Wia teen lia, ɲii ne tii ma bi wialɲ u sɪi bul jegile nii."

<sup>48</sup> ɲii ne Juu timma-la bula pi Yesu a bul, "La bi wutitii bulaa, la si si ɲ ɲaa Samaria tiina neɛ, jiŋ-

bomuŋ ma keniŋŋ?" <sup>49</sup> ɲii ne Yesu bula piba a bul, "Jiŋ-bɔŋ bimi kene, ama mii pi mi Nyimma jirima ne, aŋ ka ma-na bimi jirima ka pa ɲii. <sup>50</sup> Mi bi yiriŋ che pipi mi titia. Ama nuu ne he dime a che yiri-la pipimi. U ne saa jaŋ dii nialiŋ si via mi wiaa sariya. <sup>51</sup> Wutitii ne mi bulaa pima, nii-la kala sɪi to mi niŋ wiaa, u bi jaŋ suu." <sup>52</sup> ɲii ne Juu timma-la bula pu a bul, "Lele la jima ari ɲ keŋ jiŋ-bɔŋ ne. Abiraham suba ne. Nialiŋ ma sɪi bul wiaa, Wia Diŋ-zɔŋ-la doluŋ le, ba ma suu. Aŋ ka ɲ bul di nii-la kala sɪi to ɲ niŋ wiaa bi jaŋ ko duu suba. <sup>53</sup> La nyimma Abiraham suba ne. ɲ saa biina di ɲ kiiu neɛ? Nialiŋ sɪi bul wiaa, Wia Diŋ-zɔŋ-la doluŋ le ma suu. ɲ saa biina ɲ ɲaa kubee ne?" <sup>54</sup> ɲii ne Yesu bira bula piba a bul, "Di mi nɪi pi mi titia yiriŋ, yiri-la ɲaa yiri-peɪ ne. Mi Nyimma ne nii-la sɪi pimi yiriŋ, nii-la ma si si u ɲaa ma Wia ne. <sup>55</sup> Ma buu jiŋ, ama mi-na jimu ne. Di mi ne jaŋ bul ari mi buu jiŋ, mi jaŋ ɲaa wu-nyiaru, ari ma si ɲaa wu-nyiaraa ɲii. Mi saa jimu ne a tuto u niŋ. <sup>56</sup> Ma naabalima Abiraham nia ari mi jaŋ ko dunia duu nami. U si nii ɲii, u tuɔŋ fa ɔre. U paala nami ne." <sup>57</sup> ɲii ne Juu timma-la bula pu a bul, "ɲ ha paala bi jisiŋ mahiŋ balia ari fii yie. Eɛ ne saa ɲ ɲaa a na Abiraham?" <sup>58</sup> ɲii ne Yesu bula piba a bul, "Wutitii ne mi bulaa pima,



ka di ba-na lul Abiraham, mi fa he dime ne." <sup>59</sup> Nii ne ba paa tabiaa di ba yagu. U ken u titia faa a luora lii Wia-dia-la tuonj.

## 9

*Yesu vaare baal-la ba si lulu duu nyulima*

<sup>1</sup> Yesu si jonj wonjbiinj vivenj, u na baal kubala, ba lulu duu nyulima ne. <sup>2</sup> Nii ne Yesu haritooroo piesu a bul, "Kuhianj, kubee haache ne nja baala deenj nyulime? Baal-la haache ne koo u nyimma ari u naanj haache ne?" <sup>3</sup> Nii ne Yesu bula piba a bul, "Baal-la nyulimunj bi u haacheba le lia, u nyimma ari u naanj haache ma dee bi tii u nyulime. U nyulima di niaa wuo na nii Wia dol-la si wuo tinj tintinjaa u le ne. <sup>4</sup> La si na wonjbiinj, ma lej di la tinj tintimii-la nii-la si tinjmi di mi tinj. Bua kubala jan yi nuu-kala bira bi jan wuo tinj tintimii-la. <sup>5</sup> Mi ha si he dunia le nii, mi ne nja dunia niaa pulumunj." <sup>6</sup> Yesu si bul nii ne, u tu nantuurunj bil tinteenj a kaa buu tiarinj, a paa a taa baal-la siaa, anj bula pi baal-la a bul, <sup>7</sup> "Sii tuu fuo kubala baa yire Siloom (yirinj deenj bubuonj ne nja 'mi timu ne') a sonj n siaa." Nii ne baal-la sii tuu sonj u siaa fuo-la le. U siaa suri, u miira ko. <sup>8</sup> Nii ne nialinj si kpagu, ari nialinj kala fa si na baal-la duu faa sul kiaa, ba pipiese donjo, "Baala deenj dee fa bi hono susul kiaa nii?" <sup>9</sup> Donjsun

si u ne, donjsun ma si duu dee, ama u ta nagu ne. Nii ne baal-la titia bul duu ne nii. <sup>10</sup> Nii ne ba piesu, "Ee ne n nja n siaa suri?" <sup>11</sup> Nii ne baal-la bul di nii-la ba sii yire Yesu ne buu tiarinj, a paa taa u siaa le, anj bula pu duu tuu Siloom fuo-la a sonj. U tuu sonj, u siaa suri. <sup>12</sup> Nii ne ba piesu, "Nia le ne u he?" Baal-la bul di u bi jinj.

*Farisii tinjaa piese nyulun-la vaarinj wiaa*

<sup>13</sup> Nii ne ba kenj baal-la fa si nyulima a kaa mu Farisii tinjaa teenj. <sup>14</sup> Tapulii-la Yesu si buu tiarinj a taa baal-la siaa ba suri, u nja che-wiesii-la cheenj ne. <sup>15</sup> Nii ne Farisii timma-la piese baal-la nii u si nja u siaa suri. Baal-la bula piba a bul di Yesu nja tiarinj ne taa u siaa, u sonj, u siaa suri. <sup>16</sup> Nii ne ba kenj wii-la liler. Farisii tinjaa donjsun bula ari Wia dee bi baala deenj tima, bee wiaa u bi ba che-wiesii-la kisinj le ka to. Nii ne donjsun ma si di "Ee ne nuu si nja haache tina jan wuo nja wu-magilaa deenba?" <sup>17</sup> Nii ne Farisii timma-la bira piese baal-la a bul, "U si suri n siaa nii, nibee ne n biina ari u nja?" Nii ne baal-la si u-na biina ari nialinj sii bul wiaa, Wia Din-zonj-la dolunj le donjo ne.

<sup>18</sup> Ama juu tinjaa kuhiasila si, ba-na bi laa dii ari baal-la fa nyulima ne anj leele nina nii, see di ba yire u nyimma ari u naanj. <sup>19</sup> Nii ne ba yire baal-la nyimma

ari u naan a pieseba, "Ma bie ne nlaa? Ma si, ma lulu duu nyulima nee? Ee ne u nlaa a nina leele?" <sup>20</sup> Nii ne baal-la nyimma ari u naan bul, "La jima ari la bie ne nla. La jima la lulu maa duu nyulima ne. <sup>21</sup> Ama la bi jin u si nlaa nii u siala suri, la bira bi jin nii-la ma si nlaa u siala suri. Má piesu, u waa ne. U titia jan wuo bula pima." <sup>22</sup> Baal-la nyimma ari u naan faa fá Juu timma-la ne. Nii ne tii ba bul nii. Juu timma-la fa si di nii-la kala si bula ari Yesu ne nlaa Kirisito, nii-la Wia si liisa, ba jan kiru ba Wii-chuole dia le. <sup>23</sup> U naan ari u nyimma jin nii ne a bul duu waa ne, di ba piesu.

<sup>24</sup> Nii ne Farisii timma-la bira yire baal-la ba si lulu duu nyulima a bul, "La jima ari baala deen nlaa haache tiina ne. Wia sipaan bul wutitii pila." <sup>25</sup> Baal-la si, "Mi-na bi jin di baal-la nlaa haache tiina koo u bi haache tiina nlaa. Ama wii-la mi-na si jima ne nla: Mi fa nyulima ne, ama leele mi siala suro ne." <sup>26</sup> Nii ne ba piesu a bul, "Ee ne u nlaa a suri n siala?" <sup>27</sup> Nii ne baal-la bula piba a bul, "Mi laa sipaan bula pima ne, ka ma bi jegile. Bee ne tii ma bira chiche di ma nii? Ma ma saa che di ma mu nlaa u haritooro nee?" <sup>28</sup> Nii ne ba tuusu worun an bul, "N ne nlaa u haritooro, ama la-na nlaa Moosis haritooro ne. <sup>29</sup> La jima ari Wia fa bul wiaa pi Moosis ne, ama baal-

la deen-na, la bi jin u si lii lee-la kala." <sup>30</sup> Nii ne baal-la bul, "Wu-kpunkpere ne nla. Ma bi jin lee-la u si lia, ama u ne suri mi siala. <sup>31</sup> La jima ari Wia bi haache tinnaa wubulun ka jegili. Uu jegili nialin sii zilu ne an pe nlaa wialin u si cho. <sup>32</sup> Dunia si suomo, ma ha nia ari nuu ba si lula duu nyulima, di nuu suri u siala? <sup>33</sup> Di nii-la ne bi Wia teen lia, u bi wiin deen wuo nlaa." <sup>34</sup> Nii ne ba bula pi baal-la a bul, "Ba paala lulun di n nlaa haache tiina ne, ka n ma saa che di n dagela koo?" Nii ne ba kiru ta u lii Wii-chuole dia-la le.

*Nii-la si bi Wia Din-zon-la kene, u nyulima ne.*

<sup>35</sup> Yesu si nia di ba kiri baal-la ta u lii Wii-chuole dia-la tuon, u mu cheu, a nau a piesu, "N laa Nuhuobiine Bie wiaa dii koo?" <sup>36</sup> Nii ne baal-la piesu, "Kubee ne nii? Dagemi tiina di mi laa u wiaa dii." <sup>37</sup> Nii ne Yesu bula pu a bul, "N paala nau ne. U ne nii-la sii bul wiaa n teen nii." <sup>38</sup> Nii ne baal-la tuu kpirimi Yesu sipaan a chuolu an bul, "Mi Tiina, mi laa n wiaa dii ne." <sup>39</sup> Nii ne Yesu bul, "Mi ko dunia di mi nlaa di nialin si nyulima, di ba siala suri ne, ka di mi nlaa di nialin si si di ba siala suro ne, di ba nyulime." <sup>40</sup> Farisii timma-la si chin dime a nii Yesu si bul nii, ba piesu a bul, "N biina la ma nyulima nee?" <sup>41</sup> Nii ne Yesu bula piba a bul, "Di ma ne fa nyulima a bi wutitii jin, ma fa bi wii-kala cheye.

Ama læle ma si folo bul di maa na ne a jin wutitii ŋla, ŋii-na ma cheerij ha hema le ne.”

## 10

*Yesu si u ne ŋaa pie-daari-zomun*

<sup>1</sup> Nii ne Yesu mage namaga a bul, “Wutitii ne mi bulaa pima, nii-la kala si bi boininiin to juu pie-dia, an wule to kere juu, u tiina ŋaa gaaru ne. <sup>2</sup> Ama nii-la si to pie-dia boininiin juu, u ne ŋaa pie-se-la pie-daara. <sup>3</sup> Pie-dia bibenne yie suri pie-dia boininiin ne a pu. Piese-la ma jin u yiikoro. U yie yiyireba kubala kubala, a laa ba sipaan a kenba lii. <sup>4</sup> Di u ne ken u kiaa kala lii, u yie laa ba sipaan ne, ka piesee tuto u hariin, bæe wiaa ba jin u yiikoro ne. <sup>5</sup> Ba bi nuhuuru hariin ka to, ba jan miira fá u hariin, bæe wiaa ba bi nuhuuru-la yiikoro jin.” <sup>6</sup> Yesu mage namaga deen piba, ka ba bi wii-la u si bula piba bubuon jin.

<sup>7</sup> Nii ne Yesu bira bula piba a bul, “Wutitii ne mi bulaa pima, mi ne ŋaa pie-dia-la boininiin. <sup>8</sup> Nialin kala si laa sipaan ko mi le a nyia wiaa bul di Wia ne tinba, ba kala ŋaa gaaraa ne, pie-se-la ma bi ba yiikoro le ka to. <sup>9</sup> Mi ne ŋaa boi-la, nii-la kala si tomi le juu, mi jan laau ta. Nialin kala si jua, mi jan benba ari niaa síi ben piesee nii, a len ba lii didii yan an miira kuu juu. <sup>10</sup> Gaara-na yie ko duu gaa a kpu ne koo duu chei

kiaa, ama mi-na ko di niaa wuo ken miisin, di ba tuon tutore worun bua-na kala le.” <sup>11</sup> Yesu bira bula, “Mi ne ŋaa pie-daari-zomun. Pie-daari-zomun yie jon u miisin yoo suun ne u piesee wiaa. <sup>12</sup> Ama nii-la si bi piesee tii an didaa, ka ba titimu, u ne yie na gunguro duu ko, u len pie-se-la an fá. Gunguro-la ku kere ba donsun an ŋaa donsun pise. <sup>13</sup> U yie fá, bæe wiaa u daa pie-se-la, ka ba titimu ne. U sipaa kala tuo pie-se-la le. <sup>14</sup> Mi ne ŋaa pie-daari-zomun. Mi jin mi piesee, mi piesee ma jinmi. <sup>15</sup> Nii titia ne mi Nyimma jinmi, mi ma jimu. Mi jon mi miisin yoo suun, mi piesee wiaa. <sup>16</sup> Mi ken piesee donsun maa, an ka ba tuo piesee deenba tuon. Mi jan kenba kaa ko. Ba ma jan jin mi yiikoro a kala ŋaa ni-bala piesee, ba pie-daara ma ŋaa kubala. <sup>17</sup> Mi jon mi miisin ne yoo suun mi piesee wiaa, ka di mi bira laa. Nii ne tii mi Nyimma cho mi wiaa nii. <sup>18</sup> Nu-kala dee bi jan wuo len mi jon mi miisin yoo suun, mi titia tuotorun le ne. Mi ken dolun di mi jon mi miisin a yoo suun, a bira ken dolun di mi laa mi miisin maa. Mi Nyimma ne pimi dolun deen.”

<sup>19</sup> Yesu si bul wiaa deenba, juu timma-la bira ken wiaa liler. <sup>20</sup> Ba jesin si di bæe ne tii ba jijegili u wiaa, di jinsin ne kenu u nyinyaase. <sup>21</sup> Ba donsun ma bul di nii-la jisin

si keŋe bi wiaa deenba wuo bul. U bira bi nyulimaa ma siaa wuo suri.

*Yesu bula ari u ne ŋaa Wia Bie*

<sup>22</sup> Nii ne Juu tinŋaa gbiele kubala yi di ba gbieli Jerusalem le. Bua deen le ne ba liliisi ba si saa ba Wia dia dere a joŋo pi Wia. <sup>23</sup> U fa ŋaa waariŋ chene tuon ne. Bua deen le ne Yesu vivenŋ zawura-la tuon ba sii yire Solomonŋ zawura a he Wia dia-la le. <sup>24</sup> Nii ne Juu tinŋaa gbaaruu a piesuu a bul, "Ee ne ŋ jaŋ keŋla dieni mage ŋla aŋ-na bula pila nii-la ŋ si ŋaa? Di ŋ ne ŋaa Kirisito, nii-la Wia si liisa, chaasa bula pila." <sup>25</sup> Nii ne Yesu bula piba a bul, "Mi laa sipaanŋ bula pima ne, ka ma bi laa dii. Tinŋimii-la mi sii tinŋ mi Nyimma dolunŋ le dage nii-la mi si ŋaa ne. <sup>26</sup> Ama ma bi mi piesee ŋaa, nii ne tii ma bi mi wiaa laa dii. <sup>27</sup> Mi piesee jinŋ mi yiikoro ne, mi ma jinba, ba tuto mi hariŋ. <sup>28</sup> Nii ne mi piba miisi-la si bi dere, ba bi jaŋ ko di ba suba. Nu ma saa bi jaŋ wuo keŋba kaa laa mi nisinŋ le da. <sup>29</sup> Mi Nyimma-la si jonba pimi, u ne kii kun-kala. Nu ma kala saa bi jaŋ wuo keŋba kaa laa u nisinŋ le. <sup>30</sup> La di mi Nyimma kala ŋaa kubala ne."

<sup>31</sup> Yesu si bul nii, Juu timma-la bira paa tabiaa di ba yagu. <sup>32</sup> Nii ne Yesu bula piba a bul, "Mi ŋaa wu-zonŋoo yuge ne ma sipaanŋ di ma na. Mi Nyimma ne pimi

dolunŋ mii ŋaa. Ba kubee wiaa ne tii maa che di ma yagemi?" <sup>33</sup> Juu timma-la ma miira bul, "La bi che di la yagin a tinŋ ŋ si ŋaa wu-zomoo-la wiaa, ama ŋ ŋaa nuhuobiinŋ ne aŋ keŋ ŋ titia a kaa birime Wia, a tutuuse Wia jonŋoo. Nii ne tii." <sup>34</sup> Nii ne Yesu bula piba a bul, "Wia teninŋ tuonŋ seme donoo ba ŋmunŋsa a bul di la nage Wia ne. Wia bul wiinŋ deenŋ pi nialinŋ ba si ŋmunŋse Wia teninŋ pa ne. <sup>35</sup> U ŋaa wutitii ne, la bi jaŋ wuo via Wia teninŋ." <sup>36</sup> Nii ne Yesu bul, "Wia si liisemi, a tinŋmi mi ku tuu dunia, ee ne saa ma jaŋ bul di mii tuuse Wia jonŋoo ne di mi ne bula bul di mi ŋaa Wia Bii ne? <sup>37</sup> Di mi ne bi mi Nyimma tinŋtinŋaa ka tinŋ, ma si mi wiaa laa dii. <sup>38</sup> Ama di mi nuu tinŋ mi Nyimma tinŋtinŋaa, ma laa mi wiaa dii a tinŋ tinŋimii-la mi sii tinŋ wiaa, ari ma si bi wialinŋ mi si bula pima laa dii kala. Nii le ne ma jaŋ wuo to jinŋ a laa dii ari mi Nyimma hemi le ne. Mi ma heu le." <sup>39</sup> U si bul nii, ba bira chiche di ba kenu, u fori ba nisinŋ le.

<sup>40</sup> Nii ne Yesu bira miira mu kieli Joodanŋ fuonŋ, a mu lee-la Joonŋ fa sii fo niaa Wii-chuole liinŋ a he dime. <sup>41</sup> Niaa yuga a ko u teenŋ. Ba si di Joonŋ fa bi wu-magil kala ŋaa, ama wialinŋ kala u fa si bula a tige baala deenŋ le ŋaa wutitii ne. <sup>42</sup> Niaa fa yuga a laa u wiaa dii lee-la.

*Lazɔɔs sii suuŋ le*

1-2 Baal kubala ne fa he taŋ kubala le, taŋ-la yiriŋ ne Betani. Baal-la yiriŋ ne fa Lazɔɔs. U dihaalaa Mɛeri ari Maata ma fa he lee-la ne. Mɛeri deen ne bua kubala le joŋ tulaali a bisa he la Tiina Yesu naasiŋ le, aŋ keŋ u nyu-punaa a tiike. Nii ne Lazɔɔs fa wiwiile. 3 U dihaalaa tiŋ ba mu bula pi Yesu a bul, "La Tiina, nii-la ŋ si cho ka wiilu ne." 4 Yesu si nii wiin deen, u si, "Nyanyalin deen dee bi maga di Lazɔɔs wiila suu, ama di Wia yiriŋ to nii le ne a yire, di mi ma Wia Bie yiriŋ to dime yire."

5 Yesu fa cho Maata ari u ŋaana ari Lazɔɔs ne kinkeŋ. 6 U si nia di Lazɔɔs ka wiilu lee-la u fa si he, nii ne u bira chua dime tapulaa balia. 7 Nii hariŋ ne u bula pi u haritooroo a bul, "Má leŋ di la miira mu Judiya tiŋteen." Betani fa he Judiya tiŋteen le ne. 8 Nii ne Yesu haritooroo bula pu a bul, "La kuhian, Juu tiŋŋaa faa che di ba paa tabiaa yagin lee-la ne, u bi diene, aŋ ka ŋ biraa che di ŋ mu dime nii?" 9 Nii ne Yesu mage namaga a dage ari u suuŋ bua ha bi yie. U si, "Tapuluŋ keŋ hawaba fii ari balia ne. Nii wiaa, di nuu ní ven wiiheyɛ, u bi jaŋ gigere kiasa, bee wiaa lerin pulla ne. 10 Ama di ŋ ní ven titanin, ŋ yie gigere kiasa ne, bee wiaa pulumuŋ tuo." 11 Nii ne Yesu bira bula pi u haritooroo a bul, "La nanɔɔɔ Lazɔɔs piŋ doŋ ne,

ama mi saa jaŋ mu chisu doŋ le." 12 Nii ne u haritooroo bula pu, "Di u ne piŋ doŋ, ŋii-na u jaŋ duori." 13 Yesu si bul nii, u si ari Lazɔɔs suba ne, aŋ ka u haritooroo biine ari doŋ titia ne u sene piŋ. 14 Nii ne Yesu chaasa bula piba ari Lazɔɔs suba ne. 15 Nii ne Yesu bul, "A tiŋ ma wiaa mi tuoŋ tɔɔ ari bua-la le Lazɔɔs si suba mi tuo lee-la. Nii le ne ma jaŋ to a wuo laa mi wiaa dii. Má leŋ di la mu u teen." 16 Yesu haritooroo tuoŋ doŋ yiriŋ ne fa Tɔmas. Ba kenu yiyire daalierin ma ne, bee wiaa ba fa ŋaa daalierin ne. Nii ne u bula pi u doŋsuŋ tiŋŋaa a bul, "Má leŋ di la kala to Yesu hariŋ, duu ne ŋaa suu maa, di la kala suu."

17 Nii ne Yesu ari u haritooroo mu Betani. Ba si mu yi lee-la, niaa bula pu ari ba si hugi Lazɔɔs, u tapulaa banese ne ŋla. 18 Betani ari Jerusalem fa ŋaa ari meel-daasiŋ balia ne. 19 Juu tiŋŋaa fa yuga a lii Jerusalem ko Betani di ba lolle Maata ari Mɛeri a tiŋ ba dibaala si suba wiaa. 20 Maata si nia ari Yesu faa ko ne, u sii lii duu chemu weniŋ le, aŋ ka Mɛeri-na fa he dia le. 21 Nii ne Maata bula pi Yesu a bul, "Mi Tiina, di ŋ ne fa he daha, mi dibaala fa bi jaŋ suu. 22 Ari nii ma ha, mi jima ari ŋ ne sul Wia chiche kuŋ-kala, u jaŋ piŋ." 23 Nii ne Yesu bula pu ari u dibaala jaŋ bira sii a keŋ miisin. 24 Nii ne Maata

bula pu, "Mi jima ari dunia che-deriŋ u jaŋ sii suuŋ lɛ, bua-la lɛ nialiŋ kala si suba si jaŋ sii." <sup>25</sup> Nii nɛ Yesu bula pu, "Mi nɛ ŋaa nii-la si jaŋ sii suuŋ lɛ, a chisɛ niaa suuŋ lɛ di ba keŋ miisiŋ. Nuu-kala si laa mi wiaa dii, di ŋ suba maa, ŋ jaŋ sii a keŋ miisiŋ. <sup>26</sup> Nii-la ma kala si weye aŋ laa mi wiaa dii, u bi jaŋ kɔ duu suba. N laa wiinŋ deenŋ dii koo?" <sup>27</sup> Nii nɛ Maata bul, "Oo, mi Tiina. Mi laa dii ari ŋ nɛ ŋaa Kirisito, nii-la Wia si liisa, a ŋaa Wia Bie maa, nii-la si maga duu kɔ dunia deenŋ."

<sup>28</sup> Maata si bul wiaa deenba dɛrɛ, u miira juu dia a luɔra yirɛ u ŋaana Mɛeri, a muŋso a bula pu a bul, "Mɛeri, la kuhianŋ kɔ nɛ aa yiriŋ." <sup>29</sup> Mɛeri si nii ŋii, u sii lima a lii duu chemu. <sup>30</sup> Bua-la lɛ di Yesu ha bi taŋ-la tuɔŋ jua, u ha hɛ lee-la Maata si chemu nɛ. <sup>31</sup> Juu timma-la ari Mɛeri fa si hɛ dia lɛ baa nyagu, ba na Mɛeri duu sii lima. Ba si na ŋii, ba sii to u hariŋ, bɛɛ wiaa ba fa biina duu che duu mu yel nɛ lee-la ba fa si hugi u dibaala. <sup>32</sup> Mɛeri si yi lee-la Yesu fa si hɛ a nau, u tuu tel u naasiŋ lɛ aŋ bul, "Mi Tiina, di ŋ nɛ fa hɛ daha, mi dibaala fa bi jaŋ suu." <sup>33</sup> Yesu si na Mɛeri ari Juu timma-la sii to u hariŋ kɔ di baa yel, u tuɔŋ faasa chei. U yaraa ma faasa veŋ. <sup>34</sup> Nii nɛ u piesɛba a bul, "Nii lɛ nɛ ma hugu?" Ba bula pu, "La Tiina, ku na lee-la." <sup>35</sup> Ba

si bul ŋii, Yesu yel. <sup>36</sup> Nii nɛ Juu timma-la bul, "Má bee na u si chou ŋii." <sup>37</sup> Dɔŋsuŋ ma piesɛ a bul, "Ka u nɛ suri nyulimaa siaa ŋii, u saa fa bi jaŋ wuo ŋaa di Lazɔrɔs si suu?"

<sup>38</sup> Ba si bul ŋii, Yesu yaraa bira veŋ. Nii nɛ ba mu yi bua-la leriŋ. Bua-la fa hɛ buŋ lɛ nɛ. Ba joŋ tabiinŋ tɔ niinŋ. <sup>39</sup> Nii nɛ Yesu bul di ba suri tabii-la bua-la niinŋ. Nii nɛ Maata, baal-la si suba dihaala dɔŋɔ, bula pu, "Mi Tiina, u si suba, u tapulaa banɛsɛ nɛ jiniŋ. Nla uu suɔru." <sup>40</sup> Nii nɛ Yesu bula pu a bul, "Mi bi bula piŋ ari ŋ nɛ laa mi wiaa dii, ŋ jaŋ na ŋii Wia si keŋ doluŋ?" <sup>41</sup> Nii nɛ ba keŋ tabii-la suri. Yesu wula beŋ wia nyuŋ aŋ bul, "Mi Nyimma, mii lɔlluŋ ari ŋ si jegile nii mi teenŋ. <sup>42</sup> Mi jima ari ŋŋ jegili mi teenŋ nɛ bua-na kala lɛ. Ama mi bul wiinŋ deenŋ a tiŋ nialiŋ si hɛ daha wiaa nɛ, di ba wuo laa dii ari ŋ nɛ tiŋmi." <sup>43</sup> Yesu si bul ŋii dɛrɛ, ŋii nɛ u faasa bul, "Lazɔrɔs, ku lii!" <sup>44</sup> U si bul ŋii, baal-la si suba sii ku lii. U si ku lii, geri-kɔsumɔɔ nɛ fa vɔɔ u naasiŋ ari u nisaa kala. Geriŋ dɔŋɔ ma tɔ u siaa. Nii nɛ Yesu bula pi nialiŋ a bul, "Má kenu puro ta duu viiri." Ba kenu puri.

*Ba vuura di ba kpu Yesu*

*Mat. 26.1-5; Maak 14.1-2; Luuk 22.1-2*

<sup>45</sup> Juu timma-la fa si kɔ di ba chuɔlɛ Mɛeri, a to u hariŋ mu a na wii-la Yesu si ŋaa, ba tuɔŋ niaa yuga

a laa u wiaa dii. <sup>46</sup> Ka dɔnsun ma miira mu bula pi Farisii tinɔaa wii-la Yesu si ɔaa. <sup>47</sup> Nii ne Farisii timma-la ari nialin si kpu pusun pipi Wia kuhiasin ari niaa dɔnsun hilimi a hono vuure a bul, "Bee ne la jan ɔaa? Má na wu-magila-la kala baala deen sii ɔaa ne. <sup>48</sup> Di la ne leɔe duu ɔinɔaa wiaa deenba, nuu-kala jan laa u wiaa dii. Nii harin Rom tinteen niaa jan ko a ken la Wia-dia ari la tinteen kala kaa laa." <sup>49</sup> Juu nihiasila tuon dɔɔ ne ba faa yire Kayafas. Jina-la le u ne fa ɔaa nialin si kpu pusun pipi Wia kuhian. Nii ne u bul, "Ma bi wii jin. <sup>50</sup> Ma bi jin di ni-bala ne laa tinteen niaa kala nyun suu, u ne kpia la tinteen niaa kala si suba, koo ma bi wiin deen jin?" <sup>51</sup> U si bul nii, u bi naga u titia dolun le ne u bul nii, ama u si ɔaa nialin si kpu pusun pipi Wia kuhian jina-la, nii ne tii u wuo bul wiaa, Wia Din-zon-la dolun le, ari Yesu jan laa tinteen niaa kala nyun suu, <sup>52</sup> tinteen deen niaa ma dunduna wiaa dee, ama duu wuo pe keɔe Wia biiri-la si pisa he leree dɔnsun maa a he dɔɔ le. <sup>53</sup> A chin tapulii-la a kaa mu Juu tinɔaa kuhiasila vuure nii ba si jan to kpu Yesu.

<sup>54</sup> Nii wiaa Yesu bira bi chaasaa golle kpilii Juu tinɔaa tuon. U lii dime a mu lee kubala baa yire Efirim a kpage giri-bine tuon. Ba di u

haritooroo he dime.

<sup>55</sup> Bua-la le di Juu tinɔaa diisin kielin gbiele-la kpage. Nii ne Juu tinɔaa yuga a lii ba jasin le a mu Jerusalem, di ba piise ba disinnin ta, an ka di gbiele-la-na yi. <sup>56</sup> Nii ne ba bee chiche Yesu gbiele-la tuon. Ba si hon Wia-dia tuon, nii ne ba pipiese dɔɔ, "Ma biina u jan ko gbiele-la koo, u bi jan ko?" <sup>57</sup> Bua-la le, di nialin si kpu pusun pipi Wia kuhiasin ari Farisii tinɔaa pa niin, di nuu-kala ne jin Yesu si he lee-la, duu dage, di ba wuo kenu.

## 12

*Mɛeri ɔaa nuun tise Yesu naasin*

*Mat. 26.6-13; Maak 14.3-9*

<sup>1</sup> Leele u ka tapulaa balidu ne, ka di Juu tinɔaa diisin kielin gbiele-la-na yi. Nii ne Yesu sii mu Betani, lee-la Lazɔros si he, baal-la u fa si chisa suun le. <sup>2</sup> Nii ne u juu Lazɔros dia. Ba ɔaa kudiilee di ba huoru. Nii ne Lazɔros ari niaa dɔnsun pe Yesu le di ba dii kudiile-la. Maata ne fa ken kudiile-la golloo kpa. <sup>3</sup> Nii ne Mɛeri jon nuun ari lon. U suora sima. U yallin ma heyɛ. Nii ne u jono bisa he Yesu naasin le, a ken u nyu-punaa kaa tiike. Nuula suora su dia-la kala. <sup>4</sup> Di Yesu haritooroo dɔɔ baa yire Judas Isikarot, duu fa he dime, nii-la fa si jan jon Yesu yalle. Nii ne u bul, <sup>5</sup> "Bee ne tii ba bi nuun deen jono yalle siidi bui balia, a jon moribie-la pi

summoo?" <sup>6</sup> U si bul nii, u bi naga duu cho summo-la ne tii, ama u fa ŋaa gaaru ne. U ne faa kori ba moribiee a yie liliise moribie-la si he dime. <sup>7</sup> Nii ne Yesu bula piba a bul, "Má leŋ haal-la. Má leŋ duu ŋaa nii a gberɛ tapulli-la ba si jaŋ hugimi. <sup>8</sup> Ma di summoo jaŋ he dime bua-na kala le. Ama la di ma bi jaŋ he dime deen deen."

<sup>9</sup> Niaa yuga Juu timma-la tuon a nii di Yesu he Betani le, a sii mu dime. Yesu dunɗunɗa wiaa dee ba mu dime. Ba mua ka di ba pe na Lazɔɔs, nii-la u fa si chisa suuŋ le ne. <sup>10</sup> Nii ne nialin si kpu pusun pipi Wia kuhiasin vuure di ba kpu Lazɔɔs maa. <sup>11</sup> A tin Yesu si chise Lazɔɔs suuŋ le wiaa Juu tinŋaa yuga a via ba nihiasin niin, aŋ laa Yesu wiaa dii.

*Ba zil Yesu kaa juu Jerusalem*

*Mat. 21.1-11; Maak 11.1-11; Luuk 19.28-40*

<sup>12</sup> Tan si pula, ni-dan-la si ko diisin kielin gbiele-la nii ari Yesu ka ko Jerusalem ne. <sup>13</sup> Nii ne ba kala kaare abee pipaarin a kaa mu di ba chemu, a faasa ŋaa gon a bubul, "Tabarikala. Wia jaŋ pe nii-la sii ko la Tiina Wia dolun le. U ne ŋaa la Iziral tinŋaa kuoro." <sup>14</sup> Ba sii ŋaa nii, nii ne Yesu na kaku-bie a hon u nyun. Ba fa ŋmunse nii ne Wia tenin tuon a bul, <sup>15</sup> "Ma nialin si he Zaayon le, ma si fawullun fá. Ma

kuoro nii ko ma teen a jil kaku-bie."

<sup>16</sup> Yesu haritooro fa bi wii-la bubuon jin, ama Yesu si suba aŋ sii suuŋ le a laa yirin nii, bua-la le ne ba liisi ari wialin ba si ŋmunsa a tigeu le ne, ba sene ŋaau le nii. <sup>17</sup> Ni-dan-la fa si he dime a na Yesu duu yire Lazɔɔs u sii a lii suuŋ bua le, nii ne baa bul wii-la. <sup>18</sup> Ni-dan-la si nia ari Yesu ŋaa wumagilin deen, ba kala lii di ba chemu. <sup>19</sup> Nii ne Farisii timma-la bula pi donɗo a bul, "La bi wii-kala wuo ŋinŋaa. Má bee na, dunia niaa kala nii to u harin nii."

*Yesu bul u suuŋ wiaa*

<sup>20</sup> Nialin si lii Giriis tinteen donsun ma fa he nialin si mu Jerusalem di ba chuole Wia gbiele-la le tuon ne. <sup>21</sup> Nii ne niaa deenba mu Filip teen. Filip fa lii Betisaada ne, Galilii tinteen. Ba bula pi Filip ari baa che di ba na Yesu ne. <sup>22</sup> Filip ma mu bula pi Anduru. Nii ne ba balia-la mu bula pi Yesu. <sup>23</sup> Nii ne Yesu bula piba a bul, "Bua-la leele kpaga ne di mina Nuhuobiine Bie laa yirin. <sup>24</sup> Wutitii ne mi bulaa pima, di ŋ ne jon mii-biin duu, u yie pua ne tinteen, aŋ nyu, a he mii-biee yuge. Di ŋ ne bi jonɗo duu tinteen duu pua, u bi jaŋ ken biee. <sup>25</sup> U si nage nii mii-biin ŋ si jonɗo duu le, nii titia ne u nage nuhuobiine ma le. Nii-la kala sii che duu laa u miisin, u jaŋ via u miisin ta, ama



nii-la kala si via u miisinj ta dunia deenj le, u tiina jan ken miisi-la si bi dere. <sup>26</sup> Nii-la kala si cho duu tima pipimi, see tiina to mi harinj. Lee-la kala mi si he, u tiina ma jan he dime. Di nuu-kala ne tima pipimi, mi Nyimma jan zil u tiina.

<sup>27-28</sup> Leele mi tuonj bi dibala pina. Bee ne saa mi jan bul? Mi saa bul di mi Nyimma si leje di wialinj kala si jan naami le naa koo? Ai, mi bi jan wuo bul nii. Wiaa deenba si jan naami le wiaa ne tii mi ko dunia. Mi Nyimma, lej di niaa yire nj yirinj." Nii ne nuu yiikoro lii wia nyun a bul, "Mi paala laa yirinj ne. Mi saa jan bira lej di niaa yire mi yirinj." <sup>29</sup> Ni-danj-la si chinj dime a nii nii-la yiikoro, donsunj si di tanj ne domo. Donsunj ma si di Wia tinjaaru ne bul wiaa pu. <sup>30</sup> Nii ne Yesu bula piba, "Ma wiaa ne tii yiikoro deenj bul nii, mi wiaa dee. <sup>31</sup> Bua-la le Wia si jan dii dunia niaa sariya yie ne. Bua deenj le ne u ma jan kiri Sitaani ta, niila si naa dunia niaa kuoro. <sup>32</sup> Ama di ba ne kpaasemi daa-geese nyun, mi jan naa di niaa kala ko mi teenj." <sup>33</sup> U si bul wiinj deenj, u bula dage suu-la yiri u si jan suu ne. <sup>34</sup> Nii ne nialinj bul, "Ba dagela ari ba nmunse Wia teninj tuonj a bul di Kirisito, nii-la Wia si liisa, bi jan suu, duu jan he dime deenj deenj. Ee ne saa nj bul di ba jan ken Nuhuobiine Bie a kpaase daa-geese nyun?"

Kubee ne saa Nuhuobiine Bie deenj wiaa nj sii bul?" <sup>35</sup> Nii ne Yesu bula pi nialinj a bul, "Pulun-la si he ma teenj, u bi jan dieni. Pulun-la ha si he dime nii, ma venj pulun-la le, di biriminj sima to. Nii-la sii venj biriminj tuonj bi jinj lee-la u sii mu. <sup>36</sup> Pulun-la si he ma teenj nii, ma laa u wiaa dii. Di ma ne naa nii, ma ma jan ken pulumun a ma chaane."

Yesu si bul wiaa deenba dere, u lii a ken u titia faa di ba siu na. <sup>37</sup> U si naa wu-magila-la kala ba na, ari nii kala, ba ha bi u wiaa laa dii. <sup>38</sup> Ba si bi u wiaa laa dii nii, nii leje wialinj nii-la fa sii bul wiaa, Wia Din-zonj-la dolun le baa yire Azaaya si bula naa wutitii ne. U fa bula,

"Nuu-kala bi wialinj la si bula piba laa dii.

Nuu-kala ma bi la Tiina Wia dolun na."

<sup>39</sup> Ba sene bi Wia wiaa wuo laa dii. Nla ne Azaaya bira bul a tigeba le. <sup>40</sup> U si,

"Wia to ba siaa ne anj nyire ba tuonj,

di ba siaa si kunj-kala wuo na,

di ba si wiaa bubuwsaa ma wuo jinj.

Di nii dee, ba fa jan ko Wia teenj duu pulle ba tuonj, di ba birima tutou."

<sup>41</sup> Azaaya fa na Kirisito fa si jan ken dolun, nii ne tii u bul nii. <sup>42</sup> Ari nii ma kala juu tinjaa kuhiasinj yuga a laa Yesu wiaa dii, ama a tinj Farisii tinjaa wiaa fawullun

fa kenba. Ba bi wuo chaasa bul ari ba laa u wiaa dii, di nii dee, ba fa jaŋ kiriba Wii-chuoɛ dia ɛ. <sup>43</sup> Ba fa cho di niaa ne bibeseba ɛ a kii Wia si beseba ɛ.

<sup>44</sup> Nii ne Yesu faasa bul, "Nii-la kala si laa mi wiaa dii, u ma laa nii-la si tiŋmi wiaa dii ne. Mi dunɗuŋa wiaa dee u laa dii. <sup>45</sup> Nii-la kala si nami, u ma na nii-la si tiŋmi ne. <sup>46</sup> Mi ku tuu dunia di mi ŋaa dunia pulumuŋ ne a chaane. Nii-la kala si laa mi wiaa dii bira bi jaŋ he birimiŋ tuɔŋ. <sup>47</sup> Nii-la kala si nii mi wu-bulaa aŋ bi baa to, mi bi u tiina sariya ka dii, bee wiaa mi bi ko di mi dii dunia niaa sariya. Mi ko di mi laa dunia niaa ta ne. <sup>48</sup> Wialin mi si bula pima ne jaŋ dii tiina si bi mi wiaa laa dii sariya cheɛ-la dunia si jaŋ dere. <sup>49</sup> Wialin mi si bula, mi titia doluŋ ɛ dee mi bul. Mi Nyimma-la si tiŋmi, u titia ne dagemi wialin mi sii bul. <sup>50</sup> Mi jima ari wialin u sii dagu jaŋ pi nialin sii toba miisi-la si bi dere. Nii wiaa, wialin kala mi sii bul ŋaa mi Nyimma ne dagemi."

## 13

*Yesu soŋ u haritooro  
naasin*

<sup>1</sup> Leeɛ u ka tapulii kubala ne, ka di Juu tiŋŋaa diisiŋ kielin gbiele-la yi. Bua deen ɛ Yesu jin ari u jaŋ leŋ dunia deen aŋ mu u Nyimma teen. U cho nialin sii to u harin ne dunia deen ɛ. Bua deen ɛ saa dage ari u cho u haritooro ne a mu

kieli. <sup>2</sup> Tapulii-la didaanin Yesu ari u haritooro hoŋ di ba dii kudiilee. Bua deen ɛ di Sitaani ku juu Saamɔŋ bie Judas Isikarot duu joŋ Yesu yalle. <sup>3</sup> Yesu fa jima ari u ne lii Wia teen ne. U si lii Wia teen nii, u jaŋ bira miira mu u teen. U bira jima ari u Nyimma fa joŋ kuŋ-kala doluŋ ne a he u nisin ɛ. <sup>4</sup> Nii ne Yesu sii kudiile-la nyuŋ, a wuri u geri-balin bil, aŋ joŋ pɔpɔ vɔɔ u tiŋa, <sup>5</sup> a ŋaa liin he taasi-gbaŋa ɛ, a suomo susɔŋ u haritooro-la naasin a ken pɔpɔ-la titiike. <sup>6</sup> U si ku yi Saamɔŋ Piita ɛ, nii ne Piita piesu a bul, "Mi Tiina, ŋŋ che di ŋ ne soŋ mi naasin?" <sup>7</sup> Nii ne Yesu bula pu, "Bua deen ɛ ŋ bi jin wiila mi sii ŋaa, ama u harin ɛ ŋ jaŋ jin u bubuɔŋ." <sup>8</sup> Nii ne Piita bira bula pu a bul, "Ŋ bi jaŋ soŋ mi-na naasin da." Nii ne Yesu ma bul, "Di mi ne bi ŋ naasin soŋ, ŋ bira bi mi haritooru ŋaa." <sup>9</sup> Nii ne Piita bira bul, "Mi Tiina, di nii-na ne, si mi naasin dunɗuŋa soŋ, soŋ mi nyuŋ ari mi nisaa maa." <sup>10</sup> Nii ne Yesu bul, "Nii-la kala si fo liin, u yaraa kala zoŋo ne, u saa bira bi maga duu fo liin, [see duu soŋ u naasin dunɗuŋa.] Ma kala saa bi disinniŋ kene, ama ni-bala dunɗuŋa ne ken disinniŋ ma tuɔŋ." <sup>11</sup> Yesu paala jin nii-la sii che duu joŋu yalle ne. Nii ne tii u bul di ba kala tuɔŋ dee bi pulla nii.

<sup>12</sup> Yesu si soŋ u haritooro-

la naasiŋ dɛrɛ, u bira jorŋ u gerinŋ laale a bira mu hoŋ u di-honunŋ, nii nɛ aŋ piɛsɛba a bul, “Ma jinŋ wii-la mi si ŋaama lɛ bubuonŋ nɛɛ? <sup>13</sup> Ma kɛŋmi kaa yirɛ ma kuhianŋ ari ma Tiina. U saa kɛŋ wonŋbiinŋ nɛ di ma yirɛmi nii, bɛɛ wiaa mi nɛ sɛnɛ nii. <sup>14</sup> Mi si ŋaa ma Tiina ari ma kuhianŋ aŋ sɔŋ ma naasiŋ, u maga di ma saa sɔŋ ma dɔŋsunŋ tinŋaa naasiŋ. <sup>15</sup> Mi laa sipaanŋ ŋaama-na nɛ, di ma saa wuo ŋinŋaa nii dɔŋɔ lɛ. <sup>16</sup> Wutitii nɛ mi bulaa pima, tintinnu kala bi u kuhianŋ kii, nii-la ma ba si tima, u ma bi nii-la si timu kii. <sup>17</sup> Ma lɛɛɛ si jinŋ wiaa deenba nii, di ma nii ŋaaba, ma tuonŋ janŋ tɔrɛ. <sup>18</sup> Ma kala deɛ mi bul ari ma tuonŋ janŋ tɔrɛ. Mi jinŋ nialinŋ mi si liisa nɛ. Wii-la ba si ŋmuŋsa Wia teninŋ tuonŋ sɛnɛ janŋ ŋaa wutitii. Ba bula ari la di nii-la kala si pɛ dɔŋɔ lɛ dii kudiilee nɛ janŋ miira gollimi lɛ. <sup>19</sup> Mi bul wiinŋ deenŋ pipima nɛ, ka duu-na ŋaa, di nii nɛ sɛnɛ kɔ duu ŋaa, ma janŋ laa mi wiaa dii ari mi nɛ ŋaa Kirisito, nii-la wiaa ba si ŋmuŋsa. <sup>20</sup> Wutitii nɛ mi bulaa pima, nii-la kala si kɛŋ nii-la mi si tima worunŋ, u tiina kɛŋ mi ma worunŋ nɛ. Nii-la ma kala si kɛŋmi worunŋ, u tiina ma kɛŋ nii-la si tinŋmi worunŋ nɛ.”

*Yesu bula ari ba janŋ jorŋu yalle.*

*Mat. 26.20-25; Maak 14.17-21; Luuk 22.21-23*

<sup>21</sup> Yesu si bul wiaa deenba dɛrɛ, u tuonŋ bi di-bala pina. Nii nɛ u chaasa bul, “Wutitii nɛ mi bulaa pima, ma dɔŋɔ nɛ janŋ jorŋmi yalle.” <sup>22</sup> Nii nɛ u haritooro-la miira didaase dɔŋɔ. Ba bi jinŋ tiina u sii dagu. <sup>23</sup> Yesu haritooro-la tuonŋ nii-la u fa si cho nɛ fa hono kpagu. <sup>24</sup> Nii nɛ Saamonŋ Piita loŋɛ u haritooro-la dɔŋɔ duu piɛsɛ Yesu-na di kubɛɛ nɛ u didage? <sup>25</sup> Nii nɛ haritooro-la fa si kpage Yesu wasa suusa mu yi Yesu a piɛsu a bul, “Mi Tiina, kubɛɛ nɛ?” <sup>26</sup> Nii nɛ Yesu bul, “Mi si janŋ jorŋ boroboro yuu disinŋ a pi nii-la, u nɛ nii.” Nii nɛ u jorŋ boroboro-la a yuu disinŋ a jorŋo pi Judas, nii-la si ŋaa Saamonŋ Isikarot bie. <sup>27</sup> Judas si yia laa boroboro-la dɛrɛ, Sitaani ku juu-u. Nii nɛ Yesu bula pu, “Wii-la ŋ sii che di ŋ ŋaa, ŋaa lima lima.” <sup>28</sup> Nialinŋ dɔŋsunŋ kala fa sii dii kudiile-la, ba bi jinŋ wii-la kala u fa si bula bubuonŋ. <sup>29</sup> Judas fa sii kori ba moribiee nii, Yesu haritooro-la dɔŋsunŋ fa biina ari Yesu faa che duu mu yoo kialinŋ ba sii che di ba dii nɛ gbiele-la lɛ, koo duu jorŋ kunŋ nɛ a pi summoo. <sup>30</sup> Judas si laa boroboro-la dɛrɛ, u guu sii a lii lima lima. Bua-la lɛ titaŋ nɛ.

*Yesu bil nii-falii nɛ a pi niaa*

<sup>31</sup> Judas si lia, nii nɛ Yesu bul di niaa janŋ na u-na Nuhuobiine Bie dolunŋ si

mage ἡἰ. Niaa ma jaᅇ tou le ne a na ἡἰ Wia si keᅇ doluᅇ. <sup>32</sup> Ἡἰ ne Yesu bira bul, "Mi si jaᅇ dage Wia doluᅇ si mage ἡἰ, ἡἰ ne Wia ma jaᅇ dage mi-na Nuhuobiine Bie doluᅇ si mage ἡἰ. U jaᅇ ἡaa ἡἰ lima. <sup>33</sup> Mi biirinᅇ, mi bira bi jaᅇ he ma teenᅇ dieni. Ma jaᅇ bee chemi. Ama mi si bul ἡἰ a pi Ἰuᅇ tinᅇaa, mi jaᅇ bul ἡἰ a pima maa. Lee-la mi si jaᅇ mu, ma bi jaᅇ wuo mu dime. <sup>34</sup> Ἡἰ-falii ne mi bilee pima. U ne ἡla: Ma jima ari mi choma ne woruᅇ. Má cho doᅇo ari mi si choma ἡἰ. <sup>35</sup> Di ma ne cho doᅇo, ἡἰ le ne niaa kala jaᅇ to jin ari ma seᅇe ἡaa mi haritooroo ne."

*Yesu bula pi Piita ari u jaᅇ bul u buu jin*

*Mat. 26.31-35; Maak 14.27-31; Luuk 22.31-34*

<sup>36</sup> Ἡἰ ne Saamᅇᅇ Piita pieᅇe Yesu a bul, "Mi Tiina, nii ne ᅇ mumu?" Ἡἰ ne Yesu ma bula pu a bul, "Lee-la mi si jaᅇ mu, ᅇ bi jaᅇ wuo to mu, ama u harinᅇ ne ᅇ jaᅇ wuo to." <sup>37</sup> Ἡἰ ne Piita bira pieᅇu a bul, "Mi Tiina, beᅇ ne tii mi bi jaᅇ wuo to ᅇ harinᅇ leeᅇ? Mi paala ᅇaa siri di mi joᅇ mi miisᅇᅇ yᅇo suuᅇ ne ᅇ wiaa." <sup>38</sup> Ἡἰ ne Yesu pieᅇu a bul, "ᅇ seᅇe ᅇaa siri di ᅇ joᅇ ᅇ miisᅇᅇ yᅇo suuᅇ ne mi wiaa? Wutitii ne mi bulaa pinᅇ, ka di ji-bele-na yel, ᅇ jaᅇ bul naansᅇᅇᅇ butori ari ᅇ bimi jinᅇ."

## 14

*Yesu si u ne ᅇaa wonᅇbii-la sᅇi mu Wia teenᅇ*

<sup>1</sup> Ἡἰ ne Yesu si, "Ma sí leᅇe di ma tuᅇᅇ vugime. Má laa Wia wiaa dii a laa mi ma wiaa dii. <sup>2</sup> Mi Nyimma jaᅇ le diisᅇᅇ yuga he dime. Di ἡἰ fa dee, mi bi jaᅇ bula pima ari mi jaᅇ mu wase lerinᅇ a bilma le. <sup>3</sup> Di mi ne mua a wase lee-la bilma le deᅇe, mi jaᅇ bira ko a keᅇma kaa mu mi teenᅇ Wia-jaᅇ le, di la kala he di-bala. <sup>4</sup> Lee-la ma mi si jaᅇ mu, ma jin wonᅇbiinᅇ ne." <sup>5</sup> Ἡἰ ne Tomas bula pu a bul, "La Tiina, la bi jin lee-la ᅇ sᅇi mu, ee ne la jaᅇ wuo ᅇaa jin u wonᅇbiinᅇ?" <sup>6</sup> Ἡἰ ne Yesu bula pu a bul, "Mi ne ᅇaa wonᅇbiinᅇ aa mu Wia-jaᅇ. Mi ne bira Wutitii Tiina maa, a biraa pi niaa ma miisᅇᅇ. Nuu-kala bi mi Nyimma teenᅇ wuo mu, see duu tomi le. <sup>7</sup> Di ma ne jinᅇmi, ma jin mi Nyimma ma ne. A lii jinᅇᅇ saa ma paala jimu ne a nau maa."

<sup>8</sup> Ἡἰ ne Filip bula pu a bul, "Mi Tiina, dageᅇa la Nyimma, wii-la kala la sᅇi che ne ἡἰ." <sup>9</sup> Ἡἰ ne Yesu pieᅇu a bul, "Filip, la di ᅇ he dime a dieni ἡἰ, ka ᅇ ha bimi jinᅇᅇ? Nii-la kala si nami, u na mi Nyimma ma ne. Beᅇ ne saa tii ᅇ bul di mi dagema mi Nyimma? <sup>10</sup> ᅇ bi laa dii ari mi he mi Nyimma le ne, mi Nyimma ma hemi leeᅇ? Wialinᅇ kala mi si yie bulaa pima, mi titia doluᅇ le dee mii bul. Wialinᅇ ma mi sᅇi ᅇaa, mi Nyimma hemi

le ní ñaa ñii. <sup>11</sup> Má laa dii ari mi he mi Nyimma le ne, mi Nyimma ma hema le. Di ma ne bi ñii wuo laa dii, má laa dii a tiñ wialinj mi sí ñaa wiaa. <sup>12</sup> Wutitii ne mi bulaa pima, nii-la kala si laa mi wiaa dii, u jañ wuo ñiñaa wialinj mi sí ñaa. U jañ paala wuo ñaa kii wialinj mi sí ñaa, bæe wiaa mi jañ miira mu mi Nyimma teenj. <sup>13</sup> Kuñ-na kala ma si piése chiche mi doluj le, mi jañ joño pima. Mi jañ ñaa ñii di niaa wuo tomi le a na mi Nyimma si keñ doluj ñii, a yire u yirinj. <sup>14</sup> Di ma ní che kuñ-kala mi doluj le, mi jañ ñaa pima.”

*Yesu bula ari u jañ joñ Wia Diñ-zoñ-la a he niaa le*

<sup>15</sup> Nii ne Yesu bira bul, “Di ma ne chomi, ma jañ tuto mi niinj wiaa. <sup>16</sup> Di ma ní ñaa ñii, mi jañ sul mi Nyimma duu joñ u Diñ-zoñ-la pima, duu pipema le. U jañ he ma teenj a kaa mu wuu. <sup>17</sup> U jañ didagama wutitii. Dunia niaa buu jinj. Ba bi jañ wuo nau, ñii ne tii u bi jañ wuo heba le. Ama ma-na jimu ne. U he ma teenj ne. U saa jañ hema le.

<sup>18</sup> Mi bi jañ leñ ma dunđuna ta, mi jañ miira ko ma teenj. <sup>19</sup> U ka mua dunia niaa bira bi jañ nami, ama ma-na jañ nami. Mi si jañ keñ miisinj ñii, ma ma jañ keñ miisinj. <sup>20</sup> Tapulii-la Wia si jañ joñ u Diñ-zoñ-la hema le ne, ma jañ jinj ari mi he mi Nyimma le ne, ma ma hema

le, mi ma hema le. <sup>21</sup> Nii-la kala si nii mi niinj wiaa aa toba, u tiina ne chomi. Mi Nyimma ma saa jañ cho nii-la si chomi. Mi ma jañ cho tiina a keñ mi titia kaa dagu.” <sup>22</sup> Nii ne Judas bul (nii-la ba sí yire Isikarot dee), “Mi Tiina, ee ne ñ jañ ñaa a keñ ñ titia dagela, añ bi ñ titia kaa dage dunia niaa?” <sup>23</sup> Nii ne Yesu bula pu a bul, “Nii-la kala si chomi, u jañ tuto mi niinj wiaa. U si ñaa ñii, mi Nyimma ma jañ chou. La di mi Nyimma kala ma jañ ku heu le. <sup>24</sup> Nii-la si bimi cho, u bi mi niinj wiaa ka to. Wialinj ma si nii saa, mi titia dee bi bul. Ama mi Nyimma-la si tiñmi ne dagemi mii bul.

<sup>25</sup> Mi ha he ma teenj ne, ñii ne mi bul wiaa deenba pipima. <sup>26</sup> Ama mi Nyimma jañ joñ u Diñ-zoñ-la duu ku tuu a hema le mi doluj le. U jañ pema le a wuo dagema wiikala, a leñ di ma liisi wialinj kala mi si bula pima. <sup>27</sup> Mi sí mu ñii, mi jañ leñ di ma hoñ ari yarifielaa di ma tuoñ tore. Yarifiela-la mi si pima, u bi naga yarifiela-la dunia niaa si kene ne. Ma sí leñe di ma tuobiinaa vugime, a bira sí leñe di fawulluj ma keñma. <sup>28</sup> Ma nia ari mi si bula pima ari mi jañ miira viiri añ bira miira ko ma teenj. Di ma ne fa chomi, ma tuoñ fa jañ tore ari mi si mu mi Nyimma teenj, bæe wiaa u ne keñ doluj a kiimi. <sup>29</sup> Mi laa sipaanj bul wiaa deenba pipima ne, ka di ba-na ñaa,

ma jaŋ laaba dii. <sup>30</sup> Mi bi jaŋ wuo bul wiaa ma teen a dieni, bɛɛ wiaa dunia kuoro ka kɔ nɛ. U bi dol kala kɛnɛ mi lɛ. <sup>31</sup> Ama mii chɛ di dunia niaa jin ari mi cho mi Nyimma nɛ. Nii nɛ tii mi ŋɔŋaa wialin kala u si si di mi ŋaa. Má leŋ di la lii. Má sii.”

## 15

*Yesu nɛ ŋaa tii-titii-la ba sii yirɛ vaiŋ*

<sup>1</sup> Nii nɛ Yesu si, “Mi nage tia-la titia ba sii yirɛ vaiŋ nɛ. Ama mi nɛ tii-titii-la. Mi Nyimma ma nage nii-la sii beŋ tia-la nɛ. <sup>2</sup> Naakel-la kala si mɛrɛ tia-la lɛ aŋ bi nɛŋ, u yie kere ta nɛ, naakel-la kala sii nɛŋ, u yie buoro ta nɛ, ka di u wuo faasa nɛŋ woruŋ. <sup>3</sup> Ma tuɔŋ paala bira bi disinnin kɛnɛ a tin wialin mi si bula pima. <sup>4</sup> Má mɛrɛmi lɛ di mi ma mɛrɛma lɛ. Tia naakelee dundunja bi jaŋ wuo nɛŋ, see di ba mɛrɛ tia gentine lɛ. Ma ma bi jaŋ wuo tin tintin-zɔŋŋɔɔ, see di ma mɛrɛmi lɛ.” <sup>5</sup> Nii nɛ Yesu bira bul, “Mi nage tia nɛ, ma ma nage tia-la naakelee. Nii-la kala si mɛrɛmi lɛ, mi ma mɛrɛ tiina lɛ. Nii nɛ jaŋ wuo ŋaa duu tin tintin-zɔŋŋɔɔ woruŋ, a tin bɛɛ wiaa di ma nɛ bimi lɛ mɛrɛ, ma bi jaŋ wuo ŋaa wii-kala. <sup>6</sup> Di nuu nɛ bimi lɛ mɛrɛ, ba jaŋ jon tiina yuo ta, a nage ba si yie kerɛ tia naakelee ta, ba hil. Ba paaba a yuo he nyinin lɛ ba dii nii. <sup>7</sup> Di ma mɛrɛmi lɛ, mi nin wiaa mi

si bula pima jaŋ he ma tuɔŋ. Di ma nɛ ŋaa nii, kuŋ-kala ma si piesɛmi chiche, mi jaŋ wuo ŋaa pima. <sup>8</sup> Di ma nɛ tin tintin-zɔŋŋɔɔ woruŋ, ŋla nɛ mi Nyimma yirin jaŋ yirɛ. Ma jaŋ wuo dage nii ari ma ŋaa mi haritooroo nɛ. <sup>9</sup> Mi choma ari mi Nyimma si chomi nii nɛ. Nii wiaa, má mɛrɛmi lɛ di mi choma a kaa mu wuu. <sup>10</sup> Di ma ní to mi nin wiaa, mi jaŋ choma a kaa mu, ari mi sii to mi Nyimma nin wiaa a mɛrɛu lɛ u chomi nii. <sup>11</sup> Mi bul wiaa deenba pima di ma wuo na tuɔtuɔru-la mi si jonɔ pima. Nii nɛ ma tuɔŋ jaŋ faasa tɔrɛ woruŋ a mu dɛrɛ.

<sup>12</sup> Mi choma nɛ woruŋ. Wii-la mi si bula pima di maa ŋaa nɛ ŋla: Má cho dɔŋɔ ari mi si choma nii. <sup>13</sup> Di nuu nɛ ŋaa siri duu jon u miisin yɔɔ suuŋ u nanɔɔŋɔ wiaa, u chou nɛ woruŋ. Nu-kala bi nii-la cho mage nia deen. <sup>14</sup> Di ma ní ŋaa wialin mi sii bula pima di maa ŋaa, ma jaŋ ŋaa mi nanɔɔŋsuŋ. <sup>15</sup> Mi bira bi jaŋ kɛŋma kaa yirɛ mi tintinna, bɛɛ wiaa tintinna bi wii-la u kuhian sii ŋaa jin. Ama mi-na bul wialin kala mi Nyimma si bula pimi pima nɛ. Nii nɛ tii mi kɛŋmaa yirɛ mi nanɔɔŋsuŋ. <sup>16</sup> Ma dee bimi liisa, mi nɛ liisema. Mi liisema di ma mu faasa ŋaa wu-zɔŋŋɔɔ nɛ, wu-zɔmɔ-la si bi jaŋ lel. Di ma ní ŋaa nii, mi Nyimma jaŋ pima kuŋ-kala ma si piesu chiche mi doluŋ lɛ.

17 Wii-la mi si bula pima di maa n̄aa n̄e n̄la: Má cho d̄oŋo.

*Yesu bul n̄ii dunia n̄iaa si jaŋ bere ba di u haritooroo*

18 Di dunia n̄iaa n̄e berema, ma jin̄ ari ba laa sipaan̄ beremi n̄e. 19 Di ma n̄e fa n̄aa dunia n̄iaa, dunia n̄iaa fa jaŋ choma woruŋ, ari ba si cho d̄oŋo n̄ii. Ma di dunia n̄iaa bi kubala n̄aa. Mi liisema dunia n̄iaa tuoŋ n̄e. N̄ii n̄e tii ba berema. 20 Mi laa sipaan̄ bula pima ari tiŋtin̄nu bi u kuhian̄ kii. Má liisi wiin̄ deen̄. Ba si d̄ogisemi n̄ii, ba jaŋ d̄ogisema ma n̄ii. Di ba n̄e fa sei mi niin̄ wiaa, ba fa jaŋ sei ma ma niin̄ wiaa. 21 Ba jaŋ n̄aa wiaa deen̄ba kala a tiŋ ma s̄ii to mi harin̄ wiaa. Ba si bi nii-la si tiŋmi jin̄ n̄e tii baa n̄aa n̄ii. 22 Di mi n̄e fa bi ku bul wiaa piba, ba si n̄aa wu-b̄om̄o-la kala, mi fa bi jaŋ wuo bul di ba chei wii-kala. Ama mi si folo ku bul wiaa piba, ba bira bi jaŋ wuo bul ari ba bi wii-kala cheye. 23 Nii-la si beremi, tiina bere mi Nyimma ma n̄e. 24 Wialin̄ kala mi si n̄aa, nuu-kala biba n̄aa. Di mi n̄e fa biba n̄aa di ba na, ba fa bi jaŋ chei wii-kala. Ama ba naba kala n̄e aŋ ha bere la di mi Nyimma kala. 25 Ba si beremi n̄ii, wialin̄ kala ba si n̄mun̄sa Wia tenin̄ tuoŋ sen̄e n̄aa. N̄la n̄e ba n̄mun̄se, 'Mi bi wii-kala n̄aa chei, ka ba beremi.' 26 Ama mi jaŋ leŋ di Wia Diŋ-z̄oŋ-la lii mi

Nyimma teen̄ a ku tuu hema le. U jaŋ pema le a dagema wutitii. U n̄e jaŋ bul mi wiaa pima. 27 Ma ma jaŋ bul mi wiaa pi n̄iaa, b̄e wiaa mi si suomo didage n̄iaa, la di ma kala níi to d̄oŋo.

## 16

1 Mi bul wiaa deen̄ba kala pipima di ma sí harin̄ miiru n̄e. 2 Bua-la jaŋ yi di Juu tin̄n̄aa kirima ta Wii-chuoŋe diisin̄ le. Bua ma d̄oŋ jaŋ yi di n̄iaa kpuma aŋ biine di baa to Wia won̄biin̄ n̄e n̄ii. 3 Ba jaŋ n̄aa wiaa deen̄ba kala a tiŋ ba sí bi mi Nyimma jin̄, a bimi ma jin̄. 4 Mi bul wiaa deen̄ba kala pipima di bua-la n̄e ku yi di wiaa deen̄ba n̄in̄aa, ma jaŋ liisi ari mi bula pima.

*Wia Diŋ-z̄oŋ-la tiŋtin̄n̄aa*

La di ma kala fa s̄ii to d̄oŋo, n̄ii n̄e tii mi bi wiaa deen̄ba bula pima faafaa. 5 Ama leele mii mu nii-la si tiŋmi n̄e, aŋ ka ma kuŋ-kala ha bi mi pīesa a bul di nii n̄e mii mu? 6 Mi si bul wiaa deen̄ba pima leele n̄la, ma tuoŋ cheye n̄e. 7 Ama wutitii n̄e mi bulaa pima n̄la. Mi s̄ii mu n̄ii, u jaŋ z̄om̄o pima. Di mi n̄e bi mua, Wia Diŋ-z̄oŋ-la si jaŋ k̄o a pema le bi jaŋ k̄o. Ama di mi n̄e mua, mi jaŋ leŋ duu k̄o. 8 Duu n̄e saa k̄o, u jaŋ leŋ di dunia n̄iaa jin̄ ari ba n̄aa haacheba n̄e. U jaŋ bira dageba n̄ii ba si jaŋ to a keŋ tuo-pula Wia sipaan̄, a bira dageba ari Wia jaŋ dii ba sariya. 9 Ba jaŋ jin̄ ari ba si bi mi wiaa laa dii, u n̄ii n̄aa

haache ne. <sup>10</sup> Mi si miira mu mi Nyimma teenj nii, ma bira bi jan nami. U nii ma jan dage ari mi kenj tuo-pula ne Wia sipaan. <sup>11</sup> Wia si folo dii dunia kuoro Sitaani sariya nii, ba ma jan jinj ari Wia ma jan dii ba sariya.

<sup>12</sup> Wiaa yuga ne mi ha kenj di mi bula pima, ama ma biba wuo nyalime. <sup>13</sup> Ama di Wia Din-zon-la ne ko, u jan dagema wutitii kala. U bi jan bubul wiaa u titia dolunj le, ama wialinj kala u si nii mi Nyimma niinj le ne u jan bul. U ma jan dagema wialinj kala si jan naa. <sup>14</sup> U jan lenj di niaa yire mi yirinj, bee wiaa wialinj kala mi si kene mi bul, u jan kaa ku bula pima. <sup>15</sup> Ku-la kala mi Nyimma si kene naa mi kunj ne. Nii ne tii mi bula pima ari wialinj kala mi si kene mi bul, Wia Din-zon-la jan kaa ku bula pima."

*Yesu bula pi u haritooroo ari ba tuon jan tore*

<sup>16</sup> Nii ne Yesu bira bula piba a bul, "Ma bira bi jan nami. Tapulaa banmene cheenj ne ma jan bira nami." <sup>17</sup> Nii ne u haritooroo donsunj pipiese donjo a bul, "Wiinj deenj bubuonj ne bee? U bula pila ari tapulaa banmene la bi jan nau, di tapulaa banmene cheenj ne la bira jan nau. U bira bula ari u si jan mu u Nyimma teenj ne tii la bira bi jan nau. <sup>18</sup> U si yie bul di tapulaa banmene deenj, u bubuonj ne bee? La bi u bubuonj

jinj." <sup>19</sup> Yesu jima ari baa che di ba piesu ne. Nii ne u bula piba, "Mi si si tapulaa banmene ma bi jan nami, di tapulaa ma banmene cheenj ma jan bira nami, nii wiaa ne ma pipiese donjo? <sup>20</sup> Wutitii ne mi bulaa pima, ma jan nmunjmoo niinj kala, di dunia niaa tuonj tore, ma tuonj janj chei, ama ma tuo-chei-la jan miira birime tuotorunj. <sup>21</sup> Di haala luorunj nuu wii duu che u lul, u yie tuune niinj ne. U heenj yie ne. Duu ne saa ku lul bile dere, u yu u hee-la kala le. U si lul bie ne tii u tuonj yie tore. <sup>22</sup> Nii ne saa u jan nagema ma le. Leele ma tuune niinj ne, ama mi jan bira nama di ma tuonj kala tore. Bua-la le nuu-kala bi jan wuo naa di ma tuonj bira chei. <sup>23</sup> Di tapulii-la ne yie, ma bi jan piesemi chiche kunj-kala. Wutitii ne mi bulaa pima, mi Nyimma janj pima kunj-kala ma si piesu chiche mi dolunj le. <sup>24</sup> Leele nla ma ha bi kunj-kala piesu chiche mi dolunj le. Nii wiaa ma saa piesu, u jan jonjo pima, di ma tuonj faasa tore a mu dere.

<sup>25</sup> Wiaa deenba kala mi sii bul, namagaba ne mii mage. Ama bua kubala jan yi, mi bira bi jan mage namagaba, mi jan chaasa bul wiaa pima a mu tige mi Nyimma le, di ma jinj ba bubuosa worunj. <sup>26</sup> Di tapulii-la ne yie, ma ne jan piesu chiche kiaa mi dolunj le. Mi bi si mi ne jan sula pima, <sup>27</sup> bee wiaa mi Nyimma titia ma choma ne.



Ma chomi ne a laa mi wiaa dii ari mi lii u teen ne. Nii ne tii u ma choma. <sup>28</sup> Mi lii mi Nyimma teen ne a ku tuu dunia. Læle mi saa jan lej dunia an miira mu mi Nyimma teen.”

<sup>29</sup> Nii ne u haritooro-la bula pu a bul, “Læle η chaasaa bul wiaa ne. N bira bi namagaba ka mage. <sup>30</sup> Læle la jima di η jin wii-wii-kala ne, η bí che di nuu-kala piesin wii-kala. Wiin deen ne ηaa di la jin ari η lii Wia teen ne.” <sup>31</sup> Nii ne Yesu pieseba, “Læle saa ma laa mi wiaa dii nee? <sup>32</sup> Bua-la jan yi, u saa paala yi ma ne, ma kala jan pise a mu ma diisin, an ka mi dunɖuɖa. Ama saa, mi bi jan ηaa mi dunɖuɖ. Mi Nyimma hemi le ne. <sup>33</sup> Mi bul wiaa deenba pima di ma wuo hon ari yarifielaa ne. Dunia deen tuon ma jan na heen. Ama má lej di ma nyun nyaase. Mi yuo dii dunia ne.”

## 17

*Yesu chuole Wia pi u haritooro*

<sup>1</sup> Yesu si bul wiaa deenba dere, u wula bej wia nyun an bul, “Mi Nyimma, bua-la yie ne. Len di mi-na η Bie laa yirin, di mi ma lej di η yirin yire. <sup>2</sup> N ne jon dolun pimi di mi bibej nuhuobiinee kala, a jon miisi-la si bi dere a pi nialin kala η si liisa pimi. <sup>3</sup> Nialin si jima ari η ne sene ηaa Wia, Wia bira tuo, an pe jin mi-na Yesu Kirisito, niila ma η si tima, ba ne ken

miisi-la si bi dere. <sup>4</sup> Mi leje η laa yirin ne tinteen deen le. Mi tin tintimii-la dere ne, tintimii-la η si jon pimi di mi tin. <sup>5</sup> Oo, mi Nyimma, lej di mi yirin yire η sipaan læle, yiri-la la di η kala fa si laa, an ka η-na suomo ηaa dunia.

<sup>6</sup> Mi leje nialin η si liisa pimi dunia niaa tuon jimin ne. Ba fa ηaa η kiasa ne, η ne liiseba pimi. Ba ne sei η niin wiaa. <sup>7</sup> Læle ba jima ari wii-kala mi si ηaa, mi ηaa η dolun le ne. <sup>8</sup> Mi bul η niin wialin η si bula pimi piba ne. Ba laa dii a jin ari wutitii ne, mi sene lii η teen ne. Ba ma laa dii ari η ne tinmi. <sup>9</sup> Mi sulun pipiba ne. Mi bin sula pipi dunia niaa, see nialin η si liisa pimi dunɖuɖa. Ba ne ηaa η kiasa. <sup>10</sup> Nialin kala mi si kene ηaa η niaa ne. Nialin kala η ma si kene ηaa mi ma niaa ne. Ba ne leje mi laa yirin. <sup>11</sup> Læle mii ko η teen ne, mi bira bi jan he dunia le, ama ba-na jan he dunia le. Mi Nyimma, η ne ηaa nii-la si bi disinnin kene. Bej nialin η si liisa pimi worun η dolun le, a lej di ba ηaa kubala, ari la di η kala si ηaa kubala ηii. <sup>12</sup> Mi fa si he ba teen, mi bej ba nyun ne worun η dolun le, dol-la η si jon pimi ne mi kaa bejba. Mi si ηaa ηii, ba kubala ma bi lele, see nii-la si maga duu lel, di wialin ba fa si ηmunsa Wia tenin tuon sene ηaa. <sup>13</sup> Læle saa mii ko η teen ne. Mi ha si he dunia le ηii, ηii ne mi bul wiaa

deenba piba di ba tuon faasa tɔrɛ, ari mi tuon si tɔrɛ nii. <sup>14</sup> Mi bul η niin wiaa piba nɛ. Ba di dunia niaa bi kubala ηaa, ari la di dunia niaa si bi kubala ηaa nii. Nii nɛ tii dunia niaa bɛrɛba. <sup>15</sup> Mi bi si di η liiseba dunia lɛ, ama mi si di η pɔba nɛ a liiseba Sitaani nisin lɛ. <sup>16</sup> Ba di dunia niaa bi kubala ηaa, ari la di dunia niaa si bi kubala ηaa nii. <sup>17</sup> N niin wiaa ηaa wutitiiba nɛ. Dageba, di ba bira sɪ disinnin kɛn. <sup>18</sup> N nɛ tinmi dunia niaa teen. N si tinmi nii, nii titia nɛ mi ma tinba dunia niaa teen. <sup>19</sup> Mi jon mi miisin nɛ a yoo suun ba wiaa. Mi ηaa nii di ba ma ηaa siri di ba jon ba miisin yoo suun wutitii wiaa nɛ.

<sup>20</sup> Mi bin sula pipiba dunɔn, mi pɛ sula pi nialin si laa mi wiaa dii a tin ba si bul mi wiaa piba lɛ nɛ. <sup>21</sup> Mii sulun nii di ba kala wuo ηaa kubala nɛ. N hemi lɛ nɛ. Mi ma hɛn lɛ. Len di ba kala ma wuo hɛla lɛ. Di η nɛ ηaa nii, dunia niaa jan wuo laa dii ari η nɛ tinmi. <sup>22</sup> N si len mi laa yirin nii, nii nɛ mi ma len ba laa yirin. Mi ηaa nii di ba kala wuo ηaa kubala nɛ, ari la di η kala si ηaa kubala nii. <sup>23</sup> Mi hɛba lɛ nɛ, η ma hemi lɛ. La hɛ dɔnɔ lɛ nii di ba wuo ηaa kubala nɛ. Nii nɛ dunia niaa jan jin ari η nɛ tinmi. Ba ma jan jin ari η choba nɛ ari η si chomi nii. <sup>24</sup> Mi Nyimma, η paala chomi nɛ a len mi laa yirin, ka dunia-na suomi. Mi saa chɛ di η len di nialin η si liisa

pimi, di ba hɛ mi teen lee-na kala mi si jan hɛ, di ba wuo na nii η si lenɛ mi laa yirin. <sup>25</sup> Mi Nyimma, η kɛn wutitii. Dunia niaa bin jin, ama mi-na jimin nɛ. Niaa deenba ma jin ari η nɛ tinmi. <sup>26</sup> Mi saa ηaa ba jimin nɛ, mi saa ha jan len di ba jimin. Mi ηaa nii, di nii η si chomi, di ba ma cho dɔnɔ, di mi ma hɛba lɛ."

## 18

*Ba kɛn Yesu*

*Mat. 26.47-56; Maak 14.43-50; Luuk 22.47-53*

<sup>1</sup> Yesu si bul wiaa deenba dɛrɛ, ba duu haritooro sii kieli fuo-naan kubala ba kaa yire Kidirɔn. Lee kubala nɛ fa hɛ dime ba chɔnɛ tiisin. Nii nɛ Yesu ari u haritooro juu lee-la. <sup>2</sup> Ba venɛɛ mu lee-la nɛ, nii nɛ tii Judas, nii-la si jonu yalle, ma wuo jin dime. <sup>3</sup> Nii nɛ Judas kɛn laali-yuoro dɔnsun ari nialin si kpu pusun pipi Wia kuhiasin tintinni-biisin, ari Farisii tinnaa tintinni-biisin, di ba mu kɛn Yesu. Ba mu lee-la Yesu si hɛ. Ba sɪi mu nii, ba kori chaanaa, kapilaa ari nyinin ari ba bakiaa. <sup>4</sup> Yesu jin wii-la kala fa si jan ηaau lɛ nɛ. Nii nɛ u mu chɛnba a piesɛba, "Kubɛɛ nɛ maa chɛɛ?" <sup>5</sup> Nii nɛ ba si, "Yesu si lii Nazaret nɛ la chichɛ." Nii nɛ u bula piba, "Mi nɛ ηla." Judas, nii-la fa si jan jonu yalle, u ma fa hɛ ba tuon nɛ. <sup>6</sup> Yesu si bul nii, ba miira yala mu hariin a tuu tel. <sup>7</sup> Nii nɛ Yesu

bira pieseba a bul, "Kubee ne maa che?" Ba si, "Yesu si lii Nazaret." <sup>8</sup> Nii ne Yesu bula piba, "Mi laa sipaan bula pima ari mi ne nla. Di ma nii chemi, má leŋ di ni-kaanaa viiri." <sup>9</sup> (U bul nii di wii-la u fa si bula, duu wuo sene ŋaa wutitii. U fa bula ari nialin kala Wia si liisa pu, ba kuŋ-kala bi lele.) <sup>10</sup> Saamōŋ Piita fa kori tokobii ne. Nii ne u tuure a ta nialin si kpu pusun pipi Wia kuhian dia-yomo na-diiŋ digilin a keru. Yomo-la yirin ne fa Malikas. <sup>11</sup> Nii ne Yesu bula pi Piita a bul, "Jon ŋ tokobii-la he u pēŋ le. U bi maga di mi na hee-la, mi Nyimma sii che di mi na, koo?"

*Ba keŋ Yesu kaa mu Anas sipaan*

<sup>12</sup> Nii ne laali-yuoroo ari ba kuhian ari juu tinŋaa titinni-biisi-la keŋ Yesu a vobu. <sup>13</sup> Ba laa sipaan kenu kaa mu Anas teen ne. Anas ne fa ŋaa Kayafas hiili-baala. Jina-la Kayafas ma ne fa ŋaa nialin si kpu pusun pipi Wia kuhian. <sup>14</sup> Kayafas ne fa laa sipaan bula pi juu tinŋaa ari ni-bala ne laa tinŋeen niaa kala nyun suu, u ne kpia ni-dan si suba.

*Piita si u bi Yesu jin*

*Mat. 26.69-70; Maak 14.66-68; Luuk 22.55-57*

<sup>15</sup> Saamōŋ Piita ari Yesu haritooroo doŋo to Yesu hariŋ, a juu nialin si kpu pusun pipi Wia kuhian kaala. Kuhian-la fa jin Yesu haritooro deen ne. Nii

wiaa haritooru-la to Yesu hariŋ a juu kaala-la tuōŋ. <sup>16</sup> Ka Piita chin kaala-la jeen hariŋ boinŋiin. Nii ne Yesu haritooro-la doŋo, nii-la nialin si kpu pusun pipi Wia kuhian si jima, u miira lii, a bula pi toli-bie kubala si po boinŋ-la niin duu leŋ di Piita ku juu, an keŋ Piita ku juu. <sup>17</sup> Nii ne tolo-la si chin boi-la niin pieŋ Piita, "Ŋ ma bi baal-la haritooroo doŋo ŋaa?" Nii ne Piita si, "Ai, mi dee." <sup>18</sup> Di waariŋ fa he dime. Nii ne dia-la tinŋinnaa ari nialin si kpu pusun pipi Wia kuhian tinŋinni-biisin he nyiniŋ a china golli aa wieni. Piita ma mu chin ba teen aa wieni nyin-la.

*Yesu bul u suun wiaa*

*Mat. 26.59-66; Maak 14.55-64; Luuk 22.66-71*

<sup>19</sup> Nii ne nialin si kpu pusun pipi Wia kuhian pieŋ Yesu wiaa a tige u haritooroo le ari wialin u fa sii dagu. <sup>20</sup> Nii ne Yesu bul, "Wialin kala mi si bula, mi yie chin ni-dan tuōŋ ne a bul. Mi yie chaasa chin Wii-chuole diisin tuōŋ ne ari Wia-dia tuōŋ, lee-la juu tinŋaa kala si yie ku hilimi ne a bul. Mi ha bi wii-kala luora bul. <sup>21</sup> Bee ne saa tii ŋ pieŋemi? Pieŋ nialin si nii wialin mi si bula, di ba dagiŋ. Ba jin wialin mi si bula ne." <sup>22</sup> Yesu si bul nii, nialin si kpu pusun pipi Wia tinŋinni-bie doŋo falle Yesu chanŋpanin le an bul, "Ŋla ne u mage di ŋ bul wiaa nialin si kpu pusun pipi

Wia kuhianj teenj koo?" <sup>23</sup> Nii ne Yesu bul, "Di mi ne bul wii chei, u maga di η bul di nuu-kala nii ne. Ka di wii-la mi si bula ne ηaa wutitii, bee ne tii η fallemi?" <sup>24</sup> Ba si voo Yesu ηii, ηii ne Anas lej ba kenu ηii kaa mu nii-la si kpu pusunj pipi Wia kuhianj Kayafas teenj.

*Piita bira bula ari u bi Yesu jin*

*Mat. 26.71-75; Maak 14.69-72; Luuk 22.58-62*

<sup>25</sup> Ka Piita ha chinj kaala-la tuonj aa wieni nyinj-la. Nii ne nialinj donsunj piesu a bul, "N ma bi baala deenj haritooroo donjo ηaa?" Piita kaa via anj bul, "Ai, mi dee." <sup>26</sup> Nii ne nialinj si kpu pusunj pipi Wia kuhianj dia tintinnaa donjo ma peu le. U fa ηaa nii-la Piita si ta u digilinj keru, u naanbii ne. U piesu a bul, "Mi fa bi ma di baal-la na, lee-la ba si chonjse tiisinj?" <sup>27</sup> Nii ne Piita bira kaa via anj bul di ai, u dee. U bul ηii dexe di ji-bele yele.

*Ba kenj Yesu kaa mu Paalit teenj*

*Mat. 27.1-2, 11-14; Maak 15.1-5; Luuk 23.1-5*

<sup>28</sup> Chichuo-fiela felele ba kenj Yesu lii Kayafas dia le, a kenu kaa mu baal kubala dia baa yire Paalit. Paalit ne fa honj Rom kuori-balinj nyunj lee-la. Juu tinjaa bi to juu. Ba bi che di ba ηaa disinninj a chei ba kisinj le, anj wuo dii diisinj kielinj gbiele kudiilee. <sup>29</sup> Nii ne Paalit lii a pieseba a bul, "Bee ne ma si baala deenj ηaa chei?" <sup>30</sup> Nii ne ba

bula pu a bul, "Di u ne fa bi wii ηaa chei, la fa bi jan kenu kaa ko η teenj." <sup>31</sup> Nii ne Paalit bula piba a bul, "Ma kenu kaa mu to ma titia wonjbiinj le a dii u sariya." Nii ne ba bula pu a bul, "La bi wonjbiinj kene di la kpu nuu-kala." <sup>32</sup> Yesu fa si daga ari u jan suu daa-gese nyunj, u ηii sene ηaa wutitii. <sup>33</sup> Nii ne Paalit miira juu dia a yire Yesu a piesu, "N ne ηaa Juu tinjaa kuoroo?" <sup>34</sup> Nii ne Yesu piesu, "N titia ne bul wiinj deenj koo nuu ne bul ηii pinj a tigemi le?" <sup>35</sup> Nii ne Paalit bira bul, "Mi bi Juu tiina ηaa. N titia nia ari nialinj si kpu pusunj pipi Wia kuhiasinj ne jonunj he mi nisinj le. Bee ne η ηaa chei?" <sup>36</sup> Nii ne Yesu bul, "Mi kuorunj tuo dunia deenj le, di mi kuorunj ne fa he dunia deenj le, mi niaa fa jan yuo laami, di Juu tinjaa simi wuo kenj. Ama mi kuorunj tuo daha." <sup>37</sup> Nii ne Paalit piesu a bul, "N saa ηaa kuoru ne koo?" Nii ne Yesu bul, "Wii-la η si bula ηaa wutitii ne. Ba paala lulmi di mi ku ηaa kuoru ne. Mi ku tuu dunia di mi dage niaa, di ba jinj wutitii ne. Nii-la kala si cho duu jinj wutitii yie jegile nii mi teenj ne." <sup>38</sup> Nii ne Paalit piesu, "Wutitii ne bee?"

*Ba bula ari ba jan kpu Yesu*

*Mat. 27.15-31; Maak 15.6-20; Luuk 23.13-25*

Nii ne Paalit miira lii dialinj Juu timma-la teenj a

bula piba a bul, “Mi bi wii-la na baala deen si cheye. <sup>39</sup> Ama jina-na kala, di di-isin kielin gbiele-la ne yie-na kala, mi yie vene liise nialin ba si kaa to dia dono ne pima. U nii nage ari ma kisin ne. Ma saa che di mi liise Juu tinjaa kuoru-la ne ta pima?” <sup>40</sup> Nii ne ba kpia gon a bul, “Ai, nia deen dee! Liise Barabas ta. (Barabas fa nja gaaru ne.)”

## 19

<sup>1</sup> Nii ne Paalit len ba ken Yesu a viiru. <sup>2</sup> Ba si viru dere, laali-yuoro ken sosun sua nyun-chuulo a nage kuoro nyun-chuulo a jono chuu, a jon geri-fian laalu <sup>3</sup> an chuolu a bul, “Juu tinjaa kuoro, laa chuolun!” an pe fallu. <sup>4</sup> Nii ne Paalit bira miira lii nialin teen a bula piba a bul, “Ma bee na, mi kenu kaa kuu lii ma teen ne di ma jin ari mi-na bi wii-kala na u si cheye a mage di ba kpau.” <sup>5</sup> Nii ne Yesu ku lii a ha chu sosun nyun-chuulo-la ari geri-fian-la ba si jono laalu. Nii ne Paalit bula piba, “Ma na baal-la.” <sup>6</sup> Nialin si kpu pusun pipi Wia kuhiasin ari ba tintinni-biisin si nau, ba kpia gon a bul, “Len di ba kpaasu daa-gese nyun.” Nii ne Paalit bula piba, “Ma titia kenu kpaase daa-gese nyun. Mi-na bi wii-la u si cheye na.” <sup>7</sup> Nii ne Juu timma-la bira bul, “U ken u titia yire Wia Bii ne. La kisin le nii-la kala si nja nii, u maga di ba kpau

ne.” <sup>8</sup> Fawullun fa paala ken Paalit ne. U si nia ari ba bul nii, fawullun wasa kenu. <sup>9</sup> Nii ne u bira miira juu dia-la a piese Yesu a bul, “Nii ne n lii?” Yesu bi wii-kala bula. <sup>10</sup> Nii ne Paalit piesu, “N tore n niin nee? N bi jin mi ken dolun di mi jonun taa, a bira ken dolun di mi len di ba kpaasin daa-gese nyun?” <sup>11</sup> Nii ne Yesu bula pu, “N fa bi dol kala kene mi le. Wia ne pin dol-la. Ama nii-la si jonmi he n nisin le ne faasa ken haacheba a kiin.”

<sup>12</sup> Paalit si nii nii, u fa cho duu jon Yesu ta. Nii ne Juu tinjaa faasa kpia gon a bul, “Di n ne jonu ta, n bira bi la tinten kuori-balin ba sii yire Siiza nanjon nja. Nii-la kala si ken u titia yiyire kuoru, u tiina nja kuori-balin dinjon ne.” <sup>13</sup> Paalit si nii nii, u ken Yesu kaa ku lii, an mu hon u sariya diiri kpaasa nyun. Ba ken lee-la kaa yire Gabata ne Hiiburu yikoro le. U bubun ne: Lee-la tabiaa nja mula mula ne. <sup>14</sup> Di wia jil nyu-gbana. Tapulii-la ne Juu tinjaa nja siri di u tan ne pula di ba gbieli diisin kielin gbiele-la. Nii ne Paalit bula piba a bul, “Ma na ma kuoro.” <sup>15</sup> Nii ne ba faasa kpia gon a bul, “Len di ba kenu kaa mu kpaasu daa-gese nyun.” Nii ne Paalit pieseba a bul, “Maa che di mi kpaase ma kuoro daa-gese nyun nee?” Nii ne nialin si kpu pusun pipi Wia kuhiasin bul, “La bi kuoru

kala keṇe a pe Siiza le.”  
 16 Nii ne u jon Yesu piba di  
 ba kaa mu kpaase daa-geṣee  
 nyuṅ.

*Ba kpaase Yesu daa-geṣee  
 nyuṅ*

*Mat. 27.32-44; Maak  
 15.21-32; Luuk 23.26-43*

17 Nii ne ba keṅ Yesu lii.  
 U lii a baase u titia daa-  
 geṣee a mu lee-la ba sii che  
 di ba kpaasu. Lee-la yirin  
 ne nyu-kunḵogulo. Hiiburu  
 yiikoro le baa yire lee-la  
 Goligota ne. 18 Lee-la ne ba  
 kpaasu daa-geṣee nyuṅ. Ba  
 fa kpaase niaa balia ma ne  
 daa-geṣee nyuṅ a pe Yesu le.  
 Doṅo he u na-diin, doṅo ma  
 he u na-gua. Ka Yesu he  
 tutuobaanin. 19 Nii ne Paalit  
 ḵmuṅsa mere daa-geṣe-la le  
 a bul, “Juṅ tinḵaa kuoro  
 Yesu a lii Nazaret.” 20 Lee-  
 la kpage Jerusalem ne. Nii  
 ne Juṅ tinḵaa yuga a karime  
 wii-la Paalit si ḵmuṅsa mere  
 daa-geṣe-la le. U ḵmuṅse  
 wii-la ari yiikorusuṅ batori  
 ne. U keṅ Hiiburu tinḵaa  
 yiikoro ḵmuṅse, a keṅ Latin  
 yiikoro ma ḵmuṅse, a keṅ  
 Giriik tinḵaa yiikoro ma  
 ḵmuṅse. 21 Nii ne Juṅ tinḵaa  
 nialin si kpu pusuṅ pipi Wia  
 kuhiasin bula pi Paalit ari u  
 si ḵmuṅsa bul di Juṅ tinḵaa  
 kuoro ne, ama duu bul di  
 baala deen ne si u ne ḵaa  
 Juṅ tinḵaa kuoro. 22 Nii ne  
 Paalit bul, “Wii-la mi si folo  
 ḵmuṅse nii, mi bira bi kaa  
 birime.”

23 Laali-yuoro-la si kpaase  
 Yesu daa-geṣe-la nyuṅ dere,  
 ba paa u gennin a kaa kpa

leree banese. Laali-yuoro  
 kala keṅ doṅo. Geri-bal  
 kubala ma ne fa he dime. Ba  
 yie yuo nii ne, ba bi geripee  
 kala yere mereu le. 24 Nii ne  
 laali-yuoro-la bula pi doṅo a  
 bul, “Ma si leṅe di la keṅ  
 geri-la kiesse, ma leṅ di la  
 toṅse, a na nii-la si jan dii  
 duu laa geri-la.” Wiin deen  
 ba ḵaa di wialin ba fa si  
 ḵmuṅsa Wia tenin tuṅ, duu  
 ḵaa wutitii ne. Ba fa si,  
 “Ba paa mi gennin kpa

doṅo ne  
 an tin mi gerin doṅo  
 wiaa a toṅse.”

25 Nialin fa si china kpage  
 Yesu daa-geṣe-la ne ḵla: Yesu  
 naan, ari u naan dihaala,  
 ari Kilopas haala Meeri, ari  
 Meeri Magidalin. 26 Yesu si  
 na u naan ari u haritooru-la  
 u fa si cho, di ba china, nii ne  
 u bul u naan le a bul, “Haal,  
 bee na ḵ bie ne ḵla,” 27 an  
 bira bula pi u haritooru-la  
 ma a bul, “Na ḵ ma naan  
 ne ḵla.” A chin bua-la le u  
 haritooru-la keṅ Yesu naan-  
 la a kaa mu u dia ba he dime.

*Yesu suba*

*Mat. 27.45-56; Maak  
 15.33-41; Luuk 23.44-49*

28 Yesu jima ari leele wii-  
 wii-kala dere ne, ka duu  
 wuo leṅ di wialin ba si  
 ḵmuṅsa Wia tenin tuṅ, di  
 ba ḵaa wutitii, nii ne u si  
 lii-nyuasun ne kenu. 29 Di  
 sinin si nyala su gbaṅa chin  
 dime. Ba jon suosuo a sin  
 sin-la le, a keṅ sakelin liise  
 suosuo-la, a kaa jila he Yesu  
 niin le. 30 Nii ne Yesu nyua  
 sin-la. U si nyua sin-la dere,

nii ne u bul, "Wii-kala dere ne", an ken u nyun chugili a suu.

<sup>31</sup> Tapulii-la ne juu tinjaa naa siri a gberε ba diisin kieliŋ gbiele-la. Tapulii-la ma naa che-wiesii-la cheen ne. Nii ne tii ba bi che di nialiŋ sage daa-gese-la nyun cheε-la. Nii ne ba mu sul Paalit duu len di laali-yuoroo mu bori ba naasiŋ an soriba daa-gese-la nyun. U sei.

<sup>32</sup> Nii ne laali-yuoro-la mu ken baala-la ba si kpua a pe Yesu ε naasiŋ kaa bori. <sup>33</sup> Ba ko Yesu leriŋ duu suba. Nii wiaa ba bi u naasiŋ boro.

<sup>34</sup> Ama laali-yuoro-la doŋo jon u timiŋ a too Yesu seme ε u luri. Nii ne chaliŋ ari liiŋ lii. <sup>35</sup> Mi-na JOOJ ne na wiaa deenba ari mi siin aa bulba. Wutitii ne mi bul. Mi bul wiaa deenba pipima di ma ma laa dii. <sup>36</sup> Wiaa deenba kala naa di wialiŋ ba si nmuŋsa Wia teniŋ tuon naa wutitii ne. Ba nmuŋsa a bul,

"Ba bi jan bori u hangbel-bala maa."

<sup>37</sup> Wia teniŋ seme doŋo ba bira bula ari ba jan beŋ nii-la ba si tooo.

*Ba hugi Yesu*

*Mat. 27.57-61; Maak 15.42-47; Luuk 23.50-56*

<sup>38</sup> Yesu si suba, baal kubala ma fa he dime. Baa yire Josef. U fa lii Arimatiya tinteen ne. U ma fa naa Yesu haritooroo doŋo ne. Ama u-na faa luoru ne a tin juu tinjaa wiaa. Uu faba ne. Nii ne u mu sul Paalit duu

len duu sori Yesu ku-suun. Paalit pu wonbiin. Nii ne u mu sori. <sup>39</sup> Nikodiimas, nii-la fa si laa sipaan mu Yesu teen titanin, u ma to Josef hariŋ mu, a pe ken ti-keli-zon kubala baa yire mee ari doŋo maa baa yire alois. Ba yunon mage nuhuobiine yunon ne. <sup>40</sup> Ba balia ne mu jon Yesu ku-suun, a jon geripe-pula, a jon kialiŋ mise geripe-pula-la, a kaa be Yesu. Juu tinjaa yie naa nii ne a huhugi ba suunon. <sup>41</sup> Lee kubala ne kpage lee-la ba fa si kpaase Yesu daa-gese-la nyun. Ba chonse tiisin. Tiisi-la tuon bun kubala ne fa he dime ba lose. Ama ba ha bi nuu-kala hugo dime. <sup>42</sup> U si ka tapul-bala ka di juu tinjaa gbieli-balin yi, ka bua-la ma kpage lee-la, nii ne ba jon Yesu hugi dime.

## 20

*Yesu lii u bua ε*

*Mat. 28.1-8; Maak 16.1-8; Luuk 24.1-12*

<sup>1</sup> Lahadi cheen siipuraa di leriŋ kala ha bire, Meeri Magidaliŋ mu bua-la leriŋ a na tabii-la ba si jonon too bua-la niin duu suro. <sup>2</sup> Nii ne u fa mu Saamon Piita ari Yesu haritooro-la doŋo teen, nii-la Yesu fa si cho woron, a bula piba a bul, "Ba liise la Tiina Yesu bua-la tuon ne. La bi jin lee-la kala ba si jonu bil." <sup>3</sup> Nii ne Piita ari Yesu haritooro-la doŋo-la sii mu bua-la leriŋ. <sup>4</sup> Ba kala balia fa. Nii ne doŋo-la tiina kieli

Piita, a laa sipaan fá mu bua-la lerin. <sup>5</sup> U si yi bua-la lerin, u bi bua-la tuon̄ jua. U tuu t̄in̄ ne a nyilimi a na genni-la ba fa si jon̄o be Yesu, di ba pina, ka u buu na. <sup>6</sup> Ka Piita to harin̄ k̄o a ku juu bua-la tuon̄, a na genni-la ba fa si jon̄o be Yesu, di ba pina. <sup>7</sup> Ka geri-la ba fa si jon̄o v̄oo Yesu nyun̄ ma, duu chuolo pin̄ u dun̄dūa. <sup>8</sup> Nii ne niila si laa sipaan mu bua-la lerin ma juu bua-la tuon̄ a na wii-la si ŋaa, a laa dii ari Yesu sii suun̄ le ne. <sup>9</sup> Ama ba bi wii-la ba fa si ŋmun̄sa Wia tenin̄ tuon̄ bubuon̄ jin̄ ari u maga di Yesu sii suun̄ le ne. <sup>10</sup> Nii ne Yesu haritooro-la miira mu ba diisin̄.

*Yesu ken̄ u titia ku dage M̄eri*

*Mat. 28.9-10; Maak 16.9-11*

<sup>11</sup> Bua-la le di M̄eri miira mu bua-la teen̄. Nii ne u chin̄ dime aa yel. Uu yel ŋii ne an̄ pe nyinyilimi bua-la tuon̄. <sup>12</sup> U nyilimi bua-la tuon̄ ŋii ne a na Wia tin̄daaraa balia bua-la tuon̄ a laale geri-pullun̄. D̄on̄o h̄on̄ Yesu nyun̄ fa si mu lee-la. D̄on̄o ma h̄on̄ u naasin̄ fa si mu lee-la. <sup>13</sup> Nii ne ba piesu a bul, "Haal, bee ne tii ŋ yiyel?" Nii ne u bul, "Ba jon̄ mi Tiina Yesu kaa lel ne. Mi bi jin̄ ba si jon̄u kaa mu bil lee-la." <sup>14</sup> U si bul ŋii dere an̄ ŋaa duu birime, duu na baal duu chin̄ dime. Yesu ne fa ŋii. Ama M̄eri fa bi jin̄ ari Yesu ne. <sup>15</sup> Nii ne Yesu ma piese

M̄eri, "Bee ne tii ŋ yiyel? Kubee ne ŋ chiche?" M̄eri fa biina baal-la sii ben̄ tiisi-la ne. Nii ne u piesu, "Kuhian̄, di ŋ ne jon̄o, dagemi lee-la ŋ si kaa mu bil, di mi mu jon̄u kaa viiri." <sup>16</sup> Nii ne Yesu yiru a bul, "M̄eri." Nii ne u miira daase an̄ bul ari Hiiburu yikoro, "Rabboni, ŋ nee?" (Rabboni bubuon̄ ne kuhian̄.) <sup>17</sup> Nii ne Yesu bula pu a bul, "S̄imi ken̄. Mi ha bi mi Nyimma teen̄ jila. Ama mu bula pi mi naan̄biirin̄ ari mi jan̄ jil mi Nyimma teen̄. U ŋaa ma ma Nyimma ne a ŋaa mi Wia, a ŋaa ma ma Wia." <sup>18</sup> Nii ne M̄eri Magidalin̄ mu Yesu haritooro-la teen̄, a bula piba a bul duu na u Tiina Yesu ne, a bul wialin̄ ma kala u si bula pu.

*Yesu ken̄ u titia ku dage u haritooroo*

*Mat. 28.16-20; Maak 16.14-18; Luuk 24.36-49*

<sup>19</sup> Lahadi cheen̄ titan̄in̄ u haritooroo hilimi dia tuon̄ an̄ ken̄ boin̄ yage. Baa fá Juu timma-la ne. Nii ne tii ba ken̄ borusun̄ to a yage. Nii ne Yesu ku chin̄ ba tutuobaanin̄ an̄ bul, "Ma jan̄ h̄on̄ ari yarifielaa." <sup>20</sup> U si bul ŋii dere, u ken̄ u nisaa ari u seme dageba. U haritooroo kala tuon̄ tore ba si na ba Tiina Yesu. <sup>21</sup> Nii ne Yesu bira bula piba, "Ma jan̄ h̄on̄ ari yarifielaa. Mi Nyimma si tin̄mi ŋii, ŋii titia ne mi maa tin̄ma di ma tin̄ mi tin̄tin̄ŋaa." <sup>22</sup> U si bul ŋii dere, u wiese heba le an̄ bul,



“Má laa Wia Diŋ-zoŋ-la duu hema le. <sup>23</sup> Di ma ne joŋ nuu haacheba a cheu, u bira bi haache kene. Di ma ne bira bi nuu haacheba joŋo cheu, u ha ken u haacheba ne.”

*Yesu ken u titia ku dage*

*Tomas*

<sup>24</sup> Bua-la le Yesu si ken u titia ku dage u haritooro-la, u haritooro-la doŋo fa tuo. U yiriŋ ne Tomas. Ba fa ŋaa daalieri ne. Nii ne tii baa yiru daalieriŋ maa. <sup>25</sup> Nii ne u haritooro-la doŋsun bula pu a bul di ba na Yesu. Nii ne Tomas bula piba a bul, see duu na heme-la buasuŋ u nisaa le, a joŋ u neniŋ he bua-la le, a joŋ u neniŋ he u seme bua-la ma le, u bi jaŋ laa dii ari wialiŋ ŋaa wutitii.

<sup>26</sup> Tapulaa chori pege Yesu haritooro-la bira juu dia a ken boiŋ yage. Bua-la-na le di Tomas he ba tuoŋ. Di Yesu ku juu chiŋ ba tutuobaaniŋ aŋ bul, “Ma jaŋ hoŋ ari yarifiɛlaa.” <sup>27</sup> Nii ne aŋ ka u bula pi Tomas, “Joŋ ŋ neniŋ a he mi nisiŋ bua-la le aŋ beŋ mi nisaa, aŋ ken ŋ nisiŋ he mi seme bua-la ma le a na, aŋ laa mi wiaa dii, aŋ si kaa lere.” <sup>28</sup> Nii ne Tomas yiru a bul, “Mi Tiina, ŋ ne mi Wia!” <sup>29</sup> Nii ne Yesu piesu, “Ŋ si nami ne tii ŋ laa mi wiaa dii koo? Nialiŋ si bimi na aŋ laa mi wiaa dii, ba tuoŋ jaŋ tore.”

<sup>30</sup> Yesu ŋaa wu-magilaa yuge u haritooro na a pe wialiŋ mi si ŋmuŋsa teniŋ deen tuoŋ. Aŋ ka mi bi ba-na ŋmuŋsa he teniŋ deen

tuoŋ. <sup>31</sup> Ama mi ŋmuŋse wiaa deenba di ma wuo laa dii ari Yesu ne ŋaa Kirisito, nii-la Wia si liisa aŋ pe ŋaa Wia Bie maa. Di ma ne laa wiaa deenba dii, ma jaŋ ken miisiŋ u doluŋ le.

## 21

*Yesu ken u titia dage u haritooro balipe*

<sup>1</sup> Yesu bira ken u titia dage u haritooro doŋsun muga kubala niŋ baa yire Tabiiras. U haritooro-la ne ŋla: <sup>2</sup> Saamoŋ Piita ari Tomas, nii-la ba fa si kaa yire daalieriŋ maa, ari Nataniel fa si lii taŋ kubala ne baa yire Keena a he Galilii tiŋteen. Zebidii biiriŋ balia ma ne fa he dime, ari Yesu haritooro balia maa. <sup>3</sup> Ŋla ne u to a ken u titia ku dageba: Ba fa chiŋ muga-la niŋ ne. Nii ne Saamoŋ Piita bula pi haritooro-la kukaanaa ari uu mu duu kese chenfilee ne. Nii ne ba kala bul di ba jaŋ to mu. Nii ne ba mu joŋ liiŋ daboro a juu liiŋ tuoŋ, ama titaŋ-la kala ba bi chenfilii kala kene.

<sup>4</sup> Taŋ si pulaa ko di Yesu chiŋ lii-la niŋ, ama u haritooro-la bi jiŋ ari u ne. <sup>5</sup> Nii ne Yesu pieseba, “Mi nan-doŋsun, ma kese chenfilee nee?” Nii ne ba bul di ba bi kubala ma kene. <sup>6</sup> Nii ne u bula piba di ba joŋ ba joŋba, a yuo he liiŋ tuoŋ liiŋ daboro-la na-diŋ seme, di ba ne ŋaa nii, ba jaŋ kese chenfilee. Nii ne ba joŋ joŋ-la yuo kese chenfilee su. U

si suo nii, ba bi wuo lilere. <sup>7</sup> Nii ne haritooru-la Yesu si cho woruŋ bula pi Piita a bul, "La Tiina Yesu ne!" Bua-la le di Piita fa wuri u gerin ne. U si nii nii, u joŋ u gerin a laale, aŋ lii liin daboro-la le, a fula juu liin duu duoro mu Yesu teen. <sup>8</sup> Lee-la ari lii-la niin fa bi bol. U fa yi naakielin zolo ne. Ka Yesu haritooro-la ku-kaanaa lere joŋ-la ari chenfilie-la ku lii lii-la niin.

<sup>9</sup> Ba si ku lii lii-la niin, ba na holoo nyinin di chenfilee chebe, ka ba na boroboro maa. <sup>10</sup> Nii ne Yesu bula piba a bul, "Ma liise chenfilie-la doŋsuŋ ma si kese leele a kaa ko." <sup>11</sup> Nii ne Saamŋ Piita mu lere joŋ-la ku lii lii-la niin, di chenfilie-balaa suo. Chenfilie-la fa naa zolo ari mahin balia ari fii ari batori ne. Chenfilie-la yuga nii ma ne, aŋ ka joŋ-la bi kiesa. <sup>12</sup> Nii ne Yesu bula piba a bul, "Ma ku lii bille ma niin." U si bul nii, u haritooro kuŋ-kala bi pieŋe a bul di kubee nee? Ba kala jima ari ba Tiina Yesu ne. <sup>13</sup> Nii ne Yesu joŋ boroboro-la a piba, a joŋ chenfilie-la ma a piba di ba dii. <sup>14</sup> U si sii suuŋ le u butori ne nii u si keŋ u titia kaa ku dage u haritooro.

### *Yesu bul wiaa a pi Piita*

<sup>15</sup> Ba si dii boroboro-la ari chenfilie-la dere, nii ne Yesu pieŋe Saamŋ Piita a bul, "Jooŋ bie Saamŋ, ŋ chomi a kii niaa deenba nee?" Nii ne Piita si, "Oo mi Tiina, ŋ

titia jima ari mi choŋ ne." Nii ne Yesu bula pu, "Ben mi niaa nyuŋ, ari pie-daara si yie beŋ u pieŋe nyuŋ nii." <sup>16</sup> Nii ne Yesu bira piesu, "Jooŋ bie Saamŋ, ŋ chomi nee?" Nii ne u bira bul, "Oo mi Tiina, ŋ jima ari mi choŋ ne." Nii ne Yesu bira bula pu, "Ben mi niaa nyuŋ, ari pie-daara si yie beŋ u pieŋe nyuŋ nii." <sup>17</sup> Nii ne Yesu bira piesu torimuŋ a bul, "Jooŋ bie Saamŋ, ŋ chomi nee?" Yesu si piesu torimuŋ nii, u tuoŋ chei. Nii ne Piita bula pu, "Mi Tiina, ŋ jin wii-kala ne, ŋ jima ari mi choŋ ne." Nii ne Yesu bira bula pu, "Ben mi niaa nyuŋ, ari pie-daara si yie beŋ u pieŋe nyuŋ nii." <sup>18</sup> Wutitii ne mi bulaa pin, ŋ fa si naa hanbie, ŋ yie keŋ ŋ damere kaa voo ŋ tiŋa ne aa mu leela kala ŋ si cho. Ama di ŋ ne ku hiŋe, ŋ jaŋ keŋ ŋ nisaa jee, aŋ ka di nuu doŋ ne joŋ damere-la a vobuŋ aŋ keŋin mu lee-la ŋ si bi cho di ŋ mua." <sup>19</sup> Yesu si bul wiin deen, u dage Piita si jaŋ suu nii a laa yirin pi Wia. Nii harin le ne Yesu bula pu duu to u harin.

<sup>20</sup> Nii ne Piita daase harin a na Yesu haritooru-la Yesu fa si cho woruŋ, nii-la fa si suusa mu kpage Yesu bua-la le ba fa sii dii diisin kielin gbiele-la kudiilee, a fa piesu, "Mi Tiina, kubee ne che duu joŋuŋ yalle?" <sup>21</sup> Piita si nau, nii ne u pieŋe Yesu a bul, "Mi Tiina, ka baala deen, bee ne jaŋ naau le?" <sup>22</sup> Nii

ne Yesu bula pu, “Di mi ní che duu he dime ka di mi-na miira kɔ dunia, ŋ sipaa tuo dime. To mi harin.”

<sup>23</sup> Nii ne ba ŋmoo doworo pi nialin kala si laa Yesu wiaa dii ari Yesu haritooro deen-na bi jan suu. Ama Yesu bi nii bula. U si duu ní che di haritooru-la he dime ka di u-na miira kɔ dunia, Piita sipaa tuo.

<sup>24</sup> Mi-na Jɔɔŋ ne na wiaa deenba aa ŋmunse tenin deen. La saa jima ari wialin kala mi si bula ŋaa wutitii ne. <sup>25</sup> Yesu ŋaa wiaa dɔnsun yuge a pe wialin mi si ŋmunsa he tenin deen le. Wialin-na mi bi ŋmunsa. Di mi ne fa ŋmunse wialin kun-kun-kala, ten-la fa jan yuga kii dunia kala.

## YESU NANZŌŌBA TINTINŊAA

<sup>1</sup> Mi nanɔɔŋɔ Tiafilas, mi-na Luuk laa sipaan ŋmunɔɔ teniŋ a piŋ. Ten-la ɛ mi dage wialinŋ kala Yesu si ŋaa ari wialinŋ kala u si daga, a suomi bua-la ɛ u si suomo titinŋ u tintinŋaa <sup>2</sup> a kaa mu tapulii-la Wia si joŋu a kaa jil Wia-jaŋ. Wia Diŋ-zɔŋ-la dolunŋ ɛ u dage u nanzŏɔbala u si tuɔsa tintimii-la ba si jaŋ titinŋ, ka u-na jil Wia-jaŋ. <sup>3</sup> U si sii suunŋ ɛ, u kenŋ u titia ku dage u nanzŏɔbala a yuge ne tapulaa mahinŋ balia pɛge. Wonbiee yuga ne u kenŋ u titia kaa dage ari u weye, anŋ bul Wia kuorii-la wiaa a piba, ka u-na jil Wia-jaŋ. <sup>4</sup> U si he ba teenŋ, u bula piba a bul, “Ma sɪ Jerusalem ɛ lii. Má gberɛ ma Nyimma Wia zile ku-la u fa si si u jaŋ joŋo pima. Wii-la mi fa si bula pima ne ŋla: <sup>5</sup> Mi bula, ‘Joŋo sɪi fo niaa Wii-chuɔɔɛ liinŋ, liinŋ dunɔɔɔna ne u kaa fo. Ama u bi dieni, ka mi joŋ mi Diŋ-zɔŋ-la hema ɛ.”

### *Yesu jil Wia-jaŋ*

<sup>6</sup> Yesu ari u nanzŏɔba si hilimi ŋii, ba piesu, “La Tina, tapulaa deenba ɛ, ŋ jaŋ bira lenŋ di Iziral tinŋaa dii kuorunŋ?” <sup>7</sup> Nii ne Yesu bula piba, “Mi Nyimma bi che di ma jinŋ tapulunŋ deenŋ. U ne kenŋ dolunŋ a he tapulia-la wialinŋ si jaŋ ŋaa. <sup>8</sup> Ama di

Wia joŋ u Diŋ-zɔŋ-la hema ɛ, ma jaŋ kenŋ dolunŋ. Ma jaŋ ŋaa mi siada tinŋaa a bul mi wiaa Jerusalem ɛ, Judiya tinŋteenŋ kala ari Samaria ɛ, a kaa mu dunia semɛ-na kala.” <sup>9</sup> Yesu si bul ŋii dere, Wia joŋu kaa jil Wia-jaŋ, ka ba china bibenŋ. Nii ne duonbilingbaaninŋ ku tɔu, ba bira buu na. <sup>10</sup> Ba ha si wula bibenŋ wia nyunŋ ŋii, di niaa balia ne ŋii a chinŋ ba semɛ, a laale geri-pullunŋ <sup>11</sup> a pieseba, “Galilii timma, bɛɛ ne tii ma chinaa benŋ wia nyunŋ ŋii? Yesu deenŋ Wia si joŋo ma sipaanŋ a kaa jil Wia-jaŋ, u jaŋ miira kɔ ari ma si nau duu jil Wia-jaŋ ŋii.”

### *Ba liise nuu u laa Judas nyunŋ*

<sup>12</sup> Nii ne Yesu haritooro-la lii peel-la ba sɪi yire Olivet a miira mu Jerusalem. A chinŋ peel-la lerinŋ a kaa mu Jerusalem u yi ari meeldaanŋ lebi ne. <sup>13</sup> Ba si yi Jerusalem, ba mu juu diala ba sɪi juu Jerusalem ɛ, lusunŋ nyunŋ. Piita ari Joŋo ari Jeems ari Anɔduru ari Filip ari Tomas ari Batolomi ari Matiu, ari Alifiyas bie Jeems, ari Saamonŋ Zelot, ari Jeems bie Judas, ba kala nɪi juu dibala. <sup>14</sup> Ba di haalaa dɔŋsunŋ ari Yesu naanŋ Mɛeri ari Yesu ŋaanaa, ba kala ŋaa nii-bala ne aa hilimi dime, a fiɛɛ siinŋ a chuchuɔɔɛ Wia.

<sup>15</sup> Tapulii kubala ba ku hilimi dɔŋɔ ɛ. Ba fa yi ari niaa zɔɔɔ ari mara. Nii ne Piita sɪi chinŋ duu bul wiaa a bul, <sup>16</sup> “Mi naanbiirinŋ,

Wia DiŃ-zoŃ-la fa leŃe Devit dage wialin Judas si jaŃ Ńaa. Wia niin wiaa deenba ku Ńaa wutitii. Judas ne keŃ Ńaa ko di ba keŃ Yesu. <sup>17</sup> Yesu fa liisu duu Ńaa la doŃo ne, a maa tin la tinȚimin deen. <sup>18</sup> Judas si Ńaa wu-boŃ-la, u laa moribiee. U joŃ moribie-la a yoŃ tinȚee kubala ne. Dime ne u tuu tele yeɛ. U tuoŃ kiaa kala jaase. <sup>19-20</sup> Niaa si he Jerusalem le kala nii. Ba yiikoro le ba keŃ lee-la kaa yiyire Akilidaama. U bubuoŃ ne chalin tinȚeen. Devit ŃmuŃsa he Wia tenin seme doŃo baa yire Saams a bul, 'Wia jaŃ leŃ duu dia pin jikpeen, di nuu-kala si dime juu.' U bira ŃmuŃsa di nuu laa u nyuŃ a titin u tinȚinŃaa.

<sup>21</sup> Nii wiaa nuu ne maga duu laa u nyuŃ a pela le di la dii siada ari la Tiina Yesu sii suuŃ le. Nia deen maga duu lii nialin fa sii to la harin, bua-la le Yesu si suomo keŃla gugolle, <sup>22</sup> a lii bua-la JoŃ fa si fo Yesu Wii-chuoŃe liin a kaa mu yi tapulii-la Wia si joŃu kaa jil Wia-jaŃ." <sup>23</sup> Nii ne ba dage niaa balia. Ba doŃo yirin ne fa Josef Basabas. (U yirin doŃo ma ne fa Jasitis.) DoŃo-la ma yirin ne fa Matayas. <sup>24</sup> Ba si dage nialin nii, ba suomo chuŃe Wia a bul, "La Tiina Wia, Ń ne jin nuu-kala tuoŃ wiaa. Nii wiaa dagela niaa deenba baliamin tuoŃ

ku-la Ń si liisa, <sup>25</sup> duu Ńaa Ń nanzoŃ doŃo a laa Judas nyuŃ, a tin u tinȚinŃaa. Judas via ne aŃ suu aa mu Sitaani lerin." <sup>26</sup> Nii ne ba toŃse. Matayas kiaa dii. Ba diisu pe Yesu nanzoŃba-la fii ari kubala-la tuoŃ.

## 2

### *Wia DiŃ-zoŃ-la kuu tuu*

<sup>1</sup> Ba gbieli-bal kubala chee ku yi baa yire Penȥikos. (Tapulii-la ne ba yie ta ba bagi-bunbun kiaa a kaa mu pi Wia.) Chee-la ba ku hilimi di-bala. <sup>2</sup> Ba bi yiela di ba nii goŃ. U lii wia nyuŃ a ku tuu ari peli-balin sii Ńaa nii, a juu su dia-la tuoŃ ba fa si hoŃo. <sup>3</sup> Nii ne ba na kiaa a nage nyin-geli-biisin. Ba nagisin nage nenđelimee. Ba lii pise. Nyin-geli-bie kala togili nuu-kala si he diala le. <sup>4</sup> Ba si togili nuu-kala le nii, Wia DiŃ-zoŃ-la heba kala le, a piba doluŃ ba suomo bubul yiikori-yiri-yiriba ba si bi jin.

<sup>5</sup> Juu tinŃaa doŃsun ma fa he Jerusalem le aa fá Wia, a lii dunia seme-na kala. <sup>6</sup> Ni-dan-la si nii goŃ deen, ba kala ku hilimi. Ba si hilimi nii, ba nia di baa bul wiaa ba titia yiikorusuŃ le. U Ńaaba wu-kpunkpere. <sup>7</sup> Ba faasa hiriki a bula pi doŃo, "Niaa deenba kala Ńaa Galilii tinŃaa ne. <sup>8</sup> Ee ne saa ba bubul wiaa la nyimma yiikoro le la ninii? <sup>9</sup> La doŃsun lii Paatia, doŃsun lii Miidia, doŃsun lii Ilam. La doŃsun

lii Mesopoteemia, dɔɔnsun lii Judiya, dɔɔnsun lii Kapadoosia, dɔɔnsun lii Pɔɔntɔs, dɔɔnsun ma lii Esia. <sup>10</sup> La dɔɔnsun lii Firijia, la dɔɔnsun lii Panfilia, la dɔɔnsun lii Ijipiti, la dɔɔnsun ma lii Liibia seme dɔɔɔ si kpage taɔ-la ba sii yire Sariini. La dɔɔnsun ma ɔaa nuhuɔraa a lii Rom. La dɔɔnsun ɔaa Juu tinɔaa, la dɔɔnsun ɔaa niaa si bi Juu tinɔaa ɔaa aɔ tuto Juu tinɔaa harin. <sup>11</sup> La dɔɔnsun lii Kiriiti, la dɔɔnsun lii Ariibia. La kalaa bul yiikoro daban daban ne, ka la nii di baa bul wiaa la yiikoro le. Wia si tin tinɔin-duori-la wiaa ne ba bubul nii." <sup>12</sup> Ba kala hiriki, ba tuɔɔ vugime, ba pipiese dɔɔɔ, "Beɔ kuɔ ne ɔla?" <sup>13</sup> Dɔɔnsun ma sisieriba le di ba bugo ne.

*Piita bul Wia wiaa a pi niaa*

<sup>14</sup> Piita ari Yesu nanzooaba-la fii ari kubala fa si he dime nii, Piita sii chin a faasa bul wiaa a bul, "Mi naanɔbiirin Juu tinɔaa ari ma nialin kala si he Jerusalem le. Ma wuoli ma digilaa di mi bul wii-la si ɔaa a pima. <sup>15</sup> Ma biina niaa deɔba bugo neɔ? Ba bi bugo. Chichuɔ-fiela deɔ ba bi jan wuo bugi. <sup>16</sup> Jowel ma fa bul wiin deɔ si ɔaa wiaa ne. U fa ɔaa nii-la sii bul wiaa, Wia Din-zɔɔ-la dolun le. U si,

<sup>17</sup> 'Wia si, ɔla ne u jan ɔaa tapulaa diderin:

Mi jan jon mi Din-zɔɔ-la he nuu-kala le.

Ma biirin ari ma toloo jan bul wiaa mi Din-zɔɔ-la dolun le.

Ma bapuoɔi-biisin ma jan nina wiaa ari duosoo tuɔɔ.

Ma kuhiasin ma jan duduosi duosoo.

<sup>18</sup> Cheɔ-la mi jan jon mi Din-zɔɔ-la pi baala-la ari haala-la si ɔaa mi tinɔinnaa

di ba kaa bubul wiaa, Wia Din-zɔɔ-la dolun le.

<sup>19</sup> Mi jan ɔinaa wu-kpuɔkperisin wia nyun,

aɔ ɔinaa wu-magilaa ma tinɔeen le.

Chalin, nyinin ari nyuɔ-bine jan he dime.

<sup>20</sup> Di taɔ ne pula maa, lerin jan biri.

Chene ma jan fiɔɔ a nage chalin,

ka di la Tiina tapul-bala-na yi.

<sup>21</sup> Tapul-bii-la, nii-la kala si yire la Tiina Wia, u jan laau ta.' "

<sup>22</sup> Nii ne Piita bira bul, "Iziral tinɔaa, ma jegile nii wiaa deɔba mi sii che mi bula pima. Yesu si lii Nazaret, Wia ne timu. Wu-magilaa ari wu-kpuɔkperisin Wia si leɔe u ɔaa ma siin le ne dage nii. Ma ma jima ne.

<sup>23</sup> Wia jima aɔ leɔ Yesu juu ma nisin le. Ma ne leɔe haache tinɔaa kpaasu mere daa-geɔɔɔ nyun u suu. <sup>24</sup> Ba si kpaasu daa-geɔɔɔ nyun nii u suu, Wia chisu suun le, a liise heɔ-la u si na bua-la le u sii suu. Suun fa buu wuo

kaa bibil. <sup>25</sup> Devit fa tinj wiinj deenj wiaa ne a bul,

'Mi yie na mi Tiina.

U laa mi sipaanj a njaa mi hari-chinna, di wii simi juu.

<sup>26</sup> U njii njaa mi tuutorun, mi bubul wiaa ma ari tuutorun.

Mi janj na wiese.

Mii yiele wialinj Wia si janj njaa le ne.

<sup>27</sup> Di mi ne suba, nj-na Wia bi janj lenj di mi he lelinj le.

Nj bi cho di mi-na nj tintinni-titii-la pua.

<sup>28</sup> Nj dagemi wonbie-la mi si janj to a kenj miisij.

Nj si he mi teenj janj njaa di mi kenj tuutorun worun.' "

<sup>29</sup> Njii ne Piita bira bul, "Mi naanbiirin, mi janj chaasa bul la naabalima Devit wiaa pima. U suba ne, ba jonju hugi, u vaaminj ha pina ne la janj le. <sup>30</sup> U fa njaa nialinj sii bul wiaa, Wia Dinj-zonj-la dolunj le donjo ne a wuo jinj wialinj Wia si si u janj njaa pu. Wia njmiesa ne a bul duu janj lenj di Devit doho niaa donjo, duu dii kuorunj u nyunj le.

<sup>31</sup> Devit si na wii-la Wia fa sii che duu njaa, u wuo bubul ari Kirisito janj sii suunj le, a ma bul di Wia bi janj lenj duu he lelinj le duu yaraa pua. <sup>32</sup> Yesu deenj ne Wia chise suunj le. La kala na a njaa wiinj deenj siada. <sup>33</sup> Wia chisu u sii a jila honj Wia seme, ni-duonj di-honunj, a bira pu u Dinj-zonj-la ari u fa si bul njii. Dinj-zomunj deenj

Yesu si jonjo hela le jininj, u ne wialinj ma sii na a ninii maa. <sup>34</sup> Devit titia fa bi Wia-janj jila, ama u ta bula pa a tige Yesu a bul,

'La Tiina Wia bula pi mi Tiina

duu ku honj u seme, ni-duonj di-honunj,

<sup>35</sup> see duu yuo dii u dinjdonjoo kala dere.'

<sup>36</sup> Ma Iziral tinjnjaa, ma jinj u sene njaa wutitii ari Yesu deenj ma si kaa kpaase daagesee nyunj, u ne Wia lenj u njaa la Tiina. U ne bira lenj u njaa Kirisito maa."

<sup>37</sup> Nialinj si nii wiinj deenj Piita si bula, u faasa wiwalimeba kinjenj. Njii ne ba piese ba di Yesu nanzoo-bala donsun, "La naanbiirin, bee kunj ne saa la janj njaa?"

<sup>38</sup> Njii ne Piita bula piba a bul, "Ma birime a lii ma haacheba le, anj lenj di ba foma Wii-chuole liinj Yesu Kirisito dolunj le, di Wia jonj ma haacheba chema, ka u jonj u Dinj-zonj-la a dii zile ma le. Wia fa si si u janj jonj u Dinj-zonj-la pi niaa, u tapulunj ne njla. <sup>39</sup> Wialinj Wia si bula, ma ne u bula pa, ma ari ma biirinj ari nialinj kala si lii di-bolunj, nuu-na kala Wia si yira duu ko u teenj." <sup>40</sup> Piita si bul njii, u sulba a paala chaasa bul wiaa donsunj yuge a bul, "Ma liise ma titia ni-bonjoo deenba tuonj." <sup>41</sup> Ba tuonj niaa yuga laa wialaa u si bula dii, ba foba Wii-chuole liinj. Niaa ma si pe nialinj le tapulii-la yi bui batori.

42 Ba joŋ ba nyuŋ kala he Yesu nanzoõba-la wu-bulia-la le siifesiŋ a keŋ nii-bala. Ba kala hoŋo aa dii kudiile-la Yesu fa si si di baa dii aa liisi u wiaa, aŋ pe gbaara chuchuõle Wia.

*Nialin si laa Yesu wiaa dii di-honun*

43 Nii ne ba kuŋ-kala fifa Wia, Yesu nanzoõba-la ma ŋaa wu-kpuŋkperisiŋ ari wu-magilaa yuge kinkeŋ. 44 Nialin kala si laa wialin dii, ba kala ku hihilimi buana kala le, ba kiaa kala ma ŋaa kubala. 45 Ba yie joŋ ba kiaa ma yiyalle a keŋ moribie-la a kpikea doŋo mage nii kala nuu-kala sii che. 46 Tapulii kala ba yie mu hilimi Wia-dia le ari ba diisiŋ ma le, a didii kudiile-la Kirisito fa si si baa dii a liliisi u wiaa. Baa ŋaa nii ari zile ari tuotõruŋ 47 a didenne Wia. Niaa ma kala bibeseba le. Tapulii-na kala la Tiina Wia yie laa ni-falaa ta ne, ba kuu pe Yesu nanzoõba-la le.

### 3

*Ba vaare gberike*

1 Tapulii kubala Piita ari Joŋ sii aa mu Wia-dia. Ba mu dime kerifi batori wiiheye, bua-la le ba si yie chuõle Wia. 2 Di baal kubala ne he dime. U naaŋ lulu duu gberike ne. Ba yie chuŋu tapulii-na kala a kaa mu Wia-dia-la boiŋniin kubala baa yire boi-zomuŋ. Uu sul kiaa nialaa sii juu Wia-dia-la teen. 3 U si na Piita ari Joŋ di ba ku juu Wia-dia-la,

u sul kiaa ba teen. 4 Ba ben u siaa le. Nii ne Piita bula pu duu ma bibenba. 5 Nii ne u bibenba aŋ gberɛ kialin ba si jaŋ joŋo pu. 6 Nii ne Piita bula pu, "Mi bi moribii kala kene mi si jaŋ joŋo piŋ, ama mi jaŋ joŋ ku-la mi si kene a piŋ. Yesu Kirisito si lii Nazaret doluŋ le mi si, iŋ sii a viven." 7 U si bul nii, u keŋ u na-diin nisiŋ le a kenu chuule, u sii. U naasiŋ ari u naachigiŋ kala guu polli. 8 U fula sii chin u naasiŋ nyuŋ aa ven, ba juu Wia-dia-la. U ven aŋ pe fuful, a didenne Wia. 9 Nialin kala nau duu ven aŋ didenne Wia. 10 Ba wuo jin u ne nii-la fa si yie hoŋ Wia-dia-la boiŋniin ba sii yire boi-zomuŋ aa sul kiaa. Ba hiriki. Wii-la si ŋaa, ŋaaba wu-kpuŋkpere wii.

*Piita bul Wia wiaa Wia-dia tuŋ*

11 Nii ne Piita ari Joŋ ari gberiku-la juu zawura kubala baa yire Solomŋ zawura. Gberiku-la keŋ Piita ari Joŋ nisaa le, ka niaa kire to ba hariŋ juu. U ŋaaba wu-kpuŋkpere. 12 Piita si na nialin di baa ŋaa nii, u bula piba a bul, "Mi naaŋbiirin Iziral tinŋaa, ee ne wiin deen ŋaa wu-kpuŋkpere ma teen, ma paala faasa chaare siaa a bibenla ŋla? Ma biina ari la titia doluŋ le ne koo la wu-zoŋŋo ŋaaniŋ ne wuo ŋaa baala deen sii viven? Ai. 13 Wia-la si ŋaa la naabalimaba Abiraham ari Aizik



ari Jekɔb Wia, u ne jɔŋ yiri-baliŋ a pi u Bie Yesu. U ne ma kaa pa di ba dii u sariya, aŋ bul ma buu jɔŋ Paalit sariya diire-la sipaŋ. U faa biine duu jɔŋ ta, ka ma bi seye. <sup>14</sup> Ma kaa via Wia Tuɔ-pul Tiina, nii-la si ŋaa wu-zɔŋ ŋjaara, aŋ susul di ba jɔŋ ni-kpuura ta, <sup>15</sup> aŋ leŋ ba kpu u-na nii-la sii pi niaa miisi-la si bi dere. Ama Wia chisu suuŋ le. La ŋaa wiin deen danŋia. <sup>16</sup> Yesu doluŋ le ne ŋaa baala deen ma si na a jimu, u duori. La si ŋaa yarida u doluŋ le ne wuo ŋaa ŋii. La si ŋaa u yarida-la ne ŋaa baala deen na yarifiela woruŋ ma kala siin le.

<sup>17</sup> Mi naanbiirin, mi jima ma di ma kuhiasin si kpu Yesu ŋii, ma bi jɔŋ tuɔŋ le ne. <sup>18</sup> Wia leŋe u nialin sii bul wiaa, Wia Diŋ-zɔŋ-la doluŋ le, ba bul faafaa kala ari Kirisito-la jaŋ na heeŋ. U sene ku ŋaa wutitii ŋla. <sup>19</sup> Má birima lii ma haacheba le aŋ to Wia, duu jɔŋ ma haacheba chema, ka di Wia leŋ di ma diŋsin na wiese. <sup>20</sup> Nii ne ka Wia bira ta Yesu si ŋaa Kirisito, nii-la u si liisa, a pima. <sup>21</sup> U maga duu he Wia-jaŋ, see bua-la yie, wii-kala si he dunia le jaŋ birime wu-falii. Wia leŋe u nialin sii bul wiaa, Wia Diŋ-zɔŋ-la doluŋ le bul wiin deen faafaa kala ne. <sup>22</sup> Moosis fa he ba tuɔŋ ne a ma bul,

'La Tiina Wia jaŋ leŋ di nialin sii bul wiaa, Wia Diŋ-zɔŋ-la doluŋ le,

di ba doŋɔ kɔ ma teen ari u si tinmi ŋii.

U jaŋ ŋaa ma naanbii.

Duu ne kɔ, má saa to u niin wiaa le

wii-na kala u si jaŋ bul.

<sup>23</sup> Nii-la kala si bi u niin to,

Wia jaŋ leŋ di ba liisu

Wia niaa tuɔŋ a ta duu suu.'

<sup>24</sup> Nialin kala sii bul wiaa, Wia Diŋ-zɔŋ-la doluŋ le, a chin Samuel nisin le aa mu nialin kala si to u harin, ba kala fa bul wiaa deenba ma sii na ŋla. <sup>25</sup> Wialin Wia fa si to u nialin sii bul wiaa u Diŋ-zɔŋ-la doluŋ le a bula pi ma naabalimaba, ba kala ŋaa ma kiaa ne, maa naba ŋla. U fa bula pi ma naabalima Abiraham a bul,

'N doho niaa doŋɔ le ne mi jaŋ to

a tima pe dunia niaa kala le.'

<sup>26</sup> Nii ne Wia liise u tininna Yesu, duu laa sipaŋ kɔ ma teen a pema le, di ma kala birima lii ma wu-bɔŋɔŋ ŋaaniŋ le."

## 4

*Piita ari Jɔŋ chin nialin si yie hɔnɔ vuvuure wiaa sipaŋ*

<sup>1</sup> Piita ari Jɔŋ fa si bul wiaa pipi nialin ŋii, di nialin si kpu pusun pipi Wia ari Wia-dia kuhiasin ari nialin ba sii yire Sadusii tinŋaa, ba kɔ ba teen. <sup>2</sup> Ba fa na baaniŋ a tin wialin ba sii dage. Ba faa dage nialin ari Yesu sii suuŋ le, a dageba ŋii ari nuu ne suba, u jaŋ bira sii suuŋ

le. <sup>3</sup> Nii ne ba keſeba, a keſba kaa mu to dia, taſ-pul. (Bua-la ma le di wia ka che duu juu, nii ne tii ba toba taſ-pul.) <sup>4</sup> Ka nialin si nii wialin ba si bula, niaa yuga ba tuon a laa Yesu wiaa dii. Nialin si laa wialin dii, ba tuon baalaa leele puna yi bui banon.

<sup>5</sup> Taſ si pula, nialin si kpu pusun pipi Wia ari ba Juu tinŦaa kuhiasin ari Wia tenin kerichiba, ba kala ku hilimi Jerusalem le. <sup>6</sup> Ba di nialin si kpu pusun pipi Wia kuhian Anas ari Kayafas ari Joon ari Alekizanda, ari nuu-kala si lii nialin si kpu pusun pipi Wia kuhiasin doho niaa tuon ne ku hilimi nii. <sup>7</sup> Ba si hilimi nii, ba yire Yesu nanzoo-ba-la balia a kaa lii bil ba tutuobaanin a pieseba, “Dol bee yiri ne ma kaa Ŧaa baala deen duori? Kubee yirin le ne ma yire a Ŧaa Ŧla?” <sup>8</sup> Nii ne Wia Din-zon-la ku he Piita le worun, u si, “Ma nialin si kpu pusun pipi Wia kuhiasin ari ma Juu tinŦaa kuhiasin, <sup>9</sup> ma kenla dii sariya jinin a tin wu-zon-la la si Ŧaa gberiku-la le u duori. <sup>10</sup> U maga di ma niaa deenba ari Iziral tinŦaa kala jin ari Yesu Kirisito si lii Nazaret, u dolun le ne Ŧaa baala deen duoro chin ma sipaan nii. U ne ma len ba kpaasa mere daa-geſee nyun u suu, ka Wia chisu suun le. <sup>11</sup> Ba Ŧmunſe Wia tenin tuon ari

tiebii-la dii-saaraa si via,

duu ne ku Ŧaa tiebii-duon ba si joŦo bil dia gentine.

Ba si Ŧmunſe wiin deen, Yesu wiaa ne ba bul nii. <sup>12</sup> Nuu-kala bi jaŦ wuo laala ta, see Yesu dunduŦa. U yirin dunduŦa ne Wia si la yire duu laala ta. Wia bira bi nuu-kala liisa duu wuo laala ta, see Yesu dunduŦa.”

<sup>13</sup> Nialin si hilime na Piita ari Joon di baa bul wiaa ari nyu-duon nii, u Ŧaaba wu-kpunkpere, bee wiaa ba jima ba Ŧaa ba tuon ni-biisin ne a bi wii-kala gunna. Nii ne ba wuo jin ari ba faa to Yesu harin ne a gunne u wiaa. <sup>14</sup> Ka ba na gberiku-la Piita ari Joon si vaara, di ba kala china, ba niin kala maa. <sup>15</sup> Nii ne ba bula piba di ba lii dia-la tuon ba fa si honoo vuure wiaa. Ba lii, an ka ba pipiese donoo, “Ee ne la jaŦ ken niaa deenba balia kaa Ŧaa? <sup>16</sup> Nuu-kala si he Jerusalem le ne jima ari ba ne Ŧaa wu-balin deen, la saa bi wuo kaa lileſe. <sup>17</sup> Ama ma len di la kpurise ba digilaa di ba bira si Yesu yirin yiru, a bira si u wiaa bula pi niaa, di wiin deen bira si lerin deen kala teelu.” <sup>18</sup> Nii ne ba bira yireba kaa juu, a bula piba ari siifſin di ba bira si wii-kala bul, koo di ba si wii-kala dagu a tige Yesu le, a bira si u yirin yiru. <sup>19</sup> Nii ne Piita ari Joon pieseba, “La si to ma niin koo la si to Wia niin, kubee ne zomoo Wia teen? Ma bul. <sup>20</sup> La bi jaŦ wuo toſe la niin, see di la bul wialaa

la si na a nii maa.” <sup>21</sup> Nii ne ba bira fugisiba woruŋ ari ba jaŋ doḡiseba woruŋ aŋ joŋba ta. Ba bi worŋbiin na di ba doḡiseba, beɛ wiaa nialin kala ka denne Wia a tige wiila si ŋaa le ne. <sup>22</sup> Baala deen ba fa si ŋaa wu-kpuŋkpere deen u le u duori, u fa kii jisinj mahinj balia ne.

*Nialinj si laa Yesu wiaa dii sul Wia chiche nyu-duoŋ*

<sup>23</sup> Ba si joŋba ta, Piita ari Joŋ miira mu ba naanbiirin teen, ba di ba fa si yie hilimi, a bula piba wialin kala nialin si kpu pusun pipi Wia kuhiasinj ari Juu tinŋaa kuhiasinj fa si bula piba. <sup>24</sup> Ba si nii nii, ba suomo chuchuoɛ Wia ari tuo-bala a bul, “La Tiina Wia, ŋ ne ta wia nyuŋ ari tinteen ari mugibalaa ari fuo-biisinj ari kuŋ-kala si he dime. <sup>25</sup> N Diŋ-zoŋ-la doluŋ le ŋ wuo lenj la naabalima Devit, ŋ tininna, u bul,

‘Beɛ ne tii nialinj si bi Juu tinŋaa ŋaa, ba faasa na baaninj?

Beɛ ne tii nialinj vuure di ba jaŋ chei Wia tinŋinŋaa aŋ lol?

<sup>26</sup> Tinteen kuoroo keŋ ba titia he doŋo le a ŋaa siri, ba taŋ kuhiasinj, ba ma hilimi di ba yuo la Tiina Wia ari Kirisito, nii-la u si liisa.’

<sup>27</sup> Wiaa deenba sene ku ŋaa wutitii. Herod ari Ponsos Paalit ari nialinj si bi Juu tinŋaa ŋaa ari Iziral

tinŋaa, ba kala hilime ne taŋ deen le di ba yuo Yesu, ŋ tinŋinni-zoŋ-la ŋ si liisa duu ŋaa Kirisito. <sup>28</sup> Ba hilime di ba ŋaa wialin kala ŋ si paala jin ŋ doluŋ ari ŋ tuoɓiinaa le ari ba jaŋ ŋaa. <sup>29</sup> La Tiina Wia, bee na ba si kpurise la digilaa nii ari ba jaŋ doḡiseɛla, aŋ pe ŋ tinŋinnaa le di la wuo bul ŋ niinj wiaa ari nyu-duoŋ. <sup>30</sup> Dage ŋ doluŋ aŋ lenj di puwuoloo duori, di la ma wuo ŋinŋaa wu-kpuŋkperisinj ari wu-magilaa ŋ tinŋinni-zoŋ-la Yesu doluŋ le.” <sup>31</sup> Ba si chuoɛ Wia deɛ, lee-la ba si hilime jigisi. Wia Diŋ-zoŋ-la ku heba kala le. Ba suomo bubul Wia niinj wiaa ari nyu-duoŋ.

*Nialinj si laa Yesu wiaa dii ka pe doŋo le.*

<sup>32</sup> Nialinj kala fa si laa Yesu wiaa dii, ba kala keŋ tuo-bala ari nii-bala. Di nuu ne keŋ kuŋ maa, u bi jaŋ bul, “Na mi kuŋ ne ŋla”, ba kala ne yie tiu. <sup>33</sup> Wia lahorimo-bal-la ne tii Yesu nanzoo-bala wuo na doluŋ a bulaa pi niaa di la Tiina Yesu sii suuŋ le. <sup>34</sup> Wia pe nialinj kala si laa Yesu wiaa dii kala le woruŋ. Nialinj kala fa si keŋ diisinj ari bagisinj, ba yie joŋo yalle, a keŋ moribiele ba si na <sup>35</sup> a kaa mu Yesu nanzoo-bala teen. Ba kpaa mage nii kala nuu-kala sii che. Nii wiaa ba nialinj kuŋ-kala fa bi kuŋ chee ka. <sup>36</sup> Baal kubala ma ne fa he dime, baa yire Josef. Yesu nanzoo-bala ma kenu kaa

yyire Banabas. (U bubuŋ nɛ, u fa yie bul wiaa pi niaa ba nyusuŋ nyinyaase.) U fa ŋaa Liivai doho nuu nɛ a lii Saapɔs tinŦeen. <sup>37</sup> U nɛ jon u бага u fa si kɛnɛ a yallɛ, a kɛŋ moribie-la kaa mu Yesu nanzoŋba-la teenj.

## 5

### *Ananaya ari Safaya*

<sup>1</sup> Ama ba tuŋ baal kubala nɛ fa hɛ dime. Baa yire Ananaya. U haala ma yirin nɛ fa Safaya. U jon u dua a yallɛ <sup>2</sup> a liise moribie-la dɔŋsuŋ faa, u haala jin, aŋ kɛŋ ku-kaana-la kaa mu Yesu nanzoŋba-la teenj.

<sup>3</sup> Piita piesu, "Ananaya, bɛɛ nɛ tii ŋ leŋ Sitaani nyisin, ŋ jon tinŦee-la ŋ si yalla moribie-la dɔŋsuŋ faa, aŋ nyia wiaa pi Wia Diŋ-zɔŋ-la? <sup>4</sup> Ka ŋ-na jon ku-la yallɛ, ŋ dee buu tii? Moribie-la maa ŋ si yalla, ŋ dee biba tii? Bɛɛ nɛ saa tii ŋ biine ŋ tuŋ lɛ aŋ ŋaa wiin deen? Nuhuobiinee dunɔŋa dee ŋ nyia wiaa pa, ŋ nyia wiaa pi Wia ma nɛ." <sup>5</sup> Ananaya si nii wiin deen, u tuu tele suu. Fawulluŋ kɛŋ nialin ma kala si hɛ dime. <sup>6</sup> Bapuɔsaa jon gerin laalu a jonu kaa lii a kaa mu hugi.

<sup>7</sup> U yi hawa batori di u haala ku juu. U fa bi jin wii-la kala si ŋaa. <sup>8</sup> Piita piesu, "Moribie-la ŋ bala si kaa kɔ, mage nii nɛ ma jon ma tinŦee-la yallɛ koo?" Nii nɛ haal-la bul di ba niin nɛ nii. <sup>9</sup> Nii nɛ Piita piesu, "Bɛɛ

nɛ tii ma di ŋ bala vuure di ma nyise Wia Diŋ-zɔŋ-la, a biine u bi jan dɔgisemaa? Bee na, nialin si jon ŋ bala mu hugi, ba nɛ chin boinŋiin nii. Ba saa jan jonuŋ ma lii."

<sup>10</sup> U guu tel u sipaan a suu. Bapuɔsia-la si jon u bala kaa mu hugi, ba ku juu duu suba. Nii nɛ ba jonu kaa lii, a hugu a kperɛ u bala. <sup>11</sup> Nialin kala si laa Yesu wiaa dii aa hilimi ari nialin dɔŋsuŋ ma si nii wii-la, fawulluŋ kɛŋba woruŋ.

### *Wu-kpuŋkperisin ari wu-magilaa*

<sup>12</sup> Yesu nanzoŋba-la ŋaa wu-magilaa ari wu-kpuŋkperisin yuge niaa tuŋ. Nialin kala si laa Yesu wialin dii, ba kala hilimi dɔŋɔ lɛ ari nii-bala. Zawura-la ba si kaa yire Solomɔŋ zawura, u lɛ nɛ ba hilimi. <sup>13</sup> Nuu-kala si bi Yesu wialin laa dii bi nyu-duon kɛnɛ duu guoli ba tuŋ. Ari nii kala, ka ba ha bibɛsɛba lɛ. <sup>14</sup> Nialin si laa Yesu wialaa dii a ku pɛ nialin lɛ, ba kii nialin kala Wia fa si venɛ kaa kuu pɛ, baalaa ari haalaa. <sup>15</sup> A tin wialin kala sii ŋaa lɛ, ba paala paa puwuoloo kaa lii wonbiin niin, a bilba godoba lɛ ari bɔsunuŋ lɛ. Ba ŋaa nii di Piita nɛ kuu bal, duu daaliimin wuo hɛ ba dɔŋsuŋ lɛ di ba duori. <sup>16</sup> Niaa ma yuga a lii ta-biisi-la si kpage Jerusalem, a kɛŋ puwuoloo ari nialin jin-bɔŋŋɔɔ si kɛnɛ a kaa kɔ u teenj, ba kala duori.

*Ba to naasiŋ doŋise Yesu nanzoōba*

17 Nii ne nialin si kpu pusun pipi Wia kuhian ari u haritoorōo sii. U haritoorōo-la kala he Sadusii tinŋaa paati-la tuon ne Jerusalem le. Ba yaraa faasa bibieri. 18 Ba keŋe Yesu nanzoōba-la kaa mu to dia, lee-la ba sii to ba niaa. 19 Ama titan-la titia Wia tinŋaara kubala ku keŋ dia-la boinŋiiree suri, a len Yesu nanzoōba-la lii. Ka u bula piba, 20 "Ma mu juu chin Wia-dia le a bula pi niaa wonbii-falin deen wiaa." 21 Yesu nanzoōba-la sei. Siipuraa ba juu Wia-dia a suomo didage niaa.

Nii ne nialin si kpu pusun pipi Wia kuhian ari u nanŋonŋsun, ba yire Juu tinŋaa kuhiasin ari ba niaa kala di ba hilimi a vuure, an tin di ba mu dia-la le a keŋe Yesu nanzoōba-la kaa ko. 22 Nihiasi-la si mua, ba biba na sarika le. Ba miira ku bul, 23 "La si mu sarika-la, la na di ba yaga, nuu-kala bi suro, ka nialin sii beŋ sarika-la, ba ma chin boinŋinŋ. Ama la mu suri, la bi Yesu nanzoōba-la naa."

24 Wia-dia nihian ari nialin si kpu pusun pipi Wia kuhiasin si nii wiin deen, u kperiba kinkeŋ, ba bi jin wii-la kala ba si jan ŋaa. 25 Nii ne baal kubala ku juu a bula piba di ba bee na nialin ba si kaa to dia, ba ne chin Wia-dia tuon a didage niaa. 26 Nii ne Wia-dia nihian ari u niaa, ba mu keŋe kaa ko. Fawullun

fa keŋba ne ari nialin fa si he Wia-dia-la tuon jan paa tabiaa yageba, nii ne tii ba bi Yesu nanzoōba-la fuga.

27 Ba keŋba kaa ku juu, a len ba chin nialin si yie hilime vuvuure wiaa sipaan. Nii ne nialin si kpu pusun pipi Wia kuhian bula piba, 28 "La bula pima ari siifiesin ari ma bira si wii-kala dagu Yesu dolun le. Ama ma bee na, ma keŋ wii-la kaa gaara cheŋ Jerusalem kala aa che ma jon taali chugela a tin baala deen suun le." 29 Piita ari Yesu nanzoōba-la doŋsun miira bula piba a bul, "U maga di la to Wia niin ne a kii nuhuobiine niin. 30 La naabalimaba faa to Wia ne, u ne chise Yesu suun le, niila ma fa si kaa kpaase daageŋe nyun u suu. 31 Wia chisu u sii jila hon Wia seme, ni-duon di-honun, duu ŋaa Sipaa-laara ari Laataara, a len di Iziral tinŋaa birima lii ba haacheba le, ka duu jon ba haacheba cheba. 32 La ŋaa wiaa deenba kala dansia ari Wia Din-zon-la maa, Wia si jono pi nialin si to u niin ne."

33 Nialin si nii wiin deen, ba faasa na baaniŋ a chiche di ba kpuba. 34 Baal kubala ma ne fa he nialin si yie hilime vuvuure wiaa tuon. U lii Farisii tinŋaa tuon ne. Baa yire Gamiilial. U ne faa dage wialin Moosis fa si ŋmunsa bil di niaa tuto. Nuukala pupu jirima. U sii chin a bul di ba len di

Yesu nanzŏŏba-la lii di-jalin muapilii. <sup>35</sup> Ka u sii a bula piba, "Ma Iziral timma, má fiεε ma siaa ari ma síi ŋaa wii-la niaa deenba εε. <sup>36</sup> Jisin deenba ne, baal kubala ne fa he dime. Baa yire Tuudas. U bula ari u ŋaa ni-bal ne. Niaa yi ari zŏ-banese a peu εε. Ba kpuu, ka u haritooro-la kala pise dŏŋŏ εε, u yiri-la kala dise. <sup>37</sup> U harin εε ne, baal kubala ma lii, bua-la εε ba síi diise niaa, baa yire Judas. U lii Galilii ne. U kese ni-dan a kaa to u harin. Ba kpuu maa, ni-dan-la ma síi to u harin, ba ma pise dŏŋŏ εε. <sup>38</sup> Ka leεε wiin deen, mi jan bula pima di ma sí wii-kala ŋaa niaa deenba εε, an lenba ta. Di tinŦimin deen lii nuhuobiine dolun εε ne, u jan lel. <sup>39</sup> Ama di Wia tinŦimii ne, ma bi jan wuo cheyu. Di ma ne che di ma cheyu, ma jan na di ma di Wia paala yuyuo dŏŋŏ."

<sup>40</sup> Nii ne ba jegile nii u niin. Ba yire Yesu nanzŏŏba-la ba ku juu, a ŋaa ba viireba, an bula piba di ba bira sí wiaa bul Yesu dolun εε, an len ba viiri. <sup>41</sup> Nii ne ba lii nialin fa si hilime teen. Ba tuŋ tŏre ari ba si dŏgisεba a tin Yesu wiaa εε. <sup>42</sup> Tapulii-na kala ba yie juu Wia-dia a pεε mu niaa diisin, a ha bubul Wia wu-zŏmŏ-la a mu tige Yesu Kirisito εε.

## 6

*Niaa balipe ku pe Yesu nanzŏŏba-la εε*

<sup>1</sup> Tapulaa deenba Yesu haritooro-la ku puŋa yuge. Nii ne ba tuŋ Giriik tinŋaa suomo nyinyan Hiiburu tinŋaa. Ba bula ari ba si yie jon moribie-la a pipi yo-haalaa tapulii kala, ba yie bee kikieli ba-na yo-haalaa ne. <sup>2</sup> Nii ne Yesu haritooro-la fii ari balia yire nialin kala si laa Yesu wiaa dii a hilimi, a bula piba a bul, "U bi maga di la biben moribiee an ka Wia wiaa ta. <sup>3</sup> Mi naanbiirin, má liise ma tuŋ niaa balipe ma si jima di niaa ka zilba, ka Wia Din-zŏŋ-la heba εε an ken wujimin maa. Má liiseba di ba biben yo-haalaa deenba. <sup>4</sup> Ka la jon la nyun kala he aa chuεε Wia an pεε bul Wia niin wiaa." <sup>5</sup> Nii ne nialin kala si he dime tuŋsa kala tŏre ari wialin Yesu haritooro-la si bula. Ba liise baal kubala baa yire Sitiivin. U fa ŋaa baal-la si ken yarida worun ne. Wia Din-zŏŋ-la ma heu εε. Ba bira liise Filip ari Purŏkuros ari Nikeeno ari Taamŋ ari Paaminas ari Nikŏlas. Nikŏlas lii Antioch ne. U fa bi Juu tiina ŋaa an tuto Juu tinŋaa harin. <sup>6</sup> Nii ne ba ken nialin balipe-la ba si liisa a kaa mu Yesu nanzŏŏba-la sipaan. Ba chuεε Wia piba an jon ba nisaa danba εε.

### *Ba ken Sitiivin*

<sup>7</sup> Wia niin wiaa ha gaara su lee-la kala. Nialin si laa Yesu wiaa dii puŋ worun Jerusalem εε. Nialin ma si

kpu pusun pipi Wia yuga a ma sei Wia niin wialin.

<sup>8</sup> Wia laħrimo le Sitiivin ken dolun worun, a wuo ninnaa wu-kpunƙperisin ari wu-magilaa niaa tuon.

<sup>9</sup> Niaa donsun fa he dime. Ba fa nnaa Juu tinnaa ne a lii Sariini, donsun ma lii Alekizandia. Ba fa lii Wii-chuo le dia-la ba fa sii yire 'yosun ba si jonon ta'. Donsun ma fa nnaa Juu tinnaa a ma lii Siliisia ari Esia. Ba lii Sitiivin harin a ken wiaa lilere.

<sup>10</sup> Ama ba fa bi u bubuon le wuo ken a tin u wu-jimin ari Wia Din-zon-la dolun le u fa sii bul wiaa.

<sup>11</sup> Nii ne ba luora he niaa, ba bul, "La nia duu chei Moosis ari Wia yirin."

<sup>12</sup> Ba bul nii a nyise nialin ari nihiasi-la ari Wia tenin kerichiba he. Ba baanin sii Sitiivin nyun.

Ba kenu kaa mu nihiasi-la si yie hilime vuvuure wiaa teen.

<sup>13</sup> Ba ken niaa kaa ko di ba ku nyia wiaa pu a bul, "Baala deen yie ku bul wiaa aa chei Wia-dia-la ba si jonon pi Wia, ari wialin Moosis si nmunsa bil di la tuto. U yie bul nii, u bi tore,

<sup>14</sup> bee wiaa la nia duu si di Yesu deen si lii Nazaret jan yigi Wia-dia-la lo, a ken wialin Moosis fa si dage la naabalimaba di ba tuto a kaa birime."

<sup>15</sup> Nialaa kala fa si hon lee-la, ba chaare siaa a pe Sitiivin le. Ba na duu siaa nage Wia tinndaara siaa.

## 7

*Sitiivin bul Wia wiaa a pi*

*niaa*

<sup>1</sup> Nii ne nialin si kpu pusun pipi Wia kuhian piase Sitiivin di wiaa deenba nnaa wutitii nee?

<sup>2</sup> Sitiivin bul, "Mi nyimmaba ari mi naanbiirin, ma jegile nii mi teen. Wii-balin si ken yirin ken u titia ku dage la naabalima Abiraham, bua-la le u fa si hon Mesopoteemia tinteen le, di u ha bi tan-la ba sii yire Haran le mu hon.

<sup>3</sup> Nii ne Wia bula pu duu sii a len u dia niaa, a lii u tinteen ma le, a mu tintee-la u si jan dagu.

<sup>4</sup> Nii ne u sii lii Kalidiya tinteen le a mu hon tan kubala baa yire Haran le. Dime ne Abiraham nyimma suu. Nii ne Wia len u sii lee-la a ko tinteen deen ma niaa deenba si hono leele.

<sup>5</sup> Bua-la le Wia bi lee-la kere pi Abiraham a yi naakielin kubala maa, duu titia ken, ama u bula pu duu jan jonon pu, ba di u doho niaa. Bua-la le Wia si bul nii Abiraham le duu ha bi bii lula.

<sup>6</sup> Nla ne Wia bula pu, 'N doho niaa jan nnaa nuhucraa tinteen donon le, a birime yosun. Ba jan dogiseba worun jisun zabanese.

<sup>7</sup> Mi saa jan ken nialin ba si jan tima pipa dii sariya. Nii harin le ba jan lii lee-la le, a bira ko daha a chuchuolemi.'

<sup>8</sup> Nii ne Wia jonon u niin a pi Abiraham. U magilin ne, ba di u doho niaa kikeri ba penee. Nii ne Abiraham lul Aizik. Tapul-chorimun cheen u keru u penin. Aizik ma lul Jekob. Jekob ne lul

biirin̄ fii ari balia-la si ku Țaa la naabalimaba. <sup>9</sup> Ba tuon̄ don̄o yirin̄ ne Josef. Ku-kaana-la yaraa bibieri u nyun̄, ba kenu kaa yalle pi baalaa kubalaba. Ba kenu kaa mu Ijipiti tin̄teen̄. Ama Wia fa Țeu Țe worun̄ <sup>10</sup> a liisu wahala kala Țe u fa si jua. U fa si mu Feero Ijipiti kuoro sipaan̄, Wia lahorimo Țe u ken̄ wu-jimin̄. U len̄ u Țaa u tin̄teen̄ kuhian̄ a biben̄ u tin̄teen̄ ari u dia kala. <sup>11</sup> Nii ne losun̄ ku juu Ijipiti tin̄teen̄ ari Keenan̄ tin̄teen̄ kala. Losun̄ kpu niaa kin̄ken̄, la naabalimaba bi kudiilee wuo na. <sup>12</sup> Jekob nia ari kudiilee he Ijipiti tin̄teen̄ Țe. U tin̄ u biirin̄, la naabalimaba-la, di ba mu yoo kaa ko. Ba yoo kaa ko. <sup>13</sup> Jekob biirin̄ miira mu Ijipiti liamin̄ Țe di ba yoo kudiilee. Nii ne Josef ken̄ u titia dageba, an̄ ken̄ba ma dage Feero. <sup>14</sup> Nii ne Josef tin̄ di ba mu bula pi u nyimma Jekob, duu ken̄ u doho niaa kala kaa ko Ijipiti, ba kala fa Țaa mahin̄ batori ari fii ari banon̄ ne a mu Ijipiti. <sup>15</sup> Nii ne Jekob sii a mu Ijipiti. Ba di u biirin̄ suu dime. <sup>16</sup> Ba miira ken̄ba kaa mu Keenan̄ tin̄teen̄ a hugiba lee kubala baa yire Sekem. Ba hugiba bua kubala Țe Abiraham fa si yob̄o Ham̄o niaa teen̄.

<sup>17</sup> U ka mua, ka di wii-la-na ku bal, Wia fa si bula pi Abiraham ari u jan̄ Țaa pu. Bua-la Țe Jekob doho niaa fa puȚa worun̄ Ijipiti Țe. <sup>18</sup> Kuoru-la fa si jin̄ Josef suba, an̄ ka ni-

tanii dii kuoron̄ Ijipiti Țe. U fa bi Josef wiaa jin̄. <sup>19</sup> U nyise niaa kin̄ken̄ a dogiseba, a fuge la naabalimaba di ba jon̄ ba bii-mullun̄ kaa lii ta di ba suu. <sup>20</sup> Bua-la Țe ne ba fa lul Moosis. U fa Țaa bii-zon̄-bie ne worun̄. Ba benu u nyimma dia Țe chen̄sin̄ batori, an̄ ka ba jon̄u kaa lii ta. <sup>21</sup> Ba si jon̄u kaa lii ta nii, Feero tolo ku jon̄u, a diesu ari u bii-lullun̄. <sup>22</sup> Ba dagu Ijipiti tin̄Țaa wu-jimin̄ kala. U wu-Țaalaa ari u wu-bulaa len̄ u Țaa ni-bal.

<sup>23</sup> Moosis fa si yi jisin̄ mahin̄ balia, u biine ari u jan̄ mu na u naan̄biirin̄ Iziral tin̄Țaa. <sup>24</sup> U si mu dime, u na Ijipiti tiina duu dogise Iziral niaa don̄o. U mu lii paa Iziral tiina-la tuoron̄, a kpu Ijipiti tiina-la. <sup>25</sup> U fa biina ari u naan̄biirin̄ jan̄ jin̄ ari Wia che duu ne laaba ta, ama ba fa bi wuo jin̄. <sup>26</sup> Tan̄ si pula, u na di Iziral niaa balia, baa yuo don̄o. U mu duu ken̄ba he don̄o Țe a bul, 'Ma Țaa naan̄biirin̄ ne, bee ne tii ma gura dudogise don̄o?' <sup>27</sup> Nii-la fa sii dogise u don̄o tiina-la ken̄ Moosis yige ta an̄ bul, di kubee ne si u biben̄ba a laa ba wiaa jijin̄? <sup>28</sup> Duu che duu kpuu maa, ari u dia si kpu Ijipiti tiina-la nii nee? <sup>29</sup> Moosis si nii nii, u fá Ijipiti tin̄teen̄ Țe a mu Țaa nuhuoru Midian̄ tin̄teen̄ Țe. U hon̄ dime ne a jaa haala, a lul biirin̄ balia. <sup>30</sup> U fa hon̄ dime jisin̄ mahin̄ balia.

Nii ne Wia tin̄daara kubala ku lii u teen̄ giri-bine



tuoŋ a kpage peel kubala baa yire Saana. U ku lii a nage tii-bie sīi dii nyinin tuoŋ. <sup>31</sup> Moosis si na ŋii, u ŋaau wu-kpuŋkpere. U mu yi duu na tii-bie-la, a nii la Tiina Wia yiikoro. U bula pi Moosis a bul, <sup>32</sup> ‘Mi ne ŋaa ŋ naabalimaba Abiraham ari Aizik ari Jekob Wia.’ U si bul ŋii, Moosis china chichel. U bira bi wuo bibenŋ.”

*Ba yage Sitiivinŋ ari tabiaa*

<sup>33</sup> Sitiivinŋ bira bul, “Ŋii ne la Tiina Wia bula pi Moosis a bul, ‘Chaare ŋ neŋteŋŋe ŋ naasiŋ le. Wia he lee-la ŋ si china ne. U wase lee-la kala a ta. U bi disinnŋ kenε. <sup>34</sup> Mi na ba sīi doŋise mi niaa ŋii ne Ijipiti le, a nii ba sīi yel maa, a ku tuu di mi laaba ta. Sii leεle, mi timiŋ di ŋ miira mu Ijipiti.’ ”

<sup>35</sup> Ŋii ne Sitiivinŋ bira suomi aa bul, “Moosis deen ne ba via aŋ piεsu, ‘Kubeε ne ŋaa ŋ bibenŋla a laa la wiaa jijinŋ?’ U ne Wia tin u ŋaa ma kuhianŋ ari ma laataara. Wia ne to Wia tinŋdaari-la fa si ku lii Moosis teenŋ a nage tii-bie-la si dii nyininŋ tuoŋ, a peu le duu laa u niaa tita. <sup>36</sup> Moosis ŋaa wu-magilaa ari wu-kpuŋkperisiŋ Ijipiti le, aŋ-na kese u niaa lii Ijipiti tuoŋ, a kenba to mugi-bal kubala baa yire Mugi-fianŋ. Ba to giriŋ maa jisiri mahinŋ balia, a peε ŋaa wu-kpuŋkperisiŋ ari wu-magilaa wonbiinŋ le. <sup>37</sup> Moosis deen ne bula pi Iziral niaa a bul,

‘Wia jan leŋ di nialinŋ sīi bul wiaa, Wia Din-zoŋ-la doluŋ le,  
di ba doŋo ko ma teenŋ ari u si tinmi ŋii.

U jan ŋaa ma naanbii.’ ”

<sup>38</sup> Ŋii ne Sitiivinŋ bira suomo bubul, “Moosis ari la naabalimaba ne fa hilimi giri-bine tuoŋ. Dime ne u na Wia tinŋdaara ma peel kubala nyuŋ baa yire Saana. U joŋ Wia niinŋ wialaa si kenŋ miisiŋ pu duu laa bula pila. <sup>39</sup> La naabalimaba via u niinŋ aŋ joŋ ba hariŋ yia, ba tuobiinaa kala fa cho di ba fa miira mu Ijipiti. <sup>40</sup> Ŋii ne ba bula pi Eronŋ a bul, ‘Me vesinŋ pila di ba laa la sipaanŋ. Moosis deenŋ si kenla lii Ijipiti tinŋteenŋ le a kenla ko daha, la bi jinŋ wii-la kala si ŋaau le.’ <sup>41</sup> Ŋii ne ba me vene a nage ne-bie a kpaaru. Ba tuoŋ tore ku-la le ba titia si mee. <sup>42</sup> Wia joŋ hariŋ yiaba a joŋba ta ba chuchuoε chenwulaa ari chene ari wii-posuŋ. Ba ŋmuŋse ŋii ne Wia teŋ-la seme doŋo nialinŋ sīi bul wiaa, Wia Din-zoŋ-la doluŋ le, si ŋmuŋsa. Ba doŋo ŋmuŋsa a bul, Wia si,  
‘Ma Iziral timma, bua-la le ma fa si he giri-bine-la le jisiri mahinŋ balia-la, mi-na dee ma fa kpu pusunŋ pa.

<sup>43</sup> Ma vesinŋ ne ma kpikpaare.

Ma vene ba sīi yire Moloκ, u lebinŋ ne ma kaa chuŋaa venŋ, a chuŋ ma chenwulunŋ vene maa,

vene-la ba sîi yire Refan  
u magilin ne.

Kiaa deenba ne ma me a  
chuchuole.

Nii ne tii mi jan len ba  
kenma kaa mu di-  
bolii, a kielii Babilon a  
mu.' "

<sup>44</sup> Nii ne Sitiivin bira bul,  
"La naabalimaba fa si he  
giri-bine tuon, ba ken lebi-la  
ba fa si he pi Wia. Wia ne  
fa dage Moosis duu naa. U  
dage u nagisin kala u si jan  
naa duu nage. Moosis naa  
nii. <sup>45</sup> Niaa deenba suba ne,  
ka la naabalimaba laa lebin  
deen ba nyun le a chun. Ba  
di Josua juu tinteen dono.  
Nialin fa si tii tintee-la, ba  
fa bi Wia ka to. Wia pe la  
naabalimaba deenba le ba  
yuo kiri nialin, an laa tintee-  
la tii. Lebi-la fa he ba teen,  
nii ne deen deen, Devit, la  
naabalima, ku yiu. <sup>46</sup> Wia  
lahorimo-la le u sul Wia duu  
len duu saa dia pu, u-na Wia-  
la u naabalima Jekob fa sîi  
to. <sup>47</sup> Devit dee bi dia-la saa,  
Solomon ne miira saa a pi  
Wia. <sup>48</sup> Ka Wia si kii kun-  
kala, u bi diisi-la nuhobi-  
inee si saa dunduja ne ka  
juu. Nialin sîi bul wiaa, Wia  
Din-zon-la dolun le, ba dono  
ne fa bul nii. U si,

<sup>49</sup> 'Wia si, Wia-jan le ne mi  
kuori-kpasa he,  
tinteen ne naa mi  
naasin di-bilin.

Dii bee ne saa ma jan saa  
pimi?

Mi di-wiesin he nii?

<sup>50</sup> Kiaa deenba kala, mi dee  
bi naa?' "

<sup>51</sup> Nii ne Sitiivin bul, "Ma  
nyun dolie kinken. Ma  
digilaa ma kparime. Ma  
ken nyu-duon ari nialin si  
bi Wia ka to. Ma ma yie  
via ma to Wia Din-zon-la  
le, ari ma naabalimaba fa  
si naa nii. <sup>52</sup> Nialin sîi bul  
wiaa, Wia Din-zon-la dolun  
le, ba tuon kun-kala tuo ma  
naabalimaba si bi naasin to  
dogise. Ba fa kpu nialaa si  
laa sipaan paala bul di Wia  
Tuo-pul Tiina jan ko. U ne  
ma jonjo yalle a kpu. <sup>53</sup> Wia  
tin daaraa jon Wia niin wiaa  
pima, ama ma buu to."

<sup>54</sup> Sitiivin si bul wialin  
dere, nialin fa si hilime  
vuure wiaa nii wialin u si  
bula. Ba baanin faasa sîi,  
ba chichan ba nyilaa. <sup>55</sup> Nii  
ne Wia Din-zon-la faasa he  
Sitiivin le yuge. U wula  
ben wia nyun a na Wii-balin  
tula, a na Yesu maa duu  
hon Wia seme, ni-duon di-  
honun. <sup>56</sup> Nii ne Sitiivin  
bul, "Ma bee na, mi na  
Wia-jan boinniin duu suro,  
ka Nuhuobiine Bie hon Wia  
seme, ni-duon di-honun."

<sup>57</sup> Ka ba faasa naa gon a  
to ba digilaa, ba kala guu  
mu-u le <sup>58</sup> a kenu yige ta  
u lii ba jan tuon le, a paa  
tabiaa yiyagu. Nialin sîi yage  
Sitiivin jon ba gennin a pi  
bapucci-bie kubala baa yire  
Sool, u biben. <sup>59</sup> Baa yage  
Sitiivin nii ne ari tabiaa, ka  
u yiyire la Tiina Yesu a sulu,  
"Mi Tiina Yesu, laami kaa  
mu n teen." <sup>60</sup> U tuu kpirimi  
a faasa nmoo niin a bul, "Mi  
Tiina Yesu, mii sulun, si ba

haache deenj chiminj tinj." U bul njii ne anj suu.

## 8

*Sool to naasinj dogise nialinj si laa Yesu wiaa dii aa hilimi*

<sup>1</sup> Sool ma sei ari ba kpu Sitiivinj ne. Chεε-la ba suomo to nialinj si laa Yesu wiaa dii aa hilimi naasinj, a dudogiseba kinjken Jerusalem le. Ba kala pise Judiya ari Samaria tinjteenj kala le, see Yesu nanzoo-ba-la dunđunja ne ka. <sup>2</sup> Nialinj sii fá Wia jonj Sitiivinj a hugi anj yel u yoho worunj.

*Ba bul Wia wu-zomɔ-la Samaria le*

<sup>3</sup> Sool faa che duu pugi nialinj si laa Yesu wiaa dii, a to ba naasinj dudogiseba. U to dii-niirinj a kese haalaa ari baala-la si laa Yesu wiaa dii, a lereba lii ba diisinj le, anj lenj ba kenjba kaa mu to dia. <sup>4</sup> Nialaa fa si pisa, ba mu gollε lee kala a bubul Wia niinj wiaa. <sup>5</sup> Filip sii mu tanj kubala baa yire Samaria, a bul Kirisito wiaa pi nialaa si he dime. <sup>6</sup> Ni-danj-la kala si nii wialaa u si bula a na u wu-magila-la u si ŋaa, ba kala kenj nii-bala a jonj ba nyunj he wialinj u sii bul le. <sup>7</sup> Filip si bul wiaa njii, jin-bonjɔɔ fa kenj niaa a yuge, ba lenjba. Di ba ne lenjba, ba yie lii a faasa yiyel. Niaa ma yuga a gberike, donsunj kenj naa-suununj ari na-suununj, ba ma kala duori. <sup>8</sup> Samaria tinjŋaa kala tuonj faasa tore.

<sup>9</sup> Tanj-la le baal kubala ma he dime, baa yire Saamonj. U kenj daalusunj a njŋaa wu-kpunjkerisinj tanj-la le niaa nina, a didage ari u ne kenj dolunj. <sup>10</sup> Ni-balaa ari hanjbiisinj kala jonj ba nyunj he u wu-ŋaalaa le a bul, "Baala deenj ne ŋaa wia. U kenj dolunj, dol-la ba sii yire Wia dol-balinj." <sup>11</sup> U si ŋaa wu-kpunjkerisinj deenjba niaa na u diene, njii ne tii niaa jonj ba nyunj kala he u wu-ŋaalaa le. <sup>12</sup> Ama Filip si bul Wia wu-zomɔ-la a tige Wia kuorii-la, a bul Yesu Kirisito ma wiaa, ba laa wialaa dii, ba foba Wii-chuole liinj, baalaa ari haalaa kala. <sup>13</sup> Saamonj titia ku laa wialinj dii, ba fou ma Wii-chuole liinj, ka u mere Filip le. U si na wu-kpunjkerisila ari wu-magilaa Filip sii ŋaa, u ŋaau wu-kpunjkerpere.

<sup>14</sup> Yesu nanzoo-ba-la si he Jerusalem le nii ari Samaria tinjŋaa laa Wia wiaa dii. Nii ne ba ta Piita ari Jonj di ba mu dime. <sup>15</sup> Ba mu a chuole Wia piba di Wia jonj u Dinj-zonj-la piba, <sup>16</sup> beε wiaa bua-la le Wia Dinj-zonj-la ha biba kunj-kala le he. La Tiina Yesu dolunj dunđunja le ne ba fa foba Wii-chuole liinj. <sup>17</sup> Ba jonj ba nisaa danjba le, njii ne Wia Dinj-zonj-la ku tuu heba le. <sup>18</sup> Saamonj si na di Yesu nanzoo-ba-la jonj ba nisaa danjba le Wia Dinj-zonj-la ku heba le, u jonj moribiee a sulba a bul, <sup>19</sup> "Má pimi ma dolunj deenj di mi ma jonj nisinj danj nuu-kala le,

di Wia Diŋ-zoŋ-la he tiina ma le." Nii ne Piita bula pu, <sup>20</sup> "N biina ŋ jaŋ wuo joŋ moribee yoo Wia si joŋ kua dii zile niaa lee? Ma di ŋ moribee kala jaŋ juu nyiniŋ. <sup>21</sup> N bi wii-kala kene wiaa deenba le. N bi ŋ tuoŋ pulla Wia teenj. <sup>22</sup> Birime a lii wu-bomun deen le, aŋ sul Wia duu joŋ ŋ tuobiinaa deenba ŋ si biinu a cheŋ. Duu jaŋ joŋo cheŋ, u jaŋ joŋo cheŋ. <sup>23</sup> N yaraa bieri kiŋkeŋ, haache ma keninj." <sup>24</sup> Nii ne Saamŋ sulba di ba chuole Wia pu di wiaa deenba kala ba si bula síu le ŋaa. <sup>25</sup> Ba si bul Wia wiaa dere ari wialinjala u si ŋaa piba, ba sii di ba miira mu Jerusalem. Ba si mu Jerusalem nii, ba bul Wia wu-zomŋ-la Samaria tinteen tasinj le a yuge.

*Filip cheŋ baal-la si lii Itoopia tinteenj*

<sup>26</sup> Nii ne Wia tinđara kubala ku bula pi Filip, "Sii mu taŋ-bubuŋ a mu wonbii-binii-la si lii Jerusalem aa mu Gaza." U mua. <sup>27</sup> U si mu dime, u na baal kubala duu lii Itoopia tinteenj. U ŋaa bonjoŋ ne a tima pipi Itoopia kuoro ba síi yire Kanđasi. U fa ŋaa haal ne. Baal-la faa beŋ u kiaa kala. U fa mu Jerusalem ne a chuole Wia aŋ hoŋ u toruko nyuŋ, <sup>28</sup> a miira mumu dia. U fa síi venj nii ne u kkarime Wia teninj seme doŋo, Azaaya si ŋmuŋsa. Azaaya fa ŋaa

nialin sii bul wiaa, Wia Diŋ-zoŋ-la doluŋ le doŋo ne. <sup>29</sup> Nii ne Wia Diŋ-zoŋ-la bula pi Filip duu mu kpage toruku-la. <sup>30</sup> Filip fá mu kpagu a nii duu karime Wia tenj-la seme doŋo Azaaya si ŋmuŋsa. U piesu duu jin wialinjala u síi karimu bubuŋ nee? <sup>31</sup> Nii ne baal-la bul duu bi jaŋ wuo jin ba bubuŋsa, see di nuu dagu, aŋ yire Filip duu jila hoŋo pɛu le. <sup>32</sup> Wia niin wialinjala u fa síi karimu ne ŋla: U si,

"U tɔre u niin a nage piese ba si kaa mu di ba kpu, ka u tɔre nii.

U bira nage pie-bie ma si tɔre u niin, ka ba kikeri u punaa ne.

Nii-la bi u niin suro.

<sup>33</sup> U si keŋ u titia muuri nii, ba girima laa u wu-sinŋaa.

Ba liisu ni-weyee tuoŋ a kpuu.

Ba si kpuu nii, kubee ne jaŋ wuo to u doho naasinj?"

<sup>34</sup> Baal-la si karime Wia niin wiaa dere, u piese Filip, "Kubee wiaa ne nii-la síi bul wiaa, Wia Diŋ-zoŋ-la doluŋ le bubul nii? U titia wiaa ne koo nuu ma doŋ wiaa nee?"

<sup>35</sup> Nii ne Filip suomi Wia niin wialaa lee-la titia ne a bul Wia wu-zoŋŋoo wiaa a kaa mu tige Yesu le. <sup>36</sup> Ba si joŋ wonbii-la aa mu, ba mu yi lee kubala duu keŋ liin. Nii ne baal-la bula pi Filip a bul, "Na liin ne ŋla. Bee ne jaŋ tomi di ŋ sími Wii-chuole liin fo?" <sup>37</sup> Nii ne Filip

bula pu, “Di η ne laa Yesu wialin dii ari η tuon kala, mi jan fon Wii-chuole liin.” Nii ne baal-la bul, “Mi laa dii ari Yesu Kirisito ne n̄aa Wia Bie.” <sup>38</sup> Nii ne baal-la n̄aa jani-la fa sii lere torukula chin. Ba di Filip kala tuu a juu lii-la. Filip fou Wii-chuole liin. <sup>39</sup> Ba si ku lii lii-la tuon, Yesu Din-zon-la ku jon Filip kaa lel. Baal-la bira bi Filip na an jon u wonbiiin viven, a kala n̄aa tuotoru. <sup>40</sup> Filip n̄aa duu chin duu he tan kubala baa yire Asidod le. U golle ta-biisi-la kala si he dime a bubul Wia wuzonjoo wiaa. U n̄aa nii ne a mu yi tan kubala baa yire Sizariya.

## 9

*Sool ku laa Yesu wiaa dii*

<sup>1</sup> Sool ha fufugi la Tiina Yesu haritooro-la ari u jan kpuba, a sii mu nialin si kpu pusun pipi Wia kuhian teen, <sup>2</sup> a sulu duu n̄munse tennin pu duu kaa mu tan kubala baa yire Damaasikas a kpa Wii-chuole diisin le. U ne n̄aa nii duu na nuu-na kala sii to wonbii-la dime, baalaa koo haalaa kala, duu wuo ken dolun a wuo keseba voo kaa ko Jerusalem. U n̄munsa pu. <sup>3</sup> Sool si lii jon wonbiiin a mumu Damaasikas a ku kpage tan-la, pulumun guu lii wia nyun a faasa chaana heu le. <sup>4</sup> U tuu tel tinteen. Ka u nii nuu yiikoro. Uu bul u teen, “Sool, Sool, bee ne ti η to mi naasin a dudogisemi n̄la?” <sup>5</sup> Nii ne u piese,

“Kubee ne, tiina?” Yiikoro-la bul, “Mi ne n̄aa Yesu, nii-la η si to u naasin a dudogise. <sup>6</sup> Sii juu tan-la tuon. Dime ba jan dagine wii-la η si jan n̄aa.” <sup>7</sup> Sool ari nialin fa sii ven, ba china tuobiben, ba nii yiikori-la, ama ba bi nuukala naa. <sup>8</sup> Sool nyaga sii a suri u siaa. U bi kun-kala wuo na. Ba ken u nisin le ne a lere juu Damaasikas. <sup>9</sup> U nyulime a he dime u tapulaa batori. U bi kun-kala die, u bi liin ma nyua.

<sup>10</sup> Yesu haritooro-la kubala ma fa he Damaasikas le, baa yire Ananayas. U na wiaa ari duosoo tuon. N̄la ne u na: La Tiina Yesu yiru a bul, “Ananayas!” Nii ne u si, “Nami, mi Tiina.” <sup>11</sup> Nii ne la Tiina Yesu bula pu, “Sii mu wonbii-la ba sii yire wonbii-tegi-tegi a mu baal kubala dia u yirin ne Judas, a piese che baal-la si lii tan kubala baa yire Taa-sis. Baal-la yirin ne Sool. U n̄i chuole Wia sisele nii.” <sup>12</sup> Nii ne Yesu bira bula pi Ananayas a bul, “Sool n̄i chuole Wia nii, u na ari duosoo tuon, η-na Ananayas, di η ku juu a jon η nisin danu le di u siaa bira suri.” <sup>13</sup> Nii ne Ananayas bul, “Mi Tiina, niaa yuga kinken a bula pimi ari baala deen n̄aa wu-bonjoo η niaa le si he Jerusalem le. <sup>14</sup> Nialin si kpu pusun pipi Wia kuhiasin pu dolun tan deen le duu kese nialin kala sii chuolun voo.” <sup>15</sup> La Tiina Yesu bula pi Ananayas a bul, “Sii mu,

mi ne liisu duu tima pipimi. U jaŋ mu bul mi wiaa nialin si bi Juu tinŋaa ŋaa teen, ari kuoroo, ari Iziral niaa teen. <sup>16</sup> Mi ne jaŋ dagu hee-la nii u si jaŋ na a tin mi wiaa." <sup>17</sup> Nii ne Ananayas sii mu dia-la Sool si jua. U juu a joŋ u nisaa dan Sool le aŋ bul, "Mi naanbie Sool, la Tiina Yesu-la ŋ si na wonbiin le ŋ sii ko daha, u ne tinmi. U tinmi di mi ko di ŋ siaa wuo suri, ka di Wia Diŋ-zoŋ-la ma heŋ le."

*Sool bul Wia wiaa a pi niaa Damaasikas le*

<sup>18</sup> U si bul nii, di kiaa nage cheŋfilin kerikee guu lii Sool siaa le tel, ka u bira wuo nina. U sii, ba fou Wii-chuoŋe liin. <sup>19</sup> U dii kiaa a bira dol. U he Damaasikas le a juu Yesu haritooro-la si he Damaasikas tuoŋ tapulaa banmene. <sup>20</sup> U si he dime, u guu sii mu Wii-chuoŋe diisin a suomo bubul Yesu wiaa a pipi niaa, a bul duu ne ŋaa Wia Bie. <sup>21</sup> Nialin kala si nii wialin u si bula, u ŋaaba wu-kpuŋkperere. Baa piесе doŋo, "Baala deen dee fa bi Jerusalem le he aa kpu nialin sii to Yesu deen nii? Nla wiaa saa dee u bira ko daha, duu keŋeba voo kaa mu nialin si kpu pusun pipi Wia kuhiasin teen?" <sup>22</sup> Ka Sool sii bul wialaa, u wasa keŋ dolun a kii bunbun-la. U wuo dage ari Yesu ne ŋaa Kirisito, Wia si liisa. U paala faasa bul nii, Juu tinŋaa si he Damaasikas le, ba nanɗaasin kala yuore.

<sup>23</sup> U he dime a dieni, nii ne chee kubala Juu tinŋaa vuure di ba kpuu. <sup>24</sup> Sool ku nii. Ba yie po taŋ-la boinonii-baalin wiiheye ari titaŋin kala ne di ba kpuu.

*Sool he Jerusalem le*

<sup>25</sup> Titaŋ kubala Sool haritooro joŋu he sime tuoŋ a keŋ ŋmenin voo, a leru u kieli jee-la a tuu jeen harin, a lii mu Jerusalem.

<sup>26</sup> Sool si mu Jerusalem, u chiche duu juu Yesu haritooro-la tuoŋ. Ba bi laa dii ari u ŋaa Yesu haritooro-la doŋo. Ba fifau. <sup>27</sup> Yesu nanzooaba-la doŋo ba sii yire Banabas ne peu le a kenu kaa mu Yesu nanzooaba-la teen. U ne bula piba nii Sool si na la Tiina Yesu wonbiin le, u bul wiaa pu nii. Banabas ne saa bira bula piba nii Sool si keŋ nyu-duoŋ a bul Yesu wiaa pi niaa Damaasikas le. <sup>28</sup> Ba sei u juu ba tuoŋ a gugolle ari tuotoruŋ Jerusalem le, <sup>29</sup> a bubul Wia wiaa ari nyu-duoŋ la Tiina Yesu dolun le. Ba di Juu timma-la sii bul Giriik tinŋaa wu-bulun, ba keŋ wiaa lilere. Ba wiwalime di ba kpuu. <sup>30</sup> U naanbiiri-la si nii wiin deen, ba kenu kaa mu Sizariya a ŋaa u mu Taasis.

<sup>31</sup> Nii harin le nialin si laa Yesu wiaa dii aa hilimi Judiya ari Galilii ari Samaria tinteen le kala na wiese, a wasa ŋaa Wia yarida, a to la

Tiina Yesu a fifáú. Wia Diŋ-zoŋ-la ma peba le. Ba puŋa pe.

### *Piita mu Lida ari Jɔpa*

<sup>32</sup> Piita fa gollɛ leree kala nɛ. Tapulii kubala u sii mu Lida duu na Wia niaa dimɛ. <sup>33</sup> U si mu dimɛ, u na baal kubala baa yirɛ Iniyas. U gberike piŋ dia le jisɪŋ chori. <sup>34</sup> Nii nɛ Piita bula pu a bul, “Iniyas, Yesu Kirisito vaarin nɛ, sii chuoli ŋ bɔsɔ.” U guu sii a duori. <sup>35</sup> Nialɪŋ kala si lii Lida ari Saroŋ na nii, a birime to la Tiina Yesu.

<sup>36</sup> Haal kubala nɛ fa hɛ Jɔpa le. U faa to Yesu nɛ. U yirin nɛ Tabita. (Giriik tinŋaa kaa yiru Dɔkas. U bubuoŋ nɛ bagil.) U keŋ zile kiŋkeŋ a pipe summoo le. <sup>37</sup> Bua-la le u wiwiile a suu. Ba fou liiŋ a kaa jila bil lusun nyun dia le. <sup>38</sup> Jɔpa ari Lida fa bi bol. Nialɪŋ si laa Yesu wiaa dii a hɛ Jɔpa le nii ari Piita hɛ Lida le. Ba tin niaa balia u teen di ba sulu duu hɛ dolun aŋ kɔ ba teen lima lima. Ba mu a bula pu. <sup>39</sup> Piita sii to ba hariŋ mu. U si mu dimɛ, ba kenu jil lusun nyun dia-la. Yo-haalaa kala chin u sɛmɛ aa yel, a paa geri-laalaa ari geri-vɔbia-la Dɔkas fa si yerɛ u fa si hɛ u miisin le, a didagɛ Piita. <sup>40</sup> Piita ŋaa ba kala lii dia-la tuoŋ. Ba si lia, u tuu kpirimi a chuɔle Wia. U chuɔle Wia dɛrɛ aŋ birime suu-la teen a bul, “Tabita, sii.” U suri u sɪaa. U si na Piita, u sii hoŋ. <sup>41</sup> Piita mu yiu a keŋ u nisɪŋ le u sii. Nii nɛ u

yirɛ Wia niaa ari yo-haala-la a joŋo piba. Ba kala nau duu bira weye. <sup>42</sup> Wiin deen teeli Jɔpa kala nɛ. Niaa yuga a ku laa la Tiina Yesu wiaa dii. <sup>43</sup> Piita hɛ puri-tiseru kubala dia le nɛ Jɔpa le a didieni. U yirin nɛ fa Saamoŋ.

## 10

### *Piita ari Koniilias*

<sup>1</sup> Baal kubala nɛ fa hɛ Sizariya le. U yirin nɛ fa Koniilias. U fa ŋaa laali-yuoro-la ba si kaa kpaa zolo zolo ba doŋo kuhian nɛ, laali-yuoro-la ba kaa yirɛ Itali laali-yuoroo. <sup>2</sup> Uu fá Wia, ba di u dia niaa kala ma tuto Wia. U yie pipe summoo le, a chuchuoɛ Wia ma bua-na kala le. <sup>3</sup> Wiihɛye kubala ari kerifi batori bua le, Koniilias paala chaasa na ari duosoo tuoŋ di Wia tinɔdaara kubala ku juu a yiru, “Koniilias!” <sup>4</sup> U chaare sɪaa bibenu. Fawullun kenu. U piesɛ, “Bɛɛ kuŋ nɛ mi Tiina?” Nii nɛ Wia tinɔdaari-la bula pu, “Wia nii ŋ si yie chuchuoɔlu nii nɛ a na ŋ si yie pipe summo-la ma le nii. A tin wiaa deenba wiaa uu liisi ŋ wiaa nɛ. <sup>5</sup> Tin niaa leeɛ di ba mu Jɔpa a che yirɛ baal kubala duu kɔ ŋ teen. U yirin nɛ Saamoŋ Piita. <sup>6</sup> Uu juu puri-tiseru kubala dia nɛ, u ma yirin nɛ Saamoŋ. U dia kpage mugibalin nɛ.” <sup>7</sup> Wia tinɔdaari-la si bul wialɪŋ dɛrɛ, u miira viiri. Nii nɛ aŋ ka Koniilias yirɛ u dia tinɔinnaa balia a pe laali-yuoro kubala le.

Laali-yuori-la he nialaa si yie hɔnɔ gbaaru tuɔŋ ne a fifá Wia. <sup>8</sup> U bul wii-la kala u si na ne aŋ leŋ ba mu Ɔɔpa.

<sup>9</sup> Taŋ si pula, wia ma mage nyu-gbaŋa di ba mu kpage Ɔɔpa. Ba sí mu nii, Piita ma jil lusun duu chuɔle Wia.

<sup>10</sup> Losun fa kenu u chiche kudiilee duu dii. Ba sii nɔŋaa kudiilee di ba pu. Ba sí nɔaa kudiile-la nii, u na ari duosoo tuɔŋ <sup>11</sup> di wia nyun kpaa. Ka kun a nage geribalin a lii wia nyun ku tuu tinteen. Ba keŋ u niipine-la banesemin le. <sup>12</sup> Ka puŋ-yiriba ari zaari-yiriba ari kialin si keŋ boye tutuuri tinteen he u tuɔŋ. <sup>13</sup> Nii ne u nii nuu yiikoro duu bul, "Piita, sii kpu a dii."

<sup>14</sup> Piita bul, "Ai, mi Tiina, mi ha bi ku-la kala si keŋ disinnin die." <sup>15</sup> Yiikori-la bira miira bula pu, "Ku-la kala Wia si si u zɔmɔ, bira sí bul duu keŋ disinnin." <sup>16</sup> U na kialin deenba di ba ku tuu naanŋiin butori ne, ka ba miira jil wia nyun. Ba bira bi tibe.

<sup>17</sup> Wii-la kperi Piita. U hɔnɔ bibiine wii-la u si na bubuɔŋ, di nialin Koniilias fa si tima, di ba ne piesa ku chin Saamɔŋ boinonii-balin nii. <sup>18</sup> Nii ne ba yire a piese di baal kubala he dia deen tuɔŋ baa yire Saamɔŋ Piitaa? <sup>19</sup> Piita fa ha keŋ wii-la u fa si na a bibiine u bubuɔŋ. Nii ne di Wia Din-zɔŋ-la bula pu, "Bee na baalaa batori ne he daha a chicheŋ. <sup>20</sup> Sii tuu a sí logo logo nɔaa, aŋ

keŋba mu. Mi ne tinba n teen." <sup>21</sup> Nii ne Piita sii tuu ba teen a bula piba, "Mi ne nii-la ma sí che. Bee ne ma kaa chichemi?" <sup>22</sup> Nii ne ba bul, "Laali-yuoroo kuhian kubala, baa yire Koniilias ne tinla. U nɔaa tuɔ-pul tiina ne a fifá Wia. Juu tinɔaa ma kala bibeseu le. Wia tinɔdaara kubala ne ku bula pu duu yirin di n ko u dia, di ba nii wii-la n si jan bula piba." <sup>23</sup> Nii ne Piita yireba di ba juu chua, taŋ-pul.

Taŋ si pula u sii ba di ba mu. U naanbiiri-la ma doŋsun si laa Yesu wiaa dii Ɔɔpa le ma pe kenu mu. <sup>24</sup> Che-liamin cheen ba mu yi Sizariya. Dime Koniilias ari u naanbiirin ari u nanɔdoŋsun u si yira, ba kala hɔnɔ gberu. <sup>25</sup> Piita fa si ku juu, Koniilias sii chemu, a tuu kpirimi u sipaan a chuɔlu. <sup>26</sup> Nii ne Piita kenu aŋ bul duu sii. Ka u bula pu, "Mi ma nɔaa nuhuobiin ne." <sup>27</sup> Piita ari Koniilias fa haa bul wiaa ne aŋ to doŋɔ jujuu dia. Piita juu na di niaa yuga a hilimi dime. <sup>28</sup> Nii ne u bula piba a bul, "Ma titia jima ari Juu tinɔaa kisin ne di ba guoli nialin si bi Juu tinɔaa nɔaa tuɔŋ. Ba bi ba diisin maa mu. Ama Wia dagemi di mi sí nuu-kala kaa yire disinnin tiina. <sup>29</sup> Nii ne tii, ba si ku yiremi, mi bi wii-kala bula aŋ ko. Mi si ko nla, bul wii-la si tii n yiremi."

<sup>30</sup> Nii ne Koniilias bula pu a bul, "Tapulaa batori ne nla ari bua deen titia le, mii



chuoƙe Wia wiiheye mi dia ƙe. Di baal kubala ne ɗii a chin mi sipaan. U gennin faasa tutul. <sup>31</sup> U bula pimi, 'Ƙoniilias, Wia nii ɗ si yie chuchuoƙe Wia ɗii ne, a na ɗ si yie pipe summo-la ma ƙe ɗii. <sup>32</sup> Saa tin niaa di ba mu JoƆa, a che yire baal kubala duu ko. U yirin ne Saamɔn Piita. Uu juu puritiseru kubala dia ne, baa yire Saamɔn. U dia kpage mugibalin ne.' " <sup>33</sup> Ƙoniilias bira bul, "Nii ne tii mi tin niaa lima lima, ba ko ɗ teen di ba yirin. N ma he dolun ɗ si ko ɗla. Leele la kala hilime ne Wia sipaan, a gbigbere di la nii wii-la kala Wia si dajin di ɗ bula pila."

*Piita bul Wia wiaa a pipi niaa*

<sup>34</sup> Nii ne Piita suomo bubul, "Mi leele jima ari wutitii ne, Wia jon niaa kala ba ɗaa kubala ne. <sup>35</sup> Nuukala sii fau a ɗɗaa wialin sii to wonɗiin, Wia laau ne. U sipaan tuo yiri-la kala u si ɗaa ƙe. <sup>36</sup> Ma ma nii Wia wu-zomɔ-la u si jonɔ pi Iziral tinɗaa. U bula piba di ba to Yesu Kirisito ƙe a na wiese. (U ne ɗaa nuukala Tiina.) <sup>37</sup> Wialin si tige Yesu si lii Nazaret ƙe suomi Galili tinɗeen a teeli Judiya tinɗeen kala. Joɗɗ laa sipaan bubul Wia wiaa, a fo niaa Wii-chuoƙe liin. <sup>38</sup> Ma ma nii Yesu wiaa ne. Wia jon u Din-zɔɗ-la heu ƙe a puu dolun. U sii mu lee kala, aa ɗaa wu-zɔɗɔɔ pipi niaa, aa

vaare nialin kala Sitaani si kene a nyaga bil. Wia fa chin u harin ne tii u wuo ɗɗaa wiaa deenba kala. <sup>39</sup> Wialin kala u si ɗaa Jerusalem ƙe ari Juu tinɗaa tinɗeen kala, la na a ɗaaba danɗia. Nii ne ba kpaasu mere daa-geese nyun u suu. <sup>40</sup> Ama Wia chisu suun ƙe tapul-torimun cheen a len niaa bira nau. <sup>41</sup> Nuukala dee buu na, ama la nialin Wia fa si liisa di la ɗaa u danɗiaba, la ne nau. U si sii suun ƙe, la kala hon dibala a dii kiaa. <sup>42</sup> U bula pila di la bul Wia wiaa a pi niaa, a dageba ari Wia liisu ne duu ɗaa ni-weyee ari ni-suunun kala sariya diire. <sup>43</sup> U wiaa ne nialin kala fa sii bul wiaa, Wia Din-zɔɗ-la dolun ƙe faa bul ɗii. Ba si nuukala si laa u wiaa dii, Wia jan jon u haacheba cheu u dolun ƙe."

*Wia jon u Din-zɔɗ-la a he nialin si bi Juu tinɗaa ɗaa ƙe*

<sup>44</sup> Piita ha sii bul wiaa ɗii ne, Wia Din-zɔɗ-la ku tuu he nialin kala fa sii jegili wialin ƙe. <sup>45-46</sup> Juu timma-la fa si laa Yesu wiaa dii a lii JoƆa a to Piita harin ko, ba nia ari baa bul wiaa yiikori-yiriba ƙe ba si bi jin a didenne Wia. U ɗaaba wu-kpunɗepere. Ba fa bi biina ari Wia jan jon u Din-zɔɗ-la a dii zile nialin ma si bi Juu tinɗaa ɗaa ƙe. Nii ne Piita bul, <sup>47</sup> "Wia si jon u Din-zɔɗ-la pila ɗii, ɗii ne u jonɔ pi niaa deenba maa. Bee ne jan wuo to niaa deenba di ba si Wii-chuoƙe liin fo?" <sup>48</sup> U ɗaa



19 Bua-la ɛ ba fa si to naasiŋ dudɔgise nialin si laa Yesu wiaa dii a tin Sitiivin wiaa, ba pise. Ba si pise nii, ba mu yi Fɔniisia ari Saapɔs tinteen ari taŋ-la ba sii yire AnȚiok, a bul Wia niin wiaa pipi Juu tinŋaa dunɔɔŋa dime. 20 Ama nialin dɔnsun si laa Yesu wiaa dii a lii Saapɔs ari Sariini sii mu AnȚiok, a bul la Tiina Yesu wiaa a pi nialin si bul Giriik wu-bulun maa. 21 Wia peba ɛ a chin ba hariŋ. Niaa yuga a laa Yesu wiaa dii a birima tutou.

22 Nialin si laa Yesu wiaa dii aa hilimi Jerusalem ɛ nii wiin deen. Ba tin Banabas duu mu AnȚiok. 23 U si mua, u na nii Wia si pe nialin ɛ. U tuon tɔre. U chagileba worun a bul di ba chin la Tiina Yesu yarida ɛ ari ba tuon kala, a si jonjo ta. 24 Banabas fa ŋaa ni-pula ne a ken yarida worun. Wia Din-zon-la ma heu ɛ worun. Niaa yuga a laa la Tiina Yesu wiaa dii a ku tutou. 25 Nii ne Banabas sii mu Taasis duu che Sool lerin. 26 U si nau, u kenu ba ko AnȚiok. Ba di nialin si laa Yesu wiaa dii, ba yie hilimi. Ba hon dime ji-pilin a dage Wia wiaa pi niaa yuge. AnȚiok ɛ ne ba suomo ken Yesu haritooro-la kaa yiyire Kirisitianba.

27 Bua-la ɛ ne nialin sii bul wiaa, Wia Din-zon-la dolun ɛ dɔnsun lii Jerusalem a ko AnȚiok. 28 Ba dɔno yirin ne Agabɔs. U sii chin a bul wiaa, Wia Din-zon-la

dolun ɛ a bul di losun jan juu dunia kala. Losu-la ku juu di Kulɔɔdiɔs ne fa ŋaa kuori-balin. 29 Nii ne Yesu haritooro-la vuure a sei di ba jan jon moribiee tin, di ba kaa mu pe ba naanbiiri-la si he Judiya ɛ, di nuu-kala tia mage nii kala u si kene. 30 Ba kaa ko. Ba jonjo tin Banabas ari Sool, di ba kaa mu pi nialin si laa Yesu wiaa dii kuhiasin Judiya ɛ.

## 12

*Ba wasa to naasiŋ dɔgise Yesu nanzɔɔba*

1 Kuoro kubala ne he dime a biben Juu tinŋaa tinteen. U yirin ne fa Herod. Bua deen ɛ u suomo to naasiŋ dudɔgise nialin dɔnsun si laa Yesu wiaa dii aa hilimi. 2 U ŋaa ba jon tokobii a kpu Jon naanbie Jeems. 3 U si na di Juu tinŋaa tuon tɔro wii-la u si ŋaa ɛ, u ŋaa ba ken Piita ma to dia. (Wiin deen ŋaa ba gbieli-bal-la ɛ ne ba si yie dii boroboro si bi si-burun kene.) 4 Ba si ken Piita, ba kenu kaa mu to dia. Dime ne ba ŋaa laali-yuoroo fi ari balidu bibenu. Banese yie benu mua, banese ma bira ku laaba ɛ. Herod fa biina di diisin kielin gbiela ne bal, ka u kenu lii pi nialin di ba dii u sariya. 5 Piita fa si he sarika ɛ nii, nialin si laa Yesu wiaa dii aa hilimi chuɔle Wia pupu ari siifesin.

*Ba liise Piita sarika ɛ*

6 Titan kubala Piita fa pin don laali-yuoro-la baliamin

sii benu pege. Ba fa ken chorumōo balia ne a kaa voo u nisaa le, ka laali-yuoroo balia ma chin sarikala boinŋinŋ a pō. U tan nii pul di Herod fa kenu kaa lii nialin tuon di ba dii u sariya. <sup>7</sup> Piita he dime nii di Wia tinŋdaara kubala ne chin dime nii. Pulumun chaane sarika-la tuon. Wia tinŋdaari-la ku peese Piita vaan pe a chisu, a bula pu duu sii lima. Chorumo-la guu lii Piita nisaa le tuu tel. <sup>8</sup> Nii ne Wia tinŋdaari-la bula pu duu paa u kiaa laale a he u nenŋenŋee. Piita ŋaa nii Wia tinŋdaari-la si bula pu. U bira bula pu duu jon u geri-boso baage a to u harin. <sup>9</sup> U to u harin a lii sarika-la tuon. U sii to Wia tinŋdaari-la harin nii, u fa ha bi jin ari wii-la Wia tinŋdaari-la sii ŋaa, ŋaa wutitii. U biina u na ari duosoo tuon ne. <sup>10</sup> Ba mu kieli laali-yuoro-la si chin sipaan a biben sarikala, a bira mu kieli laali-yuoro-la donsun ma si chin harin a ma ha biben sarikala, a mu yi hoon boro-la si to boinŋinŋ-baalŋ a jujuu tanla. Boi-la suri u titia le, ba lii. Ba lii jon wonbii kubala aa ven. Ba si mu mua, Wia tinŋdaari-la jon Piita ta. <sup>11</sup> Nii ne Piita sisele ku jin ari wii-la si ŋaau le ŋaa wutitii ne. U bul, "Mi leele jima ari Wia ne tin u tinŋdaara u ku laami ta Herod nisŋ le ari wialŋ kala Juu tinŋaa fa si biina ba ŋaami le."

<sup>12</sup> Piita si jin wiin deen le,

u mu Jon Maak naan Meeri dia. U mu dime, di niaa fa yuga a hilimee chuole Wia. <sup>13</sup> Piita ŋmoo boro. Toli-bie kubala baa yire Roda, u fa ŋaa ketii ne dia-la le. U ko duu na. <sup>14</sup> U ku nii Piita yiikoro a wuo jin di Piita ne. U tuon tore worun. U bi boi-la suro an miira fa juu bula pi niaa di Piita ne chin di-jalin. <sup>15</sup> Ba si toli-bie-la nyun tuo. Ka u-na ha bul di wutitii ne. Nii ne ba bira bul, u ni-dima ne u na. <sup>16</sup> Ka Piita ma ha chin a ŋmunmoo boro. Nii ne ba ku ken boro-la suri a nau. U ŋaaba wukpunkpere. <sup>17</sup> Nii ne Piita ken u nisŋ vigi di ba ken gon, an bula piba nii Wia si kenu kaa lii sarika-la tuon. U si di ba bul wiin deen a pi Jeems ari u naanbiiri-la ma donsun si laa Yesu wiaa dii. U si bul nii dere, u lii to lee don mu.

<sup>18</sup> Tan si pula, laali-yuoro-la si pō sarika-la bi Piita na. Ba tuobiinaa kala vugime. Ba pipiese donjo di bee ne ŋaa Piita lee? <sup>19</sup> Nii ne Herod bul di ba che kenu kaa ko. Ba cheu lol. Herod piese laali-yuoro-la duu na wii-la kala si ŋaa, an ŋaa ba kpuba. Nii ne Herod sii lii Judiya tinŋeen, a mu Sizariya a hon dime.

#### *Kuoro Herod suba*

<sup>20</sup> Bua deen le Herod fa na baanŋ worun Taya ari Saadon niaa nyun. Ba sii hilime mu di ba na Herod, ba laa sipaan a na Bilasitas, nii-la sii ben kuoro dia ne,

duu peba le. U peba le. Nii ne ba mu Herod teen a sulu duu len di ba sin. Ba tan niaa kudiilee lii kuoro tinŦteen ne. Nii ne tii baa sulu nii. <sup>21</sup> Herod he tapulii ne di ba ko. Tapulii-la si yie, Herod sii laale u kuorigennin a hon u kuori-kpasa nyun, a bul wiaa pipi nialin. <sup>22</sup> Nii ne nialin faasa ninjaa gon a bul, "U bi naga nuhuobiine nii bul wiaa deenba, Wia ne." <sup>23</sup> Ba si bul nii, Herod bi Wia zile pa. Nii ne tii Wia tinŦdaara ku tuu nmoo Herod lo lima lima u suu, nanŦchuolaa diiu.

<sup>24</sup> Ka Wia niin wiaa ha teeli lerin. Niaa yuga a nii a laa dii. <sup>25</sup> Banabas ari Sool si tinŦ tinŦimii-la dere, tinŦimii-la ba si si di ba mu tinŦ Jerusalem le, ba miira mu Antioch, a pe ken Joon Maak ma peba le mu.

## 13

*Ba liise Banabas ari Sool a tinŦba di ba mu leree donsun a bul Wia wiaa.*

<sup>1</sup> Nialin sii bul wiaa, Wia Din-zon-la dolun le ari kerichiba donsun fa he Antioch le, nialin si laa Yesu wiaa dii aa hilimi teen. Ba yirin ne Banabas, ari Simian ba sii yire ni-bine, ari Lusias si lii Sariini, ari Sool ari Maneyan. (TinŦteen kuoro Herod ne diese Maneyan.)

<sup>2</sup> Niaa deenba tinŦ tinŦinŦaa pipi Wia a vuvoo niin. Nii ne Wia Din-zon-la bula piba a bul, "Ma liise Banabas ari Sool pimi di ba tinŦ tinŦimii-la

mi si jonjo piba di ba nja." <sup>3</sup> Ba chuole Wia a voo niin, a jon ba nisaa danba le, anŦ taba.

*Banabas ari Pool he Saapos le*

<sup>4</sup> Wia Din-zon-la si tinŦba nii, ba sii mu Selusia, a lii dime a juu liin daboro, a mu tinŦtee kubala liin si gollo chu baa yire Saapos. <sup>5</sup> Ba si yi dime, ba mu Saapos tan donjo baa yire Salamis. Ba bul Wia niin wiaa juu tinŦjaa Wii-chuole diisin le dime. Ba ken Joon Maak ma pe ko duu pe tinŦ tinŦimii-la.

<sup>6</sup> Ba golle tinŦtee-la kala liin si gollo chu, a mu yi tan kubala baa yire Paafos. Dime ne ba na daalusun tiina kubala baa yire Baa-Yesu. U fa nja juu tiina ne anŦ nyia wiaa bul duu-na bul wiaa, Wia Din-zon-la dolun le ne. <sup>7</sup> U fa he ba tan kuoro dia le ne, baa yire Saajas Poolos. Kuoru-la fa nja wu-jinnu ne. U yire Banabas ari Sool u sipaan. U faa che di ba bul Wia niin wiaa pu ne. <sup>8</sup> Daalusun tiina Elimas lii ba harin aa walime di kuoru-la si Yesu wialaa laa dii. (Giriik le ba ken Baa-Yesu yiyire Elimas ne.) <sup>9</sup> Nii ne Wia Din-zon-la ku he Sool le. (Ba fa kenu kaa yiyire Pool ma ne.) U chaare siaa pe daalusun tiina-la le <sup>10</sup> a bula pu, "N-na Sitaani bie deen, n nja ku-zon kala dinjon ne. N nja zenbe tiina maa a nja wu-bonjon kinken. Wia wonbii-tiiba-la n kaa golibi ne. <sup>11</sup> Bee na, Wia jan ku tuun

le, η jan nyulime, a mage magina kubala η bi jan na pulumuη.” U si bul ηii, kuη guu tƆ u siaa, u bira bi na. U gollo chiche nuu duu keη u daaη le. <sup>12</sup> Kuoru-la si na wii-la si ηaa, u laa Yesu wiaa dii. Wialin u si gunna a tige la Tiina Yesu le ηaau wu-kpuηkpere.

*Banabas ari PƆol he AnȚioκ le, Pisiidia tinȚeen le*

<sup>13</sup> PƆol ari u nanȚoηsuη sii juu liin daboro a lii PaafƆs, a kiele mu taη kubala baa yire Pεega a he Panȡilia tinȚeen le. JƆoη Maak taba dime aη miira mu Jerusalem. <sup>14</sup> Ba ma sii dime a mu AnȚioκ, Pisiidia tinȚeen le. Che-wiesii-la cheη, ba mu juu Wii-chuoε dia a hƆη. <sup>15</sup> Ba si hƆη ηii, nuu karime wialin Moosis fa si ηmuηsa bil di niaa tuto, ari Wia tenni-la nialin sii bul wiaa, Wia Diη-zoη-la doluη le fa si ηmuηsa. Ba si karima dεε, Wii-chuoε dia-la kuhi-asin tin di ba bula piba a bul, “Mi naaηbiirin, di ma ne keη wii si jan wuo pe niaa deenba le di ba nyuη nyaase, ma bul.”

<sup>16</sup> Nii ne PƆol sii chin a keη u nisin vigi di ba keη goη, aη suomo bubul, “Mi naaηbiirin Iziral timma ari ma nialin si bi Juu tinȚaa ηaa a he daha a fifa Wia, ma jegile nii mi teenj. <sup>17</sup> Wiala ma Iziral tinȚaa deenba sii to, u ne tuoε la naa-balimaba a ηaa ba puη a yuge, bua-la le ba fa si ηaa nuhuoηaa Ijipiti tinȚeen le.

U doluη le ne u keηba kaa lii Ijipiti le. <sup>18</sup> U beηba ari kenyiri jisin mahin balia giri-bine tuoη. <sup>19</sup> U leηe ba yuo ta-geηtisin balipe Keenaη tinȚeen le a laa tinȚee-la a dii. Ba hƆη dime jisin zo-banese ari mahin balia ari fii. <sup>20</sup> Ba si hƆη lee-la, Wia liise ba tuoη nihian duu biben ba tinȚeen. Ba venεε ηaa ηii ne, ka Samuel-na ko. U fa ηaa nialin sii bul wiaa, Wia Diη-zoη-la doluη le doηo ne. <sup>21</sup> Nii ne ba sul Wia duu piba kuoro. Wia sei a liise Sool piba. Sool fa ηaa Kis bie ne a lii Benjamin doho niaa tuoη. U dii kuoruη jisin mahin balia. <sup>22</sup> Nii ne Wia kiru kuoruη le aη ηaa Devit dii kuoruη. U bul wiaa a tige Devit le a bul, ‘Jesi bie Devit ne ηaa mi tuoηru nia. U jan ηaa wii-kala mi sii che duu ηaa.’ <sup>23</sup> Devit doho niaa tuoη ne Yesu lii. Wia ηaa u ku ηaa Iziral niaa Laataara, ari u fa si bul ηii. <sup>24</sup> Ka di Yesu-na ko, JƆoη bul Wia wiaa pi Iziral tinȚaa kala, a bul di ba birima lii ba haache le aη fo Wii-chuoε liin. <sup>25</sup> JƆoη tinȚinȚaa si kpage dεrin, u piεe niaa, ‘Kubeε ne ma biine di mi ηaa? Mi dee ni-la ma sii gberu duu ko. U jan ko mi harin. Nii-la-na mi paala bi maga di mi keη u nenȚenȚee ηmenin a puri!’

<sup>26</sup> Mi naaηbiirin Abiraham doho niaa ari ma nialin si bi Juu tinȚaa ηaa a he daha a fifa Wia, la wiaa ne ba tin

di ba bul wialin deenba si jan wuo laala ta. <sup>27</sup> Yesu si ko, nialin si he Jerusalem le ari ba kuhiasin fa bi jin ari u ne n̄aa la Laataara. Ba ma bi nialin fa sii bul wiaa, Wia DiȚ-zȚȚ-la dolun le wu-bulii-la bubuȚȚ jin, wialin ba si yie karime che-wiesii-la cheȚȚ kala. Ama ba ha len nialin sii bul wiaa, Wia DiȚ-zȚȚ-la dolun le niin wialin ku n̄aa wutitii, a kpu Yesu. <sup>28</sup> Ba paala bi wii-kala na u si n̄aa chei a mage di ba kpuu, ka ba sul Paalit duu len di ba kpuu. <sup>29</sup> Ba si n̄aa wialin kala d̄ere ba si laa sipaan ĩmunȚȚ Wia tenin tuȚȚ a mu tige Yesu le, ba soru daa-geȚȚȚ nyun a jonu hugi. <sup>30</sup> Ama Wia chisu suun le. <sup>31</sup> U si sii suun le, u keȚȚ u titia ku dage ba di nialin fa si lii Galilii a mu Jerusalem. Ba nau yuge. Ba ne lele saa bul u wiaa pipi Iziral tinȚȚaa. <sup>32</sup> La ma saa ko di la bul Wia wu-zȚȚȚ-la pima. Wii-la Wia fa si bula pi la naabalimaba duu jan n̄aa, <sup>33</sup> lele u n̄aa pila, la nialin si n̄aa ba doho n̄aa. Wia chise Yesu suun le u keȚȚ miisin. Ba fa ĩmunȚȚ n̄ii ne Wia tenin seme dȚȚȚ le ba sii yire Saams. Ba ĩmunȚȚ a tige Yesu le a bul,

‘N̄ n̄aa mi Bii ne.

    Mi ne lulun jinin.’

<sup>34</sup> Ba ĩmunȚȚ Wia tenin seme dȚȚȚ ma a tigeu le ari Wia si,

‘Mi jan sene tou le a pema le worun

ari mi fa si bul n̄ii a pi Devit.’

U bul n̄ii ne an chise Yesu suun le, duu bira bi jan suu a pua. <sup>35</sup> Wia tenin baa yire Saams seme dȚȚȚ maa ba bira ĩmunȚȚ,

‘N̄ bi jan len di ĩ TuȚ-pul Tiina suu a pua.’

<sup>36</sup> Devit fa n̄aa wialin Wia sii che duu n̄aa. U n̄aa n̄ii u miisin le an suu. Ba jonu hugi u naabalima seme, u pua.

<sup>37</sup> Ama nii-la Wia si chise suun le, u-na bi pua. <sup>38</sup> Mi naanbiirin, u maga di ma kala jin worun di baala deen wiaa ne n̄aa la wuo bubul di Wia jan jon ma haacheba chema. <sup>39</sup> Nuu-kala si laa u wiaa dii, u laa u haacheba kala ta ne, haacheba-la kala wialin Moosis fa si ĩmunȚȚ bil di n̄aa tuto fa si bi wuo laa ta. <sup>40</sup> Má fiele ma siaa di wialin nialin sii bul, Wia DiȚ-zȚȚ-la dolun le, si ma le n̄aa. Ba si,

<sup>41</sup> ‘Ma nialin sii mȚȚȚ Wia, má bee na tinȚimii-la mi si jan tin ma miisin tapulun le.

Di nuu ne bula pima, ma bi jan laa dii duu sene n̄aa wutitii.

U jan n̄aama wu-kpun̄kper̄e a len di ma suu.’ ”

<sup>42</sup> PȚȚȚ ari Banabas si bul wiaa deenba kala d̄ere, ba sii lii Wii-chuȚȚe dia le. Ba sii mu, nialin sulba di ba miira ko harin che-wiesii-la cheȚȚ, a bira bul wiaa deenba piba.

<sup>43</sup> N̄ii ne nialin kala lii Wii-chuȚȚe dia le. Juu tinȚȚaa ari nialin si bi Juu tinȚȚaa n̄aa an

tuto Juu tinȚaa, ba yuga a to PƆol ari Banabas hariȚ. PƆol ari Banabas bul wiaa piba a susulba di ba chinȚ Wia wu-zomƆ-la le a sí jonȚ ta.

<sup>44</sup> HariȚ che-wiesii-la si yie, niaa jesinȚ kala si he taȚ-la le ne mu Wii-chuoƆe dia di ba jegile nii Wia niinȚ wiaa.

<sup>45</sup> Juu tinȚaa fa si na ni-danȚ-la si hilime nii, ba didii hadorunȚ. Ba jujuu PƆol le ari wialinȚ u sii bul a tutuusuu.

<sup>46</sup> Ka PƆol ari Banabas bul wiaa ari nyu-duonȚ a bul, "U fa maga di la laa sipaanȚ bul Wia niinȚ wiaa pi ma Juu tinȚaa ne, ka ma viaba ta anȚ bibiine ma bi maga di ma kenȚ miisi-la si bi derɛ. La janȚ lenȚma anȚ mu nialinȚ si bi Juu tinȚaa Țaa teenȚ. <sup>47</sup> Wia ne bula pila di la Țaa nii. U bul wiinȚ deenȚ Wia teninȚ seme dorȚo. U si,

'Mi ne liisinȚ di Ț Țaa nialinȚ si bi Juu tinȚaa Țaa pulumunȚ.

NȚ janȚ bul Wia niinȚ wiaa dunia seme-na kala, di Wia laa nialaa ta.' "

<sup>48</sup> NialinȚ si bi Juu tinȚaa Țaa si nii wiinȚ deenȚ, ba tuonȚ kala torɛ, ba bul di Wia niinȚ wiaa sima kinȚkenȚ. NialinȚ Wia si liisa di ba kenȚ miisi-la si bi derɛ, ba laa wialinȚ dii.

<sup>49</sup> La Tiina Yesu niinȚ wiaa teeli lee-la kala. <sup>50</sup> Ama Juu tinȚaa nyise taȚ-la nihiasinȚ ari haala-la si Țaa ni-balaa a fifá Wia a he. Ba di Juu tinȚaa suomo to naasinȚ dudogise PƆol ari Banabas, a Țaa ba lii ba tinȚteenȚ le. <sup>51</sup> PƆol ari Banabas kpesi ba

nenȚenȚee hagila heba le, a dageba nii di ba wii dee, anȚ lii mu Ikooniam. <sup>52</sup> Ka nialinȚ si laa Yesu wiaa dii AnȚiok le, ba tuonȚ kala torɛ. Wia DinȚ-zonȚ-la ma heba le worunȚ.

## 14

*Banabas ari PƆol mu Ikooniam*

<sup>1</sup> PƆol ari Banabas si he Ikooniam le, ba juu Juu tinȚaa Wii-chuoƆe dia a bul Wia wiaa. Ba si chaasa bul Wia wiaa nii, ni-danȚ ku laa Yesu wiaa dii, Juu tinȚaa ari Giriik tinȚaa kala. <sup>2</sup> Ama

Juu tinȚaa si bi Yesu wiaa laa dii, ba nyise nialinȚ si bi Juu tinȚaa Țaa he. Ba tuobiinaa bira bi nialinȚ si laa Yesu wiaa dii teenȚ mua.

<sup>3</sup> PƆol ari Banabas honȚ lee-la a dieni. Ba bul la Tiina Yesu wiaa ari nyu-duonȚ. U ma peba le a piba dolunȚ ba ȚinȚaa wu-magilaa ari wu-kpunȚkperisinȚ. Niaa ku jinȚ ari la Tiina Yesu zile wiaa ne ba seneɛ bul. <sup>4</sup> NialinȚ fa

si he taȚ-la le kenȚ ba titia kpaa balia. DorȚsunȚ tuto Juu tinȚaa, dorȚsunȚ ma tuto Yesu nanzƆƆba-la. <sup>5</sup> Nii ne nialinȚ si bi Juu tinȚaa Țaa ari Juu tinȚaa ari ba kuhiasinȚ wi-

walime di ba dogise PƆol ari Banabas aa che di ba paa tabiaa yiyageba. <sup>6</sup> Ba ku jinȚ a sii fá mu Lisita, a lii dime a mu Deebi. Ba kala Țaa ta-biisinȚ ne Lakoonia tinȚteenȚ le. Ba ma mu ta-biisi-la si

golli Lakoonia tinȚteenȚ chu. <sup>7</sup> Dime kala ne ba bul Yesu wu-zomƆ-la wiaa.



*Banabas ari PƆol mu Lisita ari Dɛɛbi.*

<sup>8</sup> Ba fa si mu Lisita nii di baal kubala gberike hɔŋ dime. Ba lulu duu gberike nɛ. U ha bi venɛ na. <sup>9</sup> U hɔnɔ jegile nii PƆol fa sii bul wialin. PƆol chaare siaa benu, a na duu laa dii ari Yesu jan wuo a vaaru. <sup>10</sup> U faasa bula pu, "Sii chin ɛ naasin nyun." U pura sii chin u naasin nyun aa ven. <sup>11</sup> Nialin fa si hilime a na wiila PƆol fa si ɲaa, ba suomo kpikpia gon aa bul ari ba yiikoro ɛ a bul, "Vesin nɛ birime nuhuobiine ku tuu la tuɔŋ." <sup>12</sup> Nii nɛ ba ken Banabas yiyire Zuus. Zuus nɛ fa ɲaa ba ven-hian. PƆol nɛ fa nii-la sii bul wiaa, nii nɛ tii ba yiru Hɛemis maa, ba ven-hian nanzɔɔ yirin nɛ nii. <sup>13</sup> Ba vene Zuus dia ba fa si juu kpikpaare, fa chin ba tan sipaan. Vene tiina ken nɛ-bellin ari tiifilaa ba si kaa guori kaa kɔ dia-la boininiin. Ba di nialin fa si hilime ka che di ba kpaare Yesu nanzɔɔba-la nɛ. <sup>14</sup> Banabas ari PƆol si nii wiila ba sii che ba ɲaa, ba ken ba gennin kiesɛ, a dageba nii ari ba bi seye, an fa juu nialin tuɔŋ a faasa bul, <sup>15</sup> "La nanɔŋsun, bɛɛ nɛ tii maa ɲaa ɲla? La ma ɲaa nuhuobiinee nɛ. La kɔ di la bul la Tiina Yesu wu-zomɔ-la nɛ pima, di ma wuo len ma vuutoonu-la an birima to Wia-la si weye. U nɛ ɲaa wia nyun, ari tinteen, mugi-balaa ari fuonun, ari kun-kala si he dunia ɛ. <sup>16</sup> Bunɓun Wia

lenɛ la naabalimaba tuto ba titia wonɓiin nɛ. <sup>17</sup> U fa ɲaa wu-zɔŋɔɔ pipi niaa, a didageba nii ari u he dime. U ɲaa duonun ninii a ɲaa бага kiaa wiwase, ma didii kiaa a vuvoge a kala ken tuɔɔrun." <sup>18</sup> Banabas ari PƆol bul wiaa deenba kala nɛ, ka nialin ha bi seye an chiche di ba kpaareba. Ba na heen nɛ, ka nialin-na len.

<sup>19</sup> Di Juu tinɲaa dɔŋsun lii Antioɔk, Pisiidia tinteen ɛ, a ma kɔ. Dɔŋsun ma lii Ikooniam a kɔ. Ba ku kɛɛ nialin pɛ ba titia ɛ a yage PƆol ari tabiaa, a kɛnu lere lii ba tan tuɔŋ. Ba biina u fa suba nɛ. <sup>20</sup> Yesu haritoorola mu a gollu. Nii nɛ u sii a miira juu tan tuɔŋ. U tan si pula, ba di Banabas sii mu Dɛɛbi.

*Ba miira lii Siiria a mu Antioɔk*

<sup>21</sup> PƆol ari Banabas bul Yesu wu-zomɔ-la wiaa lee-la ma ɛ. Ba si bul nii, niaa yuga a laa Yesu wialin dii a tuto ba harin. Nii nɛ ba miira mu Lisita, a sii dime a mu Ikooniam, a bira sii dime a miira mu Antioɔk Pisiidia tinteen ɛ. <sup>22</sup> Leree deenba kala ba yie bul wiaa pi nialin si laa Yesu wiaa dii di ba wasa ken yarida aa ɲaa di ba nyun nyaase di ba chin ba yarida ɛ, a si joŋo ta. Ba ma bula piba di nialin si laa Yesu wialin dii, di ba jan na heen kinken, ka di ba-na juu Wia kuorii-la tuɔŋ. <sup>23</sup> Lee-na kala nialin si laa Yesu wialin dii aa hilimi, ba ma liise niaa ba tuɔŋ di ba ɲaa ba kuhiasin.

Ba ne ŋaa ŋii, ba yie chuole Wia piba aa voo niinj, aŋ joŋba he la Tiina Yesu nisinj le. U-na la Tiina Yesu wiaa ne ba laa dii.

<sup>24</sup> Nii ne ba golle Pisiidia tiŋteenj kala dere aŋ lii mu Paŋfiilia tiŋteenj. <sup>25</sup> Dime ba bul Wia niinj wiaa taŋ kubala baa yire Peega, a bira lii dime a mu taŋ kubala baa yire Atalia. <sup>26</sup> Ba lii dime a juu liinj daboro, a bira miira mu Anŋiok. Dime ne ba fa joŋba he Wia nisinj ari u lahori mo le di ba wuo tiŋ ba tiŋtiŋŋaa. Lele ba tiŋ tiŋtimii-la dere. <sup>27</sup> Ba si miira ku yi Anŋiok, ba yire nialinj kala si laa Yesu wiaa dii aa hilimi, a bula piba wuzomola kala Wia si toba le a ŋaa, a dageba nii Wia si wuo suri wonbiinj a pi nialinj si bi juu tiŋŋaa ŋaa, ba ma wuo laa Yesu wiaa dii. <sup>28</sup> Ba hoŋ dime, ba di nialinj si laa Yesu wiaa dii teenj, a dieni.

## 15

*Yesu nanzoŋba ari nialinj si laa Yesu wiaa dii kuhiasinj hilime Jerusalem le*

<sup>1</sup> Baalaa doŋsunj ma lii Judiya a ko Anŋiok, a suomo didage ba naanbiiri-la si laa Yesu wiaa dii a bul, "Wia bi jaŋ wuo laama ta, see ma keri ma penee, ari Moosis fa si bil niinj pima nii." <sup>2</sup> Nii ne Pool ari Banabas keŋ niidolunj woruŋ. Ba di nialinj si lii Judiya keŋ wii-la lile. Ba vuure di Pool ari Banabas ari nialinj doŋsunj si lii Anŋiok, di ba mu Jerusalem a na Yesu

nanzoŋba-la ari nialinj si laa Yesu wiaa dii aa hilimi kuhiasinj dime, a mu tige wiinj deenj le. <sup>3</sup> Nialinj si laa Yesu wiaa dii aa hilimi keŋba lii he weniŋ le. Ba sii mu nii, ba to Foniisia ari Samaria tiŋteenj a bula pi nialinj si laa Yesu wiaa dii dime nii nialinj si bi juu tiŋŋaa ŋaa si birima tuto Wia. Ba si bul wuzomunj deenj nii, nialinj tuoŋ tore kinkeŋ. <sup>4</sup> Ba si mu yi Jerusalem, Yesu nanzoŋba-la ari nialinj kala si laa Yesu wiaa dii aa hilimi ari ba kuhiasinj, ba keŋba woruŋ. Ba bula piba wialinj kala Wia si ŋaaba le. <sup>5</sup> Ama nialinj doŋsunj ma si laa Yesu wiaa dii aa to nialinj ba sii yire Farisii tiŋŋaa, ba sii chinj a bula piba a bul, "U maga di ba keri ba penee aŋ tuto wialinj Moosis fa si bile di maa to."

<sup>6</sup> Yesu nanzoŋba-la ari nialinj si laa Yesu wiaa dii kuhiasinj bira hilimi di ba bira biine wiinj deenj wiaa. <sup>7</sup> Ba hono keŋ wii-la a lere dieni. Nii ne Piita sii chinj aŋ bul, "Mi naanbiirinj, ma jima ari faafaa kala ne Wia liisemi ma tuoŋ di mi bul Wia wuzomola wiaa a pi nialinj si bi juu tiŋŋaa ŋaa, di ba ma wuo laa Yesu wiaa dii. <sup>8</sup> Mi mu bula piba. Wia joŋ u Diŋ-zoŋ-la heba le ari u fa si joŋo hela le nii, a dage nii ari u maga di ba ma laa Yesu wiaa dii. U saa jin nuukala tuoŋ. <sup>9</sup> U bi nialinj si ŋaa juu tiŋŋaa ari nialinj si bi juu tiŋŋaa ŋaa kaa pore. Nialinj

si bi J̄uu tinŦaa ŋaa ma laa Yesu wiaa dii, ŋii ne tii u jon̄ ba ma haacheba cheba.

<sup>10</sup> BEE ne tii ma jon̄ chugibalin̄ aa chun̄ nialin̄ si bi J̄uu tinŦaa ŋaa an̄ laa Yesu wiaa dii, aa magise Wia ŋii? La di la naabalimaba kala, la fa bi chuga deen̄ wuo chun̄.

<sup>11</sup> La laa dii ari la Tiina Yesu dun̄dun̄a lah̄orim̄o le ne Wia jan̄ laala kala ta ari u si laaba ta ŋii."

<sup>12</sup> Piita si bul wii-la dere, nialin̄ kala fa si hilime ŋaa fuii, a jegile nii Banabas ari P̄ool teen̄. Ba bul wu-magilala ari wu-kpun̄kperisi-la Wia si toba le ŋaa nialin̄ si bi J̄uu tinŦaa ŋaa le. <sup>13</sup> Ba si bul wialin̄ dere, Jeems ma bul, "Mi naan̄biirin̄, má jegile nii mi teen̄. <sup>14</sup> Saam̄on̄ Piita bula pima Wia si laa sipaan̄ cho nialin̄ si bi J̄uu tinŦaa ŋaa ŋii, a tūose niaa ba tūon̄ di ba ŋaa u niaa. <sup>15</sup> Nialin̄ sii bul wiaa, Wia Din̄-zon̄-la dolun̄ le ma fa bul wiin̄ deen̄ Wia tenin̄ tūon̄. Ba si, Wia bula a bul,

<sup>16</sup> 'Mi jan̄ miira k̄o a chuule Devit dia-la si tele.

Mi jan̄ wasa taase jekieri-la duu chin̄ worun̄.

<sup>17</sup> Mi jan̄ ŋaa ŋii di dunia niaa ni-kaanaa ma ku che Wia a tou.

Nialin̄ mi si tūosa nialin̄ si bi J̄uu tinŦaa ŋaa tūon̄ di ba ŋaa mi niaa,

ba ma jan̄ ku chemi a tomi.'

<sup>18</sup> Wia bul ŋii faafaa kala ne di niaa jin̄." <sup>19</sup> ŋii ne Jeems

bul, "Mi biina u bi maga di la walime nialin̄ si bi J̄uu tinŦaa ŋaa an̄ birima tuto Wia. <sup>20</sup> Ama má len̄ di la ŋmun̄se tenin̄ piba a bula piba di ba bira sí vuin̄ kaa tin̄ a birisi ba titia, di ba len̄ ba-ch̄orun̄ ari ha-ch̄orun̄ wu-ŋaalaa, a sí pusun̄ si suu pimee dii, a sí pusun̄ chalin̄ ma dii. <sup>21</sup> BEE wiaa ba yie dage wialin̄ Moosis fa si bile di la tuto ta-biisi-la kala le ne. Ba ŋaa ŋii faafaa kala ne a kaa k̄o jin̄in̄. Ba ma yie karime wialin̄ Wii-chuole diisin̄ le che-wiesii-la-na kala cheen̄."

*Ba ŋmun̄se tenin̄ pi nialin̄ si bi J̄uu tinŦaa ŋaa an̄ laa Yesu wiaa dii.*

<sup>22</sup> Yesu nan̄z̄ooba-la ari kuhiasi-la ari nialin̄ si laa Yesu wiaa dii aa hilimi, ba vuure a liise ba tūon̄ niaa, a tin̄ba di ba di P̄ool ari Banabas mu An̄tiok. Ba liise Judas ba sii yire Basabas ari Saalas. Niaa deen̄ba balia ne fa ŋaa ba tūon̄ sipaa-laaraa. <sup>23</sup> Ba jon̄ tenin̄ piba a tin̄ba. Ten̄-la le ba fa ŋmun̄se ŋla ne, "La nialin̄ si laa Yesu wiaa dii a ma ŋaa Yesu nan̄z̄ooba, ari nialin̄ si ŋaa kuhiasin̄ la tūon̄, laa chuolema, ma nialin̄ si laa Yesu wiaa dii an̄ bi J̄uu tinŦaa ŋaa a he An̄tiok ari Siiria ari Siliisia le. <sup>24</sup> La nia ari la niaa d̄on̄sun̄ k̄o ma teen̄ a walimema, a ken̄ ma tūobiinaa vugime. La bi bula piba di ba ŋaa ŋii. <sup>25</sup> ŋii wiaa la hilime ne a vuure. U z̄om̄o pila di la liise niaa

a tinȚba ma teenȚ, di ba di la nanȚoȚsunȚ Banabas ari PȚol ne janȚ ko. <sup>26</sup> Niaa deenȚba jonȚ ba miisinȚ a yȚȚ suunȚ ba fa sȚi tinȚ la Tiina Yesu Kirisito tinȚinȚaa. <sup>27</sup> La saa tinȚ Judas ari Saalas. Ba ma janȚ bula pima wialinȚ titia la si ņmuȚsa pima. <sup>28</sup> Wia DiȚ-zȚȚ-la ari la kala keȚ nii-bala ari la bi janȚ jonȚ chugi-yunȚi kala chunȚma. Ama u maga di ma to kisinninȚ deenȚba la sȚi dagema ne. Ba ne ņla: <sup>29</sup> Ma sȚi vuinȚ namia chanȚ, ma sȚi kunȚ-kala chalinȚ dii, ma sȚi puna-la kala si suu pimee chanȚ, a sȚi ba-chȚoruȚ ari ha-chȚoruȚ wu-ņaalaa ņȚaa. Di ma ne wuo liise ma titia wiaa deenȚba le, ma he dolunȚ. Ma janȚ hoȚ worunȚ."

<sup>30</sup> Nii ne ba ta nialinȚ ba si liisa. Ba sii mu AnȚioȚk. Ba si mu dimeȚ, ba yire nialinȚ kala si laa Yesu wiaa dii aa hilimi, a jonȚ teȚ-la piba. <sup>31</sup> Ba si karime teȚ-la, wialinȚ ba si ņmuȚsa ņaa ba keȚ tuȚȚoruȚ. Ba nyunȚ kala nyaase. <sup>32</sup> Judas ari Saalas fa ņaa nialinȚ sȚi bul wiaa, Wia DiȚ-zȚȚ-la dolunȚ le ne. Ba bul wiaa yuge piba kinȚkenȚ. Ba si ņaa ņii, ba nyunȚ nyaase, ba wasa chinȚ ba yarida le. <sup>33</sup> NialinȚ dieni mua AnȚioȚk le. Nii ne nialinȚ si laa Yesu wiaa dii AnȚioȚk le taba ari yarifielaa, ba miira mu nialinȚ si tinȚba teenȚ. [<sup>34</sup> Ama u ņaa wu-zȚȚ ne a pi Saalas duu dieni AnȚioȚk le.] <sup>35</sup> PȚol ari Banabas ma ka AnȚioȚk le. Niaa doȚsunȚ yuga a peba le a bul la Tiina

Yesu niinȚ wiaa a pi niaa.

*PȚol ari Banabas pore doȚȚ le.*

<sup>36</sup> U ņii harinȚ ne PȚol bula pi Banabas a bul, "LeȚ la miira mu, a na nialinȚ si laa Yesu wiaa dii tanȚ kala le la si bul la Tiina Yesu niinȚ wiaa, a na ba sȚi ņaa ņii." <sup>37</sup> Banabas faa che duu keȚ JoȚȚ ba sȚi yire Maak kaa pe mu. <sup>38</sup> Nii ne PȚol biine duu wonȚbiinȚ dee di ba kenu pe ba titia le, beȚ wiaa u via duu peba le a tinȚ tinȚinȚaa PanȚfilia le, lee-la ba fa si laa sipaanȚ mu di ba tinȚ, ka u miire. <sup>39</sup> Ba faasa keȚ wiinȚ deenȚ kaa lere kinȚkenȚ, ba pore doȚȚ le. Nii ne Banabas keȚ JoȚȚ Maak. Ba juu liinȚ daboro a duoro mu SaapȚos. <sup>40</sup> Ka PȚol ma liise Saalas. NialinȚ si laa Yesu wiaa dii jonȚba he Wia nisinȚ le duu bibenȚba. <sup>41</sup> Nii ne ba sii mumu a mu yi Siiria ari Siliisia tinȚteenȚ. Ba wasa bul wiaa pi nialinȚ si laa Yesu wiaa dii aa hilimi dimeȚ, di ba wasa chinȚ ba yarida le.

## 16

*Timoti to PȚol ari Saalas harinȚ*

<sup>1</sup> Nii ne PȚol sii mu Deebi, a lii dimeȚ a mu Lisita. U mu dimeȚ ņii di Yesu haritooroo kubala he dimeȚ, baa yire Timoti. U naanȚ fa ņaa Juu tiina ne a ma fa laa Yesu wiaa dii, anȚ ka u nyimma fa ņaa Giriik tiina. <sup>2</sup> NialinȚ si laa Yesu wiaa dii Lisita ari Ikooniam kala le bibese baalla le. <sup>3</sup> PȚol faa che di Timoti to u harinȚ. A tinȚ Juu tinȚaa

si he lere-la le wiaa Pŋol kenu keru u penin, be wiaa ba kala jima ari u nyimma ŋaa Giriik tiina ne. <sup>4</sup> Ba sii mu tasi-la nii, ba bul wiaa a pi nialin si laa Yesu wiaa dii dime. Ba bula piba wialin Yesu nanzŋŋba-la ari nialin si laa Yesu wiaa dii kuhiasin Jerusalem le si bile piba di ba tuto. <sup>5</sup> Nii ne nialin si laa Yesu wiaa dii aa hilimi wasa ken yarida. Ba ku punaa pe tapulii kala.

*Pŋol na wiaa ari duosoo tuŋ Turŋwas le*

<sup>6</sup> Pŋol ari Saalas gŋlle nii halii a to Firijia ari Galisia tinteen, be wiaa Wia Din-zŋ-la biba wonbiin pa di ba bul Wia niin wiaa Esia tinteen le. <sup>7</sup> Ka ba jŋ ba wonbiin a mu yi Maasiya. Dime ne ba walime di ba juu Bitinia tinteen, ama Yesu Din-zŋ-la biba wonbiin pa. <sup>8</sup> Nii ne ba to Maasiya tinteen a mu yi Turŋwas. <sup>9</sup> Dime, titanin Pŋol na ari duosoo tuŋ di baal kubala a lii Masidoonia, duu china aa sulu duu ko Masidoonia tinteen a peba le. <sup>10</sup> Pŋol si na nii dere, la duu ŋaa siri di la mu Masidoonia, be wiaa la jima ari Wia sene dagela di la mu bul Wia wu-zŋŋ-la a pi nialin si he lee-la ne.

*Haal kubala baa yire Lidia laa Yesu wiaa dii Filipa le.*

<sup>11</sup> Ba bira sii dime a sii juu liin daboro, a duoro chol tegi tegi a mu Saamŋtas. U taŋ si pula la bira sii a mu

Niyapolis. <sup>12</sup> La bira lii dime a vene mu Filipa. U fa ŋaa ta-bal ne Masidoonia sene dŋŋ a tuto Rom. La hŋ taŋ-la le tapulaa banmene. <sup>13</sup> Che-wiesii-la cheŋ si yie, la lii taŋ-la tuŋ a mu fuŋ niin. La fa biina la jaŋ na Wia di-chuŋŋ dime. La si mu dime, la tuu hŋ a bul wiaa pipi haala-la fa si hilime dime di ba chuŋŋ Wia. <sup>14</sup> Haala-la si jegile nii la wialin, ba tuŋ haal kubala ne fa he dime, baa yire Lidia. U fa lii Taataya tinteen ne. U fa biri gennin ne a yiyalle. U faa chuŋŋ Wia ne. U si jegile nii wialin Pŋol fa sii bul, Wia pulle u tuŋ, u laa wialin dii. <sup>15</sup> Ba fo ba di u dia niaa Wii-chuŋŋ liin. Nii ne haal-la sulla a bul, "Di ma ne biina di mi sene laa Yesu wiaa dii ne, ma ku juu chua mi dia le." U si sulla dieni nii, la mu chua.

*Ba ken Pŋol ari Saalas to dia Filipa le*

<sup>16</sup> Che kubala la bira mu Wia di-chuŋŋ. Yomo toli-bie ku chenla. Jima ne kenu, u vuga pipi niaa. U vuga na moribiee yuge a pi nialin si tiu. <sup>17</sup> U to la di Pŋol harin a yie faasaa bul, "Niaa deenba tin tinŋŋaa a pi Wii-balin si yuga a kii kun-kun-kala. Ba bulaa pima nii ma si jaŋ ŋaa di Wia laama ta." <sup>18</sup> U yie ŋaa nii tapulii kala. Nii ne Pŋol baaniin sii. U miira birima chaase tolo-la, aŋ bula pi jima-la a bul, "Yesu Kirisito dolun le mi si,

ŋŋ lii aŋ leŋ tolo-la." Jima-la guu lii tolo-la ɛ.

<sup>19</sup> Tolo-la tinŋaa si na ari ba bira bi moribie-la ka na, ba keŋ Pŋol ari Saalas a lere mu ba taŋ kuhiasinŋ teenŋ ba si yie hihilimi lee-la. <sup>20</sup> Ba keŋba kaa mu ba Rom kuhiasinŋ teenŋ, a bula piba a bul, "Niaa deenba ŋaa Juu tinŋaa ne aŋ wiwalime niaa la taŋ tuŋ. <sup>21</sup> Baa dagela di laa ŋaa wialaa la Rom tinŋaa sii kisu." <sup>22</sup> Ni-dan-la kala fa si hilime, ba sii pe ba nihiasi-la ɛ a keŋ Pŋol ari Saalas. Nii ne Rom tinŋaa kuhiasinŋ keŋ ba genninŋ wuri aŋ bul di ba viireba. <sup>23</sup> Ba faasa viireba aŋ keŋba to dia, aŋ bula pi sarika bibenni-la duu toba woruŋ di ba si wuo lii. <sup>24</sup> U nii ba niinŋ a keŋ Pŋol ari Saalas a kaa kiele juu sipaanŋ dia tuŋ, a keŋ ba naasinŋ baliaminŋ kala he kuruŋ.

<sup>25</sup> Ari tita-siesee Pŋol ari Saalas chuchuɔɛ Wia a yii yiilaa a didenne Wia. Nialinŋ ba si kaa to dia ku-kaanaa ma jiejgili aa nii. <sup>26</sup> Nii ne tinŋeenŋ guu zigili a keŋ sarika dia-la ma kala kaa zigili. Borusuŋ kala guu suri. Nuu-kala kuruŋ ma lii tel. <sup>27</sup> Sarika bibenni-la hirike sii donŋ ɛ a na di sarika-la borusuŋ kala suro. U biina nialinŋ kala ba si kaa to dia, ba lii fa viiri ne. U liise u tokobii duu kpu u titia. <sup>28</sup> Nii ne Pŋol faasa kpia a bula pu a bul, "Si ŋ titia kpu. La kala ne he daha." <sup>29</sup> Sarika bibenni-la ŋaa ba keŋ chaaninŋ kaa ko. U laa

fa juu, a tuu tel Pŋol ari Saalas naasinŋ ɛ a chichel. <sup>30</sup> U keŋba kaa lii a pieseba a bul, "Mi nanŋdonŋsuŋ, ɛɛ ne mi jaŋ ŋaa di Wia laami ta?" <sup>31</sup> Nii ne ba bula pu a bul, "Laa la Tiina Yesu wiaa dii, di Wia laa ma ari ŋ dia niaa kala ta." <sup>32</sup> Nii ne ba bul la Tiina Yesu niinŋ wiaa pi ba di u dia niaa kala. <sup>33</sup> Titan-la titia ne sarika bibenni-la keŋba a chese ba yaraa naawiilaa, ka ba fo ba di u dia niaa kala Wii-chuɔɛ liinŋ. <sup>34</sup> Sarika bibenni-la keŋ Pŋol ari Saalas a kaa mu u dia, a piba kudiilee ba dii. Ba di u dia niaa kala ŋaa tuŋtoru ari ba si laa Wia wiaa dii.

<sup>35</sup> Taŋ si pula, Rom nihiasinŋ tinŋ di ba mu bula pi porisiba kuhiasinŋ di ba bula pi sarika bibenni-la duu liise Pŋol ari Saalas. <sup>36</sup> Nii ne sarika bibenni-la bula pi Pŋol di Rom nihiasi-la tima di ba bula pu duu liise ba di Saalas. Nii wiaa ba jaŋ wuo mu ari yarifielaa. <sup>37</sup> Nii ne Pŋol bula pi porisi kuhiasila a bul, "Ba viirela niaa tuŋ, aŋ bi la sariya die a dagela wu-cheyinŋ, aŋ ka la ma ŋaa Rom tinŋaa. Nii ne ba keŋla to dia. Ka leele baa che di la luora viiri. Ai, la bi sei. U maga di Rom nihiasi-la titia ko daha ne a ku liise." <sup>38</sup> Nii ne porisi kuhiasila mu bula pi Rom nihiasi-la ari Pŋol ari Saalas ma ŋaa Rom timma ne. Ba si nii nii, fawulluŋ keŋba. <sup>39</sup> Nii ne ba sii mu sulba ari ba cheye ne aŋ liiseba sarika ɛ, aŋ bula piba di ba lii ba

taŋ ƙɛ. <sup>40</sup> Ba lii sarika ƙɛ a mu Lidia dia. Dime nɛ ba na nialin dɔŋsun si laa Yesu wiaa dii. Ba bul wiaa piba a ŋaa ba nyun nyaase, aŋ viiri.

## 17

*Pɔɔl ari Saalas mu Tesalonaaka tinȚeen*

<sup>1</sup> Ba sii viiri nii, ba mu to taŋ kubala baa yire Anfiipolis, a bira sii dime a to taŋ dɔŋɔ maa baa yire Apolonia, a lii dime a mu taŋ kubala baa yire Tesalonaaka. Juu tinȚaa Wii-chuɔle dia fa he dime. <sup>2</sup> Pɔɔl mu juu Wii-chuɔle dia ari u si venɛɛ ŋaa nii lee-na kala. Che-wiesii-la cheɛŋ yɔsun batori pege, ba di niaa vuvuure Wia wiaa. <sup>3</sup> U karime Wia tenin piba a dageba nii ari u si maga di Yesu na heɛŋ a suu aŋ bira sii suun ƙɛ, a bira bula piba ari Yesu deen u si bul u wiaa piba nɛ ŋaa Kirisito. <sup>4</sup> Nialin dɔŋsun laa wialin dii a pe Pɔɔl ari Saalas ƙɛ. Ba tuɔŋ Giriik tinȚaa ari haala-la si ŋaa ni-balaa ba taŋ ƙɛ ma yuga a laa wialin dii a peba ƙɛ. <sup>5</sup> Nii nɛ Juu tinȚaa yaraa bibieri. Ba che kese nyu-duo tinȚaa si yie bibaare wonbiee ari yɔsun tuɔŋ a pe ba titia ƙɛ. Ba bira che kese niaa dɔŋsun, ba kala hilimi di ba keŋ taŋ-la kala a vugime. Ba mu juu Jeesin dia di ba che Pɔɔl ari Saalas di ba keŋba kaa ku lii niaa tuɔŋ. <sup>6</sup> Ba biba naa aŋ keŋ Jeesin ari nialin dɔŋsun si laa Yesu wiaa dii

a lereba lii ba taŋ kuhiasin teen, aŋ ŋinɛa goŋ a bul, “Niaa deenba chei lee kala nɛ aŋ ƙɛle ko la jaŋ. <sup>7</sup> Ka Jeesin laaba bil u dia ƙɛ. Ba kala chei wii-la la kuoribalin si bile nɛ aŋ bul di kuori dɔŋ nɛ he dime, baa yire Yesu.” <sup>8</sup> Wiaa deenba ba si bula ŋaa nialin ari ba taŋ kuhiasin kala bi jin wii-la kala ba si jaŋ ŋaa. <sup>9</sup> Nii nɛ taŋ kuhiasin ŋaa Jeesin ari u nanɔŋsun liise ta-time, aŋ ka ba lenba.

*Pɔɔl ari Saalas mu Biriya tinȚeen*

<sup>10</sup> Taŋ si bire, nialin si laa Yesu wiaa dii ŋaa Pɔɔl ari Saalas lii mu Biriya. Ba si yi Biriya, ba mu juu Juu tinȚaa Wii-chuɔle dia. <sup>11</sup> Lee-la Juu timma-la kpia Juu timma-la si he Tesalonaaka ƙɛ. Ba chaga laa Wia niin wialin ari na-kparin a kikarime Wia tenin ari siifiesin tapulii-na kala, di ba na di wialin sene ŋaa wutitiiba nɛ. <sup>12</sup> Ba tuɔŋ niaa yuga nɛ laa Yesu wiaa dii. Giriik tinȚaa haalaa si ŋaa ni-balaa ari ba baalaa kala laa Yesu wialin dii.

<sup>13</sup> Juu timma-la si he Tesalonaaka ƙɛ nia di Pɔɔl bira bul Wia wiaa Biriya ma ƙɛ. Ba sii mu dime maa a nyise ni-dan-la he. <sup>14</sup> Nii nɛ nialin si laa Yesu wiaa dii ŋaa Pɔɔl lii a mu mugi-balin niin, ka Saalas ari Timoti bi mua aŋ he Biriya ƙɛ. <sup>15</sup> Niaa dɔŋsun lii Biriya a to Pɔɔl hariŋ, a kenu kaa mu Aten. Pɔɔl miira tinba di ba mu

bula pi Saalas ari Timoti di ba ku chemu lima.

*Pŏol mu Ateŋ tinŋeen*

<sup>16</sup> Pŏol si hŏŋ Ateŋ le a gbigberε Saalas ari Timoti, u na di daalusuŋ sŋ taŋ-la kala le. U tuŏŋ faasa viisi. <sup>17</sup> Nŋii ne Pŏol mu Juu tinŋaa Wii-chuŏle dia. U bul Wia wiaa pi Juu tinŋaa ari nialin sŋi fā Wia, ba kaa lere. U yie juu yŏbŏ maa cheε-na kala a bul Wia wiaa a pi nialin si yie kŏ dime. <sup>18</sup> Kerichibala dŏŋsuŋ sŋi to Epikuuras wonŋbiinŋ ari Sitŏik kerichiba dŏŋsuŋ ma ku nau. Niaa dŏŋsuŋ ma piεse, “Bεε kiaa ne ni-yaarinŋ deen ma chinaa bul?” Dŏŋsuŋ ma si, “U naga venŋ-falii wiaa ne u bubul.” Pŏol si yie bul Yesu wiaa ari u si sŋi suuŋ le ne tii ba bul nŋii. <sup>19</sup> Nŋii ne ba kenu kaa mu ba si yie hilimi dia-la le baa yire Ariyŏpagis a bul, “La cho di la nii wu-falinŋ deen wiaa ŋ sŋi dagu ne. <sup>20</sup> Wialin dŏŋsuŋ ŋ sŋi bul ŋaa wu-kpunŋkperisinŋ ne la teenŋ. La saa cho di la nii ba bubuŏŋ ne woruŋ.” <sup>21</sup> Ateŋ niaa ari ba nuhuŏraa kala bi wii-kala kaa pε, see di ba bul wu-falia-la ba si nia a pi niaa, a ma cho di ba jegile nii wu-falaa niaa teenŋ. Ba wiinŋ kala ne nŋii.

<sup>22</sup> Nŋii ne Pŏol sŋi chinŋ nialin fa si hilime tutuŏbaaninŋ a bula piba a bul, “Mi si kŏ daha, mi na ari ma cho vuiaa kpaarinŋ ne woruŋ. <sup>23</sup> Mi sŋi gŏlle ma taŋ le, mi na ma vesinŋ. Mi bira na koruŋ maa

ma si saa. Nŋla ne ma tuuro heu le, ‘Wia-la la si bi jinŋ dikpaarinŋ le ŋla.’ ” Nŋii ne Pŏol bira bul, “Wia-la ma sŋi chuŏle aŋ buu jinŋ, u wiaa ne mi bulaa pima nŋii. <sup>24</sup> Wia-la si ŋaa dunia ari kuŋ-kala si he dime, a ŋaa wia nyuŋ ari tinŋeen kala Tiina, u bi lee-la nuhuobiine si saa aa kpaare vuiaa ka juu. <sup>25</sup> U bi naga u si che kuŋ ka ne tii uu che nuhuobiinee tima pu. U ne pi nuhuobiinee miisinŋ ari wiese ari kuŋ-kuŋ-kala. <sup>26</sup> Wia fa ŋaa ni-bala ne bunŋbunŋ-la. Ni-bala-la le ne dunia niaa ta-gentisinŋ kala to kŏ. Ba hŏŋ dunia seme kala. Ka di u ŋaaba, u ne dage bua-la ba si janŋ kenŋ miisinŋ, ari lere-la kala ba si janŋ hŏŋ. <sup>27</sup> U ŋaaba nŋii di ba wuo bee cheu a lilaare lee-kala di ba nau. Ama Wia saa bi di-bolii he. U kpagela kuŋ-kala ne. <sup>28</sup> Nu kubala ne bula ari u dŏluŋ le ne la kenŋ miisinŋ aa venŋ a he dime. U saa ŋaa wutitii. Ma gŏgŏ dindennε dŏŋsuŋ ma fa bul nŋii a bul ari la ŋaa u biirinŋ ne. <sup>29</sup> La saa si ŋaa u biirinŋ, u bi maga di la biine Wia nage kialinŋ nuhuobiine si kenŋ selime kaa me, koo kula ba si kenŋ hŏŋŋ koo tabiinŋ kaa ŋaa ne. U bi naga kiaa deenba nuhuobiine si kenŋ u wu-jiminŋ kaa ŋaa ne. <sup>30</sup> Buala le nuhuobiinee si buu jinŋ, u fa tŏrikŏ ne ba nyuŋ. Ama leele u bula pipi nuu-kala lee-na kala di ba birima lii ba haacheba le, <sup>31</sup> bεε wiaa u he tapulii ne u si janŋ dii dunia



niaa kala sariya ari tuo-bala. U jan to nuhuobiin-la ɛ u si liisa ne a dii sariya-la. Nii-la si suba, u chisu suun ɛ, di nuu-kala wuo jin ari wutitii ne.”

<sup>32</sup> Nialin si nia ari Pɔɔl bul suun siinin ɛ wiaa, ba doɔsun mumomu, ama doɔsun ma si di ba cho duu maachie bira bul wii-la di ba nii. <sup>33</sup> Nii ne Pɔɔl sii a lii lee-la ba si hilime. <sup>34</sup> Niaa doɔsun laa wialin dii a to u harin. Ba tuon doɔo baa yire Dayonaasias. U fa he nialin sii hilimi Ariyopagis dia-la tuon doɔo ne. Haal kubala maa baa yire Damaris ari niaa ma doɔsun laa wialin dii.

## 18

### *Pɔɔl mu Korinti tinteen*

<sup>1</sup> Nii ne Pɔɔl sii Aten ɛ a mu tan doɔo baa yire Korinti. <sup>2</sup> U na baal kubala a lii Pɔntos, Rom tinteen tan ne, baa yire Akuila. U fa nna Juu tiina ne. Ba di u haala Pirisila si lii Rom ko, u bi diene. Kuori-balin ba sii yire Kulodios fa bula pi Juu tinnaa kala di ba lii Rom ɛ. Nii ne tii ba sii ko. Pɔɔl mu ba dia duu chuoleba. <sup>3</sup> U mu juu ba dia a chuchua dime, bee wiaa ba kala tin tinjin-bala ne. Ba fa ken tennin yiyere lennee ne aa yalle moribee. <sup>4</sup> Che-wiesiila cheen kala u yie mu ba Wii-chuole dia. Ba di Juu tinnaa ari Giriik tinnaa ken wiaa lilere. U wiwalime di ba sei wii-la.

<sup>5</sup> Nii ne Saalas ari Timoti lii Masidonia ko. Bua-la ɛ ba si ko, Pɔɔl jon u nyun kala he aa bul Wia wiaa, a dage worun a pi Juu tinnaa ari Yesu ne nna Kirisito. <sup>6</sup> Nii ne ba lii u harin an tuusu. Ba si nna nii, u kpesi u gennin kun-kollun heba ɛ an bula piba a bul, “Ma wu-bonnoo jan nyua ma nyun ɛ. Mi wii dee. A lii jinin mi jan mu a bul Wia wiaa pi nialin si bi Juu tinnaa nna.” <sup>7</sup> U bul nii an sii mu juu baal kubala dia, baa yire Taatis Jasitis. U faa chuole Wia ne. U dia kpage Wii-chuole dia. <sup>8</sup> Baal kubala baa yire Kirisipas ne fa nna Wii-chuole diala kuhian. Ba di u dia niaa kala laa la Tiina Yesu wiaa dii. Niaa ma yuga Korinti ɛ a nii Wia wialaa a laaba dii. Ba foba Wii-chuole lin. <sup>9</sup> Titan kubala Pɔɔl na ari duosoo tuon di Wia bula pu a bul, “Si fawullun fa. Haa bul wiaa pipi niaa a si len. <sup>10</sup> Mi chin n harin. Nuukala bi jan wuo kenin a nna wu-bon kala, bee wiaa mi niaa yuga tan deen ɛ.” <sup>11</sup> Pɔɔl hon dime nii jina ari lebi a didage Wia wiaa pipi niaa.

<sup>12</sup> Bua-la ɛ baal kubala baa yire Galio ne fa nna Giriik kuoro. U fa si dii kuorun nii, Juu tinnaa sii he doɔo ɛ a ken Pɔɔl, a kenu kaa mu ba sariya didiilin. <sup>13</sup> Ba bul, “Baala deen walime di niaa sei a chuchuole Wia wonbii-la si jan chei la kisin ɛ ne.” <sup>14</sup> Pɔɔl si nna duu bul wiaa,

Ții ne Galio bula pi Juu timma-la a bul, "Juu timma, di baala deen ne fa Țaa wii chei, u fa jan ken wonbii di mi ken kenyiri a jegile nii ma teen." <sup>15</sup> Ama u si Țaa wubulii ne ma kaa lere ari yiraa wiaa, ari ma titia kisinnin wiaa, u maga di ma titia kaa mu bula wase ne dia le. Mi bi jan wuo laa wiin deen jin." <sup>16</sup> U kiriba ta ba lii sariya didiilin. <sup>17</sup> Ba kala lii gollo ken Sositenis, nii-la fa si Țaa Wii-chuole dia kuhian dono, a Țmobu sariya didilin boinini. Ama Galio sipaa kala fa tuo dime.

### *Pool miira mu Antioch tinteen*

<sup>18</sup> Pool he Korinti le a dieni. Nii ne u sii a chuole nialin si laa Yesu wiaa dii Korinti le an lii. Ba di Pirisila ari Akuila kala sii mu a juu liin daboro di ba mu Siiria tinteen. Ka di ba-na juu liin daboro-la, Pool ta niin Wia teen tan kubala baa yire Kenkiriya le an fun u nyun, an-na juu daboro-la. <sup>19</sup> Ba mu yi tan kubala baa yire Efesis. Dime Pool len Pirisila ari Akuila an mu juu Wii-chuole dia. Ba di Juu tinȚaa ken wialin lilere. <sup>20</sup> Nialin donsun bul duu hon ba teen dieni, ka u bi seye. <sup>21</sup> U si sii dime, u bula piba a bul, "Di Wia ne pimi wonbiin, mi jan miira ko ma teen."

Nii ne u sii mu juu liin daboro a lii Efesis le, <sup>22</sup> a mu yi tan kubala niin baa yire Sizariya. U sii dime a

mu Jerusalem, a mu chuole nialin si laa Yesu wiaa dii aa hilimi dime. U bira sii dime a mu Antioch. <sup>23</sup> U hon dime a dieni mua a bira sii, a to Galiisia ari Firijia tinteen, a bul wiaa pipi nialin si laa Yesu wiaa dii dime di ba wasa ken yarida.

### *Apolos mu Efesis ari Korinti tinteen*

<sup>24</sup> Juu tiina ma ne fa he dime, baa yire Apolos. U lii Alekizandria ne. U ma sii ko Efesis. U fa jin wiaa bulun worun a jin Wia tenin ma worun. <sup>25</sup> Ba fa dagu la Tiina Yesu wonbii-la tonun worun. Uu dage Yesu wiaa worun ari siifan. Wialin kala u si bula aa tige Yesu le Țaa wutitiiba ne. Ari Ții kala, duu nii bul Wii-chuole liin fonun wiaa, Jon Wia liifoori-la sii fo niaa Wii-chuole liin dunɖunɖa wiaa ne u jin. <sup>26</sup> U si he Efesis le, u bul Wia wiaa ari nyu-duon Wii-chuole dia le. Pirisila ari Akuila he dime a nii wialin u sii bul. Nii ne ba kenu kaa mu ba dia a wasa dagu Wia wonbii-la worun. <sup>27</sup> Nii ne Apolos chiche duu mu Giriis tinteen. Nialin si laa Yesu wiaa dii Efesis le peu le a Țmunse tenin a pi nialin sii laa Yesu wiaa dii Giriis le, a bula piba di u ko ba kenu worun. U si mu dime, u puu nialin si laa Yesu wiaa dii, Wia lahormo le. U peba le worun. <sup>28</sup> U di Juu tinȚaa faasa ken wiaa lilere niaa tuon. U yie ken nii-dolon a jon Wia tenin dageba ari

Yesu ne ɲaa Kirisito. U bul ɲii a wuo loba.

## 19

### *Pɔɔl mu Efesis tinƆteen*

<sup>1</sup> Apɔɔs fa si he Kɔriɲti le ɲii, Pɔɔl bira gollɪ ɲii a bira kɔ Efesis. U si kɔ dime, u na nialɲ dɔɲsun si laa Yesu wiaa dii. <sup>2</sup> ɲii ne Pɔɔl piɛseba, "Wia jon u Diɲ-zɔɲ-la hɛma le neɛ bua-la le ma si laa Yesu wiaa dii?" ɲii ne ba si, "Ai, la ha bi Wia Diɲ-zɔɲ-la wiaa nia." <sup>3</sup> ɲii ne Pɔɔl bira piɛseba, "Ni-bɛɛ ne ma to ka ba foma Wii-chuɔle liɲ?" ɲii ne ba bul, "La to wialɲ Jɔɔɲ Wia lii-foori-la si dagela ne." <sup>4</sup> ɲii ne Pɔɔl bira si, "Nialɲ si birima lii ba haacheba le ne, Jɔɔɲ fufo Wii-chuɔle liɲ. U fa bula piba ari nuu jan kɔ u harɲ, u yirɲ ne Yesu, duu kɔ di ba laa u wiaa dii." <sup>5</sup> Ba si nii wiɲ deɲ Pɔɔl si bula, ba ɲaa ba foba Wii-chuɔle liɲ la Tiina Yesu dolun le. <sup>6</sup> ɲii ne Pɔɔl jon u nisaa danba le. U si ɲaa ɲii, Wia Diɲ-zɔɲ-la ku tuu heba le. Ba suomo bubul yiikori-yiriba ba si bi jɲ, a bul Wia wiaa Wia Diɲ-zɔɲ-la dolun le maa. <sup>7</sup> Niaa deɲba kala fa ɲaa ari baalaa fii ari balia ne.

<sup>8</sup> Pɔɔl si he Efesis le, u venɛɛ juu Wii-chuɔle dia cheɲsin batori, a chaasa bubul Wia kuorii-la wiaa ari nyu-duonj. Ba di niaa keɲ wialɲ lilɛɛ, u wiwalime di ba sei wii-la. <sup>9</sup> Ama nialɲ dɔɲsun nyun si dolie, ba

bi wii-la laa dii, aɲ bubul wu-bɔɲɲɔ a tige la Tiina Yesu wonbii-la tonun wiaa. Nialɲ si laa Yesu wiaa dii aa hilimi tuonj ne ba bul ɲii. Pɔɔl lenba aɲ keɲ nialɲ si laa Yesu wiaa dii kaa mu. Ba mu juu baal kubala dii-bal baa yire Tiranis. Pɔɔl ari niaa yie keɲ wiaa lilɛɛ dime tapulii-na kala. <sup>10</sup> U venɛɛ ɲaa ɲii a yi jisɲ balia ne. Juu tinɲaa ari Giriik tinɲaa kala si he Esia tinɲeen le wuo nii la Tiina Yesu wiaa.

### *Sikiiva biirin gollo kiri jɲ-bɔɲɲɔ*

<sup>11</sup> Wia fa jon dol-bal kubala ne a pi Pɔɔl, u ɲɲaa wu-kpunƆperisinj. <sup>12</sup> Pɔɔl yaraa geri-kɔsumɔɔ ma paala ba yie paa kaa mu pi nyanyal tinɲaa ba duduori. Di jɲ-bɔɲɲɔ ne keɲ nuu maa, ba lii tiina le. <sup>13</sup> Juu tinɲaa dɔɲsun ma fa he dime a ma fa golle aa kiri jɲ-bɔɲɲɔ niaa le. Ba wiwalime di ba ɲaa ɲii la Tiina Yesu dolun le ne. Ba bula pi jɲ-bɔɲɲɔ-la a bul, "Mi si, má lii Yesu dolun le, nii-la wiaa Pɔɔl sí bul." <sup>14</sup> Baalaa balipe ne faa ɲaa ɲii. Ba nyimma yirɲ ne Sikiiva. U fa ɲaa Juu tinɲaa nialɲ si kpu pusun pipi Wia kuhianj dɔɲɔ ne. <sup>15</sup> ɲii ne jɲ-bɔɲ-la bula piba a bul, "Mi jɲ Yesu a jɲ Pɔɔl maa, aɲ ka ma ma ɲaa kubɛɛba ne?" <sup>16</sup> ɲii ne jɲsinj si keɲ baal-la wuoba. U sii a keɲba a ɲmooba worun a pireba. Ba gennɲ kala kieɛ. Ba kala fá

lii dia-la tuŋ ari yaribiree.  
 17 Juu timma-la ari Giriik timma-la ari nialin kala si he Efesis le nii wiin deen. Fawullun kenba kala. Ba denne la Tiina Yesu worun.  
 18 Nialin ma dŋsun si laa Yesu wiaa dii yuga kŋ, a ku dage ba wu-bŋmŋ-la ba si ŋaa a pi Pŋol, niaa tuŋ.  
 19 Ba tuŋ niaa yuga a faa ŋaa daalusun. Ba kala paa tenni-la ba fa si karima aa ŋaa daalusu-la. Ba paa nyige nuu-kala siaa le. Ba si ken tenni-la kala yalin pe dŋŋ le, u ŋaa siidi bui bui bui ne.  
 20 La Tiina niin wiaa teeli lerin kala a dol worun.

*Niaa ŋaa taawei Efesis le*

21 Nii ne Pŋol biine ari u jan to Masidoonia tinteen ari Giriis tinteen a mu Jerusalem. Nii ne u bul, "Di mi ne mu dime, u maga di mi mu Rom maa." 22 Nii ne Pŋol tin nialin fa si peu le ba tuŋ balia di ba mu Masidoonia. Timoti ari Irasitas ne u tin. An ka u titia hŋ Efesis le Esia tinteen a dieni mua.

23 Bua-la le yuosun fa juu Efesis le siifesiin a tige la Tiina Yesu wonbii-la tonun wiaa. 24 Libiri kubala ne fa he dime. U yirin ne fa Demiitias. U fa ken selime ne a kaa lilibi kiaa, ba nage ba tan ven-balin Atemis. Tinjamin deen le ba di u tininnaa na moribiee kinken. 25 Chee kubala u yire u tininnaa ari u tininni-dŋsun a bula piba a bul, "Mi nanŋdŋsun, ma

jima ari tinjamin deen ne ŋaa la kuori. 26 Ma titia nia a nina maa wialin Pŋol sii bul. U si, vuia-la nuhuobiinee sii libi, ba bi wia ŋaa. U saa wuo ken ni-dan nyusun birime ba sei wiila. U ŋaa nii Efesis deen le ari Esia tinteen jesin kala le ne. 27 Wii-la la sii fá ne ŋla: Niaa jan chei la tinjamin deen yirin. La biraa fá ari la ven-balin Atemis jan ku ŋaa ku-tŋ. Niaa bira bi jan zizilu. Lelele Esia niaa ari dunia nuu-kala nii zilu."

28 Nialin si nii wii-la, ba baaniin sii. Ba ŋaa gon a bubul, "La ven-balin Atemis si he Efesis le ne ken dolun."

29 Nii ne ba ken tan kala vugime. Ni-dan-la ken Gayas ari Arisitaakis si lii Masidoonia a tuto Pŋol harin. Ba lereba kaa mu lee-la tan-la niaa si yie hihilimi. 30 Ba si kenba kaa mu dime, Pŋol fa cho duu mu juu nialin tuŋ, ama nialin si laa Yesu wiaa dii bi seye. 31 Esia tinteen kuhiasin dŋsun si dii Pŋol nanŋdŋsun tin di ba sulu duu sí nialin tuŋ juu.

32 Nialin kala si hilime bi jin wii-la sii ŋaa. Dŋsun ŋaa gon a bul ŋla ne, dŋsun ma si wiin deen ne. Ba kala jesin paala fa bi jin wii-la si tii ba ku hilimi dŋŋ le. 33 Juu tiina kubala ne fa he nialin tuŋ. Baa yire Alekizanda. Juu tinŋaa leŋe u lii chin ba sipaan ne. Nii ne tii nialin dŋsun biine duu ŋaa wii-la tuŋ ni-bal ne. Nii ne Alekizanda ken u nisiin vigi

di ba keŋ goŋ, aŋ wiwalime duu bula pi nialin di ba di u nanɔɔnsuŋ bi wii cheye. <sup>34</sup> U sii ŋaa ŋii, ba bene duu ŋaa juu tiina. Ŋii ne ba kala bira ŋaa goŋ a he dɔŋɔ le a yi hawaba balia aa bul, "La veŋ-balin Atemis si he Efesis le ne keŋ doluŋ." <sup>35</sup> Ŋii ne ba taŋ kerichi-hiaŋ dɔŋɔ ku lii a wuo ŋaa ba keŋ goŋ. U bula piba a bul, "Efesis niaa, nuu-kala ne jima ari la taŋ Efesis ne tii la veŋ-balin Atemis ari u di-kpaarin kala, a pe tabii-la sí lii wia nyuŋ ku tuu tel, la kpikpaare le. <sup>36</sup> Nuu-kala bi jaŋ wuo keŋ wiin deen kaa lere. Ŋii wiaa, má leŋ goŋ aŋ sí wii-la si bi bubuo kene ŋaa. <sup>37</sup> Niaa deenba bi kuŋ gaa joŋ la veŋ-balin di-kpaarin, ba bira bi wii bula chei la veŋ-balin yirin maa, ka ma keŋba kaa ko daha. <sup>38</sup> Di Demitias ari u tinŦinnaa ne keŋ wii ari nuu, sariya keŋ u tapul-diilie ne, ma taŋ kuhiasin ma he dime di ba dii sariya. Má leŋ di ba mu dime a nyan dɔŋɔ. <sup>39</sup> Ama di wii dɔŋ ma ne he dime maa che di ma bul, má leŋ bua-la taŋ kuhiasi-la si yie ko a hilimi di ba bula wase. <sup>40</sup> Di ba ne piesela, la bi wii-kala jaŋ wuo bul a tige taawei deen wiaa si ŋaa jinin. Wii-la mi sí fá ne ŋla, ba jaŋ bul di la ne he taawei-la." <sup>41</sup> U si bul ŋii dere, u ŋaa nialin fa si hilime sii a viiri.

## 20

*Pɔɔl mu Masidoonia ari*

### *Giriis tinŦeen*

<sup>1</sup> Ŋii ne taawei-la dere. Ka Pɔɔl yire nialin si laa Yesu wiaa dii Efesis le a bul wiaa piba di ba nyuŋ nyaase. U si bul wialin dere, u taba aŋ sii mu Masidoonia tinŦeen. <sup>2</sup> U golle Masidoonia tinŦeen kala a bul wiaa yuge piba di ba nyuŋ nyaase. Ŋii ne ka u lii dime a mu Giriis tinŦeen. <sup>3</sup> U he Giriis tinŦeen le cheŋsin batori. Ŋii ne u ŋaa siri duu juu liin daboro a mu Siiria tinŦeen. U si ŋaa siri ŋii, u nia ari juu tinŦaa vuure u wiaa di ba kpoo. Ŋii ne u keŋ u tuobiinaa birime a miira sii to Masidoonia. <sup>4</sup> Baal kubala ne fa to u harin. Baa yire Sopata a lii Biriya. U fa ŋaa Piras bie ne. Ka niaa deenba: Arisitaakis ari Sekundas a lii Tesalonaaka, baal kubala maa baa yire Gayas a lii Deebi, ari Timoti. Niaa balia ma he dime a lii Esia. Baa yire Tikikas ari Turɔfimɔs. <sup>5</sup> Ba ne laa sipaan a mu gberela Turɔwas le. <sup>6</sup> La he dime bua-la le ba si yie dii boroboro si bi si-buruŋ kene. U kieli, ka la sii Filipa le a juu liin daboro, a veŋ tapulaa banɔŋ aŋ-na yi Turɔwas. La he dime tapulaa balipe.

### *Pɔɔl mu Turɔwas tinŦeen*

<sup>7</sup> Lahadi cheen la kala he dɔŋɔ le a dii kudiile-la Kirisito fa si si di la didii a liliisi u wiaa. U taŋ ní pul di Pɔɔl sii viiri. Ŋii ne u bul wiaa deen deen taŋ siesi. <sup>8</sup> La hoŋ lusuŋ nyuŋ dia le ne a nyige chaanaa yuge.

<sup>9</sup> Bapuosi-bie kubala ma he dime. Baa yire Yutikas. U fa hoŋ tokoro niŋ ne. Pɔɔl si bul wiaa didieni nii, u hoŋ didiege doŋ a joŋo piŋ doŋ, a foro lii lusun nyun dia-la nyun a tuu tel. Ba tuu joŋu duu suba. <sup>10</sup> Nii ne Pɔɔl ma sii tuu a tiŋ a guoru, aŋ bula pi nialin a bul, “Ma si leŋe duu ŋaa wii, u weye ne.” <sup>11</sup> Nii ne ka Pɔɔl bira jil lusun nyun dia-la ba didii kudiile-la Kirisito fa si si ba didii a liliisi u wiaa. U si dii dere, ba bira keŋ ba wubulun halii taŋ-pul. Nii ne u viiri. <sup>12</sup> Ba keŋ bapuosi-bie-la kaa mu dia duu weye. U ŋaaba tuotɔrun.

*Pɔɔl sii Turɔwas le a mu Miliitas*

<sup>13</sup> Nii ne la sii a mu juu liin daboro a duoro mu Asɔs. Pɔɔl fa bula pila ari la juu liin daboro a duoro mu Asɔs, ka duu veŋ naasiŋ le ko a juu liin daboro Asɔs le. Nii ne la juu liin daboro a mu Asɔs. Dime ne la fá mu di la joŋ Pɔɔl. <sup>14</sup> Pɔɔl si ku puula Asɔs le, la joŋu ari liin daboro a mu to Mitilini. <sup>15</sup> La bira sii dime. U taŋ si pula, la ku yi Kiyɔs. Taŋ doŋɔ bira si pula, la ku yi Samɔs. U taŋ si pula, la ku yi Miliitas. <sup>16</sup> La bira sii Miliitas le. Pɔɔl si duu bi jaŋ chin Efesis le. U si, u bi che duu dieni Esia tinteen, duu faa che duu mu Jerusalem lima lima ne a puu Pentikɔs che-gbielii-la dime.

*Pɔɔl bul wiaa a pi nialin si laa Yesu wiaa dii aa hilimi*

*kuhiasiŋ Efesis le*

<sup>17</sup> Nii ne la kiele ko Militas. Pɔɔl tima yire nialin si laa Yesu wiaa dii aa hilimi kuhiasiŋ Efesis le di ba ko. <sup>18</sup> Ba si ko, u bula piba a bul, “Ma ma jin nii mi si naga ne, a chin bua-la le mi si bumo ko Esia tinteen ne a kuko jiniŋ. <sup>19</sup> Mi si tin tinŋinaa pi la Tiina Wia nii, mi keŋ mi titia muuri ne kinkeŋ. Mi ma yel sii-liirin a tin ma wiaa. Mi na heeŋ maa Juu tinŋaa teen, ba si yie vuvuure di ba kpumi. <sup>20</sup> Mi dagema wii-na kala si jaŋ pema le, mi bi kaa faama. Mi dagema Wia wiaa, niaa tuon ari ma diisin kala ma le. <sup>21</sup> Mi bula pi Juu tinŋaa ari Giriik tinŋaa kala siifesiŋ di ba birima lii ba haacheba le aŋ ku to Wia, a laa la Tiina Yesu wiaa dii. <sup>22</sup> Wia Din-zon-la dagemi di mi mu Jerusalem. U niin le ne mi leele to aa mu ŋla. Mi bi jin wii-la kala si jaŋ ŋaami le dime. <sup>23</sup> Mi ta jin ne ari taŋ-na kala le mi si mua, Wia Din-zon-la yie bula pimi siifesiŋ ari wiaa jaŋ juumi, di ba keŋmi to dia maa. <sup>24</sup> Ama mi si yie beŋ mi miisin, u bi kuŋ-kala ŋaa mi teen. Mi taa che di mi tin tinŋimii-la dere mi Tiina Yesu si si mi tin ne. U ne si di mi bul Wia wu-zomɔ-la a pi niaa, a bula piba nii u si jaŋ fába nennige. <sup>25</sup> Leele mi jima ari ma niaa deenba mi si yie golle ma tuon a bul Wia kuorii-la wiaa pima, ma bira bi jaŋ ko di ma nami.

26-27 Mi si bul Wia wialin pima nii, mi bi wialin kala Wia si ŋaa kaa faama. Mi saa bulaa pima siifesiŋ jiniŋ tapulun deen di ma nuu-kala kɔ duu lele, mi bi wii cheye. Ma wu-bɔŋɔɔ jaŋ nyua ma nyun le. <sup>28</sup> Má beŋ ma titia nyun worun, aŋ pɛ beŋ nialin maa u Diŋ-zɔŋ-la si joŋo he ma nisiŋ le. Má beŋ nialin si laa Yesu wiaa dii a hihilimi nyun, ari pie-daara si yie beŋ u piesee nyun nii. Wia ne joŋ u titia bie chalin yɔɔba. <sup>29</sup> Mi jima, di mi ne leŋma, ni-bɔŋɔɔ jaŋ ku juu ma tuɔŋ, ari gunɔgurusun si yie juu pusun tuɔŋ nii. Ni-bɔmɔ-la bi jaŋ leŋma, ba jaŋ walimema. <sup>30</sup> Niaa jaŋ lii ma tuɔŋ maa a keŋ wialin kaa birime, a nyise nialin si laa Yesu wiaa dii di ba miire hariŋ a toba. <sup>31</sup> Nii ne tii mi si, má beŋ ma titia nyun nii. Máa liisi ari mi dagema nuu-kala jisini batori ne ŋla wiiheye ari titanin kala, a yel sii-liirin ma worun ma wiaa. <sup>32</sup> Mi leele joŋma he Wia nisiŋ le ne. Wia wu-zɔmɔ-la lahɔrimɔ le u jaŋ pema le. U jaŋ wuo pema le di ma keŋ dolun a chin ma yarida le. U jaŋ leŋ di ma wuo dii kialin u si ŋaa bil ma sipaan Wia kuorii-la le a gbigbere nialin si laa u wiaa dii le. <sup>33</sup> Mi ha bi ma kuŋ-kala moribiee koo gennin biina di mi kaa laa. <sup>34</sup> Ma titia jima di mi tima worun, a na kialin kala la di mi nanɔɔŋsun sii che. <sup>35</sup> Mi ŋaa nii di mi wuo dagema di ma faasa tin tinŋaa nii,

ma jaŋ wuo pɛ puwuoloo le aa liisi ari la Tiina Yesu fa si bul nii. U si,

‘Ŋ si joŋ kua pi nia,  
u ne keŋ tuɔɔrun

a kii ŋ si laa kua nia  
teen.’ ”

<sup>36</sup> Pɔɔl si bul wiaa dere, u tuu kpirimi a chuɔle Wia a piba kala. <sup>37</sup> Ba guoru a yel sii-liirin. <sup>38</sup> Ba tuɔŋ chei worun, beɛ wiaa u fa bula piba ari ba bira bi jaŋ nau. Nii ne ba kenu kaa mu liin daboro lerin.

## 21

### *Pɔɔl mu Jerusalem*

<sup>1</sup> La ta dɔŋɔ aŋ juu liin daboro. La ven tegi tegi a mu lee kubala baa yire Kɔs, a bira sii dime. Taŋ si pula la mu lee kubala baa yire Roodis, a bira lii dime a mu Patara. <sup>2</sup> Dime ne la na liin daboro duu mu Fɔniisia. La juu mu. <sup>3</sup> La sii mu nii, la na lee kubala la na-gua, baa yire Saapɔs. La kieli dime a mu yi Siiria tinteen. La mu chin taŋ kubala le baa yire Taya. Dime ne liin daboro-la che duu chin di ba chaare kiaa si he liin daboro-la le. <sup>4</sup> La che mu na nialin si laa Yesu wiaa dii dime. La hɔŋ ba teen tapulaa balipe. Ba bula pi Pɔɔl Wia Diŋ-zɔŋ-la dolun le duu sí Jerusalem mu. <sup>5</sup> La si hɔŋ dime tapulaa balipe nii, la bira lii dime a joŋ la wonbiin. Baalaa ari ba haalaa ari ba biirin keŋla kaa lii taŋ-la tuɔŋ. La kala tuu kpirimi liin niin a chuɔle Wia. <sup>6</sup> La ta dɔŋɔ dime aŋ

juu liiŋ daboro, ka ba ma miira mu dia.

<sup>7</sup> La lii Taya ɛ a joŋ la woŋbiin a mu taŋ kubala baa yire Pitolimiiyas. La mu chuɔɛ nialin si laa Yesu wiaa dii dime aŋ chua. <sup>8</sup> U taŋ si pula, la sii a mu Sizariya, a mu juu baal kubala dia baa yire Filip. U fa gollo bul Wia wiaa ne aa pi niaa. U fa ŋaa nialin balipe doŋo ne ba fa si liisa Jerusalem ɛ. <sup>9</sup> U fa keŋ toloo banese ne. Ba fa bi balaba jaa aŋ fa bubul Wia wiaa Wia doluŋ ɛ. <sup>10</sup> La he dime nii tapulaa banmene, di baal kubala lii Judiya tinteen a ma ko, baa yire Agabos. U fa ŋaa nii-la sii bul wiaa, Wia Diŋ-zoŋ-la doluŋ ɛ ne. <sup>11</sup> U ko la teen a laa Pool damere a kaa voo u titia naasin ari u nisaa aŋ bul, "Ŋla ne Wia Diŋ-zoŋ-la bul, 'Juu tinŋaa jaŋ keŋ damere deen tiina a vobu ŋla Jerusalem ɛ, a joŋu he nialin si bi Juu tinŋaa ŋaa nisin ɛ.'" "

<sup>12</sup> La si nii wiin deen, la di nialin fa si he dime sul Pool duu si Jerusalem mu. <sup>13</sup> Nii ne Pool bula piba a bul, "Bee ne tii ma yiyel ŋla a ŋaa mi tuon chei ŋla? Di ba ne jaŋ keŋmi voo, koo di ba ne kpumi maa Jerusalem ɛ a tin mi Tiina Yesu wiaa, mi seye ne." <sup>14</sup> U si bul nii, la na ari la buu wuo nyagaa bil. Nii ne la len aŋ bul, "Wia jaŋ len di wii-kala u sii che u ŋaa duu ŋaa."

<sup>15</sup> Nii ne aŋ ka la ŋaa siri a sii mu Jerusalem. <sup>16</sup> Nialin

doŋsuŋ si laa Yesu wiaa dii a lii Sizariya ma to la hariŋ a mu, a keŋla kaa mu juu baal kubala dia baa yire Mi-neesiŋ. U lii Saapos ne. U laa Yesu wiaa dii bua-la ɛ ba fa si suomo bubul Yesu wiaa pipi niaa ne.

### *Pool mua duu na Jeems*

<sup>17</sup> La si yi Jerusalem, nialin si laa Yesu wiaa dii dime keŋla woruŋ. <sup>18</sup> Taŋ si pula, la di Pool mu di la na Jeems. La mua di nialin kala si laa Yesu wiaa dii kuhiasin kala he dime. <sup>19</sup> Nii ne Pool chuɔɛba aŋ bula piba nii kala Wia si peu ɛ u tin tintinŋaa nialin si bi Juu tinŋaa ŋaa tuon.

<sup>20</sup> Ba si nii wiin deen, ba lolle Wia aŋ bula pi Pool a bul, "La naanbii, bee na Juu tinŋaa yuga si laa Yesu wiaa dii. Ba yi niaa bui bui bui a kala tuto wialin woruŋ Moosis fa si ŋmunsa bil di niaa tuto. <sup>21</sup> Ba nii ŋ wiaa. Ba si ŋ dage Juu tinŋaa kala si he nialin si bi Juu tinŋaa ŋaa tuon di ba via wialin Moosis fa si ŋmunsa bil di niaa tuto, a bira bul di ŋ si di ba si ba biirin penee keru a si Juu tinŋaa naabalimaba wiaa to. <sup>22</sup> Ba jaŋ nii ari ŋ ko. Bee ne saa la jaŋ ŋaa? <sup>23</sup> Saa to la niin wii-la la si si ŋŋ ŋaa. Baalaa banese ne he daha. Ba ta niin ne Wia teen, baa che di ba liise niin deen Wia teen. <sup>24</sup> Keŋ baalaa deenba a ma toba ɛ, a ma piise ŋ disinnin ta, a tin moribee di ba ma piise ba



disinnij ta aŋ fuŋ ba nyusun maa. Nj ŋaa ŋii nuu-kala jaŋ wuo to ŋii le jin ari wialin kala ba si bula a tigeŋ le bi wutitii ŋaa. Ba jaŋ na ari ŋ ma titia ka to wialin Moosis fa si ŋmunsa bil di niaa tuto ne. <sup>25</sup> Ama nialin si laa Yesu wiaa dii aŋ bi Juu tinŋaa ŋaa, la ŋmunse tenin a bula piba di ba seye di ba bira sí vuiŋ namia chaŋ, di ba bira sí pusun chalin ma dii, a sí pusun si suu pimee dii, a liise ba titia ba-chorun ari ha-chorun wu-ŋaalaa le.” <sup>26</sup> Pɔɔl nanɔŋsun si bul ŋii, u taŋ-pul, Pɔɔl keŋ baalala banesemin mu, ba kala piise ba disinnij ta aŋ juu Wia-dia. U dage nialin si kpu pusun pipi Wia tapulaa mage ŋii ba si jaŋ piise ba disinnij ta, ka di ba kuŋ-kala-na kpu pusun pi Wia. Tapulaa balipe ne u dage.

### *Ba keŋ Pɔɔl Wia-dia le*

<sup>27</sup> Tapulaa balipe-la sii yi, Juu tinŋaa dɔŋsun si lii Esia na Pɔɔl duu he Wia-dia le. Ba nyise ni-dan he ba keŋ Pɔɔl. <sup>28</sup> Ba faasa kpia a bul, “Iziral timma, má ku pela le. Baal-la si golle lee kala a didage wiaa lee-na kala a chiche la niaa sí to wonbii-la, aa chei Moosis fa si ŋmunse wialin bil di niaa tuto maa, a bul wu-bɔŋŋɔ a tige Wia-dia deŋ ma le, u nii kɔ daha ŋii. U paala keŋ Giriik tinŋaa kaa ku juu Wia-dia-la, a ŋaa lerin deŋ keŋ disinnij.” Wii-la si tii ba bul ŋla: <sup>29</sup> Ba fa

na baal kubala duu to Pɔɔl harin taŋ-la le. U yirin ne Turɔfimos a lii Efesis. Ba fa biina Pɔɔl kenu kaa juu Wia-dia-la ne. <sup>30</sup> Nii ne taawei sii taŋ-la kala le, nialin kala to dɔŋɔ a keŋ Pɔɔl a kenu kaa lere lii Wia-dia-la le. Nii ne aŋ ka ba guu keŋ Wia-dia-la boiniree to. <sup>31</sup> Ba sí walime di ba kpuu, Rom laali-yuoroo kuhian nii ari taawei sii Jerusalem kala le. <sup>32</sup> U si nii ŋii, u sii a guu liise laali-yuoroo dɔŋsun ari ba kuhiasin, ba fá mu taawela lerin. Nialin si nau ari laali-yuoro-la, ba bira bi Pɔɔl ŋmobo. <sup>33</sup> Laali-yuoroo kuhian-la mu keŋ Pɔɔl, a ŋaa ba keŋ choromɔɔ balia kaa vɔbu. Nii ne u piise nialin a bul, “Kubee ne nia deŋ? Bee ne u ŋaa chei?” <sup>34</sup> Ba kala ŋaa goŋ. Dɔŋsun bubul wiin deŋ, dɔŋsun ma bul wiin deŋ. Niaa fa sí ŋaa goŋ ŋii, laali-yuoroo kuhian-la bi wii-la si paala ŋaa wuo jin. Nii ne u ŋaa u niaa keŋ Pɔɔl kaa mu laali-yuoroo dii-duon. <sup>35</sup> Ba si yi dia-la lusun cholun, nialin keŋ Pɔɔl lilere a wiwalime di ba kpuu, nii ne laali-yuoro-la jonu chun. <sup>36</sup> Nialin kala to u harin a ŋaa goŋ a bubul, “Má kpuu.”

*Pɔɔl bul wiaa duu laa u titia*

<sup>37</sup> Ba si jil lusun chol-la a chiche di ba juu dia-la, nii ne Pɔɔl sul laali-yuoroo kuhian-la duu len duu bul wii pu. Nii ne laali-yuoroo kuhian-la piise Pɔɔl a bul,

“Nii-na η nii Giriik wu-bulun nεε? <sup>38</sup> N deε bi Ijipiti tinȚaa baal-la ηaa, baal-la si suomo ηaa taawei aη keη niaa bui banεε-la si kpu niaa a kaa mu giri-bine tuoη?” <sup>39</sup> PƆol si, “Ai, mi ηaa Juu tiina nε a lii Taasis, Siliisia tinȚeen tabalin. Mii sulun di η leη di mi bul wiaa pi nialin.” <sup>40</sup> Nii nε u pu woηbiin. PƆol si chin lusun chol-la le ηii, u keη u nisin vigi di nialin keη goη. Nii nε ba kala ηaa fuui. PƆol suomo bubul wiaa Juu tinȚaa yiikoro le.

## 22

<sup>1</sup> Nii nε u bula piba a bul, “Mi nyimmaba ari mi naanbiirin, má jegile nii wi-la mi si keε di mi bula laa mi titia.” <sup>2</sup> Ba si nia duu bul wiaa ari ba yiikoro, ba kala ηaa fuui. Nii nε PƆol bul, <sup>3</sup> “Mi ηaa Juu tiina nε. Ba lulmi Taasis le, Siliisia tinȚeen. Mi hanbiirin le ne ba keηmi kaa ko daha a beηmi. Gamiilal nε dagemi. U dagemi la naabalimaba woηbii-la ba sii to ari si-ifiesin. Mi tou worun a jon mi titia pi Wia, ari ma ma si he daha jinin si ηaa ηii. <sup>4</sup> Mi ma to a doεise nialin fa sii to Yesu woηbii-la a chiche di mi kpuba. Mi ηaa ba keseba vɔɔba a keηba to dia, baalaa ari haalaa kala. <sup>5</sup> Nialin si kpu pusun a pipi Wia kuhian, ari kuhiasi-la kala si yie hilime vuvuure wiaa ma jan wuo bula pima ari wiin deen mi si bula ηaa wutitii nε. Ba ηmunse tennin pimi

di mi kaa mu Damaasikas a jonjo pi Juu timma-la si he dime. Ba ηaa ηii di mi wuo keε nialin si laa Yesu wiaa dii dime a vɔɔba, a kaa ko Jerusalem a doεiseba daha.”

<sup>6</sup> Nii nε PƆol bira bul, “Mi si lii jon woηbiin aa mu Damaasikas a mu kpage tan-la ari wiihei-siesee, pulumun guu lii wia nyun a faasa chaana hemi le. <sup>7</sup> Mi tuu tel tinȚeen aη nii nii-la yiikoro duu bul mi teen a bul, ‘Sool, Sool, beε ne tii η to mi naasin a dudogise mi ηla?’ <sup>8</sup> Nii nε mi pieε, ‘Kubeε nε, tiina?’ Yiikori-la bul, ‘Mi-na Yesu si lii Nazaret, nii-la η sii to u naasin a dudogise.’ <sup>9</sup> La di nialin fa sii veη, ba na pulun-la, aη bi nii-la fa sii bul wiaa mi teen yiikoro nia. <sup>10</sup> Nii nε mi pieε, ‘Mi ηii mi Tiina?’ Mi Tiina bira bul, ‘Sii juu Damaasikas. Dime ba jan dagin wii-la kala mi si liisin di η ηaa.’ <sup>11</sup> Pulun-la chuule mi siaan, mi bira bi naa, ηii nε la di nialin fa sii veη keη mi nisin le a lere juu Damaasikas.

<sup>12</sup> Baal kubala fa he dime, baa yire Ananayas. U faa fa Wia nε a tuto wialin Moosis fa si ηmunsa bil di niaa tuto. Juu timma-la kala fa si he Damaasikas le zizilu. <sup>13</sup> U ko mi teen a chin mi seme a bula pimi a bul, ‘Mi naanbii Sool, keη η siaan suri.’ Bua-la titia le mi siaan suri, mi bee nau. <sup>14</sup> Nii nε Ananayas bula pimi a bul, ‘Wia-la la di la naabalimaba sii to nε liisin di η jin wii-la u sii che di η

ŋaa. U leŋ ŋ na Wia Tuopul Tiina a nii u yiikoro maa u si bul wiaa piŋ. <sup>15</sup> N jaŋ ŋaa u siada tiina, a bula pi niaa wii-la ŋ si nia aŋ pe naa. <sup>16</sup> Bεε ne saa tii ŋ hōŋo dieni? Sii mu a leŋ di ba foŋ Wii-chuōle liiŋ a fo ŋ haacheba ta Yesu doluŋ le.'

*Wia yire Pōol duu bul Wia wiaa a pi nialin si bi Juu tinŋaa ŋaa*

<sup>17</sup> Nii ne mi miira mu Jerusalem a juu Wia-dia a chuchuōle Wia. Mi sii chuōle Wia nii, <sup>18</sup> mi na la Tiina Yesu ari duosoo tuōŋ. U bula pimi a bul, 'Sii lii Jerusalem le lima, bεε wiaa nialin si he daha bi jaŋ sei mi wialin ŋ si jaŋ bula piba.' <sup>19</sup> Nii ne mi bula pi Yesu a bul, 'Mi Tiina, ba jima woruŋ di leena kala mi si mua, mi yie juu Wii-chuōle diisinŋ a keŋe nialin si laa ŋ wiaa dii dime, a ŋmooba aŋ keŋba tō dia. <sup>20</sup> Bua-la le ba si kpu Sitiivinŋ, nii-la fa si ŋaa ŋ siada tiina a bul ŋ wiaa pipi niaa, mina Pōol ma fa he dime a sei di ba kpuu. Ba sii kpuu, mi ne fa pō niaa deenba genninŋ ba si wuro, aŋ ka ba kpuu.' <sup>21</sup> Nii ne mi Tiina bula pimi a bul, 'Sii daha, mi jaŋ timinŋ di ŋ mu di-bolii, nialin si bi Juu tinŋaa ŋaa lerinŋ.' "

<sup>22</sup> Pōol fa sii bul wiaa nii, nialinŋ kala fa jegile nii. Ama u si bul wiinŋ deenŋ, ba bira suomo ŋaa goŋ a bul, "Má kpu ni-tōōŋ deenŋ, u bi maga duu he dunia le." <sup>23</sup> Ba ŋiŋaa goŋ, aŋ keŋ ba genninŋ

kpikpesi a ŋaa hagila yuyuo. <sup>24</sup> Nii ne Rom laali-yuoroo kuhianŋ-la bul di laali-yuorola keŋ Pōol kaa juu laali-yuoroo dii-duo-la. U si di ba viiru aŋ piēsa na wii-la si tii ba kala lii u harinŋ aŋ ŋiŋaa goŋ ŋla. <sup>25</sup> Nii ne ba vōbu di ba viiru. Ba sii che di ba viiru, Pōol piēse laali-yuoroo kuhianŋ-la fa si chinŋ dime a bul, "U maga di ba viire nuu si ŋaa Rom tiina aŋ bi u sariya die, a dagu u wu-cheelinŋ koo?" <sup>26</sup> U si nii wii-la Pōol si bula, u ma bira mu u kuhianŋ teenŋ a bula pu a bul, "Bee na ŋ sii che di ŋ ŋaa wii-la, baal-la ŋaa Rom tiina ne." <sup>27</sup> Nii ne laali-yuoroo kuhianŋ-la titia sii kō Pōol teenŋ a piēsu, "N ŋaa Rom tiina nee? Bula pimi." Nii ne Pōol si, "Oo." <sup>28</sup> Laali-yuoroo kuhianŋ-la ma bul, "Mi ma ŋaa dōŋo ne. Mi ta tinŋ moribiee yuge ne aŋna ku ŋaa Rom tiina." Nii ne Pōol si, "Ba paala lulmi di mi ŋaa Rom tiina ne." <sup>29</sup> Nii ne nialinŋ fa sii che di ba viire Pōol aŋ piēsu, ba suusa lii u teenŋ lima lima. Laali-yuoroo kuhianŋ-la si ku jinŋ ari Pōol ŋaa Rom tiina ne, ka u ŋaa ba keŋ chorumoō kaa vōbu, fawulluŋ kenu maa.

*Pōol chinŋ nialin si yie hilime vuvuure wiaa sipaŋ*

<sup>30</sup> Nii ne laali-yuoroo kuhianŋ-la chiche duu sene jinŋ wii-la si tii Juu tinŋaa bubul Pōol teenŋ nii. U taŋ si pula u ŋaa ba kenu puri, a ŋaa nialinŋ si kpu pusunŋ pipi

Wia kuhiasij ari kuhiasi-la si yie hilimi a vuvuure wiaa ku hilimi. Ba si hilimi nij, u keŋ Pɔɔl kaa lii a ŋaa u chin ba sipaan.

## 23

<sup>1</sup> Pɔɔl fa si chin nij, u chaare u siaa pe nialin fa si yie hilime vuvuure wiaa le an bula piba a bul, “Mi naanbiirin, mi to Wia mi miisinj kala le ne. Mi si tou, mi tuɔbiinaa kala yie chesi ne a kaa kɔ tapulunj deen.” <sup>2</sup> Nii ne nialin si kpu pusun pipi Wia kuhianj dɔŋɔ, baa yire Ananayas, bula pi nialin si china kpage Pɔɔl di ba ŋmoo u niinj le. <sup>3</sup> Ba si ŋmobu nij, Pɔɔl ma bula pu a bul, “N lɔɔ nage jeen si yere, ka ba ŋaa tuɔrunj buge ne di niaa si na. Wia ma janj ŋmobunj nii. N hɔnɔ di ŋ to wialin ba si ŋmunsa bil di la tuto ne a didii mi sariya, an ka ŋ bul di ba ŋmoomi a chei wialin nij.” <sup>4</sup> Nialin si china kpage Pɔɔl piesu a bul, “Nialin si kpu pusun pipi Wia kuhianj ne ŋ tuuse nij?” <sup>5</sup> Nii ne Pɔɔl bira bul, “Mi naanbiirin, ma kiaa sima. Ba ŋmunse Wia teninj tuɔŋ ari u bi maga di la bul wu-bɔŋŋɔɔ a pi nii-la sii beŋ niaa. Mi bi jinj ari u ne ŋaa nialin si kpu pusun pipi Wia kuhianj.”

<sup>6</sup> Pɔɔl si bene nialin si yie hilime vuvuure wiaa tuɔŋ, u na ari dɔŋsunj ŋaa nialin ba sii yire Sadusii tinŋaa, dɔŋsunj ma ŋaa Farisii tinŋaa. Nii ne u faasa bul nialin si yie hilime

vuvuure wiaa teenj a bul, “Mi naanbiirin, mi ma ŋaa Farisii tiina ne, nii-la si lulmi ma ŋaa Farisii tiina ne. Mi laa dii ari nialin si suba janj sii suunj le a keŋ miisinj. Nii ne tii baa dii mi sariya.” <sup>7</sup> U si bul wiinj deen, Farisii timma-la ari Sadusii timma-la bira bi niibala kene. Ba pɔre dɔŋɔ le. <sup>8</sup> Sadusii tinŋaa si di nuu ne suba, u bira bi janj sii suunj le a keŋ miisinj, a bira bul di Wia tinɔdaaraa ma tuo, di ni-dinjinj ma tuo, ka Farisii tinŋaa si di ba kala he dime, di nuu ma ne suba, u janj sii suunj le a keŋ miisinj. <sup>9</sup> Nii ne nialin sii a faasa ŋŋaa gonj. Wia teninj kerichibala dɔŋsunj si he Farisii niaa paati-la tuɔŋ sii a faasa keŋ wialin lilere a bul, “La bi na baala deen si ŋaa wii-la chei. U naga ari ni-dima ne koo Wia tinɔdaara ne sene bul wiaa pupu, la bi u-na jinj.” <sup>10</sup> Nii ne ba keŋ wii-la faasa lere, lerinj kala hosi. Fawullunj keŋ laali-yuoroo kuhianj-la ari ba janj keŋ Pɔɔl lere puose. Nii ne u ŋaa u laali-yuoroo juu nialin tuɔŋ a loriko laau nialin teenj, a kenu kaa mu laali-yuoroo dii-duo-la.

<sup>11</sup> U tanj si bire, titanj-la titia la Tiina Yesu kɔ Pɔɔl teenj, a chinj u seme, a bula pu a bul, “Nyire ŋ boye. U maga di ŋ dii mi siada a bul mi wiaa Rom le ari ŋ si bul mi wiaa nij Jerusalem le.”

*Juu tinŋaa ka vuure di ba kpu Pɔɔl*

<sup>12</sup> U taŋ si pula, Juu tinȚaa dɔŋsun hilimi dɔŋɔ ɛ a vuure di ba kpu Pɔɔl. Ba ta niin ne ari ba ne buu kpua, ba bi jaŋ dii kiaa. Ba bi jaŋ nyua liin maa. <sup>13</sup> Nialin fa si vuure wiin deen kii niaa mahin balia. <sup>14</sup> Nii ne ba mu nialin si kpu pusun pipi Wia kuhiasin ari nialin kuhiasin teen a bula piba a bul, "La ta niin ne di la ne bi Pɔɔl kpua, la bi jaŋ dii kiaa. <sup>15</sup> Ma di nialin si yie hilime vuvuure wiaa kuhiasin saa tin di ba bula pi Rom laali-yuoroo kuhian-la duu len di Pɔɔl kɔ ma teen. Ma fugi ari maa che di ma wasa dii u sariya ne. La jaŋ ŋaa siri duu ne lenje u kukɔ, u bi jaŋ yima, ka di la kpuu."

<sup>16</sup> Pɔɔl dihaala bie ma nii ba sii vuure nii, a mu juu laali-yuoroo dii-duo-la a bul wii-la pi Pɔɔl. <sup>17</sup> Nii ne Pɔɔl yire laali-yuoroo kuhian dɔŋɔ a bula pu a bul, "Keŋ bapuoŋsi-bie deen kaa mu ma kuhian teen, u keŋ wii ne duu bula pu." <sup>18</sup> Nii ne u kenu kaa mu ba kuhian teen a bula pu a bul, "Pɔɔl, nii-la ba si kaa tɔ dia ne yiremi a bula pimi di mi keŋ bapuoŋsi-bie deen kaa kɔ ŋ teen, duu keŋ wii ne duu bula pin." <sup>19</sup> Nii ne kuhian-la keŋ bile nisin ɛ a kenu lii mua, a fiela piesu di wu-bee ne u keŋ di u bula pu? <sup>20</sup> Nii ne u bul, "Juu tinȚaa vuure ne di ba bula pin di ŋ chie len di Pɔɔl kɔ nialin si yie hilime vuvuure wiaa kuhiasin teen. Baa fugi ari

baa che di ba wasa dii u sariya ne. <sup>21</sup> Saa si sei, bee wiaa nialin dɔŋsun jaŋ faa wonbiin ɛ a gberu. Ba kii niaa mahin balia. Ba ta niin ne di ba bi Pɔɔl kpua, ba bira bi jaŋ dii kiaa, ba bi jaŋ nyua liin maa. Ba ŋaa siri ne di ŋ ne pu wonbiin duu kuko." <sup>22</sup> U si bul nii dere, kuhian-la bula pi bapuoŋsi-bie-la a bul, "Si bula pi nuu-kala ari ŋ bul wiin deen pimi," aŋ ŋaa u viiri.

*Ba keŋ Pɔɔl mu tinȚeen kuoro Fiilis teen*

<sup>23</sup> Nii ne laali-yuoroo kuhian-la yire u laali-yuoroo kuhiasin balia a bula piba a bul, "Ma liise laali-yuoroo zo-balia di ba ŋaa siri di ba di Pɔɔl mu Sizariya, a pe jajillaa mahin batori ari fii ɛ, ari nialaa ma si keŋ tinȚee zo-balia. Len di ba ŋaa siri di ba lii titanin deen kerifi nibi ɛ. <sup>24</sup> Ma che janin a liisa pi Pɔɔl duu ma jil, a kenu worun a kaa mu Sizariya, a kenu kaa mu he tinȚee-la kuoro Fiilis nisin ɛ." <sup>25</sup> Nii ne ka laali-yuoroo kuhian-la ŋmunse tenin a piba di ba kaa mu pi kuoru-la a tin wiin deen wiaa. Nla ne u bul ten-la ɛ:

<sup>26</sup> "Mi-na Kulɔɔdios Lisias ne ŋmunse tenin deen a pipi mi nyimma kuoro Fiilis. Mii chuɔluŋ worun. <sup>27</sup> Baala deen mi si ŋaa ba kaa kɔ ŋ lerin, Juu tinȚaa ne fa kenu di ba kpuu. Ba sii che di ba ŋaa nii, mi nii ari u ŋaa Rom tiina ne. Nii ne mi keŋ

mi laali-yuoroo mu, la loriko laau ba nisiin ƛ. <sup>28</sup> Mi faa che di mi nii wii-la si tii ba bubul u teenj. Nii ne mi kenu kaa mu ba nihiasinj si yie hono vuvuure wiaa teenj. <sup>29</sup> Ba si piesu wiaa, mi na ari u bi wii-kala cheye a mage di ba kpuu koo di ba kenu to dia. Wii-la si tii ba bubul u teenj tige ba titia kisinninj ƛ ne. <sup>30</sup> Ba si bula pimi ari Juu tinŦaa doŦsunj vuura ne di ba kpuu, nii ne mi si di ba kenu kaa ku pinj lima lima. Mi saa bula pi nialinj sii bul u teenj ne di ba ko Ŧ teenj, a ma dage wii-la u si Ŧaa chei a pinj.”

<sup>31</sup> U si ŦmunŦe tenj-la dere, laali-yuoro-la Ŧaa nii u si bula piba. Titanj-la ba kenj Pooƛ kaa mu yi tanj kubala baa yire Antipatis. <sup>32</sup> U tanj si pula, laali-yuoro-la sii venj naasinj ƛ ne miira ko ba diiduo-la, anj ka janiŦ tinŦaa kenu mu Sizariya. <sup>33</sup> Ba si yi dime, ba jonj Pooƛ pi ba tinŦeenj kuoro, a jonj tenj-la ma pe. <sup>34</sup> Nii ne kuoro-la karime tenj-la anj piese Pooƛ lee-la u si lia. U bul duu lii Siliisia ne. U si nii nii, <sup>35</sup> u bula pu a bul, “Buala ƛ nialinj sii bul Ŧ teenj ne ko, mi janj nii wii-la Ŧ si kene di Ŧ bul, anj ka di mi-na dii Ŧ sariya.” Nii ne u Ŧaa ba kenj Pooƛ mu he dii-balla Herod si saa, a Ŧaa laali-yuoroo pupou dime.

## 24

*Juu tinŦaa bul Pooƛ teenj*

<sup>1</sup> Tapulaa banonj si kiele, nialinj si kpu pusunj pipi Wia kuhianj baa yire Ananayas sii mu Sizariya, kuoro Fiilis teenj. Ba di nialinj kuhiasinj doŦsunj ari sariya didi-ire kubala baa yire Tatulas, ba kala ne mua. Ba si mu u teenj, ba suomo bubul wii-la si tii ba bubul Pooƛ teenj. <sup>2</sup> Tatulas ne ba laa sipaanj yire duu dage wii-la Pooƛ si Ŧaa chei. Nla ne u suomi, “Mi nyimma, Ŧ ne wuo bibenja worunj a lenj la honj ari yarifiƛaa. Nj si wuo bibenja nii, Ŧ wase wiaa yuge a pila ba zomo la tinŦeenj deenj ƛ. <sup>3</sup> La tanj seme-na kala la tuonj toro worunj wiinj deenj ƛ bua-na kala ƛ ne. La saa lollunj kinkenj. <sup>4</sup> Mi bi che di mi bul wiaa dieni. Mi saa sulunj di Ŧ kenj kenyiri anj jegile nii wii-la la si kene di la bul. La janj kerii wii-la la si janj bul kuii. <sup>5</sup> La na di baala deenj Ŧaa wu-heeru ne. Juu tinŦaa si he dunia seme-na kala ƛ, u yie mu lee-la a Ŧaa taawei. U ne Ŧaa Nazaret niaa paati kuhianj maa. <sup>6</sup> U faa che duu ma Ŧaa disinninj ne Wia-dia ƛ. Nii ne la kenu [a faa che di la dii u sariya la naabalima wonbii-la ƛ la sii to nii. <sup>7</sup> Nii ne laali-yuoroo kuhianj ba sii yire Lisias ku hosi a kenu loriko laa la teenj. <sup>8</sup> U ne bula pi la nialinj kala sii bul Pooƛ teenj di la ko Ŧ teenj a bula pinj wii-la si tii la bubul u teenj.] Di Ŧ ne piese baala deenj, Ŧ titia janj jinj ari wialinj kala la si bula a

tigeu le Țaa wutitii ne.”<sup>9</sup> Nii ne Țuu tinȚaa ma sii pe a bul di wii-la kala u si bula Țaa wutitii ne.

*PƆol bul wiaa duu laa u titia kuoro Fiilis sipaan*

<sup>10</sup> Nii ne tinȚeen kuoru-la liisi PƆol duu bul wii-la u ma si kene duu bul. Nii ne u bul, “Mi jima ari Ț dii sariya tinȚeen deenȚ le u jisinȚ bolie. Mi tuonȚ saa tɔɔ mi si janȚ bul wiaa a laa mi titia Ț sipaanȚ.<sup>11</sup> Ț janȚ wuo piesa nii Ț titia le ari bua-la le mi si ku mu Jerusalem di mi chuɔle Wia Wia-dia le, u bi tapulaa fii ari balia kii.”<sup>12</sup> Țuu tinȚaa bimi Țaa di la di nuu-kala kenȚ wii lilere Wia-dia le, mi bi taawei ma Țaa Wii-chuɔle diisinȚ le koo lee kala tanȚ-la le.<sup>13</sup> Ba bira bi janȚ wuo dage ari wialinȚ ba si si mi Țaa chei Țaa wutitiiba ne.<sup>14</sup> Wii-la mi si janȚ bula pinȚ ari u Țaa wutitii ne Țla: Ba wialinȚ kala tuonȚ mii to wonȚbii-la ba sii chei ne. WonȚbii-la mi sii to, mi maa to la naabalimaba Wia ne. Mi ma Țaa wialinȚ kala Moosis si ȚmunȚa bil di la to yarida, aa to tenni-la nialinȚ sii bul wiaa, Wia DiȚ-zonȚ-la dolunȚ le si ȚmunȚa kala maa.<sup>15</sup> Mi ma laa dii ari Wia janȚ chise ni-zonȚɔɔ ari ni-bonȚɔɔ kala suunȚ le. Niaa deenȚba kala si chinȚ Ții, ma laa wiaa deenȚba kala dii ne.<sup>16</sup> Mi yie wiwalime worunȚ di mi tuobiinaa kala chesi Wia ari nuhuobiinee kala sipaanȚ.<sup>17</sup> Mi si lii Jerusalem le diene, a yi jisi ari jisi. Leele ne mi kɔ a kenȚ moribiinȚ kaa kɔ di

mi pi mi tinȚeen niaa anȚ pe kpu pusunȚ pi Wia.<sup>18</sup> Nii le ba nami Wia-dia le. Bua-la le ba sii nami, di mi piise mi disinninȚ dere. Ni-danȚ kala tuo mi teenȚ. Mi bi taawei ma kala Țaa. Țuu tinȚaa donȚsunȚ si lii Esia tinȚeenȚ ma ne fa he dime.<sup>19</sup> Di ba ne fa kenȚ wii-kala a tigemi le, u fa maga di ba titia ne kɔ daha a ku bul.<sup>20</sup> Nii ma dee, lenȚ di niaa deenȚba si he daha bul wii-la ba si na di mi Țaa chei bua-la le mi si chinȚ nialinȚ si yie honȚ vuvuure wiaa sipaanȚ.<sup>21</sup> Wii-la dunȚduȚa mi si Țaa ne Țla: Mi fa chinȚ ba sipaanȚ a faasa bula piba a bul, ‘JininȚ maa dii mi sariya a tinȚ mi si laa dii ari ni-suunȚunȚ janȚ sii suunȚ le a kenȚ miisinȚ.’ ”

<sup>22</sup> Fiilis si nii Ții, u jinȚ wonȚbii-la PƆol sii to wiaa worunȚ. Nii ne tii u bul di ba sii. Ka u bula piba a bul, “Má lenȚ di laali-yuoroo kuhianȚ Lisias ne kɔ. Nii-na mi janȚ dii ma sariya.”<sup>23</sup> U Țaa laali-yuoru kubala bibenȚ PƆol, anȚ bula pu duu kenu tɔ anȚ lenȚ duu nina wiese, duu pi u nanȚdonȚsunȚ wonȚbiinȚ di ba ku ninau di ba bubul wiaa. Duu nii che kunȚ maa, di ba peu le.

*PƆol chinȚ Fiilis ari Dusila sipaanȚ*

<sup>24</sup> U bi diene di Fiilis kenȚ u haala kaa kɔ. U yirinȚ ne Dusila. U fa Țaa Țuu tiina ne. Nii ne Fiilis tima yire PƆol duu kɔ. U sí kɔ, u Țaa u bul wiaa pu u jijegili. U bul Yesu Kirisito wiaa pu a bula pu duu laa u wiaa dii.

<sup>25</sup> Ama PƆol si mu bul wiaa a tige wu-zoŋŋoɔ ŋaanɪŋ lɛ ari ŋ si wuo keŋ ŋ titia lɛ, a bira bul tapulii-la Wia si jaŋ dii dunia niaa sariya wiaa maa, fawulluŋ keŋ Fiilis. Nii ne u bul duu mu, ka duu nina chiniŋ u jaŋ bira yiru. <sup>26</sup> Nii kala lɛ u faa biine ari PƆol jaŋ pu moribiiniŋ. Nii wiaa ne tii u yie yiyiru tete tete ba yie bubul wiaa. <sup>27</sup> Jisin balia si kiele, baal kubala baa yire PƆokos Fesitis ne fa laa tinteenŋ kuoro Fiilis leriŋ. Fiilis faa che di Juu tinŋaa chou, nii ne tii u ŋaa ba ha keŋ PƆol to dia.

## 25

*PƆol sul di ba kenu mu tinteenŋ kuori-baliŋ teenŋ*

<sup>1</sup> Fesitis si ku laa tinteenŋ, u hoŋ Sizariya lɛ tapulaa batori aŋ sii mu Jerusalem. <sup>2</sup> U si mu Jerusalem nii, nialiŋ si kpu pusuŋ pipi Wia kuhiasin ari Juu tinŋaa kuhiasin ku bul wii-la PƆol si ŋaa cheiba pu, aŋ sulu <sup>3</sup> duu peba lɛ a ŋaa di PƆol ko Jerusalem. Ba vuura ne di ba cheme kpuu woŋbiiniŋ lɛ. Nii ne tii ba bul nii. <sup>4</sup> Nii ne Fesitis bul di ba kenu to dia ne Sizariya tinteenŋ lɛ, duu si lee-la lii, duu ma jaŋ miira mu dime sisele. <sup>5</sup> Nii ne u bul di ba leŋ di ba kuhiasin to u hariŋ mu Sizariya, di u ne ŋaa wii cheiba lɛ, di ba bul u teenŋ dime duu nii.

<sup>6</sup> Fesitis chua Jerusalem lɛ ari tapulaa chori koo fii aŋ-na miira mu Sizariya. U taŋ si pula, u mu hoŋ sariya

didilliŋ aŋ ŋaa ba keŋ PƆol kaa ko. <sup>7</sup> PƆol si ko, Juu timma-la si lii Jerusalem ko, ba ku gollu chu a bul di wialiŋ PƆol si cheye yuga ne siifese, ama ba bi wuo dage ari wialiŋ ba si bula a tigeu lɛ ŋaa wutitiiba. <sup>8</sup> Nii ne PƆol ma bul wiaa duu laa u titia a bul, "Mi bi Juu tinŋaa naabalimaba woŋbii-la ba sii to wii-kala cheye, mi bira bi wii ma kala cheye a tige Wia-dia lɛ koo Rom kuori-baliŋ ma lɛ." <sup>9</sup> Fesitis ma faa che di Juu tinŋaa chou ne, nii ne u pieŋe PƆol ari u jaŋ cho duu mu Jerusalem duu dii u sariya dime a tinŋ wiaa deenba ba si bula a tigeu lɛ koo? <sup>10</sup> Nii ne PƆol si, "Ai, mi jaŋ cho di mi mu kuori-baliŋ teenŋ. U maga di u ne dii mi sariya. N titia jima woruŋ ari mi bi wii ŋaa chei Juu tinŋaa lɛ. <sup>11</sup> Di mi ne fa ŋaa wii chei a mage di ba kpumi, mi faa sei ne, ama di wialiŋ kala ba sii bul ŋaa wu-nyiarin ne, nuu-kala tuo duu wuo joŋmi he ba nisin lɛ di ba kpumi. Mii suluŋ di ŋ leŋ di mi mu kuori-baliŋ teenŋ duu ne dii mi sariya." <sup>12</sup> Nii ne Fesitis ari u nihiasin vuure wiaa. Ka u bula pi PƆol a bul, "Na ŋ si ŋ jaŋ mu kuori-baliŋ teenŋ duu ne dii ŋ sariya. N saa jaŋ mu."

*PƆol chiniŋ Agiripa ari Bɛenis sipaanŋ*

<sup>13</sup> U bi diene di kuoro kubala ba sii yire Agiripa ari u dihaala ba sii yire Bɛenis ko di ba chuole Fesitis Sizariya lɛ. <sup>14</sup> Ba si mu dime



tapulaa banmene, Fesitis bul Pool wiaa kala a piba a bul, "Baal kubala ne he daha. Fiilis ne fa kenu kaa to dia. U ha he dime. <sup>15</sup> Mi si mu Jerusalem, nialin si kpu pusun pipi Wia kuhiasin ari ba nihiasin Juu tinŋaa tuon ku bul wialin u si naa cheiba le, an bul di mi dii u sariya a jon cheerin pu. <sup>16</sup> Nii ne mi bula piba ari Rom tinŋaa bi sei di ba bul duu cheye ne an jon tiina he u dindonhoo nisin le, see di ba kala hono, di donjo bul u wiaa, donjo ma bul u wiaa. <sup>17</sup> Nii ne ba ko daha. Ba si ko, mi bi kaa dieni. U tan si pula, mi mu sariya didillin an naa ba ken baal-la kaa ko. <sup>18</sup> Nialin fa sii bul Pool teen sii chin a bul wialin Pool si naa chei. Mi fa biina di ba jan dage wubomola u si naa. Ama ba bi wuo dage. <sup>19</sup> Wii-la ba si bula ne naa wu-kaa-lerii ne ba kaa lere a mu tige ba Wii-chuolun le ari baal kubala si suba, baa yire Yesu. Pool yie bubul ari Yesu sii suun le a he u miisin le. <sup>20</sup> Mi fa bi jin nii mi si jan to a jin wiin deen tuon. Nii ne mi piесе Pool ari u jan sei a mu Jerusalem di ba dii u sariya dimee? <sup>21</sup> Pool bi seye. U sulmi di mi len di ba benu a kenu kaa mu kuori-balin teen di u dii u sariya. Nii ne mi naa ba bibenu. Mi ne ku na wonbiin, mi jan len di ba kenu mu kuori-balin teen di u dii u sariya." <sup>22</sup> Nii ne Agiripa bula pi Fesitis ari u titia cho duu ma nii baal-la

niin ne. Nii ne Fesitis bula pu ari u chie jan nii u wubulun.

<sup>23</sup> U tan si pula, Agiripa ari Beenis mu sariya didiilin. Ba kpiere ba titia worun a mu juu dii-bal-la. Naa zilba kinken. Ba di laali-yuoroo nihiasin ari ni-balaa tan-la le, ba kala ku juu a hon donjo le. Ba kala si hon nii, Fesitis naa ba ken Pool ku juu. <sup>24</sup> Nii ne Fesitis bul, "Kuoro Agiripa, ma di nialin kala si he daha, ma na baala deen. U wiaa ne tii Juu timma-la si he daha ari Juu timma-la si lii Jerusalem kala ku wiwalimemi. Baa naa gon a bul di u bi maga di u ken miisin. <sup>25</sup> Mi-na bi na ari u si naa wii-la chei a mage di ba kpuu. Ama u titia ne sulmi ari u jan mu kuori-balin teen duu dii u sariya. Mi saa jan len duu mu. <sup>26</sup> Ama mi paala bi chaasa jin wii-la kala mi si jan nmunsa pi kuori-balin a mu tigeu le. Nii ne tii mi kenu kaa ko ma teen di ma nii u wiaa. N-na kuoro Agiripa teen ne mi saa paala kenu kaa ko. Mi biina ari n ma ne juu wii-la tuon, n jan wuo na wii di mi wuo nmunse tenin pi kuori-balin. <sup>27</sup> U bi wonbii kene mi teen di mi ne len di ba ken dansarika kaa mu kuori-balin teen, an bi chaasa bul wii-la kala u si naa chei."

## 26

*Pool bul wiaa duu laa u titia Agiripa sipaan*

<sup>1</sup> Nii ne Agiripa bula pi Pool a bul, "Wonbiin he dime di η bul wiaa a laa η titia." Nii ne Pool suomo bul wiaa a jijaake u nisaa a bul, <sup>2</sup> "Kuoro, mi jan bul di mi nyun sima jinin mi si jan wuo bul wiaa a laa mi titia η sipaan wiaa deenba kala le Juu tinnaa sii bul mi teen, <sup>3</sup> bee wiaa η-na paala chaasa jin Juu tinnaa kisinnin kala ne ari ba wu-kaa-lerin. Mi saa sulun di η ken kenyiri an jegile nii mi teen.

<sup>4</sup> Juu tinnaa kala jin mi fa si nage nii ne a suomi mi hanbiirin kala le. Mi fa yie he mi tinteen ari Jerusalem dununa le ne a ku waa. <sup>5</sup> A lii bunbun kala a kaa ko mi faa to Farisii tinnaa paati-la sii to wonbii-duo-la ne la Wii-chuolun le. Di ba ne seye, ba jan wuo bul ari ba jin nii niin le faafaa kala ne. <sup>6</sup> Ka leele ba len mi chin daha di ba dii mi sariya a tin mi sii yiele wii-la Wia si si u jan naa pi la naabalimaba. <sup>7</sup> La Iziral tinnaa ta-gentisin fii ari balia-la, la kala yiele wiin deen ne, nii wiaa ne tii la fiесе siin a chuchuele Wia wiiheye ari titanin kala nii. Mi sii yiele wiaa deenba ne tii, Juu tinnaa bubul mi teen nii, mi nyina. <sup>8</sup> Bee ne tii ma Juu tinnaa bi wuo laa dii ari Wia jan wuo chise nialin si suba, di ba bira sii suun le?

<sup>9</sup> Mi ma titia fa laa dii ari u maga di mi naa wii-la kala mi si wuo naa a chei Yesu si lii Nazaret yirin. <sup>10</sup> Nii ne mi naa Jerusalem le. Mi

laa dolun nialin si kpu pusun pipi Wia nihiasin teen, an ken Wia niaa yuge a to dia. Di ba ne si di ba kpuba maa, mi yie sei ne, ka ba kpuba. <sup>11</sup> Mi vene dogiseba yuge Wii-chuole diisin kala le, aa walime di ba bul ari ba bi Yesu jin an via u wonbiila. Mi baanin sii kinken ba nyun. Mi paala mu tasin donsun si tuo Juu tinteen le, a to ba naasin a dogiseba dime.

*Pool to nii u si naa a ku laa Yesu wiaa dii*

<sup>12</sup> Wiin deen wiaa ne tii mi sii mu Damaasikas. Nialin si kpu pusun pipi Wia kuhiasin tinmi a pimi dolun. <sup>13</sup> Mi sii mu wonbiin le mi nyina, ari wiihei-siesee mi na pulumun duu lii wia nyun a chaana he la di nialin fa sii ven le. U pulla kii wii-posun. <sup>14</sup> La kala tuu tel tinteen. Ka mi nii nuu yiikoro duu bula pimi Hiiburu yiikoro le a bul, 'Sool, Sool, bee ne tii η to mi naasin a dudogise mi ηla? N nage neen ne ba si vobo an ηmunmoo duu ven. U bi sei duu ven an dudogise u titia ne.' <sup>15</sup> Nii ne mi piесе, 'Kubee ne, Tiina?' Nii ne Tiina bul, 'Mi ne naa Yesu, niila η si to naasin a dudogise. <sup>16</sup> Ama sii chin. Mi ken mi titia ku dagin di mi liisin di η tin tinnaa pimi ne, a naa mi siada tiina, a bula pi niaa η si nami nii jinin, ari nii η si jan bira nami maachie. <sup>17</sup> Mi jan timin di η mu Iziral tinnaa teen ari

nialin̄ si bi Juu timma Țaa kala teen̄. Di ba n̄ii walimin̄, mi jaȚ laȚ ta ba nisin̄ Ț. 18 Mi jaȚ timin̄ di Ț mu Țaa di ba siaa suri, a ken̄ba di ba birima lii birimin̄ tuȚȚ a ku juu pulumun̄ tuȚȚ, a Țaa di ba lii Sitaani nisin̄ Ț a kƆ Wia teen̄. Di ba ne Țaa Ții aȚ laa mi wiaa dii, Wia jaȚ joȚ ba haacheba cheba. Ba jaȚ wuo na lerin̄ Wia si tuȚsa nialin̄ tuȚȚ.’

*PƆol to u tinȚinȚaa naasin̄*

19 Ții wiaa kuoro, mi bi yiikori-la si lii wia nyun̄ wiaa via. 20 Ții ne mi suomo bul Wia wiaa Damaasikas Ț ari Jerusalem Ț a kaa mu Judiya tinȚeen̄ kala, ari nialin̄ si bi Juu timma Țaa tuȚȚ. Mi bula piba di ba birima lii ba haacheba Ț aȚ birima to Wia, aȚ ȚȚaa wialin̄ si jaȚ dage ari ba birima lii ba haacheba Ț ne. 21 Wiin̄ deen̄ wiaa ne tii Juu tinȚaa ken̄mi Wia-dia Ț aa che di ba kpumi. 22 Ama ari jinin̄ kala Wia haa pemi Ț ne, Ții ne tii mi chin̄ daha aa bul wiaa deen̄ba kala mi si Țaa siada a pima, ma ni-balaa ari ma ni-biisin̄ kala. Wiin̄ deen̄ mi sii bul, u titia ne nialin̄ fa sii bul wiaa, Wia Din̄-zȚȚ-la dolun̄ Ț ari Moosis kala fa bul ari wii-la jaȚ Țaa. 23 Ba fa bula ari Kirisito jaȚ na heȚȚ a suu, a laa sipaan̄ a sii suun̄ Ț nialin̄ si suba kala tuȚȚ. Ba bira bula pi Juu tinȚaa ari nialin̄ si bi Juu tinȚaa ma Țaa ba si jaȚ Țaa Ții a na pulumun̄.’

24 PƆol si bul wiaa duu laa u titia Ții, Fesitis kpiau Ț a bula pu a bul, “PƆol, ȚȚ nyaase ne. Ț wu-jin̄ kin̄ken̄ kin̄ken̄ kenin̄ nyinyaase ne.”

25 Ții ne PƆol bul, “Mi bi nyaase mi nyina. Wutitii ne mii bul. Mi siaa kala ne fiela. 26 Kuoro Agiripa, Ț jin̄ wiaa deen̄ba kala ne. Ții ne tii mi wuo bubulba ari nyu-duȚȚ. Mi jima ari wiaa deen̄ba kun̄-kala tuo Ț si bi jin̄. Wiaa deen̄ba kala si Țaa, ba bi wu-faalaa Țaa.

27 Kuoro, Ț laa nialin̄ sii bul wiaa, Wia Din̄-zȚȚ-la dolun̄ Ț wiaa dii neȚ? Mi jima Ț laa dii ne.” 28 Ții ne kuoro Agiripa piȚȚ PƆol a bul, “Ț biina ȚȚȚ-bie deen̄ Ț jaȚ wuo leȚ di mi laa Yesu wiaa dii a tutou koo?” 29 Ții ne PƆol bul, “U Țaa ȚȚȚ-bie koo u bi ȚȚȚ-bie Țaa, mii chuȚȚ Wia ne di ma di ni-kaana-la kala sii jegile nii mi teen̄ jinin̄ deen̄, di ma ku nagemi ari mi si laa Yesu wiaa dii Ții. Ama mi bi che di ma nagemi ari ba si ken̄mi vȚȚ ari chorumȚȚ Țla.”

30 PƆol si bul wiaa deen̄ba deȚȚ, Ții ne tinȚeen̄ kuoro ari nii-la si chin̄ kuori-balin̄ nyun̄ ari Beenis ari nialin̄ kala fa si hȚȚȚ, ba sii di ba viiri. 31 Ba si lii di-jalin̄ Ții, ba bula pipi dȚȚȚ a bul, “Baala deen̄ bi wii-kala cheye a mage di ba kpui koo di ba kenu to dia.” 32 Ții ne Agiripa bula pi Fesitis a bul, “Di baala deen̄ fa bi won̄biin̄ sula ari u jaȚ mu kuori-balin̄ teen̄ duu dii u sariya, mi fa

janj bul di ŋ jonu ta.”

## 27

*PƆol juu liiŋ daboro a duoro mu Rom*

<sup>1</sup> Nii ne ba vuure di la juu liiŋ daboro a mu Itali. Ba jon PƆol he laali-yuoroo kuhianj kubala nisinj le a pe danŋarikaba doŋsunj le. U lii Rom ne a fa ŋaa kuhianj Rom kuori-balinj laali-yuoroo tuonj. Baa yiru Julias. <sup>2</sup> La mu juu liiŋ daboro si lii tanj kubala baa yire Adamiitam a ŋaa siri duu mu tasi-la si he mugibalinj niinj Esia tinteenj le. Baal kubala baa yire Arisitaakis ma fa he la tuonj ne. U fa ŋaa Masidoonia tiina ne a lii Tesalonaaka. La si mu nii, <sup>3</sup> u tanj si pula la mu yi tanj kubala baa yire Saadonj. Julias fa kenj zile PƆol teenj a pu wonbiinj duu mu na u nanŋdoŋsunj, di u nii che kunj maa, di ba peu le. <sup>4</sup> La bira sii dime. La sii mu, di pelinj lu lii lee-la la fa si chaasa. La miira mu to tinteenj kubala liiŋ si gollo chu, baa yire Saapɔs. La to seme-la si kere pelinj. <sup>5</sup> La kperɛ to Siliisia ari Panŋfilia tinteenj niinj, a mu yi lee kubala baa yire Maara. U fa he Laasa tinteenj ne. <sup>6</sup> Dime ne laali-yuoroo kuhianj-la na liiŋ daboro doŋɔ duu lii Alekizandia aa mu Itali. U ŋaa la juu. <sup>7</sup> La fiela duori nii deenj deenj tapulaa banmene a na heenj kinkej, anj sisele ku kpage tanj kubala baa yire Sinaadas. Pel-la bi seye di

la to dime. Nii ne la bira kperɛ to tinteenj kubala liiŋ si gollo chu, baa yire Kiriiti, a ku yi lee kubala baa yire Salimooni. La kperɛ to tintee-la seme-la si kere pelinj. <sup>8</sup> La si kperɛ to lii-la niinj nii, la na heenj woronj an-na ku yi lee kubala baa yire Fee Heevins. U fa kpage tanj kubala baa yire Lasiya.

<sup>9</sup> La honj dime a dieni, juu tinŋaa tapul-bal-la ba si yie kpu pusonj pi Wia, duu jon ba haacheba cheba, ku kieli. Bua-la le liiŋ duoronj yie hei ne. Nii ne PƆol bul wiinj deenj chagileba a bul, <sup>10</sup> “Mi naanbiirinj, mi na ari la wonbii-la veninj janj kperila. Má leŋ di la honj daha. Di la ne si la mu, la liiŋ daboro ari la chugusunj janj chei, la doŋsunj ma janj suu.” <sup>11</sup> Ama laali-yuoroo kuhianj-la fa bi PƆol teenj jegile nii, anj jegilee nii liiŋ daboro-la kuhianj ari liiŋ daboro-la tiina teenj. <sup>12</sup> Ba si lee-la bi zonj ari ba si janj he dime yibiininj le. Ba tuonj jesinj kala fa cho di ba juu liiŋ daboro-la, a wiwalime di ba ne wuolo, di ba mu yi tanj kubala baa yire Fiinis a he dime yibiininj. Fiinis ne fa ŋaa lee-la liiŋ daborusunj si yie chinj a he Kiriiti tinteenj. U fa he tanj seme ari tanj bubuonj pege, a bira pinj tanj seme ari tanj nyunj pege maa a kere pelinj.

*Lii-pelinj lu mugibalinj le*

<sup>13</sup> Nii ne pelinj fiela lu a lii tanj bubuonj a kuko. Nialinj

biina ari ba jan na wonɓiin a ven ari ba fa si biina nii ba tuon le. Nii ne ba ken hoo-bal-la ba si yie kaa chage liin daboro-la a kaa liise a he liin daboro-la tuon, an duoro kperɛ to Kiriiti tinteen niin nii. <sup>14</sup> U bi diene di peli-duon faasa lu a lii tan nyun ari wii-pɔsun pege. U lii tinteen liin si gollo chu ne a kuko. <sup>15</sup> U ku nmoo liin daboro-la, la bi pel-la wuo chaase. La bi wii-kala wuo naa. Nii wiaa la len pel-la ken liin daboro-la mu lee-la u si lu mumu. <sup>16</sup> Nii ne la to lee kubala liin si gollo chu baa yire Kaada, a to u tan semɛ. U kerɛ pel-la mua. Dime la na heen worun an-na wuo ken liin dabori-bie-la la fa si jonɔ voo liin daboro-la hariin. <sup>17</sup> Ba lere liin dabori-bie-la ku juu liin daboro-la tuon a ken nmesin vobu, an voo liin daboro-la kala kpan kpan. Fawullun fa kenba ari ba jan vene mu juu hagilibunbugulo-la tuon si golli Liibia tinteen a pe dime. Nii ne ba ken genni-la ba fa si jonɔ voo liin daboro-la nyun di pelin kaa ven a kaa ta ba suusa tuu, an len pel-la ken liin daboro-la aa ven. <sup>18</sup> Pel-la faasa lu nii ne deen deen. Tan si pula ba suomo chaare chugusu-la si he liin daboro-la tuon a yuo tita. <sup>19</sup> Tan si pula, la titia chaare liin daboro-la kiaa ba si kaa wase liin daboro-la donsun a yuo ta. <sup>20</sup> La tapulaa yuga wia si bi pɔso, chenwulaa ma bi lia. Ka pel-la ha faasa

lu kinken. Pel-la si faasa lu nii, la bira bi yiela ari la jan ken miisin.

<sup>21</sup> Nialin diene ba bi kiaa die. Ba si diene ba bi kiaa die nii, Pɔol sii chin ba sipaan a bula piba a bul, "Mi naanbiirin, u fa maga di ma jegile nii mi teen. Di ma ne fa jegile nii mi teen, la ne fa bi Kiriiti le lia, la kiaa deenba kala si cheye, ba fa bi chei. Kialin kala si lele ma fa bi lel. <sup>22</sup> Ama mii sulma, ma nyire boye. Liin daboro dunɗunɗa ne jan lel, ama ma kun-kala bi jan suu. <sup>23</sup> Wia-la si tiimi, mi maa chuolu. U tinɗaara dia ko mi teen titanin <sup>24</sup> a bula pimi a bul, 'Pɔol, si fawullun fa. N jan mu chin kuori-balin sipaan. Wia tin n wiaa ne a len ma di nialin kala si he liin daboro tuon, ma kala jan ken miisin.' <sup>25</sup> Nii wiaa, mi naanbiirin, ma nyire boye. Mi naa Wia yarida ari wii-la kala u si bula, u jan chaasa naa. <sup>26</sup> Ama la ta jan mu chin dunɗoli-bie kubala le ne liin si gollo chu."

<sup>27</sup> Pel-la kenla kaa ven nii ne tapulaa fii ari banese mugi-bal-la ba sii yire Adira tuon. U titan-la ari tita-siesee nialin sii duori liin daboro-la, ba biine ari baa mu dunɗolo niin ne. <sup>28</sup> Nii ne ba jon kun he lii-la le di ba magise a na u lunun. Ba na duu lunje a mage naakielin mahin balia. Muapilii ba bira magise a na duu naa naakielin mara ari fii. <sup>29</sup> Fawullun fa kenba ari

ba jan mu nmoo bun. Nii ne ba chaare hoonu-la ba si yie kaa chichage liinj daboro-la a kikii. Ba banese ne ba chaare liinj daboro-la harinj a chagu kii, an susul Wia di tan-pul di ba na pulumun. <sup>30</sup> Nii ne nialinj fa sii duori liinj daboro-la lii a chiche di ba fá, an ka liinj daboro-la ari ni-kaanaa. Ba liise liinj dabori-bie-la a he liinj tuon, a fufugi ari baa che di ba lii liise hoo-la ba si kaa chichage liinj daboro-la sipaan ne. <sup>31</sup> Nii ne Pool jin a bula pi laali-yuoroo kuhian-la ari laali-yuoro-la a bul, "Ma bi jan ken miisinj, see nialinj sii duori liinj daboro-la he liinj daboro tuon." <sup>32</sup> Pool si bul nii, laali-yuoro-la kerim esi-la ba fa si kaa voo liinj dabori-bie-la, a len liinj jonjo viiri.

<sup>33</sup> Tanj si kpage pulun, Pool sul nialinj kala si he liinj daboro-la tuon di ba dii kiaa a bul, "Tapulaa fii ari banese ne nla ma sii gberε wii-la si jan njaama. Ma bi kun-kala die. <sup>34</sup> Nii wiaa mii sulma di ma dii kiaa. Di ma ne dii kiaa, ma jan ken dolun a wuo laa ma titia a ken miisinj. Ma kun nyu-pun ma bi jan wii." <sup>35</sup> Pool si bul nii dere, u jon boroboro, a chuole Wia ba kala sipaan, an choge didii. <sup>36</sup> Ba nyire boyε, ba kun-kala ma dii kudiilee. <sup>37</sup> La nialinj kala fa si he liinj daboro-la tuon fa nja zɔ-balia ari mahinj batori ari fii ari balidu ne. <sup>38</sup> Ba kala si dii kiaa voge, ba chaare mia-la fa si he

liinj daboro-la le a ta, di liinj daboro-la si faasa yun.

### *Liinj daboro ka chei ne*

<sup>39</sup> Tanj si pula, nialinj sii duori liinj daboro-la bi wuo jin di ba yi dun-dolo-la niinj ne, ka ba yi. Ba na di tinteen ne golli lii-la chu, lii-la bi jal. Lee-la kala taale. Ba biina ba jan wuo ken liinj daboro-la a lii lii-la niinj. <sup>40</sup> Nii ne ba kerim hoo-bala-la ba fa si yie kaa chichage liinj daboro-la a lo he liinj le. Ba ken nmen-la ma puri ba si kaa voo danyine-la ba fa si kaa kukuosi liinj, a didage liinj daboro-la wonbiinj. Ba bira wasa ken genni-la maa ba si kaa voo liinj daboro-la sipaan, di pelinj ken liinj daboro-la vinenj. Ba wasa kaa ta ba jil a voo, di pelinj kaa vene mu lii-la niinj. <sup>41</sup> Ama liinj daboro-la fá mu juu hagilibunbugulo tuon fuo-balaa balia si ku chen donjo a kuro bil. Daboro-la sipaan muure, u bi wuo venj, an ka pelbal-la nja lii-pelinj ku nmoo liinj daboro-la, a nja u harinj kala bori. <sup>42</sup> Nii ne laali-yuoro-la vuure di ba kpu dansarikaba-la kala, di ba kun-kala si wuo lii a duori lii-la a fá lel. <sup>43</sup> Ka laali-yuoroo kuhian-la faa che duu laa Pool ta, nii ne u bula piba di ba si nii nja. U ta bula piba ari nialinj kala si jin liinj a he liinj daboro-la tuon, di ba laa sipaan fula tuu a duoro mu lii-la niinj, <sup>44</sup> an ka di ni-kaana-la

ma tuu, di dɔɔnsuŋ paa daa-  
borusuŋ, di dɔɔnsuŋ ma paa  
liiŋ daboro-la dabori-yerie-  
la, a ma kaa duori liiŋ lii. Nla  
ne la kala ŋaa a lii lii-la niinŋ.

## 28

### *Pɔɔl he Malita le*

<sup>1</sup> La si lii liiŋ niinŋ a laa la  
miisinŋ ŋii, la na ari tinȚteen  
ne liiŋ gollo chu ŋii. Nialinŋ si  
he lee-la bula pila ari tinȚtee-  
la yirinŋ ne Malita. <sup>2</sup> Nialinŋ  
keŋla woruŋ lee-la, a pe la le  
kinkeŋ. La si he dime ŋii,  
duonuŋ suomo ninii. Lerinŋ  
fiela woruŋ. Ba he nyininŋ  
pila la wiwieni. <sup>3</sup> Pɔɔl mu  
jaa daasinŋ a kaa ku he nyininŋ  
le, di diminŋ he daasi-la le.  
Wuliminŋ keŋ diŋ-la u ku  
lii a dima pe Pɔɔl nisinŋ le.  
<sup>4</sup> Nialinŋ si he lee-la na di diŋ-  
la dima pe Pɔɔl nisinŋ le ŋii.  
Ba bula pipi dɔɔɔ a bul, “U  
naga baala deenŋ ka kpu niaa  
ne. U wuo lii liiŋ tuɔŋ a keŋ  
miisinŋ, ama Wia bi seye duu  
keŋ miisinŋ.” <sup>5</sup> ŋii ne Pɔɔl  
keŋ diŋ-la kpesi u tel nyinŋ-  
la tuɔŋ, ama diŋ-la si dimu  
ŋii, u buu wii-kala ŋaa. <sup>6</sup> Ba  
faa gberɛ diŋ-la si diŋ Pɔɔl  
ŋii duu ŋmɛɛ, koo duu guu  
tele suu, di ba na. Ba gberɛ a  
dieni. Ba si gberɛ a dieni ŋii,  
ba bi na ari wii-kala ŋaau le.  
Ba keŋ ba tuɔbiinaa birime a  
bul duu ŋaa vene ne.

<sup>7</sup> TinȚtee-la kuoro yirinŋ ne  
fa Pubiliias. U bagisinŋ ma fa  
kpage lee-la ne. U keŋla kaa  
mu u lerinŋ, a keŋla woruŋ  
tapulaa batori. <sup>8</sup> Kuoru-la  
nyimma faa wiile ne a pinŋ

dia le. U yaraa fa lima ne,  
aŋ ka u ninigile. ŋii ne Pɔɔl  
juu nau u dia le a joŋ u nisinŋ  
daŋu le a chuɔle Wia pu, u  
duori. <sup>9</sup> Pɔɔl fa si ŋaa ŋii,  
puwuolo-la kala fa si he lee-  
la kɔ Pɔɔl teenŋ. U ŋaa ba  
duori. <sup>10</sup> Ba pila chɔgitaba  
yuge. Bua-la le la sii che di  
la sii juu liiŋ daboro a duoro  
viiri, ba joŋ kialinŋ kala la sii  
che a he liiŋ daboro-la le di  
la kaa joŋ wonbiinŋ.

### *Pɔɔl lii Malita le a mu Rom tinȚteenŋ*

<sup>11</sup> La he dime cheŋsinŋ  
batori ne aŋ sii juu liiŋ  
daboro a lii Alekizaŋdia.  
Liiŋ daboro-la yirinŋ ne ven-  
daalierinŋ. Yibiininŋ fa si  
suomo, ba fa vɔɔ liiŋ daboro-  
la a bil ne liiŋ niinŋ. <sup>12</sup> La  
sii mu ŋii, la mu yi taŋ  
kubala baa yire Sirakas, a  
chua dime tapulaa batori.  
<sup>13</sup> La bira lii dime a juu  
liiŋ daboro, a duoro mu taŋ  
kubala baa yire Riigiam. U  
taŋ si pula, pelinŋ bira suomo  
lu a lii taŋ bubuɔŋ. U tapu-  
laa balia cheŋ ne la ku yi  
taŋ kubala baa yire Putooli.  
<sup>14</sup> La na nialinŋ dɔɔnsuŋ si laa  
Yesu wiaa dii dime. Ba si,  
di la chua ba teenŋ tapulaa  
balipe. La chua. ŋii ne la  
bira lii dime a mumu Rom.  
<sup>15</sup> La naanbiiri-la si laa Yesu  
wiaa dii Rom le nii la wiaa  
ari laa kɔ ne. Ba ku cheŋla  
di-bolii. Ba dɔɔnsuŋ cheŋla  
lee kubala baa yire Apias  
Yɔɔɔ. Dɔɔnsuŋ ma cheŋla  
lee-la ba sii yire Diisinŋ ba-  
tori Nuhuɔraa sii chua dime.

PƆol si naba, u lolle Wia an nyire u boye.

*PƆol he Rom le*

<sup>16</sup> La si yi Rom, ba pi PƆol wonbiin duu jujuu u dunɔɔna dia, ka ba ŋaa laali-yuoro kubala bibenu.

<sup>17</sup> U tapulaa batori cheɛɛn PƆol yire Juu tinŋaa kuhi-asin tan-la le ba ku hilimi. Ba si ku hilimi nii, u bula piba a bul, “Mi naanbiirin, mi bi wii-kala ŋaa chei la niaa le, mi bi la naabalimaba kisinnin ma cheye. Ama ba kenmi a to dia Jerusalem le, an bira jonmi a he Rom tinŋaa nisin le ŋla. <sup>18</sup> Ba piesemi a na ari mi bi wii-kala cheye a mage di ba kpumi. Nii ne tii ba chiche di ba jonmi ta. <sup>19</sup> Ama Juu tinŋaa bi seye di ba jonmi ta, nii ne fugemi mi sul wonbiin di ba kenmi kaa ko kuori-balin teen duu dii mi sariya. Ama mi-na bi wu-bon kala kene di mi bul a mu tige mi niaa Juu tinŋaa le. Ba ne fugemi mi ko kuori-balin teen. <sup>20</sup> Nla ne tii mi si mi jan nama di la bul wiaa. Ba ken chorumoo deenba voo mi a tin nii-la wiaa ma Iziral tinŋaa sii yiele ari u jan ko le ne.” <sup>21</sup> PƆol si bul nii, ba bula pu a bul, “La bi ten kala laa a lii Judiya a mu tige ŋ le. La naanbiirin kubala ma bi lee-la lii ko a ku bul wu-bon a tige ŋ le. <sup>22</sup> Ama la jima ari lee-na kala niaa yie bubul wu-bonɔɔ a mu tige paati-la ŋ sii to ne.

Nii ne tii la chiche di la nii wialin ŋ si laa dii.”

<sup>23</sup> Nii ne ba he tapulun pi PƆol. Tapulii-la si yie, niaa yuga a ko lee-la PƆol sii juu. PƆol bul Wia kuorii-la wiaa a pipiba siifesiŋ a lii chichuon kala a kaa mumu didaanin. U karime wialin Moosis fa si ŋmunsa bil di niaa tuto, ari nialin fa sii bul wiaa, Wia Din-zon-la dolun le fa si ŋmunsa bil Wia tenin tuon. U dageba nii a bul Yesu wiaa piba, a wiwalime di ba laa Yesu wiaa dii. <sup>24</sup> Nialin si nii wialin u si bula, ba donsun laa dii, donsun ma bi laa dii.

<sup>25</sup> Wiaa deenba ne PƆol bul, ka ba ken wiaa lere donɔ le a sii viiri. U bula piba a bul, “Wialin Wia Din-zon-la si to Azaaya le nii a ŋaa u bula pi ma naabalimaba, ba ŋaa wutitii. Azaaya fa ŋaa nii-la fa sii bul wiaa u dolun le ne.

<sup>26</sup> U fa bula a bul,  
‘Mu niaa deenba teen a bula piba a bul,

Ma jan jegile nii wiaa an bi ba bubuon jin.

Ma jan chaare ma siaa kala an bi kun-kala jan na,

<sup>27</sup> beɛ wiaa niaa deenba nyun dolie,

ba to ba digilaa di ba si wii nii.

Ba ken ba siaa ma to di ba si kun-kala na.

Wia si, di nii dee ba siaa fa jan nina,

ba digilaa ma fa jan ninii wiaa.

Ba nyusun ma fa jan jijin wiaa bubuɔsaa.



Ba fa jaŋ birima tomi  
di mi ŋaa di ba duori.' "

<sup>28</sup> Nii ne Pɔɔl bira bula piba a bul, "U maga di ma jin ari baa bul Wia wu-zɔmɔ-la si laa niaa tita a pi nialin si bi Juu tinŋaa ŋaa ne. Ba jaŋ jegile nii." <sup>29</sup> Pɔɔl si bul wiaa deenba dɛɛ, Juu timma-la keŋ wialin lilɛɛ dɔŋɔ le si-ifiesin, a sii viiri.

<sup>30</sup> Pɔɔl hɔŋ Rom le jisin balia, a yɔɔ u dia u titia le a jujuu. Nuuna kala si kɔ duu nau, u yie kenu woruŋ ne. <sup>31</sup> U bul Wia kuorii-la wiaa a pi niaa, a dagɛ la Tiina Yesu Kirisito ma wiaa ari nyu-duon. Nuuna kala buu to ari u si ŋii ŋaa.

## TEN-LA PƆOL SI ŊMUNSA PI ROM TINŊAA

<sup>1</sup> Mi-na PƆol, si ŋaa Yesu Kirisito tintinna, mi nŋi ŋmunse teniŋ deenŋ a pipi ma Rom tinŋaa. Wia ne yiremi mi ŋaa u nanzɔɔ. U liisemi di mi bul u wu-zɔmɔ-la a pi niaa ne. <sup>2</sup> Wia to nialin sŋi bul wiaa, Wia Diŋ-zɔŋ-la dolun le ne faafaa kala a bula piba di u jan leŋ di ba bul u wu-zɔmɔ-la a pi niaa. Ba ŋmunse ŋii ne Wia teniŋ tuɔŋ. <sup>3</sup> Wu-zɔŋŋɔɔ deenba tige la Tiina Yesu Kirisito le ne. U ŋaa Wia Bii ne a ŋaa nuhuobiin maa. U ŋaa la naabalima kuoro Devit nihii ne. <sup>4</sup> Ama Wia si chisu suun le ŋii, u ŋii wuo dage ari u ŋaa Wia Bii ne, a keŋ dolun a keŋ Wia Diŋ-zɔŋ-la si keŋ tuɔ-pula maa. <sup>5</sup> U lahorimɔ le Wia leŋe mi ŋaa u nanzɔɔ a bul u wu-zɔmɔ-la wiaa a pi dunia niaa kala, di ba laa dii a to Yesu niin a wuo zil u yirinŋ.

<sup>6</sup> Ma ma Rom tinŋaa he niaa deenba tuɔŋ ne. Wia liisema ne di Yesu Kirisito tiima. <sup>7</sup> Ŋii wiaa mi ŋmunse teniŋ deenŋ pipi ma nialin kala si he Rom le, ma nialin Wia si cho a liisema di ma ŋaa tuɔ-pul tinŋaa. La Ny-amma Wia ari la Tiina Yesu lahorimɔ le, ba jan pema le di ma hɔŋ ari yarifielaa.

*PƆol sul Wia, Rom tinŋaa wiaa*

<sup>8</sup> Wii-la mi si keŋe di mi laa sipaan bul ne ŋla: Mi to Yesu Kirisito le aa lolle Wia ma kala wiaa, beŋ wiaa dunia nuu-kala nii ma yarida wiaa ne. <sup>9</sup> Wia-la mi si timaa pa ari mi tuɔ-bala aa bul u Bie wu-zɔmɔ-la wiaa, u ne ŋaa mi siada tiina ari bua-na kala le di mi nŋi chuɔlu, mi yie liliisi ma wiaa ne. <sup>10</sup> Mi yie sulu a chiche wonbiin di mi ku nama. Duu ne seye, mi jan ku nama leele. <sup>11</sup> Mi cho di mi ku nama ne ari siifiesin, a pema le ari kialin Wia Diŋ-zɔŋ-la sŋi che duu joŋo pima di ma dol. <sup>12</sup> Wii-la mi si bul ne ŋla: La jan pipe dɔŋɔ le. Mi si ŋaa yarida ŋii jan leŋ di ma nyun nyaase. Ma ma si ŋaa yarida ŋii jan leŋ di mi ma nyun nyaase.

<sup>13</sup> Mi naanbiirin, mi cho di ma jin, ari mi walima walima di mi ku nama ne, ama wii ne yie tii mi bi ko. Mi cho di mi ŋaa di niaa lii ma tuɔŋ ne a ku to Wia, ari mi si ŋaa ŋii nialin dɔŋsun si bi juu tinŋaa ŋaa le. <sup>14</sup> U maga di mi tin Wia tintinŋaa niaa tuɔŋ. Giriik tinŋaa ari nialin kala si bi Giriik tinŋaa ŋaa, wu-jinnaa ari nialin si bi wiaa jin, ba kala tuɔŋ ne u maga di mi tin Wia tintinŋaa. <sup>15</sup> Ŋii ne tii mi cho di mi bul Wia wu-zɔmɔ-la a pi ma nialin si he Rom tinŋeenŋ le.

*Wia wu-zɔmɔ-la keŋ dolun*

16 Mi bi hiisinj ka fa di mi bul Wia wu-zomɔ-la, bɛɛ wiaa u nɛ ɲaa Wia dolunj. Nialinj si ɲaaba yarida, Juu tinjɲaa ari nialinj si bi Juu tinjɲaa ɲaa kala, Wia janj laaba ta. 17 Wia wu-zomɔ-la dage ɲii Wia si ɲaa niaa wuo kenj tuo-pula u sipaanj. U daga ari nialinj si kenj yarida, ba kenj tuo-pula u sipaanj, di ba wuo chinj ba yarida naanj le a mu dɛɛ. Ba ɲmunɲɛ ɲii nɛ Wia teninj tuɔɲ a bul,  
 “Nii-la kala si ɲaa Wia yarida, u tiina ɲaa tuo-pul tiina nɛ Wia sipaanj,  
 u janj kenj miisinj.”

*Wia baaninj sii ni-bɔɲɔɔ le*

18 Wia baaninj sii ni-bɔɲɔɔ ari nialinj si bi u niinj wiaa ka to le nɛ, bɛɛ wiaa ba wu-ɲaalaa nyage wutitiila bil nɛ. 19 Wialinj niaa si maga di ba jinj a tige Wia le, ba wonjbiinj chaasa pinj nɛ. Wia nɛ dageba. 20 La bi Wia nagisinj wuo jinj. Ama la wuo chaasa na ɲii u si kenj dol-la si bi dɛɛ. U bi nuhuobiine naga. U dagela wiaa deenja, a suomi buala le u si ɲaa dunia a kaa kuko jininj. Kialinj kala u si ɲaa dagela ɲii. ɲii wiaa ni-bɔɲɔɔ deenja bi janj wuo bul ari ba bi jinj. 21 Ba jinj Wia nɛ, ama ba buu zil ari u ɲaa Wia. Ba buu ka lɔlle. Ba tuɔbiinaa kala birima nɛ ba ɲinjaa wu-liilinj. Ba tuɔbiinj-lɔrunu-la kenja kaa mu he biriminj tuɔɲ. 22 Ba to ba yaarinj le a bul ari ba kenj

wu-jiminj nɛ. 23 U fa maga di ba chuchuoɛ Wia-la si kenj yirinj anj bi suu. Ka ba via anj miira me kiaa si nage nuhuobiinee a susuu, a bira me kialinj si nage diibiisinj ari pusunj ari kialinj sii tuuri tinjteenj, a chuchuoɛ.

24 ɲii wiaa Wia jonba ta ba tuto ba titia tuɔbiinj-lɔrunu-la ba sii cho, a ɲinjaa wu-liilinj dɔɲɔ le. 25 Wutitiila ba si jima a tige Wia le, ba jonu lenni wu-nyarinj, a miira chuchuoɛ kialinj u si ɲaa, anj via di ba chuchuoɛ Nii-la si ɲaaba. U maga di la didennu a kaa mu wuu. Ami.

26 A tinj ɲii wiaa, Wia jonba ta nɛ di baa ɲaa wu-liilinj a hihise ba titia. Haalaa ma via di ba di ba balaba pipinj, anj pipinj ba ha-dɔɲsunj teenj. 27 ɲii titia nɛ baalaa ma via di ba jaa haalaa ari Wia si si ba ɲaa ɲii, anj miira kenj ba ba-dɔɲsunj pipinj a hihiene dɔɲɔ, a ɲinjaa hiisi wiaa dɔɲɔ le. Ba sii ɲaa ɲii, baa dɔgisɛ ba titia nɛ ɲii. Dɔgisunu-la mage ba yaraa le.

28 Niaa deenja bi sei di ba jinj Wia. ɲii nɛ tii Wia lenja ta ba tuto ba tuɔbiinj-bɔɲɔɔ-la harinj a ɲinjaa wialinj si bi maga di baa ɲaa. 29 Baa ɲaa wu-bɔɲ yiri-yiri-na kala nɛ. Ba kenj niaa kiaa lilaa, aa ɲaa wu-lɔrununj, a kenj yaribierinj, a kpukpu niaa, a yuyuo yuosunj, a gigirime niaa, a ɲaa wiaa jujuu niaa le, a bubul niaa wiaa. 30 Ba ɲaa yiri-cheeree ma nɛ, a

berε Wia, a ŋaa nii-jigi timma. Ba maa dage ba titia a bibigisi ba titia le. Ba yie chiche wonbii-la ba si jan to a ŋaa wu-bɔŋŋɔɔ. Ba bi ba nyimmaba ari ba naanba niinj ka to. <sup>31</sup> Ba bi wu-jimin kenε, a bi wutitii ma kenε. Ba bi niaa cho, a bi dɔŋɔ ma nennige ka fá.

<sup>32</sup> Ba jin wialinj Wia si bula a tige wu-ŋaalaa deenba le ne. U bula ari nialinj sii ŋaa wiaa deenba, ba maga di ba suu ne, aŋ ka ba via aŋ ŋiŋaa. Nii ma dunɔɔŋa dee. Ba paala bibese nialinj ma sii ŋaa wialinj le ne.

## 2

### *Wia sariya che-diilin*

<sup>1</sup> Ma bi woruŋ ka ŋaa ma si jon cheerinj pipi ma dɔŋsuŋ tinŋaa, ka ma nialinj sii bul niaa teenj a bul di ba cheye ne, ma ŋiŋaa wu-bɔmɔ-la titia. Nii-la-na kala ma si ŋaa, di ma nii ŋaa wu-bɔmɔ-la, ma bira bi wii-kala kenε di ma bul. Ma sii ŋaa nii, ma titia laa cheerinj ne nii le. <sup>2</sup> Wia si jon cheerinj pi ma nialinj sii ŋaa wu-bɔŋŋɔɔ deenba, la jima ari u kenj wutitii ne. <sup>3</sup> Ama ma-na si jon cheerinj pi niaa aŋ ŋiŋaa wu-bɔŋŋɔɔ deenba ma titia le, ma biina ari ma jan wuo fá lel Wia nisinj le duu sí ma sariya dii koo? <sup>4</sup> Wia si kenj zile kinkenj a kenj kenyiri nii, ma bene ari u bi kuŋ ŋaa? Ma bi jin ari Wia si kenj zile nii, duu che di ma birima lii ma haacheba le neε? <sup>5</sup> Ma tuɔŋ dolie. Ma via di ma

birima lii ma haacheba le. Ma wasa ŋaa Wia baaninj faasa sisii ne. Tapulii-la u si jan dii dunia niaa sariya, u jan dii sariya ari wutitii di niaa na. Bua-la le u baaninj jan sii ma nyuŋ kinkenj kinkenj. <sup>6</sup> U jan tinj nuu-kala u time a mage nii u si tinj u tintinŋaa mage. <sup>7</sup> Nialinj si kenj kenyiri aa ŋaa wu-zɔŋŋɔɔ, a ŋaa nii a chiche di ba na pulumuŋ a laa yirinj Wia sipaanj, a chiche miisi-la si bi dere, Wia jan jonɔ piba. <sup>8</sup> Ama nialinj sii to ba titia tuɔtoruŋ le aŋ via wutitii-la, aŋ tuto wu-bɔŋŋɔɔ ŋaaninj le, Wia jan na baaninj ba nyuŋ kinkenj di ba na heenj. <sup>9</sup> Nuu-na kala sii ŋaa wu-bɔŋŋɔɔ, heenj jan kenu. Hee-la jan laa sipaanj kenj juu tinŋaa ne, aŋ-na ku kenj nialinj si bi juu tinŋaa ŋaa maa. <sup>10</sup> Ama nuu-na kala sii ŋaa wu-zɔŋŋɔɔ, u jan na pulumuŋ Wia sipaanj, a laa yirinj, a hoŋ ari yarifielaa, juu tinŋaa ne jan laa sipaanj, aŋ ka nialinj si bi juu tinŋaa ŋaa tuto, <sup>11</sup> beε wiaa Wia bi niaa kaa pore.

<sup>12</sup> Wiaa ne Moosis fa ŋmuŋsa bil di niaa tuto. Nialinj si biba jin aŋ ŋiŋaa wu-bɔŋŋɔɔ, ba jan suu. Di ba ne suba, wialinj dee Wia jan kaa dii ba sariya. Nialinj ma si jin wialinj Moosis si ŋmuŋsa bil di niaa tuto aŋ ŋiŋaa wu-bɔŋŋɔɔ, di ba ma ne suba, Wia jan to wialinj le ne a dii ba sariya. <sup>13</sup> Nialinj si nii wialinj Moosis si ŋmuŋsa bil di niaa tuto, u nii bi jan

ɲaa di ba keŋ tuo-pula Wia teen. Ama nialin sii to wialin Moosis si ɲmuɲsa bil di niaa tuto, ba ne jaŋ keŋ tuo-pula Wia sipaan. <sup>14</sup> Nialin si bi Juu tinŋaa ɲaa, ba bi wialin Moosis si ɲmuɲsa bil di niaa tuto jin. Ama di ba tuobiinaa ne daga di ba ɲaa wialin titia Moosis fa si daga di niaa tuto, ba bil niin ne nii ba titia le, ari ba si bi wialin Moosis si ɲmuɲsa bil di niaa tuto jin kala. <sup>15</sup> Nii daga ari wialin Moosis fa si ɲmuɲsa bil di niaa tuto, ba he ba tuobiinaa tuon ne. Ba tuobiinaa ne dage nii. Di ba ne cheye, ba tuobiinaa yie dageba ne. Di ba ne bira bi cheye maa, ba tuobiinaa bira yie dageba ne. <sup>16</sup> U jaŋ nage nii tapulii-la Wia si jaŋ dii niaa sariya. Ba dage nii ne Wia wu-zomɔ-la tuon mi si bula pima. Chee-la Wia jaŋ keŋ wialin niaa si kaa faa a kaa ku lii pulumun tuon, a to Yesu Kirisito le a dii ba sariya.

*Juu tinŋaa ne jin wialin Moosis fa si ɲmuɲsa bil di niaa tuto*

<sup>17</sup> Ka ɲ-na nii-la si keŋ ɲ titia yiyire Juu tiina a jiejili wialin Moosis fa si ɲmuɲsa bil di niaa tuto, a bibigisi ɲ titia le ari ɲ jin Wia ne, <sup>18</sup> ɲ jin wii-la Wia si cho di ɲ ɲinŋaa ne. Ba dagin wialin Moosis si ɲmuɲsa bil ne, nii ne tii ɲ jaŋ wuo jin wii-la si zomɔ. <sup>19</sup> ɲ jima ari ɲ ne ɲaa nyulimaa daa-kenne a wuo pipi nialin ma si he birimin tuon pulumun.

<sup>20</sup> ɲ ne ɲaa nii-la sii dage nialin si bi wiaa jin, aa dage haŋbiisin maa. Wialin Moosis si ɲmuɲsa bil di niaa tuto ɲaa ɲ keŋ wu-jimin ne a jin wutitii.

<sup>21</sup> ɲ-na nii-la sii dage niaa, ɲ bi ɲ titia ka dagee? ɲn dage niaa di ba si gaa, aŋ titia gigaa. <sup>22</sup> ɲ-na nii-la si si di niaa si ba doŋsun haalaa che, aŋ titia chiche niaa haalaa. ɲ si ɲ bere vuiaa ne, aŋ mu gigaa kiaa vuiaa diisin le. <sup>23</sup> ɲ-na bigisi ɲ titia le ari ɲ jin wialin Moosis si ɲmuɲsa bil di niaa tuto ne, aŋ chichei wialin a hihise Wia. <sup>24</sup> Wia tenin tuon ba ɲmuɲse nii ne a bul, "A tin ma Juu tinŋaa wiaa, nialin si bi Juu tinŋaa ɲaa tuuse Wia jonŋoo."

<sup>25</sup> Di ma nii keri ma penee aŋ tuto wialin kala Moosis si ɲmuɲsa bil di niaa tuto, ma penee kerin keŋ bubuon ne, ama di ma nii chei wialin Moosis si bile, u naga ari ma bi ma penee kere. <sup>26</sup> Di nii-la si bi u penin kere nii to wialin Moosis si ɲmuɲsa bil di niaa tuto, ma bi jin ari Wia jaŋ benu ari u keri u penin nee? <sup>27</sup> Nii wiaa nialin si bi ba penee keri aŋ tuto wialin Moosis si ɲmuɲsa bil di niaa tuto, ba jaŋ jon cheerin pima. Ma niaa deenba jin wialin Moosis si ɲmuɲsa bil ne a kikeri ma penee maa, aŋ ka ma chichei wialin. <sup>28</sup> ɲ yaraa wu-ɲaalaa dee bi ɲaa ɲ ɲaa Juu tiina. ɲ si keri

ŋ namia ma ta dee bi tii.  
<sup>29</sup> Ama nii-la si ŋaa Juu-titii,  
 u tuon wu-ŋaalaa le ne tii u  
 ŋaa Juu tiina. Nii-la si keŋ  
 tuo-pula, u ne nii-la si keri  
 u peniŋ. Wia Diŋ-zon-la ne  
 jaŋ wuo ŋaa nii piŋ, ŋ si  
 keri ŋ yaraa namia ta dee.  
 Wia ne jaŋ beŋe u tiina le,  
 nuhuobiine dee bi jaŋ beŋeu  
 le.

### 3

<sup>1</sup> Beŋe ne saa Juu tinŋaa kaa  
 kii nialiŋ si bi Juu tinŋaa  
 ŋaa? Ba sii keri ba pene-  
 la maa, u bubuon ne beŋe?  
<sup>2</sup> Wiaa yuga ne Juu tinŋaa  
 kaa kii nialiŋ si bi Juu tinŋaa  
 ŋaa. Wialiŋ kala tuon wu-  
 baliŋ ne ŋla: Juu tinŋaa ne  
 Wia jon u niin wiaa pa. <sup>3</sup> Ka  
 di Juu tinŋaa doŋsun ne bi  
 Wia niin wialiŋ yarida ŋaa,  
 u jaŋ wuo leŋ di Wia si  
 wutitii keŋ koo? <sup>4</sup> Ai. Di  
 niaa kala ne paala ŋaa wu-  
 nyiaraa maa, Wia-na jaŋ keŋ  
 wutitii. Ba ŋmuŋŋe nii ne  
 Wia teniŋ tuon a tige Wia le.  
 Ba si,

“U maga di ba na di wialiŋ ŋ  
 sii bul ŋaa wutitii ne,  
 di ba ne jon cheeriŋ  
 pipiŋ maa, di ŋ kiaa  
 ha siŋ.”

<sup>5</sup> Ka di la wu-bomo-la la sii  
 ŋaa, di ba nii che di ba dage  
 di Wia keŋ wutitii, beŋe ne  
 laa che di la bul? Mii che di  
 mi bul nuhuobiine tuobiinaa  
 wiaa ne a piŋe: Di Wia ne  
 doŋisela a tin la wu-bonŋoo  
 wiaa, u kiaa bi siŋ u si ŋaa  
 nii, koo? <sup>6</sup> Nii dee. Di Wia  
 ne fa bi wutitii kene, ee ne

u fa jaŋ wuo dii dunia niaa  
 sariya? <sup>7</sup> Ama di mi wu-  
 nyiari-la ne wuo leŋ di Wia  
 wutitii-la chaasa chin a laa  
 yiriŋ puu, beŋe ne tii saa u  
 jaŋ dii mi sariya a bul di mi  
 ŋaa haache tiina ne, a jon  
 cheeriŋ pimi? <sup>8</sup> Di nii ne fa,  
 mi fa jaŋ bul di má leŋ di  
 la ŋaa wu-bonŋoo a na wu-  
 zonŋoo. Niaa doŋsun paala  
 tuusela ne aŋ bul di la dage  
 di nuu ŋaa wu-bonŋoo, u jaŋ  
 na wu-zonŋoo. Wia jaŋ jon  
 cheeriŋ pi niaa deŋba. U ne  
 ŋaa nii, u kiaa jaŋ siŋ.

*Nuu-kala bi tuo-pul tiina  
 ŋaa Wia sipaanŋ*

<sup>9</sup> Ee ne saa? Ma biina la  
 Juu tinŋaa kpia nialiŋ si bi  
 Juu tinŋaa ŋaa neŋe? Ai, la  
 biba kpia. Mi laa sipaanŋ bul  
 ari nialiŋ si ŋaa Juu tinŋaa  
 ari nialiŋ si bi Juu tinŋaa  
 ŋaa kala, ba ŋaa haache  
 timma ne. <sup>10</sup> Ba ŋmuŋŋe nii  
 ne Wia teniŋ tuon a bul,

“Nuu-kala bi tuo-pul tiina  
 ŋaa Wia sipaanŋ, ni-  
 bala ma bi tuo-pul ti-  
 ina ŋaa.

<sup>11</sup> Nuu-kala siaa bi suro  
 duu jin Wia wialiŋ  
 bubuon, nuu-kala ma  
 bi Wia bee chiche.

<sup>12</sup> Nuu-kala jon hariŋ yia  
 Wia ne a kala ŋiŋaa  
 wu-bonŋoo.

Nuu-kala bi wu-zon ka  
 ŋaa. Ni-bala ma tuo.

<sup>13</sup> Ba niin wu-bulaa nage  
 buo-surun sii suore nii  
 ne.

Ba bul wiaa nyinyise  
 niaa.

Wii-kala ba si yie bul kenj huonj ne a nage diminj huonj.”

14 “Ba yie nmiessa hihe niaa le, a nina baaniŋ niaa nyunj kinjenj.”

15 “Ba baaniŋ bi diene anj sisii. Di ba baaniŋ ne sie, ba yie fá lima lima a mu kpukpu niaa.

16 Di ba ne mu lee-na kala, ba yie chei lee-la ne a ŋaa niaa tuosaa chei.

17 Ba bi jinj ba si janj ŋaa njii di ba di niaa sinj.”

18 “Ba bi Wia ma ka fá.”

19 La jima ari wialinj Moosis si nmunsa bil di niaa tuto, duu ne dage wii-kala, nialinj síi to wialinj ne u daga pipa. Nii wiaa nuu-kala bira bi janj wuo bul wii-kala, dunia nuu-kala janj laa cheerinj Wia sipaanj. 20 Nuukala bi janj wuo to wialinj Moosis si bile le a wuo kenj tuo-pula Wia sipaanj. Wialinj Moosis si bile di niaa tuto ne dagela la jinj ari nuu-kalaa ŋaa haache ne.

*Nuu-kala si laa Yesu wiaa dii kenj tuo-pula Wia sipaanj*

21 Ama leele Wia suri wonjbiinj ne di niaa to a kenj tuo-pula u sipaanj. U wonjbiila bi wialinj Moosis si bile le lia. Ama wialinj Moosis si bile ari wialinj nialinj fa si bula, Wia Din-zonj-la dolunj le, ba kala fa bul wonjbiila wiaa ne. 22 Nialinj si laa Yesu Kirisito wiaa dii, nialinj si ŋaa juu tinŋaa koo nialinj si bi juu tinŋaa ŋaa

kala, ba ne janj kenj tuo-pula u sipaanj. U biba kaa porɛ, 23 beɛ wiaa nuu-kala kenj haache ne a bi Wia wuo china kpikpage. 24 Ama Wia lahorimo le ba kenj tuo-pula ne u sipaanj. Yesu Kirisito ne laaba ta a ŋaa ba ŋaa tuo-pul timma Wia sipaanj. U ŋaa njii chogita ne. 25 Wia lenje Yesu Kirisito suu a jonj u chalinj jaase, di Wia jonj u baaniŋ ta, baanj-la u fa si na a tinj la haacheba wiaa, anj jonj la haacheba a chela. Nii-la kala si laa Yesu Kirisito wiaa dii janj laa chogita deenj. Wia kenj wutitii a dage njii ari u fa kenj kenyiri ne, a bee kieli nuhuobiinee haache. 26 Leele Wia bira bi njii ka ŋaa. U dage niaa kala haacheba a piba ne. Ama u dage duu kenj wutitii, beɛ wiaa di nuu-kala ne laa Yesu wiaa dii, u janj kenj tuo-pula Wia sipaanj.

27 Wu-beɛ ne saa la janj kaa bigisi la titia le? Wii-kala tuo. Beɛ ne tii? Wu-zomola la si ŋaa ne tii? Ai, ama la yarida ne tii la bira bi wii-kala kene di la bigisi la titia le. 28 La ŋaa yarida ari nuu janj wuo na tuo-pula Wia sipaanj a tinj u si laa Yesu dii le. Di la níi to wialinj Moosis si bile, la bi janj wuo kenj tuo-pula deenj Wia sipaanj. 29 Ma biina ari nialinj si ŋaa juu tinŋaa dunɗunja ne janj wuo to Wia? Ai. Nialinj si bi juu tinŋaa ŋaa ma janj wuo tou. 30 Wia si ŋaa kubala, u janj lenj di nialinj síi keri ba penee kenj tuo-pula a tinj ba si laa

Yesu wiaa dii wiaa. Nialin ma si bi Juu tinŋaa ŋaa, u jaŋ leŋ di ba ma keŋ tuɔ-pula a tin ba ma si laa Yesu wiaa dii wiaa. <sup>31</sup> La saa jaŋ wuo joŋ wialin Moosis si bile a ta, a tin la yarida wiaa koo? Ai, la yarida-la leŋe Moosis si bil wialin wasa zɔŋ nɛ.

#### 4

*Abiraham si laa Wia dii nɛ tii u keŋ tuɔ-pula Wia sipaan*

<sup>1</sup> Wu-bɛɛ nɛ saa la keŋ di la bul a tige la naabalima Abiraham lɛ, nii-la lɛ la kala si to a ku ŋaa u nihee? <sup>2</sup> Di Wia nɛ fa leŋe u keŋ tuɔ-pula u sipaan a tin u wu-zɔmɔ-la u si ŋaa lɛ, u fa jaŋ wuo bibigisi u titia lɛ, ama Wia teen dee. <sup>3</sup> Wia tenin tuɔŋ ba bula ari Abiraham laa Wia dii nɛ. U yarida-la nɛ tii Wia ŋaa u keŋ tuɔ-pula u sipaan. <sup>4</sup> Di nuu nɛ tin tinŋaa, u maga di ba timu nɛ. Ku-la ba si joŋo timu, u bi naga ari chɔgita nɛ ba joŋo pu. U tima nɛ a laa. <sup>5</sup> Ama nii-la si bi wu-zɔŋŋɔɔ ka ŋaa aŋ ŋaa Wia yarida, a laa dii ari Wia jaŋ wuo ŋaa di nii-la si ŋaa wu-bɔŋŋɔɔ na tuɔ-pula u sipaan, u yarida-la jaŋ ŋaa duu keŋ tuɔ-pula Wia sipaan. <sup>6</sup> La naabalima Devit ma fa bul ŋii nɛ. U si di Wia nɛ leŋe di nuu keŋ tuɔ-pula u sipaan, ka u bi ŋii ŋaa a tin u tiina wu-zɔŋŋɔɔ ŋaanin lɛ, u tiina tuɔŋ jaŋ tɔɛ. Nla nɛ Devit bul:

<sup>7</sup> “Nialin wu-bɔŋŋɔɔ Wia si joŋo cheba a keŋ ba haacheba faa, nuu-kala bira bi na a kaa mu wuu, ba tuɔŋ jaŋ tɔɛ.

<sup>8</sup> Nii-la ma Wia si bi u haachebaa beŋ, u ma tiina tuɔŋ jaŋ tɔɛ.”

<sup>9</sup> Tuɔtɔruŋ deen wiaa saa Devit si bula, u ŋaa nialin sii keri ba penee dunɗunɗa kuŋ nɛɛ? Ai, nialin ma si bi ba penee keri, ba ma tiuu nɛ. La laa sipaan bul ari yarida nɛ tii Abiraham keŋ tuɔ-pula Wia sipaan. <sup>10</sup> Bua bɛɛ lɛ nɛ Wia ŋaa wiin deen Abiraham lɛ? U ŋaa ŋii bua-la lɛ duu keri u penin nɛ koo duu ha bi u penin kere nɛɛ? U ŋaa ŋii duu ha bi u penin kere. <sup>11</sup> Abiraham si keri u penin ŋii ŋaa magil nɛ. Uu dage ari u si ŋaa Wia yarida nɛ tii u keŋ tuɔ-pula u sipaan, ka u ha bi u penin kere. U ŋii ŋaa Abiraham ku ŋaa nialin kala si bi ba penee kere naabalima. Nialin si keŋ tuɔ-pula Wia sipaan a tin ba yarida wiaa, Wia leŋe ba ma ŋaa Abiraham nihee. <sup>12</sup> U nɛ ŋaa nialin si keri ba penee ma nyimma. Ama u bi naga ba si keri ba penee dunɗunɗa wiaa nɛ tii u ŋaa ba nyimma. Ba keŋ yarida a pɛ ba penee kerin lɛ nɛ, ari Abiraham ma fa si keŋ yarida ŋii, aŋ-na keri u penin.

*A tin la yarida wiaa, la ma jaŋ wuo keŋ tuɔ-pula Wia sipaan*



<sup>13</sup> Abiraham ari u doho niaa ne Wia fa bula pa di ba jan dii dunia. U bi naga Abiraham fa si to wialin Moosis fa si bile di niaa tuto ne tii Wia bul nii. Ama Abiraham fa si nna Wia yarida ne tii Wia len u ken tuo-pula u sipaan. <sup>14</sup> Di nialin sii to wialin Moosis fa si bile di niaa tuto, di ba dunɗunɗa ne fa jan dii dunia, nii-na niaa yarida fa nna pei ne. Wialin Wia si bula ma fa nna pei. <sup>15</sup> Wialin Moosis fa si bile di niaa tuto nna Wia baaniin sisii niaa nyun ne, bee wiaa ba bi baa to. Di wialin Moosis fa si bile ne fa tuo, niaa fa bi wialin ka chei.

<sup>16</sup> Wii-la Wia fa si bula ari u jan nna a pi Abiraham ari u doho niaa, u jan jono piba chogita a tinj u sii faba nennige nii. Ba yarida wiaa ne tii u jan jono piba. U bi naga ari u jono pi nialin sii to wialin Moosis si bile dunɗunɗa ne, ama ba di nialin kala si nna yarida ari Abiraham fa si nna yarida nii, ba kala ne u jono pa, nialin si keru ba penee ari nialin si bi ba penee kere kala, bee wiaa Abiraham ne nna la kala nyimma Wia sipaan. <sup>17</sup> Ba fa nmunse nii ne Wia tenin tuon. Wia bula a tige Abiraham le a bul,

“Mi lene n nna ta-gentisin yuge nyimma ne.”

Wia-la si wuo len kialin kala si suba, di ba sii suun le a ken miisin, an bira wuo dage wialin si jan nna an ha bi nna, Wia deen ne Abiraham

laa dii. <sup>18</sup> Wia fa bula pi Abiraham ari u jan ku nna ta-gentisin yuge nyimma. U fa bi maga di Abiraham yiyiele wiin deen, an ka u via an haa yiele. Nii wiaa u sene ku nna ta-gentisin yuge nyimma ari Wia fa si bul nii pu. Wia fa bula pu a bul di u doho niaa jan yuge a mage chenjwulaa. <sup>19</sup> Bua-la le Wia fa si bul nii pi Abiraham, di Abiraham ka mua ka duu yi jisin zolo. U jima ari u hiesa ne, u yaraa bira bi dolun kene. U haala Saara ma ta nna ha-piri ne a ma hiese, a bi bii wuo lul. Ari u si hiesa nii kala, u ha ken yarida. <sup>20</sup> Wia si bul nii pu, u bi u titia kaa bibegili a len u yarida. U chin u yarida-la le ne a ken dolun, a didenne Wia. <sup>21</sup> U paala chaasa ken yarida ne worun ari Wia si si u jan nna wiila, u jan sene nna. <sup>22</sup> A tinj u si ken yarida nii wiaa, Wia len u ken tuo-pula u sipaan. <sup>23</sup> Ba fa si nmunsa a bul di Wia ne len Abiraham ken tuo-pula u sipaan, Abiraham dunɗunɗa wiaa dee ba nmunse nii. <sup>24</sup> Ba nmunse nii la ma wiaa ne, la nialin si laa dii ari Wia chise la Tiina Yesu suun le. U jan len di la ma ken tuo-pula u sipaan, <sup>25</sup> bee wiaa u len Yesu suu a tinj la haacheba wiaa ne, a bira len u sii suun le di la ken tuo-pula u sipaan.

## 5

*A tinj Yesu Kirisito wiaa la*

*di Wia ŋaa sima*

<sup>1</sup> La si keŋ tuɔ-pula Wia sipaan a tiŋ la yarida wiaa, Wia to la Tiina Yesu Kirisito le ne a leŋ la ŋaa sima. <sup>2</sup> A tiŋ u wiaa, la keŋ wonɓiin di la mu Wia teen, duu fála nennige a pela le. Dime ne la he leele aa juɔse, a keŋ yielaa ari la si jaŋ kpaawia yiri-la chee doŋ. <sup>3</sup> Nii ma dunɗuna dee, la haa juɔse ne ari hee-la kala la ha sii na a tiŋ Kirisito wiaa, bee wiaa hee-la jaŋ leŋ di la wuo keŋ kenyiri. <sup>4</sup> Di la ne keŋ kenyiri, u jaŋ wuo leŋ di la wuo chinj la yarida naan le kpaŋ kpaŋ. Di la ne chinj la yarida naan le kpaŋ kpaŋ, la jaŋ keŋ yielaa. <sup>5</sup> La si keŋ yielaa nii, la bi jaŋ ko di la dii hiisin, bee wiaa Wia chola ne kinkeŋ. U joŋ chonu-la a he la tuɔŋ le ne. U ŋaa nii u Diŋ-zoŋ-la u si joŋo pila doluŋ le ne.

<sup>6</sup> Bua-la le la fa si bi doluŋ kene di la wuo pe la titia le, Kirisito laa la haache tinŋaa nyuŋ suu ne. <sup>7</sup> U ŋaa wu-haa ne ari nuu si jaŋ laa tuɔ-pul tiina nyuŋ suu. Ari nii kala, ŋ bi pɔɔ nuu jaŋ keŋ nyu-duoŋ a wuo laa ni-pula nyuŋ suu. <sup>8</sup> Ama Kirisito suu la wiaa ne bua-la le la ha si ŋaa haache tinŋaa. Wia dagela nii ari u chola ne kinkeŋ. <sup>9</sup> Kirisito si suu nii a leŋ la keŋ tuɔ-pula u teen, u jaŋ bira laala tapulii-la u si jaŋ na baaniŋ dunia niaa nyuŋ. <sup>10</sup> La di Wia faa yuo doŋo ne. Ama Wia leŋe la ŋaa sima a tiŋ u Bie si suba wiaa. Leele

Kirisito weye ne. Kirisito si weye ŋla, la duu ŋaa sima ne, u jaŋ wuo faasa pela le, a wuo laala ta tapulii-la le Wia si jaŋ dii dunia niaa sariya. <sup>11</sup> Nii ma dunɗuna dee, la to la Tiina Yesu Kirisito le ne a na Wia si nage nii kala. Nii wiaa la tuɔŋ tore Wia nyuŋ ne. La Tiina Yesu Kirisito ne ŋaa la di Wia siŋ.

*Adam keŋ suuŋ ko, Yesu Kirisito ne keŋ miisinj ko*

<sup>12</sup> Haache to ni-bala le ne a ku juu dunia. Haache-la ne tii suuŋ juu dunia. Nu-kala saa si ku ŋaa haache tiina, nii ne tii suuŋ juu dunia niaa kala a tiŋ haache-la wiaa. <sup>13</sup> Haache fa he dunia le, di Wia ha bi wialin joŋo pi Moosis di niaa tuto, ama bua-la le ba fa bi cheerin joŋo pi nialin si bi Moosis nii-la jin. <sup>14</sup> A chinj Adam bua-la le a kaa kuko Moosis ma miisinj le, suuŋ ne laa dunia kala. Niaa doŋsun fa he dime, ba haacheba bi Adam haache-la naga, ama suuŋ laaba maa. Adam ne fa ŋaa nii-la si jaŋ ko mi-maarinj.

<sup>15</sup> Ama Wia zile ku-la kii Adam haache-la. Niaa yuga ne a suu a tiŋ ni-bala haache wiaa. Ama Wia fála nennige a joŋ u zile ku-la pila, u ne paala yuga kii haache-la. Yesu Kirisito ne ŋaa zile ku-la. U lahorimo le u pe niaa le yuge kinkeŋ kinkeŋ. <sup>16</sup> Haache to ni-bala le ne a juu dunia. Wia zile ku-la ma to ni-bala le ne a juu dunia. Ama ba balia kala bi kubala

ŋaa. A tinj ni-bala haache-la wiaa Wia dii la sariya a jonj cheerinj pila. Ama niaa si jonj cheerinj pila. Ama niaa si yuga a ŋaa haache-la wiaa, Wia jonj u zile ku-la pila a jonj la haacheba chela, a lej la kenj tuo-pula u sipaanj. <sup>17</sup> Ni-bala haache wiaa ne lej suunj laa dunia tii. Wialinj Yesu Kirisito dunɗunja si ŋaa pila, ba ha yuga kii ni-bala-la haache-la tuminj. Wia to Yesu le ne a fala nennige worunj, a lej la kenj tuo-pula u sipaanj chogita. Nialinj si laa kiaa deenba, ba janj kenj miisinj (a dii dunia) a tinj Yesu Kirisito wiaa.

<sup>18</sup> Ni-bala haache si wuo lej nuu-kala laa cheerinj Wia teenj nii, nii ne ni-bala tuo-pula wu-ŋaalaa ma janj wuo lej di nuu-kala kenj tuo-pula Wia sipaanj a kenj miisinj. <sup>19</sup> Ni-bala si via Wia niinj ne ŋaa niaa yuge a ŋaa haache tinjŋaa. Nii titia ne ni-bala si to Wia niinj ne wuo ŋaa niaa yuge a kenj tuo-pula Wia sipaanj. <sup>20</sup> Wialinj Moosis fa si bile di niaa tuto ne ku wasa lej haache purike dunia le. Ama haache-la si ku wasa purike, nii ne Wia ma faasa fala nennige a wasa pela le worunj. <sup>21</sup> Haache si kenj dolunj a laa dunia dii, nii ne kenj suunj kaa ko. Wia ma saa kenj la miisinj dolunj a fa dunia niaa nennige a kieli, a peba le. U to la Tiina Yesu Kirisito tuo-pul wu-ŋaalaa le ne a lej la kenj tuo-pula u sipaanj, a kenj miisi-la si bi dere.

## 6

*Wii-chuoŋe liinj fonunj bubuwɔj*

<sup>1</sup> BEE NE saa la janj bul? La haa ŋaa wu-bonjɔɔ di Wia faasa fifala nennige a pela le koo? <sup>2</sup> Ai, la si liise la titia wu-bonjɔɔ ŋaaninj le nii, ee ne la janj bira njŋaa wu-bonjɔɔ? <sup>3</sup> Ma kala jima ari ba si foma Wii-chuoŋe liinj Yesu Kirisito dolunj le nii, u si suu nii, ma ma suba ne. <sup>4</sup> Ba si fola Wii-chuoŋe liinj nii, u naga la duu kala suba ne ba jonjo hugi. Ba ŋaa nii di la wuo jinj ari Kirisito si sii suunj le nii u Nyimma dolunj le, la ma wuo kenj mii-falinj a tuto worɓii doj.

<sup>5</sup> La duu kala si suba nii, la kala ma janj bira sii suunj le. <sup>6</sup> La jima ari ba si kenj Kirisito kpaase daa-geese nyunj nii u suu, ba kpaasu ari la wu-bonjɔɔ kala ne. U ŋaa nii a wuo yuo dii dol-la la fa si kene a njŋaa wu-bonjɔɔ ne, di la bira si haache yosunj ŋaa. <sup>7</sup> Di nuu-kala ne suba, Wia liisu u haache le ne. Nuukala bira bi janj jonj cheerinj pu. <sup>8</sup> La laa dii ari la di Kirisito kala si suba nii, la duu kala janj sii suunj le a kenj miisinj. <sup>9</sup> La jima ari Wia si chise Kirisito suunj le nii, u bira bi janj suu, nii wiaa suunj bira buu wuo. <sup>10</sup> U si suu nii, bala dunɗun ne u suu. U suba duu kenj haache dolunj ne chei. U si sii suunj le a kenj miisinj nii, u jonj u miisinj a pi Wia ne. <sup>11</sup> Nii wiaa u

maga di ma biine ma titia le ari ma ma suu haache wiaa ne, a jon ma miisin a pi Wia, bee wiaa ma di Kirisito kala naa kubala ne.

<sup>12</sup> Ma saa si leje di haache tii ma yaraa, di ma to u niin le a njaa ma titia tuotore wu-jaalaa. <sup>13</sup> U bi maga di ma jon ma yaraa nanndaasin dɔnsun pi haache a kaa naa wu-bɔnjɔɔ. Ama má jon ma titia pi Wia. Ma-na nage nialin si sii suun le a ken miisin ne. Má saa jon ma yaraa nanndaasin kala a pi Wia duu wuo len di ma naa tuɔ-pul wiaa. <sup>14</sup> Haache bira bima wuo, bee wiaa Wia lahorimo le ne ma ken miisin, wialin Moosis fa si bile di niaa tuto dee.

*La naa Wia yosun ne leele*

<sup>15</sup> La si ken miisin Wia lahorimo le, wialin Moosis fa si bile di niaa tuto le dee, u nii wiaa saa la njaa wu-bɔnjɔɔ koo? Ai, u bi wonjbii naa. <sup>16</sup> Ma jima di ma ne jon ma titia a pi nuu a tuto u niin le, ma naa nii-la ma sii to yosun ne. Di ma ne jon ma titia a he haache nisin le, ma jan suu. Di ma ne biraa to Wia niin ma le, ma jan ken tuɔ-pula Wia sipaan. <sup>17</sup> Ama laa lolle Wia ari ma nialin fa si naa haache yosun, ma leele jon ma tuɔn kala aa to Wia wialin ba si dagema di maa to. <sup>18</sup> Wia si liisema haache nisin le nii, ma mira ku ken ma titia a kaa naa tuɔ-pul kenne yosun ne. <sup>19</sup> Mi si bul yosun wiaa nii, u naa wu-kaa-magisii ne mi

magise, di nii dee ma bi u bubuɔn wuo jin. Ma fa si jon ma titia a he disinnin ari wu-bɔnjɔɔ naanin le, nii titia ne ma maga di ma leele jon ma nanndaasin kala a he tuɔ-pul wu-jaalaa le, di ma bira si disinnin ken an ken tuɔ-pula.

<sup>20</sup> Bua-la le ma fa si jon ma titia he haache nisin le a naa u yosun, ma fa laa ma titia ne tuɔ-pul wiaa naanin le. <sup>21</sup> Wiaa deenba ma fa sii naa, nyuuru bee ne ma na? Wialin miira naa hiisin kenma ne leele. Ba diderin ne saa naa suun. <sup>22</sup> Ama leele Wia laama ta ne haache nisin le. Ma naa Wia yosun ne leele. Ma nyuurun ne, ma bira si bi disin kala kene, ma saa jan ken miisi-la si bi dere. <sup>23</sup> Time-la ba si yie jonɔ tin haache ne naa suun. Ama Wia zile ku-la u si jonɔ pila ne naa miisi-la si bi dere, a tin la Tiina Yesu Kirisito wiaa.

## 7

*Wia Din-zɔn-la pila dolun di la naa wialin sii tɔre Wia tuɔn*

<sup>1</sup> Mi naanbiirin, ma naa nialin si jin wialin Moosis fa si nmunsa bil di niaa tuto ne. Ma jima ari nuhuobiine yie mage duu tuto wialin ba si bile ne duu ne he u miisin le, see duu suba. <sup>2</sup> Di haala ne ken bala, u bala ne tiuu. U yie mage duu tuto u bala niin ne, bua-la le u bala si he u miisin le. Di u bala-la ne suba, haal-la laa u titia ne u

bala nisinj lɛ. U bira bi u bala niinj to. <sup>3</sup> Di u bala nɛ ha hɛ u miisinj lɛ, ka u viau aŋ mu jaa baal dɔŋ, u juu baal-la u si via haache lɛ nɛ. Ama di u bala nɛ suba, u laa u titia nɛ u bala-la si suba nisinj lɛ. Di u nɛ jaa baal dɔŋ maa, u bira bi u bala-la si suba haache lɛ jua.

<sup>4</sup> Mi naanɓiirin, nii titia nɛ ma ma nage. Ma suu wialinj ba si bile di niaa tuto tuɔŋ nɛ, bɛɛ wiaa Kirisito si suu nii, ma duu kala nɛ suba. Lɛɛɛ nuu dɔŋ nɛ tiima, niila si sii suuj lɛ. U ɲaa nii di la wuo tinj tintinj-zɔŋɲoo a pi Wia nɛ. <sup>5</sup> Bua-la la sii to la tuɔtɔrɛ wu-ɲaalaa harinj, wialinj Moosis fa si ɲmuɲsa bil di niaa tuto nɛ fa ɲaa di sima kenla di la ken la yaraa ɲɲaa wu-bɔŋɲoo, wialinj si jan kenla mu hɛ suuj bua lɛ. <sup>6</sup> Ama lɛɛɛ Wia liisɛla wialinj Moosis fa si bile lɛ di niaa tuto. La tuɔtɔrɛ wu-ɲaalala fa kenla kaa ɲaa yosuj nɛ. Ba lɛ nɛ la suu. Lɛɛɛ la wuo tuto wonɓii dɔŋ nɛ, a tinj tintinjɲaa aa pi Wia. Wia Diŋ-zɔŋ-la nɛ dagɛla nii, wialinj Moosis fa si ɲmuɲsa bil di niaa tuto dee.

*Wialinj Moosis fa si bile nɛ dagɛ haache si nage nii*

<sup>7</sup> Bɛɛ nɛ saa laa chɛ di la bul? Wialinj Moosis fa si ɲmuɲsa bil di niaa tuto ɲaa haache wiaa nɛɛ? Ai, nii dee. Ama wialinj Moosis fa si bile nɛ leɲɛ mi jinj haache si nage nii. Di wialinj Moosis si bile nɛ fa bi daga a bul di la sɪ wialinj ba sii kisu hienu, mi

fa bi jan jinj ari u ɲaa haache nɛ. <sup>8</sup> Ama wialinj Moosis fa si ɲmuɲsa bil di niaa tuto si hɛ dime nii, haache na wonɓiin duu nyisemi hɛ di mi hihienɛ wialinj ba sii kisu. Di wialinj Moosis fa si bile wiaa dee, haache-na fa ɲaa ku-suu nɛ. U fa bi dol kenɛ. <sup>9</sup> Bua-la lɛ mi fa ha si bi wialinj Moosis fa si bile jinj, mi fa hɔnɔ nɛ ari yarifiɛlaa. Nii nɛ mi ku jinj wialinj Moosis fa si bile di niaa tuto. Mi si ku jinj wialinj nii, haache fa si nage nisuuɲ mi teenj, u miira ku kenj doluj a ɲaa mi miira nage ni-suu. <sup>10</sup> Wialinj Moosis fa si bile fa maga di ba leɲ di mi hɔŋ ari yarifiɛlaa, ama ba miira ɲaa mi nage ni-suu nɛ. <sup>11</sup> Wialinj Moosis fa si ɲmuɲsa bil di niaa tuto si hɛ dime nii, haache na wonɓiin duu nyisemi a hɛ suuj bua lɛ. <sup>12</sup> Wialinj Moosis fa si bile di niaa tuto saa bi disinninj kenɛ, wii-la kala si hɛ wialinj tuɔŋ ma bi disinninj kenɛ. Ba kala ɲaa wutitii nɛ a zɔŋ. <sup>13</sup> Wii-la si ɲaa wu-zɔŋ nɛ saa ɲaa mi suu koo? Ai, nii dee. Haache nɛ ɲaa mi suu. U kenj wialinj si zɔmɔ nɛ a kaa ɲaa mi suu. U ɲaa nii di la wuo jinj haache si nage nii. Wialinj Moosis fa si ɲmuɲsa di niaa tuto, ɲaa la jinj ari haache bɔmɔ nɛ kinjkenj.

*Wia nɛ laala haache nisinj lɛ a tinj Yesu wiaa*

<sup>14</sup> La jima ari wialinj Moosis fa si bile ɲaa Wia Diŋ-zɔŋ-la niinj wiaa nɛ. Ama mi-na ɲaa nuhuobiinj

ne, nii-la yaraa si jaŋ pua. Haache keŋmi ne mi ŋaa u yoŋ. <sup>15</sup> Mi bi jin wii-la kala si keŋmi, beɛ wiaa mi bi wii-la mi si cho di mi ŋaa ka ŋaa, ama wii-la mi si bi cho ne mii ŋaa. <sup>16</sup> Mi sii ŋaa wii-la mi si bi cho di mi ŋaa, u daga ari mi seye ari wialin Moosis fa si bile zomɔ ne. <sup>17</sup> Nii wiaa mi titia dee bi wii-la ka ŋaa. Haache-la si hemi le ne nii ŋaa. <sup>18</sup> Mi si keŋ nuhuobiine yaraa nii, mi jima ari wu-zɔŋŋɔɔ ŋaanin bimi le he. Mi fa cho di mii ŋaa wu-zɔŋŋɔɔ ne, a ŋaa lulɔl. <sup>19</sup> Wu-zomɔ-la mi si cho di mii ŋaa, mi bibaa ŋaa, ama wu-bomɔ-la mi si bi cho di mii ŋaa, ba ne mii ŋaa. <sup>20</sup> Mi si ŋaa wii-la mi si bi cho di mii ŋaa, u naga ari mi dee bi ŋaa, ama haache-la si hemi le ne ŋaa.

<sup>21</sup> Mi lele na ari mi nag-isin ne nii. Di mi nii che mi ŋaa wii-la si zomɔ, wii-la si bi zɔŋ yie he mi nyun le. U ne saa mi yie ŋaa. <sup>22</sup> Mi cho wialin Wia si daga ne mi tuɔŋ le, a cho di mii ŋaaba. <sup>23</sup> Ama mi na ari wu-tanii ne miira hemi le aa tin, a keŋ mi tuɔbiin-zomɔ-la baa yuo dɔŋɔ. Wiin deen leŋe mi ŋaa haache-la si hemi le yoŋ ne a tuto u niin wiaa le. <sup>24</sup> Mi lele ne. Wialin si hemi le keŋmi kaa mu suun bua ne. Kubee ne jaŋ laami ba le? Wia ne jaŋ wuo laami wiaa deenba le a tin la Tiina Yesu Kirisito wiaa. <sup>25</sup> Mii lollu worun. Mi titia dolun le, mi jaŋ to Wia niin wiaa ari mi

tuɔbiinaa dunɔɔŋa, ka di mi yaraa maa to haache niin.

## 8

*Má leŋ la joŋ la nyun he Wia Diŋ-zɔŋ-la wiaa le*

<sup>1</sup> Di la di Kirisito kala ne ŋaa kubala, Wia bira bi jaŋ dii la sariya a joŋ cheerin pila. <sup>2</sup> La di Yesu Kirisito si ŋaa kubala nii, u Diŋ-zɔŋ-la joŋ miisin pila. U laala ta ne haache ari suun nisin le. <sup>3</sup> Wialin Moosis fa si bile, bila le wuo pe, beɛ wiaa la yaraa bi dolun kenɛ. Ama wialin ba si bi wuo ŋaa, Wia wuo ŋaaba ne. Ba ne ŋla: U si che u liise nuhuobiine haache le, u ta u titia Bie u ku tuu. U yaraa nage la yaraa, duu laa la haacheba ta. U si ŋaa nii, Wia wuo dogise haache. <sup>4</sup> U ŋaa nii di la wuo keŋ dolun a ŋiŋaa wialin Moosis fa si bile di niaa tuto. La nialin si bi la yaraa dolun le ka to aŋ tuto Wia Diŋ-zɔŋ-la dolun le, la wuo ŋaa wutitiiba-la Moosis fa si bile di laa ŋaa. <sup>5</sup> Nialin kala sii to ba yaraa dolun le, ba joŋ ba nyun kala a he ba yaraa wu-ŋaalaa le ne, ama nialin kala ma sii to Wia Diŋ-zɔŋ-la dolun le, ba ma joŋ ba nyun kala a he Wia Diŋ-zɔŋ-la si cho wialin le ne. <sup>6</sup> Di la ne joŋ la nyun a he la yaraa wu-ŋaalaa le, la jaŋ suu, ama di la ne joŋ la nyun a he Wia Diŋ-zɔŋ-la wu-ŋaalaa le, la jaŋ keŋ miisin a hoŋ ari yarifielaa, <sup>7</sup> beɛ wiaa di nuu ne joŋ u

nyuŋ kala a he u yaraa doluŋ le, u ŋaa Wia diŋdɔŋ ne. U bi che duu to wialin Wia si daga, u paala bi wuo to. <sup>8</sup> Nialin sii to ba yaraa wu-ŋaalaa le, ba bi wialin Wia si cho wuo ŋaa.

<sup>9</sup> Ama Wia Diŋ-zɔŋ-la si hema le nii, ma-na bi ma yaraa wu-ŋaalaa le ka to, maa to wialin Wia Diŋ-zɔŋ-la si daga ne. Di Wia Diŋ-zɔŋ-la tuo nuu-kala le, u bi Kirisito kuŋ ŋaa. <sup>10</sup> Di Kirisito ne hema le, ma yaraa namia ha jan suu a tin ma haacheba wiaa. Ama Wia Diŋ-zɔŋ-la si hema le, u ne pima miisin, bee wiaa ma ken tuɔ-pula ne Wia sipaan. <sup>11</sup> Wia ne chise Yesu suuŋ le. Di u Diŋ-zɔŋ-la ne hema le, u jan chise ma yara-la si jan pua suuŋ le di ma ken miisin, ari u si chise Yesu suuŋ le nii. U jan to u Diŋ-zɔŋ-la si hema le ne a ŋaa nii.

<sup>12</sup> Nii wiaa mi naanbiirin, u bi maga di nuu-kala fugela di la tuto la yaraa wu-ŋaalaa le. <sup>13</sup> Di ma ne to ma yaraa wu-ŋaalaa le, ma jan suu. Ama di ma ne via ma yaraa wu-ŋaalaa, ma jan ken miisin Wia Diŋ-zɔŋ-la doluŋ le. <sup>14</sup> Nialin kala sii to Wia Diŋ-zɔŋ-la niin wiaa, ba ŋaa Wia biirin ne. <sup>15</sup> Wia bi ŋaa di ma nage yosuŋ a bira fifa fawulluŋ, ama u Diŋ-zɔŋ-la leŋe ma ŋaa u biirin ne. Di la nii yiru, la wuo kenu yire "la Nyimma". <sup>16</sup> Wia Diŋ-zɔŋ-la ari la tuobiinaa kala

yie dage ari la ŋaa Wia biirin ne. <sup>17</sup> La si ŋaa Wia biirin nii, Wia jon kiaa ne a billa le, kialin kala Wia si jon bil Kirisito le, la ma jan tiiba. Di la di Kirisito kala ne na heen, la ma jan laa yiri-la Kirisito si jan laa.

*Yiri-la la si jan laa Wia teen*

<sup>18</sup> Mi bee na ari heen deen mi sii na bi jan wuo kaa magise yiri-la la si jan laa. <sup>19</sup> Dunia kuŋ-kala nii gberu a kpil digilaa di ba na buala le Wia biirin si jan laa yirin. <sup>20</sup> Tin timii-la dunia kiaa si maga di ba tin, ba tima lol ne. Ba titia tuɔɔruŋ le dee ba lol nii, ama Wia ne ŋaa ba lol. Ari nii kala Wia ha leŋe ba ken yielaa, <sup>21</sup> bee wiaa Wia jan laaba ta a liiseba suuŋ bua le. Wia biirin si jan ko a laa yirin nii a tii ba titia, ba ma jan tii ba titia nii a ma ken yirin. <sup>22</sup> La jima ari dunia kiaa kala haa huuni ne, ari haala sii che duu lul aa huuni nii. <sup>23</sup> Dunia kiaa dunɔɔŋa dee, ama la ma nialin Wia si laa sipaan jon u Diŋ-zɔŋ-la hela le, la maa huuni ne la tuɔŋ le duu ken la yaraa birime [di la chaasa ŋaa u biirin] a laa yirin.

<sup>24</sup> Wia si laala ta nii, la ken yielaa. Di la ne na wialin la sii yielu, u bira bi maga di la yiyiele wii. Di nuu ne yiele kuŋ, di u ne nau, u jan bira yiyiele ku-la wiaa? Ai. <sup>25</sup> Ama di la nii yiele wialin

la ha si bi na, la keŋ keniyiri a gbigberε.

La si yie keŋ yielaa nii a keŋ keniyiri, <sup>26</sup> nii titia ne Wia Diŋ-zoŋ-la ma yie ko a pela ε a tiŋ la si bi doluŋ keŋε di la pe la titia ε. La paala bi jinŋ nii u si maga di la chuolε Wia. Ama Wia Diŋ-zoŋ-la titia sul Wia a pipila. U si yie susul Wia nii aa huuni nii, la bi jaŋ wuo keŋ niinŋ a dage, ama <sup>27</sup> Wia na nuhuobiine tuoŋ kala ne a ma jinŋ Wia Diŋ-zoŋ-la sii huuni nii bubuoŋ, beε wiaa Wia Diŋ-zoŋ-la sii sul Wia a pi Wia niaa nii, Wia tuotoŋ ε ne u yie susul nii.

<sup>28</sup> Nialinŋ Wia si tuosa di ba ŋaa u niaa, ba chou ne. Niaa deenba teenŋ Wia ŋaa wii-kala birime wu-zoŋ ne a piba. <sup>29</sup> Nialinŋ Wia si laa sipaanŋ liise, u liiseba duu keŋba birime di ba nage u titia Bie ne, a lenŋ u Bie ŋaa ba kala kuhianŋ. <sup>30</sup> Wia yire nialinŋ u fa si laa sipaanŋ liise di ba ŋaa u niaa ne. U si yireba nii, ba ko u teenŋ. Ba si ko nii, u lenje ba keŋ tuo-pula u sipaanŋ. Nialinŋ ma si keŋ tuo-pula u sipaanŋ, u lenje ba ma pe laa u yirinŋ.

*Kuŋ-kala tuo si jaŋ wuo liise mi nii Kirisito si chomi ε*

<sup>31</sup> Di la ne jinŋ wiaa deenba kala, beε ne bira ka di la bul? Di Wia ne chinŋ la harinŋ, kubεε ma ne bira keŋ doluŋ a kiila? <sup>32</sup> Wia paala bi u titia Bie kaa laa niaa teenŋ. U joŋu he niaa nisinŋ ε ne di ba kpau

a tiŋ la wiaa. U si wuo ŋaa ŋla, ma bi jinŋ ari u jaŋ wuo chaasa joŋ kuŋ-kala ma pe pila koo? <sup>33</sup> Kubεε ne saa jaŋ bira joŋ cheerinŋ a pi nialinŋ Wia si liisa? Nu u tuo, beε wiaa Wia titia ne lenje ba keŋ tuo-pula u sipaanŋ. <sup>34</sup> Kubεε ma ne bira jaŋ wuo dii ba sariya a dogiseba? Nu u tuo, beε wiaa Kirisito suba ne, aŋ bira sii suuŋ ε a keŋ miisinŋ a hoŋ Wia seme, ni-duoŋ di-hoŋuŋ, a sul Wia pipila duu pela ε. <sup>35</sup> Kirisito si chola nii, beε kuŋ ne jaŋ bira ŋaa di Kirisito sila cho? Wahala koo wu-juulaa, koo di ba to la naasinŋ dudogisela, koo di losuŋ kpula, koo di la bi genninŋ keŋε di la laale, koo di wu-boŋ ne gberela, koo di la ne jaŋ suu? Wiaa deenba kuŋ-kala bi jaŋ wuo ŋaa di Kirisito bira sila cho. <sup>36</sup> Ba ŋmunse Wia teninŋ tuoŋ a bul ŋla ne:

“A tiŋ ŋ wiaa, laa gberε suuŋ ne tapulii-na kala.

Ba yie benla ari la nage piesee ne ba si kaa lii di ba kpu.”

<sup>37</sup> Ari nii kala, di wiaa deenba kuŋ-kala ne ku ju-ula, la yie wuo yuo dii ne a tiŋ nii-la si chola wiaa. <sup>38-39</sup> Wiinŋ deenŋ tuo kaa lere, mi jima kuŋ-kala tuo si jaŋ wuo liise mi nii Kirisito si chomi ε. Suuŋ, koo miisinŋ, koo Wia tinɗaaraa, koo Wia bii-zoŋŋoo ari Wia bii-boŋŋoo, koo kialinŋ kala si he dime leεε, koo kialinŋ si jaŋ to harinŋ ko, kialinŋ si he wia nyuŋ a keŋ doluŋ,



koo kialinj si keŋ dolun a he tinteenj le. Wia si to la Tiina Yesu Kirisito le a chola nii, dunia kun-kala tuo si jan wuo liisela chonu-la le.

## 9

*Wia fa liise Iziral tinŋaa di ba ŋaa u niaa*

<sup>1</sup> Mi sii che di mi bul wii-la ŋaa wutitii ne. Mi si ŋaa Kirisito nuu nii, mi bi wiaa nyia. Wia Din-zon-la sii beŋ mi tuobiinaa nii, u ma leŋe mi jinj ari mi bi wiaa ka nyia. <sup>2</sup> Mi tuonj faasa chei ne a tinj mi titia niaa wiaa. Uu walimemi kinkeŋ kinkeŋ. <sup>3</sup> Mi fa cho di Wia ŋmiesa hemi le ne a keŋmi pore Kirisito teenj, anj laa mi naanbiirinj ari mi doho niaa kala ta. <sup>4</sup> Niaa deenba ne ŋaa Iziral tinŋaa, nialinj Wia si liisa. U leŋe ba ne ŋaa u biirinj a laa u yirinj. Ba di Wia bil niinj a pi donjo, Wia leŋ Moosis ŋmunse wiaa piba di ba tuto, a dageba Wia chuolun wonjbiinj, a bul duu jan ŋaa wiaa pipiba. <sup>5</sup> Ba ne ŋaa la naabalimaba doho niaa Wia si liisa. Ba si lul Kirisito maa, u ma fa ŋaa la naabalimaba doho nuu ne. U-na Kirisito ne kii kun-kala. Ma leŋ di la denne Wia bua-na kala le a kaa mu wuu. Ami.

<sup>6</sup> Ama u bi naga ari Wia si si u jan ŋaa wii-la u via ne, bee wiaa Iziral doho niaa kala dee Wia leŋ ba ŋaa u niaa. <sup>7</sup> Abiraham doho niaa ma kala dee bi Wia niaa ŋaa, ama Aizik doho niaa dunɗunɗa ne ŋaa Abiraham

doho niaa titia. <sup>8</sup> Wiinj deen daga ari nuu-kala doho bi Wia niaa doho ŋaa, see biiri-la Wia si bula di ba lul, ba ne u beŋ ba ŋaa u doho niaa titia. <sup>9</sup> U fa si bul wiaa a tige bile ba si jan lul le, ŋla ne u fa bul:

“Mi jan miira ko bua deen titia le harinj jina, di ŋ haala Saara lul baal.”

<sup>10</sup> Nii ma dunɗunɗa dee. Ribeka ma si lul biirinj bali-la, ba nyimma ŋaa kubala ne, u ne la naabalima Aizik. <sup>11-12</sup> Ka di Ribeka-na lul daalieri-la, biiri-la ha bi wuzonj koo wu-bonj kala ŋaa, ka Wia bula pu a bul,

“Ŋ si jan lul biiri-la, kuhianj jan tima pipi ku-bie.”

Nii daga ari Wia tuotoronj le ne u yire u niaa a tuoseba, u bi naga ari ba si ŋaa wialinj ne tii u tuoseba. U si yireba ne tii ba ŋaa u niaa. <sup>13</sup> Ba bira ŋmunse Wia teninj tuonj a bul ŋla ne:

“Mi cho Jekob anj bere Iso.”

*Wia keŋ wutitii ne*

<sup>14</sup> Bee ne saa la jan bul? La jan wuo bul di Wia bi wutitii kenee? Ai. <sup>15</sup> Wia fa bula pi Moosis a bul,

“Nialinj mi si liisa di mi peba le, mi jan peba le.

Nialinj ma mi si liisa di mi fába nennige, mi jan fába nennige.”

<sup>16</sup> Wiinj deenj saa bi naga nuhuobiine si cho wialinj a wiwalime duu ŋaaba ne tii, ama Wia si fála nennige ne tii, <sup>17</sup> bee wiaa ba ŋmunse

Wia teniŋ tuoŋ a tige Feero  
 le ari Wia bula pu a bul,  
 “Wii-la si tii mi leŋ ŋ dii  
 kuoruŋ ne ŋla:  
 mi ŋaa nii di mi wuo toŋ  
 le ne a dage mi doluŋ,  
 di ba yire mi yiriŋ dunia  
 kala le.”

<sup>18</sup> Nialiŋ saa Wia si liisa duu  
 fába nennige, uu fába nen-  
 nige ne. Nialiŋ ma u si liisa  
 di ba keŋ nyu-duoŋ a tiŋ ba  
 haacheba wiaa, u leŋe ba ma  
 keŋ nyu-duoŋ ne.

<sup>19</sup> Ma doŋo saa jaŋ wuo  
 piése a bul, “Di Wia níi ŋaa  
 nii, ee ne saa u jaŋ wuo joŋ  
 cheeriŋ a pi niaa? Kubee ne  
 saa jaŋ wuo keŋ kenyiri di  
 Wia kenu birime?”

<sup>20</sup> Kubee ne kaŋ, ŋ-na  
 nuhuobiine di ŋ laa wiaa bul  
 Wia niŋ le? Ku-la ba si ŋaa,  
 u jaŋ wuo piése nii-la si ŋaau  
 a bul, “Bee ne tii ŋ ŋaami mi  
 nage ŋla?” <sup>21</sup> Pupoi-meeere  
 jaŋ wuo loŋe churuŋ a kaa  
 me pupoi-zomuŋ, a bira wuo  
 loŋe a me pupoi-loruŋ. Di  
 pupoi-meeere ne cho nii, u  
 jaŋ wuo ŋaa. <sup>22</sup> Nii titia ne  
 Wia ma jaŋ wuo ŋaa niaa  
 le. Niaa doŋsuŋ he dime a  
 nage pupoi-kpaaniŋ si maga  
 di ba ŋmoo yere, ka Wia keŋ  
 kenyiri a nyalime nii kala  
 halii. U fa jaŋ wuo na baaniŋ  
 ba nyuŋ a dage u doluŋ, ka  
 u wuo nyalime <sup>23</sup> a tiŋ nialiŋ  
 si nage pupoi-zoŋŋoo wiaa,  
 niaa deŋba nennige ne u  
 fifá. U laa sipaan liiseba di  
 ba dii u yiri-bal-la. Ba ne u  
 dage u yiri-baliŋ pa. <sup>24</sup> La  
 ne nialiŋ u si liisa, la kala  
 dee bi Juu tinŋaa ŋaa, la

doŋsuŋ ma ŋaa nialiŋ si bi  
 Juu tinŋaa ŋaa ne. <sup>25</sup> Ba bul  
 ŋla ne Wia teniŋ seme doŋo  
 ba sii yire Hoziya a bul,  
 “Nialiŋ si bi mi niaa ŋaa,  
 mi jaŋ yireba mi niaa.  
 Nialiŋ ma mi fa si bi cho,  
 mi jaŋ yireba mi ni-  
 choooloo.

<sup>26</sup> Lee-la titia ba fa si bula pi  
 niaa ari ba bi Wia niaa  
 ŋaa,  
 lee-la ne ba jaŋ yireba  
 Wii-titii biiriŋ.”

<sup>27</sup> Azaaya fa ŋaa nii-la sii bul  
 wiaa, Wia Diŋ-zoŋ-la doluŋ  
 le ne. U ma fa heele bul a tige  
 Iziral niaa le a bul, “Di Iziral  
 tinŋaa ne paala faasa yuga  
 a nage hagili-buŋbugulo si  
 piŋ mugi-baliŋ niŋ, ba tuoŋ  
 niaa baŋmene duŋduŋa ne  
 Wia jaŋ laa ta, <sup>28</sup> bee wiaa  
 chee doŋ la Tiina Wia jaŋ  
 ŋaa nii u fa si bula pila. U bi  
 jaŋ dieni ka di u chei dunia  
 niaa.” <sup>29</sup> Ŋla ne Azaaya ma  
 fa bira bul di Wia jaŋ ŋaa  
 maachie. U fa si,  
 “Di Wia ne fa bi la naa-  
 balima doho niaa  
 baŋmene leŋe,  
 la kala fa jaŋ suu,  
 a nage Soðom ari  
 Gómora niaa kala si  
 suu nii.”

*Iziral tinŋaa doŋsuŋ bi  
 tuo-pula kene Wia sipaan*

<sup>30</sup> Wii-la dideriŋ ne ŋla:  
 Nialiŋ si bi Juu tinŋaa ŋaa  
 fa bi che di ba keŋ tuo-pula  
 Wia sipaan. Ba ne miira ku  
 keŋ tuo-pula Wia sipaan a  
 tiŋ ba yarida wiaa. <sup>31</sup> Ka  
 Iziral niaa fa faasaa che di ba  
 keŋ tuo-pula Wia sipaan aa

to wialin Moosis fa si bile di niaa tuto. Ama ba bi wialin wuo tuto di ba ken tuo-pula-la Wia sipaan. <sup>32</sup> Bɛɛ nɛ tii ba bi tuo-pula-la na? Ba bi yarida kɛnɛ di ba na tuo-pula-la Wia sipaan, bɛɛ wiaa ba faa chɛ di ba ken tuo-pula Wia sipaan a tin wialin ba sii to nɛ. Ba jon ba naasin a nmoo tabii-la si nɛa niaa sisieru nɛ. <sup>33</sup> Ba nmunse Wia tenin tuon a tige tabii-la lɛ nɛ a bul,

“Bee na, mi jon tabii-la si jan len di niaa gere  
a bil lee-la ba sii yire  
Zaayon.  
Tabii-la nɛa bun nɛ.  
U jan len di niaa gere  
titel.

Ama nuu-na kala si laa nii-la la sii yire bun-la, wiaa dii, u bi jan hiise u titia.”

## 10

<sup>1</sup> Mi naanbiirin, mi tuon lɛ mi faasa cho di Wia laa juu tinɛa ta nɛ. Mi yie chuole Wia piba ari siiflesin nɛ. <sup>2</sup> Mi jima ari ba jon ba nyun kala hɛ Wia lɛ nɛ, ama ba bi Wia wonbii-titii-la jin. <sup>3</sup> Ba bi jin wonbii-la Wia si yie len ba to a ken tuo-pula u sipaan, an chiche di ba to ba titia wonbiee. Nii nɛ tii ba bi ba titia jon hɛ wonbii-la Wia si yie to a len niaa ken tuo-pula u sipaan. <sup>4</sup> Kirisito nɛ nɛa wialin kala Moosis fa si nmunsa di niaa tuto diderin. Nii-la kala si laa u wiaa dii jan ken tuo-pula Wia sipaan.

*Nuu-na kala si yire Wia, u jan laau ta*

<sup>5</sup> Moosis fa nmunsa a tige nialin sii to wialin u si bile di niaa to a ken tuo-pula Wia sipaan, di ba nɛ wuo to wialin, ba jan ken miisin. <sup>6</sup> Wialin ba si bula Wia tenin tuon a tige nialin si ken tuo-pula Wia sipaan a tin ba yarida wiaa nɛ nla: Ba si, “Ma si ma tuon lɛ biinu a piese, ‘Kubɛɛ nɛ jan jil Wia-ja (a ken Kirisito kaa ku tuu)?’ <sup>7</sup> Koo ma bira si piesu a bul di kubɛɛ nɛ jan mu lelin (a ken Kirisito kaa ko)?” <sup>8</sup> Ba si di Wia wu-zomɔ-la kpagema nɛ. U hɛ ma niin lɛ a hɛ ma tuon maa. Wia wu-zomɔ-la la sii bul nɛ nɛa wu-zomɔ-la si tige nialin si laa Kirisito wiaa dii a ken tuo-pula Wia sipaan. <sup>9</sup> Di n nɛ jan wuo suri n niin a bul ari Yesu nɛ nɛa n Tiina, a laa dii ari n tuon ari Wia chisu suun lɛ, Wia jan laan ta, <sup>10</sup> bɛɛ wiaa di la nɛ ken la tuon a laa Yesu wiaa dii, la jan ken tuo-pula Wia sipaan. Di la nɛ ken la niin ma bul di la laa u wiaa dii, Wia jan laala ta. <sup>11</sup> Wia tenin tuon, nla nɛ ba bul: “Nuu-na kala si laa u wiaa dii, Wia bi jan hiisu.” <sup>12</sup> Juu tinɛa ari nialin si bi juu tinɛa nɛa, ba kala nɛa kubala nɛ u teen. U bi ba kaa pore. U nɛa nuu-kala Tiina nɛ. Di nuu-kala nɛ yiru, u jan pe u tiina lɛ worun. <sup>13</sup> Nla nɛ ba bul Wia tenin tuon: “Nuu-na kala si yire la Tiina Wia yirin duu laau ta, u jan laau ta.”

14 Ama di ba ne bi u wiaa laa dii, ee ne ba jan ŋaa a yire u yiriŋ duu laaba ta? Di ba ne bira bi u wiaa nia, ee ne ba jan ŋaa di ba laa u wiaa dii? Di nuu ma ne saa bi u wiaa bula piba, ee ne ba jan wuo ŋaa nii? 15 Di Wia ne bi niaa tima di ba bul u wiaa, ee ne ba jan wuo ŋaa bul u wiaa? Ba fa ŋmunse Wia teniŋ tuoŋ a bul, "Nialiŋ sii ko di ba bul Wia wu-zomɔ-la, ba ko woruŋ ne." 16 Nialiŋ ko ne a bul Wia wu-zomɔ-la maa, ama nialiŋ si ko jegile nii wialiŋ, ba doŋsuŋ bi wialiŋ to. Azaaya fa bira bul wiin deen a bul, "La Tiina Wia, kubee ne he dime si laa wialiŋ la si bula piba dii?" 17 N yie nii wii ne a laa dii. Ba ne ŋaa wialiŋ si tige Kirisito le.

18 Ama mi jan piесе wiin deen: Ba bi Wia wu-zomɔ-la niaa? Ba nia ne. Ba ŋmunse Wia teniŋ tuoŋ a tige Wia wu-zomɔ-la le a bul,

"Ba bul wiaa deenba dunia lee-kala ne.

Dunia nuu-kala ne nii wiaa deenba."

19 Mi saa jan bira piесе wiin deen: "Iziral tinŋaa si nii wialiŋ, ba bi ba bubuoŋ jin?" Moosis ne fa laa sipaan bul wiin deen a bul di Wia si,

"Mi jan leŋ di niaa yaraa bieri nialiŋ si bi mi niaa ŋaa wiaa.

Mi jan bira leŋ di ma baaniŋ sii nialiŋ si bi wiaa jin wiaa."

20 Azaaya fa chaasa bul wiin deen a bul, Wia si,

"Nialiŋ si bi mii che, ba nami ne.

Nialiŋ ma si bi mi wiaa piесе, mi keŋ mi titia dageba ne."

21 Ama u bul ŋla ne a tige Iziral tinŋaa le:

"Mi keŋ mi nisaa chage ne a dieni aa yireba di ba ko mi teenj, ama ba bi seye.

Ba viami ne. Ba bi sei di ba to mi niinj."

## 11

*Wia jan fá Iziral tinŋaa nennige*

1 Nii-na saa Wia via u niaa ne koo? Ai, mi ma titia ŋaa Iziral tiina ne, a ŋaa Abiraham doho nuu a lii Benjamin jan niaa tuoŋ.

2 Wia bi u niaa via, nialiŋ u si laa sipaan liise. Ma bi wialiŋ ba si ŋmunse Wia teniŋ tuoŋ ka liisii? Wialiŋ ba si ŋmunsa a tige Ilaaja lee? Ba ŋmunsa ari Ilaaja fa bul Iziral tinŋaa wiaa pi Wia a tinj ba haacheba wiaa. 3 U fa si,

"Mi Tiina Wia, ba kpu ŋ nialiŋ sii bul wiaa, ŋ Diŋ-zoŋ-la doluŋ le,

a ŋmoo korunu-la ba si saa piŋ a lo.

Mi dunduŋa ne ka, ba saa walime di ba kpumi ma ne."

4 Ilaaja si bul ŋii, bee ne Wia bira bula pu? U si,

"Niaa bui balipe ne mi tii.

Niaa deenba kuŋ-kala bi vene-la ba sfi yire Baal kpaara."

<sup>5</sup> Nii titia ne u nage Iziral tinŋaa le bua deen le. Iziral tinŋaa banmene Wia liise a faba nennige a peba le. <sup>6</sup> U si liiseba a faba nennige a peba le nii, u bi naga ba tintin-zonŋoo ba si tima wiaa ne tii. Di u ne tin niaa wu-zonŋoo wiaa aa faba nennige, nii-na niaa nennige dee uu fa nii.

<sup>7</sup> Be ne saa? Iziral tinŋaa fa sii che kialin, ba biba naa. Ama nialin mua Wia si liisa ba tuon ne naba. Ku-kaanaa tuon dolie. Wia si yireba, ba via ne. <sup>8</sup> Ba bul nii ne Wia tenin tuon a bul,

“Wia leŋe ba siaan chuule ne.

Ba bi kuŋ-kalaa na,  
ba bi wii-kala maa nii a  
kaa ko ari jinin.”

<sup>9</sup> Devit ma fa bula a bul,  
“Bua-la le ba tuon si toro,  
ba ku hilimi di ba dii  
kiaa,

leŋ di wiaa juuba di ba  
tel, a nage ba si he  
bere u ken kua u tel  
nii. Leŋ di ba tel nii  
a tin nii chimin.

<sup>10</sup> Leŋ di ba sian to di ba si  
kuŋ-kala wuo na,  
leŋ di wiaa nyageba di  
ba duduuri wuu.”

<sup>11</sup> Mi jan piase wiin deen:  
Ba si siera tel nii, ba tele  
nii di ba wii-wii-kala dere  
ne koo? Ai. Ama a tin  
ba haache wu-ŋaalaa le, Wia  
laa nialin si bi Juu tinŋaa  
ŋaa ta ne. U ŋaa nii di  
Juu tinŋaa yaraa bieri, di ba  
na baanin nialin si bi Juu  
tinŋaa ŋaa nyun. <sup>12</sup> Juu  
tinŋaa haacheba leŋe dunia  
niaa ŋmoo naa-simin ne. Ba

si tele nii ŋaa nialin si bi Juu  
tinŋaa ŋaa ŋmoo naa-simin  
ne. Di u ne nage ŋla saa,  
bua-la le Juu tinŋaa si jan  
ku laa Wia wiaa dii, dunia  
nuu-kala jan paala nii sima  
kinken kinken.

*Wii-la si tii Wia laa nialin  
si bi Juu tinŋaa ŋaa ta*

<sup>13</sup> Ma nialin si bi Juu  
tinŋaa ŋaa ne mi leele  
chiche di mi bul wiaa pa.  
Wia ne tinmi di mi ŋaa  
nialin si bi Juu tinŋaa ŋaa  
nanzoo. Mi jon tintimin  
deen u ŋaa tintin-fian ne.  
<sup>14</sup> Mi sii tin tintimin deen,  
ŋ bi po u jan wuo leŋ di  
mi naanbiirin Juu tinŋaa  
yaraa bibieri, a wuo leŋ di ba  
donsun ma laa Wia wiaa dii,  
di Wia laaba ta. <sup>15</sup> Juu tinŋaa  
si via Wia wiaa nii leŋe  
dunia ni-kaanaa wuo sin ne  
Wia teen. Di Juu tinŋaa ne  
bira ku laa Wia wiaa dii, ee  
ne saa u jan nage? U jan  
nage ni-suunun si sii suun le  
ne. <sup>16</sup> Di ŋ ne buu boroboro  
munun a laa sipaan loge  
mua a pi Wia, duu ne bi  
disinnin kene, ku-kaanin ma  
si ka ma bira bi disinnin  
kene. Di tia naapoloo ma ne  
zomo, u naakelee ma zomo  
ne.

<sup>17</sup> Juu tinŋaa saa nage tia-  
la ba sii yire Oliv ne. Ba  
ken u nene a kaa tutugi  
nuun ne. Wia ŋaa u zon.  
Nii ne Wia keru u naakelee  
donsun, an kenma kaa mere  
ba leree, ma nialin si nage  
girin tii-naakelee. U ŋaa nii

di ma ma pe nii Oliv tii-zɔŋ-la naakelee sima ne. <sup>18</sup> Ma sí ma titia le bigisu ari ma kpia tia-la naakelee ba si kere ta le. Ma dee bi tia-la naapoloo chaga bil. Tia-la naapoloo ne chagemá bil.

<sup>19</sup> Ma jan wuo bul ari Wia keri tia-la naakelee, ka di u kenma ne mere dime.

<sup>20</sup> Wutitii ne, Wia keri Juu tinŋaa ta a tin ba si bi Wia wiaa laa dii wiaa ne. Ama ma-na nialin si bi Juu tinŋaa ŋaa, ma si laa Wia wiaa dii dunɔɔŋa wiaa ne tii ma chin kpan kpan. Nii wiaa ma sí ma titia le bigisu, an ken ma titia worun. <sup>21</sup> Wia si bi tia-la naakelee titia nennige fá an keriba ta nii, di ma ma ne bi ma siaa fiela, u jan kerima ma ta nii titia. <sup>22</sup> Ma na nii Wia si ken zile an bira tere. U tere nialin si miuru harin nyun ne. Ama u ken zile ma-na teen, di ma ne seye di ma tuto u zile-la le ari ma si suomi nii. Nii dee u jan kerima ma ta. <sup>23</sup> Di Juu tinŋaa ne paala birima to Wia, Wia jan bira kenba kaa mere tii-zɔŋ-la le, bee wiaa Wia ken dolun duu ŋaa nii. <sup>24</sup> Ma nialin si paala bi tii-zɔŋ-la naakelee ŋaa an ŋaa girin tuon tii-naakelee, ka Wia kenma a kaa mere tii-zɔŋ-la le, u jan wuo ken tia-la titia naakelee u si kere ta a kaa mere.

*Wia ma jan laa Iziral tinŋaa ta*

<sup>25</sup> Mi naanbiirin, wiaa ne he dime Wia fa joŋo faama, mii che di ma jin. Wii-la jan

ŋaa di ma sí biina bul ari ma ken wu-jimin a bibigisi ma titia le. Wii-la ne ŋla: Iziral tinŋaa si ken nyu-duo-la, ba bi jan kenu wuu. Bua-la le di nialin si bi Juu tinŋaa ŋaa ne ku yuge a laa Wia wiaa dii, Iziral tinŋaa nyu-duo-la jan dere. <sup>26</sup> Ŋla le ne Wia jan to a laa Iziral tinŋaa kala ta. Ba ŋmunse nii Wia tenin tuon. Ba si,

“La Laataara jan lii Zaayon.

U jan kiri wu-bɔŋɔɔ kala Jekob doho niaa tuon.”

<sup>27</sup> Ba bira ŋmunsa a bul,

“La di ba jan bil niin a pi donɔ

di mi laa ba haacheba ta.”

<sup>28</sup> A tin Juu tinŋaa si via Wia wu-zomɔ-la wiaa ne tii ba ŋaa Wia dinɔɔmɔ, ma nialin saa si bi Juu tinŋaa ŋaa wiaa ne tii. Ama a tin u si liiseba wiaa ne tii ba ŋaa u ni-chooloo, a tin ba naabalimaba wiaa, <sup>29</sup> bee wiaa kialin kala Wia si joŋo piba ari u si liiseba nii, u bira bi jan wuo vonba. <sup>30</sup> Ama, ma-na nialin si bi Juu tinŋaa ŋaa, ma fa via Wia niin wiaa, ama lelele Wia fama nennige ne a tin Iziral tinŋaa ma si via Wia niin wiaa nii. <sup>31</sup> Nii titia ne Iziral tinŋaa ma si bi Wia niin ka to lelele, Wia jan fába ma nennige, ari u si fama ma nennige nii. <sup>32</sup> Nialin kala si bi Wia niin wiaa ka to, ba haacheba nyageba bil ne, nii ne Wia wuo fába nennige.

<sup>33</sup> Wia sí fála nennige nii ari nii u si ken wu-jimiŋ ari nii u si jin wiaa bubuɔŋ, u bi maga kenε. Kubεε ne jin nii Wia sí ŋaa wiaa? Nu-kala bi Wia wu-ŋaalaa jin.

<sup>34</sup> Kubεε ne jan wuo jin Wia tuɔbiinaa? Kubεε ma ne jan wuo dage Wia?

<sup>35</sup> Kubεε ne ha jon kuŋ pi Wia aŋ gberε di Wia miira jon ku-la pu?

<sup>36</sup> Bεε wiaa Wia ne ŋaa kuŋ-kala. U doluŋ le ne kuŋ-kala ma he dime. U ne tii kuŋ-kala. Má leŋ di Wia yiriŋ yire wuu. Ami.

## 12

### *Wii-chuɔluŋ wonbii titii-la*

<sup>1</sup> Nii wiaa, mi naanbiirin, a tin Wia si faasa fála nennige wiaa, mii sulma di ma jon ma miisin kala a pi Wia, ari ba fa si yie kpu pusun a ŋaa sarika a pi Wia nii. Ma si jon ma titia a pi Wia nii, ma bira sí disinnin ken, di Wia wuo laama. *Wii-chuɔluŋ wonbiin titia ne nii.*

<sup>2</sup> Ma sí sei a jon ma tuɔŋ kala a he dunia wu-ŋaalaa le. Ama má leŋ di Wia ken ma tuɔbiinaa birime di ba kala zɔŋ. Nii ne ma jan wuo jin Wia tuɔtɔrun. Ma jan wuo jin wii-la si zomɔ aa tɔre Wia tuɔŋ aŋ pe zɔŋ ma woruŋ.

<sup>3</sup> Wia si ken zile mi teen a pemi le nii, mii sulma kuŋ-kala di ma sí ma titia kaa yuge a kii nii ma si maga. Má leŋ di ma siaa fiele. Wia pi nu-kala yarida ne. Ama ba

kii dɔŋɔ ne. Nu-kala maga duu biine u nyun le a mage nii Wia si jon yarida-la pu ne. <sup>4</sup> Nuhuobiine yaraa ŋaa kubala ne, ka u nanɔdaasin yuge. Nanɔdaasi-la kala ken ba tintimia ne. Ba bi tintinbala ka tin. <sup>5</sup> Nii titia ne la ma nage. La yuga ne, aŋ ka la kala mere Kirisito le a ŋaa kubala. La ŋaa ni-yiri-yiriba ne a mere dɔŋɔ le a ŋaa yaribala. <sup>6</sup> Wia pila kuŋ-kala doluŋ ne di la kaa tin tintinyiri-yiriba. U saa lii nii le Wia si fála nennige ne a pela le. U si jon dol-la pila nii, má leŋ di la kenu kaa tin. Di la ne wuo wiaa bula pipi niaa Wia Diŋ-zɔŋ-la doluŋ le, má leŋ duu mage nii yarida-la Wia si jonɔ pila. <sup>7</sup> Duu ne jon doluŋ pin di ŋ tima pipi niaa, ŋiŋaa nii. Duu ne jon doluŋ pin maa di ŋ didage niaa, ŋ ma ŋiŋaa nii. <sup>8</sup> Di ŋ ne ken doluŋ di ŋ wuo didage niaa a leŋ di ba nyun nyinyaase, ŋ ma ŋiŋaa nii. Di nuu ne ken zile a pipe niaa le, u ma ŋiŋaa nii ari tuɔ-bala. Nii-la kala si ken doluŋ a pipe niaa le, u ŋiŋaa nii ari siifesiŋ.

### *Má cho dɔŋɔ ari siifesiŋ*

<sup>9</sup> Nii-la si ken zile a fifa niaa nennige, aa pe nennige tinŋaa le, u ŋiŋaa nii ari tuɔtɔrun. Má cho dɔŋɔ ari siifesiŋ. Má bere wu-bɔŋɔɔ, a jon ma titia a he wu-zɔŋɔɔ ŋaanin le. <sup>10</sup> Má cho ma dɔŋsun tinŋaa si laa Wia wiaa dii woruŋ ari naanbiirin si cho dɔŋɔ nii, a fiεε siin pipi ma dɔŋsun

tinŋaa jirima. <sup>11</sup> Ma sí yariwiinŋ ken, ama má faasa jon ma nyun kala he Wia tinŋtinŋaa le, Wia Diŋ-zon-la dolun le. <sup>12</sup> Má jujuose a tin wialin ma sí yieli le. Di ma ní na heŋ, má dii kenyiri. Má peŋe a chuchuole Wia. <sup>13</sup> Má pe ma naanbiirin si laa Wia wiaa dii le ari kialin ba sí che, aa ken nuhuora worun.

<sup>14</sup> Má sul Wia duu pe nialin si to naasin dudogisema le, an sí kaliba heba le. <sup>15</sup> Di niaa tuon ne toro, má ma peba le di ma tuon tore. Di niaa tuon ne cheye, má peba le di ma tuon chei. <sup>16</sup> Má kala ken nii-bala, ma sí ma titia kaa yuge. Má ken ma titia mere nialin si ken ba titia muuri le. Ma sí biina ari ma ken wu-jimin. <sup>17</sup> Di nuu ne ŋaa wu-bon ma le, ma-na sí wu-bomun jonon timu. Ama má-na ŋaa wiila si zomo, di nuu-kala jin. <sup>18</sup> Di ma ne wuolo, má len di ma di nuu-kala sin. <sup>19</sup> Mi bii-chooloo, di niaa ne ŋaa wu-bonŋoo ma le, ma sí ba chimin tin. Wia na baanin ba nyun ne, u ne jan tin ba chimin. Ba ŋmunse nii Wia tenin tuon a bul, Wia si, "Di nuu ne ŋaa wu-bon ma le, mi ne jan tin u chimin.

Mi ne ken dolun mi si jan wuo ŋaa nii."

<sup>20</sup> "Ama di losun ne ken ŋ dindomo, ŋaa kudiilee pu.

Di lii-nyuasun ma ne kenu, ŋaa liin pu duu nyua.

Di ŋ ne wuo ŋaa nii, hiisin jan kenu kinken." <sup>21</sup> Ma sí lenje di wu-bonŋoo ŋaanin wuoma. Ama má ŋaa wu-zonŋoo di ba wuo wu-bonŋoo.

## 13

*Má tuto ma tinŋteen nihiasin niin*

<sup>1</sup> Nuukala maga duu tuto u tinŋteen nihiasin niin ne. Nuukala bi tinŋteen wuo ben, see di Wia liisu a pu dolun. Nialin sí ben ma tinŋteen ŋaa Wia ne liiseba. <sup>2</sup> Nii wiaa nii-la kala si via u tinŋteen nihiasin niin, u tiina ma via Wia niin wiaa ne. Nii-la kala si ŋaa nii, u jan len di Wia dii u sariya a jon cheerin pu. <sup>3</sup> Nialin sí ŋaa wu-zonŋoo bi fawullun ka fá ba tinŋteen nihiasin teen, see nialin sí ŋaa wu-bonŋoo. Di ŋ ne bi che di ŋ fifá fawullun tinŋteen nihian teen, ŋinŋaa wialin si zomo, duu bibesin le. <sup>4</sup> U ŋaa Wia tinŋtinnu ne duu pen le. Ama di ŋ ne ŋaa wu-bon, fifá u fawullun, beŋe wiaa dol-la u si kene, u bi dol-pei ŋaa. U ŋaa Wia tinŋtinnu ne. Nuukala si ŋaa wu-bomun, Wia na baanin u nyun ne. Nii ne tii niila sí ben tinŋteen jan wuo dogise tiina. <sup>5</sup> A tin nii wiaa, máa to ma tinŋteen kuhiasin niin. Ma sí nii ŋaa a tin Wia si jan na baanin ma nyun dunɗunɗa wiaa. Ama má ma ŋaa nii di ma tuobiinaa kala su Wia sipaan. <sup>6</sup> Wia si liise tinŋteen nihiasin, nii



wiaa u ma maga di ma tɪŋ lanpoo. Lanpoo lilaaraa ma ŋaa Wia tɪŋtinnaa ne a maa tɪŋ tɪŋtimɪŋ deen a pipi Wia. <sup>7</sup> Má tɪŋ nuu-kala chimɪŋ ma si kenɛ. Má tɪŋ lanpoo a pi lanpoo lilaaraa. Di ma ne yoo kuŋ a kaa lii di-bolii kaa koo di ma kaa juu ma tɪŋteen, má tɪŋ ŋii ma si maga di ma tɪŋ aŋ kaa juu. Má fa nialɪŋ si maga di ma fá, a pi jirima nialɪŋ si maga di ma pi jirima.

*Má cho ma dɔŋsun tɪŋŋaa a kaa mu wuu*

<sup>8</sup> Sí nuu-kala chin dii. Chin-la dunɔɔŋa si maga di ŋ dii, ŋ bi jan time dere ne ŋla: Cho ŋ dɔŋɔ tiina. Nii-la kala si cho u dɔŋɔ tiina ŋaa wialɪŋ kala Moosis fa si ŋmuŋsa bil di niaa tuto ne. <sup>9</sup> Wialɪŋ Moosis fa si ŋmuŋsa bil di niaa tuto dɔŋsun ne ŋla: “Sí ŋ dɔŋɔ tiina haala che, sí niaa kpu, sí gaa, sí nuu kuŋ kaa laa.” Wiaa deenba kala ari wialɪŋ dɔŋsun Moosis si ŋmuŋsa bil di niaa tuto, ba kala ŋaa wu-bala ne. U ne ŋla: “Cho ŋ dɔŋɔ tiina ari ŋ si cho ŋ titia ŋii.” <sup>10</sup> Di ŋ ne cho ŋ dɔŋɔ tiina, ŋ bi wu-bɔŋ kala jan ŋaa u le. Nii wiaa di ŋ ne cho ŋ dɔŋɔ tiina, ŋŋ to wialɪŋ kala Moosis fa si ŋmuŋsa bil di niaa tuto ne.

<sup>11</sup> Má ŋaa wiaa deenba. Ma paala jin bua deen le la si he si nage ŋii ne. Bua-la le ma si jan sii don le yie ne. Bua-la le Wia si jan laala ta dunia deen le faasa kpage

ne. U ne kpage kii bua-la le la si laa sipaan laa Yesu wiaa dii. <sup>12</sup> Tan kpage pulun ne. Mua ne ka, ka di wia pɔse. Má saa len di la len birimɪŋ tuɔŋ wu-ŋaalaa, aŋ paa laali-yuori gennɪŋ laale a yuo laalin pi Wia, pulumun tuɔŋ. <sup>13</sup> Má len di la ken la titia worun ari nialɪŋ si he pulumun tuɔŋ. Ma sí len di la faasa gbieli gbieli-tɔɔnun a bubugi, a ŋŋaa wu-liilin aŋ pe ŋaa wu-bɔŋɔɔ. Ma sí dɔŋɔ yuo, ma ma sí len di ma yaraa bibieri dɔŋɔ nyun. <sup>14</sup> Má len di Yesu Kirisito ne ŋaa ma laali-yuori gerɪŋ, aŋ sí ma yaraa tuɔtɔre wu-ŋaalaa le hariŋ to. Má jon hariŋ yiaba.

## 14

*Ma sí ma naanbiirin si laa Yesu wiaa dii wiaa laa jin*

<sup>1</sup> Di nuu ne he ma tuɔŋ a laa Yesu wiaa dii aŋ bi faasa chin u yarida naan le, duu ní che u juu ma tuɔŋ, má len duu juu di ma kenu worun. Ama ma sí ma tuɔbiinaa wiaa kaa lere. <sup>2</sup> Ma tuɔŋ dɔŋɔ tuɔbiinaa yie ŋaa u didii kuŋ-kala ne, ama dɔŋɔ ma he dime, u bi u yarida naan le china worun a ma didii pipaarin dunɔɔŋa. <sup>3</sup> Ma sí len di nii-la síi dii kuŋ-kala mumɔŋ nii-la síi kise kialɪŋ le. Ma ma sí len di nii-la síi kise le, duu bul nii-la síi dii kuŋ-kala teen ari u bi worun ŋaa, beɛ wiaa Wia cho tiina ne a len u ŋaa u bii.

4 Kubee ne kanj di η wuo bul di nuu tintinnu cheye nee? Tintinni-la kuhianj ne janj wuo bul duu cheye ne koo duu bi cheye. La Kuhianj Yesu janj wuo peu le duu chinj. U saa janj chinj.

5 Nia doŋo yie biine ari tapulunj doŋo ne kii tapulaa kala. Doŋo ma biine ari tapulaa kala ŋaa kubala ne. U saa maga di nuu-kala chinj u tuobiinaa le ne. 6 Nii-la si biina ari tapulunj doŋo ne kii tapulaa kala, u liise tapulii-la duu zizil la Tiina Yesu ne. Nii-la ma sii dii kuŋ-kala, u ma ŋaa ŋii a zizil la Tiina Yesu ne, bee wiaa u sii dii kialinj, u yie lolle Wia ne. Nii-la ma sii kise kialinj doŋsunj, u ma ŋaa ŋii aa zil la Tiina Yesu ne, bee wiaa u ma sii dii kialinj u si bi kise, u ma yie lulolle Wia ne. 7 La tuonj kuŋ-kala bi la titia tii. Di la ne he la miisinj le, la bi la titia tii. Di la ne suba maa, la bi la titia tii. 8 La si he miisinj deenj le, la jonj la miisinj a he la Tiina Yesu nisinj le ne. Di la nii che di la suu maa, la jonj la titia ma a he la Tiina Yesu nisinj le ne. Di la ne weye koo di la ne suba, la he la Tiina Yesu nisinj le ne, 9 bee wiaa Kirisito suba anj bira sii suunj le duu tii ni-weyee ari ni-suununj kala ne, a ŋaa ba kala kuhianj. 10 Bee ne saa tii ma tuonj doŋo bubul u naanbie si laa Yesu wiaa dii teenj a bul duu bi worunj ŋaa? Doŋo ma bee guguune u naanbie si laa Yesu wiaa dii le. La kala

janj chinj Wia sipaanj duu dii la sariya. 11 Ba ŋmunse Wia teninj tuonj a bul ŋla ne: Wia si,

“Mi si he dime ŋii,  
nuu-kala janj kpirimi mi sipaanj  
a suri u niinj a bul ari mi ne sene ŋaa Wia.”

12 Bua-la le la tuonj kuŋ-kala janj dage wialinj kala u si ŋaa a pu.

*Ma si wialinj si janj lej di ma naanbie juu haache ŋaa*

13 Nii wiaa, ma bira si leŋe di la bubul la doŋsunj tinŋaa teenj a bul di ba bi worunj ŋaa, ama u maga di ma biina jonj wiinj deenj ne: Má pupo ma si wii-la si janj bere kenj ma naanbie he haache le ŋaa. 14 La Tiina Yesu leŋe mi jinj ari kudiil kala tuo si kenj disinninj. Ama niaa doŋsunj biina ari kudiilee doŋsunj kenj disinninj ne ba kikise. Di ba ne dii kialinj, ba janj chei ba kisinj le. 15 Di kialinj η sii dii wiaa ne ŋaa η naanbie tuonj chei, η bira buu cho. Kirisito suu u wiaa ne, ŋii wiaa, si leŋe di kudiile-la η sii dii wiaa cheiu. 16 Wii-la η si jima duu zomō, si leŋe di niaa kaa birime wu-boŋ aa bul u wiaa. 17 Kudiile-la la sii dii ari kialinj la sii nyua bi siifianj wii ŋaa Wia kuorii-la tuonj. Wialinj si ŋaa siifianj wiaa Wia kuorii-la tuonj ne ŋla: Di la kenj tuo-pula Wia sipaanj, a kenj nii-bala, anj pe kenj tuotōrunj maa Wia Din-zonj-la dolunj le. 18 Nuukala si to wonjiinj deenj le a tima

pi Kirisito, Wia tuon jaŋ tore u nyuŋ, niaa ma tuon jaŋ tore u nyuŋ.

<sup>19</sup> Má saa leŋ di la bibiine wialin si jaŋ leŋ di la keŋ nii-bala, a wuo pipe donjo le a keŋ doluŋ. <sup>20</sup> Ma sí kialin ma sí dii wiaa tima chei Wia tintinŋaa. Kudiil kala zomɔ ne, u bi disinnin kene di maa kise. Ama di kudiile-la donsun ma sí dii ne jaŋ leŋ di nuu juu haache le, u bi maga di ma diiba.

<sup>21</sup> Wii-la si zomɔ ne ŋla: U bi maga di maa chan namia, koo di ma nyua siniŋ, koo di maa ŋaa wii-na kala si jaŋ leŋ di ma naanbie yenŋi u wonbiin. <sup>22</sup> Di ŋ ne laa dii ari wii ne zomɔ di ŋ ŋaa, leŋ duu he ma di Wia dunɔɔna pege. Di nuu ne ŋaa wii-la u si laa dii ari u zomɔ, di u tuobinaa ne buu walime ari u sí ŋaa ŋii, u tuon jaŋ tore. <sup>23</sup> Ama di nuu ní dii kiaa aŋ biine ari u bi maga duu dii, duu ne diiba, Wia jaŋ jon cheerin pu, bee wiaa u bi wialin u si laa dii ari ba ŋaa wu-zomɔ ka to. Wii-na kala ne ŋ ŋinaa aŋ bi laa dii ari u maga di ŋ ŋaa, u ŋaa haache ne.

## 15

*Má sí ma titia tuotore wiaa hariŋ to*

<sup>1</sup> La nialin si faasa chin la yarida naan le, u maga di la pe nialin yarida si bi yuge le ari wialin ba si bi ba doluŋ kene le. U bi maga di la ŋinaa la titia tuotore

wiaa. <sup>2</sup> Má leŋ di la kuŋ-kala ŋaa di u donjo tiina tuon tore, di la pe u le ŋii duu keŋ doluŋ a chin u yarida le. <sup>3</sup> Kirisito ma bi u titia tuotore wiaa ŋaa. Ba fa ŋmunse Wia tenin tuon a bul ŋla ne a tigeu le:

“Jomo-la kala nialin si tuuse  
 ŋ-na Wia,  
 ba ne ba jonoo  
 tuusemi.”

<sup>4</sup> Wialin kala ba fa si ŋmunse Wia tenin tuon, ba ŋmunsa di ba dagela ne, Wia ten-la ne dagela ŋii la si jaŋ ŋaa a keŋ kenyiri, a ŋaa la nyuŋ nyaase, di la wuo yiyiele kialin si he la sipaan. <sup>5</sup> Wia ne pi niaa kenyiri a wuo ŋaa la nyuŋ nyaase. U jaŋ wuo pema le di ma keŋ nii-bala a wuo tuto Yesu Kirisito naabuasun, <sup>6</sup> di ma kala wuo denne Wia ari nii-bala. U ne ŋaa la Tiina Yesu Kirisito Nyimma.

*U maga di nialin si bi Juu tinŋaa ŋaa ma nii Wia wiaa*

<sup>7</sup> Nii wiaa, má sei a keŋ donjo woruŋ, ari Kirisito ma si keŋma woruŋ ŋii, di Wia yirin yire. <sup>8</sup> Mi jaŋ bula pima ari Kirisito ku tin tintinŋaa a pi Juu tinŋaa, a dage ŋii Wia si keŋ wutitii a ŋaa wialin kala u fa si bula pi la naabalimaba ari u jaŋ ŋaa, <sup>9</sup> a wuo leŋ di nialin si bi Juu tinŋaa ŋaa, di ba denne Wia a tin u si fába nennige ŋii. Ba ŋmunse ŋla ne Wia tenin tuon a bul,

“Mi jaŋ dennin nialin si bi  
 Juu tinŋaa ŋaa tuon.”

Mi ma jan yii yiilaa a denniŋ.”

<sup>10</sup> Ba bira ŋmunŋsa a bul ŋla ne:

“Ma nialiŋ si bi Juu tinŋaa ŋaa, ma di nialiŋ kala Wia si liisa, má juose.”

<sup>11</sup> Ba bira bul ŋla ne:

“Ma nialiŋ kala si bi Juu tinŋaa ŋaa,  
má denne ma Tiina Wia,  
a leŋ di niaa kala ma denŋu.”

<sup>12</sup> Azaaya bira bul ŋla ne:

“Jesi doho niaa doŋo jan ko.  
U ne jan sii a beŋ nialiŋ  
si bi Juu tinŋaa ŋaa.  
Ba jan joŋ ba yiɛlaa kala  
heu le.”

<sup>13</sup> Wia ne leŋe la keŋ yiɛlaa. Mii che duu leŋ di ma yarida wuo ŋaa di ma tuoŋ tore, di ma hoŋ ari yarifiɛlaa, a bira leŋ duu Diŋ-zoŋ-la doluŋ le ma yiɛlaa yuge.

*Wii-la si tii Pɔɔl tinŋaa nialiŋ si bi Juu tinŋaa ŋaa tuoŋ*

<sup>14</sup> Mi naanŋbiirin, mi chaasa ŋaa yarida ari maa ŋaa wu-zoŋoŋo woruŋ, a jinŋ wiaa ma woruŋ, a wuo didage doŋo. <sup>15</sup> Ama tenin deenŋ tuoŋ mi keŋ nyu-duoŋ ne di mi wuo liisima wiaa doŋsuŋ le a tinŋ dol-la Wia si pimi wiaa, <sup>16</sup> di mi tinŋ Yesu Kirisito tinŋtinŋaa nialiŋ si bi Juu tinŋaa ŋaa tuoŋ. Mi tinŋ ba tuoŋ a nage niila si kpu pusunŋ pipi Wia ne, a bul Wia wu-zoŋo-la piba. Mi ŋaa ŋii di Wia wuo laa nialiŋ si bi Juu tinŋaa ŋaa, ari u si laa pusu-la ba si yie kpu a liise sarika a

pu. Wia Diŋ-zoŋ-la jan piise ba disinniŋ ta di Wia laaba.

<sup>17</sup> Yesu Kirisito doluŋ le mi keŋ wonŋbiinŋ di mi dage mi titia a tinŋ tinŋtimii-la mi si tima pi Wia. <sup>18</sup> Mi bi nyuduonŋ kene di mi bul wii doŋ kala, see tinŋtimii-la Kirisito si pemi le mi tinŋ, a wuo leŋ di nialiŋ si bi Juu tinŋaa ŋaa ku to Wia niinŋ. Wialiŋ mi si bula ari wialiŋ mi si ŋaa, <sup>19</sup> wu-kpunŋkperisi-la ari wu-magila-la mi si ŋaa Wia Diŋ-zoŋ-la doluŋ le ne pe nialiŋ si bi Juu tinŋaa ŋaa le ba ku to Wia niinŋ ŋii. Mi chaasa bul Kirisito wu-zoŋo-la, a suomi Jerusalem le a golle ŋii kala a mu yi Iliirikam. <sup>20</sup> Mi he doluŋ an bul Wia wu-zoŋo-la lee-na kala niaa ha si bi Kirisito wiaa nia. Mi bi che di mi mu lee-la niaa si laa sipaanŋ mu a bul Wia wiaa, ŋii ne tii mi ŋaa ŋii. <sup>21</sup> Ba ŋmunŋse ŋla Wia tenin tuoŋ a bul,

“Nialiŋ ha si bi u wiaa nia,  
ba jan nii.

Ba jan nii a jinŋ wialiŋ  
bubuonŋ.”

*Pɔɔl che duu mu na Rom tinŋaa*

<sup>22</sup> Mi sii bul Wia wiaa leree doŋsuŋ ne tii mi bi ma lerinŋ wuo ko. Mi walima walima di mi ko ne an lol, <sup>23</sup> ama lee le mi bira bi tinŋtimii kene tasiŋ deenba le di mi tinŋ, ka mi ma paala cho di mi ko nama faafaa kala. <sup>24</sup> Mii che di mi ku nama bua-la le di mi nii mu Sipeenŋ tinŋteenŋ. Di mi ne hoŋ ma teenŋ a dieni mua, mii che di ma pemi le di

mi veŅ mi woŅbiin. <sup>25</sup> Ama lēlē-na mii mu Jerusalem ne di mi pe Wia niaa lē dime. <sup>26</sup> Nialin si laa Wia wiaa dii Masidoonia ari Akaaya tinŅteen lē, ba tuoŅ tōre ne ba si kiesē moribiee di ba pe summo-la si hē Wia niaa tuoŅ Jerusalem lē. <sup>27</sup> Ba titia tuoŅ ne tōrō ba Ņaa Ņii. Ba faa biine di ba peba lē ne a laa ba chimin. Wutitii, Jūu tinŅaa ne leŅe nialin si bi Jūu tinŅaa Ņaa ma nii Wia wiaa. Ņii wiaa u maga di ba ma pe Jūu tinŅaa lē ari ba ma ku-cheēlē. <sup>28</sup> Di mi ne tinŅtimin deen dēre, a keŅ moribie-la kala ba si kiesa a kaa mu piba, mi jaŅ sii dime a mu SipeeŅ tinŅteen. Di mi nīi mu dime, mi jaŅ ku to nama. <sup>29</sup> Mi jima, di mi ne kō, mi jaŅ wuo pema lē woruŅ, ari Kirisito si pemi lē Ņii.

<sup>30</sup> Mi naaŅbiirin, mii sulma la Tiina Yesu Kirisito doluŅ lē, ari dol-la Wia DiŅzōŅ-la si joŅo pila di la cho dōŅo, di ma pemi lē a chuōlē Wia pimi, <sup>31</sup> di Wia liisemi nialin si via Wia wiaa nisin lē a hē Judiya tinŅteen lē. Má bira sul Wia di u nialin si hē Jerusalem lē, di ba tuoŅ tōre ari kialin mi si jaŅ kaa mu piba nyuŅ. <sup>32</sup> Ka di Wia ne seye, mi jaŅ kō ma teen ari tuōtoruŅ, a ku wiesi mua ma teen. <sup>33</sup> Wia si wuo Ņaa nuhuobiine keŅ yarifiēlaa, u jaŅ leŅ di ma hōŅ ari yarifiēlaa. Ami.

### *Pōol chuōlē niaa*

<sup>1</sup> Mii che mi keŅ la dihaala Fiibi dagema ne. U ne Ņaa nialin si laa Yesu wiaa dii aa hilimi sipaa-laara, a hē KeŅkiriya lē. <sup>2</sup> Má kenu woruŅ la Tiina Yesu doluŅ lē, ari u si maga di Wia niaa keŅ dōŅo Ņii, a peu lē ari kuŅkala u sīi che ma teen. U pe niaa lē yuge, a pemi ma lē.

<sup>3</sup> Má chuōlē Pirisila ari Akuila. La di ba kala ne tinŅtinŅaa aa pi Yesu Kirisito. <sup>4</sup> Ba joŅ ba miisin a yōō suuŅ ne mi wiaa. Ņii wiaa mii lolleba. Mi duŅduŅa saa dee, la di nialin kala si bi Jūu tinŅaa Ņaa aŅ laa Yesu wiaa dii aa hilimi, la kala nīi lolleba. <sup>5</sup> Má chuōlē nialin ma si laa Yesu wiaa dii a hilimee chuōlē Wia ba diisin lē. Má chuōlē mi naŅdōŅchooluŅ Epaniitis maa. U ne laa sipaaŅ laa Kirisito wiaa dii Esia tinŅteen lē. <sup>6</sup> Má chuōlē Mēeri maa. U faasa tinŅtinŅaa woruŅ ne ma teen. <sup>7</sup> Má chuōlē Anđōnikas ari Junias maa. Ba ma Ņaa Jūu timma ne. Ba di la kala hē sarika lē. Wia naŅzōōbala tuoŅ ba ne paala faasa chinŅ woruŅ. Ba ne laa sipaaŅ laa Kirisito wiaa dii mi lē. <sup>8</sup> Má chuōlē Anpilaatis maa. U Ņaa mi naŅdōŅchoolii ne la Tiina Yesu wiaa. <sup>9</sup> Má chuōlē Abaanis maa, la tinŅinni-dōŅo Kirisito tinŅtinŅaa lē. Má chuōlē mi naŅdōŅchooluŅ Sitakis maa. <sup>10</sup> Má chuōlē Apeles maa, u faasa chinŅ Kirisito wiaa lē ne woruŅ. Má chuōlē Arisitobalas dia

niaa maa. <sup>11</sup> Má chuõle Herõdian maa. U ma ņaa juu tiina nē. Má chuõle Nasisas dia nialin maa si laa la Tiina Yesu wiaa dii. <sup>12</sup> Má chuõle Tafiina ari Tifoosa. Ba maa tinj la Tiina Yesu tintinŅaa nē. Má chuõle mi nanđon-choolun Pesis. U ma faasa tinj tintinŅaa a pi la Tiina Yesu nē. <sup>13</sup> Má chuõle Rufas maa. U faasa chinj la Tiina Yesu wiaa le worun nē. Má chuõle la duu kala naan. <sup>14</sup> Má chuõle Asinkitas, Filegon, Heemis, Patobas, ari Heemas ari la naanbiiri-la kala si he ba teen. <sup>15</sup> Má chuõle Filoolõgis, Julia, Niirias ari u dihaala. Má chuõle Olinpas maa ari Wia nialin kala si he ba teen. <sup>16</sup> Má guori đonj a honj worun la Tiina Yesu dolun le. Nialin kala si laa Kirisito wiaa dii aa hilimi lee-na kala, ba maa chuõlema.

<sup>17</sup> Mii sulma nē di ma kenj ma titia ari nialin si yie kenj niaa pupõre le a leŅ ba yiyenji ba wonjiin ba sii to le. Má liise ma titia ba le. <sup>18</sup> Niaa deenba bi la Tiina Kirisito tintinŅaa ka tinj, ama ba titia wu-chooloo nē baa ņaa. Ba yie kenj niisima a nyise nialin si bi wiaa jinj. <sup>19</sup> Nuukala nē nia ari ma sii to Wia niin wiaa nii. U nii ņaa mi tuõtoru nē, mii juõse ma wiaa. Mii che di ma paala jinj wialin si zõmõ aa ņaaba, aŅ liise ma titia wu-bõŅŅõõ ņaanin le. <sup>20</sup> Di ma nii ņaa nii, Wia-la si leŅe niaa kenj yarifielaa, u bi jaŅ dieni, ka di u kenj Sitaani

nyaga bil ma naasinj bubuõŅ di ma nuõse. La Tiina Yesu Kirisito jaŅ fáma nennige a pema le.

<sup>21</sup> Timoti mi tintinni-đonj, uu chuõlema. Lusias ari Jeestin ari Sõsiipata maa chuõlema. Ba ma ņaa juu timma nē.

<sup>22</sup> Mi-na Teetias si ņmunse tenin deen, mi maa chuõlema la Tiina Yesu dolun le.

<sup>23</sup> Gayas ņaa mi dia tiina nē, u dia le nē nialin kala si laa Yesu wiaa dii maa hilimi. U maa chuõlema. Irasitas, nii-la sii beŅ moribee tan-la le ari la naanbie Kõõõõõ, ba maa chuõlema.

[ <sup>24</sup> La Tiina Yesu Kirisito jaŅ fáma nennige a pema kala le. Ami.]

*Ma leŅ di la denne Wia*

<sup>25</sup> Má leŅ di la denne Wia. U nē wuo leŅ di ma wasa kenj yarida a tinj Wia wu-zõmõ-la mi si bula pima a tige Yesu Kirisito le. Wia nē ņaa niila si bi suu. U fa jonj u wu-zõmõ-la <sup>26</sup> faa, faafaa kala nē aŅ leele kaa ku lii pulumun tuõŅ. Leele Wia leŅe ba bula pi dunia kala nē di ba laa wialin dii a tutoba. Nialin sii bul wiaa, Wia Din-zõŅ-la dolun le ma fa ņmunse wiaa a tige wiaa deenba le nē Wia tenin tuõŅ.

<sup>27</sup> Má leŅ la to Yesu Kirisito le a denne Wia wuu. U dunđunja nē kenj wu-jiminj. Ami.

## TEN-BUNBUN-LA PÖÖL SI NĪMUNSA PI KÖRINTI NIAA

<sup>1</sup> Mi-na Pööl, ari la naanbie Sositenis ne nmunse teniñ deen pipima. Wia tuotorun le ne u liisemi di mi ñaa Yesu Kirisito nanzoö.

<sup>2</sup> La nmunse teniñ deen a pipi nialin si laa Yesu wiaa dii aa hilimi Kōrinti tan-la le ne. Wia ne liisema di ma to Yesu Kirisito le, a ñaa tuo-pul timma u sipaan. U ne yirema ari nialin kala sūi chuole Yesu Kirisito a he dunia seme-na kala, di ma ñaa tuo-pul timma u teen, di Yesu ñaa la di ma kala Tiina.

<sup>3</sup> La Nyimma Wia ari la Tiina Yesu Kirisito lahōrimo le, ma jañ hōñ ari yarifiēlaa.

*Wia to Kirisito le ne a pēla le*

<sup>4</sup> Mi yie lölle Wia worun a tiñ ma wiaa, bēe wiaa u to u lahōrimo le ne a jon ku-zōñjoo a pima. Kirisito Yesu le ne u to a ñaa ñii. <sup>5</sup> Wii-na kala le, Wia to Yesu le ne a pēma le worun, ma wuo jin ñii ma si jañ wuo bubul wiaa añ pē jin ba bubuōsaa maa. <sup>6</sup> Wii-la chaasa chin ne, bēe wiaa wu-zōmo-la ba si bula a tige Kirisito le he ma tuōñ ne worun. <sup>7</sup> Nii wiaa ne tii Wia chaasa pēma le worun. Ma sūi gberē la Tiina Yesu Kirisito duu miira kō ñii, u jon kialin kala si lii u Diñ-zōñ-la teen a dii

zile ma le ne. <sup>8</sup> Wia ma jañ chaasa keñma worun, a kaa mu yi tapulii-la la Tiina Yesu Kirisito si jañ miira kō. U jañ keñma di ma sí wu-bōñ ñaa a mu yi Yesu Kirisito si jañ miira kō tapulii-la. <sup>9</sup> Wia keñ wutitii ne. U ne yirema di ma di u Bie Yesu Kirisito ku ñaa kubala. U ne ñaa la Tiina.

*Nialin si laa Yesu wiaa dii sūi yuo dōñj*

<sup>10</sup> Mi naanbiirin, mii sul ma kala la Tiina Yesu Kirisito dolun le, di ma keñ nii-bala a sí dōñj le pōru. Mii sulma di ma keñ tuo-bala a chin wu-bala le. <sup>11</sup> Mi naanbiirin, mi nia di maa yuo dōñj ne. La naanbie ba sūi yire Kuluuwi, u dia niaa ne bula pimi. <sup>12</sup> Mii che di mi bul ari ma kuñ-kala bi wonbbi-bala ka to. Ma dōñj yie bul duu to Pööl hariñ ne, ka dōñj ma si duu to Apōlos hariñ ne. Dōñj ma si u to Piita hariñ ne, ka dōñj ma si u to Kirisito hariñ ne. <sup>13</sup> Má leñ di mi piesema wiin deen. Ni-bala ne tii Kirisitoo? Ba kpaase Pööl mere daa-gesēe nyun duu laama ta nee? Ba foma Wii-chuole liin Pööl yirin le nee? <sup>14</sup> Mii lölle Wia ari mi si bi ma kuñ-kala Wii-chuole liin fo, see la naanbie Kirisipas ari Gayas dunduna. <sup>15</sup> Nii wiaa nuu ma saa bi jañ wuo bul ari mi fou Wii-chuole liin di u ñaa mi haritooru. <sup>16</sup> Mi liise yi ari mi fo la naanbie Sitefinis ari u dia niaa ma Wii-chuole liin. <sup>17</sup> Mi biina mi bira bi

niaa dönsunj Wii-chuoε liinj fo, bæε wiaa Kirisito bimi tima di mi ku fo niaa Wii-chuoε liinj. U tinjmi nε di mi ku bul Wia wu-zömö-la. Nuhuobiine wu-jiminj dee u jonjo pimi mi kaa bubul wialinj. U ηaa ηii di dol-la si lii Kirisito ε, a tinj u si suu daa-geεε nyunj ηii, sí pei ηaa nε.

*Kirisito nε keη Wia dolunj ari u wu-jiminj*

<sup>18</sup> La si si ari Kirisito suu daa-geεε nyunj bi bubuo kene nialinj si leε teenj. Ama la nialinj Wia si laa ta, wialinj la síi bul lii u teenj nε a keη dolunj la teenj. <sup>19</sup> Wia teninj tuonj ba bula di Wia si u jan lej di wu-jinnaa wu-jimii-la ηaa pei, ka wu-jinj kinkeη tinjηaa wu-jiminj ma ηaa pei.

<sup>20</sup> Di ηii nε ηaa, nii nε wu-jinna-la jan he? Wu-jinj kinkeη timma-la, nii nε ba jan he? Nialinj si keη wiaa kaa lilere dunia deenj ε, ba ma jan he nii? Wia daga ari dunia deenj wu-jiminj ηaa ni-yaari wu-jimii nε. <sup>21</sup> Wia si keη wu-jiminj, ηii nε tii u wuo ηaa di nuhuobiine sí u titia wu-jiminj ε to a jinj u-na Wia. Niaa si di Wia wu-zömö-la la síi bul ηaa wu-töonu nε. Ama nialinj si laa wialinj dii, Wia jan laaba ta. <sup>22</sup> Juu tinjηaa cho di Wia ηaa wu-magil nε di ba na, ka Giriik tinjηaa ma cho di Wia dage u wu-jiminj di ba na. <sup>23</sup> Ama Kirisito si suu daa-geεε nyunj wiaa nε la bubul. Kirisito si suu daa-geεε nyunj lej Juu tinjηaa

baaninj sisii, anj ka nialinj si bi Juu tinjηaa ηaa teenj u ηaa wu-peı nε. <sup>24</sup> Ama nialinj Wia si yira kala teenj, Juu tinjηaa ari Giriik tinjηaa kala, Kirisito ε nε Wia dolunj ari u wu-jiminj kala he. <sup>25</sup> U maga di ma jinj ari wii-la si lii Wia teenj, niaa si u ηaa ni-yaari wii nε, u paala kpia nuhuobiine wu-jiminj, ka ba bi jinj. Wii-la ma si lii Wia teenj, ka nuhuobiine si u ηaa wu-pugunj, u keη dolunj a kii nuhuobiine.

<sup>26</sup> Mi naanjiirinj, má liise yi ηii ma fa si naga bua-la ε Wia si yirema. Ma tuonj niaa banjmeε nε fa keη wu-jiminj, koo ma tuonj niaa banjmeε nε faa dii dolunj niaa le? Ma niaa banjmeε ma nε fa ηaa ni-balaa nuhuobiinee teenj? <sup>27</sup> Wia paala chaasa liise nialinj dunia niaa si si ba ηaa ni-yaari nε, duu wuo he dunia niaa wu-jinnaa hiisinj ε. Wia bira liise nialinj ma dunia niaa si si ba ηaa ni-pugununj nε, duu wuo he ni-duorunj hiisinj ε. <sup>28</sup> Wia liise nialinj dunia niaa si bee guguune ari nialinj si bi lee kene dunia ε, duu wuo chei nialinj dunia niaa si biina ari ba ηaa nia. <sup>29</sup> Wia ηaa ηii di nuu-kala sí u dolunj ε wuo to a bigisi u titia ε Wia teenj. <sup>30</sup> Ama Wia leje ma to Kirisito Yesu ε a keη miisinj. Wia saa leje Kirisito nε ηaa la wu-jiminj. A tinj u wiaa Wia laala ta nε, la ku ηaa tuo-pul timma u teenj, a ηaa nialinj si bi disinninj kene. <sup>31</sup> Wia teninj tuonj ba



bula, "Di nuu-kala nii che duu bigisi u titia le, u tiina maga duu bigisi u titia a mu tige wii-la la Tiina si nja pu le ne."

## 2

*Pool bul wiaa a mu tige Kirisito si suu daa-gese nyu*

<sup>1</sup> Mi naanbiirin, mi si ko ma teen di mi bul Wia wu-zomola a pima, mi bi wu-duduosi bula a nage di mi ken wu-jimin. <sup>2</sup> Mi si ko ma teen, mi naga ari mi bi wii-kala jin ne, see Yesu Kirisito si suu daa-gese nyu dunduja wiaa. <sup>3</sup> Nii wiaa, mi si he ma teen, mi fa nage ni-pugu ne. Fawulun fa kenmi, mi boye jujon. <sup>4</sup> Nuhuobiine wu-jimin dee mi kaa bubul Wia wu-zomola, an pe didage ma maa. Ama nii mi sii bul wiaa daga ari Wia Din-zonla dolun hemi le ne. <sup>5</sup> Wia nja nii mi le di ma na u dolun a laa u wiaa dii, a si nuhuobiine wu-jimin le to.

*Wia wu-jimin kii nuhuobiine wu-jimin*

<sup>6</sup> Ama nialin si waa Wia wiaa le, la yie didageba wu-jimin ne. Wu-jimin deen la sii dagu tuo dunia deen niaa wu-jimin, dunia deen ni-duorun wu-jimin ma dee. Ni-duorun deenba wu-jimin jan dere. <sup>7</sup> Wu-jimii-la wiaa mi sii bul, u lii Wia teen ne a nja wu-faali niaa teen. Wu-jimii-la faa ne Wia teen ne, ka dunia-na suomi. Wia

liisela di la ken wu-jimin deen ne a wuo ken tula u teen. <sup>8</sup> Nialin kala sii ben dunia deen bi wiaa deenba bubuon jin. Di ba ne fa jinba, ba fa bi jan kpaase la Tiina-la si ken tula a mere daa-gese-la nyu. <sup>9</sup> Ba nmunse Wia tenin tuon ari ku-la nuhuobiine ha si bi na, ari ku-la u ha si bi u wiaa ma nia, ari ku-la ha si bi nuhuobiine tuobiinaa jua, kialin titia ne Wia wasa bil nialin si chou le.

<sup>10</sup> Ama Wia to u Din-zonla le ne a len la-na jin wiaa deenba fa si faa. Wia Din-zonla yie gbilli wii-kala ne, a paala jin Wia wii-wii-kala. <sup>11</sup> Nuhuobiin be ne jan wuo jin wii-la u donjo sii biinu? Nu-kala bi wuo jin, see u tiina titia sii biinu wii-la. Nii titia ne nu-kala bi jan wuo jin wialin Wia sii biinu, see Wia Din-zonla dunduja. <sup>12</sup> La laa Wia Din-zonla ne. U tuo dunia deen kun. Wia jon u Din-zonla a pila ne di la wuo jin kialin kala u si jonjo dii zile la le. <sup>13</sup> La yie bul kiaa deenba wiaa a pi niaa ne. Dunia deen wu-jimin dee la kaa bubul wiaa. Ama Wia Din-zonla ne dagela nii la si jan bul wialin. U yie dage u titia wiaa bubuosa a pi nialin le u si he, di ba ma jin ba bubuosa.

<sup>14</sup> Nii-la kala si bi Wia Din-zonla kene bi jan laa kialin Wia si jonjo pi nialin si ken u Din-zonla. U tiina bi jan wuo jinba. Ba yie

ηaa wu-peiba ne u teen, bæe wiaa nuu bi jaŋ wuo jinba, see duu keŋ Wia Diŋ-zoŋ-la. <sup>15</sup> Nii-la si keŋ Wia Diŋ-zoŋ-la ne jaŋ wuo chagile nuu-kala. Ama nii-la si bi Wia Diŋ-zoŋ-la keŋe bi jaŋ wuo chagile nii-la si keŋ Wia Diŋ-zoŋ-la. <sup>16</sup> Wia teniŋ tuoŋ ηla ne ba ηmunŋe a pieŋe, "Kubee ne jin la Tiina Wia tuobiinaa? Kubee ne jaŋ wuo bul wiaa a chagilu?" Ama la-na jin Kiriŋito tuobiinaa ne.

### 3

*U maga di Wia tiŋtinnaa pe doŋo le a tiŋ u tiŋtiŋηaa*

<sup>1</sup> Mi naanbiirin, mi bi wuo bul wiaa ma teen ari ma ηaa nialiŋ sii to wialiŋ sii toŋe Wia Diŋ-zoŋ-la tuoŋ ne. Ama mi bul wiaa ma teen ari nialiŋ sii to ba tuotoŋe wu-ηaalaa le ne. Ma ha ηaa haŋbiisin ne Kiriŋito wiaa le. <sup>2</sup> Wialiŋ mi si bula ma teen, ba naga yiliŋ ne mi leŋ ma wase. Mi bi wu-yuŋi kala bula pima. Buala le, ma ha bi siri ηaa di ma nii wu-yuŋi. Ari leele kala ma ha bi wu-yuŋi kala wuo nii. <sup>3</sup> Wii-la si tii ma haa to ma tuotoŋe wu-ηaalaa le ne: Ma si keŋ yaribierin doŋo le ηii a yuyuo doŋo ηii daga ari maa to ma tuotoŋe wu-ηaalaa le ne, a ηiηaa wiikala ari nialiŋ si bi Wia jin sii ηaa ηii. <sup>4</sup> Ma yie poŋe doŋo le ne. Doŋo si duu to Poŋol hariŋ ne, ka doŋo ma si duu to Apoŋos hariŋ ne. Ma sii

bul ηii, dunia niaa wu-bulaa dee ma bubul ηii?

<sup>5</sup> Kubee ne Apoŋos? Kubee ne Poŋol? La ηaa Wia tiŋtinnaa ne. La ne bul Wia wiaa pima ma laa dii. La kuŋ-kala tiŋ tiŋtimii-la la Tiina Wia si joŋo pila di la titiŋ ne. <sup>6</sup> Wia wialiŋ la si bula pima nage tii-bie ne la choŋŋe. Mi ne choŋŋe tia-la, Apoŋos ma ne ηaa liiŋ a miŋe, ama Wia ne leŋe tia-la waa. <sup>7</sup> Nii-la si choŋŋe tia-la ari nii-la si ηaa liiŋ miŋe tia-la kala bi siifia wii ηaa. Wia ne kii ba kala, bæe wiaa u ne leŋe tia-la waa. <sup>8</sup> Nii-la si choŋŋe tia-la ari nii-la si ηaa liiŋ miŋe tia-la, ba kala tima mage doŋo ne. Wia jaŋ tiŋ nuu-kala a mage ηii u si tiŋ u tiŋtimii-la mage. <sup>9</sup> La kala ηaa tiŋtinni doŋŋe ne a pe Wia le laa tiŋ. Ma saa nage Wia бага ne la peŋe hihe. Ma bira nage dia-la Wia titia si saa ne.

<sup>10</sup> Tiŋtimii-la mi sii tiŋ, Wia ne joŋ doluŋ pimi. Mi nage dii-sara-la si jin dia saaniŋ woruŋ ne a bil Wia-dia-la geŋtine. Nuu ma doŋ ne saa dia-la u jil. Nuu-kala saa fiele u siaa a saa dia-la duu jil. <sup>11</sup> Wia laa sipaan ne a joŋ Yesu Kiriŋito duu ηaa u dia-la geŋtine. Nuu-kala bira bi jaŋ wuo bil dia-la geŋtine yiri. <sup>12</sup> Di nuu ne joŋ selime kaa saa dia-la duu jil, koo hoŋŋ, koo tabiin, koo daa-borusuŋ, koo tuto, koo kaha, <sup>13</sup> di Kiriŋito ne miira ko tapulii-la, kialiŋ nuu-kala si joŋo saa dia-la u jil, ba jaŋ

nau. Nyininj ne jaŋ dage kula ba si kaa saa nagisinj. Ba jaŋ to ɲii le a jinj tintimii-la nuu-kala si tima. <sup>14</sup> Di nyinj-la ne ko aŋ bi wuo dii kialinj nuu-kala si kaa saa dia-la, u tiina jaŋ laa u time. <sup>15</sup> Ama di nyinj-la ne wuo dii kialinj nuu-kala si kaa saa dia-la, u tiina jaŋ tel. Ama u-na titia Wia jaŋ laau ta. U jaŋ naga ari nyinj-la faa che duu dii u tiina ne, aŋ ka Wia liisu nyinj-la le.

<sup>16</sup> Ma bi jinj ari ma ɲaa Wia-dia ne Wia Din-zonj-la jujuu? <sup>17</sup> ɲii wiaa, di nuu-kala ne chei Wia-dia-la, Wia ma jaŋ chei u tiina. Wia-dia bi disinninj keɲe. Ma titia ne ɲaa dia-la.

<sup>18</sup> Nuu-kala si u titia nyisu. Di nuu ne he ma tuonj a biine ari u keŋ wu-jiminj dunia deenj le ne, u maga duu birime ni-yaari ne a wuo keŋ wu-jimii-la si lii Wia teenj. <sup>19</sup> Dunia niaa wu-jiminj ɲaa pei ne Wia teenj. Wia teninj tuonj ba bula ari

“Wia to dunia niaa wu-jiminj le ne  
a bere keɲeba.”

<sup>20</sup> Wia teninj seme donjo ma ba ɲmunsa ari wu-jinnaa tuobiinaa kala ɲaa pei ne.

<sup>21</sup> ɲii wiaa nuu-kala saa si u boye le ɲmoo a dage wii-la nuhuobiine si jaŋ wuo ɲaa. Wutitii, ma ne tii kuŋ-kala.

<sup>22</sup> Ma ne tii Pool, a tii Apolos, a tii Piita, a tii dunia, a tii miisinj, a tii suunj ma, a tii leele ari maachie. Ma ne tii ba kala. <sup>23</sup> Kirisito ne tiima, Wia ma ne tii Kirisito.

## 4

*Yesu nanjzoba si nage ɲii*

<sup>1</sup> Ma sii beŋla ɲii, u maga di nuu-kala jinj ari la ɲaa Kirisito tintinnaa ne. La nage nialinj sii beŋ Wia kiaa pupu ne. U ne leŋe la bubul u wu-kpunƙperisi-la fa si faa a pipi niaa. <sup>2</sup> Ama u maga di tintinni kala keŋ wutitii a titinj u tintinɲaa. <sup>3</sup> Mi sipaa tuo di ma nii bul mi teenj a mu tige wialinj mi sii dage le. Mi paala bi cheerinj joŋo pi mi titia, ɲii wiaa nuu-kala bi jaŋ joŋ cheerinj pimi a mu tige mi wu-ɲaalaa le. <sup>4</sup> Mi tuobiinaa kala chese ne. Ama mi saa bi jaŋ wuo dage ari mi bi wii cheye. La Tiina Wia ne jaŋ dii mi sariya a jinj ari mi cheye ne koo mi bi cheye. <sup>5</sup> ɲii wiaa, ma si cheerinj joŋo pi nuu-kala, see di tapulii-la la Tiina si jaŋ ko a dii la sariya. Duu ne miira ko, wu-bomɔ-la kala niaa si ɲaa biriminj tuonj, ba kala jaŋ ku lii pulumunj. Niaa tuobiinj-lorunu-la kala ba si keɲe jaŋ ku lii pulumunj le. Nuu-kala si keŋ time mage ɲii Wia teenj, u jaŋ laa.

<sup>6</sup> A tinj ma wiaa, mi naanbiirinj, mi joŋ wiaa deenba mi si bula, a kaa dage la di Apolos si nage ɲii ne. Mi ɲaa ɲii di ma wuo gunne a wuo tuto Wia niinj wialinj ari la sii to ɲii, di ma si donjo le poru a cho donsunj aŋ bere donsunj. <sup>7</sup> Kubee ne ɲaa ma yuga kii ma donsunj? Wia dee bi kialinj ma si keɲe

jonjo pima? BEE ne tii ma bibigisi ma titia le a nage kialinj ma si kene, Wia dee bi jonjo pima?

<sup>8</sup> Ma paala kenj kuj-kala ma sii che ne. Ma paala kiila ne anj leele dii kuorunj. Wutitii, la fa cho di ma dii kuorunj, di la di ma kala biben kuj-kala ne. <sup>9</sup> U naga ari Wia jonj la nialinj si nja u nanzoba di la nja ni-peiba ne dunia deenj le. U naga ba liisela niaa tuonj di ba kpula ne. Ba tuosela a kaa ku lii, di dunia niaa kala ari Wia tinjdaaraa nala a huurila ne. <sup>10</sup> A tinj Kirisito wiaa, la nja ni-yaara ne, ka ma-na kenj wu-jiminj Kirisito teenj. La-na nja puwuoloo ne, anj ka ma-na nja ni-duori. Niaa mumonja le anj zizilma. <sup>11</sup> Naa-buasunj deenba le losunj ari lii-nyuasunj kenja ne, la laale geri-kosumoo, ba nmunjmoola, la gollo bibaare. <sup>12</sup> La faasa titinj ne di la pe la titia le. Di niaa ne nmiesa hela le, la-na yie sul Wia piba ne, di ba ne to naasinj dudogisela, la yie nyalime ne. <sup>13</sup> Di ba ne chei la yirinj, la-na yie bubul wu-zonjoo ne ba teenj. Naa-buasunj deenba le, dunia nisurunj paala kpiala ne.

<sup>14</sup> Ma nage mi bii-choolie ne. Nii wiaa, mi bi wiaa deenba nmunsa pima di hisinj kenja, ama mii che di mi chagilema ne. <sup>15</sup> Di ma ne kenj sipaa-laaraa sii dagema Kirisito wiaa, di ba ne nja bui fii maa, ma bi

nyimmaba kene. Mi ne nja ma nyimma Yesu Kirisito le, bee wiaa mi ne bul Wia wuzomola a pima. <sup>16</sup> Nii wiaa mii sulma di ma to mi harinj a njjaa wialinj mi sii nja. <sup>17</sup> Nii ne tii mi tinj Timoti duu ko ma teenj nii. U nage mi bii-choolii ne, a kenj wutitii maa la Tiina Kirisito wiaa le. U janj liliisima nii mi sii to Kirisito wiaa, ari nii mi si yie dageba lee-na kala niaa si laa Yesu wiaa dii aa hilimi tuonj. <sup>18</sup> Ma donsunj kenj nyuduonj ne a bibiine ari mi bi janj ku nama. <sup>19</sup> Di Wia ne seye, mi bi janj dieni anj ku nama. Di mi ne ko, mi bi che di mi nii nyu-duo tinjaa deenba wu-bulaa dunjuna, ama mi janj chiche di mi jinj lee-la ba dolunj si he. <sup>20</sup> Wia kuorii-la bi nuhuobiine wu-bulaa le china, ama Wia dolunj le ne u chinj. <sup>21</sup> Wubee ne ma cho? Mi kori chiba ku viiremaa, koo mi kenj chonunj ari siifielaa koo?

## 5

*Nialinj si laa Yesu wiaa dii donsunj ne nja wu-liilinj*

<sup>1</sup> Ba venee bul, mi nii ari nuu ne he ma tuonj a nja disinninj. U nii loro. Nialinj si bi Wia jinj ma paala bi nii ka nja. Ba bula pimi ari nuu ne he ma tuonj a laa u nyimma haala jaa. <sup>2</sup> Ee ne saa ma janj wuo nja a bigisi ma titia le? U maga di ma tuonj chei ne, ka di ma liise nii-la si nja nii a ta ma tuonj.

<sup>3</sup> Mi-na, mi paala he di-bolii ne, ama mi dima guoli

ma tuoŋ ne. La Tiina Yesu doluŋ le, mi paala joŋ cheeriŋ pi nii-la si ŋaa wu-loruŋ deen ne. <sup>4</sup> Mi joŋ cheeriŋ pi tiina ne. La Tiina Yesu Kirisito doluŋ le, di ma ne ku hilimi, ka mi dima he ma tuoŋ, <sup>5</sup> má joŋ baala deen he Sitaani nisiŋ le, di u to u tuotore wu-ŋaalaa le a doŋise u yaraa, ka di Wia laa u dima ta tapulii-la la Tiina si jaŋ miira ko.

<sup>6</sup> Ma sí bigisi ma titia le ŋii, u ŋaa pei ne. Ma bi jin ari si-buruŋ mua ne ba yie joŋo he boroboro munuŋ le, ka u sii puore a yugee? <sup>7</sup> Má joŋ si-buru-binii-la ta. Di ma ne ŋaa ŋii, ma jaŋ wuo ŋaa tuo-pul timma, a wuo nage boroboro muŋ-falii-la ba ha si bi si-buruŋ he. Ma saa jima ari ma bi haache kene. La ŋaa siri di la gbieli diisiŋ gbieli-bal-la ne. Kirisito ne ŋaa Pie-bie-la ba si kpua di la kaa dii la diisiŋ gbieli-bal-la. <sup>8</sup> Ŋii wiaa, má leŋ di la gbieli la diisiŋ gbieli-bal-la. Má leŋ di la joŋ boroboro binii-la si keŋ si-buruŋ ta. Si-buru-la nage haache ari tuo-bomuŋ ne. Má leŋ di la gbieli ari boroboro-la si bi si-buruŋ kene. Boroboro deen nage wutitii ari tuo-pula ne.

<sup>9</sup> Teŋ-la mi si ŋmuŋsa pima, mi bula pima di ma liise ma titia nialiŋ síi ŋaa disinniŋ tuoŋ ne. <sup>10</sup> Mi saa bi bula ari ma sí dunia niaa si ŋaa disiŋ tinŋaa, koo nialiŋ si keŋ tuo-luŋuŋ, koo gaaraa, koo vui-kpaaraa tuoŋ guolu. Di ma níi che di ma sí ba

tuoŋ guolu, ŋii-na ma bi jaŋ he dunia le. <sup>11</sup> Ama wii-la mi síi bul ne ŋla: Ma sí ma titia kaa mu mere nii-la si si u ŋaa nialiŋ si laa Wia wiaa dii doŋo ne aŋ ŋiŋaa disinniŋ, koo u keŋ tuo-luŋuŋ, koo u kpaare vuiaa, koo u gollo chichei niaa yiriŋ, koo u ŋaa si-nyuaru, koo u ŋaa gaaru. Ma paala sí leŋe di ma di tiina hoŋ a dii kudiilee maa. <sup>12</sup> Mi tinŋimiŋ dee di mi dii nialiŋ si bi Yesu jin sariya. Ama ma-na saa maga di ma dii doŋoba sariya ne. <sup>13</sup> Nialiŋ si bi Yesu jin-na, Wia ne jaŋ dii ba sariya. Wia teniŋ tuoŋ ba bula, “Má liise ni-bomuŋ ma tuoŋ.”

## 6

*Ŋii si maga di nialiŋ si laa Yesu wiaa dii bul wiaa wase*

<sup>1</sup> Ma nialiŋ si ŋaa Wia niaa, di wii ne ku he ma balia pege, doŋo yie keŋ wii-la kaa mu nialiŋ si bi Wia ka chuole teen ne, di ba bul wii-la a wase. Bee ne tii ma ŋaa ŋla? Bee ne tii ma yie bi leŋe Wia niaa bul wii-la wiwase? <sup>2</sup> Ma bi jin ari Wia niaa ne jaŋ dii dunia niaa sariya? Di ma ne jaŋ dii dunia niaa sariya, ma bi wu-biisiŋ deenba wuo bula wiwasee? <sup>3</sup> Ma bi jin ari la Wia niaa ne jaŋ dii Wia tinŋaaraa ma sariya? A saa ku biben wialiŋ si ŋaa dunia lee? <sup>4</sup> Ŋii-na saa, di wii ku he ma balia pege, bee ne tii ma yie mu nialiŋ si bi Wia ka chuole teen, nialiŋ si bi di-chinii kene nialiŋ si laa Yesu

wiaa dii aa hilimi sipaanj di ba bula wase pima? <sup>5</sup> Ma hiisi ne. Ni-bala paala tuo ma tuonj si kenj wu-jiminj, di wii ne ku he Wia niaa balia pege, duu wuo bul a wasee? <sup>6</sup> Ama di Wia niaa balia ne kenj wii, donjo yie kenj u donjo tiina mu nialinj si bi Wia ka chuole teenj ne ba bul wii-la wase piba.

<sup>7</sup> Ma si venee kenj donjo mumu niaa deenba teenj di ba dii ma wu-bulunj pima, daga ari ma kala tele ne Wia wonjiinj le. Di nuu ne nja wii chei u donjo, bee ne tii u bi tore? Di nuu ne gura laa u donjo kiaa, bee ne tii u bi leje tiina kikenj kialinj? <sup>8</sup> Ama ma titia yie nja wiaa chichei donjo anj girima lilaa ma naanjiirinj ma kiaa.

<sup>9</sup> Ma bi jinj ari tuo-bonj tinjaa bi janj wuo juu Wia kuorii-la tuonj? Ma si ma titia nyisu. Nialinj si nja disinninj ari nialinj sii kpaare vuiaa, ari nialinj si gollo chiche niaa haalaa, ari baalaa koo haalaa balia si jaa donjo, ari baala-la koo haala-la si golle lee-kala aa nja ba-liili koo ha-liili wiaa, <sup>10</sup> ari gaaraa ari tuo-lunj tinjaa, ari si-nyuaraa, ari nialinj sii chei niaa yirinj, ari nialinj sii girima lilaa donjoba kiaa, niaa deenba kunj-kala bi janj wuo juu Wia kuorii-la tuonj. <sup>11</sup> Ma donsunj faa nja wiaa deenba ne. Ama Wia fo ma haacheba ta ne. Wia ne tiima. A tinj la Tiina Kirisito Yesu wiaa ari Wia Din-zonj-la dolunj le, ma nja tuo-pul

timma ne Wia teenj.

*U maga di la lenj disinj wu-  
njalaa*

<sup>12</sup> Mi janj wuo bul ari di mi ne cho, mi janj nja wii-na kala mi sii che. Wutitii ne, ama wii-na kala bi janj nja wu-zonj a pimi. Mi janj wuo bira bul ari mi ne cho, mi janj wuo nja wii-kala, ama mi bi janj sei di kunj-kala kenj dolunj mi le. <sup>13</sup> Nu ma he dime a ma janj bul, Wia ne nja kudiilee ba dii hihe luorunj le, ka luorunj ma laa kudiile-la bibil. Wutitii ne, ama Wia janj lenj di kudiilee ari luorula kala pua. Wia bi nuhuobiine nja duu kenj u yaraa njjaa disinninj, ama duu kenj u yaraa tima pupu. Wia ne tii yara-la maa. <sup>14</sup> Wia dolunj le ne u chise la Tiina Kirisito suunj le. U janj chisela ma suunj le. <sup>15</sup> Ma bi jinj ari ma yaraa nja Kirisito yaraa seme donjo nee? Ma bira biina ari mi janj wuo jonj Kirisito yaraa seme donjo a mere ha-chorumunj yaraa le? Ai, mi bi janj nja nii. <sup>16</sup> Koo ma bi jinj di baala ne kenj ha-chorumun-la pinj, ba kala nja kubala nee? Wia teninj tuonj ba chaasa bul, "Baala ari u haala janj mere donjo le a nja kubala." <sup>17</sup> Nii titia ne niila si kenj u titia mu mere la Tiina Kirisito le, ba duu nja kubala ne Wia Din-zonj-la dolunj le. <sup>18</sup> Ma liise ma titia disinninj le. Haache-don-na kala nuhuobiine si nja bi u yaraa ka chei, ama baal-la si nja disinninj yie chei u yaraa kala ne. <sup>19</sup> Ma

bi jin ari ma yaraa ŋaa Wia Diŋ-zoŋ-la u si joŋo pima dia nee? Ma dee bi ma titia tii. Wia ne tiima. <sup>20</sup> Wia joŋ u chaliŋ ne yooma. Nii wiaa, má keŋ ma yaaraa tiŋ tiŋtimii-la sí tõe Wia tuoŋ.

## 7

### *Pool bul ha-jaari wiaa*

<sup>1</sup> Teŋ-la ma si ŋmuŋsa pimi tuoŋ ma piesemi wiaa doŋsuŋ. Mii che di mi bul wiaa a tige wialiŋ le ne. U ŋaa wu-zoŋ ne di baala ne bi haala jaa. <sup>2</sup> Ama a tiŋ wu-liiliŋ wiaa, baal kala jaa u haala, di haal ma kala jaa u bala. <sup>3</sup> U maga di baala ari u haala joŋ ba titia a pipi doŋo, a ŋiŋaa doŋoba tuotõe wiaa. <sup>4</sup> Haala bi u titia tii, u bala ne tiuu, baala ma bi u titia tii, u haala ne tiuu. <sup>5</sup> Di baala níi che u haala, u bi maga di haala via, di haala ma níi che u bala, u bi maga di u bala ma via, see di ba kala seye ari ba bi jaŋ jin doŋo a mage tapulaa baŋmene, aŋ joŋ ba titia kala he Wii-chuoŋ le. Ama di ma ne chuole Wia dere, má bira suomo jin doŋo. Di ma níi ŋaa ŋii, Sitaani bi jaŋ wuo na worbiin a joŋma he haache le a tiŋ ma si bi ma titia kenin jin wiaa. <sup>6</sup> Mi síi bul wiin deen a pipima, u bi naga ari mii che di mi bil wii ne pima di ma tuto. <sup>7</sup> Wutitii ne, mi fa jaŋ cho di ma kuŋ-kala nagemi a bi haala jaa. Ama nuu ma kala ari u wii Wia si joŋo pu ne. Wia yie joŋ wiin deen a pi kubala

a joŋ wii doŋ a pi nuu doŋ maa.

<sup>8</sup> Mii che di mi bul bonjoŋoo ari ha-bonjoŋoo ari ma yo-haalaa wiaa ne. U jaŋ ŋaa wu-zoŋ di ma ma ne nagemi a bi baala koo haala jaa. <sup>9</sup> Ama di ma ne bi ma titia wuo kiken, má mu jaa balaba ari haalaa. U ne kpia ma si jaŋ joŋ baalaa koo haalaa wiaa a he ma nyuŋ le.

<sup>10</sup> Baala-la si keŋ haalaa ari haala-la si keŋ balaba, mii che di mi bul wiin deen pima ne. Mi titia dee bi bul, ama la Tiina níi bul wii-la. U ne ŋla: ari haala bi maga duu via u bala, <sup>11</sup> ama di haal ne via u bala, u maga duu bira sí baal doŋ jaa ne, aŋ hoŋ a ŋaa ha-bonjoŋ. Duu ne na duu bi bonjoŋ wuo hoŋ, u maga duu miira mu u bala teen. Baala ma bi maga duu via u haala.

<sup>12</sup> Ma ni-kaanaa maa, mina Pool ne bul wiin deen pipima, la Tiina Wia dee. Di baal-la si laa Wia wiaa dii ne keŋ haal-la si bi Wia wiaa laa dii, di haal-la ne seye di ba hoŋ, baal-la bi maga di u viau. <sup>13</sup> Di haal-la si laa Wia wiaa dii ne keŋ baal-la si bi Wia wiaa laa dii, duu ne seye di ba duu hoŋ, u bi maga di haal-la viau. <sup>14</sup> Wii-la si tii ne ŋla: Di haala ne laa Wia wiaa dii aŋ ka u bala bi laa dii, a tiŋ haal-la wiaa, Wia yie joŋ ari baal-la ma bi disinnin kene. Nii titia ne, di baal ne laa Wia wiaa dii aŋ ka u haala bi laa dii, a tiŋ baal-la wiaa,

Wia yie jon ari haal-la ma bi disinnij kenε. Di nii fa dee, ba biirin fa jan nage nialin si bi Wia ka chuεle biirin a ken disinnij. Ama ba biirin bi disinnij kenε Wia teen. <sup>15</sup> Baal koo haal, di ba tuon nii-la si bi Wia ka chuεle ni che di nii-la u si jaa viiri, u maga duu viiri. Duu ne viire, nii-la sii chuεle Wia bi wii nja chei. Wia yie chiche di ma hon som ne. <sup>16</sup> Haal-la si laa Wia wiaa dii, an ka u bala bi Wia wiaa laa dii, εε ne η jan wuo nja jin ari η bala ma jan ku laa Wia wiaa dii? Baal-la ma si laa Wia wiaa dii, ka u haala bi Wia ka chuεle, εε ne η ma jan wuo nja jin ari η haala jan ku laa Wia wiaa dii?

<sup>17</sup> Ku-la kala Wia si jonjo pin, ari nii η fa si naga ka Wia yirin, u maga di η kenu ne. Wiin deen ne mi didage nialin si laa Yesu wiaa dii aa hilimi lee-na kala. <sup>18</sup> Di nuu ne fa keru u penin ka Wia yiru, u bi maga duu biine ari u nja wu-bon ne. Di nuu ma ne bi u penin kere an ka Wia yiru, u tiina bi maga duu keru u penin. <sup>19</sup> Di η keru η penin koo di η bi kere, u bi wii kenε Wia teen. Wii-la si nja siifan wii ne, di ma tuto Wia nin wialin u si bula. <sup>20</sup> Nu-kala si nage nii an ka Wia yiru, u nage nii. <sup>21</sup> Di η ne fa nja yon an ka Wia yirin, si leje duu nja wii-kala. Ama di η ne na wonbiin η si jan wuo tii η titia, u maga di η tii η titia ne. <sup>22</sup> Yon-na kala la

Tiina Kirisito si yira, u tiina tii u titia ne Kirisito teen. Nii titia ne nii-la si tii u titia an ka Kirisito yiru, nja Kirisito yon ne. <sup>23</sup> Kirisito ne jon u chalin yoma. Nii wiaa, ma si nuhuobiinee yosun nja. <sup>24</sup> Mi naanbiirin, nu-kala si nage nii an ka Wia yiru, u maga duu nage nii titia ne.

*Bonjonnoo, ha-bonjonnoo ari yo-haalaa wiaa*

<sup>25</sup> Ma si piesemi wii-la a mu tige ha-toloo le, Wia bi wii-kala bula pila a mu tigeba le, ama Wia si fami nennige nii, u leje mi nja ni-titii, nii wiaa mii che di mi bul wii ne a tige ha-toloo le. <sup>26</sup> A tin leεle tinteen si dolie wiaa, u jan zon di baal ne bi haala kenε. <sup>27</sup> N jaa haala neε? Pupo η siu via. N bi haala jaa? Nii-na bira si haal che. <sup>28</sup> Ama di η ne jaa haala, η bi haache wii nja. Di ha-tolo ma ha si bi bala jaa, duu ne jaa bala, u bi haache wii nja. Ama nialin si jaa haala koo baala, ba yie juu wiwalimaa tuon ne. Mi bi che di ma juu wiwalimaa deenba. Nii ne tii mi si ma si baala koo haala ken. <sup>29</sup> Mi naanbiirin, wii-la mi sii bul ne nla: La bi jan dien dunia deen le. Nii wiaa, nialin si ken haalaa, maga di ba nage ari ba bi haalaa kenε ne. <sup>30</sup> Nialin sii yel maga di ba nage ari ba tuon bi cheye, ka nialin sii mon maga di ba naga ari ba tuon bi toro. Nialin sii yoo kiaa maga di ba nage ari ba bi kun-kala ka





dolun niaa le maa a yuge,  
 6 la-na jin Wii-bala ne. U ne  
 naa la Nyimma. U ne ta kun-  
 kala si he dime. U ne tiila. U  
 le ne la to a ken miisinj. La  
 Tiina naa kubala ne. U ne  
 Yesu Kirisito. U le ne Wia to  
 a ta kun-kala. U le ne la to a  
 ken miisinj maa.

7 Ama niaa kala dee bi  
 wiinj deenj jin. Niaa donsun  
 fa kpaare vuiaa a mal ne  
 kinken, ari jinij kala di ba  
 nii dii vuiaa kudiilee, ba yie  
 biine ari ba pe nialinj sii  
 kpaare vuiaa le ne. Ba yie  
 bibiine ba tuobiinaa le ari ba  
 naa wii ne a chei. 8 Kudiilee  
 bi jan wuo lenj di Wia ari  
 nuhuobiinee pege zonj. Di  
 nj ne dii kudiilee donsun an  
 vivia donsun, u tuo wii-kala  
 Wia teenj. 9 Ma nialinj si laa  
 Wia wiaa dii a jin ari ma jan  
 wuo dii kun-kala, ma fiele  
 ma siaa, di nii dee ma jan  
 lenj di nialinj ma si laa Wia  
 wiaa dii an bi ba le china  
 worun juu haache le. 10 Ma  
 nialinj si waa Wia wiaa le, di  
 ma donsun ne juu vuinj dia a  
 hono didii kiaa, di nialinj si bi  
 waa Wia wiaa le ne nama di  
 ma dii kudiilee deenba, ma  
 bi jin ari ba ma jan to ma  
 harij a didii kiaa deenba?  
 Ba si naa nii, ba jan biine  
 ari ba naa wii ne a chei.  
 11 A tinj ma wu-jiminj deenj,  
 ma naanbie tele ne, nii-la  
 wiaa Kirisito si suba. 12 Nii  
 wiaa, di kudiile-la ma sii dii  
 ne lenje di ma naanbiirinj to  
 a juu haache le, maa chei  
 u tuobiinaa ne nii. Di ma  
 ne naa nii, ma juu Kirisito

haache le ne. 13 Nii wiaa, di  
 mi ne jima ari di mi ne dii  
 kudiil donj, mi naanbie jan  
 tel, nii-na mi bi jan dii.

## 9

*Wialinj Yesu nanzooa si  
 jan wuo naa*

1 Ma si nami nii, mi bi mi  
 titia tii? Mi bi Wia nanzoo  
 naa? Mi ha bi Yesu la Tiina  
 naa? Ma si laa wialinj dii bi  
 daga ari mi tima pi la Tiina  
 nee? 2 Di niaa donsun ne  
 paala bi laa dii ari mi naa  
 Wia nanzoo, ma-na teenj mi  
 naa ne. Miisi-la ma si kene  
 la Tiina Kirisito teenj daga ari  
 mi naa u nanzoo ne a tima  
 pupu.

3 Di niaa nii bul mi teenj,  
 nla ne mi yie bul a laa mi  
 titia: 4 U bi wonbiinj kene  
 la sii bul Wia wiaa a pip-  
 ima, di ma ma pila kudi-  
 ilee ari liinj la nyunyua, koo?  
 5 U bi wonbiinj kene di la  
 ma jaa haalaa, di ba to la  
 harij a mumu lere-la la sii  
 bul Wia wiaa, koo? Wia  
 nanzooa donsun ari la Ti-  
 ina Yesu naanaa ari Piita ba  
 sii yire Kiifas yie naa nii  
 ne. 6 Koo la di Banabas  
 dunduja ne maga di la bul  
 Wia wiaa an pe tima pe la  
 titia lee? 7 Laali-yuori bee  
 ne yie chiche u titia kiaa u  
 tintinjaa le? Paari bee ne  
 bi u titia бага kiaa ka dii?  
 Na-daari bee ne bi u titia na-  
 yilinj ka chage?

8 Ma biina mi kenj wialinj  
 dunia niaa sii naa tapulii-na  
 kala ne la kaa mimagisee?  
 Wialinj Moosis si nmunsa bil

di niaa tuto, ba bi Ții titia bula ba læ? <sup>9</sup> Wialin Moosis si Țmunȥa bil tuon, ba bula ari "Ba bi mun-nonnu chanȥpanȥaa ka chagise." Wia sipaan tuo mun-nonnu-la læ. <sup>10</sup> Wia si bul wiin deen, la wiaa ne u bubul Ții. La nialin sii bul Wia wiaa ne ba Țmunȥe wiin deen pa. Paaraa ari nialin sii kuȥ бага kiasa kala yie yiyiele ari ba keȥ toruȥ ne kialin læ. <sup>11</sup> Ții titia ne Wia wialin la si bula pima nage ku-doho ne la duu ma teen. Ții-na di ma nii pela læ ari dunia kiasa, ma si biina ari maa ȥaa kikieli ne. <sup>12</sup> Di ma nii pi niaa doȥsuȥ kiasa deenba, u bi maga di ma faasa pila a kiiba? Ama la ha bi kuȥ laa ma teen, di la si wii-kala ȥaa keȥe Wia wu-zomol-la si tige Kirisito wonȥiin læ. <sup>13</sup> Nuukala dii u tinȥinȥaa lerin ne. Ma jima nii-la sii tin Wia-dia læ ka dii Wia-dia læ ne, ka nialin ma si kpu pusuȥ pipi Wia ma yie didii namiala ne. <sup>14</sup> Ții titia ne la Tiina bul di nialin sii bul Wia wu-zomol-la, di ba ma to dime a ma didii ba kudiilee.

<sup>15</sup> Ama mi ha bi wonȥiin deen to a chiche mi kuchelele. Mi saa bi tenin deen ȥmunȥa pima, di mi laa kiasa ma teen. Mi bi jaȥ sei di nuu-kala jon kuȥ pimi, di mi si wuo bigisi mi titia læ wonȥii-la mi sii to læ. Mi si jaȥ suu ne kpia nuu-kala si jaȥ ȥaa ȥii mi læ. <sup>16</sup> Mi bi wonȥii keȥe di mi bigisi mi titia læ a tin mi sii bul Wia

wu-zomol-la wiaa. Ba tinȥi ne di mi bulba. U saa fa jaȥ lore pimi di mi ne bi Wia wu-zomol-la bula. <sup>17</sup> Di mi ne fa bul Wia wu-zomol-la mi titia tuotoruȥ læ, ȥii ne mi fa jaȥ chiche di mi laa time. Ama tinȥimii deen mi sii tin, mi titia tuotoruȥ læ dee mi titin, ama Wia ne si mi titin. <sup>18</sup> Ții wiaa saa, bæe kuȥ time ne ba jaȥ jonȥo tinȥi? Mi bi kuȥ-kala ka che. Mi tinȥimin ne di mi bul Wia wu-zomol-la a pima, a si kuȥ-kala laa nuukala teen. Mi bi jaȥ laa ku-la si maga di mi na a tin mi sii bul Wia wu-zomol-la wiaa.

<sup>19</sup> Mi ne tii mi titia, mi tuo nuu-kala yon. Ama mi keȥ mi titia ȥaa nuu-kala yon ne di mi na niaa yuge di ba ku to Wia. <sup>20</sup> Di mi ne mu juu tinȥaa teen, mi yie keȥ mi titia a nage ari mi ȥaa juu tiina ne, di mi wuo bul Wia wiaa piba, di ba wuo ku to Wia. Di mi ne mu nialin sii to wialin Moosis si ȥmunȥa bil di niaa tuto teen, mi yie keȥ mi titia a nage ba tuon doȥo ne, ama mi bi ba wonȥii-la-na ka to. Mi yie ȥaa ȥii di mi wuo na di ba doȥsuȥ ku tuto Wia ne. <sup>21</sup> Ții titia ne, di la di nialin si bi juu tinȥaa ȥaa ne hono, mi yie keȥ mi titia birime ba doȥo ne, di mi wuo na di doȥsuȥ ku tuto Wia. Wiin deen bi naga ari mi bi wialin Wia si bula di la to ka to. Ama mi sene tuto wialin Kirisito si bula ne. <sup>22</sup> Di mi ne mu nialin si bi waa Wia wiaa læ teen, mi yie keȥ mi titia a nage ba doȥo

ne, di mi wuo leŋ di ba ku to Wia. Mi yie keŋ mi titia birime a nage nuu-kala ne di mi wuo laa doŋsun ta, di mi ne wuolo. <sup>23</sup> Wiaa deenba kala mi sí ŋaa, mii ŋaaba a tiŋ Wia wu-zomɔ-la wiaa ne. Mi ŋaa ŋii di mi ma wuo na ku-zomɔ-la nialiŋ si laa Wia wu-zomɔ-la dii si jaŋ na Wia teen ne.

<sup>24</sup> Ma kala jima ari di ba ní fá, fifaara-la kala yie fá ne. Ama ba tuɔŋ ni-bala ne yie dii. Ŋii wiaa, má faasa fá a wuo dii a laa kiaa. <sup>25</sup> Fifaarina kala ba síi dagu yie wuo keŋ u titia wii-na kala le ne duu wuo fá a dii. Ama u si yie fá a dii ku-la, u bi dieni aŋ ka u chei. Ama la-na yie fá a dii ku-la si bi chei ne. U jaŋ he dime deen deen. <sup>26</sup> Ŋii ne tii mii fá tegi tegi a mumu dideriŋ ŋii. Bira ŋii ne tii mi nage choria ŋmunmooro ŋii. Mi bi mi nisiŋ viise tita pei. <sup>27</sup> Mi keŋ mi titia kala a ŋaa mi yaraa diri ne ari ŋmobun le. Mi ŋaa ŋii di mi wuo keŋ mi titia he doŋɔ le ne. Di ŋii dee, di mi ne bul Wia wu-zomɔ-la a dere, ba jaŋ bula pimi ari mi bi toru kene Wia kuorii-la tuɔŋ.

## 10

### *Má sí wuiaa kpaaru*

<sup>1</sup> Mi naanbiiriŋ, mii che di ma liise mu yi wii-la si ŋaa la naabalimaba fa síi to Moosis hariŋ le. Wia leŋ duonbilingbaaniŋ ne ku kiese to ba kala le, a beŋ ba nyun woruŋ ba kala kieli mugibal-la ba síi yire Mugi-fiaŋ.

<sup>2</sup> Duonbilingbaan-la si kiese toba le ŋii leŋ ba wuo kieli muga-la. U ŋii nage ari ba kala fa fo Wii-chuoŋe liiŋ ne a ŋaa Moosis haritooro. <sup>3</sup> Ba kala ma dii kudiile-la Wia si joŋo lo a piba. <sup>4</sup> Ba kala ma ne nyua lii-la si lii Wia teen. Lii-la Wia si piba di ba nyua lii bun le ne. Kirisito titia ne saa ŋaa Bun-la, ka u to ba hariŋ. <sup>5</sup> Ari ŋii kala, Wia tuɔŋ fa bi ba jesin nyun toɔ, ŋii wiaa ne tii Wia kpuba giri-bine tuɔŋ.

<sup>6</sup> Wiaa deenba kala ŋaa wu-magilaa ne. Baa dagela di la sí wu-bonɔɔ cho ari niaa deenba fa si choba ŋii ne. <sup>7</sup> Ma sí wuiaa kpaaru ari la naabalimaba tuɔŋ niaa doŋsun fa síi kpaaru ŋii. Wia teniŋ tuɔŋ ba si, “Nialiŋ hono di ba dii kudiilee, aŋ sii gua a ŋaa wu-liiliŋ.” <sup>8</sup> Bira u bi maga di la ŋaa wu-liiliŋ, ari la naabalimaba tuɔŋ niaa doŋsun fa síi ŋaa ŋii. Ŋii wiaa ne tii Wia leŋ ba niaa bui mara ari batori sii suu che-bala. <sup>9</sup> Ba tuɔŋ doŋsun ma fa magise la Tiina Wia ne. Ŋii ne u leŋ diŋŋaa diŋba a kpu. U bi maga di la ma magisu. <sup>10</sup> Ba tuɔŋ doŋsun ma fa gugurime wiaa Wia teen. Ŋii ne u leŋ u tiŋdaara ku kpuba. <sup>11</sup> Wia ŋaa wiaa deenba kala ba le duu chagileba ne. Ama ba saa ŋmunse wiaa deenba bil ne a pila di ba didagela wiaa ne. La he bua-la le dunia si kpage dideriŋ ne. <sup>12</sup> Ŋii wiaa nuu-kala sí biina ari u chin woruŋ ne wialiŋ u si laa

dii ƙe. U maga duu fiƙe u siaa ne, di n̄ii dee u jaŋ tel. <sup>13</sup> Di Sitaani ne ku magise nuu, u maga duu jin̄ ari n̄ii titia ne Sitaani yie mimagise nuhuobiinee kala. Ama Wia keŋ wutitii ne. U bi jaŋ sei di Sitaani magise ma a kieli n̄ii ma si jaŋ wuo n̄aa, a chin̄ wialin̄ ma si laa dii ƙe. Bua-la Sitaani s̄ii magise ma maa, Wia jaŋ pima dolun̄ di ma wuo nyalime. U jaŋ dagema won̄bii-la ma si jaŋ to a lii wii-la ƙe.

<sup>14</sup> Nii wiaa, mi nan̄ɗon̄-choolie, má liise ma titia wuiaa kpaarin̄ ƙe. <sup>15</sup> Mi jima di ma keŋ wu-jimin̄ ne, n̄ii ne tii mi bul wiin̄ deen̄ pipima. Má biine wiin̄ deen̄ worun̄. <sup>16</sup> Di la n̄ii dii kudiile-la Kirisito si si di la dii a liliisi u wiaa, la yie sul Wia ne, an̄ ka la jon̄ nyunyuala-la a nyua u tuon̄ kiaa. La si n̄aa n̄ii yie dage ari a tin̄ Kirisito chalin̄ wiaa la n̄aa kubala ne. Di la ne dii boroboro-la maa, u n̄ii daga ari a tin̄ Kirisito yaraa wiaa la kala n̄aa kubala ne. <sup>17</sup> Boroboro bala ne la yie didii. Nii wiaa la kala n̄aa kubala ne, bee wiaa la kala keŋ boroboro bala ne a kaa kpa a ɗon̄ɗo. <sup>18</sup> Má biine mu yi Iziral tin̄n̄aa ƙe, ba nialin̄ fa si yie kpu pusun̄ a nyige a pipi Wia. Di ba ne kpu puna-na kala, ba ma yie chan̄ ba torun̄ ne. Nii daga ari ba di Wia kala n̄aa kubala ne a tin̄ ba kala si dii puna-la ba si kpu pi Wia. <sup>19</sup> Wiin̄ deen̄ mi si bula, u bubuon̄ ne bee? Ma biina mi si di wuiaa

ari wuiaa kudiilee n̄aa kiaa nee? <sup>20</sup> Ai, wii-la mi si bula ne n̄la: Di vui-kpaaraa ne kpaare vuin̄, kun̄-na kala ba si kpua, ba yie kpu pi jin̄sin̄ ne. Wia dee ba kpu pa. Mi saa bi che di ma di jin̄sin̄ ku n̄aa kubala. <sup>21</sup> Ma di Wia bi jaŋ wuo pe nyunyuala, an̄ ka ma di jin̄sin̄ ma pe nyunyuala. Ma bira bi jaŋ wuo didii kiaa Wia teen̄ an̄ bira mu didii jin̄sin̄ ma teen̄. <sup>22</sup> Koo laa che di la n̄aa di Wia baanin̄ sii nee? Koo la biina la ne dolie kii Wia?

<sup>23</sup> Mi jaŋ wuo n̄aa wii-kala, ama ba kala bi jaŋ wuo pemi ƙe. Ba kala bi jaŋ wuo n̄aa di mi waa Wia wiaa ƙe. <sup>24</sup> Nu-kala bi maga duu n̄aa u tuotore wiaa, ama u maga duu nin̄aa u ɗon̄ɗo tiina tuotore wiaa ne. <sup>25</sup> Ma jaŋ wuo dii namia-na kala ba s̄ii yallu yobɔ ƙe. Ma sí leŋe di ma tuobiinaa walimema a mu tige namia-la ƙe, ari ma jaŋ wuo dii koo ma bi jaŋ wuo dii. <sup>26</sup> Wia tenin̄ wiaa tuon̄ ba si, “Dunia ari kun̄-kala si he u tuon̄, la Tiina Wia ne tiiba.” <sup>27</sup> Di nii-la si bi Wia ka chuole ne yirin̄ di n̄ ku dii kiaa, di n̄ ne cho di n̄ mua, mu a dii, ama sí leŋe di n̄ tuobiinaa walimin̄ a mu tige kudiile-la ƙe, ari u maga di n̄ dii koo u bi maga di n̄ dii. <sup>28</sup> Ama di nuu ne bula pin̄ ari kialin̄ n̄ s̄ii dii n̄aa vuin̄ kiaa ne, u naga ari ni-la si bula pin̄ tuobiinaa ka walimu ne a mu tige kudiile-la ƙe. Nii wiaa sí dii. <sup>29</sup> Sí n̄ tuobiinaa ƙe to a dii, to nii-la

si bula piŋ tuõbiinaa le a sí dii. Di mi ne jima ari mi keŋ woŋbiinŋ di mi ŋaa wii, bæe ne saa tii nuu doŋ tuõbiinaa jaŋ wuo pɔ di mi sí wii-la ŋaa? <sup>30</sup> Di mi ne lɔlle Wia aŋ-na dii kudiil-na kala, ee ne saa nuu doŋ jaŋ wuo bul ari mi cheye ne a tiŋ kudiille-la mi si die wiaa?

<sup>31</sup> Nii wiaa kuŋ-na kala ma sí dii ari kuŋ-na kala ma sí nyua, wii-na kala ma sí ŋaa, má ŋaa ba kala di Wia yirinŋ yire. <sup>32</sup> Wii-na kala ma sí ŋaa le, má pɔ ma titia le. Ma sí leŋe di Juu tinŋaa koo nialinŋ si bi Juu tinŋaa ŋaa via Wia woŋbiinŋ. Ma sí leŋe di nialinŋ ma si laa Yesu wiaa dii aa hilimi, di ba doŋɔ ma tel. <sup>33</sup> Má ŋiŋaa ŋii mi sí ŋaa. Wii-na kala mi sí ŋaa, mi yie chiche di mi pe nuu le ne. Mi bi che di mi ŋaa wiaa a pe mi titia le. Ama mii che di mi pe ni-danŋ le ne, di Wia wuo laaba ta.

## 11

*Nii si maga di haalaa chuɔle Wia*

<sup>1</sup> Má chesimi ari mi sí chesi Kirisito ŋii. <sup>2</sup> Ma ŋaa kukeri ne ma si liisi mi wiaa wii-kala le a tuto wialinŋ mi si dagma. <sup>3</sup> Ama mii che di ma jinŋ ari Kirisito ne ŋaa baal-na kala sipaa-laara, ka baala ma ne ŋaa haala sipaa-laara, ka Wia ma ne laa Kirisito sipaanŋ. <sup>4</sup> Nii wiaa di baal níi chuɔle Wia, koo duu níi bul Wia wiaa niaa tuoŋ, duu ne joŋ kuŋ to u nyuŋ, uu hiise Kirisito ne. <sup>5</sup> Di

haal ma kala níi chuɔle Wia koo duu níi bul Wia wiaa, aŋ bi kuŋ joŋo to u nyuŋ, uu hiise u bala ne. Di haal ne bi kuŋ joŋo to u nyuŋ, u naga ari u fuŋ u nyuŋ ne. <sup>6</sup> Di haal ne bi che duu joŋ kua to u nyuŋ, u maga di u fuŋ u nyuŋ ne. U si ŋaa hiisi wii ŋii di haala ne fuŋ u nyuŋ koo duu ke u nyuŋ ŋii, u maga di haala joŋ kuŋ ne a to u nyuŋ. <sup>7</sup> Baala-na bi maga duu joŋ kuŋ a chu to u nyuŋ, bæe wiaa ŋii Wia si naga, ŋii titia ne u ŋaa baala. Baala tula ma lii Wia teenŋ ne, ka haala ma tula lii baala teenŋ, <sup>8</sup> bæe wiaa haala le dee Wia to a ŋaa baala, ama u to baala le ne a ŋaa haala. <sup>9</sup> Bira, Wia bi baala ŋaa a tiŋ haala wiaa, ama u ŋaa haala ne a tiŋ baala wiaa. <sup>10</sup> A tiŋ Wia tinŋdaaraa wiaa haala maga duu joŋ kuŋ ne a vɔɔ to u nyuŋ. <sup>11</sup> Nialinŋ si laa Kirisito wiaa dii le, baala bi u titia tii, haala ma bi u titia tii, ba kala tii doŋɔ. <sup>12</sup> Wia si to baala le a ŋaa haala ŋii, ŋii titia ne haala ma lulul baala. Wia ne ŋaa ba kala. <sup>13</sup> Má titia biine wiinŋ deenŋ woruŋ, a na di haal níi chuɔle Wia lee-la nialinŋ si laa Yesu wiaa dii síi hilimu aŋ bi kuŋ joŋo to u nyuŋ, u zɔmɔ nee? <sup>14</sup> Wia si ŋaa baala, u daga ari baala ari nyu-puŋ-duduosuŋ keŋ hiisŋ ne, <sup>15</sup> ama haala-na tuoŋ jaŋ wuo tɔre a tiŋ u nyu-puŋ-duduosu-la. Wia joŋ nyu-puŋ-duduosuŋ pi haala di u kaa to u nyuŋ ne. <sup>16</sup> Di

nuu ne saa che duu ken wiin deen kaa lere, mi jan bul ari wii-la ne la tuto. Wii don kala tuo. Nialin si laa Yesu wiaa dii aa hilimi ma ka to nii ne.

*Nii si maga di la dii kialin a liliisi Yesu wiaa*  
*Mat. 26.26-29; Maak 14.22-25; Luuk 22.14-20*

<sup>17</sup> Mii che di mi dagema wiaa banmene ne. Di ma ne hilime di ma chuole Wia, ma yie bi donjo le pe. Ma yie chichei donjo ne. Ma ha bi worun naa. <sup>18</sup> Wii-la mi sii che di mi bul ne nla: Mi nia ari di ma ne ku hilimi di ma chuole Wia, ma bi niibala ka ken. Mi saa laa dii a nage wutitii mua he wiin deen mi si nia le. <sup>19</sup> U paala maga di ma pore donjo le ne, di ba to nii le a na nialin si naa ni-titiiba. <sup>20</sup> Di ma ne ku hilimi, di ma dii kudiile-la la Tiina Kirisito si si di la didii a liliisi u wiaa, u dee ma didii nii. <sup>21</sup> Di ma nii dii, nuu-kala yie didii u kudiilee ne. Donsun ken losun, ka donsun ma bugi. <sup>22</sup> Bee ba! Ma bi diisin kene ma si jan wuo hon dime a dii kudiilee an pe nyunyua? Koo maa che di ma mon nialin si laa Yesu wiaa dii aa hilimi, an len di nialin si bi kun kene ba tuon dii hiisin nee? Bee ne maa che di mi bula pima a tige wiin deen le? Mi bibesema lee? Ai, mi bi jan besema le.

<sup>23</sup> La Tiina Kirisito teen ne mi laa wialin mi si dagema. Titan-la ba si jon la Tiina

Yesu yalle ne, u jon boroboro <sup>24</sup> a lolle Wia, an kaa choge an bul, "Mi yaraa ne nla mi chogo pima, ma laa dii. Ma ma choge boroboro a didii, a liliisi mi wiaa." <sup>25</sup> Nii ne ba si dii boroboro-la dere, u bira jon nyunyuala ari si-huon an bul, "Nyunyuala deen ne Wia jon a tita nii-falii-la ma teen. Mi jan suu di mi chalin jaase. Bua-na kala le di ma nii nyuau, ma nyua a liliisi mi wiaa." <sup>26</sup> Ka di la Tiina-na ko, ma dii boroboro deen an nyunyua nyunyuala tuon. Di ma nii naa nii, ma yie didii dansia ne ari la Tiina Kirisito suu ma wiaa ne.

<sup>27</sup> Nii ne tii di nuu-kala ne dii boroboro deen, koo duu ne nyua nyunyuala-la tuon, a bi nii naa di la Tiina yirin yire, uu tuuse la Tiina jonhon ne nii. U tiina naa chei ne. U bi la Tiina yaraa ari u chal-la jon ari ba naa siifan kiaa. <sup>28</sup> Nii wiaa nuu-kala maga duu laa sipaan a ben u titia le worun an-na dii boroboro-la, a nyua nyunyuala-la tuon maa. <sup>29</sup> Di nuu ne bi u titia le bene worun ari boroboro-la u sii dii naa Kirisito yaraa ne, si-huo-la ma naa u chalin, u ken u titia banjaa he nmenin ne nii. <sup>30</sup> Ma donsun he dime a bi ba titia le bene an-na didii boroboro-la, an pe nyua nyunyuala-la tuon. Nii ne tii ma donsun wiwiile nii, ka donsun ma pugime, ka donsun ma suu. <sup>31</sup> Di la ne laa sipaan ben la titia le, la bi jan ken la titia banjaa

kaa he n̄menin̄ le Wia teen̄.  
<sup>32</sup> Ama di Wia ne na di la cheye, u yie d̄ogisela ne. U yie n̄aa n̄ii duu s̄ila jon̄o pe dunia n̄iaa le a dii la sariya, a jon̄ cheerin̄ pila.

<sup>33</sup> N̄ii wiaa mi naan̄biirin̄, di ma ne hilime di ma dii kudiile-la la Tiina si si la didii a liliisi u wiaa, má gber̄e d̄on̄o. <sup>34</sup> Di losun̄ ne ken̄ ma d̄on̄o, u maga duu dii kiaa u dia le ne an̄-na k̄o. Di ma ne n̄aa n̄ii an̄ hilimi, Wia bi jan̄ jon̄ cheerin̄ pima. Wu-kaana-la-na, di mi ne k̄o, mi jan̄ dagema ba won̄biin̄.

## 12

*Kialin̄ Wia Diŋ-zon̄-la si jon̄o dii zile la le*

<sup>1</sup> Lele, má len̄ di la bul kialin̄ Wia Diŋ-zon̄-la si jon̄o dii zile la le wiaa. Mi naan̄biirin̄, mii che di ma jin̄ kiaa deen̄ba ne. <sup>2</sup> Ma jima bua-la le ma fa si bi Wia ka chuole, ma faa to Sitaani hariŋ ne, a faa kpaare vuiaa maa. Vuiaa deen̄ba fa bi wiaa wuo bubul. Ba len̄e ma yen̄ni ne. <sup>3</sup> Mii che di ma jin̄ ari di nuu ne ken̄ Wia Diŋ-zon̄-la, u bi jan̄ wuo kaliba he Yesu le. Nuuna kala bi jan̄ wuo bul di Yesu ne n̄aa la Tiina, see di Wia Diŋ-zon̄-la heu le.

<sup>4</sup> Wia Diŋ-zon̄-la si jon̄o kialin̄ dii zile la le, ba yuga ne, ama ba kala lii u dun̄dun̄a teen̄ ne. <sup>5</sup> Won̄biee yuga ne la si jan̄ wuo to a tima pipi Wia, ama Wii-bala ne la tima pipa. <sup>6</sup> Kialin̄ Wia Diŋ-zon̄-la si jon̄o dii zile la

le yie tin̄ tin̄tin̄-yiriba ne u n̄iaa le, ama Wia ne toba le a titin̄ tin̄timia-la kala. <sup>7</sup> Nuukala ken̄ u wii ne Wia Diŋ-zon̄-la si jon̄o dii zile u le, duu kaa pipe u naan̄biirin̄ le. <sup>8</sup> Wia Diŋ-zon̄-la yie jon̄ wu-jimin̄ a pi nuu u wuo bubul Wia wiaa pipi n̄iaa. U yie jon̄ wii pi nuu d̄on̄ u wuo jin̄ Wia wiaa bubuon̄ a wuo didageba worun̄. <sup>9</sup> Wia Diŋ-zon̄-la yie n̄aa nuu d̄on̄ ma ken̄ yarida, ka d̄on̄o ma ken̄ dolun̄ a ma wuo vivaare n̄iaa, <sup>10</sup> ka d̄on̄o ma ken̄ dolun̄ a kaa n̄aa wu-kpun̄kperisin̄, ka d̄on̄o ma ken̄ dolun̄ a wuo bubul Wia wiaa, ka d̄on̄o ma bira ken̄ wu-jimin̄ u yie jin̄ diŋsi-la si lii Wia teen̄ ari diŋsi-la si bi u teen̄ lia pege. Wia Diŋ-zon̄-la yie pi nuu d̄on̄ ma dolun̄ u wuo bubul wiaa, yiikori-la Wia Diŋ-zon̄-la si pe n̄iaa le ba bubul, ka u pi d̄on̄o ma wu-jimin̄ u wuo dage wialin̄ ba si bula bubuon̄. <sup>11</sup> Tin̄tin̄-yiri deen̄ba kala lii Wia Diŋ-zon̄-la teen̄ ne. U titia tuot̄orun̄ le ne u to a jon̄ ku-yiri-yiri deen̄ba a pi nuukala ari n̄ii Wia si cho.

<sup>12</sup> Nuhuobiine yaraa n̄aa kubala ne, ama u nan̄daasin̄ yuga ne. La yaraa nan̄daasin̄ si yuga n̄ii, ba kala pe d̄on̄o le ne a n̄aa yari-bala. N̄ii titia ne Kirisito ma nage. <sup>13</sup> La nialin̄ si laa Yesu wiaa dii, la nage n̄la ne. La yuga ne, ama la n̄aa kubala ne. Wia Diŋ-zon̄-la dolun̄ le ne ba fola Wii-



chuole liinj, nialinj si n̄aa Juu tin̄n̄aa ari nialinj si bi Juu tin̄n̄aa n̄aa, nialinj si n̄aa yosu ari nialinj si tii ba titia. Wia leñe la laa u Diñ-zõñ-la a he la tuõñ ne.

14 Nuhuobiine bi nan̄daa-bala kene, u nan̄daasiñ yuga ne. 15 Di nuhuobiine naan̄ ne bula ari u si bi nisin̄ n̄aa, n̄ii wiaa u bi nuhuobiine nan̄daan̄ n̄aa, u si bul wii-la bi jan̄ leñ di u sí nuhuobiine seme dõñ n̄aa. 16 Di nuhuobiine digilin̄ ma ne si u bi siinj n̄aa, n̄ii wiaa u bi nuhuobiine yaraa seme dõñ n̄aa, u n̄ii bi jan̄ leñ di u sí nuhuobiine seme dõñ n̄aa. 17 Di nuhuobiine yaraa kala ne fa n̄aa siaa, ee ne nuhuobiine fa jan̄ n̄aa a ninii wiaa? Di nuhuobiine yaraa kala ma ne fa n̄aa digilaa, ee ne u fa jan̄ n̄aa a ninii suoraa? 18 U si nage n̄ii, Wia n̄aa nuhuobiine nan̄daan̄ kala, kuñ-kala ari u tin̄timii, ari n̄ii u si cho ne. 19 Di nuhuobiine fa ken̄ nan̄daa-bala, nii ne u yara-la fa jan̄ he? 20 U si nage n̄ii, nuhuobiine nan̄daasiñ yuga ne a mere dõñ le a n̄aa yari-bala. 21 Nii wiaa siaa bi jan̄ wuo bula pi nisin̄ ari u buu che, n̄ii titia ne nyun̄ ma bi jan̄ wuo bula pi naasiñ ari u biba ka che. 22 Di la ne bene, la jan̄ na ari nuhuobiine bi jan̄ ken̄ dolun̄ di u nan̄daasi-la si paala bi siifian̄ kiaa n̄aa ne tuo u le. 23 La biina ari la nan̄daasi-la dõñsun̄ bi siifian̄ kiaa n̄aa, ama ba nyun̄ ne la yie biben̄ worun̄. La bi

nan̄daasi-la niaa sii na nyun̄ ka ben̄ worun̄. 24 Wia ne jon̄ nuhuobiine nan̄daasi-la kala a mere dõñ le, a n̄aa u biben̄ u nan̄daasi-la si bi siifian̄ kiaa n̄aa nyun̄ worun̄. 25 Wia n̄aa n̄ii di nuhuobiine yaraa n̄aa kubala ne a kala tima pipe dõñ le. 26 Di nuhuobiine seme dõñ n̄ii wii, u yaraa kala n̄ii wii n̄ii, di ba ne bira bese nuhuobiine seme dõñ le, u nan̄daasi-la kala le ne ba bese n̄ii.

27 Ma kala si laa Yesu wiaa dii, ma n̄aa Yesu yaraa ne, ma kuñ-kala ne pe dõñ le a n̄aa yaraa kubala. 28 Nii ne tii nialinj si laa Yesu wiaa dii aa hilimi tuõñ, Wia jon̄ ma kala he leree ne, nialinj si laa sipaan̄ ne Wia nan̄zõba, nialinj sii tigeba le ne n̄aa nialinj sii bul wiaa, Wia Diñ-zõñ-la dolun̄ le, nialinj sii to ne n̄aa nialinj sii dage Wia wiaa, ari nialinj ma sii n̄aa wu-magilaa ari nialinj ma Wia Diñ-zõñ-la si jon̄ dolun̄ pa ba vivaare niaa, ari nialinj sii pe niaa le, ari nialinj sii ben̄ niaa, ari nialinj sii bul wiaa yiikori-la Wia Diñ-zõñ-la si peba le ba bubul. 29 Wia niaa kala bi Wia nan̄zõba n̄aa, ba kala tuo nialinj sii bul wiaa, Wia Diñ-zõñ-la dolun̄ le, koo nialinj sii dage Wia wiaa. Ba kala dee bi dolun̄ kene di ba n̄in̄aa wu-magilaa. 30 Ba kala dee bi dolun̄ kene di ba vivaare niaa. Ba kala dee bi yie bubul wiaa yiikori-yiriba-la, Wia Diñ-zõñ-la si pe niaa le

ba bubul le. Ba kala dee bi wialinj Wia Diŋ-zõŋ-la si bula bubuõŋ ka dage. <sup>31</sup> Nii wiaa, má joŋ ma nyuŋ kala he siifianj kialinj Wia Diŋ-zõŋ-la si joŋo dii zile ma le. Mi janj dagema woŋbii-la si kii woŋbiee kala di ma tuto.

## 13

### *Chonuŋ ne kii kuŋ-kala*

<sup>1</sup> Di mi ne wuo ninii yiikoro-na kala a wuo ninii Wia tinđaraa ma wu-buluŋ, aŋ bi niaa cho, u nage biŋbeliminj ne mi ŋmuŋmoo ŋii a ŋiŋaa goŋ pei. <sup>2</sup> Di Wia Diŋ-zõŋ-la ne pimi doluŋ di mi wuo bubul Wia wiaa, a wuo jinj wu-faali kala bubuõŋ, a keŋ wu-jiminj kala, aŋ pe keŋ yarida si janj wuo ŋaa di peelee churo mumu leree doŋsuŋ, aŋ bi niaa cho, u ŋaa wu-peŋ ne. <sup>3</sup> Di mi ne joŋ mi kiaa kala a pi summoo, a joŋ mi titia a pi niaa di ba nyige nyininj di u diimi kpu, aŋ bi niaa cho, u bi nyuuruŋ kala kene.

<sup>4</sup> Di ŋ ne cho niaa, ŋ janj keŋ kenyiri ba teenj a keŋ zile maa, ŋ bi janj keŋ yaribierinj niaa teenj, ŋ bi janj bigisi ŋ titia le ba teenj, ŋ bi janj ŋiŋaa siiduõŋ ma ba teenj. <sup>5</sup> Di ŋ ne cho niaa, ŋ bi ŋ titia ka dage ba teenj, ŋ bira bi janj to ŋ titia tuõtoruŋ le, ŋ bi janj leŋ di ŋ baaninj sisii lima lima, ŋ bira bi janj laa wiaa hihe ŋ tuõŋ. <sup>6</sup> Di ŋ ne cho niaa, ŋ tuõŋ bi janj tõre di wu-bõŋ ne juuba, ama ŋ tuõŋ janj tõre di ba ne na wu-zõŋ. <sup>7</sup> Di

ŋ ne cho niaa, u maga di ŋ nyalime wii-kala le ne, a ŋaa nuu-kala yarida maa. Di ŋ ne cho niaa, u maga di ŋ keŋ yielaa ba le, a dii kenyiri wii-kala le.

<sup>8</sup> Di ŋ ne cho niaa, chonu-la ŋ si kene, u bi janj kõ duu dere. Dol-la Wia Diŋ-zõŋ-la si joŋo pila la wuo bubul Wia wiaa, koo la wuo ninii yiikori-yiriba kala aŋ pe wu-jiminj ma, ba kala janj lel. <sup>9</sup> La wu-jimii-la la si kene, u bi yuge. Wia wialinj la sii bul, la bi janj wuo bula dere. La sii bul wiaa, Wia Diŋ-zõŋ-la doluŋ le ŋii, la bi janj wuo bula dere, mua mua ne la bubul. <sup>10</sup> Ama di kula si ŋaa ku-pilinj ne kõ, kula si bi ku-pilinj ŋaa janj lel. <sup>11</sup> Mi fa si ŋaa hanbie, mi bul hanbii wiaa ne aa biine wiaa ari hanbie, a fa ŋiŋaa wiaa ari hanbie. Ama mi si ku waa dere, mi joŋ hanbii wialinj ta ne. <sup>12</sup> Leele la si he dunia deenj le, u naga ari la beŋ Kirisito, ari niaa si yie beŋ ba titia beenantire le ŋii ne. La bi Kirisito chaasa nina woruŋ, ama maachie la janj nau woruŋ. Leele mi jimuu mua ne, ama maachie mi janj chaasa jimuu woruŋ, ari Wia si jinmi ŋii. <sup>13</sup> Nii-na wii-la diderinj, wiaa batori ne he dime. Ba ne ŋla: Ŋ si ŋaa Wia yarida, a keŋ yielaa, a cho niaa. Ama wiaa deenba batorimuŋ tuõŋ ba siifianj wiinj ne, ŋ si cho niaa.

## 14

*Kialinj Wia Diŋ-zõŋ-la si*

*joŋo dii zile la le ku-kaanij*

<sup>1</sup> Má kuŋ-kala fiɛɛ sii nɛ a chichɛ ŋii ma si jaŋ wuo ŋaa a cho niaa, a fiɛɛ sii ma a chichɛ kialij Wia Diŋ-zɔŋ-la si joŋo dii zile ma le, a wasanyaŋ ŋii ma si jaŋ wuo ŋaa a bubul wiaa, Wia Diŋ-zɔŋ-la doluŋ le. <sup>2</sup> Di nuu nii bul wiaa yiikori-la Wia Diŋ-zɔŋ-la si pɛ niaa le ba bubul, u tiina bul wiaa a pipi Wia nɛ. U sii bul wialij niaa si bi nii, nuu-kala bi wialij bubuɔŋ ma wuo jin, ama Wia Diŋ-zɔŋ-la si hɛu le nɛ tii u wuo bubul wu-kpunƙperisiŋ deɛŋba. <sup>3</sup> Ama nii-la sii bul wiaa, Wia Diŋ-zɔŋ-la doluŋ le, u bul wiaa pipi niaa nɛ. U yie pɛ niaa le a leŋ ba yarida yuge nɛ, a leŋ di ba nyuŋ nyaase Wia wiaa le, a leŋ ba tuɔŋ ma tɔrɛ. <sup>4</sup> Di nuu nii bul wiaa yiikori-la Wia Diŋ-zɔŋ-la si pɛ niaa le ba bubul, u tiina bula pipe u titia le nɛ. Ama nii-la sii bul wiaa, Wia Diŋ-zɔŋ-la doluŋ le ka pɛ nialij si laa Yesu wiaa dii a hihilimi le nɛ. <sup>5</sup> Nii wiaa mi fa cho di ma kala bubul wiaa yiikoro-la Wia Diŋ-zɔŋ-la si pɛ niaa le ba bubul le nɛ, ama mi fa paala cho di ma wuo bubul wiaa, Wia Diŋ-zɔŋ-la doluŋ ma le nɛ. Nii-la sii bul wiaa, Wia Diŋ-zɔŋ-la doluŋ le nɛ kii nii-la sii bul wiaa yiikoro-la Wia Diŋ-zɔŋ-la si pɛ niaa le ba bubul le. Di nuu nɛ hɛ dime si jaŋ dage wii-la u sii bul bubuɔŋ a pi nialij kala si laa Yesu wiaa dii aa hilimi le, uu peba le

nɛ.

<sup>6</sup> Mi naanbiirin, di mi nɛ kɔ ma teen a bubul wiaa yiikoro-la Wia Diŋ-zɔŋ-la si pɛ niaa le ba bubul le, ɛɛ nɛ mi jaŋ ŋaa a pɛma le? Mi bi jaŋ wuo pɛma le, see di mi bul wii-la Wia si joŋo dagemi a pima, koo di mi jin wii a kaa kɔ dagema Wia doluŋ le, koo di mi nɛ bul wiaa, Wia Diŋ-zɔŋ-la doluŋ le, koo di mi joŋ Wia wii dɔŋ a dagema u doluŋ le. <sup>7</sup> Di kialij ba si kaa gbigbieli, ŋmuluŋ ari chen, di ba nɛ bi woruŋ du hɛ dɔŋɔ le, kialij bi digilin ka ken. <sup>8</sup> Di ba nii du pam pam tua, di ba nɛ bi u dunuŋ duo, nuu-kala bi jaŋ wuo jin ari wii nɛ ŋaa ba yiyire niaa. <sup>9</sup> Nii titia nɛ ma nage. Di ŋ nɛ bul wii-la niaa si bi nii, ɛɛ nɛ ba jaŋ wuo jin wii-la ŋ si bula bubuɔŋ? N jaŋ ta ŋiŋaa goŋ nɛ. <sup>10</sup> Yiikorusuŋ yuga nɛ dunia le, ba kuŋ-kala ma ken u bubuɔŋ nɛ. <sup>11</sup> Di nuu nii bul wiaa yiikori-la le mi si bi nii, mi jaŋ nage nuhuɔru nɛ u teen, ka nii-la ma sii bul wiaa mi teen ma jaŋ nage nuhuɔru mi teen. <sup>12</sup> Nii wiaa, ma si cho di ma ken kialij kala Wia Diŋ-zɔŋ-la si joŋo dii zile ma le ŋii, má hɛ doluŋ aŋ pɛ nialij si laa Yesu wiaa dii aa hilimi le, di ba chin wialij ba si laa dii le kpaŋ kpaŋ.

<sup>13</sup> Nii wiaa nii-la sii bul wiaa yiikori-la Wia Diŋ-zɔŋ-la si pɛ niaa le ba bubul, u tiina maga duu sul Wia duu wuo leŋ duu wuo didage wialij bubuɔŋ ma nɛ. <sup>14</sup> Di

mi nîi chuolê Wia yiikori-la Wia Diŋ-zōŋ-la si pē niaa lē ba bubul lē, mi dima nē yie chuchuolē, ama mi tuobiinaa lē mi bi wii-la mi sîi bul bubuōŋ jîŋ. <sup>15</sup> Nii nē tii mi jaŋ keŋ mi dima ari mi tuobiinaa kala kaa chuchuolê Wia, aŋ keŋ ba kala ma kaa yiyii yiilaa. <sup>16</sup> Di ma nē ku hilimi, aŋ ka di nuu keŋ yiikori-la Wia Diŋ-zōŋ-la si pē niaa lē ba bubul lē a didenne Wia, nialîŋ si hōŋ dia-la lē si bi wii-la ŋ sîi bul nia, di ŋ nē chuolê dēre, ēē nē ba jaŋ ŋaa jîŋ wii-la bubuōŋ a bul di Ami? <sup>17</sup> U ŋaa wutitii nē, nuu jaŋ wuo denne Wia woruŋ ari yiikori-la Wia Diŋ-zōŋ-la si pē niaa lē ba bubul, ama di nuu nē ŋaa ŋii, u bi nialîŋ si hilimi lee-la wuo pipe. <sup>18</sup> Mii lolle Wia ari mi si wuo bubul wiaa yiikori-la Wia Diŋ-zōŋ-la si pē niaa lē ba bubul a kii nuu-kala, <sup>19</sup> ama di la nē ku hilimi a chuchuolê Wia, mi jaŋ cho di mi keŋ mi tuobiinaa bul wiaa banmene di niaa jîŋ ba bubuōŋ, a kii mi si jaŋ bul wiaa yuge yiikori-la niaa si bi nii lē.

<sup>20</sup> Mi naanbiirin, ma sîi wiaa biinu a nage hanbiisin sîi biine ŋii. Ma wu-ŋaalaa lē, má nage bii-mulluŋ si bi wu-bōŋŋō jîŋ, ama má bibiine wiaa a nage kuhiasin sîi biine ŋii. <sup>21</sup> Ba ŋmunŋe Wia teniŋ tuōŋ ari Wia si u jaŋ to nialîŋ sîi bul yiikori-tania ari nuhuōraa lē a bul wiaa pi u niaa, ari ŋii ma kala ba bi jaŋ jegile nii u

teen. <sup>22</sup> Nii wiaa, Wia leŋe u Diŋ-zōŋ-la pē niaa lē ba wuo bubul wiaa yiikorusuŋ dōŋsuŋ lē, duu wuo ŋaa wu-magil a pi nialîŋ si bi Wia wiaa laa dii teen. Nialîŋ si laa Wia wiaa dii, wiin deen biba lē pē. Di nuu ma nē bul wiaa, Wia Diŋ-zōŋ-la doluŋ lē, u bul wiaa pipe nialîŋ si laa Wia wiaa dii lē nē. U bi nialîŋ si bi Wia wiaa laa dii lē ka pē. <sup>23</sup> Nii wiaa, di nialîŋ si laa Yesu wiaa dii nē ku hilimi, di ba kuŋ-kala bubul wiaa yiikori-la Wia Diŋ-zōŋ-la si joŋo pēu lē u bubul, di ni-wogusuŋ koo nialîŋ si bi Wia wiaa laa dii nē he ba tuōŋ, ba jaŋ biine ari ma nyuŋ tuo. <sup>24</sup> Ama di ma kala nē bul wiaa, Wia Diŋ-zōŋ-la doluŋ lē, di nii-la si bi Wia wiaa laa dii koo di ni-wogo nē he ma tuōŋ, u jaŋ sene jîŋ ari u ŋaa haache tiina nē. Wialîŋ ma ma si bula jaŋ juu-u lē duu na duu cheye nē. <sup>25</sup> U tuobiinaa kala jaŋ ku lii pulumuŋ Wia sipaan. Nii nē u jaŋ tuu kpirimi Wia sipaan a chuolu, a bul ari wutitii, Wia he ma teen nē.

*Wonbii-la si maga di nialîŋ si laa Yesu wiaa dii to chuolê Wia*

<sup>26</sup> Wialîŋ mi si bula, ba bubuōŋ nē bēē? Di ma nē ku hilimi-na kala, di dōŋō nē keŋ yiilin duu yii, di dōŋō ma keŋ wii duu dage niaa, koo nuu nîi che duu bul wii-la Wia si joŋo dagu u doluŋ lē, dōŋō maa che duu bul wiaa yiikori-la Wia Diŋ-zōŋ-la sîi pē niaa lē ba bubul lē, dōŋō

maa che duu dage wii-la ba si bula bubuon, má ñaa wiaa deenba kala a pipe donjo le. <sup>27</sup> Di niaa donsun níi che di ba bul wiaa yiikoro-la Wia Diñ-zon-la si pe niaa le ba bubul le, u maga di ba ñaa balia koo batori a bul kun kun, ka di nuu ma he dime aa dage wialin ba si bula bubuon. <sup>28</sup> Ama di nuu ne tuo duu laa wialin bul an dage ba bubuon, u maga di nii-la si bul wialin yiikori-la Wia Diñ-zon-la si pe niaa le ba bubul le, duu tɔre ne. Má leñ duu chuole Wia u tuon le, a sí u niin suro bubul, a ken u tuon a bul wiaa a pi Wia ari u titia. <sup>29</sup> Di niaa ne he ma tuon aa bul wiaa, Wia Diñ-zon-la dolun le, má leñ di ba ñaa balia koo batori a bubul wialin, an ka di ma ku-kaanaa ma ken wialin ba si bula kaa cho naa. <sup>30</sup> Di Wia ne jon wii dage ma tuon donjo duu bula pima, má leñ di nuu-kala ken gon, ka duu bul. <sup>31</sup> Ma kun-kala jan wuo bul wiaa, Wia Diñ-zon-la dolun le, a wuo gunne a pipe donjo le maa. <sup>32</sup> Nii-la síi bul wiaa, Wia Diñ-zon-la dolun le ne maga duu biben kialin Wia Diñ-zon-la si jon puu. <sup>33</sup> Wia bi cho di ma ñin aa taawe, ama u cho di ma hon som ne.

Nialin si laa Yesu wiaa dii aa hilimi tuon lee-na kala, <sup>34</sup> u bi maga di haalaa bubul Wia wiaa a pipiba. U maga di ba tɔre ba niin an tuto baalaa niin ne, ari ba si bul nii Wia tenin tuon. <sup>35</sup> Di wii

ma ne he dime a maga di ba jin, u maga di ba piесе ba balaba ne dia le. U ñaa hiisin ne di Wia niaa ne hilime, di haalaa laa wiaa bul a pipiba. <sup>36</sup> Bee ne? Ma ne suomo bul Wia niin wiaa? Koo ma dunɔnɔn ne ba bul Wia wiaa pa?

<sup>37</sup> Di nuu ne biina ari Wia Diñ-zon-la pu dolun duu bul Wia wiaa koo duu ken wialin Wia Diñ-zon-la si kene dolun, u maga di u tiina jin ari wiin deen mi si bul lii Wia teen ne. <sup>38</sup> Di nuu ne bi che duu sei wiin deen a tin u si bila jin wiaa, la ma bi u tiina jin. <sup>39</sup> Nii wiaa mi naanbiirin, má fiесе siin a chiche di ma wuo bubul wiaa, Wia Diñ-zon-la dolun le, an sí ma donsun tin ñaa kiru di ba sí wiaa bul yiikoro-la Wia Diñ-zon-la si pe niaa le ba bubul. <sup>40</sup> U maga di ma ñaa wii-kala u bua le, duu ñaa dee dee ne.

## 15

### *Yesu sí sii suun le*

<sup>1</sup> Mi naanbiirin, mii che di mi liliisima a mu tige Wia wu-zomɔ-la mi si bula pima. Ma laaba dii ne a chin ba nyun le. <sup>2</sup> Wia wu-zomɔ-la ne laama tita, di ma ne kenu worun. Ma sí leñ duu nage ari wialin ma si laa dii bi bubuon kala kene.

<sup>3</sup> Wialin mi si nia, u ne mi bula pipima. Wii-la wu-nyun ne ñla, ari Yesu suu la haacheba wiaa ne, ari ba si ñmunse nii Wia tenin tuon. <sup>4</sup> U si suu nii, ba jonu hugi,

ka u sii suun le tapulaa batori cheen, ari ba si nmunse Wia tenin tuon nii. <sup>5</sup> Nii ne u laa sipaan ken u titia ku dage Piita, an-na ken u titia ku dage u nanzöoba-la fii ari balia. <sup>6</sup> U nii harin le bua kubala u ken u titia ku dage u haritooroo zö-banon ari danja. Niaa deenba dönsun ha he ba miisin le, ka dönsun ma suu. <sup>7</sup> Nii harin le u ken u titia ku dage Jeems, a ken u titia ku dage u nanzöoba-la kala maa. <sup>8</sup> Ba kala harin le ne u ken u titia ku dagemi maa. Mi-na paala nage nii-la ba si lula, an ka u lullun ha bi yie ne. <sup>9</sup> Yesu nanzöoba-la kala, mi ne paala naa ba tuon ku-bie. U paala bi maga di ba kenmi kaa yire Wia nanzoo, bee wiaa mi to naasin dogise nialin si laa Yesu wiaa dii aa hilimi ne. <sup>10</sup> Ama Wia dii zile mi le worun. U ne leje mi naa nuu leele, u zile ma bi pei naa (u nanzöoba-la tuon, mi ne naa ba tuon ku-bie), ama mi ne faasa tin kinken, a kii ba kala. Mi titia dolun le dee mi wuo titin, ama Wia dol-la u si jonjo pimi ne tii. <sup>11</sup> Wii-la si maga ne, Wia wu-zömö-la la sii bul. Wu-zömö-la ba sii bul ne, mi ma bubul, u ne ma laa dii.

*Nii Wia si jan naa a chise niaa suun le*

<sup>12</sup> Di la ne bul Kirisito wiaa ari u si sii suun le ne, bee ne tii ma dönsun si di nuhuobinee bi jan suu an sii suun le? <sup>13</sup> Di niaa ne bi jan suu an sii suun le, nii-na Kirisito

bi suun le sie. <sup>14</sup> Di Kirisito ne bi suun le sie, wii-la la si bula pima naa wu-peiba ne, ka ma si laa wialin dii ma naa pei ne. <sup>15</sup> U jan nage ari laa nyia wiaa pipi Wia ne, bee wiaa la bula ari u chise Kirisito suun le ne. Di niaa ne bi jan suu an wuo sii suun le, nii-na Wia bi Kirisito chisa. <sup>16</sup> Di niaa ne bi jan suu an sii suun le, nii-na Kirisito bi suun le sie. <sup>17</sup> Di Kirisito ne bi suun le sie, nii-na wii-la ma si laa dii naa pei ne, ma ha he ma haacheba le. <sup>18</sup> U nii saa jan dage ari nialin si laa Yesu wiaa dii an suu ma lele ne. <sup>19</sup> Di la yielaa si he Kirisito teen jan dere dunia deen le, nii-na dunia niaa maga di ba mumonla ne.

<sup>20</sup> Ama wutitii ne, Kirisito sii suun le ne. U ne laa nialin kala si suba sipaan a sii suun le. Ba ma jan to u harin a sii suun le. <sup>21</sup> Ni-bala le ne suun to a ken nuu-kala. Nii titia ne ni-bala ma le ne niaa jan to a sii suun le. <sup>22</sup> Adam wiaa ne tii niaa susuu. Nii titia ne a tin Kirisito ma wiaa, niaa jan sii suun le a ken miisin. <sup>23</sup> Nialin si jan sii suun le jan tuto döjoba harin. Kirisito ne jan laa ba sipaan. Di u ne miira kö, nialin si laa u wiaa dii, ba ma jan to harin a sii suun le. <sup>24</sup> Nii harin ne dunia diderin jan yi. Kirisito jan yuo dii dunia kuoroo ari ni-balaa ari nialin sii dii dolun dunia deen le. U jan jon kuorii-la a he u Nyimma nisin le. <sup>25</sup> Ama u

maga di Kirisito dii kuorun, an-na yuo dii u dinḁonḁoo kala, a kenba kaa ku he u naasinḁu bubuon. <sup>26</sup> U dinḁon-la u si jan to harinḁu yuo dii ne ḁaa suun. <sup>27</sup> Wia teninḁu tuon ba bula ari Wia jonḁu kuḁ-kala a he Kirisito nisinḁu le ne. Di ba ne bul Wia teninḁu tuon di Wia jonḁu kuḁ-kala a he Kirisito nisinḁu le ne, u bi naga ari la Nyimma Wia ma he u nisinḁu le ne. <sup>28</sup> Di Wia ne jonḁu kuḁ-kala a he Kirisito nisinḁu le, u nii harinḁu le, Kirisito ma jan jonḁu u titia a he Wia nisinḁu le, nii-la si jonḁu kuḁ-kala he u nisinḁu le di Wia kenḁu kuḁ-kala dolun.

<sup>29</sup> Di niaa ne suba an bi jan sii suunḁu le, nii-na, beḁ ne tii niaa yie lenḁu ba chinḁu ba naanḁbiiri-la si suba nyunḁu le a ḁaa ba foba Wii-chuole liinḁu? Beḁ ne tii ma yie lenḁu ba foba Wii-chuole liinḁu? <sup>30</sup> Nii-na, beḁ ne tii la nina heḁnḁu bua-na kala le? <sup>31</sup> Bua-na kala le mi ḁaa siri di mi suu ne. La kala si kenḁu miisinḁu Kirisito Yesu teenḁu nii, mi jan wuo bigisi mi titia le a tinḁu ma wiaa. <sup>32</sup> La si mu Efesis, niaa hoso ari бага kiaa si hoso nii ne, a faa che di ba kpumi. Di mi ne fa yuo yuosunḁu deenḁu di mi laa yirinḁu koo kiaa, niaa teenḁu, u bubuonḁu ne beḁ? Di nuu ne suba, ka u bi jan sii suunḁu le, nii-na má lenḁu di la to la tuotore wu-ḁaalaa le dunia deenḁu le. Niaa dḁnsunḁu bul ḁla ne. Ba si, "Má lenḁu di la dii kiaa a nyua sininḁu, beḁ wiaa maachie la jan suu." <sup>33</sup> Ama ma sí ma titia nyisu.

Di ḁ ne ḁaa ni-zonḁu an tuto ni-bonḁoo harinḁu, ḁ ma jan ku ḁaa ni-bonḁu. <sup>34</sup> Má lenḁu wu-yaayasinḁu ari ma haacheba wonḁbie-la. Ma dḁnsunḁu wu-ḁaalaa naga ari ma bi Wia jinḁu. Ma dii hiisinḁu.

*Yari-zom-la la si kaa sii suunḁu le*

<sup>35</sup> Nia dḁnḁu jan piese, di ee ne nialinḁu si suba jan wuo ḁaa a sii suunḁu le? Di yari beḁba ne ba jan kenḁu? <sup>36</sup> Nii-la si piese wiinḁu deenḁu ḁaa nitoo ne. La jima ari di ḁ ne jonḁu ku-doho a dḁu, ba bi jan nyu ku-falinḁu, see ku-la ḁ si jonḁu dḁu, laa sipaanḁu pua. <sup>37</sup> Di ḁ ne jonḁu kuorimiinḁu koo mii-biinḁu a dḁu, nyuuli-la bi bii-la ḁ si jonḁu dḁu wuo nage. <sup>38</sup> Di ḁ ne dḁu kuḁ, Wia yie lenḁu u nyu a nage nii u sii che ne. Kuḁ-na kala yie nyu a nage u nagisinḁu ne. <sup>39</sup> Kialinḁu kala si he dunia le a kenḁu miisinḁu, ba namia bi kubala ḁaa. Nuhuobiinee ari pusunḁu ari diibiisinḁu ari chenḁfilee namia bi kubala ḁaa. <sup>40</sup> Nialinḁu kala si he Wia-jan ari nialinḁu kala si he tinḁteenḁu, ba yaraa bi dḁnḁu naga. Kialinḁu si he wia nyunḁu ari kialinḁu si he tinḁteenḁu, ba zomunḁu bi dḁnḁu naga. <sup>41</sup> Wii-pḁsunḁu kenḁu u pulumunḁu ne, chene ma kenḁu u pulumunḁu, ka chenḁwulaa ma kenḁu ba pulumunḁu. Chenḁwulaa ma tuonḁu, dḁnsunḁu ma pulla ne a kii dḁnsunḁu.

<sup>42</sup> Nii titia ne u nage di niaa ne sii suunḁu le. Ku-la ba si jonḁu hugi jan pua, ka ku-la si

jan sii suun le bi jan ko duu pua. <sup>43</sup> Ku-la ba si jan jono hugi loro ne. Duu ne sii suun le, u jan ken tula. Ku-la ba si jono hugi pugima ne, duu ne sii suun le, u jan ken dolun. <sup>44</sup> Yara-la ba si jan jono hugi ne la ken dunia le nii. Ama yara-la si jan sii suun le naa yara-la Wia Din-zon-la si jan jono pila ne. Di la ne ken yaraa dunia deen le, u maga di la ken yaraa Wia teen ma ne. <sup>45</sup> Wia tenin tuon ba nmuusa, "Nuhuobiin-la Wia si humo naa yirin ne Adam. Nii ne Wia wiese heu le u ken miisin." Nuhuobiin-la si to harin ko ne naa Kirisito. U nii to u Din-zon-la le a pi niaa miisin. <sup>46</sup> U bi naga miisi-la Wia Din-zon-la si jono pila ne laa sipaan ko, ama miisi-la la si kene dunia deen le ne laa sipaan ko, ka miisi-la Wia Din-zon-la si jono pila ma to harin ko. <sup>47</sup> Nuhuobiin-la si laa sipaan ko dunia, tiarin ne Wia jono me. Nii-la si to harin ko-na lii Wia-jan ne a ko. <sup>48</sup> Ba si ken tiarin ne me Adam nii, nii titia ne nialin kala ma miisin si lii Adam teen naa tiarin ne. Kirisito si lii Wia-jan ku tuu nii, nii titia ne nialin si ken miisin u teen ma ken miisi-la si lii Wia-jan. <sup>49</sup> La si ken nii-la ba si ken tiarin me nagisin nii, nii titia ne la jan ken nii-la si lii Wia-jan ma nagisin. <sup>50</sup> Mi naanbiirin, wii-la mi sii che di mi bul ne nla: Nialin ba si ken tiarin me bi jan wuo

juu Wia kuorii-la tuon. Ku-la ma sii pua bi jan wuo he dime deen deen a nage ku-la si bi pua.

<sup>51</sup> Má bee na, mi jan bul wu-kpunkerisin pima. La kala bi jan suu. Ama bua kubala jan ko di Wia ken la yaraa kala birime. <sup>52</sup> Wiin deen jan guu naa ne. Di bua-la ne yie, Wia tinpara jan nmuu u nyile. Di u ne nmuu nyile-la, nialin kala si laa Yesu wiaa dii an suu jan sii a wei. Ba bira bi jan suu. La nialin si he la miisin deen le an bi suba maa, Wia jan kenla birime. <sup>53</sup> Wia jan ken yara-la sii pua kaa birime di ba bira si pua. Nii titia ne la yara-la ma sii suu, u jan kenba kaa birime, di ba si suu. <sup>54</sup> Bua kubala jan yi la yaara-la sii pua bira bi jan pua, la yara-la ma sii suu bira bi suu. Di bua-la ne yie, ba si bul wialin Wia tenin tuon jan ku naa wutitii. Ba bula ari,

"La yuo dii suun ne. <sup>55</sup> La bira bi jan suu. Suun, n dolun he nii? Suun, nii ne n huon he duu wuo juu niaa le?"

<sup>56</sup> Suun huon ne naa haache. Haache ma dolun lii wialin Wia si jono billa le di la tuto, ka la biba wuo tuto. <sup>57</sup> Ama má len la lolle la Nyimma Wia, nii-la si to la Tiina Yesu Kirisito le a pila dolun la wuo yuo dii suun.

<sup>58</sup> Nii wiaa mi naanbiirin, má chin wialin ma si laa dii le kpan kpan, a si begilu. Má fiese siin a tin la Tiina



tiŋtiŋŋaa woruŋ. Ma jima ari Wia tiŋtimii-la ma sii tiŋ bi jaŋ kɔ duu ŋaa pei.

## 16

*Kialij la si jaŋ joŋo pi la dɔŋsuŋ tiŋŋaa si laa Yesu wiaa dii*

<sup>1</sup> Lɛɛɛ mii che di mi bul wiaa a mu tige moribie-la ma sii che di ma kiesɛ, di ba kaa mu pi Wia nialij si he Judiya tiŋteen ɛ. Mi laa sipaan dage nialij si laa Yesu wiaa dii aa hilimi a he Galiisia tiŋteen ɛ, nii ba si jaŋ ŋaa a kiesɛ moribie-la. Ma ma jaŋ ŋaa nii titia.

<sup>2</sup> Yɔbɔ-na kala Lahadi cheɛŋ, moribie-la ma si tima a na, nuu-kala liise mage nii ŋ sii che di ŋ joŋo bil. Di mi ne kɔ, ma bira bi jaŋ kikiɛɛ moribiee. <sup>3</sup> Di mi ne kɔ, mi jaŋ ŋmuŋse tenij pi nialij ma si liisa, di ba keŋ moribie-la ma si kiesa pi nialij si laa Yesu wiaa dii a he Jerusalem ɛ, di ba kaa mu piba. <sup>4</sup> Di u ne maga di mi ma mu, la kala jaŋ to dɔŋɔ mu.

*Wialij Pɔɔl sii che duu ŋaa*

<sup>5</sup> Mii che di mi ku to Masi- doonia tiŋteen ne a mu lee. Di mi ne ku to lee-la, mi jaŋ ku nama. <sup>6</sup> Di mi ne kɔ kapoo, mi jaŋ he ma teen a dieni di waariŋ cheŋsiŋ lii. Mi jaŋ he ma lerij a mu yi bua-la mi si jaŋ joŋ wonjiin, di ma wuo tami lee-na kala mi sii che di mi mu. <sup>7</sup> Mi bi che di mi nama lima lima aŋ kiele mu lee-la mi sii mu. Di Wia ne seye, mi

cho di mi dieni ne ma teen. <sup>8</sup> Ama mi jaŋ hoŋ Efesis ɛ a mu yi gbieli-bal-la ba sii yire Pentikos cheɛŋ. <sup>9</sup> Wia pimi wonjiin-bal ne di mi tiŋ tiŋtiŋ-zɔŋ daha, ka nialij si bi che di mi tiŋ tiŋtiŋŋaa daha yuga ne. <sup>10</sup> Di Timoti ne kɔ ma teen, má kenu woruŋ, duu sí wii-kala fá. La duu kala nii tiŋ Wia tiŋtimia-la. <sup>11</sup> Ma sí leŋe di nuu-kala bee guunu. Má peu le duu venj wonjiin ari yarifiɛlaa, aŋ miira kɔ mi teen. Mii gberu ari la naanjiiri-la.

<sup>12</sup> Ma jin la naanbie ba sii yire Apɔɔs ne. Mi bula pu woruŋ ari ba di la naanjiiri-la ku nama. Ama u bi biina ari u jaŋ na wonjiin kɔ lɛɛɛ. Di bua-la si maga ne yie, u jaŋ ku nama.

*Wu-kaanaa*

<sup>13</sup> Má pɔ, a chinj wialij ma si laa dii le kpan kpan. Má keŋ boi-duoŋ a keŋ doluŋ Wia teen. <sup>14</sup> Wii-kala ma sii ŋaa, má ma ŋaa di niaa na ari ma choba ne.

<sup>15</sup> Mi naanjiirin, ma jin baal kubala ba sii yire Sitefinis ne. Ba di u dia niaa ne laa sipaan laa Wia wiaa dii Akaaya tiŋteen ɛ. Ba pe Wia niaa ɛ ne woruŋ, a joŋ ba titia kala a he nii le. <sup>16</sup> Mii sulma, mi naanjiirin, di ma tuto ni-yiri deenba niin. Má tuto Wia tiŋtinnu-na kala, ari nialij sii pela le la titin ma niin ɛ. <sup>17</sup> Mi tuoŋ tore woruŋ ari Sitefinis ari Fotunaatis ari Akaakis kɔ mi teen ne. Ba ne laa ma nyuŋ daha. <sup>18</sup> Ba leŋe mi tuoŋ pin

di-bala nɛ. Ba jaŋ leŋ di ma ma tuoŋ piŋ di-bala. U maga di ma zizil niaa deenba nɛ.

<sup>19</sup> Nialin si laa Yesu wiaa dii aa hilimi a he Esia tinteen, ba kala ka chuɔɛma. Baal-la ba sii yire Akuila ari u haala Pirisila, ari nialin si laa Yesu wiaa dii aa hilimi ba dia ɛ, baa chuɔɛma woruŋ la Tiina Yesu doluŋ ɛ. <sup>20</sup> Nialin kala si laa Wia wiaa dii a he daha maa chuɔɛma. Má guori doŋo aŋ chuɔɛ doŋo kinkeŋ kinkeŋ.

<sup>21</sup> Leeɛ, mi-na Pool, mi titia ní ŋmuŋɛ aa chuɔɛma. <sup>22</sup> Di nuu-kala nɛ bi la Tiina Kirisito cho, Wia jaŋ kaliba heu ɛ. Maranata! U bubuoŋ nɛ, la Tiina Kirisito ko! <sup>23</sup> La Tiina Yesu Kirisito lahorimo ɛ Wia jaŋ pema ɛ. <sup>24</sup> Yesu Kirisito doluŋ ɛ, mi cho ma kala nɛ. Ami.

## TEN-LIA-LA PÖÖL SI NMUNSA PI KÖRINTI NIAA

### *Pööl lolle Wia*

<sup>1</sup> Mi-na Pööl ari la naanbie Timoti ne nmunse tenin deen a pipima. Wia tuutorun le ne u liisemi di mi nja Kirisito Yesu nanzoo. La nmunse tenin deen a pipi nialin si laa Yesu wiaa dii aa hilimi a he Korinti tan-la le ne, ari nialin si bi haache kene Wia sipaan Akaaya tinteen le.

<sup>2</sup> La Nyimma Wia ari la Tiina Yesu Kirisito lahormo le, ma jan hon ari yarifelaa.

<sup>3</sup> Má len di la denne Wia. U ne nja la Tiina Yesu Kirisito Nyimma, aa fá niaa nennige. U ne yie len nialin tuon si cheye tuon bira tore. <sup>4</sup> Di la nii na heen ma, u ne yie len la tuon tore. U si yie nja la tuon tore nii, la ma yie nja la naanbiirin ma sii na heen, ba ma tuon tore nii ne. Wia jon tuutorun ne pila, nii ne tii la ma pe la naanbiirin le di ba ma na tuutoru-la yiri.

<sup>5</sup> Kirisito na heen ne worun. Hee-la u fa si na, u titia ne la ma nina. A tin nii wiaa Kirisito ma len la tuon faasa tore ne. <sup>6</sup> La si ko di la bul Wia wu-zomola a pima di Wia laama ta, la na heen ne worun. La na heen di ma na tuutorun ne. Di ma ne na hee-la yiri la si na an wuo

nyalime, ma jan na tuutoru-la yiri la si na. <sup>7</sup> Laa yielema ne. La yiele-la saa bibegili. La jima ari hee-la la si na, ma ma na u titia ne. Nii titia ne tuutoru-la la si kene, ma ma kenu ne.

<sup>8</sup> La naanbiirin, laa che di ma jin nii la si na heen Esia tinteen le ne. Wialin si juula le fa yunie ne kinken kinken a pila. La paala bi biina ari tan jan pulla. <sup>9</sup> Wutitii, la fa biina ari la suba dere ne. Ama nii pela le di la si la titia dolun le ben, ama di la jon la yielaa kala a he Wia le, nii-la sii chise niaa suun le. <sup>10</sup> Wia ne liisela suun deen nisin le. Maachie di wiaa ne juula le, u jan liisela ba le. U le ne laa yiele ari maachie u jan bira liisela di heen ne juula. <sup>11</sup> Má ma pe sul Wia pila. Niaa yuga ne aa sul Wia a pipila duu pela le. Di Wia ne laa ba Wii-sula, ba kala jan wuo denu.

### *Pööl ken u wiaa birime*

<sup>12</sup> Læle la jan wuo bigisi la titia le, bee wiaa la tuobiinaa daga ari la wu-ñaalaa kala zomo nuu-kala teen dunia deen le. Wii-kala la si nja ma teen, la nja wialin sii to Wia wonbiin ne an pe nja wutitii-la Wia sii che. Nuhuobiine wu-jimin le dee la to a njaa wialin, ama Wia dolun le ne la ñaaba. <sup>13</sup> La bi wu-tanii nmunsa pima, ama wialin la si nmunsa, ma jan wuo karime, a jin ba bubuṣaa maa. La saa laa dii ari ma jan jin wiaa deenba

bubuɔsaa a mu dɛrɛ, <sup>14</sup> ari ma si jinba mua nii. Ma jima ari tapulii-la, la Tiina Yesu ne miira kɔ, ma jan bigisi ma titia ɛ a tinj la wiaa, ka di la ma bibigisi la titia ɛ a tinj ma wiaa.

<sup>15</sup> Mi fa jima di la jinj dɔɔɔ ne woruɔ, u nii wiaa ne tii mi faa che di mi kɔ ma teenj, di ma wuo nii sima bulia. <sup>16</sup> Mi faa che di mi ku to ma lerinj a nama, an-na mu Masidoonia tinjteenj. Di mi ne fa bira lii Masidoonia kukɔ, di mi bira ku to ma teenj, di ma hemi wonjbiinj ɛ di mi mu Judiya tinjteenj. <sup>17</sup> Ma biina ari di mi nii che di mi nja wii, mi bi jan biine an-na nja? Ma bira biina mii nja mi wiaa ari dunia niaa sii nja neɛ, di mi sei wiinj an bira bul di mi bi wii-la seye naa-buasula titia ɛɛ? <sup>18</sup> Ma jima woruɔ ari Wia kenj wutitii. Nii wiaa wialinj kala la si bula pima nja wutitii ne. La bi wiaa bula ari tuɔbiinaa balia ne. <sup>19</sup> Ma bira jima ari mi-na Pɔɔl, la di la naanjiirinj Silivaanas ari Timoti ne bul Yesu Kirisito wiaa pima. Yesu wii-wii-kala nja wutitii ne. Wunyari kala tuo ba ɛ. U yie sei wutitii ne bua-na kala. <sup>20</sup> Wia bula ari u jan nja wiaa yuge a pila. U jan to Yesu ɛ ne a lenj di wialinj ku nja wutitii. Nii wiaa ne tii, di la ne chuɔɔɔ Wia dɛrɛ-na kala, la yie bul "ami" u doluj ɛ. La yie bul nii di Wia yirinj wuo yire ne. <sup>21</sup> Ama Wia titia ne bula ari la di ma kala kenj miisinj Kirisito ɛ ne. U ne

liisela di la tinj tintiminj deen maa. <sup>22</sup> U magilela ne. U jonj u Dinj-zɔɔɔ-la a hela ɛ ne, di la wuo jinj ari maachie u jan jonj ku-danj ma pila.

<sup>23</sup> Ari Wia, wialinj kala mi si bula nja wutitii ne. Mi bi ma teenj kɔ Koriinti ɛ, beɛ wiaa mi fa bi che di mi walimema. <sup>24</sup> U bi naga ari ma si laa wialinj dii ne tii la chiche di la fugema, ama laa che di la pema ɛ di ma kenj tuɔtoruj. Ma laa Yesu wiaa dii ne a chinba ɛ kpanj kpanj.

## 2

<sup>1</sup> Nja wiaa ne tii mi bi ma teenj kɔ. Di mi ne fa kɔ, ma tuɔɔɔ fa jan chei. <sup>2</sup> Di mi ne nja di ma tuɔɔɔ chei, kubee ne he dime si jan lenj di mi tuɔɔɔ tɔrɛ? Nuukala tuo, see nialinj titia mi si nja ba tuɔɔɔ chei. <sup>3</sup> Di mi ne fa kɔ ma teenj, ma ne fa jan nja di mi tuɔɔɔ tɔrɛ. Nii wiaa, di mi ne leje ma tuɔɔɔ chei, ma bira bi jan lenj di mi ma tuɔɔɔ tɔrɛ, nii ne tii tenj-la mi si nmuɔsa pima mi bul wialinj nii pipima. Mi nja ma kala yarida ne. Mi jima ari tuɔtoru-la mi si na, ma ma nau ne. <sup>4</sup> Bua-la ɛ mi si nmuɔse tenj-la di mi pima, mi tuɔɔɔ faasa chei ne woruɔ. Mi paala yel ne a tinj ma wiaa. Mi bi tenj-la nmuɔsa di mi chei ma tuɔɔɔ, ama di mi lenj di ma jinj ari mi faasa choma ne.

*U maga di la jono che nii-la si nja wii chei*

<sup>5</sup> Di nuu ne nja ma tuɔɔɔ chei, ma dunɔɔɔɔ saa dee,

mi ma tuon cheye ne, ama mi bi che di mi bul wiin deen yuge. <sup>6</sup> Nii-la si n̄aa nii, ma d̄ogisu ne, nii wiaa má leŋ wii-la ta. <sup>7</sup> L̄ēēē-na u maga di ma jon wii-la kala cheu, a p̄eu le di u tuon t̄ore. Di nii dee, u tuon jan faasa chei a kieli duu pugime. <sup>8</sup> Nii wiaa mii sulma di ma wasa kenu woruŋ a chou. <sup>9</sup> N̄la wiaa ne tii mi n̄muŋse teniŋ pima, di mi na di ma jan wuo to wii-kala mi si bula pima. <sup>10</sup> Di ma ne jon wii che nuu, mi ma joŋo cheu ne. Di mi ne fa maga di mi jon wii che nuu, mi joŋo cheu ne, a tin ma wiaa. Kirisito sipaan ne mi n̄aa nii, bēe wiaa <sup>11</sup> mi bi che di Sitaani wuola. La jin u wu-keniŋ ne.

*Pool tuon bi di-bala pina Turawas tinteen*

<sup>12</sup> Mi si ko Turawas tinteen di mi bul Kirisito wu-zom̄o-la a piba, la Tiina suri won̄biin pimi ne, <sup>13</sup> ama mi tuon bi di-bala pina, bēe wiaa mi naan̄bie Taatis fa tuo dime. Nii ne mi sii lee-la a mu Masidoonia tinteen.

*Kirisito doluŋ le la yuo dii Sitaani*

<sup>14</sup> Ari nii kala, mi haa lolle Wia ne. Bua-na kala, u yie to Kirisito le ne a pela le la wuo yuo dii Sitaani. U yie pela le la wuo bul Kirisito wiaa leena kala. Kirisito wu-zom̄o-la nage tulaali sii suore, u suora la lerin kala. <sup>15</sup> La titia nage tulaali-zon̄-la ne Kirisito joŋo pi Wia. Wia jonla gaare nialiŋ u si laa

ta ari nialiŋ sii lel tuon ne. <sup>16</sup> Nialiŋ sii lele teen tulaalii-la suora kpuba ne. Ama nialiŋ Wia sii laa ta teen, tulaalii-la suora piba miisin ne. Kubee ne saa maga duu tin tin̄tiniŋ deen? <sup>17</sup> Niaa yuga ne a gollo bubul Wia niin wiaa a lilaa moribee, ama la-na bi nii n̄aa. La-na n̄aa ni-titiiba ne. Wia ne liisela di la tin tin̄tiniŋ deen. Kirisito doluŋ le ne la to aa bul Wia wiaa.

### 3

*Nii-falii-la doluŋ wiaa*

<sup>1</sup> Ma biina wialiŋ la si bula, laa dage la titia nii la si naga nee? Niaa d̄on̄suŋ cho di ba n̄muŋse tenniŋ a dage ba si nage nii ne di ba kaa ko pima. D̄on̄suŋ ma cho di ba laa tenniŋ ma teen a dage ba si nage nii a pi niaa, ama la-na bi che di la n̄n̄aa nii. <sup>2</sup> Ma-na, ma ne saa n̄aa ten-la la si n̄muŋsa, di niaa karime a jin nii la si naga. Ba n̄muŋsa he la tuon ne. <sup>3</sup> Ma ne saa chaasa daga ari ma n̄aa ten-la Kirisito si leŋe la n̄muŋse. Teniŋ deen, u bi naga ku-la niaa si kaa n̄muŋse tenniŋ ne. Wia si weye jon u Diŋ-zon̄-la ne kaa n̄muŋse kialin ma tuon. Ba saa bira bi n̄muŋsa ne tabii-taala le, ama ba n̄muŋsa he nuhuobiinee tuosaa le ne.

<sup>4</sup> La to Kirisito le ne a n̄aa Wia yarida, nii ne tii la ken̄ nyu-duon̄ a bubul u wiaa nii. <sup>5</sup> U nii bi naga ari tin̄timii-la la sii tin, la titia ken̄ u

doluŋ nε. Wia nε pila doluŋ la titiŋ. <sup>6</sup> Wia titia nε pila tiŋtiniŋ deenŋ doluŋ. Kiriŋsito si joŋ u chaliŋ a ta n̄i-falii-la u niaa teenŋ, u wiaa nε la bubul. Ba bi wialiŋ ŋmuŋsa hε tabii-taala-la lε. N̄i-falii-la doluŋ lii Wia Diŋ-zōŋ-la wialiŋ nε. Wialiŋ Moosis si ŋmuŋsa bil di niaa tuto bi niaa miisiŋ wuo pa, ama Wia wu-zōmō-la si lii u Diŋ-zōŋ-la teenŋ nε wuo niaa miisiŋ pipa.

<sup>7</sup> Wialiŋ Moosis si ŋmuŋsa bil di niaa tuto, ba ŋmuŋsa hε tabii-taala lε nε. Wialiŋ fa bi niaa miisiŋ wuo pa. Bua-la lε Wia si joŋba pipi Moosis, Wia dage u tula pu nε. N̄i nε Moosis siaa kala tutul. Ba s̄i tul n̄i, tula-la fa jaŋ lel, ama Iziral tiŋŋaa bi u siaa wuo bibenŋ. <sup>8</sup> Ama Wia wu-zōmō-la lii Wia Diŋ-zōŋ-la lε nε. U tutul a kii n̄i nε. Tula-la-na bi jaŋ lel. <sup>9</sup> Wialiŋ Moosis si ŋmuŋsa bil di niaa tuto nε fa keŋ tula. Ama ba fa joŋ cheeriŋ pi nialiŋ fa s̄i toba nε. N̄i-na wialiŋ si leŋe niaa keŋ tuō-pula Wia teenŋ jaŋ paala keŋ tula a kii n̄i. <sup>10</sup> N̄i-na buŋbuŋ ku-la fa s̄i tul bira bi tula keŋε. U tula-la lele nε, beε wiaa kuŋ dōŋ n̄i tul a kii n̄i. <sup>11</sup> Di ku-la fa si bi jaŋ dieni nε kō a tutul, n̄i-na ku-la si jaŋ hε dime deenŋ deenŋ nε jaŋ tutul a kiiu.

<sup>12</sup> Laa yiele Wia wu-zōmō-la lε nε. N̄i nε t̄i la chaasa keŋ nyu-duoŋ aa tiŋ. <sup>13</sup> Ama la bi Moosis naga. Bua-la lε u si na Wia tula, tula-la juu u siaa nε. Tula-la haa

che duu lii nε. N̄i nε u joŋ geriŋ a tō u siaa, di tula-la si lii, di Iziral tiŋŋaa s̄i na. La bi kuŋ joŋo tō la siaa. <sup>14</sup> Ama Iziral tiŋŋaa fa keŋ nyu-duoŋ nε. Ba bi Wia wialiŋ laa dii. N̄i wiaa ari jiniŋ kala, di ba nε karime wialiŋ Wia fa si joŋo pi Moosis buŋbuŋ-la di niaa tuto, ba biba laa didii. U naga ari geri-la Moosis fa si joŋo tō u siaa di Iziral tiŋŋaa s̄i u siaa na, ku-la ha tō ba siaa nε di ba s̄i Wia tula na. Ama Yesu Kiriŋsito nε jaŋ wuo keŋ geri-la suri, di ba wuo na Wia tula. <sup>15</sup> Ari jiniŋ kala, di ba nε karime wialiŋ Wia fa si joŋo pi Moosis di niaa tuto-na kala, u yie nage ari kuŋ nε tō ba wu-jimiŋ, di ba s̄i wialiŋ bubuoŋ jin. <sup>16</sup> Ama di nuu nε birima a tō la Tiina Yesu, Wia jaŋ keŋ ku-la si keŋε ba wu-jimiŋ kaa joŋ. <sup>17</sup> La Tiina Kiriŋsito ari Wia Diŋ-zōŋ-la kala ŋaa kubala nε. Lee-la kala saa la Tiina Kiriŋsito Diŋ-zōŋ-la si hε, lee-la niaa bi kuŋ-kala yosu ŋaa. <sup>18</sup> La nialiŋ kala si laa Yesu wiaa dii, geri-la fa si tō la siaa, Wia kaa suri nε. Kiriŋsito tula juu la siaa nε la tutul ari u s̄i tul n̄i. U keŋla kaa bibirime di la wasa tutul halii, la ku naga u wii-wii-kala lε. La Tiina Kiriŋsito ari Wia Diŋ-zōŋ-la nε ŋaa n̄i la lε.

## 4

*La nage pupoyee nε, Wia joŋ ku-zōŋ-la a tuole la tuōŋ*

<sup>1</sup> Wia ne fála nennige a jonj tĩntimĩj deenj pila di la titĩj, ńii wiaa la nanđdaasin bi yuore. <sup>2</sup> Hiisi wialĩj ari wu-kaa-faali-la niaa si luora ńĩjaa, la-na viaba ta ne faafaa kala. La bira bi nuu nyise. La bi wiaa nyia pipe Wia niĩj wialĩj le. Ama Wia sipaanj la chaasa bul wiaa, di nuu-kala tuobiinaa jĩj ari wutitii ne la bubul. <sup>3</sup> Ama di Wia wu-zomɔ-la la sĩi bul faa, nialĩj si lele teenj ne ba faa. <sup>4</sup> Niaa deenba Sitaani ne to ba wu-jimĩj di ba sĩ wuo na pulumunj. Wia wu-zomɔ-la la sĩi bul nĩi dage pulunj-la. Wia wu-zomɔ-la ma didage Kirisito tula, niila si nage Wia. <sup>5</sup> Wialĩj la sĩi bul, u bi naga la titia wiaa ne la bubul, ama Yesu Kirisito wiaa ne la bubul, nii-la si tii nuu-kala. U wiaa ne tii la tima pipima. <sup>6</sup> Bunbun Wia si ńaa dunia, u leje pulumunj chaane birimĩj tuonj ne. Nii titia ne leele u lej pulumunj ku juu la tuonj. Pulunj-la ne leje la keń wu-jimĩj a wuo jĩj ńii Wia sĩi tul. Wia dage ńii u sĩi tul Kirisito siaa le ne.

<sup>7</sup> La nage pupoyee ne, Wia jonj ku-zomunj deenj a tuole la tuonj. Nla saa daga ari dolbal-la ńaa Wia kunj ne. La dee buu tii. <sup>8</sup> La na heenj ne worunj lee-na kala, ama hee-la bila wuo. Bua donɔ le la yie bi jĩj wii-la kala le la si he, ama la ha keń yielaa. <sup>9</sup> Ba yie to naasinj a dudogisela, ama Wia bila via ta. Niaa yie ńmoola lo, ama la bi suu. <sup>10</sup> Kirisito si suu ńii, ńii titia

ne la yie na la miisinj le ari la ma suba. U ńii leje di miisila Yesu si kene, di la ma keń miisi-la titia. <sup>11</sup> A tinj Yesu wiaa, la si he miisinj deenj le, niaa yie keńla di ba kpula ne. U ńii ńaa di miisi-la Yesu si kene, di la ma kenu ne. <sup>12</sup> Nii wiaa Wia leń la suu ne di ma-na keń miisinj.

<sup>13</sup> Nuu ne ńmunse wiĩj deenj a bul, 'Mi laa Wia wiaa dii ne, ńii ne tii mii bulba.' La ma keń yarida-la titia ne. Nii ne tii la ma laa u wiaa dii a ma bubulba. <sup>14</sup> La jima ari Wia ne chise la Tiina Yesu suunj le, u janj chisela maa, di la di Yesu kala keń miisinj. U janj keńla ari ma kala a kaa mu u teenj. <sup>15</sup> Ma wiaa ne tii wiaa deenba kala ńaa, di niaa wuo yuge a juu Wia lahɔrimɔ-la le. Nii janj leń di niaa yuga a denne Wia, di u yirinj yire.

<sup>16</sup> A tinj wiĩj deenj wiaa la nanđdaasinj bi yuore. Yara-la la si kene la miisinj deenj le, uu hiese ne, ama la dińsin-na wasa zuzonj tapulii kala ne. <sup>17</sup> La teenj hee-la la sĩi na bi yuge anj bira bi janj dieni maa. Hee-la dagela wonbbi-la la si janj to a laa yirinj ne Wia teenj. Yiri-la janj ńaa yiri-bal. Yiri-bal-la la si janj laa janj kii hee-la la sĩi na. La janj keń yiri-balinj deenj deenj. <sup>18</sup> Nii wiaa kialĩj la sĩi na dunia deenj le, la bibaa benj ari ba ńaa kaaa. La miiraa benj kialĩj la si bi na ne, bee wiaa kialĩj si he dunia deenj le niaa nina, ba janj lel, ama kialĩj niaa si bi na a he Wia

teen, ba-na jan he dime a kaa mu wuu.

## 5

*La jan ken yari-falaa Wia teen*

<sup>1</sup> La jima la yaaraa deenba la si kene la miisin deen le, di la ne suba a mu Wia teen, u jan pila yari-falaa. Yari-falii-la bi dunia deen lia. U lii Wia teen ne. La jan kenba a he Wia jan le deen deen.

<sup>2</sup> La si he la miisin deen le, la faasa yel ne. La fa cho di la ken yara-la Wia si jan jonjo pila ne. <sup>3</sup> Di Wia ne fa jon yara-la pila, la fa bi jan ken yaribiree. <sup>4</sup> Yara-la la si kene la miisin deen le bi leje la tuon tore. U bi naga ari la cho di la suba ne, ama la cho di la ken miisin Wia teen ne. U nii wiaa Wia jan jon yara-la si bi jan suu, a lenni la yaraa deenba si jan suu. <sup>5</sup> Wia naa nii-la si jon yari-falaa deenba ne a pila. U ne saa jon u Din-zon-la ma hela le di la wuo jin ari la jan ken yari-falaa deenba u teen.

<sup>6</sup> Nii wiaa bua-na kala le la nyun yie nyaase ne. La si ken yaraa deenba la miisin le, la bi la Tiina Yesu kpaga.

<sup>7</sup> La bi Kirisito ka na, ama la laa u wiaa dii a tutou. <sup>8</sup> La nyun nyaasa ne, la saa cho di la lii dunia deen le a mu la Tiina Yesu teen. <sup>9</sup> Nii wiaa, di la ne he dunia deen le, la cho di la naa wiaa di u tuon tutore ne. Di la ne mu u teen maa, nii titia ne la jan njaa, <sup>10</sup> be wiaa la kala jan mu chin Kirisito sipaan duu

dii la sariya. Kirisito jan tin nuu-kala mage nii u si tima mage dunia deen le. Di n ne faa naa wu-zonjoo, u jan jon wu-zonjoo tminj. Di n ne fa naa wu-bonjoo maa, u jan jon wu-bonjoo tminj.

*A tin Kirisito wiaa, la di Wia dii nanjonsun*

<sup>11</sup> Laa fa Wia ne. Nii ne tii la bul u wiaa pipi niaa, di ba birima lii ba haacheba le a ku to Wia. Wia ne jin nii la si naga. Mi saa jima ari ma tuobiinaa le ma jin nii la si naga ne. <sup>12</sup> Nii ne tii la bi che di la dage la titia ma teen, ama laa che di ma bul wutitii-la ma si jima a mu tigela le. Di ma ne naa nii, ma jan wuo bul wiaa a pi nialin si si baa to Wia an ken tuo-bomun. <sup>13</sup> Ma biina ari laa nyaase ne ari la sii bul wialin? Di la nii nyaasu, Wia wiaa ne tii, ama di la nyun nii tin maa, ma wiaa ne tii. <sup>14</sup> Kirisito chola ne, u chonu-la ne kenla kaa titin. La saa seye ari nuu-kala wiaa ne ni-bala suu, a tin nii wiaa u nage nuu-kala suba ne. <sup>15</sup> Nuukala wiaa ne tii Kirisito suu. U si suba nii, nialin si tou le a ken miisin, u maga di ba njaa wialin sii tore u tuon, an si ba titia tutore wiaa naa, a tin u si suu ba wiaa an sii suun le.

<sup>16</sup> Nii wiaa, a lii jinin kaa mumu la bi che la ben niaa ari dunia niaa sii ben niaa nii. Bua donjo le, la faa ben Kirisito ari niaa sii ben donjo nii, ama leele la bira buu



beŋ ari la fa sîi benu Ții.  
 17 Ții wiaa di nuu-kala ne laa Kirisito wiaa dii, ba di Kirisito Țaa kubala ne. Wia keŋu birime ni-falii ne. Wu-binia-la kala bálá ne. Wufalaa ne suomi u miisij le.  
 18 Wu-falaa deenba kala lii Wia teen ne. Wia to Kirisito le ne a leŋ ba di niaa sij. Țiŋtimii-la Wia si joŋo pila ne Țla: di la mu bula pi niaa di ba kɔ, di ba di Wia sij.  
 19 Wia to Kirisito le ne a wuo Țaa ba di dunia niaa kala sij. Wia na dunia ari ba keŋ haache ne, ama u fába nennige a joŋ ba haachebala a cheba. Wia ne si la bula pi niaa ari la di Wia sima ne leele.  
 20 A tiŋ Ții wiaa Kirisito naasij le ne la chin a bubul wiaa deenba a pipi niaa. Wia tola le ne a bula pima di ma kɔ u teen. A tiŋ Kirisito wiaa laa sulma di ma kɔ, di ma di Wia sij.  
 21 Kirisito fa bi haache kene, ama a tiŋ la wiaa, Wia leŋe u suu a nage haache tiina. Wia Țaa Ții di la wuo to Kirisito le a keŋ tuɔ-pula u teen.

## 6

1 Țiŋtimii-la la sîi tiŋ, la di Wia kala níi tiŋ. Ții wiaa laa sulma, ma sí leŋe di Wia lahɔrimɔ-la u si kene ma teen Țaa wu-peiba. 2 Wia titia bul wiinj deen u tenij tuɔŋ. U si,

“Bua-la le mi si cho ne mi jegile nii ma teen.

Mi pema le ne.

Tapulii-la maa mi si cho, mi laama ta ne.”

Má bee na, jiniŋ ne Țaa tapulii-la Wia sîi che duu laama ta. 3 La bi che di la joŋ kuŋ-kala gere nuu-kala wonbiinj le di ba sí wu-bɔŋ kala biinu a mu tige tiŋtimii-la la sîi tiŋ le. La Țaa Wia tiŋtinnaa ne. 4 Ții wiaa wii-na kala la sîi Țaa le, la yie dage ari la Țaa nititiiba ne. La yie nina heen ne a na wu-yiriba kala ma le, ama la yie faasa nyalime ne. 5 Ba yie Țmoola a keŋla to dia, niaa Țaa taawei la nyuŋ, la yie faasa titiŋ ne, la bi don pin, losuŋ ma keŋla.  
 6 La yie dage ari la Țaa Wia tiŋtinnaa ne, bee wiaa la bi disinnij kene. La jin wiaa ne, a keŋ kenyiri, a keŋ zile, a keŋ Wia Diŋ-zɔŋ-la maa, a cho niaa ari Wia si chola Ții. 7 La yie bul wutitii ne a keŋ dol-la Wia si pila a kaa titiŋ, a keŋ tuɔ-pula ma Wia sipaaj. Tuɔ-pulala nage huonuŋ ne la si vɔɔ laale la na-diinj ari la na-gua nisaa le a kaa Țaa siri di la po la titia le. 8 Niaa dɔŋsuŋ ka pila jirima, ka dɔŋsuŋ ma tutuusela. La hariŋ niaa dɔŋsuŋ bibesela le, ka dɔŋsuŋ ma bul wu-bɔŋɔɔ a titigela le. Ba biina ari laa nyise niaa ne, ama wutitii ne la bubul. 9 Nuhuobiinee bila jin, ama Wia-na jinla ne. Niaa biina ari la suba ne, ama Wia teen la weye ne. Baa dɔgisela ne, ama ba bila kpua. 10 La tuɔŋ yie chei ne, aŋ ka la jujuɔse. La Țaa summoo ne, ama la yie pe niaa le di ba ma kuori Wia

teenj. La bi kuŋ-kala kenε, ama la ne tii kuŋ-kala.

<sup>11</sup> Ma Kōrinti niaa, la chaasa bul wutitii ne a pima. La bi wii-kala kaa fifaama. <sup>12</sup> La choma ne, ma ne bila cho, nii ne tii ma bi che di la mal dōŋo. <sup>13</sup> Ma nage mi biirinj ne. Nii ne tii mii bul wiaa ŋla a pipima. Má leŋ ma tuōŋ pulle a chola.

*Pōol chagile nialinj si laa Yesu wiaa dii a mu tige nialinj si bi Wia wiaa laa dii ε*

<sup>14</sup> Ma sí ma titia kaa mere nialinj si bi Yesu wiaa laa dii ε. Ni-zōŋŋo ari ni-bōŋŋo bi maga di ba mere dōŋo ε. Pulumuŋ ari biriminj bi jaŋ wuo guoli dōŋo ε. <sup>15</sup> Kirisito ari Sitaani bi jaŋ wuo keŋ nii-bala, nii titia ne nii-la ma si laa Yesu wiaa dii ari ni-la si bi u wiaa laa dii, ma bi jaŋ wuo tuto dōŋo. <sup>16</sup> La ŋaa Wia-la si weye dia ne, u hela ε. Nj bi jaŋ wuo juu Wia-dia a kpaare vuiaa dime. Nla ne Wia titia bul u teninj tuōŋ. U si,

“Mi jaŋ heba ε

a vivilli ba tuōŋ.

Mi ne jaŋ ŋaa ba Wia,

di ba ma ŋaa mi niaa.

<sup>17</sup> Nii wiaa má liise ma titia nialinj si bi Yesu wiaa laa dii tuōŋ,

a hoŋ ma duŋduŋ.

Ma sí kialinj si keŋ disinninj didigu.

Ma ne ŋaa nii, ma jaŋ wuo kō mi teenj.

<sup>18</sup> Mi jaŋ ŋaa ma Nyimma di ma ma ŋaa mi nanu-alaa ari mi toloo.”

Wii-jaribako ne bul nii.

## 7

<sup>1</sup> Mi naanbii-kpianaba, Wia si folo bul di u jaŋ ŋaa wiaa deenba kala pila, má leŋ di la liise la titia disinj-na kala ε. Di la ne bi disinj kala ŋaa, nii jaŋ dage ari wutitii, la sene fifá Wia ne.

*Wialinj si ŋaa Pōol tuōŋ tōre*

<sup>2</sup> Má chaasa pulle ma tuōŋ pila. La bi wii ŋaa cheima, la bi ma nyuŋ ma cheye, la bira bima gura maa. <sup>3</sup> Mi si bul wiinj deenj, u bi naga ari mi si di ma cheye ne, beε wiaa mi laa sipaanj bula pima ari la choma ne. Nii wiaa, di miisinj ne, la kala jaŋ kenu, di suuŋ ma ne, la kala jaŋ suu. <sup>4</sup> La nyuŋ nyaasa ma wiaa ne. A tinj ma wiaa ne tii la bibigisi la titia ε. Mi kala ne ŋaa tuōtōru. La na heej ne kinkeŋ, ama mi tuōŋ faasa tōre ne.

<sup>5</sup> La si paala ku juu Masi-doonia tinjeen, la bi wiesee na. Wiaa juula woruŋ. La yaraa ε la na heej, la tuōbiinaa ε wiaa wi-walimela woruŋ. <sup>6</sup> Nii ne la naanbie kubala baa yire Taatis kō la teenj. U si kō nii, la tuōŋ tōre ne woruŋ. Wia ne pila tuōtōruŋ deenj. U ne yie ŋaa nialinj tuōŋ si cheye na tuōtōruŋ. <sup>7</sup> U si kō nii duŋduŋa dee bi leŋe la tuōŋ tōre. U bula pila ari ma kenu woruŋ, u ma tuōŋ tōre. U bira bula pila ari ma cho di ma nami, a bira bula pila ari wii-la mi si bula pima ŋaa ma tuōŋ faasa chei ne, a bira bula

pila ari ma cho mi wiaa ne. Nii wiaa mi tuo-chei-la miira birime tuotoruŋ ne. <sup>8</sup> Teŋ-la mi si ŋmuŋsa pima leŋe ma tuoŋ cheye ne. Di ma tuoŋ ne cheye maa, mi-na tuoŋ bi cheye. Di ma tuoŋ ne fa cheye a tiŋ teŋ-la wiaa, mi jima ari ma tuoŋ bi jaŋ chei a dieni. <sup>9</sup> Ama leele mi tuoŋ toŋo ne, bee wiaa ma birima lii ma haacheba le. Ma sii to Wia ne tii ma tuoŋ chei nii, ama ma saa bi tele. <sup>10</sup> Di Wia ne leŋe nuu tuoŋ chei a tiŋ u haacheba wiaa, u tiina yie birima lii u haacheba-la le ne. Di u ne ŋaa nii, Wia laau ta. Ama di nuu tuoŋ ne cheye ari dunia niaa tuoŋ si cheye nii, u tiina bi jaŋ keŋ miisinj Wia teenj. <sup>11</sup> Má bee na hee-la ma si na a tiŋ ma sii che di ma to Wia woŋbiila wiaa. Leele ma fiŋe siinj ne a didage ari ma bi wii cheye. Ma na baaniŋ ne a tiŋ wu-bomo-la ma si ŋaa wiaa. Fawulluŋ keŋma. Ma chomi ne a fiŋe siinj di ma nami. Ma ŋaa siri di ma dogise nialiŋ sii ŋaa wu-bonŋoŋo ma tuoŋ. Ma daga ari ma bi wii-kala cheye. <sup>12</sup> Nii wiaa teŋ-la mi si ŋmuŋsa, u bi naga ari nii-la si ŋaa wiaa chei ne tii mi ŋmuŋse. Mi bira bi ŋmuŋsa pi nii-la si na heeŋ a tiŋ ba si ŋaa wii-la cheiu le. Ama mi ŋmuŋsa ne di ma dage Wia sipaanj ari ma chola ne. <sup>13</sup> Nii wiaa la tuoŋ piŋ di-bala ne. Taatis si ko ma teenj, ma leŋe u tuoŋ toŋe ne woruŋ. U tuobiinaa ma piŋ di-bala. Nii ne leŋe la

ma tuoŋ toŋe. <sup>14</sup> Mi bigisi mi titia le ne u sipaanj a tiŋ ma wiaa. Ama ma bi leŋe hiisin diimi. Nii ne wialiŋ kala la si bula pi Taatis a tigema le ma ku ŋaa wutitii. Wialiŋ kala la si bula pima sene ŋaa wutitii ne. <sup>15</sup> Taatis titia choma ne woruŋ. U na nii ma sii to Wia niinj wialiŋ. Ma fá fawulluŋ aŋ kenu woruŋ, a zizilu woruŋ. <sup>16</sup> Mi tuoŋ toŋe ne, bee wiaa mi ŋaa ma yarida ne kirkeŋ.

## 8

*Wia niaa maga di ba pe nialiŋ sii to Wia le*

<sup>1</sup> La naanbiirin, laa che di ma jinj Wia si pe nialiŋ si laa Yesu wiaa dii aa hilimi Masidoonia tinteenj kala le nii. Wia doluŋ le, niaa deenba tiŋ tinŋin-zoŋŋoŋo ne. <sup>2</sup> Ba faasa na heeŋ ne woruŋ. Hee-la magiseba ne woruŋ. Niaa deenba fa ŋaa summoo ne, ama a tiŋ tuotoru-la wiaa ba si kene, kialinj mua ba si kene, ba joŋo dii zile niaa le. Ba joŋba kpikpaa nialiŋ si bi kene biri biri. <sup>3</sup> Mi jaŋ wuo bula pima ari niaa deenba, ba joŋ ku-dan ne pila di la joŋo pi nialiŋ si ŋaa summoo a guoli Wia niaa tuoŋ Jerusalem le. Ba bira wasa joŋ a kii nii ne a pe pila, aŋ hoŋ ari na-hilliŋ. <sup>4</sup> Ba chaasa faasa sulla ne woruŋ di la piba woŋbiinj di ba ma wuo joŋ kiaa pipe Wia nialiŋ le. <sup>5</sup> La fa bi yiela di ba jaŋ wuo pa a mage ŋla. Ba laa sipaanj joŋ ba titia a pi Wia

ne. U nii harin̄ le ne ba sei la ma niin̄ wiaa. Wia tuot̄orun̄ le ne ba ŋaa ŋii. <sup>6</sup> Taatis ne suomo laa kiaa deen̄ba ma teen̄. Nii wiaa laa sulu, u si suomo ŋii, duu wuo kaa mu d̄ere ma teen̄. <sup>7</sup> Ma bi kuŋ-kala che kika. Ma faasa keŋ yarida. Ma wuo Wia wiaa bubul ne worun̄. Ma faasa keŋ wu-jimin̄, a fiese siin̄ di ma pe niaa le, aŋ faasa chola maa. Laa che di ma faasa keŋ zile ne a pe Wia nialin̄ le.

<sup>8</sup> Mi bima fuga di ma jon̄ kiaa pipi niaa. Niaa d̄on̄sun̄ fiese siin̄ ne a cho di ba ŋaa kiaa kpikpaa niaa. Nii ne tii mii che di ma ma dage ari wutitii, ma sene cho niaa ne. <sup>9</sup> Ma jima, la Tiina Yesu fa keŋ zile ne. Aŋ ka duu ku tuu dunia, u fa keŋ kiaa ne worun̄ Wia-jaŋ le, ama a tin̄ ma wiaa u keŋ u titia kaa ŋaa summu dunia le. U ŋaa ŋii di ma wuo tou le ne a kuori. <sup>10</sup> Mi keŋ wii ne di mi bul a tige wiin̄ deen̄ le. Diimin̄ ne ma suomi di ma kiese kiaa pipi nialin̄ si ŋaa summoo a guguoli Wia niaa tuon̄ Jerusalem le. Ma ne laa sipaan̄ a kiese kiaa di ba kaa mu pi Wia nialin̄. Nii wiaa má ŋaa mu na u diderin̄. <sup>11</sup> Ma fa ŋaa siri ne di ma kiese kiaa pipi nialin̄ si he Jerusalem le. L̄ēēē kialin̄ ma si kiesa, má jon̄o piba di la jin̄ ari ma ŋaa wii-la ma fa s̄ii che di ma ŋaa ne. Má piba a mage ŋii kala ma si kene. <sup>12</sup> Di nuu ne ŋaa siri duu jon̄ kuŋ pi nuu, nii-la u si che

duu jon̄ ku-la pa jaŋ laa ku-la kala u si jon̄o pu, ama u bi jaŋ laa a kii ŋii. <sup>13</sup> Ma si jon̄ kialin̄ pi nialin̄, mi bi si di ba ne miira keŋ kiaa a yuge a ninii sima, aŋ ka di ma ne miira nina heen̄. <sup>14</sup> Wii-la mi s̄ii che ne ŋla, di ma keŋ kiaa mage d̄on̄o. Bua deen̄ le ma keŋ kiaa yuge ne, aŋ ka ba bi kuŋ kene. Nii wiaa, má peba le di ba na kialin̄ ba s̄ii che. U harin̄ le, di nialin̄ ma ne ku keŋ kuŋ, ba ma jaŋ pema le di ma keŋ kialin̄ ma s̄ii che. <sup>15</sup> Ŋla ne ba bul Wia tenin̄ tuon̄. Ba bula ari nialin̄ kala si faasa paa boroboro-la si lii Wia-jaŋ ku tuu, ari nialin̄ kala si paa mua mua, ba kala yie kaa kpaa a mage d̄on̄o ne.

*Pool tin̄ Taatis duu mu na Kōrin̄ti niaa*

<sup>16</sup> Mii l̄olle Wia ne kin̄ken̄ ari u si leŋe Taatis choma ari mi ma si choma ŋii. <sup>17</sup> U bi naga ari la si tin̄ Taatis duu ku laa kialin̄ ma teen̄ ne tii u k̄o. U ma fa paala cho duu k̄o ma teen̄ ne. <sup>18</sup> La naan̄bii d̄on̄ ma ne to Taatis harin̄ kuko. Nialin̄ kala si laa Yesu wiaa dii aa hilimi jimu ne a tin̄ u s̄ii bul Wia wu-z̄om̄o-la wiaa. <sup>19</sup> Nii ma dun̄dun̄a dee. Nialin̄ si laa Yesu wiaa dii aa hilimi tasi-la kala le ne liisu duu pela le di la lilaa kialin̄ a pipe Wia niaa le. Nii daga ari la ŋaa siri ne di la peba le, di Wia yirin̄ yire. <sup>20</sup> Nii wiaa la bi che di nuu-kala wuo na wu-b̄on̄ kala a bul, a mu tige kialin̄ la s̄ii che di la kaa kpaa Wia

niaa Ƽ, bƼƼ wiaa kialinȚ Țaa ku-danȚ nƼ. <sup>21</sup> La bul Ții, bƼƼ wiaa wii-na kala la siiȚ Țaa Ƽ, laa che duu Țaa wu-zonȚ nƼ Wia ari nuhuobiinee pƼge. <sup>22</sup> La naanȚbii donȚ ma nƼ to ba harinȚ kuko. Wii-kala Ƽ la magisu nƼ a na ari u kenȚ wutitii. LƼƼƼ u paala chaasa fiƼƼ siinȚ nƼ woruȚ, bƼƼ wiaa u kenȚ yarida ma Ƽ woruȚ. <sup>23</sup> Taatis-na Țaa mi tinȚtinni donȚ nƼ. La duu kala nƼ tima pipima. Ka la naanȚbiiri-lana, baa Țaa nialinȚ si laa Yesu wiaa dii aa hilimi tasi-la kala Ƽ tinȚdaaraa nƼ. Baa tinȚ Kirisito tinȚtinȚȚaa nƼ duu yirinȚ yire. <sup>24</sup> La laa sipaanȚ bul ma wiaa piba nƼ, a bigisi la titia Ƽ a tinȚ ma wiaa. Ma dage nialinȚ si laa Yesu wiaa dii aa hilimi tasi-la Ƽ ari wialinȚ la si bula a tigema Ƽ Țaa wutitii nƼ. Ma pƼ lenȚ di ba jinȚ ari ma choba nƼ.

## 9

<sup>1</sup> U bi maga di mi bul di ma jonȚ kiaa pipi Wia niaa si he Jerusalem Ƽ, <sup>2</sup> bƼƼ wiaa mi paala jinȚ ari ma Țaa siri nƼ di ma Țaa Ții. Ții wiaa nƼ tii mi bibigisi ma wiaa a pi Wia nialinȚ si he Masidoonia tinȚteenȚ Ƽ. Mi bula piba ari nialinȚ si he Akaaya tinȚteenȚ Ƽ Țaa siri harinȚ jina-la di ba pƼ Wia niaa Ƽ. Ma si fiƼƼ siinȚ Ții, ma leȚe niaa yuge nƼ a ma cho di ba pƼ jonȚ kiaa pipi nialinȚ. <sup>3</sup> Mi laa sipaanȚ titinȚ mi naanȚbiirinȚ deenȚba di ba ko ma teenȚ, di ma wasa kenȚ ma titia ari kialinȚ ma sii che di ma paa, ari mi si bul

ma wiaa Ții piba, di wialinȚ mi si bula a tigema Ƽ si pƼi Țaa. La laa ma wiaa dii woruȚ a bula piba ari ma janȚ che kialinȚ bil. <sup>4</sup> Di ba nƼ to ko a na di ma bi kialinȚ che bil, hiisinȚ janȚ diila, a diima maa a tinȚ Ții wiaa. <sup>5</sup> Ții nƼ tii mi biine duu maga di mi tinȚ mi naanȚbiirinȚ deenȚba di ba laa sipaanȚ ko mi Ƽ, di kialinȚ ma si bula ari ma janȚ jonȚo pƼ Wia niaa Ƽ, di ma jonȚo he donȚo Ƽ, ka di mi-na ko. Ții janȚ dage ari ma titia tuototuruȚ Ƽ nƼ ma Țaa Ții. Mi bi maa fuge di ma Țaa Ții.

<sup>6</sup> Ma si wiinȚ deenȚ yu. Di Ț nƼ jonȚ ku-doho mua duu, kialinȚ Ț si janȚ kuȚ bi janȚ yuge, ama di Ț ku-doho nƼ yuga di Ț jonȚo duu, Ț janȚ kuȚ kiaa yuge. <sup>7</sup> Nuu-kala doluȚ si mage Ții, u maga duu tia a mage Ții nƼ. U maga duu pulle u tuonȚ a pi kialinȚ, anȚ si saka saka Țaa. U bi maga duu biine ari baa fugu nƼ duu pi kialinȚ. Nuu-kala maga duu tia kiaa ari u tuototuruȚ Ƽ, bƼƼ wiaa Wia cho nii-la sii pa ari tuototuruȚ nƼ. <sup>8</sup> Ma si yu ari Wia kenȚ doluȚ. U janȚ wuo faasa pima kuȚ-kala ma sii che. U janȚ paala faasa pima di ma kaa wase ma titia anȚ ka, a kenȚ ku-kaanaa ma pƼ ma donȚsunȚ tinȚȚaa Ƽ. <sup>9</sup> Țla nƼ ba bul Wia teninȚ tuonȚ. Ba si, “Zile tiina yie jonȚ kiaa jaase nƼ a pi summoo. U zile bi dere.”

<sup>10</sup> Wia nƼ yie jonȚ ku-doho a pi paara. U nƼ pi niaa kudiilee maa. Ții wiaa u

janj pima kiaa a leŋ di ba puŋa pɛ bua-na kala ɛ. U si leŋe ma kiaa puŋa pipeŋ nji, u janj leŋ di ma ma keŋ zile kiŋkeŋ. <sup>11</sup> Wia janj leŋ di ma faasa keŋ kiaa. Di ma ne keŋ kiaa woruŋ, ma ma janj faasa keŋ zile kiŋkeŋ. Di ba ne laa kialinj ma si joŋo piba, ba janj denne Wia. <sup>12</sup> Kialinj ma si joŋo pi Wia nialinj, ma piba ba ku-cheɛɛɛ ne nji. Nji wuo leŋ niaa yuge a denne Wia duu yirinj yire. <sup>13</sup> Kialinj ma si joŋo piba daga nji ma si naga ne. A tinj ma wiaa, niaa janj yuge a denne Wia, beɛ wiaa ma nii Wia wu-zomɔ-la si tige Kirisito ɛ a tutoba maa. Nji dunɗunja ma dee. Ba janj denne Wia a tinj kialinj ma si joŋo dii zile, ba di nialinj kala ɛ. <sup>14</sup> Ba yie sul Wia pipima ne a cho di ba nama, beɛ wiaa tintinj-zoŋ ne Wia tinj ma teenj. <sup>15</sup> Laa lolle Wia a tinj wu-bal-bal-la u si joŋo pila pei.

## 10

*Pɔɔl bul wiaa a tige tintinjŋaa u si timaa pi Wia*

<sup>1</sup> Mi-na Pɔɔl titia nji che di mi bul wii pima. Mii sulma a tinj Kirisito wiaa. U siaa ne fiela, ka u bira keŋ ken-yiri maa. Ama niaa doŋsunj si, di mi ne he ma teenj, mi yie pui ne gbeɛ gbeɛ, ama di mi tuo ma teenj, mi nyuŋ yie duori ne wenjem. <sup>2</sup> Di mi ne ko ma teenj, ma si leŋe di mi dage wu-duoruŋ, beɛ wiaa mi ŋaa yarida ari mi fa janj wuo dage wu-duoruŋ a

pi nialinj si biina ari la ŋaa wiaa a ninage dunia niaa sii ŋaa nji. <sup>3</sup> La he dunia ma le ne a yuyuo laalinj, ama la bi yuo a ninage nji dunia niaa sii yuo laalinj. <sup>4</sup> La laali-yuori kiaa bi dunia kiaa ŋaa, ama ba lii Wia teenj ne a faasa keŋ doluŋ, a wuo yigi dii-duoruŋ a lulo. <sup>5</sup> Nialinj si keŋ nji-doluŋ a keŋ wiaa kaa lere, a keŋ ba titia ma kaa yuyuge, ba bi la sipaŋj wuo chinj. La yie keŋeɛba di ba ku jinj Wia. La bira leŋ ba keŋ ba tuɔbiinaa kala a to Kirisito niinj wiaa. <sup>6</sup> Di ma ne sene tuto Kirisito niinj wiaa woruŋ, nji-na la janj ŋaa siri a doŋise nialinj si bi u niinj wiaa ka to.

<sup>7</sup> Má suri ma siaa woruŋ. Di nuu ne biina ari u ŋaa Kirisito nuu ne, u tiina maga duu jinj ari la ma ŋaa Kirisito niaa ne. <sup>8</sup> Di mi ne faasa bigisi mi titia ɛ mua a mu tige dol-la Wia si joŋo pila, la bi wii cheye, beɛ wiaa Wia joŋo pila di la kaa wasema ne. U bi si di la kaa cheima. Nji wiaa hiisinj bi janj wuo keŋmi. <sup>9</sup> Mi bi che di ma biine ari mi yie ŋmunɗe tenninj pipima di mi joŋ fawuluŋ a hema ɛ. <sup>10</sup> Mi jima ari ma doŋsunj yie bul di wialinj mi si yie ŋmunɗe mi tenninj tuɔŋ a piba, ba dolie ne aŋ pɛ hei, ka mi titia ŋaa ni-pugu. Di mi níi bul Wia wiaa maa, mi yie nage ari mi bi wu-buluŋ jinj. <sup>11</sup> U maga di ni-yiriba-la jinj ari wialinj la si yie bul tenninj tuɔŋ, di la ne bi kpage, di la ne kpage

maa, wialin̄ titia ne la jan bul. <sup>12</sup> La bi che di la biine ari la di niaa dõnsun̄ mage dõnõ ne. La bira bi che di la ken̄ la titia mimagise nialin̄ sii dage ba titia. Di niaa deen̄ba nü pagise dõnõ a ken̄ ba titia mimagise dõnõ, ba bi wu-jimin̄ kene.

<sup>13</sup> La bi jan̄ faasa bigisi la titia le a kielii, ama la jan̄ bigisi mage nii Wia si jonõ pila, u ne leje la ku bul u wiaa pima. <sup>14</sup> Nii wiaa, di la ne ku bul Wia wiaa pima, la bi ñaa kikieli, bee wiaa la ne ñaa nialin̄ si laa sipaan̄ ken̄ Kirisito wu-zõmõ-la kaa kõ bula pima. Di la ne fa bi ma teen̄ kõ, an̄ bibigisi la titia le nii, la fa naga la bigisi la titia le a kikieli ne. <sup>15</sup> La bi la titia le bigisi a kikieli a tin̄ tin̄timii-la niaa dõnsun̄ sii tin̄. Ama la laa dii ari ma si waa ma yarida le nii, tin̄timii-la la si jan̄ tin̄ ma teen̄ ma jan̄ puja pe. <sup>16</sup> Di nii ne china, la jan̄ wuo bul Wia wu-zõmõ-la lere-la si paala kielima mu sipaan̄. La bi che di la bibigisi la titia le lee-la nuu dõn̄ sii tin̄ u tin̄tin̄ña. <sup>17</sup> Wia tenin̄ wiaa tuõn̄ ba si, nii-la kala sii bigisi u titia le, u maga duu bibigisi a mu titige Wia dolun̄ le ne. <sup>18</sup> Nii-la sii biinu ari u maga di Wia liisu duu tima pupu, Wia bi jan̄ liise tiina, ama Wia titia yie liise nii-la kala u sii che duu tima puu ne.

## 11

*Põõl bul wiaa a tige nialin̄*

*si nyia wiaa bul ari ba ne ñaa Yesu nan̄zõõba*

<sup>1</sup> Mii sulma di ma ken̄ kenyiri a nii mi teen̄. Di mii bul wu-tõõ maa, má jegile nii mi teen̄. <sup>2</sup> Wia tuõn̄ sii wiima le nii, nii titia ne mi ma tuõn̄ wiwiima le. Ma nage ha-tolo-la si bi disinnin̄ kene ne mi jonõ pipi bala. Ma bala ne ñaa Kirisito. <sup>3</sup> Ama fawullun̄ ken̄mi ne, bee wiaa ma bi jan̄ wuo to Kirisito ari tuõ-bala. Ari dimin̄ si nyise Hawa ari u wu-jimin̄ nii, nii titia ne baa nyisema maa di ma sí Kirisito to ari tuõ-bala ari wutitii. <sup>4</sup> Mii bul ñla, bee wiaa di nuu dõn̄ ne bira kõ ma teen̄ a bira bul wu-tanii a mu tige Yesu le, koo di ma ne bira na din̄-wogo an̄ leñ Wia Din̄-zõn̄-la ta, koo di ma ne bira nii wu-wogo maa, ma yie via Wia wu-zõmõ-la ta ne an̄ sei wu-wogusu-la lima lima. <sup>5</sup> Mi biina nan̄zõõ deen̄ba si jon̄ ba titia ari ba ne kii nuu-kala, ba bimi le kpia. <sup>6</sup> Ama di mi ne paala bi wiaa wuo bul maa, mi jin̄ wiaa ne. La chaasa bul wiaa deen̄ba pima ne.

<sup>7</sup> Bua-la le mi si bul Wia wu-zõmõ-la pima, mi bi kun̄-kala laa ma teen̄. Mi ken̄ mi titia muuri ne di ma wuo yuge. Ma biina mi si ñaa nii, u ñaa wu-bõn̄ nee? <sup>8</sup> Nialin̄ si laa Yesu wiaa dii aa hilimi a he tasin̄ dõnsun̄ le ne faa pimi kialin̄ mi fa sii che bua-la le mi si he ma teen̄ a titin̄. <sup>9</sup> Bua-la le mi fa si he ma teen̄, di mi nü che kun̄-kala, mi ha bi bula

pima kuŋ-kala di ma pemi le. La naan̄biiri-la fa si he Masidoonia tin̄teen̄ le ne faa pimi kialin̄ kala mi fa s̄i che. Mi fa bi cho di mi laa kuŋ-kala ma teen̄. Mi saa bi che di mi laa kuŋ-kala ma teen̄. <sup>10</sup> Mi keŋ Kirisito wutitii-la ne. Ama mi jaŋ bigisi mi titia le a leŋ di Akaaya tin̄teen̄ kala nii wii-la. <sup>11</sup> B̄e ne tii mi bul nii? Ma biina ari mi bima cho nee? Ai, Wia titia jima ari mi choma ne.

<sup>12</sup> Mi s̄i tin̄ mi tin̄tin̄ŋaa aŋ bi kuŋ-kala ka che ma teen̄ nii, mi ha jaŋ ŋin̄ŋaa nii. Niaa doŋsun̄ he dime a bibigisi ba titia le ari la di ba ne to weŋ-bala a titin̄ tin̄tin̄ŋaa. Mii che di mi ŋaa nii, di ba s̄i wuo na won̄biin̄ a bul nii. <sup>13</sup> Niaa deen̄ba nyia wiaa ne ari ba ŋaa Kirisito nan̄zooba ne. Ba bira nyise niaa ne ba tin̄tin̄ŋaa le. Ba yie fugi a keŋ ba titia birime ari ba ŋaa Kirisito nan̄zooba ne. <sup>14</sup> U nii saa bi wu-kpun̄kpere wii ŋaa, b̄e wiaa Sitaani ma keŋ u titia a nage duu ŋaa Wia tin̄daaru ne si keŋ pulumun̄ ko dunia. <sup>15</sup> U saa bira bi wu-kpun̄kpere wii ŋaa di Sitaani tin̄tin̄naa ne keŋ ba titia ŋaa a nage nialin̄ si keŋ tuo-pula a tima pipi Wia. Ba si tima mage nii, nii ne Wia jaŋ doŋiseba a mage.

*Pool si na heŋŋ nii a tin̄ u si ŋaa Yesu nan̄zo*

<sup>16</sup> Má leŋ di mi bira bula pima ari nuu-kala s̄i biina ari mi ŋaa ni-yaari ne. Ama di ma n̄i che di ma jon̄mi ari

mi ŋaa ni-yaari, mi jaŋ wuo bigisi mi titia le muapilii. <sup>17</sup> Wialin̄ mi s̄i bul, ni-yaari wiaa ne mii bul. Mii bigisi mi titia le ne. Mi jima Kirisito bi jaŋ bigisi u titia le nii. <sup>18</sup> Niaa yuga a bibigisi ba titia le a tin̄ dunia kiaa wiaa. Nii wiaa mi ma jaŋ bigisi mi titia le. <sup>19</sup> Ma keŋ wu-jimin̄ ne a wuo sisei wialin̄ ni-yaaraa s̄i bul. <sup>20</sup> Di nuu ma ne keŋma birime u yosun̄, koo di u ne keŋ ma kiaa kala lilaa, koo di u n̄i gurema, koo di u ne leŋe ma ŋin̄ŋaa wialin̄ u s̄i che, koo u ne fallema, ma yie toŋe ma niin̄ ne. <sup>21</sup> Hiisin̄ keŋmi ne a tin̄ wiin̄ deen̄ mi s̄i che di mi bul le. La-na fa bi dolun̄ keŋe di la ŋaa wiaa deen̄ba ma le. Ama di nuu n̄i bigisi u titia le a tin̄ wii wiaa, mi ma jaŋ wuo bigisi mi titia le a tin̄ wii-la wiaa. Ama mi haa bul wiaa ari ni-yaari ne. <sup>22</sup> Ba ŋaa Hiiburu timma nee? Mi ma ŋaa doŋo ne. Ba ŋaa Iziral timma nee? Mi ma ŋaa doŋo ne. Ba ŋaa Abiraham doho niaa maa, mi ma ŋaa doŋo ne. <sup>23</sup> Ba ŋaa Kirisito tin̄tin̄naa maa, mi ma ŋaa doŋo ne. Mi ne paala kiiba. Mi ne paala fiŋe siin̄ a tin̄ kin̄keŋ. Ba keŋmi kaa to dia a yuge ne. Ba si ŋmoomi, mi bi u niin̄ jin̄. Mi fa si ka mua di mi suba maa, mi biba ma niin̄ jin̄. Mii bul wiaa deen̄ba kala ari mi nyun̄ tuo. <sup>24</sup> Naan̄siin̄ bun̄oŋ ne Juu tin̄ŋaa keŋmi a viire ari kpaasa naan̄siin̄ mara ari fii



ari nibi. <sup>25</sup> Naan̄siinj butori ne ba jon̄ chiba a viiremi. Bua kubala le ba yagemi ari tabiaa. Mi si juu liinj daborusun̄ a viven̄, butori ne liinj daborusu-la chei liinj tuon̄, chee don̄ mi he liinj tuon̄ wihēye ari titan̄j kala a ninerike di mi lii. <sup>26</sup> Mi si venēē ven̄ won̄biinj̄ n̄ii, mi na heen̄ ne worun̄. Mi na heen̄ lii-libisin̄ tuon̄. Mi na heen̄ gaaraa ma nisin̄ le. Mi na heen̄ mi titia niaa nisin̄ le, mi na heen̄ nialinj̄ si bi Juu tin̄ḡaa ḡaa nisin̄ le, mi na heen̄ ta-balaa le, mi na heen̄ giri-bine ma tuon̄, mi na heen̄ mugī-balin̄ tuon̄, mi na heen̄ nialinj̄ si nyia wiaa ari ba ḡaa la naan̄biirin̄ nisin̄ le. <sup>27</sup> Mi tima ne a faasa tin̄ worun̄ a na heen̄. Tapulaa yuga mi si bi don̄ pina, losun̄ ari lii-nyuasun̄ ma ken̄mi, mi paala bi kudiilee kenē di mi dii, a ken̄ yaribiree, waarin̄ kpumi. <sup>28</sup> Di mi ne paala len̄ wiaa deen̄ba kala ta, mi yie bibiine wiaa don̄sun̄ ne. Tapulii-na kala nialinj̄ si laa Yesu wiaa dii aa hilimi leree kala, ba wiaa ne mi yie bibiine. <sup>29</sup> Di nuu ne bi dolun̄ kenē, mi ma bi dolun̄ kenē. Di ba nyise nuu duu ḡaa wu-bon̄ maa, mi tuon̄ yie faasa chei ne.

<sup>30</sup> Di mi n̄ii che di mi bigisi mi titia le maa, mi jan̄ bigisi mi titia le a tin̄ kialinj̄ si daga ari mi bi dolun̄ kenē. <sup>31</sup> Wia si ḡaa la Tiina Yesu Nyimma, u yirin̄ jan̄ yire deen̄ deen̄. U jima ari mi bi wiaa nyia. <sup>32</sup> Mi fa si he Damaasikas

le, bua-la le di baal kubala baa yiyire Ariitas ne dii ba kuoron̄. Nii ne kuoro Ariitas pi nii-la si chin̄ tin̄tee-la kuori-balin̄ nyun̄ won̄biinj̄ di ba pō tan̄-la boin̄niinj̄ a ken̄mi. <sup>33</sup> Ama ba jon̄mi a he sim-balin̄ tuon̄, a jon̄mi to tokoro ta jeen̄ harinj̄. Nii ne mi wuo lel u nisin̄ le, u chemi ka.

## 12

*Pool na wiaa ari duosoo tuon̄*

<sup>1</sup> Mi si bigisi mi titia le, n̄ii bi jan̄ pemi le, ama mi ha jan̄ bigisi mi titia le a bul wialinj̄ Wia si leje mi na ari duosoo tuon̄, ari wialinj̄ u si jon̄o dagemi. <sup>2</sup> Mi jin̄ baal kubala fa si laa Kirisito wiaa dii. U jisin̄ fii ari banese ne ḡla Wia si guu jon̄u kaa jil u jan̄ di-boli-la, a dagu wiaa yuge, an̄ miira kenu kaa ku tuu ta. Di Wia jon̄ u dima ne koo u yaraa kala ma ne, mi bi jin̄. Wia ne jima. <sup>3</sup> Mi jima ari baala deen̄ Wia guu jon̄u kaa jil Wia-jan̄ di-zon̄-la ba s̄ii yire Paradaas ne. Di Wia jon̄ u dima ne koo u yaraa kala ne, mi bi jin̄. Wia ne jima. <sup>4</sup> Wialinj̄ u si nia, nuhuobiinee paala bi jan̄ wuo bulba. U bi maga di ba bulba maa. <sup>5</sup> Mi jan̄ bigisi baala deen̄ le, mi-na bi mi titia le wuo bigisi. Ama di mi n̄ii bigisi mi titia ma le, mi jan̄ bigisi mi titia le a mu tige kialinj̄ si daga ari mi bi dolun̄ kenē le. <sup>6</sup> Di mi n̄ii che di mi bigisi mi titia le maa, mi bi jan̄ bul wu-yaayasin̄. Mi

jan̄ bul wutitiiba. Ama mi bi jan̄ wuo bigisi mi titia le, di nuu-kala sí wuo na won̄biin̄ a biine ari mi kii nii mi si maga a tin̄ wialin̄ ba si na mi teen̄, koo a tin̄ wialin̄ ba si nia di mii bul le. <sup>7</sup> Wu-kpun̄kperisi-la kala Wia si jon̄o dagemi fa jan̄ wuo n̄aa di mi bigisi mi titia le. Di mi sí wuo na won̄biin̄ a bigisi mi titia le, u naga kun̄ ne ba jon̄o t̄omi. U wiwii ari soon̄ si t̄o niaa u wiwii nii. U fa naga Sitaani ne tin̄ ku-la duu k̄o mi teen̄ a walimemi di mi sí wuo na won̄biin̄ a bigisi mi titia le. <sup>8</sup> Mi yaraa síi wii nii, nii ne mi sul Wia naan̄siin̄ butori duu len̄ di mi yaraa fiele. <sup>9</sup> Nii ne Wia bula pimi a bul, “Mi zile yuga kin̄ken̄ ŋ teen̄, nii wiaa nialin̄ si bi dolun̄ kene ba titia le, mi yie jon̄ dolun̄ piba ba kaa titin̄ mi tin̄tin̄n̄aa a dere.” Nii wiaa mi tuon̄ t̄oro ari mi si bi dolun̄ kene mi titia le. Mi saa jan̄ bigisi mi titia le a tin̄ mi si bi dolun̄ kene wiaa, di Kirisito dol-la wuo hemi le a titin̄. <sup>10</sup> Nii-na a tin̄ Kirisito wiaa mi tuon̄ t̄oro ari mi si bi dolun̄ kene mi titia le. Ba yie tutuusela. La yie nina heen̄ ne. Ba yie to naasin̄ dudogisela. La yie nina wu-yiriba kala ma le. Di mi bi dolun̄ kene, Wia pimi u dolun̄.

*Korin̄ti niaa wiaa wii P̄ool*

<sup>11</sup> Mii bul wiaa ari mi n̄aa ni-yaari ne. Ma ne saa fugemi he nii le. Ma ne fa maga di ma bibesemi le. Mi

jima ari mi bi nuu n̄aa, ama nan̄z̄ooba-la si jon̄ ba titia ari ba ne kii nuu-kala, ba bimi kpia. <sup>12</sup> Mi nyalima ne worun̄ a wuo tin̄ ma teen̄. Wialin̄ kala mi si n̄aa, wu-magilaa ari wu-kpun̄kperisi-la ari wialin̄ kala mi si n̄aa Wia Din̄-z̄on̄-la dolun̄ le daga ari mi sene n̄aa Kirisito nan̄z̄o-titii ne. <sup>13</sup> Wialin̄ mi si n̄aama le, ba titia ne mi n̄aa nialin̄ si laa Yesu wiaa dii aa hilimi lee-kala le. Wii-la dun̄dun̄a mi si bi n̄aama le ne n̄la: Mi bima walima di ma pimi kialin̄ mi síi che. Mi saa sulma di ma jon̄ wiin̄ deen̄ chemi.

<sup>14</sup> Tori ne n̄la mi si n̄aa siri ne di mi ku nama. Di mi ne k̄o, mi bi jan̄ walimema di ma pimi kun̄-kala. Mi bi ma kun̄-kala ka che. Ma titia ne mi chiche, beē wiaa han̄biisin̄ bi jan̄ wuo che kiaa bil ba nyimmaba ari ba naan̄ba le. Ama han̄biisin̄ nyimmaba ari ba naan̄ba ne maga di ba che kiaa a bil ba biirin̄ le. <sup>15</sup> A tin̄ ma wiaa mi paala faasa cho ne di mi ken̄ kun̄-kala mi si kene ari mi dolun̄ a tima pima. Nii wiaa, di mi ne choma kin̄ken̄, u maga di ma ma chomi ne, ama ma bimi cho kin̄ken̄. <sup>16</sup> U n̄aa wutitii ne ari mi bima walima di ma pimi kun̄-kala, ama ma bula ari mi nyisema laa ma kiaa ne. <sup>17</sup> Mi tin̄ niaa ne ba k̄o ma teen̄. Ma biina ari mi tin̄ba di ba ku laa ma kiaa neē? <sup>18</sup> Mi ne tin̄ Taatis duu k̄o ma teen̄. La

naanɓie dɔŋɔ ma ne to u harin kuko. Taatis si ko ma teen, u girima laa ma kun nee? Wii-kala la sii naa le, la di Taatis niin naa kubala ne. La kala ka to wen-bala ne.

<sup>19</sup> Wialin kala la sii bul, ma jan biine ari laa bul nii di la laa la titia ma teen ne. Nii dee. La he Kirisito le ne aa bul wialin Wia sipaan. Mi naanbii-kpianaba, laa bul wiaa deenba kala di la wuo pema le di ma waa wialin ma si laa dii le. <sup>20</sup> Fawullun kenmi ne di n bi pɔɔ mi jan ku nama, di mi si cho di ma nage nii, di ma bi nii naga, ma ma jan na di mi ma bi nii ma si cho naga. Mi boye ka jon ari mi ne ko, mi jan nama di maa yuo yuosun, a ken yaribierin, a nina baaniin dɔŋɔ nyun, a to ma tuɔɔre wu-ɲaalaa, a chichei dɔŋɔba yirin, a gigaa dɔŋɔ harin, a ken siiduon, a bi nii-bala kene. <sup>21</sup> Mi fá fawullun di mi ne bira ko ma teen, Wia jan len di mi tuon chei ma nyun a tin ma haacheba wiaa. Ma ha bi birima liiba le. Niaa yuga a he ma tuon a naa haache wiaa, aa naa disinnin, aa naa wu-liilin, a gollo chiche niaa haalaa, a bi birima liiba le. Di mi ne ko ma teen, mi jan yel a tin ma haacheba wiaa.

### 13

*Pɔɔl bira chagile Kɔrinti niaa a chuɔleba*

<sup>1</sup> Naanɓiin butori ne nla mi sii ko ma teen di mi

nama. Di mi ne ko, di ma kun-kala ne biina ari u dɔŋɔ tiina naa wii chei u chiche u bul u teen, u maga di u ken siada tinnaa balia koo batori. <sup>2</sup> Mi si ko ma teen liamin le, mi kpurise nialin si naa haache digilaa ne. Mii che di mi bira ko ma teen torimun le nla, nii ne mi chiche di mi bira kpurise ba digilaa, ari di mi ne ko, mi bi jan taba. <sup>3</sup> Maa che di ma jin ari Kirisito hemi le ne a bubul wiaa. Ma ma jan na di u ken dolun ne ma teen, a wuoma maa wii-kala le. <sup>4</sup> Ba kpaasu mere daa-geese nyun a nage ari u fa bi dolun kene. Ama Wia dolun le u sie a ken miisin. La he Kirisito le ne. Nii wiaa la bi dolun kene la titia le. Kirisito si weye nii a ken miisin Wia dolun le, nii titia ne la ma jan ken miisin Wia dolun le a titin ma teen.

<sup>5</sup> Má ben ma titia le a pe mimagise ma titia, a na di ma ne chin ma yarida naan le. Ma bi jin ari Yesu Kirisito hema le nee? Di ma ne bi jin duu hema le, nii-na ma tele ne nii. <sup>6</sup> Mi ken yielaa ari ma jan na di la-na bi tele. <sup>7</sup> La sul Wia pipima di ma si wii-kala naa chei. U bi naga ari laa che di la dage ari la-na naa worun ne, ama di ma ne paala biine ari la tele maa, laa che di ma wuo ninaa wialin sii to wonbiin ne, <sup>8</sup> bee wiaa la bi jan wuo lii wutitii-la harin. Ama la chin wutitii-la le ne. <sup>9</sup> Di la ne bi dolun kene maa, la yie juuɔse ne a tin dol-

la ma si kene wiaa. Wii-la la si sul Wia chiche ne, di ma yarida wasa dol Kirisito wiaa le. <sup>10</sup> Lelele mi tuo ma teen, nii ne tii mi nmunse tenin pipima. Di mi ne ko ma teen, mi che di mii dage dol-la la Tiina Wia si jojo pimi ma teen. U jojo dol-la pimi di mi kaa pema le ne di ma wasa dol. U bi si di mi kaa cheima.

<sup>11</sup> Mi naanbiirin, mi tenin diderin ne nla. Ma jan hon worun. Ma ken ma titia worun, ma jegili wii-la mi si bula pima, ma ken niibala donjo le, ma nna sima donjo teen. Di ma ne nna nii, Wia-la si cho niaa jan he ma teen a lej di ma hon ari yarifilaa. <sup>12</sup> Ma ken tuo-bala a guori donjo a chuchule donjo. <sup>13</sup> Wia niaa kala chuolema.

<sup>14</sup> Laa sul la Tiina Yesu Kirisito duu lahirimō hema le, di la Nyimma Wia ma choma, ka di Wia Din-zon-la ma lej di ma nna kubala. Ami.

## TEN-LA PÓOL SI NMUNSA PI GALIISIA NIAA

<sup>1</sup> Mi-na Póol ne nmunse tenin deen aa pi ma nialin si laa Yesu wiaa dii aa hilimi Galiisia tinteen le. La Nyimma Wia ne chise Yesu Kirisito suun le. Ba ne liisemi di mi nnaa ba nanzoo. Nuhuobiinee dee bimi liisa. <sup>2</sup> La di la naanbiiri-la si he daha nii chuolema.

<sup>3</sup> La Nyimma Wia ari la Tiina Yesu Kirisito lahorimo le, ma jan hon ari yarifielaa.

<sup>4</sup> Kirisito Yesu suu la wubonjoo wiaa ne, duu liisela wu-bomola si he dunia le leele. U to la Nyimma Wia tuutorun le ne a nnaa nii pila.

<sup>5</sup> Wia yirin jan yire leele a kaa mu wuu. Ami.

### *Wia wonbii-wogo tuo*

<sup>6</sup> Ma bi diene an via nii-la si yirema Kirisito lahorimo le, a bira tuto Wia wonbii-wogo. Wii-la nnaa wukpunkpere mi le. <sup>7</sup> Wutitii ne, Wia wonbii-wogo kala bira tuo. Mi bul wiin deen, bee wiaa nnaa yuga a he dime aa walimema a chiche di ba ken Kirisito wu-zomola kaa birime.

<sup>8</sup> Ama di la ne ku bul wu-wogusu, koo Wia tinndaara ne lii wia nyun a ku bul wu-wogusu, a ken Kirisito wu-zomola la si bula pima kaa birime, Wia jan kalibe heba le. <sup>9</sup> La laa sipaan bul wiin deen ne, an bira bubul u titia leele

nla. Di nuu-kala ne bul Wia wonbii-wogo pima, ba di wialin la si bula pima bi kubala nnaa, u maga di Wia kalibe heu le.

<sup>10</sup> Ma biina ari mi bul wiin deen a chiche di mi laa yirin Wia teen koo nnaa teen nee? Ma biina ari mii che di nnaa zizilmii? Di mi nii che nnaa zizilmi, mi fa bi jan nnaa Kirisito tintinna.

### *Pool daga nii Yesu Kirisito si yiru duu ku nnaa u nanzoo.*

<sup>11</sup> Mi naanbiirin, ma len di mi bul wiin deen pima. Wia wu-zomola mi si bula pima bi nuhuobiine teen lia.

<sup>12</sup> Nuhuobiinee dee bi bula pimi, nuhuobiinee dee bimi daga. Ama Yesu Kirisito ne jono dagemi.

<sup>13</sup> Nialin bula pima nii mi fa si naga bua-la le mi fa sii to Juu tinnaa Wii-chuolun wonbiin. Ma jin nii mi fa si to naasin a dogise nialin si laa Yesu wiaa dii aa hilimi. Mi nnaa mi kukeri kala di mi chei ba tintinna.

<sup>14</sup> La Juu tinnaa Wii-chuolun wonbiin le, mi ne fa jin wiaa kii mi donsun tinnaa jesin kala. Mi fa jon mi nyun kala a he wialin kala la naabalimaba si dagela ne.

<sup>15</sup> Ama ka ba-na lulmi, Wia liisemi di mi tima pu. U lahorimo le ne u nnaa nii mi le. <sup>16</sup> U tuutorun le ne u dagemi u Bie Yesu Kirisito, di mi wuo bul u wu-zomola a pi nialin si bi Juu tinnaa nnaa. U si nnaa nii, mi bi nuu-kala teen mua duu dagemi.

<sup>17</sup> Bira mi bi Jerusalem mua di mi na nialin si laa sipaan nnaa Wia

nanzɔɔba mi le. Ama mi mu tinṭee-la ba sii yire Ariibia ne, a lii dime a miira mu tabal-la ba sii yire Damaasikas.

<sup>18</sup> Jisin batori ne kiele, ka mi-na mu Jerusalem di mi na Piita, nii-la ba si kaa yire Kifas. Mi si mu dime, mi hoŋ u teen tapulaa fii ari banɔŋ ne. <sup>19</sup> Mi si hoŋ dime, mi bi Yesu nanzɔɔ kala na see Jeems, la Tiina Yesu ŋaana. <sup>20</sup> Wialin mi si ŋmuŋsaa pima, Wia teen ba ŋaa wutitiiba ne. Mi bi nyia. <sup>21</sup> Nii ne mi sii dime, a mu Siiria ari Siliisia tinṭeen. <sup>22</sup> Bua deen kala le nialin kala si laa Yesu wiaa dii aa hilimi Judiya tinṭeen le, ba ha bimi jin. <sup>23</sup> Ba ta nii niaa sii bul mi wiaa ne a bul a tigemi le, "Nii-la fa si to naasin a dudɔgisela ne leele bul Wia wu-zɔmɔ-la wiaa u fa sii che duu chei." <sup>24</sup> Ba denne Wia woruŋ a tin mi wiaa.

## 2

*Yesu nanzɔɔba-la sei Pɔɔl si bul Wia wiaa a pi nialin si bi Juu tinṭaa ŋaa teen*

<sup>1</sup> Jisin fii ari banese si kiele, la di Banabas bira miira mu Jerusalem. La keŋ la naanbie Taatis to la hariŋ mu. <sup>2</sup> Mi si mu lee-la, Wia ne dagemi mi mu. La si mua, la di nialin si laa Yesu wiaa dii kuhiasin hilime. Nii ne mi bula piba wialin mi fa si bula pipi nialin si bi Juu tinṭaa ŋaa a tige Wia wu-zɔmɔ-la. Mi bul nii piba di tintimii-la mi fa si tima aŋ haa tin si pei ŋaa. <sup>3</sup> Taatis, sii to

mi hariŋ. U fa ŋaa Giriik tiina ne, ama ba buu fuga duu keru u penin. <sup>4</sup> Ari nii kala, niaa doŋsuŋ fa bula di ba keru Taatis penin. Niaa deenba fa fugo ari ba ma laa Yesu wiaa dii ne a ŋaa la naanbiirin. Ba fa ku guoli la tuon di ba na ari laa to Juu tinṭaa naabalimaba wonbii-la ne koo la biba to. La si laa Yesu Kirisito wiaa dii nii, ba faa che ba na di la liise la titia Juu tinṭaa naabalimaba wonbiin le. Ba fa cho di la to Juu tinṭaa naabalimaba wonbii-la ne a ŋaa yosi u le. <sup>5</sup> La bi seye muapili maa, di wutitii-la Wia wu-zɔmɔ-la si daga si chei ma teen. <sup>6</sup> Mi jan bul ari nialin si ŋaa nihiasin Wia niaa tuon bi wii bula di mi dage a pe Wia wu-zɔmɔ-la le mi si jima. Ama niaa deenba di-chinin bi wii ŋaa mi teen. Wia bi niaa kaa pɔre. <sup>7</sup> Nihiasin deenba na ari Wia liisemi di mi bul u wu-zɔmɔ-la a pi nialin si bi Juu tinṭaa ŋaa, ka di Piita ma bul wu-zɔmɔ-la a pi Juu tinṭaa. <sup>8</sup> Wia ne liise Piita a pu doluŋ duu bul wu-zɔmɔ-la a pi Juu tinṭaa. Nii titia ne u yiremi ma di mi bul u wiaa a pi nialin si bi Juu tinṭaa ŋaa. <sup>9</sup> Jeems ari Piita ari Joon si ŋaa Wia niaa tuon nihiasi-la na ari wutitii, Wia ne liisemi di mi tin tinṭinfiemin deen. Nii ne ba keŋ la di Banabas he ba tuon, la kala keŋ nii-bala. Ba bula ari la di Banabas jan mu bul Wia wu-zɔmɔ-la nialin si bi Juu tinṭaa ŋaa teen, ka

ba ma bul wu-zomɔ-la J̄uu tin̄ɲaa teen. <sup>10</sup> Wii-la ba si bula pila dunɲa nɛ, di la sɪ summo-la si hɛ ba tuɔɲ wiaa yu. Mi ma sɛyɛ ari mi jan̄ liliisi ba wiaa.

*Pɔɔl kpurise Piita digilaa*

<sup>11</sup> Ama bua kubala Piita sii kɔ An̄tiok. Mi lii u hariɲ a chaasa bul u teen̄ niaa tuɔɲ ari u cheye nɛ. Wii-la si tii mi bul u cheye nɛ ɲla: <sup>12</sup> U si hɛ An̄tiok lɛ, Jeems tin̄ niaa ba ma kɔ An̄tiok. Ba si kɔ, ba na ari Piita ari nialin̄ si bi J̄uu tin̄ɲaa ɲaa an̄ laa Yesu wiaa dii, di ba kala nɛ pɛ dɔɲɔ lɛ didii kiaa. Piita si na nialin̄ Jeems si tima, u liise u nisin̄ nialin̄ si bi J̄uu tin̄ɲaa ɲaa lɛ, ba di ba bira bi kiaa ka dii. Piita fifá nialin̄ si si u maga di ba keri nialin̄ si bi J̄uu tin̄ɲaa ɲaa an̄ laa Yesu wiaa dii penɛ nɛ. N̄ii nɛ tii u ɲaa ɲii. <sup>13</sup> N̄ii nɛ J̄uu timma-la ku-kaana-la ma paala to ba fawul wiaa, ari Piita si ɲaa ɲii. Banabas ma paala to ba fawul wu-ɲaala-la lɛ. <sup>14</sup> Mi si na ari ba bi wutitii-la Wia wu-zomɔ-la si daga ka to, ɲii nɛ mi bula pi Piita ba kala sipaan̄ a bul, “N̄ ɲaa J̄uu tiina nɛ, an̄ ka ɲ wu-ɲaalaa nage nii-la si bi J̄uu tiina ɲaa. Ɛɛ nɛ saa ɲ jan̄ wuo ɲaa a fuge nialin̄ si bi J̄uu tin̄ɲaa ɲaa di ba ɲaa wialin̄ J̄uu tin̄ɲaa sɪi ɲaa?”

*Yarida dunɲa nɛ jan̄ tii di la kɛɲ tuɔ-pula Wia teen̄*

<sup>15</sup> Wutitii nɛ, ba si lulla, la ɲaa J̄uu tin̄ɲaa nɛ. Nialin̄ si bi J̄uu tin̄ɲaa ɲaa si ɲaa

wu-bomɔ-la, la bi baa ɲaa. <sup>16</sup> Ama la jima ari nuu n̄ii to wialin̄ Moosis fa si bile di niaa tuto, u ɲii bi jan̄ wuo len̄ di tiina ɲaa tuɔ-pul tiina Wia sipaan̄. Ama di nuu nɛ laa Yesu Kirisito wiaa dii, u dunɲa nɛ jan̄ wuo len̄ duu tiina ɲaa tuɔ-pul tiina Wia teen̄. N̄ii titia nɛ la ma laa Yesu Kirisito wiaa dii, di Wia len̄ di la ɲaa tuɔ-pul tin̄ɲaa u teen̄, a tin̄ yarida-la la si kɛnɛ Kirisito lɛ. Di nuu n̄ii to wialin̄ Moosis si bile, u ɲii bi jan̄ wuo len̄ di u kɛɲ tuɔ-pula Wia teen̄. <sup>17</sup> La sɪi chɛ di la to Kirisito lɛ di Wia len̄ di la ɲaa tuɔ-pul timma, la na ari la nage haache timma nɛ si bi wialin̄ Moosis si ɲmun̄sa bil ka to. Ma saa biina ari Kirisito nɛ len̄e la ɲin̄ɲaa haachɛɛ? Ai, u dee!

<sup>18</sup> Wialin̄ Moosis fa si bile di la tuto, di mi nɛ viaba ta an̄ bira suomi tutoba, u ɲii daga ari mi ɲaa haache diire nɛ. <sup>19</sup> Wialin̄ Moosis fa si bile di la tuto, u titia nɛ len̄e mi suu. Ama u ɲii ɲaa mi suu Moosis wialin̄ lɛ a wuo kɛɲ miisin̄ Wia teen̄. <sup>20</sup> Mi si kɛɲ miisin̄ Wia teen̄ ɲii, la di Kirisito kala nɛ ba kpaasa mɛrɛ u daa-gesɛɛ nyun̄ ɲii. Ama miisi-la mi si kɛnɛ, u bi mi teen̄ lia, u lii Kirisito teen̄ nɛ. Mi si laa Wia Bie wiaa dii nɛ tii mi wuo kɛɲ miisin̄ deen̄ mi si kɛnɛ dunia deen̄ lɛ. Mi bi lahɔrimɔ-la Wia si kɛnɛ la teen̄ via. <sup>21</sup> Wia Bie Yesu nɛ chomi, a jon̄ u miisin̄ a yɔɔ suun̄ mi wiaa. Ama di nuu nɛ jan̄ wuo to wialin̄

Moosis fa si bile le a ken tuo-pula u teen, suu-la Kirisito si suba njaa pei ne.

### 3

*Yarida koo wialin Moosis si bile*

<sup>1</sup> Ma Galiisia ni-yaaraa deenba! Kubee ne nyisema? La si ko ma teen, la dagema worun nii Yesu si suu daa-gese nyun, ma jin u bubuon. <sup>2</sup> Má len di mi piesema wiin deen: Wia si jon u Din-zon-la dii zile ma le, u njaa nii a tin ma sii to wialin Moosis fa si bile di niaa tuto, koo a tin ma si nii Wia wu-zom-la a laaba dii ne tii? <sup>3</sup> Bee ne tii ma yaare kinken nla? Wia Din-zon-la le ne ma suomi a ken miisin deen Kirisito le. Ma saa che di ma na u diderin ne ma titia dolun lee? <sup>4</sup> Ma na wiaa yuge, an ka ba kala njaa pei ma teen koo? Ai, mi biina ba bi pei njaa. <sup>5</sup> Wia jon u Din-zon-la a dii zile ma le, an pe njaa wu-kpunkperisin ma teen. Ma biina ma sii to wialin Moosis si bile ne tii u wuo njaa nii, koo ma si nii Wia wu-zom-la a laaba dii ne tii u njaa nii?

<sup>6</sup> Wia tenin tuon ba bula ari Abiraham njaa Wia yarida ne, nii ne tii Wia len u ken tuo-pula u teen. <sup>7</sup> Nii wiaa nialin kala si laa Wia wiaa dii njaa Abiraham biirin ne. <sup>8</sup> Wia tenin tuon ba na wiin deen faafaa kala ne a bul di nialin si bi juu tinjaa nja, di ba ne njaa Wia yarida, u jan len di ba ma

ken tuo-pula. Wia na wiin deen ne, a bula pi Abiraham faafaa kala a bul, "N le ne mi jan to a pe dunia niaa kala le." <sup>9</sup> Abiraham nii wiin deen a laa dii. Nii ne Wia peu le. Nialin ma kala si laa wiin deen dii, Wia peba ma le ari u si pe Abiraham le nii.

<sup>10</sup> Nialin sii che di ba to wialin Moosis si bile a ken tuo-pula, Wia kaliba heba le ne, bee wiaa Wia tenin tuon ba bula ari nii-la kala si bi wialin kala Moosis si njunsa bil ka to, Wia kaliba heu le ne. <sup>11</sup> Ama leele Wia chaasa dage nii-la kala sii to wialin Moosis si njunsa bil bi jan wuo ken tuo-pula Wia sipaan, bee wiaa Wia tenin tuon ba bula a bul, "Di nuu ne laa Wia wiaa dii, u jan nja tuo-pul tiina a ken miisin Wia teen." <sup>12</sup> Yarida dee ba kaa tuto wialin Moosis si njunsa bil di niaa tuto. Ba bul nii ne Wia tenin tuon. Ba si, "Di nuu ne to wialin kala Moosis si njunsa bil, wialin u sii to jan nja u ken miisin." <sup>13</sup> Ama Wia si kaliba he nialin si nii wialin Moosis si njunsa bil an biba wuo tuto, Kirisito liisela wiaa deenba le. Ba kpaasu mere daa-gese nyun. Ba si njaa nii, Wia kaliba heu le a tin la wiaa ne, bee wiaa ba njunse Wia tenin tuon ari nii-la kala ba si kpaasa mere daan nyun, Wia kaliba heu le ne. <sup>14</sup> Wia fa si duu jan to Abiraham le ne a pe nialin si bi juu tinjaa nja ma le, a jon u Din-zon-la piba. U to



Kirisito le ne a n̄aa wialin u fa si bula pi Abiraham duu jan n̄aa. Di la ne laa Kirisito wiaa dii, u jan to la yarida le a jon u Din-zon-la pila.

*Moosis n̄ii-la bi wialin Wia fa si bula pi Abiraham wuo chei*

<sup>15</sup> Mi naanbiirin, wu-magisii ne mii che di mi dage. Di niaa balia ne vuura di ba n̄aa wii a nmiesa pi donɔ, nuu-kala bi jan wuo chei wii-la. Nuu-kala bi jan wuo n̄aa wii pe wialin ba si vuura bil le. <sup>16</sup> Wia ma bil u niin ne a pi Abiraham ari u doho nuu. U bi u doho niaa kala daga. Ni-bala ne u dage. Nii-la u si dage ne n̄aa Kirisito. <sup>17</sup> Wii-la mi si bula ne n̄la: Wia si bil n̄ii-la a pi Abiraham, u n̄aa jisij zo-banese ari mara ari fii ne, an ka Moosis-na bil wialin di niaa tuto. Nii wiaa Moosis si bil wialin bi jan wuo chei wialin Wia si laa sipaan bul. <sup>18</sup> Wii-la Wia si si u jan jonɔ pi Abiraham, u bi wialin Moosis si bile le lia. Duu ne lii wialin Moosis si bile le, u naga ari Wia bi u niin bile pi Abiraham. Ama Wia ne jon u Din-zon-la pila a tin wialin u fa si bula pi Abiraham.

<sup>19</sup> Nii ne saa wialin Moosis si bile di niaa tuto bubuon ne bee? Moosis si bil wialin di niaa tuto pe dage nii haache si naga ne. Wialin he dime nii a mu yi bua-la le Abiraham doho nii-la si ko. U le ne Wia si u jan to a pe niaa le. Wialin Moosis fa si bile, Wia

tin daaraa ne kaa ku tuu pu. Moosis ne saa n̄aa Wia ari niaa sipaa-tooro nii. <sup>20</sup> Di niwogusun balia nii che di ba bil niin a n̄aa wii, see sipaa-tooru he ba pege. Ama Wia si n̄aa ni-bala, u bi maga duu ken sipaa-tooru.

*Wii-la si tii Moosis bil n̄ii-la pila*

<sup>21</sup> Wialin Moosis si bile, ba saa ken wii-la Wia si si u jan n̄aa pi Abiraham chei nee? Ai, di wialin Moosis si bile ne faa pi niaa miisin, nii-na u fa maga di nialin sii toba ken tuo-pula ne. <sup>22</sup> Ama Wia tenin tuon ba bula ari dunia niaa kala n̄aa haache timma ne. Wia bul nii duu wuo jon ku-la wiaa u fa si bula a pi nialin si laa Yesu wiaa dii a tin ba yarida-la wiaa.

<sup>23</sup> Ka di bua-la-na yi di la wuo n̄aa Yesu Kirisito yarida, wialin Moosis fa si bile nyagela bil ne. <sup>24</sup> Nii wiaa wialin Moosis fa si bile ne faa pola, a wuo ku yi bua-la le Kirisito si ko, di la wuo n̄aa yarida a ken tuo-pula Wia sipaan. <sup>25</sup> Leele Kirisito si ko nii, wialin Moosis fa si bile bira bila wuo nyaga bibil. <sup>26</sup> A tin yarida-la ma si kene Yesu Kirisito le ne tii, ma kala n̄aa Wia biirin nii. <sup>27</sup> Ma nialin kala ba si fo Wii-chuole liin Kirisito dolun le, ma kala nage Kirisito ne. <sup>28</sup> Leele, la bira bi niaa kaa pupore. Di n̄aa juu tiina koo di n̄ bi n̄aa, di n̄ n̄aa yon koo di n̄ tii n̄ titia, di n̄ n̄aa haal koo baal, ma kala

ηαα kubala ne Kirisito Yesu teen. <sup>29</sup> Di ma di Kirisito ne ηαα kubala, ηii-na ma ηαα Abiraham doho nuu ne. Nii-na Wia si si u jan ηαα wii-la a pi Kirisito, Abiraham doho nii-la, u jan ηαα pima maa.

#### 4

<sup>1</sup> Wii-la mi si jan bul ne ηla: Bile si jan dii dia duu nyimma ne suba, di bile ne muuro, ba yie ηiηaa wiaa bile le ari u ηαα yon ne, ka u ne paala tii kialij kala maa. <sup>2</sup> Niaa ne yie bibenu a didagu wiaa deen deen, u ku waa a mu yi bua-la le u si jan dii u nyimma dia. <sup>3</sup> Nii ne la ma fa nage. La fa si bi Yesu yarida ηαα, la faa to wialij bunbun nialij sii to. <sup>4</sup> Ama bua-la titia si yie, Wia tinj u bie. Haal ne lulu. U ma faa to Juu tinηaa naabalimaba wonbii-la ne. <sup>5</sup> U ηαα ηii duu wuo laa nialij fa sii to Juu tinηaa wonbii-la a ta ne, di ba di la kala wuo ηαα Wia biirin. <sup>6</sup> A tinj la si ηαα Wia biirin ne tii u jon u Bie Din-zon-la ku hela le. Din-zon-la si he la tuon, u yie ηαα la keη Wia kaa yire "la Nyimma". <sup>7</sup> Nii wiaa ma kun-kala bira bi yon ηαα. Ma ηαα Wia biirin ne. Ma saa si ηαα u biirin ηii, Wia jan jon kun-kala u si kene a pima.

*Pool si chil Galiisia niaa wiaa ηii*

<sup>8</sup> Ama bua dono, ma fa bi Wia jin. Ma faa to vuiaa ne a ηαα ba yosun. <sup>9</sup> Ama leele ma si ku jin Wia ηii,

koo mi jan bul ari Wia ku jinma ne, bee ne saa tii ma cho di ma birime a bira tuto wialij bunbun nialij fa sii to, wialij si bi dolun kene di ba wuo laama ta? Bee ne tii ma saa cho di ma bira tutoba a ηαα ba yosun? <sup>10</sup> Ma yie beη ari tapulaa kii dono, cheηsinj ma kii dono, bua dono kii dono, jisinj ma kii dono. <sup>11</sup> Ma leηe fawullun keηmi ne ari tinjimii-la mi si tinj ma teen ηαα pei ne.

<sup>12</sup> Mi naanbiirin, mii sulma, ma nagemi. Mi si nage ma ηii, ma ma nagemi. Ma bi wii-kala ηαα cheimi. <sup>13</sup> Ma jima, bua-la le mi si bul Wia wu-zom-la pima, mi faa wiile ne. <sup>14</sup> Ari mi si ηαα puwuol ma kala, ma bimi via, a bimi bee guune maa. Ama ma keηmi worun ari mi ηαα Wia tinjaari ne. Ma keηmi worun ari Yesu Kirisito ne. <sup>15</sup> Ma si sei Wia wu-zom-la, ma tuon toro ne worun. Tuotorun deen saa ηαα pei nee? Mi titia jan wuo bul wiin deen. Di ma ne si wuo, ma fa jan wuo chaare ma siaa pimi. <sup>16</sup> Mi saa ηαα ma dinjon ne a tinj mi si bul wutitii-la pima? <sup>17</sup> Nialij sii dage Juu tinηaa wonbii-la, ba tuon wiima le ne worun, ama ba tuobiinaa bi zon. Ba tuobiinaa kala ne di ba keη ma di mi pore dono le, di ma tuon wiiba le ari ba tuon sii wiima le ηii. <sup>18</sup> U ηαα wu-zon ne di la tuosaa nii wii dono le di mi ne he ma teen koo lee-na kala, ama u maga di ba ηαα tu-wii-

zomɔ nɛ. <sup>19</sup> Mi biirin, ma wiaa wiimi nɛ woruŋ, ari haala si yie chiche duu lul u luoruŋ wiwii ŋii. Ma wiaa jaŋ wiwiimi lɛ ŋii, see di ma birime a nage Kirisito si nage ŋii. <sup>20</sup> Mi fa cho di mi hɛ ma teen nɛ lɛlɛ, a wuo jin wii-la mi si jaŋ bul nuu-kala teen. Ma wiaa kperimi nɛ woruŋ.

*Pool bul Heega ari Saara wiaa*

<sup>21</sup> Má dagemi, ma nialin si cho di ma ha to wialin Moosis si bile lɛ, ma bi ba bubuɔŋ jin? <sup>22</sup> Wia tenin tuɔŋ ba bula ari Abiraham fa lul biirin balia nɛ. Dɔŋɔ ŋaa u haala titia bii nɛ, dɔŋɔ ma fa ŋaa Abiraham ha-yomo bii. <sup>23</sup> Abiraham ha-yon-la si lul bile, nuhuobiine wonbiin lɛ nɛ ba to a lulu. Bile Abiraham haala titia si lula, Wia nɛ bula ari ba jaŋ lulu. <sup>24</sup> Wiin deen nage niirin balia nɛ Wia bil. Yon-la yirin nɛ fa Heega. U biirin ŋaa yosi nɛ. Heega nage wialin Wia si jonɔ pi Moosis nɛ, peel-la nyuŋ ba sii yire Saana nɛ. <sup>25</sup> Heega nage Saana peel-la nɛ. Peel-la hɛ Ariibia tinteen lɛ nɛ. Heega nage taŋ-la ba si kaa yire Jerusalem lɛlɛ. U tuɔŋ niaa ŋaa yosi nɛ. <sup>26</sup> Ama Jerusalem dɔŋɔ nɛ Wia-jaŋ lɛ. U nɛ tii u titia. U nɛ ŋaa la naan. <sup>27</sup> Wia tenin tuɔŋ ba si,

“Má len di ha-pirin jujuɔsɛ.

Ŋ-na nii-la luoruŋ ha si bi wii na, chiesi ari tuɔɔruŋ,

bɛɛ wiaa ha-pirin jaŋ lul bi-irin

kii haal-la síi lul.”

<sup>28</sup> Mi naanbiirin, la-na nage Abiraham bie Aizik nɛ. Wia fa si lenɛ ba lul Aizik ŋii, ŋii titia nɛ Wia len ba lulla maa.

<sup>29</sup> Abiraham biirin balia tuɔŋ ku-la ba si to nuhuobiine wonbiin a lul dɔgisɛ bile ba si lula Wia doluŋ lɛ. Ŋii titia nɛ ba dudɔgisela ma lɛlɛ.

<sup>30</sup> Bɛɛ nɛ ba bul Wia tenin tuɔŋ? Ba bula, “Kiri yon-la ari u bie ta, di ba lii ŋ dia lɛ, bɛɛ wiaa yomo bie bi jaŋ wuo pɛ haal-la si tii u titia bie lɛ di ba dii ba nyimma dia, duu nɛ suba.” <sup>31</sup> Ŋii wiaa mi naanbiirin, la bi ha-yon-la biirin ŋaa. La ŋaa haal-la si tii u titia biirin nɛ.

## 5

*Kirisito laala ta nɛ di la tii la titia*

<sup>1</sup> Kirisito laala ta nɛ di la tii la titia. Má saa chin kpaŋ kpaŋ, a pɔ di nuu-kala bira si ma kaa ŋaa yosi. <sup>2</sup> Má jegile nii. Mi-na Pool nɛ bul wiin deen pipima. Di ma nɛ lenɛ di ba keri ma penɛ, wii-la Kirisito si ŋaa pima ŋaa wu-pɛi nɛ. <sup>3</sup> Mi jaŋ bira bul, di nuu-kala nɛ seye di ba keri u penin, u maga di tiina tuto wialin kala Moosis fa si bile nɛ. <sup>4</sup> Ma nialin síi to wialin Moosis si bile aa walime di ma ken tuɔ-pula Wia sipaan, ma keri ma titia ta nɛ Kirisito teen. La Tiina Yesu zile-la nɛ ma via ŋii. <sup>5</sup> Ama Wia Din-zon-la doluŋ lɛ, la-na laa dii a ken yiɛlaa ari la jaŋ ken

tuo-pula Wia sipaan. <sup>6</sup> Di la di Kirisito ne n̄aa kubala, di la keri la penee koo di la bi kere, u bi wii ken̄e. Wii-la si n̄aa siifian wii ne, ma si laa Wia wiaa dii a cho niaa maa. <sup>7</sup> Ma faa n̄aa woruñ ne. Kubee ne saa nyisema di ma sí wutitii-la to? <sup>8</sup> Wia ne yirema, u bima nyisa di ma leñ wutitii-la. <sup>9</sup> Si-buruñ muapilii ne ba yie joño he boroboro munuñ si yuga le, an̄ ka u sii puore. <sup>10</sup> Mi ha ken̄ yarida ne ma le. La di ma kala n̄aa kubala ne Wia teen. Nii wiaa mi jima ari ma bi jan̄ to won̄bii-tanii. Mi saa laa dii ari Wia jan̄ dogise nii-la yiri-na kala sii walimema. <sup>11</sup> Mi naan̄biirin, di mi ne haa bul ari u maga di ma keri ma penee ne, an̄ ka di Wia-na laama ta, bee ne tii ba haa to naasin̄ dudogisemi? Di mi ne fa si di nuu-kala maga duu keri u peniñ, nii-na mi fa bi jan̄ na heñ a tiñ mi sí bul Yesu si suu daa-gese-la nyuñ wiaa. <sup>12</sup> Nialin̄ kala sii walimema, mi fa cho di ba lii ma tuon̄ ne a mu feri ba titia.

<sup>13</sup> Ka ma-na mi naan̄biirin, Wia yirema ne di ma tii ma titia. Ma saa si tii ma titia nii, ma sí leñ di ma joñ nii a to ma titia tuotore wu-n̄aalaa le. Ama má cho don̄o a tima pipa don̄o. <sup>14</sup> Má n̄aa nii, bee wiaa wialin̄ Moosis fa si bile di niaa tuto, ba tuon̄ wu-nyuñ ne n̄la: “Cho ñ don̄o tiina ari ñ si cho ñ titia nii.” <sup>15</sup> Ama di ma wu-n̄aalaa ne nage бага kiaa di ma gura

ken̄ don̄o didii, má po ma titia le, di nii dee ma jan̄ kpu don̄o d̄ere.

*Má to Wia Din̄-zon̄-la le a ken̄ miisin̄*

<sup>16</sup> Ama wii-la mi sii che di mi bula pima ne n̄la: Má to Wia Din̄-zon̄-la niin̄ le an̄ via ma titia tuotore wu-n̄aalaa, <sup>17</sup> bee wiaa la titia tuotore wu-n̄aalaa bi Wia Din̄-zon̄-la wu-n̄aalaa cho. Wia Din̄-zon̄-la wu-n̄aalaa ma bi la tuotore wu-n̄aalaa cho. La tuotore wu-n̄aalaa ari Wia Din̄-zon̄-la saa n̄aa d̄indomo ne, nii wiaa, wii-la la sii che la n̄aa, la buu wuo n̄aa. <sup>18</sup> Ama di ma ní to Wia Din̄-zon̄-la niin̄ le, juu tin̄n̄aa naabalimaba fa sii to wialin̄ bira bima wuo. <sup>19</sup> La tuotore wu-n̄aalaa chaasa chin̄ ne. Di nuu ne toba, u yie chiche han̄tolibiisin̄, aa n̄aa disinnin̄, aa n̄aa wu-liilin̄, <sup>20</sup> aa kpaare vuiaa, aa n̄aa hil wiaa, aa bere niaa, aa hihe yuosuñ, aa ken̄ yaribierin̄, a ken̄ baanin̄, a chil u dun̄duña wiaa, a ken̄ don̄o pupore, a lili don̄o harin̄, <sup>21</sup> a ken̄ hadorun̄, a nyua sinin̄ a bubugi, a golloo nyua sinin̄ vuiaa yirin̄ le. Mi laa sipaan̄ kpurise ma digilaa ne. Mi saa bira kpurise ma digilaa ne ari nialin̄ sii n̄aa wiaa deen̄ba bi jan̄ wuo juu Wia kuorii-la tuon̄. <sup>22</sup> Ama Wia Din̄-zon̄-la yie n̄aa la cho niaa ne, a ken̄ tuotorun̄, a fiela hon̄ som, a ken̄ kenyiri, a ken̄ zile, a ñin̄aa wu-zon̄on̄oo, a chin̄ la

yarida le, <sup>23</sup> a fiεε la siaa, a keŋ la titia woruŋ. Kisiŋ doŋ bira tuo si jaŋ wuo bul di η leŋ wiaa deenba. <sup>24</sup> Nii wiaa, nialiŋ si laa Kirisito wiaa dii, ba titia tuotoruŋ le ne ba suu. Ba bira bi ba tuotore wu-ŋaalaa le ka to. <sup>25</sup> Di Wia Diŋ-zoŋ-la ne hela le, u maga di la tuto u niin le ne. <sup>26</sup> Ma sí leŋe di la cho di la bibigisi la titia le, a sí leŋe di la ŋaa di la doŋsuŋ tinŋaa baaniŋ sisii, a sí yaribieriŋ keŋ doŋo le.

## 6

*Má ŋaa wu-zoŋŋoo a pi nuu-kala*

<sup>1</sup> Mi naanbiiriŋ, di ma doŋo ne juu haache le, ma nialiŋ sí to Wia Diŋ-zoŋ-la niin le, má dagu nii u si jaŋ to a miira lii u haacheba le. Má chagilu, a sí u le kpia. Ma si ŋaa nii, má beŋ ma titia nyuŋ woruŋ, di Sitaani sí wuo nyisema maa, di ma juu haache. <sup>2</sup> Di ma kuŋ ne juu wii, má peu le. Di ma ní ŋaa nii, maa to Kirisito niin ne. <sup>3</sup> Di nuu ne biina ari u ŋaa nuu ne, u bi nuu-kala ŋaa, uu nyise u titia ne. <sup>4</sup> Má leŋ di nuu-kala beŋ u titia wu-ŋaalaa le a na duu to woŋbiin ne koo u bi woŋbiin to. Duu to woŋbiin, u jaŋ wuo bigisi u titia le a tin u wu-ŋaalaa le a sí u titia kaa magise u doŋsuŋ tinŋaa, <sup>5</sup> beε wiaa nuu-kala maga duu chuŋ u titia chuga ne.

<sup>6</sup> Nii-la ba sí dage Wia niin wiaa, duu ne keŋ kuŋ-kala,

u maga duu ŋaa pi nii-la sí dagu ne.

<sup>7</sup> Ma sí ma titia nyisu. Nuu-kala bi Wia wuo moŋ. Ku-la η si duo, u titia ne η jaŋ kuŋ. <sup>8</sup> Di nuu-kala ne to u tuotore wu-ŋaalaa hariŋ, u wu-ŋaalaa le ne Wia jaŋ to a dogisu. Ama di nuu ne to Wia Diŋ-zoŋ-la niin, Wia jaŋ joŋ miisi-la si bi dere a timu. <sup>9</sup> Nii wiaa, ma sí leŋe di la lol wu-zoŋŋoo ŋaaniŋ le. Di la ne ŋaa wu-zoŋŋoo a lol aŋ nyalime, di bua-la ne yie, Wia jaŋ tinla. <sup>10</sup> Nii wiaa, di la ne wuolo, la ŋiŋaa wu-zoŋŋoo nuu-kala le, a wasa nyan la di nialiŋ kala si laa Wia wiaa dii a ŋaa kubala.

*Chagiliŋ ari Chuolaa*

<sup>11</sup> Ma na mi ŋmuŋsuŋ si barima nii. Mi titia nisiŋ ne mi kaa ŋmuŋse teniŋ deen a pipima. <sup>12</sup> Nialiŋ sí che di ba dage ba titia le ari baa to Juu tinŋaa woŋbiin, ba ní fugema di ma keru ma penee. Ba laa dii ari Kirisito suu daa-geεε nyuŋ ba wiaa ne. Ba saa jima ari ba si laa dii nii, niaa jaŋ to naasiŋ dogiseba. Ba saa bi nii cho, nii ne tii ba fugema di ma keru ma penee. <sup>13</sup> Nialiŋ titia si keru ba penee, ba bi wialiŋ Moosis fa si bile ka to. Baa che di ma keru ma penee di ba wuo bibigisi ba titia le ari ma maa to Juu tinŋaa woŋbii-la ne.

<sup>14</sup> Ama mi-na, mi jaŋ bigisi mi titia le ari la Tiina Yesu Kirisito si suu daa-geεε-la nyuŋ dunduŋa wiaa. A tin

u si suu ɲii, u nage ari la duu kala ne suba. ɲii wiaa, mi ta jia ne dunia kiaa le. Dunia kiaa ma ta jiami le. <sup>15</sup> U bi wii kene di la keru la penee koo di la bi kere. Wii-la si ɲaa siifan wii ne, di la birime a keɲ mii-falii-la.

<sup>16</sup> Nialin kala si to wiin deen, Wia jan faaba nennige a leɲ di ba hoɲ ari yarifielaa, ba di Wia niaa kala. Ba ne ɲaa Iziral tinɲaa titia Wia teen. <sup>17</sup> A lii jiniɲ a kaa mumu, nuu-kala bira simi walimu. Fufuunu-la mi si kene mi yaraa le, ba nii dagu ari mi ɲaa Yesu nuu ne.

<sup>18</sup> Mi naanbiirin, la Tiina Yesu Kirisito lahorimo le, ma jan hoɲ ari yarifielaa. Ami.

## TEN-LA PÓOL SI NMUNSA PI EFESIS NIAA

<sup>1</sup> Mi-na Póol ne nmunse tenin deen a pipi ma Wia nialin si he Efesis le a chin wialin ma si laa dii le a mu tige Kirisito Yesu le. Wia tuotorun le ne u liisemi di mi naa Kirisito Yesu nanzoo.

<sup>2</sup> La Nyimma Wia ari la Tiina Yesu Kirisito lahormo le, ma jan hon ari yarifelaa.

*Wia si to Kirisito le a pela le*

<sup>3</sup> Má len di la denne Wia. U ne naa la Tiina Yesu Kirisito Nyimma. U to Kirisito le ne a pela le wii-na kala le u Din-zon-la dolun le. Wii-na kala u si kaa pela le lii u jan ne.

<sup>4</sup> U to Kirisito le a liisela ne, ka u-na suomo naa dunia. U liisela di la wuo ken tuo-pula u sipaan, di ba sí cheerin kala jonjo pila. <sup>5</sup> Ka di u-na naa dunia, u laa sipaan biina jin ari u jan to Yesu Kirisito le ne a len di la naa u biirin. U si chola nii, nii ne tii u fa biine nii. U tuotorun le ne u naa nii. <sup>6</sup> U naa nii di la wuo dennu, a len di u yirin yire, a tin u si fála nennige. U Bii-schoolun le ne u to a pela le. <sup>7</sup> La si mere Kirisito le nii, u jon u chalin jaase a tin la wu-bonhon chimin, di Wia jon la wu-bonhon chela. Wia zile yuga ne kinken la teen. <sup>8</sup> Nii ne tii u naa nii pila. U

fála nennige. <sup>9</sup> Wia pila wu-jimii-na kala di la wuo jin wialin kala u si biina ari u jan naa pila bubuon. Wiaa deenba fa faa ne. Nu-kala fa biba jin. Ka u leele len la jin wialin. Kirisito le ne u to a naa nii. <sup>10</sup> U naa nii di buala ne yie, duu to Kirisito le a ken kun-kala he donjo le ne, kialin si he Wia-jan ari kialin si he tinteen kala.

<sup>11</sup> U to Kirisito ma le ne a jon kiaa billa le di la tiiba. Faafaa kala ne u biine nii. U yie naa wii-kala u tuotorun le ne. <sup>12</sup> U naa nii di la nialin si laa sipaan jon la yielaa he Kirisito le, di la wuo len di u yirin yire. <sup>13</sup> Ma nialin si bi juu tinnaa naa, ma ma nii Wia wialin si naa wutitiiba ne. Yesu wu-zom-la wiaa ne nii. Ba ne wuo laala ta. Ma ma laa u wiaa dii ne. Ma si laa u wiaa dii nii, Wia jon u Din-zon-la hema le ne, kula u fa si si u jan jonjo pi nialin si laa u wiaa dii. U magilin ne nii. <sup>14</sup> Wia Din-zon-la u si jonjo hela le sene daga ari wutitii, maachie la jan dii ku-dan-dan-la Wia si naa billa le. Nla naa di la wuo len duu yirin yire ne.

*Pool chuole Wia a pi Efesis niaa*

<sup>15</sup> Mi nii nii ma si laa la Tiina Yesu wiaa dii ari nii ma si cho Wia niaa maa. <sup>16</sup> Nii wiaa ne tii, di mi ní chuole Wia-na kala, mi bi ma wiaa yu. Mi yie liisi ma wiaa ma ne a chuole Wia pipima buana kala. <sup>17</sup> Mi yie sul Wia, la Tiina Yesu Kirisito Nyimma,

nii-la si keŋ yiriŋ maa, duu pima wu-jimiŋ, a bira keŋ u titia ma kaa dagema u Diŋ-zoŋ-la doluŋ ɛ di ma wuo jimu. <sup>18</sup> Wia si yirema di ma wuo juu u kuorii-la tuoŋ nii, mii sulu duu wuo pulle ma tuoŋ di ma wuo jin ku-la ma sii yielu nagisiŋ, a bira jin kialiŋ ma di Wia niaa kala si jaŋ dii ba zomuŋ. <sup>19</sup> Mi biraa sulu di u wuo leŋ di ma jin u doluŋ si yuga mage nii, nialiŋ si laa u wiaa dii teen. U yie to u dol-bal-la ɛ ne a tin u tinŋinaa. <sup>20</sup> Dola titia ne u kaa chise Kirisito suuŋ ɛ a leŋ u hoŋ Wia seme Wia-jaŋ ɛ, ni-duoŋ di-hoŋuŋ. <sup>21</sup> U ne kii nuu-kala si keŋ doluŋ a biben niaa dunia deen ɛ. U ne keŋ yiriŋ a kii nuu-na kala si keŋ yiriŋ dunia deen ɛ ari dunia-la si jaŋ bira ko ɛ. <sup>22</sup> Wia joŋ kuŋ-kuŋ-kala doluŋ a he Kirisito nisiŋ ɛ ne, a bira leŋ u ŋaa nialiŋ si laa Yesu wiaa dii aa hilimi kuhian maa. <sup>23</sup> Nialiŋ si laa Yesu wiaa dii aa hilimi ne ŋaa Yesu yaraa. Kirisito ne bira ŋaa nii-la si joŋ u doluŋ he dunia lee-na kala.

## 2

*Wia to Kirisito ɛ a leŋ la keŋ miisiŋ*

<sup>1</sup> Ma fa naga ari ma suba ne a tin ma wu-boŋhoŋo ari ma haacheba wiaa. <sup>2</sup> Ma faa ŋaa wu-boŋhoŋo ne a ŋinaa ma tuotore wiaa, buala ɛ ma fa sii to Sitaani dunia deen ɛ. Sitaani ne leŋe nialiŋ si bi Wia niin

wiaa ka to ŋinaa wu-boŋhoŋo. <sup>3</sup> La kala kala ne faa to la tuotore wu-ŋaalaa hariŋ a ŋinaa wu-lorunuŋ, a bira bibiine wu-boŋhoŋo. La fa sii ŋaa wiaa deenba, Wia fa na baaniŋ ne la nyuŋ, ari u fa si na baaniŋ dunia niaa nyuŋ nii. <sup>4</sup> Ama Wia chola ne kinkeŋ a fifala nennige, nii ne tii u leŋ la di Kirisito kala keŋ miisiŋ. [U si fala nennige ne tii u laala ta.] <sup>5</sup> Buala ɛ la fa si ŋaa haacheba ne a fa bi miisiŋ kene a tin la haacheba-la wiaa, u laala ta. A tin u si chola ne tii u ŋaa nii. <sup>6</sup> U bira chise la di Kirisito Yesu kala suuŋ ɛ ne, a leŋ di la di Kirisito Yesu kala ŋaa kubala a hoŋ Wia-jaŋ ɛ. <sup>7</sup> U to Kirisito ɛ ne a leŋ la keŋ miisiŋ, duu wuo dagela maachie nii u si chola ari nii u si faasa fala nennige. <sup>8</sup> Wia lahirimɔ ne tii u laama ta, a tin ma si laa u wiaa dii. U bi naga ma titia si keŋ doluŋ ne tii Wia laama ta, u ŋaa nii pima chogita ne. <sup>9</sup> U bi naga ma tinŋin-zoŋhoŋo wiaa ne tii u laama ta. Nii wiaa nuu-kala bi maga duu bibigisi u titia ɛ. <sup>10</sup> Wia ne ŋaala. U ŋaala di la to Kirisito Yesu ɛ ne a ŋaa wu-zoŋhoŋo. U ŋaa wu-zoŋhoŋo deenba billa ɛ di la ŋinaaba.

*Nuhuobiinee kala ŋaa kubala ne Kirisito teen*

<sup>11</sup> Ma nialiŋ si bi Juu tinŋaa ŋaa, ma si yu ari Juu timma-la fa si keri ba penee



ka yire ma nialin si kenj pen-purunj ne. Nialin si keriba penee fa keriba yaraa seme donjo ne a ta. <sup>12</sup> Ma bira si yu ari bua kubala le ma fa bi Kirisito jin. Ma di Iziral tinjaa fa bi kubala naa. Wialin Wia fa si bula ari u janj naa pi u niaa, ma-na fa bi janj naba. Ma fa bi kunj-kala ka yiele, ma bira bi Wia ma kene dunia le. <sup>13</sup> Ma di Wia pege fa bolie ne, ama leele Kirisito jonj u chalin jaase la wiaa ne, di la di Wia kpage donjo. <sup>14</sup> U ne kenj nialin si naa Juu tinjaa ari nialin kala si bi Juu tinjaa naa he donjo le ba sinj a ku naa kubala. U ne kenjla he donjo le la bira bi dindomoo naa. <sup>15</sup> U si suba nii, u leje wialin Moosis fa si bile di niaa tuto, ba bira bi dolunj kene. U naa nii di nialin si naa Juu tinjaa ari nialin si bi Juu tinjaa naa kala tou le ne a wuo sinj, a naa kubala maa. U ne leje ba sinj. <sup>16</sup> Kirisito si suu daageese nyunj nii, u leje ba dindonnu-la dere ne. U si naa nii, u leje ba kala balia tou le a naa kubala ne, a kenj ba di Wia he donjo le ba sinj. <sup>17</sup> Kirisito ne ko a bul Wia wu-zomoo-la a pi nialin pege fa si bolie ari Wia, ari nialin ma fa si kpage Wia kala, a bula piba di ba sinj a kenj niibala. <sup>18</sup> La kala kenj u Din-zonj-la ne. U dolunj le ne la kala janj to a mu Wia teenj.

<sup>19</sup> Ma saa bira bi nuhuoora naa, a bi duura bibaare maa. Ma di Wia niaa kala naa

kubala ne a he Wia dia le. <sup>20</sup> Ma nage dia-la Wia si saa ne. Wia nanzooaba ari nialin sii bul wiaa, Wia Din-zonj-ladolunj le, ba ne naa dia-lagejine. Kirisito Yesu titia ne naa tiebii-duo-la ba si kaa bil dia-la gejine. <sup>21</sup> U ne chage dia-la kala bil u ku naa Wia-dia, la Tiina Yesu diala. <sup>22</sup> Ma di Kirisito si naa kubala nii, ma di Wia niaa donsunj kala ne u kaa saa Wia-dia deenj, dime ne Wia lenj u Din-zonj-la jujuu.

### 3

*Pool bul Wia wu-zomoo-la a pi nialin si bi Juu tinjaa naa*

<sup>1</sup> Ba kenj mi-na Pool to dia a tinj Kirisito Yesu wiaa ne. Mi bira he sarika le a tinj ma ma nialin si bi Juu tinjaa naa wiaa ne. Nii wiaa ne tii mi yie sul Wia pipima. <sup>2</sup> Mi jima ari ma ma nii nii Wia si fami nennige a liisemi di mi tinj tintiminj deenj ma teenj. <sup>3</sup> Tenj-la mi fa si njunsa pipima mi bul wiaa mua, a dage nii Wia si kenj wialin fa si faa a kaa dagemi. <sup>4</sup> Di ma ne karime tenj-la, ma janj naa nii Wia si leje mi jinj wialin fa si faa a tige Kirisito le. <sup>5</sup> Wia fa bi leje di nuu-kala jinj wiaa deenba, ama leele u jonjo dage u nanzooaba-la si kenj tuo-pula, ari nialin sii bul wiaa, Wia Din-zonj-ladolunj le. U leje u Din-zonj-la ne jonj wialin dageba. <sup>6</sup> Wialin ne nla: Wia to Kirisito Yesu wu-zomoo-la le ne a lenj Juu tinjaa ari nialin ma si bi Juu tinjaa naa kala

keŋ toruŋ kialinŋ Wia si ŋaa billa le. Lele ba kala ŋaa Kirisito yaraa seme doŋo ne a tinŋ Wia wu-zomɔ-la wiaa. Ba ma jaŋ pe dii kialinŋ Wia si to Kirisito Yesu le a bul di u jaŋ joŋo pila.

7 Wia leŋe mi ŋaa u tinŋinnu ne, di mi bul Yesu wu-zomɔ-la a pi niaa. U lahorimɔ le ne u dii zile mi le a joŋ u doluŋ pimi mi kaa titinŋ. 8 Wia niaa tuɔŋ kala, mi ne ŋaa ba ku-bie, aŋ ka u fami nennige a liisemi di mi bul Wia wiaa a pi nialinŋ si bi Juu tinŋŋaa ŋaa, di ba wuo jinŋ ari Kirisito keŋ kiaa ne woruŋ. Nuu-kala bi ba niinŋ wuo jinŋ. 9 Wia ne nii-la si ta kuŋ-kala. U ne leŋe mi bul wiaa deenba kala a pi niaa, di ba wuo jinŋ wialinŋ u sii che duu ŋaa a mu tige kialinŋ kala u si joŋo faa faafa kala le. 10 Wia ka che duu to nialinŋ si laa Yesu wiaa dii aa hilimi le, a leŋ Wia bii-zoŋŋo ari Wia bii-boŋŋo kala si he wia nyuŋ le ku jinŋ Wia si keŋ wu-jiminŋ nii kinkeŋ. 11 Wia fa biine faafa kala ne duu ŋaa wiaa deenba. Ama lele u to la Tiina Yesu Kirisito le ne a leŋ di wialinŋ sene ku ŋaa wutitii. 12 La si laa u wiaa dii nii, la bi jaŋ fifa fawulluŋ. La jaŋ keŋ nyuduɔŋ a mu u sipaanŋ. 13 Mi saa sulma di ma si leŋe di ma tuɔŋ chei a tinŋ mi sii na heeŋ nii wiaa. Mi sii na hee-la jaŋ leŋ di ma laa yirinŋ.

*Pool bira sul Wia a pi Efesis niaa*

14 Di mi ne biine wialinŋ Wia si ŋaa pila, mi yie tuu kpirimi la Nyimma Wia sipaanŋ ne. 15 U ne he doho kala yirinŋ, kialinŋ kala si he Wia-jaŋ ari kialinŋ kala si he tinŋteenŋ le. 16 U si keŋ yirinŋ kinkeŋ nii, mii sulu duu leŋ di u Din-zoŋ-la pima doluŋ ma tuɔsaa le. 17 Mi bira sulu di ma wuo laa Kirisito wiaa dii woruŋ, duu wuo he ma tuɔsaa le a leŋ di ma chinŋ kpanŋ kpanŋ a cho niaa. 18 Mi bira sulu duu pima doluŋ, di ma di u niaa kala wuo jinŋ nii Kirisito si faasa choma kinkeŋ kinkeŋ, di ma ku jinŋ chonu-la jalinŋ ari u luŋuŋ ari u duomuŋ kala. 19 Ama nuu-kala bi jaŋ wuo jinŋ Kirisito chonu-la si mage nii. U ne kii wialinŋ kala la si wuo jinŋ. Mii sul Wia duu leŋ di ma ma keŋ ku-zomɔ-la kala u si kene.

20 U dol-la u si kaa titinŋla le, mii sulu duu leŋ di dolla faasa titinŋ la tuɔsaa le. U ne jaŋ wuo ŋaa kiaa yuga kii kialinŋ kala la si sulu chiche ari wialinŋ kala la sii biinu. 21 Ma leŋ di la nialinŋ kala si laa Yesu wiaa dii aa hilimi to Kirisito Yesu le, a leŋ di u yirinŋ yire a lii lele a kaa mu wuu.

## 4

*Kirisito pila doluŋ di la ŋaa kubala u teenŋ*

1 Ba keŋ mi-na Pool to dia a tinŋ la Tiina Yesu wiaa. Ma nialinŋ Wia si yira, mii sulma di ma leŋ di ma wu-ŋaalaa joŋ wonbiinŋ ari Wia sii che

ηii. <sup>2</sup> Má lej di ma siaa tuu tinteen, a pe keη ma titia muuri, a keη kenyiri, a jon wiaa chiche dɔŋɔ, a tin ma si cho dɔŋɔ wiaa. Má lej ma ηaa kubala <sup>3</sup> Wia Diη-zɔŋ-la le. Ma sí leŋe di kuη-kala keηma pɔre dɔŋɔ le. Má keη dɔŋɔ woruη a fiela hɔŋ som. <sup>4</sup> A tin Kirisito wiaa, la kala ηaa kubala ne. Wia Diη-zɔŋ-la si hela le, ma ηaa kubala ne. Wia si yirela ηii, la kala yiele wu-bala ne. <sup>5</sup> La kala Tiina ηaa kubala ne. Wialin la si laa dii ma ηaa kubala ne. Wii-chuoɓe lii-bala ne la kala fo. <sup>6</sup> La kala Wia ari la kala Nyimma ηaa kubala ne. U ne kii kuη-kuη kala. U he kuη-kala le ne a titin, a he ma ma tuɔsaa le. <sup>7</sup> Kirisito pela kuη-kala le ne a jon kiaa pila ari u síi che ηii. <sup>8</sup> Ba ηmuηse Wia tenin seme dɔŋɔ a bul,

“U si yuo dii u dindɔŋɔɔ dere, u jil Wia-jaη aη jon doluη pi niaa di ba kaa titin.”

<sup>9</sup> Di la ne si ari u jil Wia-jaη ne, ηii daga ari u laa sipaη lii Wia-jaη ne a ku tuu tinteen. <sup>10</sup> Nii-la titia si ku tuu tinteen, u ne bira jil Wia-jaη ηii a kieli lere-la kala si he wia nyuη, duu keη kuη-na kala doluη. <sup>11</sup> Dol-la u si joŋo pi niaa, u ne ηla: U pi niaa dɔŋsun doluη di ba wuo ηaa Yesu nanɔɔba, a lej dɔŋsun ma ba wuo bubul wiaa, Wia Diη-zɔŋ-la doluη le, a lej dɔŋsun maa di ba wuo gollo bubul Wia wiaa a pi niaa.

Dɔŋsun ma biben nialin si laa Yesu wiaa dii, ka dɔŋsun ma didage nialin si laa Yesu wiaa dii. <sup>12</sup> U pila doluη deen di Wia niaa wuo kaa tin Wia tintinηaa, a wuo pe nialin si laa Yesu wiaa dii aa hilimi le di ba waa wialin ba si laa dii Kirisito teen. <sup>13</sup> U pela le ηii a kaa mu yi bua-la le la kala si jaη wuo ku chin wialin la si laa dii le, a wuo ku jin Wia Bie si nage ηii, a ku ηaa ni-duoru Wia wiaa le, a wuo ku nage Kirisito si nage ηii wii-kala le. <sup>14</sup> Nii-na la bira bi jaη ηaa hanbiisi Wia wiaa le. La bi jaη mu sipaη aη miire hariη maa a tin wu-wogo-la la si nia a tige Wia wiaa le. La bi jaη to nialin síi nyia wiaa aη pe nyinyise niaa, di ba jon wialin ba si laa dii ta. <sup>15</sup> Ama u maga di la cho dɔŋɔ a bul wutitii bua-na kala. Di la ne ηaa ηii, la jaη wuo waa Wia wiaa le a ku nage Kirisito si nage ηii. Nialin si laa Yesu wiaa dii aa hilimi nage nuhuobiine nanɔaasin ne. Kirisito ne ηaa nyuη. <sup>16</sup> U si ηaa la kala nyuη ηii, di nanɔaasi-la kala ne mere dɔŋɔ le a titin ba tintinηaa woruη, yara-la jaη waa. La wasa keη yarida aa cho dɔŋɔ woruη.

*Mii-falii-la la si kene Kirisito teen*

<sup>17</sup> Wia doluη le mii che di mi bul wii ne pima ari siiffesin. Wialin nialin si bi Wia jin síi ηaa aη bibiine, ba ηaa wu-peiba ne. Ma-na bira sí wialin ηaa. <sup>18</sup> Birimin to ba wu-jimin ne. Ba bi

janj wuo na miisi-la Wia si jonjo pi niaa, bæe wiaa ba bi wii-kala jin, an kenj tuo-heenj maa. <sup>19</sup> Ba jonj hiisinj chomɔ nyua ne, an jonj ba titia he wu-liilinj njaaninj le, aa hihienɛ di ba gollo njaa disinj-na kala. <sup>20</sup> Nii dee Kirisito dagema. <sup>21</sup> Ma nii Yesu wiaa ne. Ba dagema u wiaa ma ne. Wialinj kala saa njaa wutitiiba ne. <sup>22</sup> Ma fa si nage nii bunbun-la, má jonj ta. Ba fa nyisema a cheima ne. <sup>23</sup> Má lej di Wia kenj ma tuɔbiinaa kala birime di ba njaa ku-falia. <sup>24</sup> Ma tuɔbiinj-falia-la nage Wia si nage nii ne. Wia ne jonjo pima. Nii wiaa, má to ma tuɔbiinaa deenba harinj, di ma sene kenj tuo-pula Wia sipaanj a sí disinninj ma kenj.

<sup>25</sup> Nii wiaa, ma bira sí wiaa nyinyia. Má lej di nuu-kala bul wutitii a pi u dɔɔɔ tiina, bæe wiaa la kala nage nanndaasinj ne a ku mere dɔɔɔ le a njaa kubala. <sup>26</sup> Di ma ne na baaninj, ma sí leɔe di ma baanj-la lej di ma juu haache le. Ma bira sí leɔe di ma na baaninj di wia tuu juu. <sup>27</sup> Ma sí leɔe di Sitaani na wonjbiinj a nyisema di ma njaa haache. <sup>28</sup> Nii-la kala fa síi gaa, u maga duu lej gaarinj, an kenj u nisaa faasa tinj tintinj-zɔɔɔɔ a wuo na ku-la kala u síi che u titia le, anj wuo pe summoo ma le. <sup>29</sup> Ma sí leɔe di wu-bɔɔɔ kala lii ma niinj le. Má bul wu-zɔɔɔ-la síi juu niaa digilaa bua-la le si maga, a lej di wialinj ma síi bul pe nialinj le

síi jegili wialinj. <sup>30</sup> Ma sí leɔe di Wia Din-zɔɔɔ-la tuɔɔɔ chei. U ne Wia jonjo hema le. U njaa magilinj ma le a dage ari Wia janj laama ta tapulii-la Kirisito sí janj miira kɔ. <sup>31</sup> Má jonj wu-bɔɔɔɔ njaaninj kala ta. Di nuu ne njaa wii juuma le, ma sí jonjo he ma tuɔɔɔ le. Ma sí teru, ma sí baaninj na. Ma sí gonj njaa niaa nyunj. Ma sí niaa yirinj chichei. Ma bira sí wu-bɔɔɔ kala kala njaa. <sup>32</sup> Ama má kenj zile dɔɔɔ le, a fifá dɔɔɔ nennige. Má jonj wiaa chiche dɔɔɔ, ari Wia si to Kirisito le a jonj ma wu-bɔɔɔɔ kala chema nii.

## 5

*Ma he Kirisito pulumunj tuɔɔɔ*

<sup>1</sup> Ma njaa Wia bii-chooloo ne. Nii wiaa, má chichesí Wia wu-ɔaala. <sup>2</sup> Má cho dɔɔɔ ari Kirisito si chola nii a suu la wiaa. U jonj u titia a pi Wia. Ba kpuu ari ba si yie kpu pusunj a nyiga pi Wia nii, u suɔra sinj.

<sup>3</sup> Ma si njaa Wia niaa nii, u maga di ma liise ma titia ha-chɔrunj ari ba-chɔrunj wu-ɔaala le, a bira liise ma titia disinninj kala le, a sí niaa kiaa lilaa. <sup>4</sup> Ma sí wu-liilinj ari wu-tɔɔɔɔɔ ma bubul. Ma sí sisii-tɔɔɔɔɔ ma sii. U bi maga di Wia niaa njinaa wiaa deenba. Ama u maga di ma lulɔle Wia ne bua-na kala le. <sup>5</sup> U maga di ma jin worunj, ari nialinj síi njaa ha-chɔrunj ari ba-chɔrunj wiaa ari nialinj síi njaa disinninj,

ari nialinj si keŋ niaa kiaa lilaa, niaa deenba kala bi jaŋ dii kialinj Wia si ŋaa bil u niaa le, u-na Wia ari Kirisito kuorii-la tuonj. <sup>6</sup> Ma sí leŋe di nuu-kala bul wu-toonuŋ a nyisema. Wiaa deenba ne leŋe Wia baaninj sisii nialinj si bi u niinj ka to nyuŋ. <sup>7</sup> Nii wiaa, má liise ma titia ni-yiri deenba le. <sup>8</sup> Bua kubala le ma ma fa he biriminj tuonj ne, ama la Tiina Yesu leŋe ma leele he pulumuŋ tuonj ne. Nii wiaa, má leŋ di ma wu-ŋaalaa nage nialinj si he pulumuŋ tuonj sí ŋaa ŋii. <sup>9</sup> Pulumuŋ tuonj wu-ŋaalaa zomɔ ne a pe ŋaa wutitiiba, aa to Wia wonbiinj. <sup>10</sup> U maga di ma gunne wialinj ma si jaŋ ŋaa di la Tiina Yesu tuonj tore ne. <sup>11</sup> Biriminj tuonj wu-ŋaalaa-la niaa sí ŋaa, má liise ma titia ba le. Niaa doŋsuŋ he biriminj tuonj aa ŋaa wu-bonjɔɔ ne. Ama má joŋ ba bubuonj ta a leŋ niaa jinj wialinj ba sí ŋaa bi zonj. <sup>12</sup> U paala keŋ hiisinj ne di la bul wialinj ba si luɔraa ŋaa. <sup>13</sup> Kuŋ-na kala ne he pulumuŋ tuonj, ba yie nau ne. Kuŋ-kala sí chaane keŋ pulumuŋ ne. <sup>14</sup> Nii wiaa ne tii ba bul, “Ma nialinj si piŋ doŋ a nage ma suba, má sí doŋ le. Kirisito jaŋ chaana hema le.”

<sup>15</sup> Nii wiaa, má pɔ ma titia le ari ma wu-ŋaalaa le. Ma sí ni-yaaraa nagu. Má ŋaa wiaa a nage nialinj si keŋ wu-jiminj. <sup>16</sup> Tapulaa deenba niaa ŋaa wu-bonjɔɔ ne. Nii wiaa bua-na kala le di ma

ne na wonbiinj, má ŋaa wu-zonjɔɔ aa bul wu-zonjɔɔ. <sup>17</sup> Ma sí yaaru, u maga di ma jinj wii-la sí tore la Tiina Wia tuonj aa ŋaaba. <sup>18</sup> Ma sí sininj nyua bubugi. Di niaa ne nyua sininj bugi, ba yie ŋiŋaa wu-liilinj ne. U jaŋ cheima. Ama má leŋ di Wia Diŋ-zonj-la hema le a titinj. <sup>19</sup> Di ma ne ku hilimi a bul wiaa pipi doŋɔ, má yiyii yiilaa ba sí yire Saams a didenne Wia, a yii yiila-la doŋsuŋ maa sí dage Kirisito wiaa. Ma tuonj ma le má yii yiilaa a didenne la Tiina Kirisito. <sup>20</sup> Bua-na kala le ari wii-na kala le, má lolle la Nyimma Wia. Má to la Tiina Yesu Kirisito le a ŋaa ŋii.

*Haalaa ari baalaa mele si maga duu nage ŋii*

<sup>21</sup> La sí fá la Tiina Kirisito wiaa ŋii, u maga di la tuto doŋɔba niinj wiaa ne. <sup>22</sup> Haalaa, má tuto ma balaba niinj ari ma sí to Kirisito ŋii. <sup>23</sup> Haalaa maga di ba ŋaa ŋii ne, beɛ wiaa baalaa ne keŋ doluŋ haalaa nyuŋ ari Kirisito si keŋ doluŋ ŋii nialinj si laa u wiaa dii aa hilimi nyuŋ, ka ba ŋaa u yaraa. U ne saa bira ŋaa ba Laataara. <sup>24</sup> Nialinj si laa Yesu wiaa dii aa hilimi sí to Kirisito niinj wiaa ŋii, ŋii titia ne haalaa ma maga di ba tuto ba balaba niinj wiaa. <sup>25</sup> Baalaa, má cho ma haalaa, ari Kirisito si cho nialinj si laa Wia wiaa dii aa hilimi ŋii, u suu ba wiaa, <sup>26</sup> a piise ba disinninj ta, a fo ba wu-bonjɔɔ kala ma ta ari liinj, a

tiŋ Wia niŋ wialin ba si nia wiaa. <sup>27</sup> U ŋaa ŋii di nialin si laa u wiaa dii aa hilimi, di ba wuo zɔŋ kinkeŋ, a tutul u teen, a sí wu-bɔŋ kala keŋ muapilii maa, a bira sí ŋmaamu muapilii maa, a sí wu-bɔŋ kala yiri ma ŋaa, a ŋaa nialin si bi disinnin keŋ Wia sipaan a sí wii-kala ŋaa chei. <sup>28</sup> Yesu si cho nialin si laa u wiaa dii aa hilimi ŋii, ŋii titia ne u maga di baalaa cho ba haalaa, ari ba si cho ba titia ŋii. Baal-la kala si cho u haala, u cho u titia ne. <sup>29</sup> Nuu-kala bi u titia bere, ama u cho u titia a biben u titia nyun worun, ari Kirisito sii ben nialin si laa u wiaa dii aa hilimi nyun ŋii. <sup>30</sup> Kirisito yie ŋaa ŋii, bee wiaa la ma ŋaa u nanndaasin ne a mere u yaraa le. <sup>31</sup> Wiin deen wiaa ne tii baala yie len u nyimma ari u naan, ka ba di u haala mere doŋo le a keŋ chal-bala. <sup>32</sup> Wu-kpunkpere deen ŋaa wu-bal ne a faa. Kirisito ari nialin si laa u wiaa dii aa hilimi wiaa ne mi bubul ŋii. <sup>33</sup> U saa nage ŋii ne ma ma le. U maga di nuu-kala cho u haala ari u si cho u titia ŋii, u maga di haala ma pi u bala jirima ne.

## 6

*Pɔɔl bul hanbiisin ari ba nyimmaba ari ba naanba wiaa*

<sup>1</sup> Hanbiisin, u maga di ma tuto ma nyimmaba ari ma naanba niŋ. Nii ní to Wia wonbiin. <sup>2</sup> Má zizil ma nyimmaba ari ma naanba

ari ba si bul ŋii Wia tenin tuon. Wialin Wia si dage niaa di ba tuto, ba tuon deen ne keŋ time. <sup>3</sup> Di ma ní zil ma naanba ari ma nyimmaba, Wia jan pema le di ma na di-zomun, a keŋ miidudun dunia deen le. <sup>4</sup> Ma nyimmaba, ma sí ma biirin walimu kinkeŋ di ba baanin sisii ma nyun. Má benba a dageba worun, duu nage ari Wia titia ne dageba wonbiin ba tuto.

*Pɔɔl bul yosun ari ba tinŋaa wiaa*

<sup>5</sup> Ma yosun, má tuto nialin si tiima niŋ dunia deen le. Má zizilba a fifába. Má keŋ wutitii a tutoba ari Kirisito ne ma tuto. <sup>6</sup> Má si leŋe di ma tinŋaa benba an ka ma-na titin worun, a sí che di ma tin di ba besema le. Ama má tin ari ma timaa pi Kirisito ne a keŋ tuɔ-bala, aa ŋaa wialin Wia si cho. <sup>7</sup> Má keŋ tuɔɔrun titin ma tinŋaa, ari ma tima pipi Kirisito ne, nuhuobiine dee ma timaa pa. <sup>8</sup> Ma jin di nuu ne tin tinŋ-zon, la Tiina Wia jan jon ku-zon a timu, di tiina ŋaa yomo koo u tii u titia ne. <sup>9</sup> Ma nialin ma si keŋ yosun, má keŋba worun, ma síba walimu. Ma jin ari ma kala tiina ŋaa kubala ne a he Wia-jan. La kala ŋaa kubala ne u teen. U bila kaa pore.

*Kialin Wia si joŋo pila di la kaa yuo Sitaani*

<sup>10</sup> Wii-la mi síi che mi bul, u wu-kaanin ne ŋla: Mii

che di ma keŋ doluŋ la Tiina Wia teenŋ a wasa keŋu woruŋ. U jaŋ wuo pima doluŋ deenŋ. <sup>11</sup> Sitaani keŋ wu-jimiŋ kinkeŋ aa nyise niaa. Ama má keŋ ma titia woruŋ a yuo laa ma titia Sitaani teenŋ. Ma nage laali-yuoroo ne. Má laale laali-yuori genni-la kala Wia si joŋo pima. <sup>12</sup> Ama la bi naga nialiŋ sí yuo nuhuobiinee. Laa yuo Sitaani ari u haritooroo ne, ari kuŋkala si keŋ doluŋ nialiŋ si he birimiŋ tuŋ teenŋ. Dunia deenŋ ari dol-bomŋ-la kala si he wia nyuŋ, ba ne laa yuo. <sup>13</sup> Nii wiaa, má laale laali-yuori kias Wia si joŋo pima, di tapulii-la wu-bŋŋŋ sí che di ba ŋaama le, di ma wuo ŋaa siri a china gberɛ. <sup>14</sup> Má chinŋ kpaŋ kpaŋ, má leŋ di wutiti-la ma si nia nage ma laali-yuori damere a vŋŋ ma tiŋa le, a leŋ di tuŋ-pula nage ma hŋŋ-geriŋ a tŋŋ ma hariŋ ari ma sipaŋ kala, <sup>15</sup> a leŋ di Yesu wu-zomŋ-la ŋaa ma laali-yuori neŋteŋŋeɛ. Yesu wu-zomŋ-la pe niaa le ba hŋŋ ari yarifiɛlaa. <sup>16</sup> U nii hariŋ le ne má leŋ di ma yarida dol a nage hŋŋ-la laali-yuoroo si joŋo kere ba boye. Di ma ne ŋaa nii, ma jaŋ wuo kere laa ma diŋdŋŋ heŋŋeɛ kala u si joŋo a yuoma. Heŋŋeɛ deenba bieru a nage nyiniŋ sí bieru nii ne. <sup>17</sup> Wia si laama ta nii, u maga duu nage nyuŋ-chuulo ne di ma joŋo chu, aŋ joŋ tokobii-la

si he Wia Diŋ-zŋŋ-la teenŋ a kori a yuo laaliŋ. Tokobii-la ne ŋaa Wia wiaa. <sup>18</sup> Má leŋ di Wia Diŋ-zŋŋ-la pima doluŋ di ma chuŋle Wia buana kala le a sulu wii-wii-kala. Ma sí ŋaa nii, má pŋŋ woruŋ a sí doŋ diegu, aŋ pese, aa chuŋle Wia pipi Wia niaa maa. <sup>19</sup> Má sul Wia pimi maa di Wia pimi nyu-duŋŋ, a wuo dagemi nii mi si jaŋ tŋŋ a bul Yesu wu-zomŋ-la fa si faa a pi niaa. <sup>20</sup> Mi sí bul Kirisito wu-zomŋ-la aa pi niaa nii, nii ne tii ba keŋmi kaa he chorumŋŋ. Má sul Wia pimi di mi wuo bul Wia wiaa ari nyu-duŋŋ, ari mi si maga di mi bul nii.

#### *Wu-kaaninŋ*

<sup>21</sup> Mii che di ma jin mi si nage nii ne, a bira jin tiŋtimii-la mi sí tiŋ. Mi naanbii-chooluŋ Tikikas si ŋaa la Tiina Yesu tiŋtinni-titi, u jaŋ bul mi wiaa kala, <sup>22</sup> di ba wuo leŋ di ma nyuŋ nyaase. Nii ne tii mi timu ma teenŋ.

<sup>23</sup> La Nyimma Wia ari la Tiina Yesu Kirisito jaŋ leŋ di la naanbiiri-la kala si laa Yesu wiaa dii hŋŋ ari yarifiɛlaa, a keŋ yarida, a cho doŋŋ. <sup>24</sup> Nialiŋ si cho la Tiina Yesu Kirisito a kaa mu deenŋ deenŋ, Wia jaŋ fá niaa deenba kala nennige.

## TEN-LA PƆƆL SI NMUNSA PI FILIPA NIAA

1 Mi-na PƆƆl ari Timoti ne nmunse teniŋ deenŋ aa pi Wia niaa kala si he Filipa le a laa Yesu Kirisito wiaa dii. La ŋaa Yesu Kirisito tintinnaa ne. 2 Laa nmunse teniŋ deenŋ a pipi nialiŋ si laa Yesu wiaa dii aa hilimi nihiasin ari nialiŋ si pe nihiasi-la le.

La Nyimma Wia ari la Tiina Yesu Kirisito laħrimo le, ma jaŋ ħoŋ ari yarifiɛlaa.

*PƆƆl chuɔɛ Wia pipi Filipa niaa*

3-4 Bua-na kala le di mi ne liisi ma wiaa, mi yie chuɔɛ Wia pipima ne. Mi yie lolu a mu tige ma wiaa ari tuɔɔruŋ ne. 5 Mi yie lolle Wia a tiŋ ŋii ma si pemi le mi bul Wia wu-zomɔ-la a pi niaa. Ma pemi le a lii tapulii-la ma si nii Wia wu-zomɔ-la a kaa ko jiniŋ. 6 Mi laa dii ari Wia si pema le ma tiŋ tintiŋ-zomɔ-la ŋii, u jaŋ pema le di ma tima mu yi tapulii-la la Tiina Yesu Kirisito si jaŋ ko. 7 Mii biine ma wiaa ne woruŋ. U ŋaa wonbii ne di mi ŋaa ŋii, beɛ wiaa Wia fa la di ma kala nennige. A tiŋ Wia wu-zomɔ-la wiaa ne ba keŋmi kaa to dia. Bua deenŋ le la kala dii dansia a mu tige Wia wu-zomɔ-la le duu ŋaa wutitii, a leŋ u chiŋ kpaŋ kpaŋ. Wiaa deenba kala le ma pemi le ne woruŋ. 8 Mii

biine ma wiaa ne woruŋ. Wia ne ŋaa mi dansia ari wiinŋ deenŋ le. Chonu-la mi si choma lii Kirisito Yesu teen ne. 9 Mii sul Wia duu leŋ di ma cho doŋɔ, di chonula wasa yuge kinkeŋ, a biraa sulu duu pima wu-jimiŋ di ma wuo jin wii-na kala ma sii ŋaa bubuɔŋ. 10 Wu-jimii-la jaŋ leŋ di ma liise wu-zoŋŋɔɔ a pi ma titia. Di ma ne ŋaa ŋii, ma jaŋ wuo liise ma titia disinniŋ le, a si wii-kala ŋaa chei a mu yi tapulii-la Kirisito si jaŋ ko. 11 Ma si keŋ tuɔ-pula Wia sipaanŋ ŋii, ma jaŋ wuo to Yesu Kirisito le a wasa ŋaa tuɔ-pul wu-ŋaalaa. Di ma ne ŋaa ŋii, niaa jaŋ denne Wia duu yirinŋ yire.

*PƆƆl si duu jaŋ joŋ u titia bil a mu tige Kirisito tintiŋŋaa wiaa*

12 Mi naanbiirinŋ, mii che di ma jin ari wialiŋ si ŋaami le leŋe wu-zomɔ-la mi sii bul wasa mu sipaanŋ ne. 13 Nialiŋ sii beŋ nialiŋ ba si kaa to dia ari nuu-kala jima ari Kirisito wiaa ne tii ba keŋmi kaa to dia. 14 Mi si he dia-la le pe la naanbiirinŋ doŋsuŋ le ba wasa chiŋ la Tiina Yesu wialiŋ ba si laa dii le woruŋ. Ba bira keŋ nyuduonŋ a bubul Wia wiaa, aŋ bi fawulluŋ ka fa.

15 Mi jima ari niaa doŋsuŋ ka bul Kirisito wiaa a pipagise ne ari yaribierinŋ, aŋ pe ŋaa yuo-heereɛ. Ama doŋsuŋ ma keŋ ba tuɔbiin-zoŋŋɔɔ a bubul Kirisito



wiaa. <sup>16</sup> Nialinj sii to ba tuɔbiinj-zɔŋŋɔɔ le a bubul Kirisito wiaa chomi ne. Ba jima ari Wia ne liisemi di mi bul u wu-zɔmɔ-la a pi niaa. <sup>17</sup> Nialinj si bul Kirisito wiaa a pipagise yie to ba titia tuɔɔrun le ne. Ba bi wutitii kenɛ. Mi si he dia le nii, ba chiche di mi na heɛŋ a yuge. <sup>18</sup> Ama mi-na teenj u bi wii-kala kenɛ. Di tuɔbiinj-zɔŋŋɔɔ ne koo di tuɔbiinj-bɔŋŋɔɔ ne ba kaa bul, mi tuɔŋ tɔɔ ne ari ba sii bul Kirisito wiaa.

<sup>19</sup> Mi tuɔŋ ma janj tɔɔ a mumu. Mi jima ari ma chuɔle Wia pipimi ne. Nii wiaa a tinj ma Wii-sula ari Yesu Kirisito Dinj-zɔŋ-la le, mi jima ba janj liisemi ta. <sup>20</sup> Wii-la mi sii che kinjkenj ari wii-la mi sii yiele ne nla: Mi bi janj kɔ di mi naa wii a mu tige tintimii-la mi sii tinj di hiisinj diimi, ama a suomi jininj a kaa mu, bua-na kala le, mi janj kenj nyu-duonj a bul Wia wiaa. Di mi ne weye koo di mi ne suba, mi janj jonj mi titia bil a mu tige Kirisito tintimii-la wiaa, duu yirinj yire. <sup>21</sup> Mi-na teenj, di mi ne kenj miisinj, mi kenu Kirisito teenj ne. Di mi ne suba maa, mi janj na nyuurunj u teenj. <sup>22</sup> Di mi ne he mi miisinj le, mi janj faasa tinj, di ni-danj nii Wia niinj wiaa. Di mi ne bira suba maa, mi janj na nyuurunj. Mi bi jinj ba kula mi si janj liise. <sup>23</sup> Mi he wiaa deenba balia pege ne. Mi fa cho ne worunj di mi sii dunia deenj le a mu Kirisito teenj. U ne kpia mi si janj

he dunia deenj le. <sup>24</sup> Ama u janj naa wu-zɔŋ a pima di mi ne he mi miisinj le. <sup>25</sup> Mi laa wiinj deenj dii ne ari mi janj he ma teenj dunia deenj le, di mi wuo pema le di ma waa a mu tige wialinj ma si laa dii le, anj pe kenj tuɔɔrun ba le. <sup>26</sup> Nii wiaa, di mi ne miira kɔ ma teenj, ma janj na wonjiinj a denne Yesu Kirisito a tinj mi wiaa.

<sup>27</sup> Má lenj di ma wu-ŋaalaa tuto Wia wu-zɔmɔ-la mi si bula pima a tige Kirisito le. Di ma ne naa nii, di mi ne he ma teenj koo di mi ne tuo, mi janj wuo nii ari ma faasa chinj ne kpanj kpanj a kenj niibala, a lenj di ma tuɔbiinaa ku pe dɔŋɔ le, a faasa he dolunj a pipe dɔŋɔ le a mu tige Wia wu-zɔmɔ-la ma si laa dii le. <sup>28</sup> Ma sí lenje di fawullunj kenjma a mu tige ma dinjɔŋŋɔɔ le. Wiinj deenj chaasa dageba ari ba janj lel, ama Wia janj laa ma-na ta. <sup>29</sup> Ma-na, Wia ne pima wonjiinj di ma laa Kirisito wiaa dii anj pe na heɛŋ a tinj u wiaa. <sup>30</sup> Laal-la ma si na di mii yuo bunjbunj, a bira nii di mi haa yuo, ma ma janj wuo yuou.

## 2

*Kirisito si kenj u titia muuri, Wia jonj yiri-balinj pu*

<sup>1</sup> Di Kirisito pema le ma miisinj le, a pema le di ma dɔŋsunj ma nyusunj nyaase, a pema le ma cho dɔŋɔ di ma tuɔsaa pinj di-bala, a lenj di Wia Dinj-zɔŋ-la he ma tuɔsaa le a titinj, a pema le di ma fifá

ma dɔŋsun tiŋŋaa nennige,  
<sup>2</sup> nii wiaa má keŋ tuɔ-bala,  
 a wasa cho dɔŋɔ, a keŋ nii-  
 bala, nii jaŋ wuo leŋ di mi  
 tuɔŋ faasa tɔre. <sup>3</sup> Wii-na  
 kala ma sí ŋaa le, ma sí  
 ma titia tuɔtɔrun to, a ma  
 sí ma titia ma le bibigisu.  
 Ama má leŋ di ma siaa fiele  
 dɔŋɔ nyuŋ, a beŋ di niaa  
 dɔŋsun yuga kiima. <sup>4</sup> Di nuu  
 ní ŋaa wii, u sí ŋaa chiche  
 duu pe u duŋduŋ le. Ama ú  
 ŋaa chiche duu pe nuu-kala  
 le ne. <sup>5</sup> Ma maga ma nage  
 nii Yesu Kirisito si naga ne  
 ma tuɔbiinaa le. <sup>6</sup> U fa keŋ  
 Wia nagisiŋ ne, ama u fa bi  
 biina duu fuge u titia duu  
 di Wia mage dɔŋɔ. <sup>7</sup> Ama  
 u titia tuɔtɔrun le, u joŋ u  
 Wia nagisiŋ ta aŋ ku tima pi  
 Wia. Ba sí lulu, u ku nage  
 nuhuobiine, <sup>8</sup> a keŋ u titia  
 muuri, a to Wia niŋ a mu yi  
 bua-la le u sí suu. Ba paala  
 kpaasu mere daa-geŋe nyuŋ  
 ne u suu. <sup>9</sup> A tiŋ wiŋ deŋ  
 le Wia chisu a kenu kaa jil  
 Wia-jaŋ, a pu yiri-la si yuga  
 kii yiri-na kala. <sup>10</sup> Nii wiaa  
 Yesu doluŋ le, kialin kala si  
 he Wia-jaŋ ari kialin si he  
 tiŋteen ari leleŋ-jaŋ, ba kala  
 jaŋ tuu kpirimi u sipaŋ a  
 chuɔlu. <sup>11</sup> Nuu-kala jaŋ suri  
 u niŋ a bul ari Yesu Kirisito  
 ne ŋaa u Tiina. Di wiŋ deŋ  
 ne ŋaa, la Nyimma Wia yiriŋ  
 jaŋ yire.

*Má chaane a nage  
 cheŋwulaa dunia le*

<sup>12</sup> Nii wiaa mi naŋbii-  
 choooloo, má tuto mi niŋ ari  
 ma fa sí to nii bua-la le mi

fa si he ma teen. Lele mi  
 tuo ma teen, ari nii kala ma  
 ha to mi niŋ. Wia laama ta  
 ne, ama má fá fawulluŋ, aŋ  
 keŋ ma titia muuri, a titin,  
 aŋ na ku-la Wia si si u jaŋ  
 joŋo pima. <sup>13</sup> Má ŋaa nii, beŋ  
 wiaa, Wia he ma teen bua-na  
 kala le a keŋma a titin ne. U  
 jaŋ ŋaa ma tuɔtɔre wii di ma  
 ní ŋaa wialin u sí che.

<sup>14</sup> Di ba ne si di ma  
 ŋaa wii, ma sí kaa lere,  
 di ma ní ŋaa, ma sí wiaa  
 gurimu. <sup>15-16</sup> Di ma ne tiŋ  
 ma tiŋtiŋŋaa woruŋ, ma jaŋ  
 ŋaa tuɔ-pul timma a sí wii-  
 kala chei. Ma jaŋ bira ŋaa  
 Wia biirin a he haache diiree  
 ari ni-bɔŋŋɔ tuɔŋ dunia  
 deŋ le. Nii wiaa, u maga  
 di ma tuto Wia niŋ wialin  
 si pima miisin, di ma wuo  
 chaane niaa deŋba tuɔŋ,  
 ari cheŋwulaa si chaane nii  
 wia nyuŋ. Di ma ne ŋaa ŋla,  
 mi jaŋ wuo beŋe mi titia le  
 a mu tige mi tiŋtimii-la kala  
 mi si tima, tapulii-la la Tiina  
 Yesu Kirisito si jaŋ kɔ. ŋla ne  
 jaŋ dage ari tiŋtimii-la kala  
 mi si tima bi pei ŋaa. <sup>17-18</sup> A  
 tiŋ ma si laa Wia wiaa dii,  
 ma nage puna-la ba si yie  
 kpu a pi Wia. Di ba paala  
 kpumi a tiŋ wu-zɔŋŋɔ ma  
 si ŋaa Wia sipaŋ, mi ŋaa  
 siri ne di mi suu. Nii leŋe  
 mi tuɔŋ tɔre ma nyuŋ nii.  
 Má leŋ ma ma tuɔŋ tɔre mi  
 nyuŋ.

*Pɔɔl bul Timoti ari  
 Epafodaatis wiaa*

<sup>19</sup> Mii yiele ari la Tiina  
 Yesu doluŋ le mi jaŋ tiŋ

Timoti duu kɔ ma teenj lɛɛɛ. Duu nɛ kɔ ma teenj aŋ miira ku bul ma wiaa pimi, mi tuɔŋ jaŋ tɔrɛ. <sup>20</sup> U dunɔŋ nɛ nii-la si chil ma wiaa ari mi ma si chil ma wiaa nii. <sup>21</sup> Niaa dɔŋsuŋ chil ba titia wiaa nɛ. Ba bi Yesu Kirisito wiaa chila. <sup>22</sup> Ma ma titia jin nii Timoti si naga nɛ. U pemi lɛ bubul Wia wu-zɔmɔ-la a nage bie si yie pɛ u nyimma lɛ ba titinj nii nɛ. <sup>23</sup> Di mi nɛ ku jin nii wialin si nage mi teenj, mi jaŋ timu duu kɔ ma teenj. <sup>24</sup> Ama mi wii-wii-kala hɛ Wia teenj nɛ. Mi jima u bi jaŋ dieni ka di mi titia kɔ ma teenj.

<sup>25</sup> Mi bee na ari u maga di mi tinj la naanbie Epafodaatis duu kɔ ma teenj nɛ. U ŋaa mi tintinni dɔŋ nɛ aŋ pɛ ŋaa mi laali-yuori dɔŋ ma. Ma nɛ timu u kɔ mi teenj a pemi lɛ ari wiila mi sii che. <sup>26</sup> U faa biine ma wiaa nɛ di u ku nama, ama u tuɔŋ cheye a tinj ma si nia ari u bi yarifielaa kɛnɛ. <sup>27</sup> Wutitii, u wiila nɛ, a fa ka mua duu suba, ama Wia fáu nennige a lenj u duori. Di Epafodaatis nɛ fa suba, mi tuɔŋ fa jaŋ faasa chei. Ama Wia fámí nennige a bi leje u suu. <sup>28</sup> Nii wiaa mi siinj faasa fiɛɛ nɛ kinkeŋ duu kɔ ma teenj nɛ, di ma nau di ma tuɔŋ bira tɔrɛ, di mi ma tuɔŋ bira tɔrɔ. <sup>29</sup> Nii wiaa, la Tiina Yesu doluŋ lɛ, má laau woruŋ ari tuɔtɔruŋ. Má pipi ni-yiri deenba jirima. <sup>30</sup> A mu tige Kirisito tintinŋaa wiaa, u jonj u miisinj bil, u fa ka mua duu suba. U ŋaa nii

duu wuo pemi lɛ, bɛɛ wiaa ma titia faa che di ma pemi lɛ nɛ aŋ bi wuo pɛ.

### 3

*Pɔɔl bi u nyuŋ jonjo hɛ wialin nuhuobiinee sii ŋaa ba yaraa lɛ*

<sup>1</sup> Mi naanbiirin, wii-la wu-kaaninj mi sii che mi bula pima nɛ ŋla: Má jujuɔɛ la Tiina Wia sipaanj. Mi laa sipaanj bul wiinj deenj nɛ pima nɛ, aŋ bira chiche di mi bul u titia ŋla. Mi bi jaŋ kɔ di mi lolɔ ari wii-la buluŋ, Wialin jaŋ pema lɛ di ma sí wu-bɔŋ kala juu.

<sup>2</sup> Má pɔ ma titia lɛ ari nialinj si ŋaa wiaa ari vahinj sii ŋaa nii, a pɔ ma titia nibɔŋ wu-ŋaalaa lɛ. Má keŋ ma titia ari nialinj si pesema lɛ di ma kerí ma penɛɛ. <sup>3</sup> La nɛ paala chaasa ŋaa nialinj si senɛ kerí ba penɛɛ, bɛɛ wiaa la-na to Wia Din-zɔŋ-la niinj lɛ nɛ aa chuɔɛ Wia. Nii wiaa, laa juɔɛ Kirisito Yesu teenj nɛ. La-na sipaa tuo wialinj niaa sii ŋaa ba yaraa lɛ. <sup>4</sup> Mi-na nɛ paala maga di mi keŋ nyu-duonj a tinj wialinj niaa sii ŋaa ba yaraa lɛ. Di nuu-kala nɛ biina ari u jaŋ wuo jonj u nyuŋ a hɛ wialinj nuhuobiinee sii ŋaa ba yaraa lɛ, mi-na jaŋ paala wuo bul ari mi kii tiina nɛ. <sup>5</sup> Ba si lulmi, tapulchorimuŋ cheeŋ nɛ ba kerí mi peninj. Mi ŋaa Iziral tiina titii nɛ, a lii Benjaminj doho. Mi naan ari mi nyimma ŋaa Hiiburu timma nɛ. Di juu

tiŋŋaa naabalima wonʒbii-la ne maa to, mi ŋaa Farisii tiina ne. <sup>6</sup> Mi faa to Juu tiŋŋaa naabalimaba wonʒbii-la ne ari siifŋesin, a to naasin dudɔgisɛ nialin si laa Yesu wiaa dii aa hilimi. Di nuhuobiine ne fa jan wuo keŋ tuɔ-pula a tin u sii to Juu tiŋŋaa naabalimaba wonʒbii-la, mi jan bul ari mi ŋaa ni-pula ne. Mi fa sii to wonʒbii-la, mi bi wii ŋaa chei. <sup>7</sup> Mi fa biina, wiaa deenba kala mi fa si to jan keŋ nyuurun, ama a tin Kirisito wiaa mi bene ba ŋaa pei ne. <sup>8</sup> Mi si ku jin mi Tiina Yesu Kirisito, mi bene ari mi tele ne wiaa deenba le. Mi chaasa jin ari u ne keŋ nyuurun a kii wiaa deenba kala mi fa sii to. A tin Yesu wiaa mi jon wii-kala yuo ta ne. Mi bene ari ba kala nage nisurun ne. Mi ŋaa nii di mi wuo na nyuurun ne Kirisito teen, an pe keŋ u tuɔ-pula-la, <sup>9</sup> di la di Kirisito kala ŋaa kubala. Tuɔ-pula-la mi si keŋe, u bi mi titia le lia, u saa bira bi wialin Moosis si ŋmunsa bil di niaa tuto ma le lia. Ama leele mi si laa Kirisito wiaa dii, nii ne tii mi keŋ tuɔ-pula u teen. Tuɔ-pula deen-na lii Wia teen ne. Wia jon pi nuu-kala si laa u wiaa dii ne. <sup>10</sup> Wii-la kala mi sii che ne ŋla, di mi jin Yesu Kirisito, a wuo jin u dol-la si lii u teen a tin u si sii suun le, a wuo na hee-la yiri u si na a suu. <sup>11</sup> Nii le ne mi ma titia jin ari mi jan suu an sii suun le.

*U maga di la he la nyun*

*kala wialin si he la sipaan*

<sup>12</sup> Wiaa deenba mi si bula, mi ha biba na deɛ, mi ha bi ni-pula ma ŋaa. Mi ha he dime ne a yuyuo di mi dii ku-la mi si jan na Yesu teen. Yesu Kirisito paala laa sipaan yuo diimi ne a tiimi. <sup>13</sup> Mi naanbiirin, mi paala biina ari mi ha bi ku-la na, ama mi jon mi nyun kala he wu-bala le ne di mi ŋaa. Mi yu wialin si he harin, an he mi dolun kala di mi na wialin si he mi sipaan. <sup>14</sup> Nii wiaa mi fa jon mi sipaan tuule ne a mumu di mi na ku-la Wia si jan to Yesu Kirisito le a jon pimi u jan le. <sup>15</sup> U maga di nialin kala si waa Kirisito wiaa le bibiine wiin deen. Di ma dɔnsun ma nii sei wii dɔŋ, Wia jan dagema wutitii-la. <sup>16</sup> Wii-la si maga di la ŋaa ne ŋla, má leŋ di la mu sipaan a tuto wialin titia la fa sii to a ku yi lele.

<sup>17</sup> Mi naanbiirin, má kala chichesii mi wu-ŋaalaa. Naabuasu-la si maga di ma tuto ne laa dagema. Nii wiaa, má tuto nialin si laa ma sipaan. <sup>18</sup> Mi laa sipaan bul wiaa pima a tige nialin dɔnsun le, an ka leele-na sii-liirin paala yuori mi siaa le ne ka mii bul. Kirisito suu daa-geɛɛ nyun ba wiaa, ama nialin wu-ŋaalaa daga ari ba bi wii-la u si ŋaa kaa titin. A tin nii wiaa ba di Kirisito ŋaa dɔndɔŋ ne. <sup>19</sup> U diderin ba jan mu juu Wia nyinin. Ba tuɔɔɛ wu-ŋaalaa le ne baa to. Ba siin yie fiɛɛ hiisi

wiaa le ne. Ba yie bibiine dunia kiaa dunɗuna wiaa ne. <sup>20</sup> Ama la-na ŋaa Wia-jaŋ niaa ne. La hono gberɛ la Tiina Yesu Kirisito duu lii Wia-jaŋ ko ne. U ne ŋaa la Laataara. <sup>21</sup> Duu ne ko, u jaŋ keŋ u dol-la a kaa birime la yaraa deenba si jaŋ pua, di ba nage u titia yara-la si bi pua. Dol-la ne u kaa biben kuŋ-kala. U jaŋ joŋ u doluŋ a ŋaa wiin deen, a joŋ kuŋ-kala a he u naasiŋ bubuon a biben.

## 4

### *Pool chagile Filipa niaa*

<sup>1</sup> Nii wiaa mi naanbiirin, mi choma ne kinkeŋ, mi yie bibiine ma wiaa ne. A tiŋ ma wiaa, mi tuon toro woruŋ, mi nyuŋ duori. Nii-na, mi naanbii-kpianaba, ma chin la Tiina hariŋ kpaŋ kpaŋ.

<sup>2</sup> La dihaalaa Yuoodia ari Sintiki, mii sulma jaŋ-jaŋ di ma siŋ a tiŋ la Tiina Yesu wiaa. <sup>3</sup> N-na mi tintinni don, mii che di ŋ pe haalaa deenba le, ka di Kilement ari mi tintinni donsuŋ kala ma pemi le di la he la doluŋ kala a mu tige Wia wu-zomola wiaa di ba mu sipaan. Niaa deenba kala yiraa ne he miisiŋ ten-la tuon Wia si bile.

<sup>4</sup> Ma juuɔɔe Wia sipaan bua-na kala. Mi jaŋ bira bula pima di ma juuɔɔe Wia sipaan. <sup>5</sup> Ma leŋ di ma siaa fiele nuu-kala teen. Ma ŋiŋaa nii, bee wiaa bua-la le la Tiina Yesu si jaŋ miira ko kpaŋ ne. <sup>6</sup> Ma si leŋe di

kuŋ-kala wiaa wiwalimema, ama di ma nii chuole Wia, ma sulu a chiche ku-la kala ma sii che, an pe lollu. <sup>7</sup> Di ma nii ŋaa ŋla, Wia jaŋ pima yarifielaa. Yarifiela-la jaŋ leŋ di ma tuon ari ma tuobiinaa kala pin di-bala, Yesu Kirisito doluŋ le.

<sup>8</sup> Mi naanbiirin, wii-la diderin ne ŋla: Ma ŋiŋaa wialin si ŋaa wutitiiba, wialin si keŋ yirin, wialin sii to wonbiin, wialin si bi wii-wii-kala kene, wialin si dage di ma cho niaa, ari wialin si zomola niaa sipaan. Ma joŋ ma nyuŋ kala he wu-zonɔɔ ŋaaniŋ le, aa ŋaa wiaa di niaa bibesema le. <sup>9</sup> Wialin kala mi si bula pima, ari wialin kala mi si dagema, ari wialin kala ma si nia di mii bul, ari wialin kala ma si gunna mi teen, ma keŋba kaa tiŋ tintiŋaa. Di ma ne ŋaa nii, Wia-la sii pi niaa yarifielaa jaŋ leŋ di ma hon ari yarifielaa.

### *Pool lolle Filipa niaa ari ba si peu le nii*

<sup>10</sup> Mii juuɔɔe ne kinkeŋ Wia teen, bee wiaa leele ma daga ari ma faa biine mi wiaa ne. Faafaa-la kala ma faa biine mi wiaa ne. Ama wonbiin ne ma bi na di ma wuo dage chonu-la ma si kene a pimi. <sup>11</sup> U bi naga ari mi che kuŋ ka ne tii mii bul wiin deen, bee wiaa mi gunne wiaa yuge ne mi miisiŋ le. Di mi keŋ kuŋ koo di mi bi kuŋ kene, mi tuon yie toro ne. <sup>12</sup> Mi jin nii u si naga a pimi ne, di mi ne keŋ kuŋ

koo di mi ne bi kene. Mi gunne wiinj deenj ne bua-na kala koo lee-na kala. Di mi vɔgɔ koo di losun kenmi, di mi ken kiaa yuge koo di mi ne ken mua, mi sipaa tuo. <sup>13</sup> Mi jan wuo ken mi titia worun wiaa deenba kala le, bee wiaa Kirisito ne pimi dol-la.

<sup>14</sup> Ama u naa wu-zɔŋ ne ma sii pemi le. Bua-la le wiaa si juumi, ma pemi le ne. <sup>15</sup> Ma Filipa niaa, ma titia jima worun ari mi si suomo bubul Wia wu-zɔmɔ-la ma teen, ma pemi le ne. Mi si lii Masidoonia tinteen maa, ma ha pemi le ne. Nialinj kala si laa Yesu wiaa dii aa hilimi, ba kun-kala bimi le pe, see ma dunɔna ne pemi le ari moribee. <sup>16</sup> Mi fa si he Tesalonaaka tan-la le, ma pemi le yuge ne. <sup>17</sup> U bi naga ari mi yie chiche di mi laa kiaa ne ma teen, ama mi cho di mi na ari ma time wasa yuge Wia teen ne. <sup>18</sup> Ma si tinj Epafodaatis, u ken kialinj ku pimi, leele mi ken kun-kala mi sii che ne. Kialinj paala yuge ne. Kialinj ma si jonɔ pimi, ba nage kiaa ba si yie kpu pi Wia, u laaba, ka u tuɔŋ tɔre ba nyun ne. <sup>19</sup> Wiala mi si timaa pa ken kun-kala ne, u jan to Yesu Kirisito le a pima kun-kala ma sii che a yuge. <sup>20</sup> La Nyimma Wia yirin jan yire bua-na kala le a kaa mu wuu. Ami.

### *Chuoŋlaa*

<sup>21</sup> Mii chuole nialinj kala si to Yesu Kirisito le a naa Wia niaa. La naanbiiri-la kala ma si laa Yesu wiaa dii a

he daha, ba maa chuolema. <sup>22</sup> Wia niaa kala si he daha ka chuolema. Nialinj ma si laa Yesu wiaa dii a he kuoribal-la ba sii yire Siiza dia le ka chuolema.

<sup>23</sup> La Tiina Yesu Kirisito lahɔrimɔ le, ma jan hon ari yarifiela.

## TEN-LA PÓOL SI NMUNSA PI KOLSI NIAA

<sup>1</sup> Mi-na Póol si n̄aa Yesu Kirisito nan̄zoo Wia si liisa, ari Timoti, la kala naan̄bie, laa chuole ma Kólósi niaa.

<sup>2</sup> Mi n̄mun̄se tenīj deen̄j a pipi ma-na Wia niaa si n̄aa naan̄bii-titiiba-la Kirisito teen̄j. La Nyimma Wia lah̄orim̄o le u jan̄ pema le a len̄j di ma h̄on̄j ari yarifiela.

*Póol lolle Wia Kólósi niaa wiaa*

<sup>3</sup> Bua-na kala la níi chuole Wia aa pima, la yie lolu, u-na, la Tiina Yesu Kirisito Nyimma, <sup>4</sup> b̄ee wiaa la nia ari ma sei Kirisito Yesu nīīj a cho Wia niaa kala n̄e.

<sup>5</sup> Maa n̄aa n̄ii a tīj ma síi yie kialīj si pīj ma sipaan̄j Wia-jan̄j le. <sup>6</sup> Ma níi wīīj deen̄j bua-la ma si níi Wia wu-zóm̄o-la si n̄aa wu-titii. Epafiras n̄e bula pima.

Wia wu-zóh̄oo deen̄ba tīj tījtīj-zóh̄oo n̄e lere yuge dunia le. Niaa yuga laaba dii, ba pūj lere-la ari ba si pūj n̄ii ma le. Ba pūj n̄ii ma le a suomi bua-la le ma si jegile níi wu-zóm̄o-la a senē j̄īj n̄ii Wia si pema le u lah̄orim̄o le. <sup>7</sup> Ma gunne wiaa deen̄ba Epafiras teen̄j n̄e, la ni-choolii-la si n̄aa la tījtinni d̄on̄j Wia tījtin̄jaa le. U n̄aa Kirisito tījtinni-titii n̄e la nyūj. <sup>8</sup> U n̄e bula

pila ari ma si cho d̄on̄j Wia Dīj-zon̄-la dolūj le.

<sup>9</sup> A lii tapulii-la la si níi wīīj deen̄j, la chuole Wia pipima a bi len̄j. Laa sul Wia aa pima duu len̄j di ma senē j̄īj wii-la u síi che di ma n̄aa, a ken̄j wu-jimīj ari digilīj jegilee Wia Dīj-zon̄-la si pima. <sup>10</sup> U jan̄ len̄j di ma wu-n̄aalaa kala chin̄j Wia won̄bīīj le, duu tuon̄j t̄ore ma nyūj a len̄j di ma tīj tījtin̄-zóh̄oo, tījtin̄-yiriba kala le, duu ken̄j doho, di ma ku j̄īj Wia worūj a waa p̄e. <sup>11</sup> Wia jan̄ pima dolūj a magē n̄ii u si dolie, di ma wuo ken̄j piina ari kenyiri ma tuot̄orūj le. <sup>12</sup> Má lolle Wia ari u si lēje di maachie ma ma si jan̄ wuo p̄e dii kialīj u si n̄aa bil u niaa le Wia kuorii-la tuon̄j. <sup>13</sup> U laala Sitaani n̄isīj le, a ken̄la kaa mu he u bii-choolūj kuorii-la le di u biben̄la. <sup>14</sup> U n̄e Wia jon̄o tīj la haacheba chim̄īj a jon̄j la haacheba chela.

*Kirisito ken̄j dolūj wii-kala le*

<sup>15</sup> Kirisito n̄e nage Wia-la nagisīj kala kala, níi-la la si bi na. U n̄e kii kūj-kala u si n̄aa. <sup>16</sup> U le n̄e Wia to a n̄aa kūj-kala si he wia nyūj ari tījteen̄j, kialīj la síi na ari kialīj la si bi na kala, a p̄e Wia bii-zóh̄oo ari bii-bóh̄oo kala le. U le n̄e u to a n̄aa kiaa kala. Ba he dime u yirīj le. <sup>17</sup> U n̄e laa sipaan̄j he dime, ka kūj-kalana he dime. U níi ben̄j kiaa kala ba chin̄j ba di-chinaa.

<sup>18</sup> U ne ɲaa nialin si laa Yesu wiaa dii aa hilimi kuhian aa berɓa. Ba nage u yaraa, u ne ɲaa ba nyun. U ne suomo bil Wia niaa gentine, beɛ wiaa u ne ɲaa bunɓun nii-la si laa sipaan sii suun le nialaa kala si suba le. Nii wiaa u ne ken dolun wii-kala le. <sup>19</sup> Wia cho di Yesu nage u-na Wia nagisin kala kala. <sup>20</sup> U le ne Wia to ba di kun-kala sin, kialin si he wia nyun ari kialin si he tinteen le kala. Bua-la u si suu daageɛɛ nyun, u chalin jaase. U chal-la jaasin ne leɲe Wia ari kialaa kala si he dime tuɔsaa fiele donɔ nyun.

<sup>21</sup> Ma di Wia siala fa bi donɔ na a tin ma wu-bomola ɲaanin ari ma tuobiin lorunu-la wiaa. <sup>22</sup> Ama lele Wia ɲaa ma duu sin a tin Kirisito suun le, duu kenma kaa ko Wia sipaan ari tuɔ-pula, duu sima nyan. <sup>23</sup> Kirisito jan ɲaa ɲla pima, di ma ken yarida-la naan le a chin kpan kpan, aa yiele wialin ba si ɲmunsa Wia tenin tuɔɲ. Ma nii Wia wuzonɲoo deenba ba si bula pi niaa leree yuga ne. Mina Pɔol ma ku ɲaa Wia tintinnaa donɔ aa bul Wia wiaa.

*Tintimii-la Pɔol si tima pi nialin si laa Yesu wiaa dii aa hilimi*

<sup>24</sup> Lele mi tuɔɲ tɔɔ heela le mi si na a pima. Heela jan pe dere, ari Kirisito si si mi jan na heen pi nialin si laa u wiaa dii aa hilimi. U niaa ɲaa kubala ne, a nage u yaraa si ɲaa kubala nii. <sup>25</sup> Mi

ku ɲaa ba tintinnu don. Wia ne liise mi di mi tin tintimin deen a pima, di mi bul Wia niin wiaa kala a pima. <sup>26</sup> Wia niin wiaa fa faa ne. Wia jono faa la naabalimaba tinteen le faafaa kala a ku yi bua deen le. Ama lele Wia jono dage u niaa ne. <sup>27</sup> Ba ne Wia liise di ba jin wialaa si zomo nii kinken, ka u fa jono faa. Lele u dage ba si mage nii nialaa si bi juu tinɲaa ɲaa tuɔɲ. Wialin ne daga ari Kirisito he ma tuɔɲ le. Nii wiaa maa yiele di ma kpa u yiri-bal-la Wiajan le. <sup>28</sup> U wiaa ne la bula pipi niaa. Laa kpurise nuukala digilaa, aa dage nuuna kala ari wu-jimii-na kala, di la wuo ɲaa ba waa dere Kirisito wiaa le. <sup>29</sup> Nii wiaa mi faasa he mi dolun kala a titin, ari Wia si jon u dol-bal-la pimi di mi kaa titin nii.

## 2

<sup>1</sup> Mii che di ma jin nii mi si he dolun a faasa tima pima a pe Wia nialaa si he Laadisiya le, ari Wia nialaa donsun kala ha si bimi naa. <sup>2</sup> Mii che di ba ken boi-duon a tin chonun si wuo kenba he donɔ, di ba wuo jin wu-faali-la kala kala worun a dere si tige Kirisito le a laa dii. <sup>3</sup> Wujimin kala he u teen ne. U dunɲuna ne wuo ɲaa la sene ku jin wiaa a ken wu-jimin.

<sup>4</sup> Mi bul nii pipima di nuukala si wuo nyisema ari nisima. <sup>5</sup> Mi tuo ma teen, ama mii biine ma wiaa ari mi he ma teen, aa juɔɛ ma si



ηaa Yesu yarida a chinj kpan kpan, a fiele ma yaraa.

*Mii-zɔŋ-la la si kene Kirisito teenj*

<sup>6</sup> Ma si seye ari Yesu Kirisito ne ηaa ma Tiina, má lej di wii-na kala ma sí ηaa le, duu nage ma duu ηaa kubala ne. <sup>7</sup> Má lej di ma naapoloo suusa juu-u woruŋ, di ma wuo gunne u wiaa woruŋ a wuo chinj ma yarida le, ari ma si gunne nii di ma ηaa. Má ma pe a faasa lolle Wia woruŋ.

<sup>8</sup> Ma sí leŋe di nuu-kala yuo diima di ma tou. Baa dagema nuhuobiine wujimiŋ, a nyisema ari wialaa si bi bubuɔsaa kene. Ba to nuhuobiinee naabalima wenin a dage di-suomuŋ wiaa nialiŋ sí to. Wiaa deenba bi Kirisito teenj lia. <sup>9</sup> Wia nagisiŋ kala kala he Yesu nuhuobiine yara-la le ne. <sup>10</sup> Ma duu si ηaa kubala, ma bi kuŋ-kala chee ka. U ne kii Wia bii-bɔŋŋɔ ari Wia bii-zɔŋŋɔ ari Wia tinɔaraa kala. U ne kenba doluŋ aa benba. <sup>11</sup> Ma di Kirisito si ηaa kubala, u naga ari u keri ma penee ne. U bi naga nuhuobiinee kerin. U ne ηaa ma wuo lej ma faafaa wu-kene-la si bomo a ta. <sup>12</sup> Wii-chuole liin ba si foma, u naga ma di Kirisito kala ne ba joŋo hugi. Wia dol-bal-la wuo chise Yesu suuŋ le. A tinj ma si laa wiin deen dii, ma duu kala ne sí suuŋ le. <sup>13</sup> Ma faafaa wu-kene ari ma haacheba ne leŋe ma naga ari ma suba.

Ama Wia si leŋe Yesu sí suuŋ le, ma ma kenj miisiŋ. U joŋ la haacheba kala a chela. <sup>14</sup> La chei u niin wialaa kala u si ηmuŋsa, ka u bi leŋe la tel. Kirisito si suu daa-geese nyuŋ ne kpu wialaa la si ηaa ta. <sup>15</sup> U liise Sitaani ari Wia bii-bɔŋŋɔ kala doluŋ. U kenba muuri ni-dan tuɔŋ. U si suu daa-geese-la nyuŋ ηaa u juose ba nyuŋ, ari nii-la sí juose u ni-yuo-diilee nyuŋ nii.

<sup>16</sup> Ma sí leŋe di ba bil kisininj pima a tinj kudiilee koo ku-nyualaa koo tapulaa le a joŋ cheerin pima. <sup>17</sup> Kisinnin deenba naga ku-la si jan ko daaliimiŋ ne. Ku-la titia ne ηaa Kirisito. <sup>18</sup> Ma sí leŋe di nuu-kala joŋ cheerin pima a pesema le di ma kenj ma titia a muuri, a chuchule Wia tinɔaraa. Niaa deenba kenj wialiŋ ba si na a nage duosoo tuɔŋ a kaa lere. Ba bi wii-kala ηaa an bibigisi ba titia le. Ba yie ηaa nii a tinj ba si yie biine ba yaraa wiaa ne. <sup>19</sup> Ba bi Kirisito le mere, nii-la sí ηaa la nyuŋ. U ne ηaa Wia niaa waau le ari Wia sí che nii. Ba waau le ari nuhuobiine yaraa hangbeli-susugusuŋ ari poloo si mere doŋo le a waa nii, an ka nyuŋ ηaa ba doluŋ tiina.

<sup>20</sup> Ma di Kirisito si suba nii, u maga di ma liise ma titia di-suomuŋ wiaa, niaa fa sí to. Nii wiaa, ma sí ma titia joŋo to kisininj le a nage ari ma haa to dunia wonbiin ne. Kisinni-la ne ŋla: <sup>21</sup> Ma sí kiaa doŋsuŋ

kpagu, ma sí kíaa dɔɔsun dii, ma sí kíaa dɔɔsun digu. <sup>22</sup> Ma sí kudiile-la kisinni-la to. Kudiile-la ma síi dii, ba jaɔ dɛɛ ma yaraa ɛ. Nuhuobiinee nɛ dage kisin-niɔ deɛɔba. <sup>23</sup> Ba daginnin deɛɔba yie nage ba keɔ wu-jimiɔ. Ba yie dage di niaa to ba-na Wii-chuoɛ woɔbiin, a bul di ba muuri ba titia, aa dɔgise ba yaraa. Daging-niɔ deɛɔba bi jaɔ wuo ɔaa di niaa leɔ ba yaraa wu-chooloo a ta.

### 3

<sup>1</sup> Ma di Kirisito kala si sii suuɔ ɛ nɛ ɔii, máa che wialaa si he Wia-jaɔ, lee-la Kirisito si hɔɔ u kuori-kpasa ɛ Wia sɛmɛ. <sup>2</sup> Má jaɔ ma nyuɔ kala he wialiɔ si he Wia-jaɔ ɛ, aɔ sí ma nyuɔ joɔo he dunia wiaa ɛ, <sup>3</sup> bɛɛ wiaa u naga ma suba nɛ. Ka ma miisiɔ faa Kirisito ɛ. U nɛ he Wia teen. <sup>4</sup> Kirisito nɛ ɔaa la miisiɔ. Bua-la ɛ u si jaɔ miira kɔ, niaa jaɔ na ma duu kala di maa kpaa u yiri-bal-la.

*Má kpu dunia wialaa si hɛma ɛ a ta*

<sup>5</sup> U maga di ma kpu dunia wialaa kala si hɛma ɛ a ta nɛ. Ba nɛ ɔla: Ba-chɔruɔ ari ha-chɔruɔ wu-ɔaalaa, disinnin ɔaanin, wu-liilin ɔaanin, wu-bɔɔɔɔ biinin, tuɔ-luɔ wuɔaalaa. Tuɔ-luɔ wuɔaalaa-na paala nage wiaa kpaarin nɛ. <sup>6</sup> Wia jaɔ dɔgise nialaa [si bi u niin sɛyɛ] aɔ ɔiɔaa wiaa deɛɔba. <sup>7</sup> Ma ma fa he

nialaa tuɔɔ nɛ a venɛɛ ɔaa wiaa deɛɔba. <sup>8</sup> Ama leeɛ u maga di ma jaɔ wiaa deɛɔba kala ta. Ba nɛ ɔla: Baanin nanin, baanin fiisin, wu-bɔɔɔɔ ɔaanin niaa ɛ, hari-gaarin, wu-liilin buluɔ. <sup>9</sup> Ma sí wiaa nyia a pi dɔɔɔ, bɛɛ wiaa ma jaɔ ma fafaa wu-bɔɔɔɔ-la ma fa síi ɔaa ta nɛ <sup>10</sup> aɔ leeɛ tuto wu-kɛɛ-la si zɔmɔ. Wia ɔaa ma waa wu-kɛɛ deɛɔba tuɔɔ di ma wuo jin u wiaa woruɔ a ku nage u titia nagisiɔ. <sup>11</sup> Niaa deɛɔba tuɔɔ u bi wii kɛɛ di ma ɔaa Juu tinɔaa koo ma bi Juu tinɔaa ɔaa, di ma keri ma penɛ koo ma bi ma penɛ kere, di ma ɔaa nuhuɔraa koo ni-gollo baaraa, di ma ɔaa yosuɔ koo di ma tii ma titia, Wia niaa tuɔɔ wu-nyuɔ nɛ ɔaa Kirisito.

<sup>12</sup> Wia liisɛma a leɔ ma ɔaa u niaa. U choma. Nii wiaa, má leɔ di maa fá niaa nennige a keɔ zile, a keɔ ma titia muuri, a ɔaa chim, a keɔ kenyiri. <sup>13</sup> Má keɔ piina ari kenyiri ma dɔɔsuɔ teen. Di ma keɔ wii ari dɔɔɔ maa, má joɔo che dɔɔɔ. La Tiina si jaɔ ma haacheba chɛma, má ma joɔo che dɔɔɔ ɔii. <sup>14</sup> Wu-nyuɔ nɛ ɔla: Má cho dɔɔɔ. Chonuɔ nɛ jaɔ pima doluɔ di ma wuo kaa ɔaa wiaa deɛɔba kala woruɔ. <sup>15</sup> Má hɔɔ ari yarifiɛlaa a keɔ nii-bala Kirisito si pima. Wia yirema di ma hɔɔ ɔii a tin ma si ɔaa kubala. Má lolle Wia <sup>16</sup> a leɔ di wialaa kala Kirisito si bula he ma tuɔɔ

woruj. Má kpurise dɔɔba digilaa aa dage dɔɔɔ ari wujimij. Má yii yiila-la si he Wia tenij tuɔɔ, ari Wia niaa yiilaa dɔɔsun, ari yiilaa Wia Diɔ-zɔɔ-la si dagema. Má yii nii a pi Wia a lollu ma tuɔsaa le. <sup>17</sup> Wialij kala ma sii ɔaa ari wialaa kala ma sii bul, má ɔaa ba kala la Tiina Yesu doluj le a lolle la Nyimma Wia u doluj le.

*Wia niaa si maga baa ɔaa nii dɔɔba le*

<sup>18</sup> Haalaa, má to ma balaba niij a tij ma sii to Wia. <sup>19</sup> Baalaa, má cho ma haalaa, ma sí ba nyuj teru. <sup>20</sup> Hanbiisij, má to ma naanba ari ma nyimmaba wii-na kala le, nii nii tɔre Wia tuɔɔ. <sup>21</sup> Nyimmaba, ma sí ma biirin walimu kinkeɔ di ba yaraa yuɔre. <sup>22</sup> Yosuj, má to nialaa si ɔaa ma tinjaa dunia le wii-na kala le. Ma sí leɔe di ma tij woruj bua-la le ma tinjaa sii beɔma dunɔɔ, a sí che di ma tij di ba besema le. Ama má tij ari tuɔ-bala a tij ma sii fá Wia. <sup>23</sup> Tinjimii-la kala ma sii tij, má tij ari tuɔ-bala a nage ma tima pipi Wia ne, nuhuobiinee dee. <sup>24</sup> Ma sí yu ari Wia jan tij ma time, kialij u si bil u niaa le Wia-jan le. La Tiina Kirisito ne ma tij tinjinja-la a pipa. <sup>25</sup> Wu-bɔɔ ɔɔjaaraa ma jan laa ba time a mage ba wu-bɔɔ-la ba si ɔaa le. Wia sipaan tuo nii-la ɔ si ɔaa le.

## 4

<sup>1</sup> Yosuj tinjaa, má to wu-titii a jon mage nii si maga a pi ma yosuj, aɔ sí yu ari ma ma keɔ Tiina ne Wia-jan le.

<sup>2</sup> Má chuɔle Wia bua-na kala a sí leɔ, a pɔ ma titii le, aa lolle Wia. <sup>3</sup> Má pe chuɔle Wia pipila maa, di Wia wuo suri wonbiiɔ pila di la wuo bul Kirisito wialaa fa si faa, <sup>4</sup> a polli woruj nii mi si maga di mi bul. Ba wiaa ne tii ba keɔmi tɔ dia.

<sup>5</sup> Di ma he nialaa si bi Yesu niij to tuɔɔ, má keɔ ma titii a jin wonbii-la ma si jan to. Bua-na kala le di ma ne na wonbiiɔ, má bul wiaa piba aɔ pe ɔaa wu-zɔɔɔɔ. <sup>6</sup> Má leɔ di ma wu-bulaa kala sin a keɔ bubuɔsaa, di ma wuo jin nii ma si jan to a wuo chaare nuu-kala wiaa siaa pu.

### *Chuɔlaa*

<sup>7</sup> Tikikas jan bul mi wiaa kala pima. U ɔaa la naanbii-choolii ne, a ɔaa Wia tinjinni-titii, a ɔaa la tinjinni dɔɔɔ ma Kirisito tinjinjaa le. <sup>8</sup> Mii timu di ma jin nii la si naga, di u wuo ɔaa di ma nyuj nyaase. <sup>9</sup> Ba di Oniisimas mii tij. U ma ɔaa la naanbii-titii-la la si cho ne a ma lii ma jan. Ba jan bul wii-na kala si ɔaa daha a pima.

<sup>10</sup> Arisitaakis ka chuɔlema. La duu kala ne ba kaa tɔ dia. Maak-la si ɔaa Banabas naanbie maa chuɔlema. Mi laa sipaan dagema wialij ma si jan ɔaa le. Duu ne kɔ, má kenu woruj. <sup>11</sup> Yesu ba sii yire Jasitis

ma si duu chuolema. Niaa deenba batori dunɔɔna ne ɔaa mi tiɔtinni-dɔɔsuɔɔ a lii Juu timma-la si ɔaa Yesu yarida tuɔɔ, a pemi le aa bul Wia kuorii-la wiaa. Ba ɔaa mi tuɔɔ fiele. <sup>12</sup> Epafiras ma si lii ma jaɔ chuolema. U ma ɔaa Yesu Kirisito tiɔtinni-la dɔɔɔ ne aa tiɔ u tiɔtiɔɔ. U yie chuole Wia pipima ari siifesiɔ, di ma waa dɛɛ Wia wiaa le a jiɔ woruɔ wialiɔ kala Wia sii che di ma ɔaa. <sup>13</sup> Mi jaɔ wuo bula pima ɔii u si faasa he u doluɔ kala a tima pima, ari nialiɔ kala si he Laadisiya ari Hiirapolis le. <sup>14</sup> Luuk, dokito-la la si cho ari Dimas ka chuolema. <sup>15</sup> Má chuole niaa deenba mi si che di mi diise a pima: La naaɔbiiri-la si he Laadisiya le, Nimifa ari nialiɔ si laa Yesu wiaa dii aa hilimi u dia le. <sup>16</sup> Di ma karime teniɔ deen a pi ma niaa dɛɛ, má leɔ di ba ma karime teɔ-la a pi Wia nialaa si he Laadisiya le. Ka má ma laa mi teɔ-la Laadisiya niaa teen a ma karime ma tuɔɔ. <sup>17</sup> Má bula pi Akipas duu he u doluɔ kala aɔ tiɔ Wia tiɔtimii-la woruɔ u si joɔɔ pu duu tiɔ. <sup>18</sup> Lɛle mi-na Pɔol titia nii ɔmuɔse aa chuolema. Ma sí mi wiaa yu ari ba tomi dia. Wia jaɔ pema le ari u lahorimo.

## TEN-BUNBUN-LA PƆOL SI NMUNSA PI TESALONAAKA NIAA

<sup>1</sup> Mi-na PƆol ari Silivaanas ari Timoti ne nmunse tenin deen a pipi nialin si laa Yesu wiaa dii aa hilimi a he Tesalonaaka le a naa la Nyimma Wia ari la Tiina Yesu Kirisito niaa. Wia jan pema le di ma hon ari yarifielaa.

*PƆol lolle Wia a mu tige Tesalonaaka niaa le*

<sup>2</sup> La yie chuole la Nyimma Wia pipima kala ne. Di la nii chuole Wia, la yie lulollu ne a tin ma wiaa. <sup>3</sup> La yie liliisu nii ma sii tin u tintinnaa a tin ma si laa Yesu wiaa dii le, ari nii ma si cho niaa, ari nii ma si ken yielaa la Tiina Yesu Kirisito le. <sup>4</sup> Mi naanbiirin, la jima ne ari Wia choma ne worun, nii ne tii u liisema di ma naa u niaa. <sup>5</sup> Bua-la le la si bul Wia wu-zomɔ-la a pima, u bi naga ari wu-bulun dunduna ne la ku bula pima. La si he ma teen, Wia wu-zomɔ-la fa ken dolun, ka Wia Din-zon-la ma fa he la teen. Wialin ma si nia juu ma digilaa ne worun. La si he ma teen, ma na la mele fa si nage nii ne. Ma wiaa ne tii la ken la titia worun nii. <sup>6</sup> Ma to la wu-naalaa harin ne a to la Tiina Kirisito maa. Ma si laa wialin dii nii, ba dogisema worun, ama Wia Din-zon-la leje ma juuɔse wialin le.

<sup>7</sup> A tin wiin deen wiaa nialin kala si laa Yesu wiaa dii a he Masidoonia ari Akaaya tinteen chebema le ne. <sup>8</sup> La Tiina Wia wialin ma si nia lii ma le ne a teeli Masidoonia ari Akaaya tinteen kala le. U nii dunduna ma saa dee, lee-kala baa bul wiaa a mu tige Wia wialin ma si laa dii le. Nii wiaa u bira bi maga di la bul ma wiaa pi nuu-kala. <sup>9</sup> Niaa yie bubul nii ma si kenla worun bua-la le la si ko ma teen. Ba yie bul ari nii ma si via ma vuiaa ta an birima to Wia. U ne weye, u ne naa Wii-titi-la. <sup>10</sup> Maa gberɛ u Bie Yesu duu lii Wia jan ko. U ne Wia chise suun le. U ne jan laala ta tapulii-la Wia baanin si jan sii nuhuobiinee nyun.

## 2

*Tintimii-la PƆol si tima Tesalonaaka le*

<sup>1</sup> Mi naanbiirin, la fa si ko ma teen nii, ma jima u fa bi pei naa. <sup>2</sup> An ka la ko ma teen Tesalonaaka le, la fa laa sipaan na heen ne. Ba dogisela worun Filipa tan-la le. La si che la bul Wia wu-zomɔ-la a pima maa, niaa yuga a lii la harin. Ama Wia-la la si tima pipa pila nyuduon la wuo bul u wu-zomɔ-la a pima maa. <sup>3</sup> La bi ma teen ko di la ku bul wialin si bi wutiti naa a pima. La bira bi tuobiin-bonjɔɔ ma kaa ko. La bi maa nyisa ma. <sup>4</sup> Wia na ari la naa ni-titiiba ne. Nii ne tii u liisela di la bul u wu-zomɔ-la a pi niaa.

Wialinj la sii bul, la fa bi che di la bul di niaa tuonj tore la nyun. Ama laa che di Wia tuonj tore wialinj la sii bul le ne. U nii bej la tuobiinaa. <sup>5</sup> Ma saa jima ari la si ko ma teenj, la bi nii-sima ne kaa ko. La bi ko di la bul kanfugi wiaa a laa ma kiaa. Wia ne nja la siada tiina. <sup>6</sup> La bi ma teenj ko di ma niaa koo niaa donsunj zizilla. La si nja Kirisito nanjzoba nii, la fa jan honj ma nyun a gberema. <sup>7</sup> Ama la bi nii nja. La leje la siaa fiele ma teenj ne, ari haala si yie biben u biirinj nyun nii. <sup>8</sup> La si ku choma worunj, la jonj la titia kala a pima ne, la bi Wia wu-zomɔ-la dunɔnɔ bula pima. La nja nii, bee wiaa la di ma kala mal donɔ ne kinkekinkekinj.

<sup>9</sup> La naanbiirinj, ma jinj nii la fa si faasa tinj a na heenj bua-la le la fa sii bul Wia wu-zomɔ-la aa pima. La tinj wiiheye ari titaninj kala ne, di la si ma nyun honj a gberema. <sup>10</sup> Ma di Wia kala jan nja la siada tinjaa ari la fa si he ma nialinj si laa Yesu wiaa dii teenj, la wu-jaalaa kala fa to Wia wonjbiinj ne a nja wutitii. La bi wii-kala nja chei. <sup>11</sup> La si he ma teenj, la kenma, ari hanjbiisinj nyimma si yie kenj u hanjbiisinj nii ne. Ma jinj nii la si chagile ma kun-kala di ma wuo to wutitii-la a wuo lenj ma nyun nyaase. La bira sulma <sup>12</sup> di ma lenj di ma mele zonj Wia sipaanj. Wia ne yirema di ma ku juu u kuorii-la tuonj anj pe

na u tula.

<sup>13</sup> A tinj wiinj deenj wiaa, la yie lulolle Wia ne bua-na kala. La si kenj Wia wialinj ku bula pima maa, ma laaba a seiba ne. Ma bi biina ari ba nja nuhuobiine wiaa, ama ma seiba ari ba sene nja Wia wiaa ne. Ma nialinj si laa Yesu wiaa dii, Wia niinj wiaa deenba lenj ma chinj kpan kpanj wialinj ma si laa dii le.

<sup>14</sup> Mi naanbiirinj, ma ma ku nage nialinj si laa Yesu wiaa dii aa hilimi aa to Yesu Kirisito, a he Judiya tinteenj le. Hee-la ba si na, u titia ne ma ma na. Juu tinjaa si dogise ba tuonj nialinj si laa Yesu wiaa dii Judiya tinteenj le nii, nii ne ma ma na heenj ma tanj niaa nisinj le. <sup>15</sup> Juu tinjaa deenba ne kpu la Tina Yesu ari nialinj fa sii bul wiaa, Wia Dinj-zonj-la dolunj le. Ba to naasinj dogisela maa. Wia tuonj bi ba nyun toro. Ba hosi nuu-kala nyun. <sup>16</sup> Ba paala pugila, di la si Wia wiaa bula pi nialinj si bi Juu tinjaa nja di Wia laaba ta. Wu-bomɔ-la ba si nja, ba tuonj wu-bomunj ne nja. Ama lele Wia baaninj sii ba nyun ne.

*Pɔɔl bul duu cho duu miira mu na Tesalonaaka timma-la*

<sup>17</sup> Mi naanbiirinj, la si pore donɔ le, u bi diene, ka laa biine ma wiaa. La si bi maa na nii, nii ne la faa che la ku nama ari siifiesinj. <sup>18</sup> Mi-na Pɔɔl titia paala nerike nerike ne di mi bira ku nama, ama Sitaani to la wonjbiinj. <sup>19</sup> La yielaa hema le ne. La tuonj

tore ma nyun. Di la Tiina Yesu ne miira ko, a tin ma wiaa la jan bigisi la titia le. <sup>20</sup> Ma ne laa yirin pila. A tin ma wiaa la yie jujuse ne.

### 3

<sup>1</sup> La si walima ka di la ku nama, nii ne la biine ari u jan pela le di la ne hon Atejan ta-ja le, <sup>2</sup> an tin la naanbie Timoti duu ku nama. U tima pipi Wia ne aa bul Wia wuzom-la si tige Kirisito le ne a pima. U pema le di ma chin wialin ma si laa dii le worun a wuo len ma nyun nyaase. <sup>3</sup> Ma sii na heen nii, u jan pema le di nuu-kala boye si jujon a mu tige hee-la ma sii na le. Wia ne liisela la na hee-la. <sup>4</sup> La fa si he ma teen, la laa sipaan bula pima ari la jan na heen. Wialin la si bula pima ku naa wutitii ne. Leele ma naba ne.

<sup>5</sup> Mi si nyalima lol di mi ku nama, nii ne mi tin Timoti di mi jin nii ma si china a mu tige wialin ma si laa dii le. Mi fa fawullun ari Sitaani jan magisema a naa di ma jon wialin ma si laa dii ta. Di ma ne naa nii, tintimii-la la si tima ma teen jan naa pei. <sup>6</sup> Ama leele Timoti si lii ma teen ko, u ken wu-zon ne ku bula pila. U bula pila ari ma chin wialin ma si laa dii le ne a cho niaa maa. U bira bula pila ari ma yie liliisi la wiaa ne worun bua-na kala le, a fa cho di ma nala, ari la ma sii cho di la nama nii. <sup>7</sup> Mi naanbiirin, laa na heen ne ka wiaa wiwalimela. Ama la si nia ari ma chin ma yarida

le nii, la tuon pin di-bala ne. <sup>8</sup> Di ma ne chin ma yarida le, leele-na la na wiese ne.

<sup>9</sup> La bi jan wuo lolle Wia a mu dere a tin ma wiaa. La yie jujuse Wia sipaan ne a tin ma wiaa. <sup>10</sup> Laa sul Wia ne worun titanin ari wiheye kala di la wuo ku nama, a wuo pema le di ma na kialin si ka a tige ma yarida le. <sup>11</sup> Laa sul la Nyimma Wia ari la Tiina Yesu di ba che wonbiin pila di la ko ma teen. <sup>12</sup> La biraa sul la Tiina Yesu duu pema le di ma wasa cho donjo, di ma cho donjo kinken a cho nuu-kala, ari la si choma nii, <sup>13</sup> an bira sulu duu len di ma ken dolun ma tuon le, a ken tuopula la Nyimma Wia sipaan, a si wii-kala ken tapulii-la la Tiina Yesu ari u niaa si jan miira ko.

### 4

*Wialin sii tore Wia tuon*

<sup>1</sup> Mi naanbiirin, wialin mi sii che di mi bul wu-kaanin ne nla: Laa sulma la Tiina Yesu dolun le di ma len di ma mele zon, di Wia tuon tore ma nyun. Ma na nii la fa sii ken la titia ma teen. Ma gunne meli-zon-la la teen. Ma mele si zon nii, ma naa nii a pipe. <sup>2</sup> Ma jin wialin la Tiina Yesu si jonjo pila di la ma jonjo dagema. Ma to wiaa deenba. <sup>3</sup> Wialin sii tore Wia tuon ne nla, di ma si disinnin ken. U cho di ma liise ma titia ha-chorun ari ba-chorun wu-naalaa le. <sup>4</sup> Nuukala maga duu to Wia

wonjiin ɛ a jaa haala, di Wia tuon ɔrɛ. Duu nɛ to nii, nuu-kala jan ziluu a na duu bi disinnin kala kenɛ wiin deen ɛ. <sup>5</sup> Ma sɪ ma tuɔtɔrɛ wu-ɲaaalaa ɛ to a gollo chiche haalaa ari nialin si bi Wia jin sɪi ɲaa nii. <sup>6</sup> Bira nuu-kala sɪ wii ɲaa chei u donɔ tiina a tige u haala ɛ. La chaasa bula pima nɛ faafaa kala ari Wia jan dogise nialin si ɲaa disinnin a tige haalaa ɛ. <sup>7</sup> Wia bila liisa di la ɲinɲaa wu-liilin, ama u liisela di la ɲaa tuɔ-pul timma nɛ. <sup>8</sup> Nii-la kala si via wialin mi si bula, nuhuobiine dee tiina via, Wia nɛ u via nii, nii-la si jon u Din-zon-la pima.

<sup>9</sup> Mi naanjiirin, u bi maga di mi ɲmunɲɛ tenin a bula pima nii ma si jan cho donɔ, bɛɛ wiaa Wia titia dagema nii ma si jan cho donɔ nɛ. <sup>10</sup> Wutitii, ma paala cho nialin kala si laa Yesu wiaa dii a he Masidoonia ɛ nɛ. Mi naanjiirin, la saa sulma di ma wasa cho niaa kii nii. <sup>11</sup> La laa sipaan bula pima di ma he ma dolun kala a fiela hon, a biben ma titia tinɲinɲaa nyun a wuo nina ma ku-cheɛɛɛ. <sup>12</sup> Di ma nɛ ɲaa nii, nialin si bi Wia wiaa laa dii jan zizilma. Ma bi jan hono gberɛ nuu duu pima ma ku-cheɛɛɛ.

<sup>13</sup> Mi naanjiirin, laa che di ma jin wutitii-la a mu tige nialin si suba ɛ, di ma tuon sɪ faasa chei a nage nialin si bi kun-kala ka yiele tuon si chei nii. <sup>14</sup> La si laa dii ari Yesu suba nɛ an sii suun ɛ,

nii titia nɛ la ma laa dii ari Wia jan chise nialin si laa Yesu wiaa dii an suu.

*Yesu jan chise nialin si laa u wiaa dii suun ɛ*

<sup>15</sup> La Tiina Yesu dagela ɲla: La nialin si laa Yesu wiaa dii a he la miisin ɛ tapulii-la la Tiina Yesu si jan mira ko, la bi jan laa nialin si suba sipaan a mu Yesu teen. <sup>16</sup> Bua kubala la Tiina Yesu jan lii Wia-jan a ku tuu dunia. Bua-la ɛ niaa jan nii duu faasa kpia gon. Wia tinɲaara kuhian ma jan kpia, ka di ba ɲmuu Wia nyile-la maa. Nialin kala si laa Kirisito wiaa dii an suu, u jan laa sipaan chiseba di ba sii suun ɛ. <sup>17</sup> La nialin si he la miisin ɛ, u jan kesela kaa pɛ nialin u chisa suun ɛ, di la kala cheɲ la Tiina Yesu duonbilinbaanaa tuon wia nyun. La jan he la Tiina teen a kaa mu wuu. <sup>18</sup> Má bul wiaa deenba a pi donɔ di ma tuosaa pin di-bala.

## 5

*Má ɲaa siri a gberɛ tapulii-la la Tiina Yesu si jan miira ko*

<sup>1</sup> Mi naanjiirin, u bi maga di mi ɲmunɲɛ a bula pima a dagema tapulii-la ari bua-la ɛ wiaa deenba si jan ɲaa, <sup>2</sup> bɛɛ wiaa ma titia jima worun di la Tiina Yesu nii ko tapulii-la, u jan di-ma ɛ, ari gaara si yie guu ko nii titanin. <sup>3</sup> Bua-la ɛ niaa si jan biine ari lerin fiela nɛ di wii-kala tuo, wahala jan guu a



juuba. Nuukala bi jaŋ wuo fá lel. U jaŋ nage ari haala si keŋ luorun, u luorun sii a wiwiiu le duu lul.

<sup>4</sup> Ama mi naanbiirin, ma-na tuo birimin tuon. Ma sí leje di bua-la guu ku di-ma le, ari gaara si yie juu gaa niaa kiaa a di-ba le nii. <sup>5</sup> Ma kala ŋaa nialin si he pulumun tuon ne. La tuo titanin, la tuo birimin tuon. <sup>6</sup> Nii wiaa, u bi maga di la pin don ari nialin si bi la Tiina gberɛ sii ŋaa nii. Ama u maga di la wei a keŋ la titia wii-na kala le. <sup>7</sup> Titanin ne niaa pipin don. Titanin ma ne niaa nyua sinin bubugi. <sup>8</sup> Ama la-na he pulumun tuon ne, nii wiaa u maga di la keŋ la titia wii-na kala le ne. Wialin la si laa dii ari la si cho niaa nii, má leŋ di ba nage kiaa la si jonɔ to la boisin. La sii yiele di Wia laala ta nii, má leŋ duu nage hoon nyun-chuulo di la chu, <sup>9</sup> beɛ wiaa Wia bila liisa duu na baanin la nyun. Ama u liisela duu to la Tiina Yesu Kirisito le ne a laala ta. <sup>10</sup> La wiaa ne tii u suu, nii wiaa, di la ne suba koo di la ne weye, la keŋ miisin u teen. <sup>11</sup> A tin wiin deen wiaa, má ŋaa di ma donsun tinŋaa nyun nyaase, a pipe donɔ le di ma wasa ŋaa Wia yarida. Wialin titia ne ma ŋaa lele.

<sup>12</sup> La naanbiirin, nialin la Tiina Kirisito si liisa di ba titin ma teen an pe ŋaa nihi-asin ma teen aa dagema Wia wiaa, u maga di ma zizilba. <sup>13</sup> Má zizilba a choba worun a tin tintimii-la ba sii tin

wiaa. Má hoŋ som a ŋaa sima donɔ le.

<sup>14</sup> La naanbiirin, laa sulma di ma kpurise yariwii tinŋaa digilaa, a pe fawulubaa le di ba keŋ boi-duon, a pe nialin si bi faasa chin Wia wiaa le. Má keŋ kenyiri ari niaa deenba kala. <sup>15</sup> Di nuu ne ŋaa u donɔ tiina wu-bon, u bi maga duu ma ŋaa wu-bon-la a timu. Ama bua-na kala le, má ŋinŋaa wu-zonɔɔ donɔ le ari nuu-kala le. <sup>16</sup> Má juuɔse bua-na kala le <sup>17</sup> a chuchuele Wia bua-na kala le. <sup>18</sup> Wii-na kala le, má lolle Wia. Ma si laa Yesu Kirisito wiaa dii nii, ŋla ne Wia cho di maa ŋaa.

*Pool chagile Tesalonaaka tinŋaa a chuoleba*

<sup>19</sup> Wia Din-zon-la tintinŋaa nage nyinin. Ma síu disu. <sup>20</sup> Ma sí wialin ba si bula Wia Din-zon-la dolun le via. <sup>21</sup> Ama má magise wii-kala na, a liise ku-la si zomɔ a kenu worun. <sup>22</sup> Má liise ma titia wu-bon kala le. <sup>23</sup> Mii sul Wia-la sii pi niaa yarifelaa duu leŋ di ma wasa keŋ tuɔ-pula. U jaŋ beŋ ma tuobiinaa ari ma yaraa kala a liisema wu-bon-na kala le, di ma wuo ŋaa nizonɔɔ a sí disinin keŋ, a mu yi tapulii-la la Tiina Yesu Kirisito si jaŋ ko. <sup>24</sup> Nii-la si yirema ŋaa Wutitii Tiina ne, u jaŋ beŋma.

<sup>25</sup> La naanbiirin, má ma sul Wia pila. <sup>26</sup> Má guori donɔ a chuole la naanbiiri-la kala worun.

<sup>27</sup> Mii kpurise ma digilaa  
Wia dolunɛ ɛ di ma karime  
teninɛ deenɛ a pi la naanɛbiiri-  
la kala.

<sup>28</sup> La Tiina Yesu Kirisito  
lahorimɔ ɛ, u janɛ pɛma ɛ.

## TEN-LIA-LA PÓOL SI NMUNSA PI TESALONAAKA NIAA

<sup>1</sup> Mi-na Póol ari Silivaanas ari Timoti ne nmunse tenin deen pipi ma nialin si laa Yesu wiaa dii aa hilimi Tesalonaaka le, a naa la Nyimma Wia, ari la Tiina Yesu Kirisito niaa.

<sup>2</sup> La Nyimma Wia jan pema le a len ma hon ari yarifielaa u dolun le, ari la Tiina Yesu Kirisito dolun le.

*Tapulii-la Yesu si jan miira ko, nialin si na heen u wiaa, ba tuon jan tere*

<sup>3</sup> Mi naanbiirin, ma wasa chin ma yarida le a wasa cho donjo kinken kinken. Ma si naa nii, u naa la tintimii ne di la lolle Wia a pima. <sup>4</sup> Di la ne bul ma wiaa nialin si laa Yesu wiaa dii aa hilimi leree donsun, la yie bigisi la titia le a tin ma wiaa, bee wiaa ba si to naasin dogisema, ma na heen, an ka ma nyalime a chin ma yarida naan le.

<sup>5</sup> Ma si na heen a tin Wia kuorii-la wiaa ne, Wia to wutitii-la a liisema ta, a len di ma wuo juu u kuorii-la tuon. <sup>6</sup> Ama u jan dogise nialin si dogisema mage nii kala ba si dogisema mage. <sup>7</sup> U jan pila wiese a pima ma wiese. Wiin deen jan naa bua-la le la Tiina Yesu si jan ko ari u tindaara-la. Ba ne ken dolun. <sup>8</sup> U si jan ko, u jan nage nyin-gelin a dogise

nialin si bi Wia jin ari nialin si bi Wia wu-zom-la si tige la Tiina Yesu le ka to. <sup>9</sup> Wia jan dogiseba di ba suu. Suu-la bi jan dere. Ba bi jan wuo mu la Tiina Yesu teen. Ba bira bi jan wuo na u tula ari u dolun. <sup>10</sup> Tapulii-la u si jan ko, Wia niaa kala jan pu yirin. Nialin kala si laa u wiaa dii ma jan zizilu. Ma ma jan he ba tuon, bee wiaa ma laa wialin la si bula pima dii ne.

<sup>11</sup> A tin wiin deen wiaa la yie chuole Wia pipima buana kala le ne. La sul Wia duu len di ma wuo juu u kuorii-la tuon, a len di ma wuo njaa wu-zom-la ma si cho, a wuo chin ma yarida naan le a mu dere. La sulu duu naa nii u dolun le. <sup>12</sup> La bira sul Wia di la Tiina Yesu yirin toma le a yire, di ma ma laa yirin u teen. Wiin deen jan naa la Nyimma Wia ari la Tiina Yesu Kirisito lahoring le.

## 2

*Di Yesu ne ko, u jan nyage wu-bonjoo kuoru-la a nmuure*

<sup>1</sup> Mi naanbiirin, mii che di mi bul la Tiina Yesu Kirisito si jan miira ko wiaa ne a pima. Duu nuu ko, u jan len la hilimi a chemu. <sup>2</sup> Nii wiaa, ma si lehe di ma tuobiinaa guu vugime koo di ma boye jon di nuu ne si ari tapulii-la Yesu si jan ko yie ne. N bi poo nuu jan lii ma tuon a bul di Wia Din-zon-la bula pu ari Yesu ko ne, koo nuu sii bul Wia wiaa ma jan wuo bul nii

pima, koo niaa jan nyia wiaa bul ari la ne n̄mun̄sa pima ari Yesu k̄o n̄e. <sup>3-4</sup> Ma s̄i lēne di nuu-kala nyis̄ema won̄bii kala l̄e. Tapulii-la bi jan yi, see di niaa sisii a n̄aa taaw̄ei a via Wia. N̄ii harīn̄ l̄e ni-b̄ōn̄j̄ōo kuoro, nii-la Wia si jan jon̄o h̄e nyinīn̄ l̄e, jan ken̄ u titia kaa daḡema. U n̄e n̄aa nii-la si lii Wia harīn̄ a ken̄ u titia a kaa yuga kii Wia ari kun̄-kala nuhuobiine s̄ii chuolu. U jan juu h̄ōn̄ Wia-dia tuōn̄ a bul ari u n̄e n̄aa Wia. <sup>5</sup> Ma bi liise yi ari mi si k̄o ma teen̄, mi bul wiaa deen̄ba pima? <sup>6</sup> Wii n̄e tii ni-b̄ōn̄j̄ōo kuoru-la ha bi k̄o. Ma jin̄ wii-la si tii n̄e. Ama di bua-la n̄e yie, ni-b̄ōn̄j̄ōo kuoru-la jan k̄o.

<sup>7</sup> Niaa paala n̄in̄aa taaw̄ei n̄e aa via Wia, ama ba bi n̄ii n̄aa niaa nina. Nuu n̄e h̄e dime a kaa bil. Nii-la si ken̄ wialin̄ bil di ba s̄i n̄aa, see di u surisa a pi won̄biin̄, <sup>8</sup> ka di ni-b̄ōn̄j̄ōo kuoru-la-na k̄o. Bua-la l̄e la Tiina Yesu jan miira k̄o ari u tula, a puuse u niin̄ pelin̄ a kpu wu-b̄ōn̄j̄ōo kuoru-la. U tula-la jan nyage wu-b̄ōn̄j̄ōo kuoru-la a n̄muure. <sup>9</sup> Ni-b̄ōn̄j̄ōo kuoro jan ken̄ Sitaani dolun̄ a k̄o. U jan nyise niaa ari wu-magilaa ari wu-kpun̄kperisin̄. <sup>10</sup> U jan ken̄ wu-b̄ōn̄-na kala kaa k̄o a nyise nialin̄ si jan lel, b̄ēe wiaa ba via di ba cho wutitii n̄e di Wia laaba ta. <sup>11</sup> Ba si via wutitii-la n̄ii, Wia piba won̄biin̄ n̄e di ba tuto wu-nyarīn̄ harīn̄. <sup>12</sup> Nii-la

kala si bi wutitii-la cho an̄ cho wu-b̄ōn̄j̄ōo, Wia jan dii u sariya a jon̄ cheerin̄ pu a len̄ duu suu.

<sup>13</sup> La naan̄biirin̄, la yie lolle Wia pipima bua-na kala l̄e, ma nialin̄ la Tiina Yesu si cho. Bun̄bun̄ kala n̄e Wia liis̄ema duu laama ta. Wia to u Din̄-z̄ōn̄-la dolun̄ l̄e duu len̄ di ma n̄aa tuō-pul timma a tin̄ ma si laa wutitii-la dii wiaa. <sup>14</sup> Wia wu-z̄ōm̄o-la la si bula pima, Wia tou l̄e n̄e a yirema. Wia yirema di ma ku to ken̄ la Tiina Yesu Kirisito tula-la n̄e. <sup>15</sup> Nii wiaa mi naan̄biirin̄, má chin̄ wutitii-la l̄e la si daḡema ari wialin̄ la si n̄mun̄sa pima.

<sup>16</sup> La Tiina Yesu Kirisito ari la Nyimma Wia lah̄orimo l̄e, u chola a wuo n̄aa la tuōn̄ pin̄ di-bala aa mu wuu, di la wuo yiyiele ku-z̄ōn̄j̄ōo. <sup>17</sup> Laa sulu duu len̄ di ma nyun̄ nyaase, a pima dolun̄ di ma n̄in̄aa wu-z̄ōn̄j̄ōo aa bul wu-z̄ōm̄o-la maa.

### 3

*P̄ool bula pi niaa di ba chuole Wia pu*

<sup>1</sup> Mi naan̄biirin̄, wialin̄ mi s̄ii che di mi bul u diderin̄ n̄e n̄la: Má chuole Wia pila di la Tiina niin̄ wiaa wuo teeli lee-na kala a laa yirin̄, ari u si laa yirin̄ n̄ii ma teen̄. <sup>2</sup> Má bira chuole Wia a pipila, di Wia wuo liis̄ela ni-b̄ōn̄j̄ōo nisin̄ l̄e, b̄ēe wiaa niaa kala dee bi Wia niin̄ wialin̄ laa dii. <sup>3</sup> Ama la Tiina Yesu ken̄ zile. U jan pima dolun̄ a liis̄ema Sitaani nisin̄

le. <sup>4</sup> La Tiina Wia leŋe la ŋaama yarida, la saa laa dii ari wialij la si bula pima, maa ŋaaba ne. La bira laa dii ari ma jaŋ keŋ ŋii naaŋ le aa mu. <sup>5</sup> Mii sul la Tiina Wia duu leŋ di ma wuo jin ma tuoŋ le ari u choma woruŋ. Mii sulu duu leŋ di ma wuo keŋ kenyiri Kirisito doluŋ le.

*Nuu-kala bi maga duu keŋ yariwiin*

<sup>6</sup> Mi naaŋbiirin, la Tiina Yesu Kirisito doluŋ le, la bula pipima di ma liise ma titia nialij si he ma tuoŋ a keŋ yariwiin le, nialij si bi wialij la si bula pima ka to. <sup>7</sup> Ma titia jima ari u maga di ma ŋaa wialij titia la sii ŋaa. La si ko ma teenj, la fa bi yariwiin kene. <sup>8</sup> La fa bi nuu-kala kudiilee die di la bi tiina time. La tima ne woruŋ siifesiŋ, a na heeŋ wiiheyē ari titaŋij kala di la wuo nina la ku-cheelee, di la si hoŋo gberē ma kuŋ-kala aa che kiaa ma teenj. <sup>9</sup> La si ŋaa ŋii, u bi naga ari la bi woŋbiin kene di la laa kiaa ma teenj ne. Ama la faasa tiŋ ŋii di ma wuo to la naabuasuŋ ne. <sup>10</sup> La fa si he ma teenj, la bula pima di nuu-kala ne bi tiŋtiŋŋaa ka tiŋ, u bi maga duu dii kudiilee. <sup>11</sup> La nia ari yariwii tiŋŋaa he ma tuoŋ. Ba bi tiŋtimii ka tiŋ, see di ba joŋ ba niin he niaa wiaa le. <sup>12</sup> La Tiina Yesu Kirisito doluŋ le la bula pi niaa deŋba aa kpurise ba digilaa ne di ba keŋ ba titia woruŋ a tiŋ tiŋtiŋŋaa a wuo na ba titia kudiilee

didii. <sup>13</sup> Ama la naaŋbiirin, ma si lol wu-zoŋŋoŋ ŋaanin le.

<sup>14</sup> Di nuu ne he ma tuoŋ a bi wialij la si bula pima teniŋ deeŋ tuoŋ ka to, má jin u tiina a liise ma titia u le, a leŋ di hiisiŋ kenu. <sup>15</sup> Ma si wiaa ŋiŋaau le ari u ŋaa diŋdoŋ ne. Ama má leŋ ari u ŋaa ma naaŋbii ne aŋ kpurise u digilaa.

*Wu-kaanin*

<sup>16</sup> Laa sul la Tiina Kirisito, nii-la si keŋ yarifielaa, duu pima yarifiela-la bua-na kala le. La Tiina Kirisito pe ma kala le.

<sup>17</sup> Mi-na Pool titia ne ŋmuŋse ari mi nisiŋ aa chuolema. Mi veneē ŋaa ŋii mi tenniŋ kala le, a dage ŋii ari mi ne ŋmuŋse teniŋ deeŋ. Nla ne mi yie ŋmuŋse teŋ-la le. Mii chuolema. <sup>18</sup> La Tiina Yesu Kirisito lahoŋimo le, ma jaŋ hoŋ ari yarifielaa.

## TEN-BUNBUN-LA PƆƆL SI N̄MUNSA PI TIMOTI

<sup>1</sup> Mi-na PƆƆl n̄ n̄munse teniŋ deen̄. La Tiina Wia ari Kirisito Yesu tuot̄orun̄ l̄ n̄ ba liisemi di mi n̄aa Kirisito Yesu nan̄zɔɔ. Wia n̄ laala tita. Kirisito Yesu l̄ n̄ laa yiele.

<sup>2</sup> Mi n̄munse teniŋ deen̄ a pipi n̄-na Timoti n̄. A tin̄ n̄ si laa Kirisito wiaa dii l̄, n̄ n̄aa mi bii-titii n̄. La Nyimma Wia ari la Tiina Kirisito Yesu lah̄orimɔ l̄, ba jan̄ f̄an̄ nennige a len̄ di n̄ h̄on̄ ari yarifielaa.

*Má pɔ ma titia l̄ a mu tige nialin̄ s̄ii dage wu-nyiarin̄ l̄*

<sup>3</sup> Bua-la l̄ la fa si he Efesis l̄, mi bula pin̄ di n̄ h̄on̄ dime, an̄ ka di mi mu Masidoonia tin̄teen̄. Mi bula pin̄ di n̄ h̄on̄ dime a wuo p̄e Wia niaa l̄. Niaa d̄on̄sun̄ n̄ he dime aa nyiseba. Ba bi wutitii jon̄oo dageba. Mi bula pin̄ di n̄ bula pi niaa deen̄ba di ba len̄ ba wu-nyiarin̄ wialin̄.

<sup>4</sup> Mii che di mi bira bula pin̄ di n̄ bula piba di ba sí ba sun̄sogulo-la jon̄o he ba nyun̄ l̄, an̄ sí ba naa-balimaba doho niaa wiaa si duomo n̄ii diisu. Wiaa deen̄ba yie n̄aa niaa ken̄ nii-dolon̄ n̄. Nii-dolon̄ ma bi jan̄ p̄eba l̄ di ba n̄aa Wia yarida a laa wii-la dii u s̄ii che duu n̄aa pi u niaa.

<sup>5</sup> Mi bul n̄ii pin̄ di n̄ bula

piba di ba cho ba d̄on̄sun̄ tin̄n̄aa ari tuo-pula, a len̄ di ba tuobiinaa chesi, a bira len̄ di ba yarida wasa dol worun̄. <sup>6</sup> Niaa d̄on̄sun̄ via wiaa deen̄ba n̄ an̄ miiraa bul wu-yaayas̄in̄. <sup>7</sup> Moosis fa n̄munse wialin̄ bil di niaa tuto n̄. Niaa deen̄ba fa cho di ba dage wiaa deen̄ba a pi niaa, ama ba titia bi wialin̄ ba si n̄munsa bubuon̄ jin̄. Ba bi wialin̄ ma ba s̄ii bul chaasa jin̄.

<sup>8</sup> La jima ari wialin̄ Moosis si n̄munsa bil di niaa tuto, ba zomɔ n̄, di niaa ken̄ba kaa titin̄ ari ba si dage n̄ii. <sup>9</sup> U bira maga di la jin̄ ari wialin̄ Moosis fa si n̄munsa bil di niaa tuto, u bi n̄munsa pi tuo-pul tin̄n̄aa. Ama ba n̄munsa pi nialin̄ s̄ii chei Wia niin̄ wu-bulaa n̄. U bira n̄munsa pi ni-bon̄n̄ɔɔ, ari nialin̄ si bi Wia ka fá, ari haache diiree, ari nialin̄ si bi Wia ka to, ari nialin̄ s̄ii kpu ba nyimmaba ari ba naan̄ba, ari ni-kpuuraa. <sup>10</sup> Ba bira n̄munse wiaa deen̄ba a pi ba-liilin̄ ari ha-liilin̄ n̄, ari baala-la si gollo tuu ba d̄on̄ɔba bubuo-n̄iiree, ari nialin̄ si gollo paa niaa biirin̄ a kaa faa lel. Ba bira n̄munse wiaa deen̄ba a pi wu-nyiaraa ari dan̄sia wu-nyiaraa, ari nialin̄ si bi Wia won̄bii-titii-la ka to. <sup>11</sup> Wialin̄ mi si dagema lii Wia wu-zomɔ-la tuon̄ n̄, u si jon̄o pimi di mi bula pima. Wia n̄ ken̄ yirin̄ dunia l̄.

*PƆƆl l̄lle Wia a mu tige*

*nennige-la u si kene u le*

<sup>12</sup> Mii lolle la Tiina Kirisito Yesu, bee wiaa u ne bene di mi maga di mi bul u niin wiaa pi niaa. Nii ne tii u liisemi di mi tima pu. U ne pimi dolun di mi wuo titin tinjimin deen. <sup>13</sup> Bunbun kala ne paala mi bul wu-bonjoo u le a to naasin tutu-usu maa. Ka Kirisito ha fami nennige a liisemi di mi timaa pu. Bua-la kala le mi fa sii njaa nii, mi fa bi jin wii-la mi sii njaa. Mi fa bi u wiaa laa dii maa. Nii ne tii mi faa njaa nii. <sup>14</sup> An ka la Tiina Wia ha pemi le kinkej kinkej a len mi nja Kirisito Yesu yarida, an pe chou. <sup>15</sup> Mii che di mi bul wiin ne pima. U nja wutitii ne. U saa maga di nuu-kala jin wii-la. U ne nja: Kirisito Yesu ku tuu dunia ne duu laa haache diiree ta. Mi ne saa paala nja ba tuon ni-bomun. <sup>16</sup> An ka Kirisito Yesu ha fami nennige, mina nii-la si chaasa nja wu-bonjoo a kii nuu-kala. U nja nii a tomi le a dage niaa nii u si ken kenyiri. Nii le ne niaa donsun jan to u harin a laa u wiaa dii, a ken miisi-la si bi dere. <sup>17</sup> Ma len di la denne la Nyimma Wia an pe zilu a kaa mu wuu. U ne nii-la si dii kuoron a kaa mu deen deen. U-na bi suu. Niaa ma buu ka na. U dunjuna ne nja Wia. Ami.

<sup>18</sup> Timoti, mi bii, mii che di mi bul wii ne a pin. Nialin sii bul wiaa, Wia Din-zon-la dolun le fa bul wiaa a tigen le. Si wialin yu. N

nage laali-yuoru ne. Len di wialin nja n laali-yuori kiaa, di n kaa wuo yuo laalin worun. <sup>19</sup> Di n nii yuo laal-la, chin n yarida naan le a len di n tuobiinaa chesi. Niaa donsun bira bi ba tuobiinaa lee to, nii ne tii ba jon ba yarida ta. <sup>20</sup> Haminiiyas ari Alekizanda ma he niaa deenba tuon ne. Nii ne mi jonba he Sitaani nisin le duu dogiseba, di ba gunne wu-jimin, di ba bira si Wia jonjoo tuusu.

## 2

*Wonjii-la Wia niaa si maga di ba to a chuchule Wia*

<sup>1</sup> Siifan wii ne mii che di mi laa sipaan bula pima. U ne nja: Ma chule Wia an pe susulu duu pima kialin ma sii che. Ma chule Wia a pipi ma donsun tinjaa maa, an pe lulollu. Ma bira chule Wia a pipi nuu-kala. <sup>2</sup> Ma chule Wia pipi kuoroo ari nialin si ken dolun ma le, di la wuo hon som ari yarifela, a wuo tuto Wia a njaa wialin kala sii to Wia wonjin. <sup>3</sup> U nii zomo ne a tutore la Laataara Wia tuon. <sup>4</sup> U cho duu laa nuu-kala ta ne di ba wuo jin wutitii-la si lii u teen. <sup>5</sup> U saa maga di nuu-kala jin ari Wia nja Wii-bala ne. Ni-bala ne he Wia ari nuhuobiine pege duu kenba kaa he don le. Nii-la ne nja Kirisito Yesu. U titia ku nja nuhuobin ne. <sup>6</sup> U jon u miisin yoo suun duu laa nuu-kala ta. U ne

dagela nii ari bua-la yie ne, di Wia laa nuu-kala ta. <sup>7</sup> Nii ne tii Wia liisemi di mi n̄aa u nan̄zɔɔ a wuo heele bul wiaa deen̄ba a pi nialin̄ si bi Juu tin̄jaa n̄aa, an̄ p̄e dageba di ba laa wialin̄ dii a jin̄ wutitii. (Wutitii ne mii bul, mi bi wiaa nyia.)

<sup>8</sup> Di ma ne ku hilimi lee-na kala di ma chuɔle Wia, mii che di baalaa ne chuchuɔle Wia, baala-la si jon̄ ba titia a pi Wia a bi disinnin̄ kene, di ba ne ken̄ ba nisaa jee a chuɔle Wia. Di ba nii chuɔle Wia, u bi maga di ba nina baanin̄. U bi maga di ba bibiine yuosun̄ wiaa maa. <sup>9</sup> Mii che di haalaa ma fiɛle ba siaa an̄ p̄e ken̄ wu-jimin̄ nii ba s̄ii laale ba gennin̄ le. Genni-la ba si jan̄ laale di niaa bibagise ba yaraa, ma s̄iba laalu. Ma s̄i leje di niaa to ba nyusun̄ vɔɔnun̄ le aa bagisema, koo ma s̄i selime digilin̄kpen̄sin̄ ari ban̄zaliba-la s̄ii tul he di niaa bibagisema. <sup>10</sup> Ama má len̄ di niaa bibagise haalaa a tin̄ ba wu-zɔmɔ-la le. Nii jan̄ dage ari baa to Wia ne. <sup>11</sup> Haalaa maga di ba fiela hɔn̄ ne a gugunne Wia wiaa, a ken̄ ba titia muuri, a tuto nialin̄ si ken̄ dolun̄ ba le harin̄. <sup>12</sup> Mi bi haalaa won̄biin̄ pa di ba didage baalaa, koo di ba ken̄ baalaa dolun̄ a biben̄ba. U maga di ba hɔn̄ sɔm ne. <sup>13</sup> Wiila si tii ne n̄la: Wia fa laa sipaan̄ ta Adam ne an̄-na ta Hawa. <sup>14</sup> Sitaani ma bi Adam nyisa. Hawa ne u nyise u

juu haache le a chei Wia niin̄ wiaa u si bula piba. <sup>15</sup> Ari nii kala haala-la si jan̄ na heen̄ biirin̄ lullun̄ le, Wia jan̄ p̄eba le. Ama u maga di ba laa Wia wiaa dii a cho niaa, aa n̄aa wialin̄ s̄ii tore Wia tuɔn̄, a len̄ di ba siaa fiɛle.

### 3

*Wia niaa tuɔn̄ kuhiasin̄ si maga di ba nage nii*

<sup>1</sup> Mi biraa che di mi bul wiin̄ ne a pin̄. Wiin̄ deen̄ n̄aa wutitii ne. U maga di niaa sei wii-la. Di nuu ne fiɛse sii aa che duu ku n̄aa Wia niaa kuhian̄, tin̄tin̄-fian̄ ne u chiche nii. <sup>2</sup> Nii wiaa di nuu ne n̄aa Wia niaa kuhian̄, u tiina maga duu len̄ di u wu-n̄aalaa kala zɔn̄ ne, di niaa s̄i u yirin̄ wuo chei. U maga duu jaa ha-bala dun̄dun̄ ne. U maga di u siaa fiɛle. Uu wuo ken̄ u titia worun̄ di niaa pupu jirima. U bira maga duu wuo laa nuhuɔraa ma bibil u dia le a wuo didage Wia niaa worun̄. <sup>3</sup> U bi maga duu n̄aa si-nyuaru, a s̄i baan̄ tiina ma n̄aa. Ama u maga duu n̄aa ni-chim-chim ne a s̄i yuosu heeru ma n̄aa. U bira bi maga duu cho moribiee kin̄ken̄. <sup>4</sup> U maga di u wuo ben̄ u dia niaa nyun̄ worun̄ ne. Bira, u maga duu wuo len̄ di u han̄biisin̄ tuto u niin̄ a zizilu wii-kala le, <sup>5</sup> b̄ee wiaa di nuu ne bi u dia niaa nyun̄ wuo biben̄, u bi nialin̄ si laa Yesu wiaa dii aa hilimi nyun̄ ma wuo ben̄. <sup>6</sup> Di nuu ne ha bi Yesu wiaa laa dii a dieni, u bi maga di u tiina



ku n̄aa Wia n̄aa kuhian̄. Di u tiina n̄e ku n̄aa nialin̄ si laa Yesu wiaa dii aa hilimi kuhian̄, u jan̄ dage u titia. Duu n̄e n̄aa n̄ii, u jan̄ tel ari Sitaani si tele n̄ii. <sup>7</sup> Wia n̄aa kuhian̄ maga duu n̄aa ni-zon̄ n̄e nialin̄ si bi Wia ka chuol̄e teen̄. Di n̄ii dee n̄aa jan̄ wuo chei u yirin̄, di Sitaani to n̄ii le a ber̄e kenu.

*Nialin̄ s̄ii p̄e Wia n̄aa kuhiasin̄ le*

<sup>8</sup> Nialin̄ s̄ii p̄e Wia n̄aa kuhiasin̄ ma le, ba maga di ba ma ken̄ meli-zon̄ n̄e, a sí nii-sima ken̄ a nyinyise n̄aa. U bi maga di ba faasa nyua sinin̄ koo di ba cho moribiee kin̄ken̄. <sup>9</sup> U maga di ba ken̄ tuobiin̄-zon̄n̄oo a laa Wia niin̄ wiaa dii. Wialin̄ fa faa n̄e. Leele Wia jon̄o dagela. <sup>10</sup> U bira maga di Wia n̄aa n̄e laa sipaan̄ a ber̄ nialin̄ s̄ii che di ba p̄e Wia n̄aa kuhiasin̄ le, a na di ba maga koo di ba bi maga di ba tin̄ tin̄in̄n̄aa deen̄ba. Di ba maga, má len̄ di Wia n̄aa tuoseba di ba p̄e Wia n̄aa kuhiasin̄ le. <sup>11</sup> Haalaa maa s̄ii p̄e Wia n̄aa kuhiasin̄ le, u maga di ba ken̄ meli-zon̄ n̄e a sí n̄aa harin̄ ma gigaa. U maga di ba fiele ba siaa a p̄e ken̄ wutitii wii-na kala ba s̄ii n̄aa le. <sup>12</sup> Baalaa s̄ii p̄e Wia n̄aa kuhiasin̄ le, u maga di ba jaa ha-bala-bala n̄e. U maga di ba wuo biben̄ ba han̄biisin̄ ari ba dia n̄aa kala nyun̄ n̄e worun̄. <sup>13</sup> Di nialin̄ s̄ii p̄e Wia n̄aa kuhiasin̄ le ní tin̄ ba tin̄in̄n̄aa

worun̄, n̄aa jan̄ zizilba. Ba jan̄ wuo ken̄ nyu-duon̄ a bul wialin̄ ba si laa dii a tige Kirisito Yesu le.

<sup>14</sup> Mii che di mi ku nama n̄e leele. Ama mi bi jin̄ di mi jan̄ dieni koo di mi bi jan̄ dieni an̄-na k̄o. N̄ii wiaa, mi n̄mun̄se tenin̄ deen̄ pipima <sup>15</sup> di ma jin̄ ari Wia n̄aa mele si maga duu nage n̄ii. Wia n̄aa n̄e n̄aa nialin̄ si laa u wiaa dii aa hilimi. Wia-la si weye n̄e tiiba. Ba chin̄ wutitii-la le Wia si dageba n̄e. <sup>16</sup> Wutitii-la Wia si dagela sen̄e n̄aa wu-bal n̄e. Wii-chuol̄-la la s̄ii to fa fáa n̄e. Leele Wia n̄e jon̄o dagela. U n̄e n̄la:

Wia birime nuhuobiine n̄e a ku tuu dunia.

Wia Din̄-zon̄-la ma dage duu n̄aa Tuo-pul Tiina n̄e. Wia tin̄daaraa ma nau.

Niaa bul u wiaa dunia seme-na kala le.

Dunia n̄aa laa u wiaa dii n̄e, an̄ ka Wia jon̄u kaa jil Wia-jan̄. U si kenu kaa jil Wia-jan̄, u laa yirin̄ n̄e.

## 4

*Pool bul wiaa a tige wu-nyiari kerichiba le*

<sup>1</sup> Wia Din̄-zon̄-la paala chaasa bul ari bua-la jan̄ yi di n̄aa don̄sun̄ jon̄ ba yarida ta. Ba jan̄ to nibon̄n̄oo s̄ii nyise n̄aa, a bira to wialin̄ Sitaani s̄ii dagu. <sup>2</sup> Ba fugo didage Wia wiaa n̄e, ama ba n̄aa wu-nyiaraa n̄e. Ba tuobiinaa lor̄o n̄e

kinkeŋ kinkeŋ. <sup>3</sup> Ni-yiriba-la yie dage ari u bi maga di niaa jijaa haalaa, a bira kikise kudiilee doŋsun maa ari namii-yiriba. Ama Wia ne ta namia ari kudiilee deenba di niaa didii. Nialin si laa Yesu wiaa dii a jin wutitii, ba jan wuo diiba. Ama Wia si peba le nii ba na kudiile-la, u maga di ba laa sipaan a lolu ne an-na dii. <sup>4</sup> Kun-na kala Wia si ta zomɔ ne, u bi maga di niaa kikiseba. U maga di la lolle Wia ne an-na dii kialin kala. Wia teen ba zomɔ ne, <sup>5</sup> bee wiaa Wia tenin tuon ba bula ari kudiile-la zomɔ ne. La si chuole Wia nii an-na dii kudiile-la, ba bi disinnin kene Wia teen.

*Pɔɔl bula pi Timoti duu faasa tin Wia tintinŋaa worun*

<sup>6</sup> Di η ne jon wiaa deenba a dage η doŋsun tinŋaa si laa Yesu wiaa dii, η jan wuo ŋaa Kirisito Yesu tintinni-zon, η jan ŋaa nii-la si laa wialin dii a jonɔ he η nyun le, a kenba kaa titin bua-na kala le. Wia nin wialin ne ŋaa wu-zomɔ-la la si dagin. La laa dii, η maa toba ne. <sup>7</sup> Ama po di η si sunsoɔgulo-la si bi Wia wonbiin ka to gunnu. Viaba ta. Ken η titia worun, a gunne wiaa a ken dolun Wia wonbiin le. <sup>8</sup> N jan wuo ŋaa wiaa mua di η yaraa wuo ken dolun. Ama di η ne to Wia wonbiin le, wii-la jan pen le di η na miisin dunia deen le. Di η ne suba

maa, η jan ken miisi-la si bi dere. <sup>9</sup> Wii-la mi si bula ŋaa wutitii ne. U maga di η ma sei a laa wialin dii ne. <sup>10</sup> Laa yiele Wia-la si weye le ne. Nii ne tii laa loo a faasaa tin worun. Wia ne ŋaa nuu-kala Laataara, a saa wasanyan nialin si laa u wiaa dii.

<sup>11</sup> Chaasa bul wiaa deenba a pipi niaa di ba ŋinŋaa an pe didageba wialin maa. <sup>12</sup> N ŋaa hanbie ne, ama si lene di nuu-kala bee guguunun. Len di η wu-ŋaalaa ŋaa di niaa na ari wialin kala η si bula ŋaa wutitii ne di baa to η naa-buasun. Len di ba na di η cho niaa. Len di ba na di η ken yarida a ken tuo-pula maa. <sup>13</sup> Má hilimi a kikarime Wia wiaa a didage ba bubuosa maa, an pe bubul Wia wiaa pipi niaa, an ka di mi-na ko. <sup>14</sup> Sí Wia Din-zon-la ku-la via, ku-la u si jonɔ dii zile η le. Nialin si laa Wia wiaa dii, kuhiasin ne jon ba nisaa a dan-η le η laa ku-la. Nialin sii bul wiaa, Wia Din-zon-la dolun le bul u wiaa pin ne. <sup>15</sup> U maga di η ŋinŋaa wiaa deenba ne. Jon η nyun kala heba le di nuu-kala wuo na η si he dolun wialin le a mu sipaan nii. <sup>16</sup> Po η titia le a to wialin sii to Wia wonbiin, a dage niaa maa di baa ŋaa nii. Di η nii ŋaa nii, η jan laa η titia ta ari nialin sii jegilee nii wialin η sii bul.

## 5

*Nii si maga di nialin si laa*

*Yesu wiaa dii aa hilimi njjaa dɔŋɔ ɛ*

<sup>1</sup> Sí nii-la si njaa nihianj ɛ kpia, ama chaasa bul wiaa pu, a zilu ari u si njaa nj nyimma dɔŋɔ tiina nii. Bul wiaa a pi baala-la nj si hia ari ba si njaa nj njaanaa dɔŋsun tinjaa. <sup>2</sup> Bira bul wiaa a pi ha-nihiasinj ari ba si njaa nj naanba, a bira bul wiaa a pi hanjtolibiisinj maa ari ba si njaa nj dihaalaa. Di nj ne njaa nii, pɔ nj sí disinninj kenj.

<sup>3</sup> Yo-haalaa si bi niaa kene di ba bibenba, zizilba a pipeba ɛ. <sup>4</sup> Ama di yo-haal-la ne kenj biirinj koo nihee, u maga di ba laa sipaanj njaa wii-la Wia si si di ba njaa ne ba dia niaa teenj a wuo tinj ba niaa ari ba naabalimaba chiminj, bee wiaa nii ní tɔre Wia tuɔŋ. <sup>5</sup> Haal-la si chaasa njaa yo-haal-titii a bi nuu-kala kene duu benu, u ne jonj u yielaa kala a he Wia ɛ aa sul Wia duu pɛu ɛ bua-na kala ɛ, titanjinj ari wiiheye kala. <sup>6</sup> Ama yo-haal-la síi to u titia tuɔtɔre wu-njaalaa ɛ, u-na paala nage u suba ne anj wei, Wia teenj u bi miisinj kene. <sup>7</sup> Chaasa bul wiaa deenba a pi Wia niaa, di ba sí wu-cheeli kala kenj niaa teenj. <sup>8</sup> Di nuu-kala ne bi u naanbiirinj nyunj benj a wasanyanj u dia niaa titia, u yarida njaa pɛi ne. Nii-la si bi Yesu wiaa laa dii anj bibenj u naanbiirinj nyunj, u ne kpia tiina.

<sup>9</sup> Sí yo-haal kala yirinj njmunsa he yo-haal-la tuɔŋ, see u tiina yi jisinj mahinj

batori. U tiina maga duu jaa ba-bala dunɔunj ne. <sup>10</sup> U maga di u wu-njaalaa ma zɔŋ, ka niaa zizilu ari nii u si diesɛ u biirinj, a kikenj nuhuɔraa worunj u dia ɛ, aa huɔre Wia niaa worunj u dia ɛ, aa pɛ nialinj si juu wahala ɛ, a jonj u titia he wu-zɔŋɔŋɔŋ njaaninj ɛ. <sup>11</sup> Ama sí yo-haal-la si njaa hanjtolibiisinj yirinj njmunsa he yo-haal-la tuɔŋ. Di ba níi tinj Kirisito tinjtinjaa anj jonj harinj yia Kirisito, aa che ba njaa ba titia tuɔtɔre wu-njaalaa, baa che di ba jaa balaba ne. <sup>12</sup> Di ba ne njaa nii, ba via wii-la ba fa si laa sipaanj bul di ba janj njaa pi Kirisito ne. Di ba ne njaa nii, Wia janj dɔgiseba. <sup>13</sup> Nii dunɔunj ma dee. Ba bira bi sei di ba tinj tinjtinjaa anj gollo tuto di-niirinj. Di-bomunj ne, ba yie gigaa niaa harinj a jonj ba niinj hihe niaa wiaa ɛ a bul wialinj si bi maga di ba bul. <sup>14</sup> Nii wiaa, mi janj bul di yo-haal-la si njaa hanjtolibiisinj, di ba jaa balaba a lulul biirinj a bibenba, a titinj ba dia tinjtinjaa. Di ba ne njaa nii, la dindɔmɔ Sitaani bi janj wuo na wonbiinj a bul wubɔŋ kala a tigela ɛ. <sup>15</sup> Yo-hanjtolibiisinj dɔŋsunj paala via Kirisito ne anj miira tuto Sitaani. Nii ne tii mi bul nii. <sup>16</sup> Ama haal-na kala si laa Yesu wiaa dii, di yo-haalaa ne he u dia niaa tuɔŋ, u maga duu benj ba nyunj ne. U bi maga duu jonjba pi nialinj si laa Yesu wiaa dii aa hilimi di ba bibenba. Nialinj si laa

Yesu wiaa dii aa hilimi, ba maga di ba biben yo-haala-la si bi niaa kene di ba bibenba ne.

<sup>17</sup> Wia niaa nihiasi-la sii tinj ba tintinjaa woruj, u maga di nialinj si laa Yesu wiaa dii aa hilimi zizilba ne. U bira maga di ba zizil ba tuonj nialinj si faasa bul Wia wiaa anj pe didage niaa le, <sup>18</sup> bee wiaa ba bula nja ne Wia teninj tuonj. Ba si,

“Di neenj nii nmoo miaa pinj,  
u bi maga di nj woc u  
niinj to  
duu si dii.”

Ba bira nmunja ari tintinna maga duu laa u time ne. <sup>19</sup> Di nuu ne jonj cheerinj a pi nialinj si laa Yesu wiaa dii aa hilimi ba kuhiasinj, si jegile nii tiina teenj, see di niaa balia koo batori nja wii-la danja. <sup>20</sup> Wia niaa nihiasinj kala saa sii nja haache, bul ba teenj nialinj si laa Yesu wiaa dii aa hilimi sipaanj. Di nj nja nii, fawullunj janj kenj ni-kaanaa. <sup>21</sup> Mi bul nii pinj Wia ari Kirisito Yesu ari Wia tinjdaaraa Wia si liisa sipaanj ne. Mii sulunj ari siiffiesinj di nj to wiaa deenja, a si niaa kaa pore wii-na kala nj sii nja le. Jonja ba kala nja nibala nj teenj. <sup>22</sup> Fiele nj siaa a po di nj si pese liise nuu a jonj nj nisaa danj le duu tinj Wia tintinjaa. Di tiina ne nja haache wii, ka nj liisu, nj ma janj pe juu u haache-la le. Si disinninj nja wiinj deenj le.

<sup>23</sup> Bira si liinj dundunj nyua. Ama nyunyua sininj mua

mua, a tinj nj luorunj si yie wiwii bua-na kala wiaa.

<sup>24</sup> Di niaa donsunj ne nja haache, ba haacheba yie ku lii pulumunj lima lima ne. Ba haacheba-la saa janj dage ari ba janj dii niaa deenja sariya. Ama di niaa donsunj ne nja haacheba, nj bi janj jinj ba wiaa see tapulii-la ba si janj dii ba sariya. <sup>25</sup> Nii titia ne di niaa donsunj ne nja wu-zonjoc, niaa yie naba lima lima. Niaa donsunj wu-zonjoc ma yie faa ne. Ama chee donj ne ba janj chaasa lii pulumunj tuonj.

## 6

*Wu-nyari kerichiba ari wutitii kerichiba*

<sup>1</sup> Nialinj kala si nja yosunj, u maga di ba zizil nialinj si yocba ne. U maga di ba nja nii di nuu-kala si wonjbiinj na a wuo bul wu-bonj kala a mu tige Wia yirinj le, koo a mu tige wialinj la sii dagema le. <sup>2</sup> Yosula si kenj nihiasinj ba laa Yesu wiaa dii, u bi maga di ba mimaase ba tinjaa a tinj ba kala si laa Yesu wiaa dii le. U paala chaasa mage di ba tinj tintinjaa woruj ne a piba, bee wiaa nialinj si laa Yesu wiaa dii, ba ne yosula cho.

Di nj nii dage Wia wiaa, dage wiaa deenja kala pi niaa, a chaasa bul wialinj kala a piba. <sup>3</sup> Nii-la kala si bi wutitiiba-la la Tiina Yesu Kirisito si bul daga anj dage wu-tanii, wialinj si bi la Wii-chuolunj wonjbiinj ka to, <sup>4</sup> u tiina kenj u titia duu yuge

ne, ari u jin wiaa an bi wii-kala jin. U cho wu-kaa-lerin kinken kinken, a njjaa gon wialin si bi siifan wiaa naa le. Nii jan len di nialin sii jegile nii ba teen, di ba ken yaribierin. Ba yuyuo dono a tutuuse dono, a bibiine wu-bonono dono le. <sup>5</sup> Njaa deenba nyun bira bi tin. Nii ne tii ba yie ken wiaa lilere nii. Ba bira bi wutitii ma jin. Ba biina ba jan chuole Wia ne a na moribiee. <sup>6</sup> Wutitii, di njaa ne chuole Wia an len di ba tuon tore kialin ba si kene nyun, nii jan wuo peba le worun, <sup>7</sup> be wiaa la si ko dunia, la bi kun-kala kaa ko. Nii wiaa, di la ne suba, la bira bi kun-kala kaa lii dunia le aa mu. <sup>8</sup> Di la ne ken kudiilee ari gennin, u maga la len di ba magela ne. <sup>9</sup> Ama nialin si cho di ba ken kiaa dunia deen le, Sitaani yie nyiseba he bere le ne. Ba cho di baa to ba tuotore wunjaalaa le ne, wiaa deenba jan dogiseba. Ba yie lere njaa tuu tinteen a chichei ba kala ne worun. <sup>10</sup> Di njaa ne cho moribiee, wu-bon kala yie njjaaba le ne. Moribiee chonun ne njaa wu-bon kala naaluno. Njaa donsun jon ba yarida ta ne a tin ba si cho moribiee wiaa. Ba ken ba titia mu he heen le ne nii.

### *Pool chagile Timoti*

<sup>11</sup> Ama nj-na si njaa Wia tintinnu, si wiaa deenba kala njaa. Len di nj siin fiene di nj njjaa wialin si njaa wutitii ba a tuto Wia wonjin,

a chin nj yarida naan le, a cho njaa, a ken kenyiri, a ken nj titia muuri njaa sipaan. <sup>12</sup> He dolun kinken a faasa chin nj yarida naan le, a nage njaa si yie fa a ken dono kii nii. He dolun di nj wuo laa miisi-la si bi dere. A tin miisin deen wiaa ne Wia yirin. Nii ma dunduja dee. Ama bua-la le nj si ku laa Yesu wiaa dii, a wuo bubul nii njaa sipaan, nj chaasa bula piba di nj laa wialin si njaa wutitii dii ne. <sup>13</sup> Mii sulun Wia sipaan ari Kirisito Yesu ma sipaan di nj to wialin kala mi si bula pin. Wia ne jon miisin a pi kun-kala. Kirisito Yesu ma ne njaa ni-la fa si chin u yarida naan le Ponso Paalit sipaan, ni-la fa si chin Rom kuori-balin nyun Judiya tinteen le, a wuo bul wutitii a pu. <sup>14</sup> He dolun an to wiaa deenba ari tuo-bala, di njaa si wuo jon cheerin pin. Ken nii naan le a kaa mu yi tapulii-la la Tiina Yesu Kirisito si jan miira ko. <sup>15</sup> Wia jan len duu ko bua-la le u si bene duu maga duu ko. U dunduja ne njaa Wii-balin sii ben kun-kala. U ne njaa kuori-balin a ken kuoro kala dolun. U ne ken dolun duu len di nuu-kala tuon tore. <sup>16</sup> U dunduja ne bi suu. U he pulun-bal tuon ne. Nuukala bi dime wuo mu. Nuukala ha buu na, nuu ma kala saa buu wuo na. U maga di njaa kala zizilu ne. U ne ken dolun dunia le a kaa mu wuu. Ami.

<sup>17</sup> Bula pi nialin si ken

kiaa dunia deen ɛ di ba sí bee guguune nialin si bi kun kenɛ, a sí ba yielaa kala jonɔ he kialin ɛ, bæɛ wiaa nuu-kala bi jan wuo jin u dia si jan chinɛ nii. Ama u maga di baa yiele kialin si he Wia teenɛ. U nɛ kenɛ zile a jonɛ kun-kala a pila di la kaa ninii sima. <sup>18</sup> Bula pi nialin si kenɛ kiaa di ba wu-zɔŋŋɔɔ ma mage kialin ba si kenɛ. Lenɛ di ba kenɛ zile a ŋaa siri di ba ŋaa kiaa pipi niaa, di ba kala ninii sima. <sup>19</sup> Nii nɛ ba jan wuo ŋaa a che kiaa a bil ba titia ɛ Wia-jan ɛ di ba wuo na kialin nyuurun maachie. Nla nɛ ba jan wuo laa miisi-la si ŋaa mii-titii.

<sup>20</sup> Tɔɔ, Timoti, pɔ worun a tinɛ ŋ tinɛtimii-la Wia si jonɛ he ŋ nisinɛ ɛ. Sí nialin sí ŋaa gonɛ ɛ pɛ, nialin si bul wialin si bi Wia wonɛbiin ka to a kenɛba kaa lɛɛ. Nialin sí ŋaa nii yie nyia wiaa a biine wu-jimii nɛ nii. <sup>21</sup> Niaa dɔŋsunɛ to wu-jiminɛ deenɛ ɛ nɛ a jonɛ ba yarida ta.

Wia lahɔrimɔ ɛ ma jan hɔŋ ari yarifielaa.

## TEN-LIA-LA PƆƆL SI NMUNSA PI TIMOTI

*Ten-lia-la PƆƆl si nmunsa  
pi Timoti*

<sup>1</sup> Mi-na PƆƆl ne nmunse teniŋ deen. Mi n̄aa Yesu Kirisito nan̄zɔɔ n̄e. La Tiina Wia tuɔtɔrun ɛ n̄e u liisemi di mi n̄aa u nan̄zɔɔ. Wia bula pila di u to Yesu Kirisito ɛ n̄e a jon̄ miisin̄ pila. U tin̄mi n̄e di mi bul miisin̄ deen wiaa a pi n̄aa.

<sup>2</sup> Mi n̄munse teniŋ deen a pipi n̄-na Timoti. N̄ n̄aa mi bii-choolii n̄e. La Ny-  
imma Wia ari la Tiina Yesu Kirisito lahorimɔ ɛ, ba jan̄ f̄an̄ nennige a len̄ di n̄ hon̄ ari yarifiɛlaa.

*PƆƆl bula pi Timoti duu  
chin̄ wialin̄ ɛ u si laa dii*

<sup>3</sup> Mii lɔlle Wia kin̄ken̄. Mi si tima pi Wia nii, mi tuɔbiinaa yie chesi n̄e. Nii titia n̄e mi doho n̄aa ma fa tima pipi Wia. Bua-na kala ɛ di mi n̄fi chuɔɛ Wia, mi yie liliisi n̄ wiaa n̄e. <sup>4</sup> Mi liise yi ari bua-la ɛ mi si sii n̄ teen, n̄ faa yel n̄e. Nii n̄e tii mi cho di mi ku nan̄ ari siifiesin̄, di mi tuɔn̄ faasa tɔre worun̄. Mi tuɔbiinaa yie he n̄ teen̄ titan̄in̄ ari wiiheye kala n̄e. <sup>5</sup> Mi liise yi nii n̄ si laa Wia wiaa dii ari siifiesin̄. N̄ nahima Lowis ari n̄ naan̄ Yunis n̄e laa sipaan̄ laa Wia wiaa dii. Mi jima ari n̄ ma chin̄ nii ɛ n̄e. <sup>6</sup> Wia jon̄ kun̄

n̄e a dii zile n̄ ɛ. U n̄aa nii n̄e bua-la ɛ mi si jon̄ mi nisin̄ dan̄-n̄ ɛ. Mii liisin̄ di n̄ bira ken̄ ku-la worun̄. <sup>7</sup> Wia bi u Din̄-zɔn̄-la jon̄o hela ɛ di la fifá fawullun̄, ama duu pela ɛ di la wuo ken̄ dolun̄ n̄e la miisin̄ ɛ, a bira cho n̄aa, a p̄e ken̄ la titia worun̄.

<sup>8</sup> Di n̄ n̄fi bul la Tiina Yesu wiaa pipi n̄aa, sí len̄e di hiisin̄ kenin̄ a tin̄ Yesu wiaa. Bira sí len̄e di hiisin̄ kenin̄ a tin̄ mi ma wiaa. Kirisito wiaa n̄e tii ba ken̄mi tɔ dia. Ama sei di la kala na heen̄ a tin̄ Yesu wu-zɔmɔ-la wiaa. Wia dolun̄ si heen̄ ɛ nii, nii n̄e tii n̄ wuo na heen̄ nii. <sup>9</sup> Wia n̄e laala ta a yirela di la n̄aa u n̄aa. U bi naga di Wia to la wu-zɔn̄n̄ɔɔ ɛ n̄e a laala ta. U titia tuɔtɔrun̄ ɛ n̄e u fála nennige a laala ta. Yesu Kirisito ɛ n̄e u to a n̄aa nii pila. U jima ari u jan̄ n̄aa nii pila faafaa kala n̄e, ka dunia-na suomi. <sup>10</sup> L̄eɛɛ la Laataara Kirisito Yesu sene ko dunia. U si ko nii, la wuo na Wia zile wiaa si nage nii n̄e. Kirisito si ko, u kpu suun̄ dolun̄ kala n̄e. U bul wu-zɔmɔ-la pila a to nii ɛ dagela ari u n̄e pila miisin̄, a bira dagela di la n̄e suba maa, la jan̄ bira sii a ken̄ miisi-la si bi d̄ere. <sup>11</sup> Yesu wu-zɔmɔ-la wiaa n̄e tii Wia liisemi di mi n̄aa u nan̄zɔɔ, a len̄ mi bul wiaa deen̄ba a pipi n̄aa a didageba. <sup>12</sup> Mi síi bul nii len̄e mi nina heen̄ n̄e. Ama hiisin̄ bimi kene a tin̄ hee-la mi si na wiaa. Mi jin̄ niila mi síi to n̄e. Mi si jon̄

mi titia he u nisij le nii, mi laa dii ari u jan wuo benmi woruŋ halii a kaa mu yi tapulii-la Kirisito Yesu si jan miira ko. <sup>13</sup> Wialin kala mi fa si dajin, ba ŋaa wutitiiba ne. Chin wialin le a tutoba. La di Kirisito Yesu si ŋaa kubala nii, he doluŋ aŋ chin ŋ yarida naan le, a cho niaa maa. <sup>14</sup> Wia Diŋ-zoŋ-la hela le ne. Wia joŋ wutitii he ŋ nisij le ne. Ben wutitii-la u Diŋ-zoŋ-la doluŋ le.

<sup>15</sup> Ŋ jima ari bua-la le mi fa si he Esia tinteen le niaa kala ne fa viami, Fijilas ari Homojinis ma fa he niaa deenba tuoŋ ne. <sup>16</sup> Ama baal-la ba sii yire Onisiiforos, u ne pemi le woruŋ a ŋaa mi nyuŋ faasa nyaase. Ba si kenmi kaa to dia nii, hiisin fa buu kene a tin mi wiaa. La Tiina Wia jan fau nennige, ba di u dia niaa kala. <sup>17</sup> U si ku tuu Rom le, lee-la ba si tomi dia, u suomo chichemi ari siifesiŋ aŋ-na ku nami. <sup>18</sup> Wia jan leŋ di la Tiina Kirisito fau nennige sariya che-diilin. Ŋ ma jin nii u si faasa pemi le ne bua-la le mi fa si he Efesis le.

## 2

*Pool bula pi Timoti duu ŋaa laali-yuori-zomuŋ*

<sup>1</sup> Ŋ-na mi bii Timoti, mii che di ŋ ken doluŋ. Dol-la lii Kirisito Yesu teen ne. U lahõrimo wiaa ne tii ŋ ken doluŋ deen. <sup>2</sup> Mi si bul Wia wiaa pin, niaa yuga ne a fa he dime a pe nii. Bul wiaa

deenba ŋ si nia a pi nialin si ken wutitii. Niaa deenba saa jan bira wuo bul wialin a pi ba doŋsuŋ tinŋaa maa. <sup>3</sup> Ŋ si ŋaa Kirisito Yesu laali-yuori-zomuŋ, ŋaa siri di la diŋ kala na heeŋ. <sup>4</sup> Laali-yuoru kala si he u tintinŋaa le a titin, u yie chiche duu tin nii di nii-la si joŋu tintinŋaa le, duu tuoŋ tore ne. Nii wiaa u yie bi che duu tin tintimii doŋ kala a pe tintimii-la u sii tin le. <sup>5</sup> Bira na fifaari-la sii fa, u bi jan wuo fa a laa u time, see di u to wialin ba si bile pi fifaaraa ba tuto le. <sup>6</sup> Bira na ba-paari-la si faasa titin ne maga duu laa sipaŋ dii бага ku-falaa. <sup>7</sup> Bibiine wiaa deenba mi sii bul. La Tiina Yesu jan pen le di ŋ wuo jin wiaa deenba kala bubuoŋ.

<sup>8</sup> Joŋ Yesu Kirisito wiaa he ŋ nyuŋ le. U fa ŋaa Devit doho nuu ne. U si suba, u bira sii suuŋ le ne. Wia wu-zomõ-la mi si bula pima ne dage wiaa deenba. <sup>9</sup> A tin Yesu wu-zomõ-la wiaa, mi na heeŋ. Ba dogisemi a nage mi ŋaa ni-boŋ ne. Ba kenmi voo ne. Ama ba bi jan wuo ken Wia niin wiaa voo bil. <sup>10</sup> A tin Yesu wu-zomõ-la wiaa mi nyalime wii-kala ne. A tin nialin Wia si liisa wiaa ne mi ŋaa nii, di Yesu Kirisito wuo laaba ta. U si laaba ta nii, ba jan na Wii-balin doluŋ a kaa mu deen deen.

<sup>11</sup> Wii-la mi sii che di mi bula pima ŋaa wutitii ne. U ne ŋla:

Di la di Yesu kala ne suba,



la duu kala ne jan sii a  
kenj miisinj.

<sup>12</sup> Di la nii na heen an  
nyalime hee-la,  
la duu kala jan dii  
kuorunj.

Koo di la ne si la bi Yesu jinj,  
u ma jan bul di u bila jinj.

<sup>13</sup> Di la ne bi wutitii ka to,  
u-na ha kenj wutitii,  
bee wiaa u bi jan wuo  
nyise u titia.

*Pool bula pi Timoti  
duu naa tintinni-titii Wia  
tintinjaa le*

<sup>14</sup> Bula pi nialinj si laa Yesu  
wiaa dii di ba liliisi wiaa  
deenba worunj, a sulba di ba  
bira sí wiaa kaa lilere. Nj si  
bul nii, lenj di Wia ne naa nj  
siada tiina. Ma si kenj wiaa  
lilere nii, u nii bi nuu-kala  
lee pe, ama u yie lenj nialinj  
sii jegili wialinj titel ne. <sup>15</sup> Di  
nj ne mu Wia teenj di nj dage  
nii nj si tinj nj tintinjaa, he  
nj dolunj kala duu wuo na  
ari nj naa tintinni-titii si bi  
hiisinj ka fá, a bira lenj duu  
wuo na ari nj dage wialinj  
si naa wutitiiba ne worunj.

<sup>16</sup> Di niaa ne naa gonj aa  
bul wialinj si bi bubuonj kene,  
wialinj si bi Wia wonbiinj ka  
to, liise nj titia nialinj le. Wiaa  
deenba ba sii bul yie kikiri  
niaa ne ba jonj harinj yia Wia.

<sup>17</sup> Wialinj ba sii dagu jan teeli  
a nage naawiilinj si yie keeri  
nii a dii nanpilinj kala. Niaa  
balia ne he niaa deenba tuonj  
aa dage wiaa deenba. Ba  
yiraa ne Haminiyas ari Fali-  
itis. <sup>18</sup> Ba lenj wutitii wonbii-  
la ne anj bul ari bua-la le

niaa si jan suu anj sii suun  
le paala kieli ne. Ba si dage  
nii naa nialinj donsunj si laa  
Yesu wiaa dii jonj ba yarida  
ta ne. <sup>19</sup> Ama dia gentinj-  
duo-la Wia si bile pi u niaa,  
u bi jan wuo jigisi. Wialinj ba  
si njmunsa heu le ne njla: “La  
Tiina Wia jinj nialinj si naa u  
niaa ne.” Ba bira njmunsa  
ari u maga di nii-la kala si si  
u naa Wia nuu ne, duu lenj  
wu-bonjoo njaaninj.

<sup>20</sup> Niaa nage gbanjsi-la si  
he niaa diisinj le ne. Donsunj  
naa selime gbanjsinj, donsunj  
naa taasi-gbanjsinj, donsunj  
naa gbanjsinj, donsunj ma  
naa henjsinj. Donsunj ba yie  
jonjo bil ne a kaa didii kiaa  
che-zonjoo, anj kenj donsunj  
ma kaa didii kiaa tapulii-na  
kala. <sup>21</sup> Nii wiaa di nuu ne  
liise u titia wu-bonjoo le, u  
jan nage gbanjsi-la ba si kaa  
didi kaa che-zonjoo. Nii-la  
si nage nii naa tuo-pul tiina  
ne u kuhianj teenj. U jan  
wuo peu le worunj. U kuhianj  
jan lenj duu titinj tintinj-zonj-  
na kala. <sup>22</sup> Nj sii yiele wiinj  
deenj, liise nj titia wu-bomo-  
la le bapucsa ari ha-toloo  
si yie cho di baa naa. Ama  
loo chiche di nj kenj tuo-pula  
a wuo chinj nj yarida naan  
le, a pe cho niaa a lenj di  
ma di niaa kenj nii-bala. Ma  
di nialinj si kenj tuo-pula, sul  
Wia duu peba le, má kala loo  
chiche wiaa deenba. <sup>23</sup> Ama  
liise nj titia nialinj sii lere wu-  
yaaraa le. Nj jima ari wiaa  
deenba yie lenj niaa suomo  
yuyuo donjoo ne. <sup>24</sup> Nii-la si

tima pipi la Tiina Wia, u bi maga duu yuyuo yuosun. U maga duu ken zile ne nuu-kala le, a wuo didage niaa worun, an pe ken kenyiri. <sup>25</sup> Di η nii dage wiaa a pi nialin si bi η hariη china, len di η siaa fiεε. N bi pɔɔ, Wia jan len di ba na wonbiin a wuo birima lii ba haacheba le a ku jin wutitii-la. <sup>26</sup> Ba si ηaa nii, ba jan bira wasa ken wu-jimin a ken ba titia liise Sitaani beré-la le. U fa kenba ba tuto u tuɔɔrun le ne.

### 3

*Bua-la dunia si jan dere kpage ne*

<sup>1</sup> Timoti, jin bua-la le dunia si jan dere kpage ne. Bua deen le wiaa jan kperi. <sup>2</sup> Niaa jan cho ba titia an pe cho moribiee. Ba jan bibigisi ba titia le, ba siaa bi jan susu nuu-kala maa, ba jan tutuuse niaa maa. Ba bi jan tuto ba nyimmaba ari ba naanba niin. Ba bira bi jan jin zile. Ba bi jan ken tuɔpula ma Wia sipaan. <sup>3</sup> Ba bi jan cho niaa. Ba bira bi jan sei di ba di niaa ηaa sima. Ba jan chichei niaa yirin maa. Ba bi jan ken ba titia. Ba jan tere. Ba jan bere wu-zon kala. <sup>4</sup> Ba jan ηaa zenbe timma, ba bi jan ken tuɔbiinaa. Ba jan ken sii-duon. Ba bi jan cho Wia. Ba tuɔɔre wiaa dunduna ne ba jan cho di baa ηaa. <sup>5</sup> Ba yie chuchuele Wia ne niaa tuon, ama ba wu-ηaalaa yie dage ari ba bi Wia dolun

jin. Liise η titia niaa deenba tuon. <sup>6-7</sup> Wu-nyiari tinηaa deenba donsun yie juu niaa diisin ne a nyinyise ha-niyaaraa. Wu-bonηɔɔ nyage haala-la bil. Ba to ba tuɔɔre wu-ηaalaa le. Tuɔɔre wu-ηaalaa-la yuga ne. Di nuu-kala nii che u dage haalaa deenba, ba yie jegile nii u teen a chiche di ba gunne wu-jimin, ama ba bi wutitii kala wuo gunne.

<sup>8</sup> Baalaa balia ne fa he dime. Ba yiraa ne Janis ari Janbas. Ba fa bi Moosis hariη china. Ba si bi Moosis hariη china nii, nii titia ne baalaa deenba ma bi wutitii-la hariη china. Niaa deenba nyun bi tin. Ba bi ba yarida naan le wuo chin. <sup>9</sup> Ama niaa deenba bi jan wuo ηaa nii a mu sipaan, bee wiaa nuu-kala jan na di ba ηaa niyayaase. Nii titia ne nialin ma fa na Janis ari Janbas fa si yaara nii.

*Pɔɔl chagile Timoti*

<sup>10</sup> Ama η-na to wialin mi sii dage ne, an bira to mi wu-ηaalaa maa. N na mi wu-ηaalaa si nage nii, a na wii-la mi sii che dunia le, a bira na nii mi si chin mi yarida naan le, a bira na mi si ken kenyiri ma nii. N na mi si cho niaa maa, a bira na nii mi si ken nyalima. <sup>11</sup> N na nii ba si to naasin dogisemi ne ari nii mi si na heen. N ma jin nii mi si na heen ne Antiok ari Icooniam ari Lisita tinteen kala le ne. Ba si to naasin dogisemi nii

ne, ka mi nyalime. Ama mi Tiina Wia liisemi ne ba kala le. <sup>12</sup> Nuu-kala sii che duu to Wia wonjiin a len di ba di Kirisito Yesu naa kubala, niaa jan to naasin dogisu. <sup>13</sup> Ama ni-bonhoo ari nialin sii nyise niaa jan wasa njaa wu-bonhoo. Ba jan nyise niaa an pe nyinyise ba titia maa. <sup>14</sup> Ama n-na he dolun an chin wialin n si gunna naan le, wialin n si laa dii di ba naa wutitii. Siba jono ta. N jin nialin si dagin wialin ne worun. <sup>15</sup> A suomi n hanjiirin kala le a kaa mu, n jin Wia tenin ne. U bi disinnin ken. U ne wuo dagin Kirisito Yesu wiaa a bira len n laa u wiaa dii duu laan ta. <sup>16</sup> Wia tenin kala lii Wia teen ne. Wia ne jon u Din-zon-la a he niaa le ba wuo nmunseba. Wia ten-la wuo dage niaa wutitii wonjiin. Di nuu ne naa wii chei, u wuo dagu wii-la u si naa chei a jon cheerin pu, a bira wuo dagu wonjiin-la si maga duu tuto, a wuo dagu nii u si jan wuo naa a ken tuo-pula Wia sipaan a mu sipaan. <sup>17</sup> Nla ne jan wuo pe nii-la si tima pipi Wia le, duu si wii-kala naa chei, a naa siri duu tin tintin-zon-na kala.

#### 4

<sup>1-2</sup> Mii sulun di n bul Wia wiaa. Naa siri di n bul buana kala a jon n nyun kala heba le. Di niaa naa siri di ba jegili, koo di ba bi siri naa, n-na bul. Bul wiaa ba

teen an kpiaba le, a bira naa di ba nyun nyaase. N sii naa nii, ken kenyiri a didage niaa worun. Mi si sulun nii, Wia ari Kirisito Yesu ne naa la siada tinnaa. Yesu ne naa nii-la si jan dii niaa kala sariya. Nialin si weye ari nialin si suba kala ne u jan dii ba sariya. U ne jan miira ko dunia a dii kuorun. Nii ne tii mii sulun. <sup>3</sup> Naa wialin mi si si di n naa a tin wialin si jan naa le. Bua kubala jan yi, niaa bi jan jegili wutitii-la ba si jan dageba. Ama ba jan to ba titia tuotorun le. Ba jan che a kese kerichiba a yuge. Niaa deenba jan dageba wialin ba si cho di baa nii. <sup>4</sup> Ba bi jan cho di ba nii wutitii-la. Ba jan jon harin yia wutitii-la an cho di baa nii sunsooguloo. <sup>5</sup> Ama n-na he dolun a ken n titia worun wii-na kala le. Di heen ne juun maa, nyalime. N si naa Wia tintinnu nii, bul Yesu wu-zomoo-la a pi niaa. Tin n tintimii-la kala worun a kaa mu.

*Pool bul wiaa a tige u titia le*

<sup>6</sup> Bua-la le mi si jan suu a lii dunia le, u yie ne. <sup>7</sup> Mi yuo laali-zon-la ne worun. Mi fa mi faniin dere ne. Mi chin mi yarida naan le ne. <sup>8</sup> Leele mii gbera mi time ne. La Tiina Wia jan jon time deen pimi tapulii-la tuo-pul timma-la si jan sii suun le. U ne naa sariya diiri-titii. Mi dununa dee u jan jon time-la pa, ama nialin kala si chou a gbera la

Tiina Kirisito duu miira kɔ dunia, ba ma jan laa time deen.

<sup>9</sup> He dolun an kɔ mi teen lima, <sup>10</sup> beɛ wiaa Dimas viami ne. U cho dunia kiaa ne. Nii ne tii u viami ta an mu Tesalonaaka. Kiresiken ma mu Galiisia, Taatis ma mu Dalimeesa. <sup>11</sup> Luuk dunɗunɗa ne he mi teen. Di η ne kɔ mi teen, pe ken Maak kaa kɔ. U jan wuo ηaa wiaa yuge a pimi. <sup>12</sup> Mi tin baal-la ba sii yire Takikas ne u mu Efesis. <sup>13</sup> Di η nii kɔ, pe ken mi geri-la ari mi tenni-la kaa kɔ. Mi jono pi baal-la ba sii yire Kaapis a he Turɔwas le ne. Tenni-la ba si ken pusun purun kaa ηaa ne mi wasa chiche. <sup>14</sup> Libiri kubala ba sii yire Alekizanda dogisemi ne worun. U si ηaami ηii, Wia jan kpuse u purun. <sup>15</sup> Pɔ η titia ari libiri-la le. La si bul Wia niin wialin pi niaa, u lii la harin ne. <sup>16</sup> Bua-la le mi si laa sipaan bul wiaa di mi laa mi titia, bua-la le ba sii dii mi sariya, nuu-kala bi mi harin china. Ba kala viami ta ne. Mii sul Wia duu si ba dogisu a tin wialin ba si ηaa. <sup>17</sup> Ama Wia chin mi harin a pimi dolun mi wuo bul Wia niin wialin kala kala. Mi bul wialin a pi nialin si bi Juu tinηaa ηaa ma ne ba kala nii. Wia liisemi ni-bɔnɔɔ nisin le. <sup>18</sup> Wia jan liisemi wu-bɔnɔɔ kala le. U jan benmi worun a kenmi joiin kaa mu he u kuorii-la tuɔn Wia-jan le. Wia yirin jan yire bua-na kala le, a kaa mu wuu. Ami.

### *Chuɔlaa*

<sup>19</sup> Chuɔle Pirisila ari Akuila pimi, a chuɔle Onisiiforɔs ari u dia niaa kala maa. <sup>20</sup> Irasitas tuo mi teen. La si jon wonbiin, u ka Korinti le ne, an ka mi len Turɔfimɔs ma Miliitas le. U faa wiile ne. Nii ne mi len dime. <sup>21</sup> He dolun an kɔ, ka di yibiinin-la juu. Nialin ba sii yire Yubulas ari Pudens ari Laanis ari Kilaadia, ba maa chuɔlun, ari nialin kala si laa Yesu wiaa dii.

<sup>22</sup> Wia jan len di ma duu honun zɔn. U lahɔrimɔ le u jan pen le.



mu tige u niaa ɛ. U bula ari Kiriiti niaa kala ɲaa wu-nyiaaraa nɛ a ɲaa ni-bɔmɔ, luobii tinɲaa, aɲ pɛ kɛɲ yari-wiin maa. <sup>13</sup> Wii-la u si bula ɲaa wutitii nɛ. Nii wiaa, faasa kpiaba ɛ di ba chin wutitii-la ba si laa dii ɛ kpaɲ kpaɲ. <sup>14</sup> Bira bula piba di ba sɪ Juu tinɲaa naabalimaba wiaa si nage sunsɔgulɔɔ nii, a sɪ nialin si via wutitii-la harin to. Wutitii-la lii Wia teen. <sup>15</sup> Ni-zɔmun teen kun-kala zɔmɔ nɛ. Disin timmala si bi Wia wiaa laa dii teen kun-kala ɲaa ku-bɔɲ nɛ. Ba tuɔɲ lɔrɔ, ba tuɔbiinaa kala bi chese. <sup>16</sup> Baa bul ari ba jin Wia nɛ, ama ba wu-ɲaalaa daga ari ba bi Wia jin. Ba wu-ɲaalaa lɔrɔ, ba bi nialin niin wiaa ka nii, ba bi wu-zɔɲ kala ka ɲaa.

## 2

*Wutitii-la si maga di la tuto*

<sup>1</sup> Ama ɲ-na Taatis didage wutitii-la nɛ. <sup>2</sup> Bula pi banihiasi-la si hɛ ma tuɔɲ di ba leɲ di ba siaa fieɛ, a kɛɲ meli-zɔɲ, a kɛɲ ba titia woruɲ, a jin wialin ba si laa dii woruɲ, a cho niaa, a kɛɲ kenyiri. <sup>3</sup> Bula pi hanihiasi-la ma di ba ɲaa wialin si daga ari baa to Wia wonɲiin nɛ. U bi maga di ba gigaa niaa harin koo di ba ɲaa si-nyuaraa. Bula piba di ba didage wialin si zɔmɔ, <sup>4</sup> di ba wuo dage ha-toloo ma di ba cho ba balaba ari ba biirin, <sup>5</sup> a wuo kɛɲ ba titia woruɲ,

a sɪ wu-liilin ɲinɲaa, a ben ba dia niaa woruɲ, a kɛɲ zile, a tuto ba balaba niin woruɲ, di nuu-kala sɪ wuo bul wu-bɔɲ kala a tige Wia wu-zɔmɔ-la ɛ. <sup>6</sup> Bul nii titia a pi bapuoɔsaa maa di ba ma kɛɲ ba titia woruɲ. <sup>7</sup> N-na titia Taatis, wii-na kala ɲ sɪ ɲaa ɛ, leɲ di niaa na ɲ wu-ɲaalaa si zɔmɔ di ba tuto. Wialin kala ɲ sɪ dagu, leɲ di ba na ari ɲ kɛɲ wutitii ari siifɛsin. <sup>8</sup> Wialin kala ɲ sɪ bul, bul ari tuɔtɔruɲ, di nuu-kala sɪ wuo kaa lɛrɛ. Di ɲ nɛ ɲaa nii, ɲ dindɔɲɲɔɔ bi jan na wonɲiin a bul wu-bɔɲ kala a tigela ɛ. <sup>9</sup> Bula pi yosuɲ ma di ba tuto nialin si tiiba niin ɛ, a ɲaa wialin kala si maga di ba tinɲaa tuɔɲ tɔrɛ ba nyuɲ. U bi maga di ba laa wiaa bubul ba teen. <sup>10</sup> Ba sɪ ba tiinaba kiaa gigaa. Wialin kala ba sɪ ɲaa, u maga di ba leɲ di nialin si tiiba laaba dii ari ba kɛɲ wutitii. Di ba nɛ ɲaa nii, ba jan wuo leɲ di nuu-kala jin ari la Laataara Wia wu-zɔmɔ-la ɲaa wutitii nɛ.

<sup>11</sup> La Tiina Wia lahorimɔ guu chaane nɛ. Uu che duu to nii ɛ nɛ a laa nuu-kala ta. <sup>12</sup> Wia wu-zɔmɔ-la dagela di la sɪ wu-bɔɲɲɔɔ ɲaa, a sɪ la titia jɔɲo hɛ dunia wiaa ɛ, a jima kɛɲ la titia, a kɛɲ wutitii, a tuto Wia wonɲiin dunia deen ɛ. <sup>13</sup> La si hɛ dunia deen ɛ nii, laa gbɛrɛ tapulii-la la Laataara Yesu Kirisito, nii-la si ɲaa Wia, jan kɔ ari u tula. Laa yieɛ tapulii-la nɛ. La tuɔɲ ma jan tɔrɛ duu

ne kɔ. <sup>14</sup> La wiaa ne tii u suu, duu laala ta la haacheba le a piise la disinnij ta, di la ku n̄aa tuɔ-pul timma u sipaan. Uu che di la n̄aa nialij si jon ba nyun he wu-zɔŋŋɔ le. <sup>15</sup> Wia si jon dol-la pin, kenu a bul wiaa deenba. Chaasa bul wiaa pi nialij ŋ sii dagu. Di ba n̄aa wii chei, dageba. Sí leŋe di nuu-kala bee guununj.

### 3

*Maa n̄aa wu-zɔŋŋɔ bua-na kala le*

<sup>1</sup> Bula pi Wia niaa di ba jon ba titia pi nialij si kenj dolun ba le ari nialij sii benba a tutoba, a n̄aa siri di ba n̄aa wii-na kala si zɔmɔ. <sup>2</sup> Bula piba di ba sí wu-bɔŋ kala bula a tige nuu-kala le. U bi maga di ba cho yuosun, ama u maga di ba dii nanɔŋsun ne a leŋ di ba siaa fiele nuu-kala teen, <sup>3</sup> bee wiaa la ma titia fa n̄aa ni-yaara ne, a fa bi Wia niin to. La fa keru Wia wonbii-la ta ne a n̄aa wu-bɔŋŋɔ ne. La fa to la tuɔɔre wu-ŋaalaa harin ne. La fa cho di niaa juu wu-bɔŋŋɔ a fa kenj yaribierin dɔŋɔ le. Niaa fa berela, la ma fa berɛba. <sup>4</sup> Ama la Laataara Wia dage nii u si kenj zile ari nii u si cho niaa. <sup>5</sup> U laala ta. U bi naga ari la si n̄aa tuɔ-pul timma ne tii u laala ta. Ama u sii fá niaa nennige ne tii u laala ta. U laala ta ne, bee wiaa ba fola Wii-chuɔle liin Wia Din-zɔŋ-la dolun le. Nii dage ari Wia bira wasa lulla ne, la

kenj mii-falin u teen. <sup>6</sup> Wia to la Laataara Yesu Kirisito le ne a jon u Din-zɔŋ-la a hela le worun. <sup>7</sup> U lahɔrimɔ le u n̄aa nii di la kenj tuɔ-pula u sipaan, a wuo kenj miisi-la si bi dere, wii-la la sii yielu le. <sup>8</sup> Wiin deen sene n̄aa wutitii ne. Mii che di ŋ paala chaasa bul wiaa deenba, di nialij si laa Wia wiaa dii, di ba n̄aa siri di ba n̄aa wu-zɔŋŋɔ bua-na kala le. Wiaa deenba n̄aa wu-zɔmɔ ne. Ba jan wuo pe niaa le.

<sup>9</sup> Má leŋ ni-yaari wu-kaalerin, a sí ma naabalimaba gentine si duomo diisu. Ma sí yuosun he a sí dɔŋɔ yuo a tin wialin Moosis fa si ŋmunsa bil di niaa tuto le. Ba n̄aa wu-peiba ne, ba bi nuu le pe. <sup>10</sup> Di nuu he ma tuɔŋ aa che duu kenj ma nyusun yage dɔŋɔ, yiru a kpurise u digilaa. Di u ne via an ŋin̄aa, bira yiru a lere u digilin le lia, an liise ŋ nisin u le. <sup>11</sup> Nii-la sii n̄aa nii via wutitii-la ne aa n̄aa haacheba maa. U wu-ŋaalaa jan dii u titia sariya.

#### *Wu-kaanin*

<sup>12</sup> Di mi ne tin Atimas koo Tikikas duu kɔ ŋ teen, he dolun an kɔ mi teen Nikopolis le, bee wiaa mi biina mi jan hon dime waarin chɛnsila tuɔŋ. <sup>13</sup> Di Ziinas sariya didiiri-la ari Apɔlos nii ven ba wonbiin, peba le worun. Piba ku-la kala ba sii che. <sup>14</sup> Leŋ di la niaa ma gunne di ba ŋin̄aa wu-zɔŋŋɔ a wuo pipe nialij si maga di ba pe

le. U maga di ba tinj tintin-  
zongoo duu ken doho.

<sup>15</sup> La di nialin kala si hono,  
laa chuolun. Chuole nialin  
kala si laa Yesu wiaa dii a  
chola. Wia jan pema kala le  
worun.



## TEN-LA PŌOL SI NMUNSA PI FALIIMŌŊ

<sup>1</sup> Mi-na Pōol ari la naanbie Timoti ne nmunse tenin deen a pi n-na Faliimōŋ. N ne nna la nanḡon-choolun, a bira nna la ḡonḡo tiina la tinḡinḡaa le. Ba kenmi to dia a tin Yesu Kirisito wiaa.

<sup>2</sup> La bira nmunse tenin deen a pipi nialin si laa Yesu wiaa dii aa hilimi n dia le, a bira nmunse tenin deen a pipi la dihaala Afia ari la dibaala Akipas. Akipas nna la laali-yuoroo ḡonḡo ne Kirisito tinḡinḡaa le.

<sup>3</sup> La Nyimma Wia ari la Tiina Yesu Kirisito lahōrimo le, ma jan hōŋ ari yarifielaa.

*Pōol lolle Wia a mu tige Faliimōŋ le*

<sup>4</sup> Bua-na kala le di mi nii chuole Wia, mi ma yie lolle Wia a pipin ne. <sup>5</sup> Mii nii nii n si cho Wia niaa, ari nii n si laa la Tiina Yesu Kirisito wiaa dii. Nii ne mii lolle Wia ne a tin n wiaa. <sup>6</sup> N si bul wialin a pi niaa ḡonsun nii, mi yie sul Wia a pipin, di nii jan len di la jin wu-zōŋ-na kala la si na Kirisito teen. <sup>7</sup> Mi naanbii-choolii, n si cho Wia niaa worun, nii nna mi ma tuōŋ tōre kinken, mi nyun ma nyaase, be wiaa n len Wia niaa tuōŋ pin di-bala ne.

*Pōol sul Faliimōŋ duu ken Oniisimas worun*

<sup>8</sup> La di Kirisito si nna kubala, mi fa jan ken dolun di mi chaasa dagin wii-la si maga di n nna. <sup>9</sup> Mi-na Pōol ne paala chin Yesu Kirisito naasin le an leele he sarika le a tin u wiaa. Nii ne tii mi fa jan wuo chaasa fugun di n nna wii-la si maga di n nna. Ama mi si choŋ nii, mi jan sulun di n nna wii-la ari tuōtorun. <sup>10</sup> Wii-la ne nna: Mii sulun a tin mi bie Oniisimas wiaa. U naga ari mi titia bie ne, be wiaa, mi le ne u to a laa Yesu wiaa dii bua-la le mi si he sarika le. <sup>11</sup> Bua kubala le u fa he n teen ne an bi tinḡimii kala tima pin. Ama leele, duu ne ko n teen, u jan wuo nna wiaa yuge a pin, a len mi ma tuōŋ tōre. <sup>12</sup> Mi jan len u miira ko n teen ne a nage mi titia Pōol fa si ko n teen nii. Nii wiaa, kenu worun ari n fa si jan kenmi nii. <sup>13</sup> Mi fa cho duu he mi teen ne. Mi ha si he sarika le nii a tin Yesu wu-zōmō-la wiaa, u fa jan wuo pemi le ari n fa si jan pemi le nii. <sup>14</sup> Ama mi bi che di mi fugun di n pemi le. Mii che di n to n titia tuōtorun le ne a pemi le. Nii wiaa mi bi jan nna wii-kala see di n seye.

<sup>15</sup> Oniisimas si lii n teen, u bi diene, ama u jan miira ko n teen leele. Duu ne miira ko, u jan he n teen deen deen. <sup>16</sup> Oniisimas nna n yomo ne an leele miira ko n teen. Ama leele u kii yomo. U nna la naanbii-titii si laa Yesu wiaa dii. Mi

cho u wiaa woruŋ. N jaŋ chou woruŋ, ari u si ŋaa ŋ yomo ari ŋ naanbie kala ne la Tiina Yesu teen. <sup>17</sup> Di ŋ ne bene di mi ŋaa ŋ nanɔŋ-fiaŋ, duu ne miira kɔ, kenu woruŋ ari ŋ fa si jaŋ kenmi ŋii. <sup>18</sup> Duu ne ŋaa wii cheyiŋ, joŋo cheu a tiŋ mi wiaa. Duu ne dii ŋ chimiŋ maa, mi jaŋ timiŋ. <sup>19</sup> Mi-na Pɔɔl, mi titia nisiŋ ne ŋmunɔse teniŋ deen a pipiŋ. Mi jaŋ timiŋ. Sí yu ari mi-na Pɔɔl le ne ŋ to ken miisiŋ Yesu teen. Nii wiaa mi ne laa ŋ miisiŋ ta. <sup>20</sup> Mi naanbii, mi saa suluŋ, pemi le wiŋ deen le. La Tiina Yesu Kirisito doluŋ le, len di mi tuɔŋ tɔre.

<sup>21</sup> Mi laa dii ari mi si ŋmunɔse wiŋ deen piŋ, ŋ jaŋ ŋaa wii-la mi sí che. Mi jima ari ŋ jaŋ paala ŋaa kii ŋii. <sup>22</sup> Pe che dia a ŋaa siri bilmi le, beɛ wiaa mii yiele ari ma si chuɔle Wia pipimi ŋii, Wia jaŋ laa ma kala sulaa a len di mi miira kɔ ma teen.

*Pɔɔl ari niaa dɔŋsuŋ  
chuɔle Faliimóŋ*

<sup>23</sup> Baal kubala ma ne he daha. Baa yire Epafiras. Ba kenu tɔ dia a pemi le a tiŋ Yesu Kirisito wiaa ne. Uu chuɔluŋ. <sup>24</sup> Maak ari Arisitaakis ari Dimas ari Luuk, ba ma ŋaa mi tiŋtinni-dɔŋsuŋ ne. Ba maa chuɔluŋ.

<sup>25</sup> La Tiina Yesu Kirisito lahorimo le, ma jaŋ hoŋ ari yarifiɛlaa.

## TEN-LA BA SI NMUNSA PI HIIBURU TINŊAA

*Wia Bie ne kii Wia tinɗaaraa*

<sup>1</sup> Faafaa-la Wia bul wiaa pi la naabalimaba a yuge ne. Wonɓie-la u si to bul wiaa piba ma yuga ne. U to nialin fa sii bul wiaa, Wia Diŋ-zɔŋ-la dolun ɛ ne a bul wiaa deenɓa piba. <sup>2</sup> Ama ɓeele tapulaa deenɓa, u to u Bie ɛ ne a bul wiaa pila. U leɗe u Bie deen ɛ keŋ kuŋ-kala dolun. Wia sii che duu ŋaa dunia, u leɗe u Bie ne ŋaa. <sup>3</sup> Wia si keŋ tula-la, u ne u Bie ma keŋ. Nii Wia si naga, nii titia ne u ma nage. Wialin u sii bul keŋ dolun. Dol-la ne u kaa beŋ kuŋ-kala si he dunia ɛ. U si ku tuu dunia, u piise niaa disinnin ta ne. U si ŋaa nii dere, u jila hoŋ Wia seme, ni-duon di-honun. <sup>4</sup> U ne kii Wia tinɗaaraa kala. Yiri-la u si laa Wia teen, u ma ne kii yiri-la Wia tinɗaara-la si laa.

<sup>5</sup> Wialin Wia si bula a tigeu ɛ ne ŋla:

“Ŋ ŋaa mi Bii ne,  
mi ne lulun jinin.”

U saa bira bula a tigeu ɛ:

“Mi jan ŋaa ŋ Nyimma,  
ŋ ma jan ŋaa mi Bii.”

Wia tinɗaari beɛ ɛ ne Wia ha bul wiin deen? Ba kuŋ-kala ɛ dee Wia bul wiin deen. <sup>6</sup> Bua-la ɛ u si leɗe u

Bie ku tuu dunia, u bira bula a bul,

“Wia tinɗaaraa kala jan tuu kpirimi u sipaan ɓa chuɗu.”

<sup>7</sup> Wialin Wia si bula a mu tige u tinɗaaraa ɛ ne ŋla: U si,

“Mi leɗe mi tinɗaaraa nage pelin  
ari nyin-gelin ne.”

<sup>8</sup> Ama u si bul wiaa a tige u Bie ɛ, ŋla ne u bul: U si,

“Ŋ kuoron jan he dime a kaa mu deen deen.

Wia tuɗ-pul kaa ne jan ŋaa ŋ kuori-daantiga di ŋ kaa beŋ ŋ niaa.”

<sup>9</sup> “Ŋ cho wutitiiba ne a kii wu-nyiarin.

Nii ne tii ŋ Nyimma Wia liisin

di ŋ yuga kii ŋ doŋsun tinŋaa a bibenɓa.”

<sup>10</sup> Wialin ba bira si bula a tige u Bie ɛ ne ŋla: Ba si,

“La Tiina, ŋ ne ta tinteen bunɓun-la,  
a ta wia nyun maa.

<sup>11</sup> Wia nyun ari tinteen kala jan ɓel, ama ŋ-na jan he dime.

Ba kala jan birime kubinaa a kose, ari gennin sii kose nii.

<sup>12</sup> Ba jan nage gerin di ŋ kaa kpen.

Ŋ jan keŋba kaa birime, ari geri-zɔŋ-la si yie birime nii. Di u zomun ne lia, u bira bi ku-falii ŋaa.

Ama ŋ-na bi jan ko di ŋ birima. Ŋ bi jan ko di ŋ hiesa.”

13 Wialin Wia bira si bula pu ne ŋla: U si,

“Ku hɔŋ mi sɛmɛ, ni-duon di hɔnɔŋ,

see mi yuo dii ŋ dindɔŋŋɔɔ kala dɛrɛ.”

Wia tinɔdaari bɛɛ lɛ ne Wia ha bul wiin deen? Ba kuŋ-kala lɛ dee Wia bul wiin deen.

14 Wia tinɔdaara-la kala ŋaa Wia tinɔtinnaa nɛ. Wia yie tinɔba ba mu pɛ nialin u sii che u laa ta lɛ nɛ.

## 2

### *Yesu ne ŋaa la Laataara*

1 A tin wiin deen wiaa, u maga di la keŋ wialin la si nia woruŋ, a si hariŋ miiru.

2 Wialin Wia tinɔdaaraa fa si bula pi Iziral tinŋaa fa dolie nɛ woruŋ. Di nuu nɛ fa bi baa to, koo di nuu nɛ fa chei ba kuŋ, ba yie dɔgisu nɛ woruŋ.

3 Wia sii che duu laala ta, nii ŋaa wu-bal ne a kii wialin Wia tinɔdaara-la si bula. Di la nɛ bi wii-la seyɛ, wii-kala bira tuo duu laala ta, see duu dɔgisɛla. La Tiina Yesu nɛ laa sipaan bul wii-la. Nialin ma si nii wii-la bula pila nɛ.

4 Wia ma titia daga ari wii-la ba si bula ŋaa wutitii nɛ. U dage u doluŋ a ŋaa wu-kpuŋkperisin ari wu-magilaa kala. Wia ma to u tuɔɔruŋ lɛ ne a leŋ niaa keŋ doluŋ, di ba tin ba tinɔtinnaa u Din-zɔŋ-la doluŋ lɛ.

5 U bi naga Wia jon tintee-falii-la si jan ko a he Wia tinɔdaaraa nisin lɛ ne di ba biben. Tintee-falii-la wiaa

ne la bulaa pima. 6 Wia tenin tuɔŋ sɛmɛ dɔŋɔ ba bula,

“Bɛɛ kuŋ ne nuhuobiine ŋaa ŋ bibiine u wiaa, bɛɛ kuŋ ne nuhuobiine bie ma ŋaa ŋ bibenu?”

7 N si ta nuhuobiine, ŋ leŋe Wia tinɔdaaraa kiiu mua nɛ,

ama ŋ leŋe nuhuobiine nɛ keŋ yirin ari doluŋ.

8 N jon kuŋ-kala nɛ a he u nisin lɛ u biben.”

N si jon kuŋ-kala he nuhuobiine nisin lɛ nii, ŋ leŋe u keŋ ba kala doluŋ nɛ.

Ama lɛɛɛ la na di nuhuobiine ha bi kuŋ-kala ka beŋ.

9 La na ari Wia fa leŋe Wia tinɔdaaraa nɛ kii Yesu mua. Ama lɛɛɛ Wia leŋe Yesu yuge a keŋ yirin maa, bɛɛ wiaa u na heŋ nɛ a suu. Wia lahɔrimɔ lɛ ne u fa ŋaa nii, duu wuo laa nuhuobiinee kala nyuŋ a suu.

10 Kialin si he dunia lɛ, Wia nɛ ŋaaba a tiiba maa. U sii che di u biirin yuge a ko u teen, u leŋe ba sipaalaara chaasa na heŋ nɛ woruŋ duu sɛnɛ wuo laaba ta.

11 Nii-la si piise niaa disinnin ta, ari nialin disinnin u si piisa ta, ba kala nyimma ŋaa kubala nɛ. Nii nɛ tii u ŋaa nii a wuo yire ba kala u naanbiirin, ka hiisin buu kɛnɛ.

12 Wialin Yesu si bula pi Wia ne ŋla:

“Mi jan yire ŋ yirin mi naanbiirin teen.

Nialin si hilime aa chuɔluŋ tuɔŋ mi jan dennin.”

13 U bira bula,  
 “Mi jaŋ laa ŋ wiaa kala dii,”  
 a bira bul,  
 “Nami ari ŋ biiri-la kala ŋ si  
 joŋo pimi.”

14 Biiri-la Wia si joŋo pi  
 Kirisito keŋ chaliŋ ari yaraa  
 ne. Nii titia ne Kirisito ma  
 keŋ chaliŋ ari yaraa duu suu  
 a wuo yuo dii Sitaani, nii-  
 la si keŋ suuŋ doluŋ, 15 a  
 wuo laa niaa ta, nialiŋ sii  
 fá suuŋ a ŋaa suuŋ yosi ba  
 miisiŋ kala le. 16 Nii wiaa  
 u bi naga ari u ko duu pe  
 Wia tinɗaaraa le ne, ama u  
 ko duu pe Abiraham doho  
 niaa le ne. 17 Nii ne tii  
 u birime nuhuobiine a ma  
 nage u naanbiiri-la, ba wi-  
 wi-kala le. U ŋaa nii duu  
 wuo ku ŋaa nialiŋ si tima  
 pipi Wia niaa nyuŋ kuhian  
 u naanbiirin tuoŋ ne a wuo  
 fába nennige, a wuo ŋaa ni-  
 titii, a wuo pe nialiŋ le Wia  
 woŋbiin le, a wuo leŋ di Wia  
 joŋ u baaniŋ u fa si kene a  
 tin niaa haacheba wiaa ta.  
 18 U titia na heeŋ ne woruŋ.  
 Sitaani ma fa magisu. Nii  
 wiaa u jaŋ wuo pe nialiŋ  
 Sitaani sii magise le.

### 3

#### *Yesu ne kii Moosis*

1 Nii wiaa mi naanbiirin si  
 bi disinniŋ kene Wia sipaan,  
 Wia ne yirela di la ko u  
 teen. U saa maga di ma  
 joŋ Yesu wiaa he ma nyuŋ  
 le. U ne ŋaa Wia nanɗoo a  
 ŋaa nialiŋ si kpu pusun pipi  
 Wia kuhian maa, woŋbii-la  
 la sii to le. 2 U to nii-la si  
 liisu niin woruŋ ne a tima

pu, ari Moosis fa si to Wia  
 niin nii a tima pi Wia niaa.  
 3 La jima ari nii-la si saa  
 dii-zomuŋ ne maga duu laa  
 yirin a kii dia-la u si saa. Nii  
 titia ne yiri-la Yesu si laa ne  
 yuga kii Moosis yirin. 4 Dia-  
 na kala si he dime, nuu ne  
 saa. Ama kialin kala si he  
 dime, Wia ne ŋaa. 5 Moosis  
 fa ŋaa tintinni-titii ne Wia  
 niaa kala tuoŋ a tima pipiba.  
 U ne fa bul wiaa piba a tige  
 wialiŋ si jaŋ ko le. 6 Ama  
 Kirisito-na fa ŋaa Wia Bii ne,  
 a ŋaa ni-titii a tima pipi Wia  
 niaa. Di la ma ne keŋ nyu-  
 duoŋ a tin kialin la sii yielu  
 wiaa, la ma jaŋ wuo ŋaa u  
 dia niaa.

*Nii la si jaŋ ŋaa a na wiese  
 Wia teen*

7 Nii wiaa, Wia Diŋ-zoŋ-la  
 bula pila ari,

“Jiniŋ, di ma ne nii Wia  
 yiikoro,

8 ma sí siiduon keŋ, ari  
 nialiŋ fa si lii Wia  
 hariŋ girin tuoŋ si keŋ  
 siiduon nii.

Bua-la le ne ba magisemi  
 a ŋaa mi na baaniŋ.

9 Lee-la ma naabalimaba  
 magisemi ne woruŋ,  
 a na mi wu-ŋaalaa jisin  
 mahin balia.

10 Nii wiaa ne mi baaniŋ  
 sii niaa deenba kala  
 nyuŋ. Nii ne mi bul,

‘Ba tuobiinaa yie ŋaa ba  
 yenŋi ne,  
 ba bi mi niin wiaa ka to.’

11 Nii ne mi na baaniŋ a  
 ŋmiese a bul,

'Mi bi jaŋ piba di-honun di ba hono wiesi da.' "

12 Mi naanbiirin, má pɔ ma titia le di ma tuon nuu sí wu-bon biinu. Di u ne ŋaa nii, u bira bi jaŋ laa Wia wiaa dii. U jaŋ jon harin yia Wia-la si weye. 13 Ama má pe dono le tapulii-na kala a lii jinin a kaa mumu, di wu-bonɔɔ sí wuo nyise ma kun-kala a wuo ŋaa di ma ŋaa siiduo wiaa Wia sipaan. 14 Wialin la si laa dii bunbun, di la ne kenba nii a kaa mu wuu, la di Kirisito kala jaŋ ŋaa kubala. 15 Wialin ba si bul Wia tenin tuon ne ŋla:

"Jinin, di ma ne ko di ma nii Wia yiikoro,  
 ma sí siiduon ken ari nialin fa si lii Wia harin si ken siiduon nii."

16 Kubɛɛba ne nii Wia yiikoro aŋ lii Wia harin? Nialin fa si to Moosis harin a lii Ijipiti tinteen le ne ŋaa nii. 17 Kubɛɛba ne fa leŋe Wia baanin sii ba nyun jisin mahin balia? Nialin fa si bi u niin wiaa to le ne leŋe u baanin sii. Ba ne u leŋ ba suu girin tuon nii. 18 Kubɛɛba le ne Wia ŋmiesɛa he ari ba bi jaŋ na wiese-la u fa sí che u joŋo pi u niaa? Nialin fa si bi Wia niin wiaa ka to le ne u bul nii. 19 La na ari ba si bi Wia wiaa laa dii ne tii ba bi wiese-la wuo na Wia fa sí che u joŋo pi u niaa.

**4**

1 Wia lele bula pila ari la

jaŋ wuo ko u teen a na wiese. Nii wiaa má leŋ di la ken la titia worun duu sí wuo na di la donsun ŋaa wiaa chei. Di la ne ŋaa wiaa chichei, la bi jaŋ na wiese u teen. 2 Wia wu-zomɔ-la ba si bula pila, ba fa bula pi la naabalimaba ma ne. Ama ba bi wialin laa dii. Nii wiaa wialin biba le pe. 3 La nialin si laa wialin dii jaŋ wuo mu Wia teen a na wiese-la ari Wia si bul nii. U si,

"Mi na baanin, nii ne tii mi ŋmiesɛ ari  
 ba bi jaŋ na wiese-la mi fa sí che mi joŋo piba."

Ama la jima ari bunbun-la Wia si ŋaa dunia dere, u tin u tintinŋaa kala dere ne. 4 Wialin ba si bula Wia tenin tuon a tige che-pemin cheen ne ŋla: Ba si,  
 "Wia si ŋaa dunia dere, u wiese ne che-pemin cheen."

5 Lee-la titia Wia bira bula,  
 "Ba bi jaŋ na wiese mi teen."

6 Nii-na niaa donsun jaŋ na wiese-la. Ama nialin si laa sipaan nii Wia wu-zomɔ-la bi wiese-la na, bee wiaa ba bi wialin ba si nia to. 7 Nii ne Wia bira liise tapulii kubala. Tapulii-la ne ŋaa jinin. U to la naabalima Devit le ne a bul wiin deen. U si,

"Jinin, di ma ne ku nii Wia yiikoro, ma sí siiduon ken."

8 Bua-la le ba naabalima Josua fa si ŋaa Iziral tinŋaa sipaa-laara, u biba wiese pa. Di u ne fa piba wiese, Wia

fa bira bi jaŋ bul tapulii doŋ wiaa. <sup>9</sup> Nii wiaa, tapulii doŋ ne he dime, Wia niaa si jaŋ wiesi. <sup>10</sup> Nii-la kala si na wiese Wia teen, u tiina leŋ u tiŋtiŋŋaa ne aŋ wiesi, ari Wia ma si tiŋ u tiŋtiŋŋaa dere aŋ wiesi nii.

<sup>11</sup> Má saa leŋ di la he doluŋ a na wiese-la Wia sí che duu joŋo pila. Nialin fa si bi u niin wialin to, ba bi wiese-la na. Di la ma ne bi u niin wialin ka to, la ma bi jaŋ na wiese-la. <sup>12</sup> Wia niin wiaa weye a keŋ niin a kii sia niirin balia kala sí dii nyagaga. U yie wuo too juu nuhuobiine, a keŋ u dima ari u miisin kaa pore doŋo le. U yie wuo jin nuhuobiine tuon ari u tuobiinaa kala. <sup>13</sup> Kuŋ-kala tuo si jaŋ wuo keŋ u titia faa Wia teen. Wia na kuŋ-kala ne, u teen ba kala he pulumuŋ tuon ne. U jaŋ leŋ di la dage la wu-ŋaalaa kala a pu.

*Yesu ne ŋaa nialin si tima pipi Wia niaa nyuŋ kuhian*

<sup>14</sup> Yesu ne ŋaa Wia Bie a bira ŋaa nialin si tima pipi Wia niaa nyuŋ ba tuon kuhian. U ne ŋaa kuhiasila tuon kuhian maa. U si tiŋ u tiŋtiŋŋaa dere, u jil wia nyuŋ a mu Wia teen. La kuhian si yuga nii, má leŋ di la keŋ wialin la si laa dii woruŋ. <sup>15</sup> Yesu bi nage nialin si kpu pusun pipi Wia kuhiasin si bi niaa nennige ka fa nii. U ne wuo fála nennige a jin wialin sí walimela, bee wiaa ba ma

walimu ne. Sitaani paala magisu ne, ama u bi wu-bon kala ŋaa. <sup>16</sup> Nii wiaa má leŋ di la keŋ nyu-duon a wuo yi lee-la Wia si hono, duu wuo fála nennige. Di la ne juu wii-kala, u jaŋ fála nennige a pela le.

## 5

<sup>1</sup> Nialin si kpu pusun pipi Wia kuhian-na kala, ba yie liisu niaa tuon ne. U he nuhuobiine ari Wia pexe a laa kiaa pipi Wia, aŋ pe kpu pusun a piise niaa disinnin tita. <sup>2</sup> U siaa yie fiele niaa nyuŋ ne woruŋ, nialin sí ŋaa wu-bonŋo aŋ bi jin, ari nialin si yenŋe Wia wonbii-la le, bee wiaa u ma titia yie ŋaa wiaa chichei ne. <sup>3</sup> A tiŋ nii wiaa ne u yie kpu pusun pipi Wia a tiŋ u titia haacheba wiaa, di Wia piise u disinnin ta, a bira kpu pusun pipi Wia maa a tiŋ ni-kaana-la kala wiaa, di Wia piise ba ma disinnin ta. <sup>4</sup> Nu-kala bi jaŋ wuo liise u titia a titin tiŋtimin deen. Wia ne yie liise tiina ari u fa si liise Eroŋ nii. <sup>5</sup> Nii titia ne Kirisito ma bi u titia kaa yuge duu tiŋ tiŋtimii-la nialin si kpu pusun pipi Wia kuhian sí tiŋ. Ama Wia ne liisu. Wii-la Wia si bula pu ne ŋla: U si,  
 “Ŋ ŋaa mi Bii ne,  
 jinin mi ne luluŋ.”  
<sup>6</sup> Wia tenin tuon seme doŋo maa u bula,  
 “Ŋ nage nii-la fa si kpu  
 pusun pipi Wia doŋo  
 ba sí yire

Melikizedeki ne.

N jan tima pipi Wia niaa nyuŋ a kaa mu deen deen.”

<sup>7</sup> Yesu fa si he u miisinj le dunia deen le, u chuole Wia a faasa yel sii-liirinj a sul Wia, u-na nii-la si jan wuo laa u miisinj ta duu si suu. Yesu seye duu ŋaa wialinj sii tɔre Wia tuonj ne, nii ne tii Wia laa u Wii-sula. <sup>8</sup> Yesu fa ŋaa Wia Bii ma ne, ama u na heen ne woruŋ. U si na heen nii, u ku jinj nii u si jan ŋaa a to Wia niinj woruŋ. <sup>9</sup> U si to Wia niinj kala dere, u ku ŋaa nialinj kala ma sii to u niinj sipaa-laara, a laaba ta a kaa mu deen deen. <sup>10</sup> Nii ne Wia liisu duu ŋaa nialinj si tima pipi Wia niaa nyuŋ kuhianj, a tima pi Wia ari Melikizedeki fa si timaa pi Wia nii.

*Má waa Wia wiaa le, anj sí harinj jono yia Wia wu-zomɔ-la*

<sup>11</sup> La kenj wiaa yuge ne di la bul a tige wiinj deen le. La bi jinj nii la si jan wuo bul wii-la di ma jinj u bubuonj, bee wiaa leele ma digilaa kparima ne. Ma bi wialinj bubuonj wuo jinj lima lima. <sup>12</sup> Ma si nii Wia wu-zomɔ-la, u diene ne. U fa maga di ma ne didage niaa, ama ma bira che nuu ne duu didage ma Wia niinj wialinj ma si nia bunbuŋ. U naga maa che yilinj ne di ma wase. Ma ha bi ku-duoruŋ wuo didii. <sup>13</sup> Bii-mulo ne yie wiwase yilinj, u bi ku-duoruŋ wuo didii. Nii

titia ne ma ma nage. Ma ma ha bi wu-duoruŋ wuo jijin. Wialinj ba si dagema jan lej di ma kenj tuɔ-pula Wia sipaanj. <sup>14</sup> Nihianj ne wuo ku-duoruŋ didii. Nialinj si waa dere Wia wiaa le nage nihiasinj ne. Nii ne tii ba yie wuo jinj wu-bonjɔɔ ari wu-zonjɔɔ pɛge, bee wiaa ba venee ŋaa wu-zonjɔɔ ne.

## 6

<sup>1</sup> Nii wiaa la si wuo jinj bunbuŋ wialinj ba si bula pila a tige Kirisito le nii, u maga di la kiele mu sipaanj ne a wuo waa dere Kirisito wiaa le. Ma si leŋe di la bira suomo bubul wialinj la si jan ŋaa a birima lii la haacheba-la le, anj lej la wu-bomɔ-la la fa sii ŋaa. La bira bi che di la suomo bul nii la si jan to a laa Wia wiaa dii. <sup>2</sup> La ma bira bi che la bul nii ba si jan fola Wii-chuole liinj, ari nii ba si jan jonj nisaa danja le, ari nii niaa si jan suu anj sii suuŋ le, ari nii Wia si jan dii niaa sariya a jonj cheerinj pi donsunj a kaa mu deen deen, a bira jonj miisinj pi donsunj ma a kaa mu deen deen. <sup>3</sup> Di Wia ne seye, la jan kieli bunbuŋ wialinj anj mu sipaanj. <sup>4</sup> Di Wia ne wuo suri niaa siaa di ba wuo jinj u wiaa, a wuo laa wialinj si lii Wia teenj dii, a bira kenj u Din-zonj-la maa, <sup>5</sup> a wuo nii Wia niinj wiaa a jinj ari u niinj wialinj zomɔ ne kinjenj, a bira wuo na Wia kuorii-la si jan ko doluŋ si mage nii ba miisinj le leele ŋla, <sup>6</sup> di ba ne



jin wiaa deenba kala an bira jon hariŋ yia Wia wu-zomola, εε ne ba jan bira ŋaa di ba birima lii ba haacheba ε, an bira ko Wia teen? Ba bira bi jan wuo miira ko Wia teen. U saa naga ari ba bira wasa kpaase Wia Bie mere daa-geese nyun ne. Ba si ŋaa nii, ba bira leŋe hiisin diu ne niaa tuon. <sup>7</sup> Di duonun ne nii he tinteen ε, tintee-la yie wuo nyua duon lii-la. U si nyua lii-la nii, kiaa wiwase lee-la. Nialin sii pere lee-la ma nina kiaa worun. Tintee-la zom piba ne. Wia ne pe tintee-la ε. <sup>8</sup> Ama di yan ari sosun dunɗun nii nyu lee-la, nii-na tintee-la bi zom pi nialin. Wia via tintee-la wiaa ne. Ba jan chaane nyinin he duu dii buru.

<sup>9</sup> Laa bul wiaa deenba kala, ama ma-na, la nandon-chooloo, ma-na kpia ne. Ma bi tintee-loru-la wiaa la si bula naga. La ŋaa yarida ari Wia jan laama ta, <sup>10</sup> bee wiaa Wia ken wutitii. U bi jan bee kieli tintimii-la ma si tima pu. A tin u wiaa ma cho u niaa ne a tima pipiba, an haa titin nii. <sup>11</sup> La saa cho di ma kun-kala fiese siin aa yiele kialin ma si jan na, a jin worun ari ma sene jan naba, a ken nii naan ε a mu dere. <sup>12</sup> La bi che di ma ken yariwiin. Nii ne tii la bul nii. Laa che di ma to nialin si laa Wia wiaa dii faafaa naa-buasun ne. Niaa deenba chin wialin ba si laa dii ε ne a nyalima nii halii, a wuo na

kialin Wia fa si bula piba ari ba jan na.

*Wialin Wia si bula sene ŋaa ne*

<sup>13</sup> Faafaa-la Wia bil u niin a pi Abiraham an ŋmiese. Kun-kala fa tuo a yuga a kii u-na Wia duu ŋmiese. Nii ne u ŋmiese u titia. <sup>14</sup> U ŋmiesa a bul, "Wutitii, mi jan pen le a len di ŋ doho niaa pun." <sup>15</sup> Nii ne Abiraham ken kenyiri a wuo nyalime, a sene na wii-la Wia fa si bula pu ari u jan na. <sup>16</sup> Ama di nuhobiinee nii che di ba ŋmiese, ba yie ŋmiese ku-la si kiiba ne. Di ba ne ken wii ma kaa lilere, ba yie ŋmiese ne. Di ba ne ŋmiesa, wii-la sene chin. <sup>17</sup> Wia fa bula pi u niaa ari u jan jon kiaa piba. U fa sii che di ba chaasa jin ari u bi jan ken u niin birime, ama u sene jan jon kialin piba, u ŋmiesa dan ne. <sup>18</sup> Wia saa ŋaa wiaa balia ne. U si wuo bul wii-la an pe ŋmiese nii, wiaa deenba baliamin bira bi jan ko di ba birima, bee wiaa Wia bi wiaa nyia. U bul wiaa deenba a pi la nialin si fa mu Wia teen, di la laa la titia dime ne. U bul nii pila di la nyun nyaase ne a tin kialin Wia si bula ari u jan ŋaa pila wiaa, a ken kialin la sii yielu worun. <sup>19</sup> La sii yiele kialin nii, la jan wuo nyire la boye a chin wialin la si laa dii ε worun, a wuo juu Wia di-zon-la, lee-la patiisabalin fa si kere. Ni-peiba bi lee-la wuo juu. <sup>20</sup> Yesu ne ŋaa nialin si tima pipi Wia

niaa nyuŋ a kaa mu wuu, ari baal kubala ba faa yire Melikizedeki fa si ŋaa nialin si tima pipi Wia niaa nyuŋ kuhian a kaa mu wuu ŋii. Yesu ne laa sipaan juu di-zoŋ-la a tin la wiaa, di la ma wuo to u harin a juu lee-la.

## 7

*Ba bul wiaa a tige Melikizedeki le, nii-la si kpu pusun pipi Wia*

<sup>1</sup> Baal-la ba si yiru Melikizedeki, u fa ŋaa taŋ kubala kuoro ne aŋ fa pe ŋaa nii-la si kpu pusun pipi Wii-jaribako. Taŋ-la yirin ne Selem. Bua kubala Melikizedeki cheŋ Abiraham duu mu yuo laalin dii tintee doŋsun kuoro aŋ kuko. Nii ne u sul Wia pu duu peu le. <sup>2</sup> Nii ne Abiraham keŋ kialin u si paa laal-la le a kaa kpaal leree fii, a joŋ doŋo pu. Melikizedeki yiri-la bubuon ne kuoro-la si keŋ tuo-pula Wia sipaan. Baal-la ne bira ŋaa Selem kuoro maa. Selem kuoro bubuon ne, kuoro-la si keŋ u niaa hoŋ som. <sup>3</sup> Melikizedeki fa bi nyimma kene, u bi naan ma kene. Nu-kala fa bi u doho jin, a bi bua-la ba si lulu ari bua-la u si suba ma jin. Ama u fa nage Wia Bii ne. U ŋaa nii-la si tima pipi Wia niaa nyuŋ a kaa mu wuu.

<sup>4</sup> Ma jaŋ na di u fa ŋaa nibal ne. La naabalima Abiraham fa si lii laalin ko, u paala kpaal kiaa pu ne. <sup>5</sup> Baal doŋ ma ne fa he dime. U yirin ne

fa Liivai, u biirin ne fa ŋaa nialin si kpu pusun pipi Wia doho niaa. Wialin Moosis fa si ŋmuŋsa bil di niaa tuto tuoŋ ba bula ari Abiraham doho niaa kala keŋ ba kiaa kpaal leree fii fii, a joŋ doŋo pi ba naanbie Liivai ari u biirin. La jima ari Liivai doho niaa ari Iziral tinŋaa doŋsun kala ŋaa Abiraham doho niaa ne. Ama Wia haa bul ŋii ne. <sup>6</sup> Melikizedeki fa bi Liivai doho nuu ŋaa aŋ pe laa kpaalin Abiraham teen, aŋ sul Wia pu duu peu le. Ka Wia ma fa ta niin ne Abiraham teen. <sup>7</sup> Ni-balin ne yie sul Wia duu pe ni-bie le. Wii tuo ba si jaŋ kaa lere a tige wiin deen le. <sup>8</sup> Liivai nialin si laa kpaalin deen, ba-naa suu ne. Ama Melikizedeki si laa kiaa Abiraham teen, u-na bi jaŋ suu. Ari jinin u ha weye ne. Ba bul ŋii ne Wia tenin tuoŋ. <sup>9-10</sup> Bua-la le Liivai naabalima Abiraham si cheŋ Melikizedeki a keŋ kiaa kpaal pu di ba ha bi Liivai lula. Leele u yie lilaa kiaa u niaa teen ne. Ama Abiraham fa si joŋ kiaa pi Melikizedeki ŋii, la jaŋ wuo bul ari Liivai ma fa joŋ kiaa puu ne, bee wiaa u ŋaa Abiraham doho nuu ne.

<sup>11</sup> Wia si joŋ u niin a pi Moosis, bua-la le ne Liivai biirin suomo tin tin timii-la nialin si kpu pusun pipi Wia sii tin. Di tin timii-la fa pe Iziral tinŋaa le di ba chaasa ŋaa ni-zomo, ŋii-na u bira bi maga di nuu doŋ si nage Melikizedeki ko aa tin

nialin si kpu pusun pipi Wia tintinŋaa. Ama Wia si nuu don jaŋ ko (a pe Iziral tinŋaa le). U-na bi jaŋ lii Eron doho niaa tuon. <sup>12</sup> Di ba ne liise nuu a bul di u doho niaa dunɔɔna ne kpu pusun pipi Wia, an bira liise nuu si bi u doho niaa tuon lia, see di ba ken wialin ba sii to ma kaa birime. <sup>13</sup> La Tiina Kirisito wiaa ne baa bul nii. U ma lii doho don tuon ne. Nuukala ha bi doho deen tuon lia a ŋaa nii-la si kpu pusun pipi Wia. Nuukala jima ari Yesu lii Juda doho niaa tuon ne. <sup>14</sup> Ama bua-la le Moosis fa si bul wiaa a tige nialin si jaŋ kpu pusun pipi Wia le, u bi bula ari ba liise nuu si lii Juda doho niaa tuon.

*Yesu ne ŋaa nii-la si timaa pi Wia niaa nyun deen deen*

<sup>15</sup> Nuu don si tima pipi Wia niaa nyun si folo ko ŋla a nage Melikizedeki, wiaa deenba kala chaasa chin ne. <sup>16</sup> U tiina si ku ŋaa nii-la si tima pipi Wia niaa nyun nii, u bi naga ari u doho wii ne. U bira bi naga ari wialin ba si ŋmuɔsa bil di niaa tuto ne daga ba liisu. Ama u miisin dolun le ne ba liisu. U jaŋ he dime deen deen. U bi jaŋ suu. <sup>17</sup> Wia bula pu a bul, “N nage Melikizedeki ne. N jaŋ chin la nyun a tima pipi Wia a kaa mu deen deen.” <sup>18</sup> Nii wiaa ba jon wialin Moosis fa si ŋmuɔsa bil di niaa tuto ta ne. Ba bira bi bubuɔ kene, ba bi jaŋ wuo pe nuu le. <sup>19</sup> Wialin Moosis fa si ŋmuɔsa bil di niaa tuto

bi jaŋ wuo len di nuu-kala wuo chaasa ŋaa ni-zon. Ba si jon wu-binaa ta, wu-falaa ne he dime la tuto. Wu-falaa deenba le ne laa yiele. Ba suri wonbiin pila ne, di la wuo ko Wia teenj.

<sup>20</sup> Wia ŋmiesa ne a dan wu-falaa deenba le u si bula pila. <sup>21</sup> Di ba ne fa liise nialin si kpu pusun pipi Wia, Wia bi ŋmiesa he, an ka ba titin ba tintinŋaa. Ama la Tiina Wia si liise Yesu, u ŋmiesa ne a bul, “Mi bi jaŋ ken mi niin birime.” U bira bula, “N ne ŋaa nii-la si timaa pimi Wia niaa nyun a kaa mu wuu.” <sup>22</sup> Wia ta niin ne u niaa teenj. Yesu ne u kaa ta nii-la. Wii-la u si bula ne kpia wialin Moosis fa si ŋmuɔsa bil di niaa tuto. Nii daga ari u ŋaa wutitii ne.

<sup>23</sup> Bunbun nialin fa si kpu pusun pipi Wia fa yuga ne, bee wiaa ba faa suu ne. Ba sii suu nii, ba bi tintimii-la wuo tin deen deen. <sup>24</sup> Ama Kirisito-na jaŋ ŋaa nii-la si tima pipi Wia niaa nyun a kaa mu wuu, bee wiaa u bi suu. <sup>25</sup> Nii wiaa, u jaŋ wuo laa nialin si tou le a ko Wia teenj ta. U jaŋ wuo laaba ta, bee wiaa u jaŋ he dime buana kala a sul Wia pipiba duu peba le.

<sup>26</sup> Yesu si ŋaa nialin si tima pipi Wia niaa nyun kuhian nii, u ŋaa wu-zon ne a pila. Yesu bi disin kene, u bi wii-kala cheye. U chaasa ŋaa ni-zon ne. U ken u titia pore ne haache tinŋaa le. Wia kenu ŋaa ni-bal. U si he Wia-jaŋ

le nii, u yuga kii kuŋ-kuŋ-kala si he dime. <sup>27</sup> Nialin fa si kpu pusun pipi Wia kuhiasin fa yie kpu pusun tapulii-na kala ne. U fa maga di ba kpu pusun a tin ba titia haacheba wiaa ne, an bira kpu donsun ma a tin niaa haacheba wiaa. Yesu-na bi nii naa. U bi pusun kpua a tin u titia haacheba wiaa. U liise sarika bala ne a pi Wia a tin niaa haacheba wiaa. U titia miisin ne u kaa liise sarika-la. <sup>28</sup> Ba yie to wialin Moosis fa si nmunsa bil di niaa tuto le ne a liise niaa di ba naa nialin si kpu pusun pipi Wia kuhiasin. Nialin ba si liisa fa ken haache ne. Ama wii-la Wia si bula a tige u Bie Yesu le to harin ne a ko. Wia nmiesa ne an-na liise Yesu duu naa nialin si tima pipi Wia niaa nyun kuhian. U chaasa naa ni-zon ne a kaa mu wuu. U bi jan ko duu ken disinnin.

## 8

*Yesu ne timaa pi Wia la nyun*

<sup>1</sup> Wii-la kala la sii bul wu-nyun ne nla. La ken nialin si tima pipi Wia niaa nyun kuhian ne. U ne he Wia-jaŋ a hon Wii-jaribako seme, ni-duon di-honun. <sup>2</sup> Wia di-zon-la le ne u he a titin. Wia-dia titia ne nii. Lee-la nuhuobiine dee bi saa. La Tiina Wia ne saa. <sup>3</sup> Di ba ne liise nialin si kpu pusun pipi Wia kuhian-na kala, ba yie liisu duu laa kaaa pipi Wia ne, an pe kpu pusun ma

pupu. Nii wiaa u maga di nialin si tima pipi Wia niaa nyun kuhian deen ma jon kuŋ ne a pi Wia. <sup>4</sup> Di u ne saa fa he dunia le, u fa bi jan naa nii-la si kpu pusun pipi Wia, bee wiaa nialin si he dunia le a kpu pusun pipi Wia, ba nii to wialin Moosis fa si nmunsa bil di niaa tuto an ninaa. <sup>5</sup> Niaa deenba si kpu pusun pipi Wia kuhiasin tin ba tintinnaa ne Wia-dia tuon dunia deen le. Ba sii tin tintinnaa nii, baa chesi Wia di-zon-la wiaa ne nii. Wia di-zon-la titia dee. Moosis fa si naa siri duu he lebin, Wia fa bul wiaa pu ne. U si, "He lebi-la duu nage kula mi si dagin peel-la nyun." <sup>6</sup> Tintimii-la Kirisito sii tin ne yuga kii tintimii-la bunbun niaa si tima, bee wiaa Wia tou le ne a ta nii-falin a pi u niaa. Nii-falii-la ne kpia bunbun nii-la Wia si ta u niaa le, bee wiaa wii-la Wia si bula bi jan ko di u ta da. <sup>7</sup> Bunbun Wia ta niin ne u niaa teen. Di wialin faa pe u niaa le di ba naa ni-zom Wia teen, Wia fa bira bi jan ta nii don u niaa teen.

<sup>8</sup> U na di bunbun wialin bi u niaa le pe di ba wuo naa ni-zom, nii ne u bira bul,

"Tapulii kubala mi jan bira ta nii don mi niaa Iziral tinnaa teen, ari Juda doho niaa le."

<sup>9</sup> Mi si jan ta nii-la, u bi jan nage bunbun nii-la mi fa si ta ba naabal-imaba teen

bua-la le mi si kenba kaa  
 lii Ijipiti tinteen.  
 Ba fa bi mi nii-la le to,  
 nii ne tii mi jon harin  
 yiaba.  
 10 Wialin la Tiina Wia fa si  
 bula ne nla: U si,  
 "Tapulii kubala ne jan yi  
 di mi ta niin mi niaa  
 Iziral tinŋaa teen.  
 Mi jan len di ba jin mi niin  
 wiaa worun, a jonjo he  
 ba nyun  
 ari ba tuon kala le.  
 Di mi ne naa nii, mi jan naa  
 ba Wia,  
 di ba ma naa mi niaa.  
 11 Bua deen le nuu-kala bira  
 bi jan dage u donjo ti-  
 ina  
 koo u naanbii nii u si jan  
 naa a jinmi.  
 Nuukala jan jinmi,  
 hanbiisin ari kuhiasin  
 kala.  
 12 Mi jan faba nennige a jon  
 ba haacheba a cheba.  
 Mi bira bi jan liliisi ba  
 wu-bonjoo."

13 Wia si bul nii-falii-la wiaa  
 nii, u si di bunbun ku-la naa  
 ku-binii ne. Ku-la kala saa  
 si diene naa ku-binii ne, u  
 maga di ba jonjo ta ne.

## 9

*Yesu ne timaa pi Wia la  
 nyun Wia-jan le*

1 Bunbun-la Wia fa ta niin  
 ne a pi u niaa. Nii-la fa  
 ken wonbiee ne ba to a  
 chuchuele Wia. Ba fa he  
 lebin ne a chuchulu dime.  
 2 Lebi-la fa ken leree balia  
 ne, tegge ari sipaan. Tegge  
 lebi-la le ne chaanin fa chin

korun nyun. Teebul ma fa  
 he dime. Boroboro-la ba si  
 yie kaa mu bil Wia sipaan  
 ma fa dan teebul nyun tegge  
 lebi-la le ne. Lee-la yirin ne  
 fa lee-la si bi disinnin kene,  
 3 a kiele juu lebi-la sipaan,  
 ba fa ken patiisa ne a kaa  
 kere. Lee-la yirin ne fa lee-la  
 si chaasa pulle a bi disinnin  
 kene. 4 Selime korun ne fa he  
 lee-la. Dime ne ba yie nyige  
 tii-kelin suora si sima a pipi  
 Wia. Daga kubala ma ne fa  
 chin dime. Selime tou kala.  
 Selime pupoin ne fa he daga-  
 la tuon. Pupoi-la tuon ne ba  
 fa jon boroboro-la si lii Wia-  
 jan ku tuu a he. Eron daa-la  
 si toso ma fa he daga-la tuon  
 ne. Tabii-taala-la le Wia fa si  
 nmunse u niin wialin he, u  
 ma fa he dime ne. 5 Daga-la  
 nyun, ba me Wia tindaaraa  
 sii tul, a bil ba ma chin.  
 Ba ken ba kinkesin kaa jere  
 to Wia kuori-kpasa-la nyun,  
 lee-la u si hono aa fa niaa  
 nennige, a jon ba haacheba  
 a cheba. Leele la bi jan wuo  
 bul wiaa yuge a tigeba le.

6 Di ba ne bil kialin kala  
 dere, nialin si kpu pusun  
 pipi Wia, ba yie juu tegge  
 lebi-la di ba tin tintimii-la  
 si maga di ba tin. 7 Ama  
 nialin si kpu pusun pipi Wia  
 kuhian dunduja ne yie juu  
 lebi-la sipaan. U ma saa  
 yie juu lee-la bala ne jina  
 kala. U yie ken chalin ne  
 a kaa juu pi Wia, a tin u  
 titia haacheba ari nialin kala  
 haacheba wiaa. 8 A tin wiin  
 deen wiaa Wia Din-zon-la  
 chaasa dage ari wonbii-la ba

si to juuu lebi-la sipaan, ba ha bi suro, beε wiaa tegeε lebi-la ha he dime ne. <sup>9</sup> Tegeε lebi-la nage dunia deen le la si he ne. U bi jan dieni. Tegeε lebi-la le ne ba yie jon kiaa pipi Wia an pe kpu pusun pupu. Wialin ba si yie ŋaa lebi-la tuon, ba bi jan wuo pe nialin si ken kialin ko, di ba tuobiinaa chesi. <sup>10</sup> Wiaa deenba dage kudiilee ari ku-nyualaa wiaa dunɗunɗa ne. Ba bira dage ari ba si jan fufo ba yaraa disinnin a kaa mu yi bua-la le Wia si jan ken wu-falaa ko ne.

<sup>11</sup> Ama Kirisito ko ne leεle a ŋaa nialin si tima pipi Wia niaa nyun kuhian. Wiila u si kaa ko ne zomɔ a kii bunɓunɓun wialin. U si ko nii, u juu lebi-la sipaan si bi disinnin kene, lee-la ne zomɔ kinken a kii bunɓunɓun ku-la. Nuhuobiine dee bi saa. U bi dunia deen kur ŋaa. <sup>12</sup> Kirisito juu lebi-la sipaan bala dunɗunɗu ne. U bi buuna koo ne-pasin chalin kaa juu dime. Ama u ken u titia chalin ne kaa juu, a jon chal-la a tin la haacheba chimin, a laala ta a kaa mu wuu. <sup>13</sup> Bunɓunɓun ba fa yie jon buuna koo ne-bele chalin ne a fo niaa disinnin ta. Di nuu ne ŋaa disinnin, ba yie jon ne-pasa-la ba si kpua a nyige ne a pi Wia, a ken u tuorun kaa mise nialin a piise ba disinni-la ta. <sup>14</sup> Di wiaa deenba ne wuo piise niaa disinnin ta, nii-na Kirisito chalin ma jan wuo

paala piise niaa disinnin ta a kii buunaa koo nesin chalin. Kirisito fa bi disin kala kene. Wia Din-zon-la dolun le, u jon u titia pi Wia, a suu a tin la wiaa. U jan wuo len di ma tuobiinaa chesi di ma si wu-bon biinu, ka di ma wuo tima pipi Wia, Wia-la si ken miisin.

<sup>15</sup> Kirisito ne he Wia ari nuhuobiine pege. U le ne Wia to a ta nii-falii-la u niaa teen. Wia ŋaa nii di nialin kala u si yira wuo na kialin u si si u jan jonɔ piba Wia-jan le. Kialin jan he dime a kaa mu wuu. Leεle Kirisito suba ne. U suu nii duu wuo laa niaa haacheba ta ne, nialin si ŋaa haache bua-la le ba fa sii to bunɓunɓun wialin Wia si ta u niaa teen. <sup>16</sup> Di nuu ne si duu ne suba, nuu don ne jan dii u kiaa, di tiina ne ha bi suba, nii-la bi jan wuo dii kialin, see di kialin tiina suba. <sup>17</sup> Di kiaa tiina ne weye, nii-la u si si u jan dii u kiaa bi jan wuo dii kialin, see di u suba. <sup>18</sup> Nii titia ne Wia jon chalin ta bunɓunɓun nii-la. <sup>19</sup> Moosis si ŋmunse wialin bil di niaa tuto, di u ne ku dageba wialin a ku dere-na kala, u yie kpu ne-pasin ari buunaa ne, a laa chalin a ŋaa liin guoli. U yie che pie-pun-fiesin ari pipaa-sucrusun a voo a he donɔ le, a kaa yuu chal-la, a mise he ten-la le u si ŋmunsa, an pe ŋaa mise nialin maa. <sup>20</sup> Di u ne ŋaa chal-la mimise nialin, ŋla ne u yie bul: U si, "Chal-la Wia si jonɔ ta niin ma teen

ne ŋla." <sup>21</sup> Nii titia ne u yie ŋaa chal-la mise lebi-la ari gban̄si-la kala ba si kaa titin̄ Wia tin̄tin̄ŋaa lebi-la tuoŋ. <sup>22</sup> Wutitii, wialin̄ Moosis si ŋmuŋsa bil di niaa tuto, tuoŋ chalin̄ ne ba yie kaa fo kiaa jesin̄ kala disinnin̄ ta. Di ba ne bi kuŋ chalin̄ liisa, Wia bi jaŋ wuo joŋ nuu-kala haacheba a cheu.

*Yesu suu bala ne niaa nyun̄ duu laa haacheba ta*

<sup>23</sup> Kialin̄ si he lebi-la tuoŋ nage kialin̄ si he Wia-jaŋ ne. U maga di ba ken̄ pusun̄ chalin̄ chese kiaa deen̄ba disinnin̄ ta. Ama kialin̄ titia si he Wia-jaŋ le, u maga di ba che ku-la si zom̄o kii pusu-la chalin̄ ne a piise ba disinnin̄ ta. <sup>24</sup> Kirisito juu Wia di-zoŋ-la titia ne. Lee-la u si jua, nuhuobiine dee bi ŋaa. Nialin̄ si ŋaa lebi-la, baa chesi Wia di-zoŋ-la ne. Ama Kirisito juu Wia-jaŋ titia ne. U juu lee-la duu wuo mu Wia teen̄ a chin̄ la nyun̄. <sup>25</sup> Nialin̄ si kpu pusun̄ pipi Wia kuhiasin̄ yie juu lebi-la sipaan̄ si bi disinnin̄ kene jina jina ne, a pe ken̄ pusun̄ chalin̄ kaa juu a pi Wia. Chal-la ba si yie kaa juu, ba titia chalin̄ dee. Ama Kirisito-na si juu lee-la, u bi naga ari u jaŋ ven̄ee juu dime jina-na kala ne a joŋ u titia a pipi Wia. <sup>26</sup> Duu ne faa ŋaa nii, u fa jaŋ na heen̄ jina-na kala a lii dunia di-suomun̄ a kaa ko ari jinin̄ kala. Ama u si china mage ŋla, dunia diderin̄ kpaga ne.

Nii ne u ko bala duu joŋ u titia a pi Wia a suu, a laa niaa haacheba ta. <sup>27</sup> Bala ne nuu-kala jaŋ suu. Nii harin̄ le Wia jaŋ dii u tiina sariya. <sup>28</sup> Nii titia ne ba kpu Kirisito balá duu wuo laa nidaŋ haacheba ta. U jaŋ bira ko. Duu ne ko, u bira bi jaŋ laa niaa haacheba ta, ama u jaŋ laa nialin̄ ta, nialin̄ si ŋaa siri aa gberu.

## 10

<sup>1</sup> Wialin̄ Moosis fa si ŋmuŋsa bil di niaa tuto laa sipaan̄ ne, ka wu-zom̄o-la-na to harin̄ ko. Wialin̄ Moosis fa si ŋmuŋsa bil nage wu-zom̄o-la ne, ama wu-zom̄o-la titia dee nii. Ba nage wu-zom̄o-la daaliimin̄ ne. Nii wiaa pusu-la ba si yie kaa ku kpu pipi Wia jina-na kala, ba bi jaŋ wuo len̄ di nialin̄ si ken̄ pusu-la kaa ko ŋaa nizom̄o-la si bi disin̄ kala kene. <sup>2</sup> Di pusu-la ba si yie kaa mu kpu pipi Wia ne fa wuo len̄ nialin̄ si kaa ko ŋaa tuo-pul timma, nii-na ba fa bira bi jaŋ kpukpu pusun̄ deen̄ba jina-na kala. Di ba ne fa wuo piise nialin̄ disinnin̄ tita, nii-na ba fa bira bi jaŋ bibiine di ba ken̄ haacheba kala. <sup>3</sup> Ama ba si yie kpu pusu-la pipi Wia jina-na kala, ba yie liliisi ba haacheba ne, <sup>4</sup> bee wiaa nesin̄ ari buunaa chalin̄ bi jaŋ wuo laa niaa haacheba ta.

<sup>5</sup> Nii ne tii Kirisito bul wiaa deen̄ba a pi Wia bua-la le u si ku tuu dunia. U si, "Ŋ-na bi pusu-la ba si yie kaa ku pin̄ ka che, aŋ bira

bi pusu-la ma ba si yie kpu a nyige piŋ ka che. Ama ŋ liisemi ne di mi jon mi titia kala a piŋ.

6 Ba si yie kpu pusu-la a nyige pipiŋ, aŋ kpu pusu-la doŋsuŋ maa a piise ba disinniŋ tita, ŋ tuoŋ bi ba kala nyuŋ tore.

7 Nii ne mi bul, 'Mi Tiina Wia, mi ko ne di mi ŋaa wialiŋ sii tore ŋ tuoŋ. Mi ko ne di mi ŋaa wialiŋ ba si ŋmuŋsa bil ŋ teniŋ tuoŋ a tigem i le.' "

8 Wialiŋ Moosis fa si ŋmuŋsa bil di niaa tuto ne daga di ba kpu pusun pipi Wia, a bira jon kiaa pupu, a bira kpu pusun a nyiga pi Wia, a kpu doŋsuŋ maa a piise niaa disinniŋ tita. Ama Kirisito bula di Wia bi nii cho. U tuoŋ ma bi ba nyuŋ toro.

9 Nii ne ka u bira bul, "Mi ko ne di mi ŋaa wialiŋ sii tore ŋ tuoŋ." U si bul nii, u via bunbun wialiŋ ta ne, aŋ miira suomo bil wu-falia.

10 Kirisito si ŋaa Wia tuoturu wii-la a jon u titia kala a pu a tiŋ la wiaa, nii ne leŋe la bira bi disinniŋ kene. U si suu nii, u jon u titia pi Wia balá ne. U bira bi jaŋ ko duu ŋaa nii.

11 Nuu-kala si kpu pusun pipi Wia yie chin u leriŋ ne a titiŋ u tintiŋŋaa tapulii-na kala, a venee kpu pusun pipi Wia tapulii-na kala. U si yie kpu kiaa deenba a pipi Wia, ba bi jaŋ wuo laa niaa haacheba ta. 12 Ama

Kirisito suba a jon u titia a pi Wia bala ne duu laa niaa haacheba ta. U si ŋaa nii dere, u jil Wia-jaŋ a hoŋ Wia seme, ni-duoŋ di-honuŋ. 13 U jaŋ hoŋ dime halii, see di u yuo dii u diŋdoŋŋoo kala dere. 14 U si jon u titia a pi Wia balá nii, u leŋe nialiŋ ba si piise ba disinniŋ ta ŋaa tuo-pul timma ne u teen a kaa mu wuu. 15 Wia Diŋ-zoŋ-la ma ŋaa wialiŋ la sii bul dansia. 16 U si, "Di tapulii doŋ ne yie, mi jaŋ ta mi niin ba teen. Mi jaŋ leŋ di ba jin mi niin wialiŋ, a joŋba he ba tuobiinaa ari ba nyuŋ kala le."

17 U bira bula, "Mi bira bi jaŋ liliisi ma haacheba ari ma wu-boŋŋoo kala."

18 Di Wia ne jon la haacheba-la kala a chela, u bira bi maga di la kpu pusun a pi Wia a tiŋ la haacheba wiaa.

*Má keŋ nyu-duoŋ a kpage Wia*

19 Nii wiaa, mi naanbiirin, la jaŋ wuo keŋ nyu-duoŋ a juu Wia di-zoŋ-la, bee wiaa Yesu jon u chaliŋ a jaase la wiaa ne. 20 Woŋbii-falii ne Yesu suro pila. Woŋbii-la u si suro pila le ne la jaŋ to a juu Wia di-zoŋ-la, a laa miisiŋ Wia teen. Bua-la le Yesu fa si bi suba, nii ne patiisa-bal ne fa kere lebi-la sipaan. Ni-peiba bi dime wuo juu. Nii titia ne la fa bi Wia di-zoŋ-la wuo juu. Ama leele Yesu suba ne, ba



keŋ patiisa-bal-la bege pila la wuo to juu Wia di-zoŋ-la. <sup>21</sup> La folo keŋ nialin si tima pipi Wia kuhian ne, u biben Wia niaa. <sup>22</sup> Nii wiaa, má leŋ la keŋ nyu-duoŋ a laa wiaa deenba dii ari tuo-bala, a mu Wia teen. Wia chese la tuoŋ ne, a chese la tuobiin-bomo-la kala ta. Ba bira bi jaŋ wiwalimela. U keŋ lii-zomuŋ ne fola. La bira bi disinnin kenε. <sup>23</sup> Nii wiaa, wialin la si laa dii, má leŋ di la yiele wialin, a chin ba le kpaŋ kpaŋ, a sí begilu mua maa, bee wiaa Wia keŋ wutitii ne. Kialin u si si u jaŋ joŋo pila, la laa dii ari la jaŋ naba. <sup>24</sup> Nii wiaa, má leŋ di la cho doŋo, a keŋ doŋo ari siifiesin, a pe doŋo le, aa ŋaa wu-zoŋŋo doŋo le. <sup>25</sup> La si yie hihilimi nii, niaa doŋsun yie via ne. Ma sí nii ŋaa. Ama má leŋ di la haa hilimi a pipe doŋo le di la to Wia ari siifiesin, bee wiaa tapulii-la la Tiina Yesu si jaŋ miira ko kpaŋa ne.

<sup>26</sup> Di la ne ku jin wutitii-la an viau ta a ŋinaa wu-boŋŋo, kuŋ doŋ bira tuo ba si jaŋ wuo kpu a pi Wia a piise la disinnin ta. <sup>27</sup> Ama la jaŋ fá fawullun, bee wiaa Wia jaŋ dii la sariya. U jaŋ joŋ cheerin a pila, a joŋla he nyinin le, nyin-la jaŋ faasa didii kinkeŋ. Nyin-la jaŋ dii Wia din-doŋŋo kala dere. <sup>28</sup> Di nuu-kala ne chei wialin Moosis fa si ŋmuŋsa bil di niaa tuto, an ka di niaa balia koo batori ne he dime a ŋaa

wii-la u si ŋaa chei danŋia, ba yie kpu tiina ne. Ba yie bi u nennige ka fá. <sup>29</sup> Di ba ne fa yie ŋaa ŋla, εε ne saa ba jaŋ ŋaa nii-la si bee guune Wia Bie ari u tuo kuŋ-kala? Tiina bira keŋ Yesu chal-la Wia si joŋo ta niin u niaa le kaa chei ne. Chal-la ne Wia fa kaa chese tiina disinnin kala ta u ku ŋaa tuo-pul tiina. Di tiina bira tuuse Wia Din-zoŋ-la fa sii peu le, u maga di ba doŋisu a kii nialin si chei wialin Moosis fa si ŋmuŋsa bil di niaa tuto. <sup>30</sup> La jin Wia ne. U si,

“Mi jaŋ joŋ wu-bomo-la niaa  
sii

ŋaa doŋo le a tinba.”

Nuu doŋ bira si,

“Wia jaŋ dii u niaa sariya.”

<sup>31</sup> Di η ne juu Wia-la si weye nisin, u jaŋ loŋo pin.

<sup>32</sup> Má liise mu yi bua-la le Wia si suri ma siaa, ma ku laa Yesu wiaa dii. Bua-la le ma na heen ne worun an nyalime. <sup>33</sup> Bua doŋo ba yie tuusema a doŋisema niaa tuoŋ. Bua doŋo ma ba kenma guoli nialin ba fa sii doŋise tuoŋ a doŋisema maa. <sup>34</sup> Ba keŋ niaa doŋsun si laa Yesu wiaa dii a to dia ne. Ma si na nii, ma tuoŋ cheye ne. Ba bira fuga laa ma kiaa. Ba si ŋaa nii, ma bi wii-kala bula. Ama ma tuoŋ toŋo ne, bee wiaa ma jima ari ma ne keŋ kialin si zomo kii dunia deen kialin ba si kaa laa ma teen. Kialin-na jaŋ he dime deen deen. <sup>35</sup> Nii wiaa ma sí leŋe di ma nanŋaasin yuore.

Di ma ne chin ma yarida le a si len, ma time yuga ne Wia teen. <sup>36</sup> U maga di ma ken kenyiri a wuo ŋaa wialin Wia sii che di maa ŋaa. Di ma ne ŋaa nii, ma jan na kialin u si si u jan joŋo pima. <sup>37</sup> U si,

“Muapulii nii-la Wia si liisa jan miira ko.

U bi jan dieni.

<sup>38</sup> Nialin kala si ŋaa tuo-pul tinŋaa Wia teen maga di ba

haa ŋaa Wia yarida ne. Di ba ne ŋaa nii, ba jan ken miisin Wia teen.

Ama di ba ne via Wia ta, u tuon bi jan tore ba nyun.”

<sup>39</sup> Wia jan dogise nialin si yenŋe an viau ta. Ama lana tuo niaa deenba tuon. La ŋaa Wia yarida ne a wuo laa la miisin.

## 11

*Bunbun nialin fa si laa Wia wiaa dii nii*

<sup>1</sup> Di ŋ ne laa Wia wiaa dii, ŋ yie jin ari kialin ŋ sii yielu Wia teen, ŋ jan naba. N jan jin ari kialin ŋ siin si bi na sen he dime ne. <sup>2</sup> Bunbun nialin fa si laa Wia wiaa dii, Wia tuon tore ba nyun ne. <sup>3</sup> La laa Wia wiaa dii, nii ne tii la jin ari Wia ne ŋaa dunia, u bi kun-kala kaa ŋaa dunia. U niin ne u kaa suro bul wiaa, an ka kun-kun-kala-na he dime. Dunia kiaa deenba la sii na, ba fa tuo, Wia len ba lii kialin la si bi na tuon ne.

<sup>4</sup> Naanbiirin balia ne fa he dime. Dono yirin ne Ebil, dono ma yirin ne Keen. Ba kala balia jon kiaa pi Wia ne. Ama Ebil-na fa laa Wia wiaa dii ne. A tin nii wiaa, Wia laa kialin u si joŋo pu. Wia tuon tore ba nyun a kii Keen kialin u si joŋo pu. Nii ne Wia len Ebil ŋaa tuo-pul tiina u sipaan. Ebil suba ma ne, ama a tin u fa si laa Wia wiaa dii nii, u ha bul wiaa pipila ne.

<sup>5</sup> Baal kubala ma ne fa he dime baa yire Inok. U ma fa laa Wia wiaa dii ne. U bi suba, an ka Wia joŋu kaa jil Wia-jan. Nu-kala bira buu na. Wia titia ne joŋu kaa jil Wia-jan. Wia tuon fa tore u nyun ne, ka u-na joŋu kaa jil Wia-jan. <sup>6</sup> Di nuu ne bi laa dii ari Wia he dime, Wia tuon bi jan tore u tiina nyun. Nii-la kala sii che duu ko Wia teen, u maga duu laa sipaan laa dii ari Wia he dime ne, a bira laa dii ari nii-la kala si bee chiche Wia, u tiina jan laa u time Wia teen.

<sup>7</sup> Baal kubala ma ne fa he dime baa yire Nowa. U fa laa Wia wiaa dii ne. Nii ne Wia bula pu duu saa liin daboro di ba di u dia niaa juu, bee wiaa uu che di u kpu dunia niaa kala kala ne. (Wia si bul wii-la u diene, an ka wii-lana ŋaa.) Nii ne Nowa sei a saa liin daboro-la ba di u dia niaa juu, an ka Wia len liin ku to dunia ni-kaanaa kala ba suu. Ama Nowa ari u dia niaa bi suba. Nowa si laa Wia wiaa dii ne tii u ku ŋaa tuo-pul tiina a jon cheerin a

pi ni-kaana-la kala ne.

<sup>8</sup> Baal kubala ma ne fa he dime baa yire Abiraham. U ma fa laa Wia wiaa dii ne. Wia bula pu duu lii u jan le a mu tinteen donjo, di u jan jon lee-la a pi ba di u doho niaa. U to Wia niin le a lii u jan le a mumu lee-la. U fa bi lee-la u sii mu jin. <sup>9</sup> U si yi tintee-la Wia si si u jan jono pu, u hon dime a naa nuhuru tintee-la le. U bie Aizik ari u nihin Jekob ma fa hon lee-la titia ne a naa nuhuraa. Ba fa he lenge ne a jujuu. Wia fa bula ari u jan jon tintee-la pi ba kala ne. <sup>10</sup> Abiraham faa che duu juu tan-la Wia titia si bil u gentine a saa ne. Tan deen ne jan he dime deen deen a mumu. Nii ne tii u sei a naa nuhuru tinteen donjo le. <sup>11</sup> Nii titia ne Abiraham haala Saara ma laa Wia wiaa dii. Abiraham ari u haala kala fa hiesa ne worun, ka Wia wuo peba le ba lul bie. Saara jima ari Wia ken wu-titii ne. Nii wiaa u laa dii ari u jan na ku-la Wia si si u jan jono pu. <sup>12</sup> Abiraham fa hiesa ne worun a bi biirin wuo lulul. Nii ne an ka u lul bii-bala, ama u bii-bala-la le ne u doho to pun. Ba yuga kieli. Ba yuga ari chenwulaa si yuga nii, koo hagila si yuga nii mugi-balin niin ne.

<sup>13</sup> Naa deenba kala laa Wia wiaa dii ne an-na suu. Kialin Wia si si u jan jono piba, ba biba na. Ba naba ari ba he di-bolii, ama ba laa dii ari maachie ba jan naba. Nii wiaa ba na kialin ne. Ba bira jima ari ba naa

nuhuraa ne dunia deen le an ta hon tintee donjo le. <sup>14</sup> Naa deenba faa che ba titia lerin ne di ba hon. Nii ne tii ba bul wiaa deenba a mu tige ba titia le nii. <sup>15</sup> Ba bira bi tintee-la le ba si lia wiaa ka biine. Di ba ne faa biine u wiaa, ba fa jan che wonbin a miira mu lee-la. <sup>16</sup> Ama ba faa che di ba hon tintee-la si zomoo kii tinteyee donsun. Wia-jan ne nii. Wia titia ne saa jan-la a piba. Nii ne tii ba wuo yire Wia yirin, ka hiisin bi Wia kene.

<sup>17</sup> Abiraham laa Wia wiaa dii ne. Nii ne Wia magisu duu na nii u yarida si maga. Wia bula pu duu ken u bie Aizik a kpu a pu. U sei a naa siri duu kpu Aizik a pu. Abiraham bie kala ne fa Aizik. <sup>18</sup> Wia fa bula pi Abiraham a tige Aizik le duu jan tou le a len di u doho niaa pun. <sup>19</sup> Abiraham fa jima ari Wia jan wuo chise u bie suun le. Nii ne u naa siri duu kpu u bie a pi Wia. U si naa siri nii maa, u nage u kpua ne. Nii ne Wia ma chise Aizik suun le a jonu pi Abiraham. <sup>20</sup> Aizik ma fa laa Wia wiaa dii ne. Nii ne tii u sul Wia pi u biirin Jekob ari Iso, di Wia peba le maachie. <sup>21</sup> Jekob ma laa Wia wiaa dii ne. U suun si kpaga ne, u ma sul Wia duu pe u nihee Josef biirin le. U tige u daantiga ne a chuole Wia piba. <sup>22</sup> Josef ma fa laa Wia wiaa dii ne. Nii wiaa u suun si yie, u bul wii a mu tige Iziral tinnaa le an-na suu. U bula di Iziral

tinŋaa jaŋ lii Ijipiti tinŋeen le maachie a bira mu ba tinŋeen. U bira bula piba di ba nii mu, ba pe joŋ u ku-suunŋ kaa mu hugi lee-la.

<sup>23</sup> Moosis naanŋ ari u ny-imma ma fa laa Wia wiaa dii ne. Ijipiti kuoro fa bula pi Iziral tinŋaa di ba kpu ba bii-mulo-na kala si ŋaa hanbolobie. Ama ba bi ŋii ŋaa. Ba si lul Moosis, ba na duu ŋaa bii-zoŋ ne. Ŋii ne ba joŋo faa cheŋsiŋ batori.

<sup>24</sup> Moosis si ku waa dere, u ma fa laa Wia wiaa dii ne. U bi seye di ba kenu yire kuoro Feero tolo bii. <sup>25</sup> Moosis via ku-zomɔ-la kala u fa si jaŋ na Feero teen. U fa bi che u to wu-bonŋɔɔ ŋaaninŋ a ninii sima anŋ via u niaa ta. Ijipiti niaa fa sii dogise Wia niaa ŋii, u ŋaa siri di ba di ba kala ne na heen. <sup>26</sup> Moosis ŋaa siri di ba dogisu duu na heen ne a tinŋ Kirisito-la wiaa, nii-la Wia si liisa. U jima ari hee-la kala u si jaŋ na a tinŋ u wiaa keŋ time ne, a kii ku-zomɔ-la ma kala u si jaŋ na Ijipiti tinŋeen le. U ŋaa siri duu laa time-la Wia si jaŋ joŋo pu maachie ne.

<sup>27</sup> Moosis fa laa Wia wiaa dii ne, ŋii ne tii u lii Ijipiti tinŋeen a mu hoŋ tinŋeen doŋɔ le. U jima ari Ijipiti kuoro jaŋ na baaninŋ u nyunŋ, ama u bi u wiaa biina. U na heen ne, ama u nyalima anŋ beŋ Wia le, Wia-la u si bi wuo na. <sup>28</sup> Moosis ma fa laa Wia wiaa dii ne, ŋii ne tii u dage Iziral tinŋaa ba diisinŋ kielinŋ gbiele-la. U leŋe ba kpu pusunŋ, a keŋ

chalinŋ taa ba borusunŋ kala. Ba si ŋaa ŋii, Wia tinŋaari-la u si tima duu ku tuu a kpu Ijipiti tinŋaa bii-bunŋbunŋ-na kala Ijipiti tinŋeen le, u ku tuu a kpuba anŋ kielii Iziral tinŋaa ta.

<sup>29</sup> Iziral tinŋaa ma fa laa Wia wiaa dii ne. Ba fa si lii Ijipiti tinŋeen le a ku yi mugi-fianŋ-la niinŋ, Wia leŋe u kpaal balia ne ba venŋ u tuonŋ a chol. Ba venŋ u tuonŋ a nage ba sii venŋ tinŋee-hilinŋ le ne. Ama Ijipiti timma-la fa sii kiriba si ko a walime di ba chol, muga-la ku toba. Ba kala suu. <sup>30</sup> Bua doŋɔ Iziral tinŋaa ma fa laa Wia wiaa dii ne. Ba ŋaa wialinŋ Wia si dageba ba ŋaa, a vene golli kere-la si kere tanŋ-la ba sii yire Jeriko tapulaa balipe. Ba si ŋaa ŋii a dere, Jeriko kere-la tel wuru. <sup>31</sup> Haal kubala ma ne fa hoŋ Jeriko le, u yirinŋ ne Reehab. U fa ŋaa ha-chorunŋ ne. Ama u laa Wia wiaa dii ne. Ŋii ne u laa nialinŋ Iziral tinŋaa si tima di ba ku luore bee na Jeriko tinŋeen si nage ŋii. A tinŋ ŋii wiaa Iziral tinŋaa si ku yuo dii tanŋ-la, ba bi haalla kpua. Ama ba kpu u jaŋ nialinŋ kala si bi Wia wiaa laa dii ne.

<sup>32</sup> Wiaa doŋsunŋ he dime mi faa che di mi bul. Ama di mi fa bul Gidianŋ, Beerak, Samsonŋ, Jefita, Devit, Samuel ari nialinŋ fa sii bul wiaa, Wia Din-zoŋ-la dolunŋ le wiaa, mi fa bi jaŋ wuo bula dere. Ba yuga kielii. <sup>33</sup> Niaa deenba kala

fa laa Wia wiaa dii nɛ. Nii nɛ ba tuɔŋ dɔŋsun yuo dii tinɔeyee dɔŋsun aŋ laa ba kiaa. Ba to wutitii-la Wia sii che nɛ. Ba na kialin Wia si si u jaŋ joŋo piba. Naachigee fa sii che di ba chaŋ ba niaa dɔŋsun, ba yuoba. Naachige-la biba wuo. <sup>34</sup> Nyinin ma bi ba dɔŋsun wuo. Wia liiseba ni-bɔŋŋɔɔ nisin ɛ di ba siba kpu. Ba fa bi dolun kene, ama Wia nɛ piba dolun ba wuo ŋaa wiaa. Ba ku ŋaa bɔi-duon tinŋaa a yuo laalin a dii. Ba yuo a dii tinɔeyee dɔŋsun, ba laali-yuoroo fá ɛɛ. <sup>35</sup> Haalaa biirin si suba, Wia chiseba suun ɛ nɛ. Niaa dɔŋsun ma fa he dime ba viireba kpu. Niaa deenba fa bi che di ba joŋ hariŋ yia Wia aŋ laa ba miisin. Ba fa jima di ba nɛ suba maa, Wia jaŋ chiseba suun ɛ a joŋ miisi-la si zɔmɔ a kii dunia deen kua a piba. <sup>36</sup> Dunia niaa mɔŋ dɔŋsun nɛ. Ba viire dɔŋsun ma ba yaraa bieɛ. Ba vɔɔ dɔŋsun maa ari chɔrumɔɔ aŋ kenba to dia. <sup>37</sup> Ba yage dɔŋsun ari tabiaa, a ken dɔŋsun keri balia balia, aŋ kpu dɔŋsun ma ari tokobiee. Ba dɔŋsun faa laale piesee ari buunaa jɛŋɛ nɛ. Ba fa bi ba wu-cheeli kala na. Ba dɔgiseba, ba na heen. <sup>38</sup> Dunia deen fa bi zɔmɔ pi nialin. Nii nɛ ba lii niaa tuon a faa golle tinɔee-hilin tuon ari peelee nyun. Ba fáa bu-buɔsun ari buɔsun tuon nɛ.

<sup>39</sup> Wia tenin tuon ba bul

niaa deenba wiaa worun. Ba kala fa laa Wia wiaa dii nɛ. Ama kialin Wia si si u jaŋ joŋo piba, ba biba na. <sup>40</sup> Wia fa sii che duu joŋ ku-zɔŋ-la a piba nii, u faa biine la ma wiaa nɛ. U faa che di la di ba kala ŋaa ni-zɔmɔ nɛ worun duu wuo joŋ ku-la pi la kala.

## 12

### *Má to Yesu naa-buasun*

<sup>1</sup> La paala na di bunbun nialin si sei Wia niin wialin yuga nɛ. Ba chin la seme-na kala nɛ a gollila. Ba nii na wialin kala la sii ŋaa. La si laa Wia niin wiaa nii, u naga laa fá a pipagise nɛ a mumu Wia-jaŋ. La sii fá nii, má len di la joŋ kuŋ-kala si nyagela bil a ta. U maga di la len wu-bɔŋŋɔɔ ŋaanin a wuo nyalime a fá mumu sipaan. <sup>2</sup> La sii fá nii, u maga di la beŋ Yesu ɛ nɛ, bee wiaa u nɛ laa sipaan sei wialin la si laa dii a nyalime mu, a na ba diderin. U fa jima ari u jaŋ na heen, ama u bi wii-la u si laa dii len ta, bee wiaa u jima ari u si ŋaa nii, Wia jaŋ len duu tuon tɔre. Nii nɛ tii u sei ba kpaasu mere daagee nyun. U si dii hiisin nii, u sipaa tuo. U si na heela a dere, u jil Wia-jaŋ a leeɛ hoŋ Wia seme, ni-duon di-honun.

<sup>3</sup> Má biine Yesu wiaa. U na heen nɛ worun ni-bɔŋŋɔɔ nisin ɛ. Ama u nyalima chin u yarida naan ɛ nɛ. Di ma nɛ biine u wiaa, ma nanndaasin bi jaŋ yuore. Ma bi jaŋ joŋ wialin ma si laa

dii ta. <sup>4</sup> Ma si laa Yesu wiaa dii nii, ma di wu-bɔŋŋɔɔ nii loo. Ama wu-bɔmɔ-la ha bima wuo. Ama ma si via wu-bɔmɔ-la a na heɛŋ nii, ma chaliŋ ha bi jaasa. <sup>5</sup> Nyunyaase wialiŋ Wia si bula pima, ma yua neɛ? Wia bul wialiŋ pi u biiriŋ ne. U si,

“Mi bii, di Wia nii che duu dagiŋ woŋbiin, jegile nii woruŋ.

Duu ne dɔgisin maa, si leŋe di ŋ tuɔŋ chei.

<sup>6</sup> Wia cho u bii-na kala ne, nii ne tii u dudɔgisɛba nii.

Nuu-na kala Wia si bene u ŋaa u bii, u yie dɔgisu ne.”

<sup>7</sup> Di Wia nii dɔgisin, sei u niin. U jima ŋ ŋaa u bii ne. Nii ne tii u dɔgisin. Ŋ ha na bii-na kala duu nyimma buu dageɛ? <sup>8</sup> Wia yie didage u biiriŋ kala ne. Di u bima daga, u naga ari ma tuo u biiri, ma ŋaa maŋgaa-biiri ne.

<sup>9</sup> La nyimmaba si lulla, ba yie dagela ne, la ma zizilba. Nii-na u maga di la ma to la Nyimma Wia woruŋ a wuo keŋ miisin. <sup>10</sup> La nyimmaba si lulla la keŋ miisin, ba yie dagela jisin baŋmene ne. Ba tuɔtɔre wiaa ne ba yie dagela la tuto. La Nyimma Wia titia ma dagela ne. Uu che duu pela le ne, nii ne tii u didagela nii. Wia bi disinnin keɛ. Uu dagela di la ma nage nii u si naga ne.

<sup>11</sup> Bua-la le Wia sii dagela nii, la tuɔŋ yie chei ne, beɛ wiaa wialiŋ u sii dagela heye pila. Ama di la ne seye duu dagela, nii jaŋ pela le

maachie. Di la ne nyalima a mu sipaan nii, wialiŋ jaŋ leŋ di la ŋaa tuɔ-pul timma Wia teen, a fiela hoŋ som ari yarifiɛlaa.

*Má pɔ ma titia le di wu-bɔŋ kala sí ma pege juu*

<sup>12</sup> A tin wiin deen wiaa, má joŋ ma nisaa ta aŋ leŋ di ma naŋdaasin polli. <sup>13</sup> Wutitii-la ma si nia, má kenu kaa titin a wuo mumu sipaan. Di ma ne ŋaa nii, ma jaŋ wuo pe nialiŋ si he ma tuɔŋ a laa Wia wiaa dii aŋ bi doluŋ keɛ wialiŋ le. Ma jaŋ wuo peba le di ba chin ba yarida le a sí begilu. <sup>14</sup> Má he ma doluŋ kala aŋ loo chiche di ma di nuu-kala keŋ niibala, a bira loo chiche di ma sí disinnin keŋ. Di ma ne bi disinnin keɛ, ma jaŋ wuo na Wia. Nuukala si keŋ disinnin bi jaŋ wuo nau. <sup>15</sup> Wia si fála kala nennige nii, má pɔ di nuu-kala sí hariŋ joŋo yia nennige-la u sii fála le. Má pɔ ma titia le di wu-bɔŋ kala sí ma pege juu di ma keŋ disinnin Wia sipaan. <sup>16</sup> Nii wiaa má pɔ ma titia le di ma tuɔŋ nuu-kala sí ni-bɔŋ ŋaa, a bira pɔ di ma tuɔŋ nuu-kala sí u titia tuɔtɔre wu-ŋaalaa ma le to aŋ via Wia woŋbiin ta. Baal kubala ne fa he dime baa yire Iso. U fa ŋaa u nyimma bii-hian ne, ama u ŋaa wu-bɔŋ ne u si joŋ u hiasin yalle aŋ laa kiaa dii. <sup>17</sup> U nii hariŋ le ne Iso tuɔŋ chei u si ŋaa nii. U faasa yel a sul u nyimma duu sul Wia

pu duu pɛu lɛ. Ama Wia biu lɛ pɛ. U bi wii-la u si bula wuo kaa birimɛ.

<sup>18</sup> Má kɔ Wia teenj nɛ. Ma naabalimaba fa kɔ peelin deenj teenj ba sí yire Saana nɛ. U saa bi naga ari peelin deenj teenj nɛ ma kɔ. Ba si ku yi peel-la, Wia bula piba di ba sí peel-la digu. Ba na nyinj-gelin duu lii peel-la lɛ, a bira na di peel-la kala tɔ birimiŋ nɛ lim. Ba nii pel-bal maa duu lu lee-la. <sup>19</sup> Ba nii nyilliŋ ba sí ŋmuu, a nii nuu yiikoro maa sí bul wiaa. Ba si nii yiikori-la, nii nɛ ba fá fawulluŋ a bul di yiikori-la bira sí wiaa bula piba. <sup>20</sup> Wii-la u si bula pi nialiŋ heye nɛ a piba. U fa si di puna koo kuŋ-kala nɛ digi peel-la, u maga di ba yagu ari tabiaa nɛ a kpu. Wiinj deenj fa heye nɛ nialiŋ teenj. Nii nɛ tii ba bul nii. <sup>21</sup> Wialiŋ nialiŋ si na leŋe ba kala fá fawulluŋ, nii nɛ tii Moosis ma titia chichel a bul, “Mii fá fawulluŋ nɛ.” <sup>22</sup> Ama ma nialiŋ si laa Yesu wiaa dii, má ku yi peel-la ba sí yire Zaayɔŋ nɛ. Má ku yi taŋ-la ba sí yire Jerusalem a he Wia-jaŋ lɛ nɛ. Wia-la si weye jaŋ nɛ nii. Wia tinɗaaraa bui buiba bui ma hilimi lee-la ari tuɔtoruŋ. <sup>23</sup> Lee-la nɛ nialiŋ Wia si laa sipaanj laa ta he. Wia ma titia he dime nɛ a ŋaa nii-la si jaŋ dii nuu-kala sariya. Wia nialiŋ si suba ma he dime nɛ, nialiŋ u si leŋe ba ŋaa tuɔ-pul tinɗaa u sipaanj. <sup>24</sup> Má kɔ Yesu ma teenj nɛ. U nɛ he Wia ari

nuhuobiine pɛge. Wia tou lɛ nɛ a ta nji-faliŋ nuhuobiine teenj. U nɛ suba a joŋ u chaliŋ jaase a pi nuu-kala. U chal-la-na faasa tinj nɛ a pela lɛ. U bi Ebil chaliŋ naga. Ebil chaliŋ-na fa joŋ cheeriŋ pi nii-la si kpuu nɛ.

<sup>25</sup> Má jegile nii wialiŋ Yesu sí bul. Ma síba via ari Iziral tinɗaa si via wialiŋ Moosis fa si bula piba, Wia dogiseba nɛ. Nii wiaa, di la nɛ via wialiŋ Yesu Kirisito si bula, Wia jaŋ dogisela a kii nii u si dogise Iziral tinɗaa.

<sup>26</sup> Iziral tinɗaa fa nii Wia yiikoro nɛ. U yiikoro leŋe tinteenj kala zigili nɛ. Leele ŋla Wia bula pila ari u jaŋ leŋ di tinteenj bira zigili, ama tinteenj duŋduŋa dee. Wia nyuŋ ari tinteenj kala nɛ jaŋ zigili. <sup>27</sup> U si bula duu jaŋ bira leŋ di tinteenj zigili keŋ bubuɔŋ nɛ. U bubuɔŋ nɛ ŋla: Wia jaŋ leŋ di dunia deenj kialiŋ u si ŋaa zigili. U jaŋ keŋba kaa birime, ka kialiŋ si bi wuo zigili-na he dime. <sup>28</sup> Wia joŋ tintee-la si bi wuo zigili nɛ a pila. Nii wiaa, má leŋ di la fáu a lolu, aŋ pɛ chuchuɔlu ari siifesiŋ. <sup>29</sup> U maga di la fá Wia a chuɔlu, bee wiaa u nage nyinj-gelin nɛ a didii kiaa.

## 13

*Nii la si jaŋ ŋaa di Wia tuɔŋ tɔre*

<sup>1</sup> Ma nialiŋ si laa Yesu wiaa dii, ma si cho dɔŋɔ nii, má keŋ nii naan lɛ. <sup>2</sup> Má he doluŋ a biben nuhuɔraa

worun ma diisin le. Niaa donsun laa nuhuɔraa bil ba diisin le, an bi jin di nuhuɔra-la donsun naa Wia tinɔdaaraa ne. <sup>3</sup> Ma donsu-la ba si kaa to dia, ma liliisi ba wiaa. Ba si kenba to dia nii, ma liliisi ba wiaa a nage ma kala ne ba kaa to dia nii. Ma donsu-la ba si to naasin dogise maa, ma liliisi ba ma wiaa a nage ma kala ne baa dogise nii. Ma naa nii, bee wiaa ma ma he ma miisin le ne a naa kubala. <sup>4</sup> Ma nialin si jaa haalaa, ma ken ma haalaa worun. Haalaa maa, ma ma ken ma balaba worun. Baalaa, ma si ma haalaa via koo ma si ma donsun haalaa gollo chiche. Ma si wu-liilin naa, bee wiaa Wia jan dii nialin si naa wu-liilin sariya. Nialin ma si via ba haalaa ta, Wia jan dii ba sariya. <sup>5</sup> Ma si faasa cho moribiee kinken. Ku-la kala ma si kene, ma len di ma tuon tore ba nyun. Nla ne Wia bul u tenin tuon. U si, "Mi bi jan viama ta. Mi bi jan ko di mi lii ma harin." <sup>6</sup> A tin nii wiaa, la jan wuo bul ari nyu-duon,

"Wia ni pemi le.

Mi bi jan fa fawullun.

Bee ne niaa chiche di ba naami?

Nuhuobiine bi wii-kala wuo naami le."

<sup>7</sup> Ma liisi ma kuhiasin wiaa. Ba ne bul Wia wiaa pipima. Ma biine a mu yi nii ba si laa Wia wiaa dii a chin nii le a mu suu. Ma to ba naa-buasun a chin nii le.

<sup>8</sup> Yesu Kirisito si nage nii, u bi jan ko duu birima. Faafaa u si nage nii, nii ne u haa nage ari jinin kala. Maachie maa, nii titia ne u jan nage. <sup>9</sup> Ma si len di niaa donsun ken wu-tania ku dagema. Niaa deenba, baa bul kudiilee wiaa ne. Wialin ba si che di ba dagema bi jan pema le. Wialin biba ma titia le pe. Ama u maga di ma to Wia. U lahɔrimo le ma jan ken dolun. <sup>10</sup> La nialin si laa Yesu wiaa dii ma to ken lee-la ba si kpu kiaa pila. Ba kpu Kirisito daagese-la nyun a tin la wiaa ne. U si suu nii, u che kudiilee ne pila la kaa kpa a didi. Nialin si to wialin Moosis si nmunsa bil di niaa tuto aa tin tinin naa lebi-la tuon, ba bi kudiilee deenba wuo dii. <sup>11</sup> Di nialin si kpu pusun pipi Wia kuhian ni che duu piise niaa disinin ta, u yie kpu pusun ne a ken chalin kaa juu Wia-dia-la sipaan a gaare koru-la nyun. Ama pusu-la ba si kpua, ba yie nyige ta tan-la jeen harin ne.

<sup>12</sup> Nii ne tii Yesu ma na heen Jerusalem jeen harin duu wuo jon u titia chalin a piise niaa disinin ta, di ba naa ni-zomo Wia teen. <sup>13</sup> Yesu dii hiisin ne worun tan-la jeen harin, nii wiaa ma len di la mu lee-la a dii hiisi-la titia. <sup>14</sup> La he dunia le ne, ama la bi lee kene dunia deen le. Ama la-na, laa gberɛ tan-la si jan lii Wia-jan ko ne. <sup>15</sup> Nii wiaa la nialin si wuo suri la niin a bul ari



la jinj Wia, má leŋ di la to Yesu Kirisito ɛ a dennu bua-na kala ɛ, a leŋ di u yirin yire. <sup>16</sup> Bua-na kala má ŋaa kukeri a ŋinŋaa wu-zɔŋŋɔɔ dɔŋɔ ɛ. Kialin ma si kenɛ, má ŋaa pipi dɔŋɔ. Di ma ní ŋaa ŋii, Wia tuɔŋ jaŋ tɔre ma nyuŋ.

<sup>17</sup> U maga ma tuto ma kuhiasin niin a jon ma titia a piba. Má ŋaa ŋii, bæe wiaa ba ní beŋma. Maachie ba ne jaŋ dage ŋii ma si tin ma tinŋinŋaa a pi Wia. Di ma ne to ba niin ɛ, ba jaŋ tin ba tinŋinŋaa woruŋ ari tuɔtɔruŋ. Ama di ma ne bi ba niin to, ba tuɔŋ jaŋ chei ma nyuŋ. U ŋii saa bi jaŋ pɛma ɛ.

<sup>18</sup> Má sul Wia pila bua-na kala. La jima la tuɔbiinaa kala chese ne Wia teen. Wina kala la sí ŋaa ɛ, la yie chiche di la ken wutitii ne aa ŋaa wialin. <sup>19</sup> Mii sulma di ma fiɛse siin a sul Wia pimi, di Wia pimi wonbiin di mi kɔ ma teen lima.

### *Tenin wu-bulun diderin*

<sup>20</sup> Mii sul Wia duu pɛma ɛ. U ne pi nuu-kala yarifiɛlaa. U ne chise la Tiina Yesu Kirisito suuŋ ɛ. Yesu Kirisito nage pie-daari-duo ne aa beŋ u niaa nyuŋ woruŋ. U chalin ne Wia jon a ta niin la teen. Wii-la u si ŋaa bi jaŋ lel. <sup>21</sup> Mii sul Wia duu pima ku-zɔŋ-na kala di ma wuo kaa ŋinŋaa wialin kala sí tɔre u tuɔŋ. Wia to Yesu Kirisito ɛ ne a ŋaa wiin deen pima. Má leŋ di la dennu a leŋ di

u yirin yire a kaa mu wuu. Ami.

<sup>22</sup> Mi naanbiirin, mii sulma di ma jegile nii wialin mi si bula pima. Wu-kuubie ne mi ŋmuŋsa pima ŋii. <sup>23</sup> Mii che di ma jin ari la naanbie Timoti ba fa si kaa to dia, ba liisu ne. Duu ne bi diene an kɔ mi teen, la duu kala jaŋ kɔ ma teen. <sup>24</sup> Má chuɔɛ ma nihiasin ari Wia niaa kala a pila. La tuɔŋ nialin si lii Itali tinŋteen maa chuɔɛma. <sup>25</sup> Wia lahɔrimɔ ɛ ma jaŋ hɔŋ ari yarifiɛlaa.

## TEN-LA JEEMS SI N MUNSA

<sup>1</sup> Mi-na Jeems si ɲaa Wia ari la Tiina Yesu Kirisito tiɲtinna, mii chuɔlema Juu tiɲɲaa kala si laa Yesu wiaa dii a pisa a he nialin si bi Juu tiɲɲaa ɲaa tuɔɲ.

*Yarida ari wu-jimin wiaa*

<sup>2</sup> Mi naanɓiirin, di wu-yiri-na kala ne juuma, má leɲ duu ɲaa ma tuɔɔru. <sup>3</sup> Di ma ní na heɛɲ wii le aɲ ha ɲaa Wia yarida, ma jaɲ wasa chin ma yarida le a keɲ kenyiri. <sup>4</sup> Má leɲ di ma wuo keɲ kenyiri a nyalima mu dɛɛ, di ma wuo ku ɲaa tuɔ-pul timma a sí kuɲ-kala che ka.

<sup>5</sup> Wiaa deenba le, di nuu ne he ma tuɔɲ a bi wu-jimin kene duu wuo jin wii-la u si jaɲ ɲaa, má leɲ di tiina sul Wia duu pu wu-jimin. U keɲ zile a joɲ wu-jimii-la a pi nuu-kala si sulu. U bi ba kuɲ-kala ka kiri. <sup>6</sup> Ama di ɲ ne sul Wia duu pin kuɲ, laa dii ari u jaɲ ɲaa wii-la pin. Sí tuɔbiinaa balia keɲ ari u jaɲ ɲaa koo u bi ɲaa. Nii-la kala si sul Wia chiche kuɲ aɲ keɲ tuɔbiinaa balia, u nage lii-pelin si he fuoɲ tuɔɲ ne. Pelin yie ɲmobu a kaa mu sipaan, aɲ bira ɲmoo ko hariɲ maa. <sup>7-8</sup> Nii-la kala si keɲ tuɔbiinaa balia a bi wu-bala le china wii-kala u sii ɲaa le, u tiina sí

yielu ari la Tiina Wia jaɲ joɲ kuɲ-kala pu.

*Nialin si ɲaa summoo ari nialin si keɲ kiaa wiaa*

<sup>9</sup> Nii-la si bi lee kene dunia le nialin si laa Yesu wiaa dii tuɔɲ, má leɲ duu tuɔɲ tɔɛ ari Wia si pu lerin. <sup>10</sup> Nii-la ma si ɲaa kiaa tiina nialin si laa Yesu wiaa dii tuɔɲ, má leɲ duu ma tuɔɲ tɔɛ ari Wia si kenu kaa muuri. U bi jaɲ dieni aɲ suu, a nage yaɲ si yie fiile u bí dieni aɲ hihil ɲii. <sup>11</sup> Bɛɛ wiaa, wia yie pose, lerin faasa lin. U wulimin ɲaa yaɲ-la hil. U filaa yuori. U zomun lel. Nii-la si keɲ kiaa ma nage ɲii ne. U ha jaɲ titin u tiɲtiɲaa aɲ suu kage.

<sup>12</sup> Wia jaɲ pe nii-la wiin si jua le, aɲ ka u wuo nyalime a chin u yarida le. U si wuo nyalime ɲii, Wia jaɲ joɲ miisi-la si bi dɛɛ a timu, miisi-la u si si u jaɲ joɲo pi nialin kala si chou.

*Nii la si jaɲ ɲaa di wii ne juula le*

<sup>13</sup> Di nuu-kala ne juu wii, u bi maga di tiina bul ari Wia ne magisu. Nuukala bi Wia wuo nyise duu ɲaa wu-boɲ, u titia ma bi nuu-kala ka nyise duu ɲaa wu-boɲ. <sup>14</sup> Tuɔbiin-bomɔ-la si he nuu tuɔɲ ne yie nyise nuu-kala duu ɲiɲaa wu-boɲɲoo. Tuɔbiin-bomɔ-la ne yie kenu yenɲi. <sup>15</sup> Duu ne seye duu to tuɔbiin-bomɔ-la le, ba yie ɲaa u juu haache le. Haache-la yie ku yuge.

Duu ne ku yuge lerinj kala, u yie n̄aa nii-la suu.

<sup>16</sup> Mi naan̄bii-kpianaba, ma sí ma titia nyisu. <sup>17</sup> Ku-zoŋ-na kala lii Wia teen ne. U ne ta kialinj kala si he wia nyuŋ le a chaane. Ama di ba ne jua, biriminj yie he dime. Wia titia bi nii naga. U bí birime. <sup>18</sup> U tuot̄orunj le ne u laa sipaanj bul u niinj wiaa si n̄aa wutitii a pila di la wuo tutoba, di Wia wuo n̄aa di la n̄aa u biirinj. U n̄aa nii di la wuo n̄aa u bun̄bun̄ biirinj, ka di ku-kaanaa-na tuto.

*La síi nii wiaa nii ari la síi n̄aa wiaa nii*

<sup>19</sup> Ma jinj wiaa deen̄ba kala ne. Nii wiaa, má leŋ di nuu-kala n̄aa lima a jegilee nii wiaa niaa teenj worunj. Di ma níi che ma bul wiaa maa, má fiele an̄-na bul. Di ma che ma na baaninj maa, ma sí guu na, <sup>20</sup> bee wiaa nii-la síi na baaninj bi jaŋ wuo n̄aa wialinj síi to won̄biinj Wia teenj. <sup>21</sup> Nii wiaa, má liise ma titia wu-b̄oŋ wu-n̄aalaa le a via wu-b̄om̄o-la kala si gollima. Má kenj ma titia muuri Wia sipaanj a sei Wia niinj wialinj u si dagema. Má laa he ma tuonj le. Wialinj kenj dolunj a wuo laama tita.

<sup>22</sup> Ama u maga di ma tuto wialinj Wia si si di ma n̄in̄aa ne. U bi maga di ma ninii wialinj dun̄dun̄. Di ma níi nii wialinj an̄ bibaa n̄aa, maa nyise ma titia ne. <sup>23</sup> Di nuu-kala ne nii wialinj an̄ bibaa n̄aa, u nage nia si jonj been̄antire a bee na u

nagisinj ne. <sup>24</sup> U yie ben̄ a na u titia been̄antire-la tuonj. Di u ne surisa lii, u yu nii u si naga. <sup>25</sup> U nage nii ne wialinj Wia si leŋe ba n̄muŋsa bil di niaa tuto tuonj ne. Wiaa deen̄ba kala ne zoŋo kin̄kenj. Wun̄yiarinj bi guolo. Ba wuo laa niaa tita ne. Di nuu ne na wiaa deen̄ba, a nyalima n̄aa wialinj u si na, a bí yu an̄ haa n̄aa mumu, Wia jaŋ peu le wialinj kala u síi n̄aa le.

<sup>26</sup> Di nuu ne jonj u titia ari u to Wia ne, an̄ bi u titia kene ari wialinj u síi bul le, uu nyise u titia ne. U Wii-chuolunj ma n̄aa pei ne. <sup>27</sup> La Nyimma Wia won̄biinj tonunj u si daga ari u n̄aa won̄biititii ne n̄la: Má mu nina biisinsinj ari yo-haala-la síi na heen̄ a pe pipeba le, an̄ liise ma titia dunia niaa wu-n̄aalaa le di ba disinninj síi digu.

## 2

*Má p̄o di ma sí niaa kaa pup̄ore doŋo le*

<sup>1</sup> Mi naan̄biirinj, leele ma laa la Tiina Yesu Kirisito wiaa dii ne, u-na yiri-balinj Tiina. Nii wiaa u bi maga di ma jonj niaa doŋsunj jirima an̄ ben̄ doŋsunj maa, ma siaa bibaa su, a kenj niaa pup̄ore nii. <sup>2</sup> Má leŋ di la jonj ari niaa balia ne ku juu lee-la nialinj si laa Yesu wiaa dii si hilime. Doŋo kenj kiaa a laale geri-zoŋoŋo a jonj selime nenii-piraa a kpiere u titia. Doŋo ma n̄aa summu a ma laale geri-kosum̄o. <sup>3</sup> Nii u

ne ma keŋ nii-la si laale geri-zoŋŋoo woruŋ a pu di-hoŋ-zomun u hoŋ, aŋ bula pi nii-la si laale geri-kosumoo duu hoŋ tinteen koo duu chin dime. <sup>4</sup> U nii zomoo nee? Di ma ne ŋaa nii, ma tuobiinaa bi wu-bala le china, maa pore niaa ne nii. Ma yie keŋ ma tuobiin-lorunu-la ne a laa niaa wiaa jiiŋ a didageba, a keŋba pore doŋo le. U nii bi zoŋ.

<sup>5</sup> Mi naanbii-kpianaba, má jegile nii mi teen. Nialin si ŋaa summoo dunia deen le ne, Wia tuose di ba laa u wiaa dii a juu Wia kuorii-la, lee-la u si si nialin si chou jaŋ juu. Ba jaŋ juu a sene kuori. <sup>6</sup> Ama ma bi woruŋ ka ŋaa, ma si yie ŋaa wiaa juuu summoo le nii. Na, kiaa tinŋaa ne yie gurema a didii doluŋ ma ma le a yie fuga keŋma mu sariya didiilin. <sup>7</sup> Ba yie chichei yiri-zoŋ-la Wia si joŋo he pima.

<sup>8</sup> Ba ŋmuŋse Wia tenin tuoŋ a bul ŋla ne:  
“Cho ŋ doŋo tiina ari ŋ si cho ŋ titia nii.”

Di ma ne sene to niin deen, ma ŋaa woruŋ ne. La Kuoro Wia ne joŋ niin deen pila.

<sup>9</sup> Di ma ne keŋ niaa pupore a juoŋ doŋsun jirima, aŋ ka ma siin bi doŋsun su, maa ŋaa haache ne. Wialin Wia si leŋe ba ŋmuŋsa bil di niaa tuto daga ari ma tele ne. <sup>10</sup> Di nuu ne paala tuto wialin kala ba si ŋmuŋsa bil di niaa tuto aŋ chei ba tuoŋ wu-bala maa, u naga u chei wialin kala ne nii Wia

sipaan. <sup>11</sup> Wia-la si si di ma si niaa haalaa che, u titia ne si di ma si niaa kpu. Di ma ne bi niaa haalaa che aŋ kpukpu niaa, ma ha chei Wia niin wialin u si bile ne.

<sup>12</sup> Di ma nii bul wiaa aŋ pe ŋiŋaa wialin, má liise yi ari Wia jaŋ to ma wu-bulaa ari ma wu-ŋaalaa le ne a dii ma sariya. U jaŋ to wialin le ne u si leŋe ba ŋmuŋsa bil di niaa tuto a dii ma sariya. Wiaa deenba ne laa niaa tita. <sup>13</sup> Di nuu ne bi niaa nennige ka fá, Wia ma bi jaŋ fá tiina nennige bua-la le u si jaŋ didii niaa sariya. Ama nii-la si fá niaa nennige bi jaŋ fá wii-kala sariya-la che-diilin.

*Nii la si jaŋ dage ari laa ŋaa yarida*

<sup>14</sup> Mi naanbiirin, di nuu ne si u laa Wia wiaa dii ne aŋ bi wialin Wia si cho ka ŋaa, u nii zomoo? Duu yarida nage ŋla, ma biina Wia jaŋ laau ta koo? <sup>15</sup> Má leŋ di la joŋ ari ma naanbie bi geri-zoŋŋoo kene a bi u niin kudiilee wuo na dii. <sup>16</sup> Nii ne ma bula pu a bul, “Wia jaŋ pen le a pin kialin ŋ sí che.” Di ma ne ŋaa nii aŋ bi seye di ma peu le ari kialin u sí che, u nii zomoo? <sup>17</sup> Nii wiaa, di nuu ne si u laa Wia wiaa dii aŋ bi wialin Wia si cho ka ŋaa, u yarida-la ŋaa pei ne.

<sup>18</sup> N bi poo nuu doŋ jaŋ he dime a bula pin ari u laa Wia wiaa dii ne. Doŋo ma bul duu maa ŋaa wu-zoŋŋoo ne. Duu ne bul ŋla, mi jaŋ

piesu a bul, “Di η ne bi wu-zonηoo ηaa aa pe η yarida le, ee ne η jan wuo dagemi ari η sene laa Wia wiaa dii nee? Mi-na ηaa wu-zonηoo ne a dagine ηii ari mi sene laa Wia wiaa dii ne.”<sup>19</sup> N jima ari Wii-bala ne he dime koo? Di η ne jin ηii, u ηaa wu-zon ηe. Ama si yu ari jin-bonηoo ma jin ηii le ne, ηii ηaa fawullun kenba, ba chichel.<sup>20</sup> Bee ne tii ma yaare ηla a biine di nuu jan wuo laa Wia wiaa dii an bi wu-zonηoo ηaa pipe? Ma len di mi dagema ari nuu ne si u laa Wia wiaa dii ne an bi wu-zonηoo ηaa pipe u yarida-la le, u yarida-la ηaa pei ne.<sup>21</sup> Ma liisi la naabalima Abiraham wiaa. Bee ne tii Wia len Abiraham wuo ηaa tuo-pul tiina u sipaan? Wii-la si tii ne ηla: U to Wia niin, Wia si bula pu duu ken u bie Aizik a kaa mu kpu a pu. Nii ne u sii ken Aizik mu di u kpu a pu.<sup>22</sup> Abiraham laa Wia wiaa dii ne a faa ηaa wialin maa Wia si cho. U ηaa wu-zonηoo a pe u yarida-la le. Nii ne u yarida sene wasa su.<sup>23</sup> U si ηaa ηii ne, wialin ba fa si ηmunsa Wia tenin tuoη ku ηaa wutitii. Ba fa ηmunsa ari Abiraham laa Wia wiaa dii, ηii ne tii Wia len u wuo ηaa tuo-pul tiina u sipaan. Nii wiaa ne niaa paala kenu yiyire Wia nanonη.<sup>24</sup> Nii daga ari wialin nuu sii ηaa ne yie tii Wia len u wuo ηaa tuo-pul tiina u sipaan. U si laa Wia wiaa dii dunduηa-la

dee bi tii.<sup>25</sup> Nla titia ne u fa nage Rehab ma le. U fa ηaa ha-chorun ne. Iziral tinηaa tinđaraa si ko u teen, u kenba worun. Ba sii che di ba luora lii fa viiri, u dageba wonbii-tanii ne ba to a fa lel ba dinđonηoo nisin le. A tin u si ηaa ηii wiaa, Wia len u wuo ηaa tuo-pul tiina u sipaan.<sup>26</sup> Di nuhuobiine ne bi wiese kene, u bi wei. Nii-la saa si laa Wia wiaa dii an bi wu-zonηoo ηaa pipe u yarida-la le, u tiina ma nage ηii ne. U yarida-la ηaa pei ne.

### 3

#### *La nenđelimiη si nage ηii*

<sup>1</sup> Mi naanbiirin, ma tuoη, ma si chiche di ma yuge a wiwalime di ma didage ma donsun tinηaa si laa Yesu wiaa dii, bee wiaa ma jima di ba nii dii dunia niaa sariya, ba jan faasa dii la nialin sii dage niaa sariya ne a kii la donsun tinηaa.<sup>2</sup> La kala yie ηaa wiaa piperiki ne. Di nuu ne bi wiaa bula piperiki, u bi wii-kala kene. U wuo ken u titia ne wialin kala u sii ηaa le.<sup>3</sup> Na jaaba, di nuu nii che duu dagu, u yie jon jaaba niin kon ne a he jaaba niin le. Kon-la le ne u yie ken, a didage joo-la u mumu lee-la kala u sii che duu mu.<sup>4</sup> Bira na liin daborusun maa. Ba ηaa kubalaa ne. Peli-duon yie lu a kaa ven. Ama daanyi-bie ne he dime. Nii-la si ken liin daboro-laa ven, u yie ken daanyi-bie-la a kaa dage a

ηaa u mumu lee-la kala u sii che. <sup>5</sup> Nii ne nuhuobiine nenđelimiη ma nage. U bi wii-kala maga aη bubul wu-balaa. Ma jima ari nyiη-geliη ma bi yuge aη jaη wuo chol giri-baliη a diiu kala.

<sup>6</sup> Nuhuobiine nenđelimiη ma nage nyiniη ne. U jaη wuo ηaa wu-bōη kala si he dunia le. U ηaa la yaraa seme dōη ne. Ama u wu-bōηηō u si yie ηaa yie cheη la yaraa kala ne u chei. U yie chol nyiniη ne a dii ηii halii nuhuobiine miisiη kala le. Nyiη-la yie lii Sitaani leriη ne a chol. <sup>7</sup> Nuhuobiine keη pusūη kala dolūη ne: Baga kiaa ari diibiisiη, ari kialiη kala sii tuuri tiηteen, ari liiη tuōη kiaa. U keηba kala dolūη ne. <sup>8</sup> Ama nuu-kala bi nenđelimiη dolūη kene duu kaa bil duu ηaa fululu. U ηaa ku-bōη ne a keη huōη-la sii kpu niaa. <sup>9</sup> La yie keη la nenđelimee ne a kaa didenne Wia si ηaa la Tina a ηaa la Nyimma maa, aη bira keη nenđelime-la titia a kaa tutuuse la dōηsuη tiηηaa maa Wia si ηaa ba nagu. <sup>10</sup> Nii-la titia la si kaa denne Wia, u titia ne la kaa tuuse niaa. La naarbiiriη, u bi maga di ηla ηiηaa. <sup>11</sup> Lii-bul-sii-bala bi jaη wuo bul lii-zōmuη ari lii-lōruη kala. <sup>12</sup> Tutogo ma bi jaη wuo neη babilaa. Chichueη ma bi jaη wuo neη tutogo nanbilaa. Nii titia ne lii-la si nage yisiη ma bi jaη wuo birime lii-zōmuη.

*Wu-jimii-la si lii Wia teen si nage ηii*

<sup>13</sup> Ma tuōη nialiη si keη wu-jimiη, ma siaa ma suri, u maga di ma ηiηaa wu-zōηηō ne a keη ma titia muuri, a dage ηii ari ma sene keη wu-jimiη ne. <sup>14</sup> Ama di ma ne faasa keη yaribieriη dōη le, a chil ma dunđuηa wiaa, aη didage ma titia ari ma keη wu-jimiη, maa nyia ne. <sup>15</sup> Wu-jimiη deη yiri bi Wia teen lia. U ηaa dunia wii ne a lii dunia niaa tuōbiinaa le ari Sitaani teen. <sup>16</sup> Di niaa ne faasa keη yaribieriη dōη le a chil ba titia wiaa dunđuηa, ba jaη keη nii-liaba, a yuyuo dōη, a ηiηaa wu-bōηηō yuyuge. <sup>17</sup> Ama wu-jimii-la si lii Wia teen zōmō kiηkeη. Wu-bōη kala tuo u le. Nii-la kala si keη wu-jimiη deη, yie hōη ne sōm a kikere yuosuη, a keη zile. U yie jegilee nii niaa niη wiaa. U yie fifá niaa nenniη ma ne woruη. U yie ηiηaa wu-zōηηō ne. U bi tuōbiinaa balia ma kene a bi nii-sima ma kene. <sup>18</sup> Nanjejeeree yie hōη sōm ne aη pe niaa ma le di ba ma hōη sōm, a ηiηaa wialiη Wia si cho.

#### 4

*La to Wia hariη koo la to dunia niaa hariη?*

<sup>1</sup> BEE ne ma yie guraa yuo dōη? Wii-la si tii ne ηla: Ma chil ma titia tuōtōre wiaa ne ma tuōη le a chiche di maa ηaa wu-bōηηō, ηii ne tii. <sup>2</sup> Ma cho di ma keη

kiaa an bi baa na, nii ne tii ma cho di maa kpu dɔŋɔ an laa. Ma yie hihiene kialin an bi wuo na. Nii ne tii ma guraa yuo dɔŋɔ nii. Wii-la si tii ma bi kialin ma si cho kene ne ɲla: Ma bi Wia sul duu joŋo pima. <sup>3</sup> Bua dɔŋɔ ma le ma yie sene sulu a chiche kiaa. Ama ma yie ken tuɔbiin-bɔŋɔɔ ne a sul. Nii ne tii ma bi laa. <sup>4</sup> Ma nage haala bira si bi u bala niin ka to ne. Ma bi jin ari nii-la kala si joŋ u nyun kala he dunia kiaa le ɲaa Wia dinɔŋ nee? Wutitii, nii-la kala si joŋ u nyun he dunia kiaa le birime Wia dinɔŋ ne. <sup>5</sup> Ma biina wialin ba si dage Wia tenin tuɔŋ bi bubuɔŋ kenee? Ba ɲmuɲsa ari Wia faasa cho di u dunɔŋa ne tii la kala. Di la bi seye duu tiila, u didii hadɔrun. <sup>6</sup> Ama Wia fála nennige worun a pipela le di la joŋ la titia kala a pu. Nii ne tii ba ɲmuɲse Wia tenin tuɔŋ ari Wia via nialin sii bigisi ba titia le an pipe nialin si ken ba titia muuri le. <sup>7</sup> Nii wiaa, má joŋ ma titia a he Wia nisin le. Má joŋ hariŋ yia Sitaani, u jan fá lel. <sup>8</sup> Má surisa mu kpage Wia, u ma jan ku kpage ma. Má soŋ ma nisaa liise wu-bɔŋɔɔ ɲaaniŋ le a pulle ma tuɔŋ, a bira sí tuɔbiin-lɔrunun biinu, be wiaa ma ken tuɔbiinaa balia balia ne. <sup>9</sup> Má leŋ di ma tuɔŋ chei. Máa yel sii-liirin. Má leŋ di ma tuɔɔrun birime tuɔcheen. <sup>10</sup> Má ken ma titia

muuri Wia sipaan. Di ma ne ɲaa nii, u jan kenma chuule.

*Má pɔ ma sí ma dɔŋsun tinɲaa wiaa laa jin*

<sup>11</sup> Mi naanbiirin, ma sí ma dɔŋsun tinɲaa yirin chei. Nii-la kala si chei u dɔŋɔ tiina yirin koo u bul u teen maa a bul duu cheye ne, u naga tiina ma bul wu-bɔŋ ne a tige wialin Wia si leŋe ba ɲmuɲsa bil di niaa tuto le ne, a bul ari ba bi zoŋ. Di nuu ma ne bira bul di wialin bi zoŋ, u ma bira bi wialin to. U miira joŋ u titia ari u yuga ne a kii wialin Wia si leŋe ba ɲmuɲsa bil. <sup>12</sup> Wia dunɔŋa ne ken dolun duu bil wiaa pi niaa di ba tuto. U dunɔŋa ma ne jan wuo dii niaa sariya. U ne jan wuo laaba ta, u ne jan bira wuo joŋ cheerin piba a ɲaa di ba suu. Kubee ne kama maa, di ma chichei ma dɔŋsun tinɲaa yirin?

*Má pɔ ba-bii-bal wiaa ɲaaniŋ*

<sup>13</sup> Bee na ma nialin si yie bul ari maachie ma jan mu tan deen a yalle bayalin a yi jina a na nyuurun, ma paala bi chiemin wiaa jin. <sup>14</sup> Ma miisin bi kun-kala ɲaa. U nage burun si yie to ne chichuɔŋ, ka muapilii wia pɔse u lel. <sup>15</sup> U fa maga di ma bul ari Wia ne seye di la ken miisin, la jan ɲaa ɲla. <sup>16</sup> Ama ma haa ɲmoo ma boye le ne aa dage ma titia. U nii bi zoŋ. <sup>17</sup> Di nuu ne jima ari wii ne maga duu

ηαα ka u via duu ηαα wii-la, u ηαα haache ne.

## 5

*Wii-la si jan ηαα nialin si kenj kiasa le*

<sup>1</sup> Ma nialin si kenj kiasa, má jegile nii mi teenj. Máa ηmoo niinj! Bua kubala níi kɔ, bua-la le ma jan faasa na heenj. <sup>2</sup> Ma ku-dan-la suomo chichei ne. Mɔgulun ma suomo didii ma genninj. <sup>3</sup> Ma selime kiasa ari ma moribii-biin ma kala ne sua. Kialin si sua ηii daga ari ma bi worun ηαα. Ma kialin si sua ηii, ηii titia ne ma yaraa ma jan pua a nage nyininj ne die. Leele dunia kpage diderinj ne, an ka ma-na ha paa kiasa fifaa. U bubun ne beε? <sup>4</sup> Ma gure nialin maa, ma si ηαα ba tinj ma bagisinj le ne. Ba níi ηαα gonj ma le. Gonj-la juu la Tiina Wia digilaa ne, nii-la síi bej dunia kun-kala. <sup>5</sup> Ma si he dunia le, ma nii sima a ηαα ma tuɔɔre wiaa. Ma si dii kiasa a waa a nere ηii, ma nage nesinj ba si diesa ba nere di ba kpu ne. Di ba ne dii ma sariya, ba jan jonj cheerinj pima di ma suu ηii titia. <sup>6</sup> Ma bi worun ηαα, ma si jonj cheerinj pi nialin si bi wii cheye, ka ma kpuba. Ka ba bi wii ηαα di ba laa ba titia.

*Má kenj kenyiri a chuchuoεe Wia*

<sup>7</sup> Mi naanbiirinj, má kenj kenyiri a gberε cheε-la la Tiina Yesu si jan miira kɔ. Má na paara, u si kenj kenyiri

ηii. U yie gberε duonpuso. Duonunj nii, u duu kiasa, a bira kenj kenyiri a gberε gbanchaan-duonunj le u kiasa wase, u ta. <sup>8</sup> Má ηαα kukeri a ma kenj kenyiri ηii. Má nyage ma boye worun, beε wiaa tapulii-la la Tiina Yesu si jan miira kɔ ka kpage ne. <sup>9</sup> Mi naanbiirinj, ma sí wiaa gurimu donjo le, di Wia sí ma sariya dii a jonj cheerinj pima. Na nii-la si jan dii la sariya ne chinj boinjinj a ηαα siri duu juu ηii. <sup>10</sup> Mi naanbiirinj, má na nialin síi bul wiaa, la Tiina Wia Din-zonj-la dolunj le. Ba na heenj worun an ha kenj kenyiri. Má ηαα kukeri an ma to ba naa-buasunj a ma kenj kenyiri. <sup>11</sup> Wia pe nialin si wuo nyalime ηii a mu dere le worun. Má bira na ηii baal kubala ba síi yire Job si na heenj an nyalime ηii. U heε-la harinj le la Tiina Wia peu le a lej u nii sima. Wutitii, la Tiina Wia ka fála nennige kinjenj kinjenj.

<sup>12</sup> Mi naanbiirinj, siifian wiinj ne mii che mi bula pima. U ne ηla: Di ma ne si ma jan ηαα wii, ma sí ηmiesu. Ma sí wia nyunj kunj ηmiesu, ma sí tinteenj kunj ma ηmiesu, koo ma sí kunj-kala ηmiesu. Di ma ne seye, u maga di ma bul, "Oo, la seye ne." Di ma ne bira bi seye maa, u maga di ma bul, "Ai, la bi seye," an sí ηmiesu. Di ma níi ηαα ηii, Wia bi jan jonj cheerinj pima bua-la le u si jan dii ma sariya.



<sup>13</sup> Di nuu ne he ma tuon aa na heen, má leŋ duu chuole Wia a sulu duu peu le. Di nuu ma ne he ma tuon, u tuon tɔre, má leŋ duu yi yiilaa a denne Wia. <sup>14</sup> Di nuu ma ne he ma tuon a wiwiile, má leŋ duu yire nialin si laa Yesu wiaa dii aa hilimi ba tuon kuhiasin di ba ko u teen a chuole Wia pu. Ba sii chuole Wia nii, má leŋ ba loge nuun a tisu, an sul Wia pu la Tiina Yesu dolun le. <sup>15</sup> Di ba ne laa dii ari Wia jan sene ŋaa wii-la ba si sulu chiche, u jan leŋ di nii-la sii wiilu duori a ken dolun. Di u ne ŋaa haacheba maa, Wia jan jon ba kala cheu. <sup>16</sup> Nii wiaa, má dage ma titia haacheba a pi donɔ a sul Wia a pipi donɔ, di Wia wuo ŋaa di ma bira ken dolun a duori. Di tuo-pul tiina ne sul Wia, u Wii-sulun yie faasa ken dolun ne. Duu ne sul Wia a chiche wii, wii-la yie sene ŋaa ne. <sup>17</sup> Má na baal kubala baa yire Ilaaja. U ma fa nage la ne. U faasa sul Wia ari siifesiŋ di duonun si nii. Duonun sene bi nia jisin batori ari chensiŋ balidu. <sup>18</sup> Nii hariŋ le ne u bira sul Wia a chiche duonun. Nii ne Wia leŋ duonun nii, ba duu kiasa, ba kala wase.

<sup>19</sup> Mi naanbiirin, di ma tuon nuu ne faa to wutitii le an bira leŋ wutitii-la, ka nuu don bira kenu kaa miira ko u tuto wutitii-la, <sup>20</sup> u tiina si ŋaa nii pe haache tiina-la le u leŋ u wu-bonɔɔ ŋaaniŋ an miira ko a tuto wutitii-

la. U jan laa tiina miisin pu. Wia jan chese nii-la haacheba kala ta. U bira bi jan liliisi.

Mi tenin diderin ne nii.

## TEN-BUNBUN-LA PIITA SI N̄MUNSA

1 Mi-na Piita si ŋaa Yesu Kirisito nan̄zɔɔ, mi ne ŋmun̄se teniŋ deen̄ a pipi ma nialiŋ kala si laa Yesu wiaa dii aŋ tiŋ heeŋ wiaa a piŋe a he Pɔŋtɔs le, Galiisia, Kapadoosia, Esia, ari Bitiinia tiŋteen̄ kala le. 2 Faafaa kala ne la Nyimma Wia biine ari u maga di ma ŋaa u niaa, ŋii ne tii u liisema a jɔŋ u Diŋ-zɔŋ-la a hema le, di ma ŋaa tuɔ-pul timma u teen̄ a tuto Yesu Kirisito niin̄. U ne jɔŋ u chaliŋ jaase ma wiaa di ma si disinniŋ keŋ Wia teen̄. La Tiina Wia lahɔrimɔ, yarifielaa jaŋ yuge ma teen̄.

### *Wialiŋ la s̄i yiɛlu*

3 Má leŋ di la denne Wia, nii-la si ŋaa la Tiina Yesu Kirisito Nyimma. U fála nenniŋe kin̄keŋ. Nii ne tii la wuo keŋ mii-faliŋ deen̄, beɛ wiaa Yesu Kirisito suba aŋ sii suuŋ le ne. La saa yiele ari la jaŋ keŋ miisi-la si bi dere. 4 La maa yiele ari la jaŋ dii ku-zɔmɔ-la Wia si ŋaa bil u niaa le u jaŋ le. Kialiŋ bi jaŋ pua, ba bi jaŋ chei maa, ba zɔmuŋ ma bi jaŋ lii. 5 A tiŋ ma si laa u wiaa dii ŋii, Wia beŋma ne. Di dunia ne ku didere, u jaŋ dage niaa ŋii u si laama ta. 6 Kialiŋ ma si jaŋ na Wia teen̄ leŋe ma tuɔŋ faasa tɔre. Leɛle ŋla-na ma tuɔŋ cheye ne, beɛ wiaa

heeŋ juuma ne. Ama ma jima ari hee-la si juuma, u bi jaŋ dieni. 7 Hee-la jaŋ leŋ di niaa wuo na ari wialiŋ ma si laa dii-na sene ŋaa wutitiiba ne. Ba zɔmɔ a kii selime si zɔmɔ ŋii. Selime ŋaa dunia niaa ku-choolii ne. Ba yie jɔŋo cho ne a yugile di ba na u sene ŋaa selime neɛ? Nii titia ne ma ma nage. Ba magisema ŋii di Yesu Kirisito ne miira ko tapulii-la, niaa jaŋ denne Wia a zizilu duu yiriŋ yire a tiŋ wialiŋ ma si laa dii wiaa. 8 Ari ma ha si bi Yesu Kirisito na ma kala, ma ha chou ne. Ma si buu na ma ha, ma laa u wiaa dii ne. Nii wiaa, ma tuɔŋ tɔre kin̄keŋ kin̄keŋ ne. Ma paala bi ma tuɔtɔruŋ wuo didage. 9 A tiŋ ma si laa Yesu wiaa dii ŋii, ŋii ne tii Wia laama ta.

10 Nialiŋ fa s̄i bul wiaa, Wia Diŋ-zɔŋ-la doluŋ le fa bul wu-zɔmuŋ deen̄ Wia si jaŋ jɔŋo pima wiaa ne. Ba fa gbilli Wia teniŋ tuɔŋ ari si-ifiesiŋ di ba na ŋii Wia si jaŋ laa u niaa ta. 11 Yesu Kirisito Diŋ-zɔŋ-la fa si heba le, u ne bula piba ŋii Kirisito si jaŋ na heeŋ, ka di niaa-na zizilu. Nii ne ba ninerike di ba na bua-la le wiaa deen̄ba si jaŋ ŋaa ari ŋii ba si jaŋ ŋaa. 12 Wia jɔŋo dageba ari ma wiaa ne tii ba faa bul wiaa deen̄ba, ba titia wiaa dee. Leɛle nialiŋ si bul Wia wu-zɔmɔ-la pipima, ba dagema bun̄bun̄ wiaa deen̄ba kala ne. Wia Diŋ-zɔŋ-la si lii Wia-jaŋ ku tuu heba le ne piba doluŋ deen̄. Wia tiŋdaaraa

ma fa cho di ba na wiaa deenba.

*Nii Wia niaa si maga di ba nage*

<sup>13</sup> Nii wiaa, má leŋ di ma tuobiinaa pe dɔŋɔ le a keŋ ma titia wii-na kala le. Má joŋ ma yielaa kala he ku-la Wia si jaŋ joŋo pima bua-la le Yesu Kirisito si jaŋ miira kɔ. <sup>14</sup> Má tuto Wia niinj. Bua-la le ma fa si bi Wia jin, ma faa to ma tuɔtɔre wu-ŋaalaa le ne. Ma bira siba to. <sup>15</sup> Wia bi disinninj kene aŋ yirema. Nii wiaa, má ma sí disinninj keŋ wii-na kala ma síi ŋaa le, <sup>16</sup> bee wiaa ba ŋmunŋsa faafaa kala ne ari Wia si, “Ma sí disinninj keŋ, bee wiaa mi ma bi disinninj kene.”

<sup>17</sup> N si keŋ Wia yire ŋ Nyimma duu peŋ le, liise yi ari duu ní dii niaa sariya, u biba kaa pɔre. U yie tin nuu-kala nii nii-la si tima mage. Má saa fáu a leŋ di ma wu-ŋaalaa zɔŋ dunia deen le. <sup>18</sup> Ma kala jima ari Yesu Kirisito tin ma chiminj a liisema wu-peiba ŋaaniŋ le. Ma naabalimaba faa ŋaa wu-peí deenba ne. U bi naga ari kialinj síi chei a nage selime koo moribiee ne u joŋo yɔɔma. <sup>19</sup> Ama Yesu Kirisito chalinj titia ne u joŋo tin ma chiminj. Moribiee bima wuo yɔɔ. Yesu nage pie-bie ne ba si liisa di ba kpu a pi Wia. U ŋaa Pie-bii-zɔŋ ne a bi wu-bɔŋ kala kene. <sup>20</sup> Bunbun kala, ka di Wia-na ŋaa dunia, u liise Yesu Kirisito ne duu tou le

a laa dunia niaa ta. Dunia si ku kpage derinj, Wia leŋ u kɔ ma teen duu laama ta. <sup>21</sup> Má tou le a laa Wia wiaa dii ne. U ne chise Yesu suunj le a pu yirinj di ma yarida ari ma yielaa kala he Wia le.

<sup>22</sup> A tin ma síi to wutitii wonbiinj le nii, ma piise ma disinninj kala ta ne. Ma si ŋaa nii, ma sene cho ma naanbiiri-la si laa Wia wiaa dii. Nii wiaa, má keŋ ma tuɔŋ ari ma dolunj kala a wasa cho dɔŋɔ. <sup>23</sup> U naga ba wasa lulma ne a tin Wia niinj wiaa si pi niaa miisinj. Ba ne pima mii-falinj. Ba bi jaŋ pua, ba jaŋ he dime a kaa mu wuu. U bi nage nuhuobiine síi suu ne pima miisinj deen. Ama Wia-la si bi suu ne pima. <sup>24</sup> Ba ŋmunŋse Wia teninj tuɔŋ a bul, “Nuhuobiine kala nage yan ne. U zɔmunj kala nage ya-filaa ne. Yan-la hil, ka ya-filaa ma yuori. <sup>25</sup> Ama Wia niinj wialinj jaŋ he dime a kaa mu wuu.” Wia niinj wialinj ne ŋaa wu-zɔmɔ-la ba si bula pima.

## 2

*Piita bul wiaa a tige tabiinj si keŋ miisinj*

<sup>1</sup> Ma si keŋ mii-falinj nii, má liise ma titia wu-bɔŋ kala le, a sí niaa nyinyisu, a sí kanfugi timma ŋaa. Ma sí yaribierinj keŋ, a sí niaa hariŋ gigaa. <sup>2</sup> Ama u maga di ma nage bii-mullunj ne aa che yilinj di ba wase a waa. U

maga di ma ma chiche Wia niinj wialinj ari bii-mullunj sii che yilinj nii. Di ma nii che Wia wiaa nii, ma janj waa worunj ba le, a mu yi tapulii-la Wia si janj laama ta. <sup>3</sup> Má njaa nii, bæe wiaa ma titia jima ari la Tiina Wia kenj zile ma teenj.

<sup>4</sup> Nii wiaa, má ku kpage la Tiina Kirisito, nii-la si nage tabii-la si kenj miisinj. Niaa viau ta, ama Wia ne liisu u njaa ku-zonj u teenj. <sup>5</sup> Di ma ne kpagu, ma ma titia janj nage tabia-la si kenj miisinj. Nii wiaa, má lej di Wia kenjma saa u dia, lee-la u Dinj-zonj-la si janj he. Wia liisema di ma sí disinninj kenj a laa niaa nyunj a tima pupu, ari nialinj fa si laa niaa nyunj a kpu pusunj pi Wia nii. Wia cho di ma to u Dinj-zonj-la le ne a tima pu ari ma tuonj kala, a tinj Yesu Kirisito wiaa. <sup>6</sup> Ba nmunse Wia teninj tuonj a bul,

“Wia si, mi jonj tabiinj ne a bil Zaayonj le,  
tabii-duo-la mi si janj kaa bil mi dia gentine.  
Mi liise tabii-la ne, u zomɔ pimi.  
Nii-la kala si laa u wiaa dii, hiisinj bi janj dii u tiina.”

<sup>7</sup> Ma nialinj si laa u wiaa dii, u njaa ku-zonj ne ma teenj. Ama ba nmunse Wia teninj tuonj a tige nialinj si bi u wiaa laa dii le,

“Tiebie-la dii-saaraa si via,  
Wia lej u ku njaa tiebii-duonj ba si jonj bil dia gentine.”

<sup>8</sup> Ba bira nmunsa ari niaa janj gere tabii-la a tel.

Tabii-la njaa bunj ne. Ba janj tel, bæe wiaa ba via Wia niinj wialinj ne. Wia bul faafaa ne ari ba janj njaa nii.

<sup>9</sup> Ama Wia liisema di ma njaa u niaa, a laa niaa nyunj a tima pipi ma Kuoro. Wia titia ne tiima. Ma ne njaa nialinj Wia si liisa di ma njaa u niaa. U yirema di ma wuo bul wu-kpunjkerisi-la kala u si njaa a pi niaa ari nii u si liisema biriminj tuonj a kaa ku juu u pulunj-jalii-la tuonj. <sup>10</sup> Bunj-bunj-la ma fa bi kunj-kala njaa, ama leele ma njaa Wia niaa ne. Wia fa bima nennige fá, ama leele u fáma nennige ne.

*Wialinj si maga di ma nialinj si laa Yesu wiaa dii njjaa*

<sup>11</sup> Mi naanjii-kpianaba, ma jima ma njaa nuhuɔraa ne a bi dieni dunia deenj le. Nii wiaa, mii sulma, má liise ma titia ma tuɔɔre wu-njaalaa le, bæe wiaa ma tuɔɔre wu-njaalaa bi janj sei di ma njaa wialinj sii tɔre Wia tuonj. <sup>12</sup> Ma si guoli nialinj si bi Wia wiaa laa dii tuonj, má kenj ma titia worunj, di ba sí wonjbiinj na a bul ari ma njaa ni-bomɔ ne. Di ba nii bul ma njaa wu-bonjɔɔ maa, má lej di ba na wu-zomɔ-la ma sí njaa, a denne Wia duu yirinj yire tapulii-la u si janj dii niaa sariya. <sup>13</sup> A tinj la Tiina Yesu Kirisito wiaa, má sei nialinj si kenj dolunj aa benjma dunia deenj le. Má zizil ma tinjteenj kuori-balinj,

nii-la síi beŋ nuu-kala, <sup>14</sup> a bira zizil nialin kuori-balin síi liisa di ba laa u nyun. Ba yie dudogise nialin síi ŋaa wu-bonŋoo, aŋ bibese nialin síi ŋaa wu-zonŋoo le. <sup>15</sup> Wia tuotoron ne ŋla, di maa ŋaa wialin síi to wonbiin a wuo len di ni-yaara-la si bi wii jin, di ba sí wii wuo bul a tigema le. <sup>16</sup> Ma tii ma titia ne, nii wiaa má hōŋ ari nialin si tii ba titia, aŋ sí len di nii ŋaa di ma ŋaa wu-bonŋoo. Ama má ŋaa wialin si jaŋ dage ari ma ŋaa Wia tintinnaa ne. <sup>17</sup> Má zil nuu-kala. Má cho nialin ma si laa Yesu wiaa dii a ŋaa ma naanbiirin. Má fá Wia a zizil ma kuori-balin.

wu-bonŋ kala ŋaa. U bi wu-nyiari kala nyia. <sup>23</sup> Ari niaa si tuusu ma kala, u biba laa tuuse. Ari nii ba si dogisu kala ma, u bi bula bul duu ma jaŋ dogiseba. U ta jon wii-kala a he Wia nisin le ne, nii-la si jaŋ keŋ wutitii a dii niaa sariya. <sup>24</sup> Yesu Kirisito titia ne laa la haacheba a chun, ba kpaasu mere daageŋe nyun di la jon harin yia haache a ŋinaa tuo-pul wiaa. Ba viiru, chalin lii u yaraa le. U nii len la nyanyalaa kala dere la yaraa le. <sup>25</sup> Ma fa nage pieŋe si yenŋe ne, ama leeŋe ma miira ko Pie-daarila, nii-la si beŋ ma miisin pima.

### 3

#### *Má to Yesu naa-buasun*

<sup>18</sup> Ma nialin si ŋaa tintinnaa a timaa pi niaa, má tuto ma nihiasin niin a zizilba bua-na kala le. Di ba keŋ zile koo di ba ne tere ma teen, má pipiba zile. <sup>19</sup> Di nuu ne bi wii cheye ka baa dogisu, a tin u síi to Wia nii, di tiina ne nyalima a na hee-la, u ŋaa worun ne Wia teen. <sup>20</sup> Di ŋ ne ŋaa wu-bon di ba dogisun, ka ŋ wuo dii kenyiri nii le, u bi maga di ŋ chiche di ba lollun. Ama di ŋ níi ŋaa wu-zon, ka di baa dogisun a tin wu-zon-la wiaa, di ŋ ne nyalima, Wia tuon jaŋ tōre ŋ nyun. <sup>21</sup> Wia paala yirema di ma na heeŋ. Má liisi ari Yesu Kirisito titia ma na heeŋ ne ma wiaa a dagema nii ma si jaŋ to u naa-buasun. <sup>22</sup> U bi

*Haalaa ari ba balaba si maga di baa ŋaa nii donŋ le*

<sup>1</sup> Ma haalaa, má len di ma siaa tuu tintenŋ ma balaba teen. Di haala donŋ keŋ bala si bi Wia wu-zomō-la laa dii, u bala-la jaŋ wuo birima lii u wu-ŋaalaa le a laa Wia wu-zomō-la dii a tin u haala mele si zomō wiaa, di haala ne paala bi Wia wu-zomō-la bula pu maa. <sup>2</sup> Di ma ŋaa nii, ba jaŋ na ma mele si zomō ari nii ma síi fá Wia. <sup>3</sup> Ma sí bibiinu nii ma si jaŋ lilaale kpieraa a zon nii, ari nii ma si jaŋ voo ma nyun duu zon, a sí selime kun-kala jonŋo he ma yaraa le di ma zon, a sí biine nii ma si jaŋ lilaale geri-zonŋoo. <sup>4</sup> Ama má len di ma zomun lii ma tuon ne. Má hōŋ som a keŋ ma titia muuri. Zomun

deen yiri-na bi lel. U ne bira ken nyuurun ma Wia teen. <sup>5</sup> Faafaa haala-la faa kpiere ba titia nii ne a jon ba nyun ari ba yielaa kala he Wia le a ken ba siaa tuu tinteen ba balaba teen. <sup>6</sup> Nii ne haal-la ba sii yire Saara ma fa to u bala Abiraham niin a kenu yiyire u tiina. Di ma nii nja wialin sii to wonbiin a si len di fawullun kenma wii-kala le, ma nja Saara biirin ne.

<sup>7</sup> Ma baalaa maa, ma len di ma mele zon a ken ma haalaa worun. Ma jima di ma dolie kiiba ne. Nii wiaa, ma pipiba zile, bee wiaa Wia ne pi ma kala miisi-la si bi dere. Di ma ne nja nii, wii-kala bi jan wuo ku he ma di Wia pege a chei ma Wii-chulun.

*Ma si wu-bon jono tin wu-bomun chimin*

<sup>8</sup> Wii-la mi sii che di mi bul wu-kaanin ne nja: Ma kala ken tuobiin-bala ne, ma fifa dono nennige, a cho nialin kala si laa Yesu wiaa dii, a ken zile dono le, a ken ma titia muuri dono teen. <sup>9</sup> Ma si wu-bon jono tin wu-bomun chimin. Di nuu ne tuusema, ma si tuusa tin, ama ma sul Wia duu pe tiina le, bee wiaa Wia ma liisema ne duu pema le. <sup>10</sup> Ba nmunse Wia tenin tuon a bul,

“Di nuu-kala nii che duu nii  
sima dunia deen le  
a ken tuotonun,  
tiina si wu-bonhon  
bubul,  
a si wiaa ma nyinyia.

<sup>11</sup> Tiina miire wu-bonhon njanin le,  
a njaa wialin sii to wu-  
titii wonbiin,  
a fiere siin di ba tuosaa  
fiere dono nyun,

<sup>12</sup> bee wiaa Wia siaa kala he  
nialin sii nja tuo-pul  
wiaa le ne,  
a wuoli u digilaa maa a  
nini ba Wii-sulun.

Ama Wia jon u harin yia  
ni-bonhon ne.”

<sup>13</sup> Di ma ne fiere siin di  
ma wuo njaa wu-zonhon,  
kubee ne jan wuo nja wu-  
bon ma le? <sup>14</sup> Di ba nii  
dogisema maa a tin ma tuo-  
pul wu-naalaa le, Wia jan  
pema le. Nii wiaa, ma si  
nialin si dogisema fa, a si ma  
titia ma wiwalimu. <sup>15</sup> Ama  
ma tuon le ma fifa Kirisito a  
len duu nja ma Tiina. Bua-  
na kala le, di nuu ne piesin  
duu jin wii-la si tii n laa Yesu  
wiaa dii, nja siri a to wii-  
la naasin pu. Nii fa Wia  
nii, bul wii-la ari siifilaa.  
<sup>16</sup> Bua-na kala le, ma len di  
ma tuobiinaa chesi, di ma  
wu-naalaa dage ari maa to  
Kirisito ne. Di ma nii nja  
nii, hiisin jan dii nialin sii  
chei ma yirin. <sup>17</sup> Di u ne  
nja Wia tuotonun di ma na  
heen a tin ma sii nja wialin  
sii to wutitii wonbiin wiaa,  
u ne kpia ma si nja wialin  
si bi wonbiin ka to a na  
heen. <sup>18</sup> Yesu Kirisito titia  
suu la haacheba wiaa ne,  
duu wuo liisela la haacheba  
le. U nja nii bala dunun  
ne. U ne fa nja tuo-pul tiina  
a suu haache tinjaa wiaa,

duu wuo kenla kaa mu Wia teenj. Nuhuobiinee ne kpu u yaraa, ama Wia lenj u dima wei a kenj miisinj. <sup>19</sup> Nii harinj u ni-dima le u mu bul Wia wu-zomɔ-la a pi ni-dinji-la ba si kaa to dia. <sup>20</sup> Niaa deenba ne fa via di ba to Wia niinj wiaa bua-la le Nowa fa sii kpaase liinj dabori-balla. Bua deenj le Wia fa kenj kenyiri a gbigberɛba di ba ku juu liinj daboro-la, ka ba via. Bua-la le niaa chori dunɗun ne fa juu liinj dabori-balla, a duori lii-la, a lii a laa ba miisinj. <sup>21</sup> Lii-la tuɔŋ ba si duoro lii nage ba si fo niaa Wii-chuɔle liinj ne. Di ba ne fonj Wii-chuɔle liinj, u bi naga ari ŋ yaraa disinninj ne ba chese ta nii. Ba si fonj Wii-chuɔle liinj nii, u naga la yie sul Wia duu to Yesu Kirisito le si sii suun le a chese la tuɔsaa di ba zɔŋ. <sup>22</sup> U ne lii dunia le a jil Wia-jaŋ a hoŋ Wia seme, ni-duonj di-honunj. U ne kenj dolunj a bibenj Wia tinɗaaraa ari kunj-kunj-kala si kenj dolunj a he Wia-jaŋ le.

#### 4

##### *Má lenj faafaa wu-ŋaalaa*

<sup>1</sup> A tinj Kirisito titia si na heenj nii, má kenj ma titia a ŋaa siri di ma na hee-la yiri u si na, bee wiaa nii-la kala si na heenj, haache bira buu wuo. <sup>2</sup> Ma si he ma miikaaninj deenj le, ma bira sí ma tuɔtɔre wu-ŋaalaa le to, ama má tuto Wia tuɔtɔrunj le. <sup>3</sup> Bunɗun-la kala le ma faa ŋaa wialinj nialinj fa si

bi Wia jinj sii ŋaa ne. Má lenj wialinj. Ma faa to ma tuɔtɔre wu-ŋaalaa harinj ne aa ŋaa wu-liilinj, a chil ma titia wiaa, a faa nyua sininj bubugi, a fa faasa didii kiaa, a yie gollo nyunyua sininj, a faa kpaare vuiaa maa. Vui-kpaarinj bi Wia wonɗiinj ka to. <sup>4</sup> Nialinj si bi Wia jinj ŋaa wu-bɔŋŋɔɔ kinkenj. Leele ma bira bi nii ŋaa. Niaa deenba si na nii, u ŋaaba wu-kpunkpere, nii wiaa ne ba tutuusema. <sup>5</sup> Ama tapulii kubala, ba jaŋ dage wialinj kala ba si ŋaa a pi nii-la si ŋaa siri duu dii ni-weyee ari ni-suununj kala sariya. <sup>6</sup> Nla wiaa ne tii Kirisito bul Wia wu-zomɔ-la a pi nialinj si suba maa, di ba dinjinj kenj miisinj ari Wia si kenj miisinj nii. Wia paala dii ba sariya dunia deenj le ari u si dii niaa kala sariya nii. Ama u bul Wia wu-zomɔ-la a pi nialinj si suba, di ba dinjinj wuo kenj miisinj.

*Nii nialinj si laa Wia wiaa dii si maga di ba ŋiŋaa doŋo le*

<sup>7</sup> Bua-la dunia si jaŋ dere kpaga ne. Nii wiaa má kenj ma titia worunj di ma siaa fiele, di ma wuo chuchuɔle Wia. <sup>8</sup> Wii-la si ŋaa siifianj wiinj ne ŋla: Má he ma dolunj kala a faasa cho doŋo. Di ma ne cho doŋo, ma jaŋ tuto wialinj ma doŋsunj tinɗaa si ŋaa cheima le. <sup>9</sup> Má kenj zile a huhuɔre doŋo worunj ma diisinj le, a sí wiaa gugurimu.

10 Wia jonj dolun pi nuu-kala duu kaa tinj tinjtin-yiri-yiriba ne. Nii wiaa nuu-kala kenj wii-la Wia si jonjo pu a kaa pipe u dɔnsun tinjaa le. 11 Di Wia ne pi nuu-kala dolun duu wuo bubul wiaa, má puu wonbiinj duu wuo bubul wialinj si lii Wia teenj. Di nuu ne tima pipi niaa, ú kenj dol-la Wia si jonjo pu a tima pipiba. Má njaa nii di niaa wuo to Yesu Kirisito le a bibese Wia, duu yirinj yire wii-na kala le. U ne nii-la si kenj dolun ari yirinj a kaa mu wuu. Ami.

*Hεε-la nialinj si laa Wia wiaa dii sí na*

12 Mi naanbii-kpianaba, ma sí leje di hεε-la ma si faasa nina, duu njaa wu-kpunkpere ma le. Wiaa deenba kala ka magisema ne. Ma sí leje di wiinj deenj njaa wu-falii ma teenj. 13 Hεε-la Kirisito si na, má ma na hεε-la titia ne. Nii wiaa má jujuose. Tapulii-la Kirisito ne kɔ ari u tula, ma janj faasa juose. 14 Di ba ní tuusema a tinj Kirisito wiaa, Wia janj pema le, beε wiaa Wia Din-zɔn-la si kenj dolun hema le ne. 15 Má si wu-bɔnɔɔ njaa di niaa dɔgisema. Ma kun-kala sí heenj na a tinj u si kpu niaa wiaa, koo u si njaa gaaru wiaa, koo u si njaa wu-bɔnɔɔ wiaa, koo u si njaa wu-hεeru wiaa. 16 Ama nii-la kala sí na heenj a tinj Kirisito wiaa, u sí leje di hiisinj kenu. U maga di tiina denne Wia, beε wiaa niaa jima ari uu to Kirisito ne. 17 Bua-la Wia si

janj dii dunia sariya yie ne. U janj laa sipaanj a suomi Wia niaa le. Duu ne saa suomiba le, εε ne saa u janj nage nialinj si bi Wia Wuzɔmɔ-la ka to le? 18 Ba nmunse Wia teninj tuɔn a bul,

“U njaa wu-haa ne ari njaa tuɔ-pul tiina Wia sipaanj, duu laanj ta.

εε ne saa u janj nage nialinj si bi Wia jinj a njjaa wu-bɔnɔɔ?”

19 Nii wiaa, má lenj di nialinj sí na heenj a tinj Wia tuɔɔrunj wiaa njjaa wialinj sí to Wia wonbiinj. U maga di ba jonj ba titia kala a he Wutitii Tiina-la si njaaba, nisinj le.

## 5

*Má bej Wia nialinj worunj u si jonjo he ma nisinj le*

1 Mi kenj wii ne di mi bula pi ma nialinj si njaa Wia niaa nihiasinj. Mi ma njaa Wia niaa nihianj dɔn ne. Mi titia siinj na hεε-la Kirisito si na ne. Nii titia ne mi ma janj na tula-la Kirisito si janj na bua-la le u si janj miira kɔ. Nla ne tii mii sulma <sup>2</sup> di ma bej Wia nialinj u si jonjo he ma nisinj le, ari pie-daaraa si bej ba piesee nyunj nii. Ma sí leje duu nage ari baa fugema di ma bejba, ama má bejba ari ma titia tuɔɔrunj. Má cho tinjimii-la, anj sí time-la ma sí laa harij to, beε wiaa u bi maga di ma kenj yaribierinj aa che moribiee. <sup>3</sup> Ma sí dolun kaa bej niaa deenba Wia si jonjo he ma



nisiŋ ɛ. Ama má leŋ di ba na ari ma meɛ zɔmɔ, di ba tuto ma naa-buasun.

<sup>4</sup> Di ma ne ŋaa ŋii, tapulii-la Yesu Kirisito si jaŋ miira kɔ, nii-la si ŋaa Pie-daaraa kala kuhian, u jaŋ joŋ ku-la si zɔmɔ a kii kuŋ-kala pima. U-na bi jaŋ chei. <sup>5</sup> Ma bapuosi-biisiŋ, má joŋ ma titia he ma nihiasiŋ nisiŋ ɛ. Má kala keŋ ma titia muuri ma doŋɔba teen. Má liisi ari Wia teniŋ tuɔŋ ba bula,

“Wia lii nialiŋ síi bigisi ba titia ɛ hariŋ ne, ama nialiŋ si keŋ ba titia muuri, uu peba ɛ ne.”

<sup>6</sup> Nii wiaa, má keŋ ma titia muuri Wia teen. U ne keŋ doluŋ a wuo beŋma. Di bua-la ne yie, u jaŋ leŋ di ma ŋaa ni-balaa. <sup>7</sup> Wii-la kala síi walimema, má joŋo he Wia nisiŋ ɛ, beɛ wiaa u níi beŋma. <sup>8</sup> Má leŋ di ma siaa fieɛ aa pɔ ma titia ɛ woruŋ. Ma diŋdoŋ-la Sitaani, uu gollima ne a nage naachigiŋ si gollo yele chiche kudiilee, aa che duu keŋ ma doŋɔ dii. <sup>9</sup> Má via Sitaani aŋ keŋ wialiŋ ma si laa dii kpaŋ kpaŋ. Ma jima ari nialiŋ ma si laa Wia wiaa dii a ŋaa ma naaŋbiiriŋ a he dunia seme-na kala, ba maa na heeŋ ne. <sup>10</sup> Heeŋ deen ma síi na bi jaŋ dieni. U ŋii hariŋ ɛ, Wia-la si keŋ zile kinkeŋ kinkeŋ a yirema di ma ma na tula-la Kirisito si keɛ a kaa mu wuu, u ne jaŋ keŋma wasa kii, a leŋ di ma chaasa chin ari doluŋ. <sup>11</sup> Wia ne keŋ doluŋ a kaa mu wuu. Ami.

### *Chuɔlaa*

<sup>12</sup> Mi ne leŋe Silivaanas ŋmuŋse teniŋ deen pipima. Mi jima ari u ma ŋaa la naaŋbii-titii ne. Wu-kuu-bie ne mi ŋmuŋse pima di mi ŋaa di ma nyuŋ nyaase ne. Wutitii ne, mi bula pima ŋii Wia si pela ɛ. Nii wiaa má chin wiaa deenba ɛ kpaŋ kpaŋ. <sup>13</sup> Nialiŋ si laa Yesu wiaa dii aa hilimi Babilon ɛ, nialiŋ Wia si liisa di ba ŋaa u niaa ari u si liisema ma ŋii, ba maa chuɔɛma. Mi bie Maak maa chuɔɛma. <sup>14</sup> Má guori doŋɔ a chuɔɛ doŋɔ, a dage ma si cho doŋɔ ŋii.

Ma nialiŋ kala si laa Yesu wiaa dii, ma jaŋ hoŋ ari yarifiɛlaa.

## TEN-LIA-LA PIITA SI N̄MUNSA

<sup>1</sup> Mi-na Saamɔŋ Piita n̄ n̄mun̄s̄e teniŋ deen̄ pipima. Mi ŋaa Yesu Kirisito t̄nt̄innu n̄e a ŋaa u nan̄zoo maa. Mi n̄mun̄s̄e teniŋ deen̄ pipi ma nialin̄ ma si laa Yesu Kirisito wiaa dii ari la ma si laa u wiaa dii ŋii. La di ma kala ŋaa tuo-pul timma n̄e a tiŋ Wia ari la Laataara Yesu Kirisito wiaa.

<sup>2</sup> Wia lah̄orim̄o l̄e yarifelaa jan̄ yuge ma teen̄, a tiŋ wu-jimii-la ma si ken̄e a mu tige Wia ari la Tiina Yesu l̄e.

*Má leŋ di ma mele zɔŋ di Wia wuo t̄ŋma*

<sup>3</sup> U dolun̄ l̄e Wia wuo pila kun̄-kala la síi che la miisin̄ l̄e, di la wuo kaa ŋaa wialin̄ kala síi to Wia won̄biin̄, di la wuo jin̄ Wia, nii-la si yirela di la wuo na u tula ari u zomun̄ kala. <sup>4</sup> Wiaa deen̄ba n̄e ŋaa wu-bal-la u fa si si u jan̄ ŋaa pila. Wialin̄ zom̄o kin̄ken̄ la teen̄. U jon̄ wiaa deen̄ba pila di la wuo liise la titia wu-bom̄o-la dunia niaa síi to ba tuot̄ore wu-ŋaalaa l̄e a ŋiŋaa, ka di la ku nage ŋii Wia si naga. <sup>5</sup> A tiŋ ma si laa Yesu wiaa dii ŋii, má he dolun̄ di ma mele zɔŋ. Má leŋ di ma wu-jimin̄ puŋa pip̄e ma meli-zɔŋ-la l̄e. <sup>6</sup> Má to ma wu-jimii-la l̄e a ken̄ ma titia worun̄. Ma si ken̄ ma titia

worun̄ ŋii, má ken̄ kenyiri. Ma si ken̄ kenyiri ma ŋii, má pe ken̄ nyalima. Ma si ken̄ nyalima ŋii, má ŋiŋaa wialin̄ síi to Wia won̄biin̄, <sup>7</sup> a pe ken̄ zile ma naan̄biiri-la kala teen̄, an̄ pe choba maa. <sup>8</sup> Di ma n̄e ŋaa wiaa deen̄ba a yuyuge, ba jan̄ pe wialin̄ ma si jima a mu tige la Tiina Yesu Kirisito l̄e, a leŋ di ma ŋaa nialin̄ Wia si jan̄ kaa titin̄ u t̄nt̄in̄ŋaa. <sup>9</sup> Nii-la kala si bi wiaa deen̄ba ka ŋaa, u tiina ŋaa nyulun̄, a nage nii-la si na u naasiŋ bubuɔŋ dun̄duŋa an̄ bi di-bolii na, beɛ wiaa u tiina paala yu ari Yesu fa chese u bun̄bun̄ haacheba-la u si ŋaa ta n̄e. <sup>10</sup> Nii wiaa mi naan̄biirin̄, mii sulma ari Wia si yirema a liisema ŋii, má he dolun̄ a chin̄ wiaa deen̄ba l̄e worun̄. Di ma níi ŋaaba, ma bi jan̄ lii Wia won̄biin̄ l̄e. <sup>11</sup> Di ma n̄e chin̄ worun̄, ma jan̄ jin̄ ari ma jan̄ wuo juu la Tiina ari la Laataara Yesu Kirisito kuorii-la tuɔŋ. U kuorii-la jan̄ he dime deen̄ deen̄.

<sup>12</sup> Nii wiaa n̄e tii bua-na kala l̄e mi yie liliisima a mu tige wiaa deen̄ba l̄e. Ma paala jin̄ wutitii-la n̄e a chin̄ u l̄e worun̄. <sup>13</sup> Mi ha si he mi miisin̄ deen̄ l̄e, u ŋaa wu-zɔŋ n̄e di mi liliisima wiaa deen̄ba di ma síba yu, <sup>14</sup> beɛ wiaa mi jima ari mi bi jan̄ dieni dunia deen̄ l̄e. La Tiina Yesu Kirisito titia dagemi wiin̄ deen̄ n̄e. <sup>15</sup> Mi saa che di mi n̄e suba maa, di ma wuo liliisi wiaa deen̄ba bua-na kala l̄e.

*Piita si duu titia ne na Yesu u miisinj le*

<sup>16</sup> La bula pima nii la Tiina Yesu Kirisito si ko dunia ari dolun. Wii-la la si bula pima bi nage sunsoḡuloḡ wu-jinnaa si soḡulo. La titia siin ne na Yesu Kirisito tula.

<sup>17</sup> Bua-la le la Nyimma Wia si jon dolun ari tula pu, la nii yiikoro duu lii wia nyun, Wii-jaribako yiikoro ne. U fa si, "Mi Bii-choolun ne nla, mi tuon tore u nyun."

<sup>18</sup> Bua-la le yiikori-la fa si bul nii di Yesu ne fa he peel-la si bi disinnin kene nyun.

<sup>19</sup> Nialin fa sii bul wiaa, Wia Diŋ-zon-la dolun-la le ma fa bula ari wiaa deenba jan naa. Má jegile niiba, bee wiaa wialin ba si bula nage chaanin ne a chaane birimin tuon halii tan mu pul. Bua-la le chaanin deen jan pulle a nage nanyualun a he ma tuon. <sup>20</sup> U maga di ma laa sipaan jin ari wialin ba si nmunsa bil Wia tenin tuon, nialin fa sii bul wiaa, Wia Diŋ-zon-la dolun le ne bulba. Nii wiaa nuu-kala bi jan wuo ken u titia wu-jimin a dage wialin bubun. <sup>21</sup> Wii-la si tii ne nla: Wialin ba si bula bi ba titia tuobiinaa le lia. Ama Wia Diŋ-zon-la ne ku he ba tuon a len ba bul wialin Wia si jonjo piba.

## 2

*Wu-nyiari kerichiba si nage nii*

<sup>1</sup> Bunbun wu-nyiaraa ku nialin si laa Wia wiaa dii tuon, a fugiba ari baa bul

wiaa, Wia Diŋ-zon-la dolun le ne. Nii titia ne wu-nyiari kerichiba jan ku he ma tuon a luora didage ma wialin si jan cheima a paala bul ari ba bi la Tiina Kirisito jin, nii-la si laaba ta. Ba si naa nii, u bi jan dieni, ka di Wia dogiseba di ba suu. <sup>2</sup> Niaa jan yuge a to ba harin a ninaa wu-liili-la wu-nyiari kerichiba-la sii naa. Ba wu-naalaa jan len di niaa bul wiaa a chichei Wia wonbii-titii-la la sii to.

<sup>3</sup> Wu-nyiari kerichi deenba jan ken tuon-lun. Ba jan ken nii-sima a nyinyisema a lilaa ma kiaa maa. Faafaa kala ne Wia dage ari u jan dii niaa deenba yiri sariya a dogiseba maa. U bi jan dieni ka di Wia dogiseba di ba mu suu.

<sup>4</sup> Bunbun kala ne Wia tindaaraa donsun fa naa haache. Ba si naa nii, Wia biba lenje pei. U keseba a jonba yuo he Wia nyinin tuon. Ba ken chorumoḡ voba a len ba pin birimin tuon. Ba jan he dime a kaa mu yi tapulii-la Wia si jan dii dunia niaa sariya. <sup>5</sup> Bua-la le Nowa fa si he u miisin le, nialin kala fa sii naa wu-bonhoḡ, Wia fa biba lenje pei. U lenje liin pelle paa ni-bonhoḡ deenba kala, an len Nowa ari u niaa balipe dundun. Nowa fa bula pi nialin di baa naa wialin sii to Wia wonbiin. <sup>6</sup> Bua-la le tasi-la balia ma fa he dime. Ba yirin ne Sodom ari Gomora. Ba niaa fa sii naa wu-bonhoḡ, Wia fa dogiseba

ne. U fa jon nyinin ne a nyigeba, ba kala dii buru an ka tuorun dunɗuna. Wia dage nii ari u jan dogise nialin kala si bi u wonɓiin ka to. <sup>7</sup> Baal kubala ba faa yire Lot ma fa hon Sodom ari Gomora tinteen ne a fa nja tuo-pul tiina. U dunɗuna ne Wia kaa liise tasi-la tuon. Ni-bomɔ-la wu-ɗaalaa fa chei u tuon worun. <sup>8</sup> Lot fa si hon ni-bomɔ-la tuon, u yie na an pe nii wu-bomɔ-la kala ba fa sii nja tasi-la tuon tapulii-na kala. Wiaa deenba ne leɗe u tuon viisi, bee wiaa u-na fa nja tuo-pul tiina ne. <sup>9</sup> Wiaa deenba kala dagela ari Wia jin wonɓii-la u si jan to a laa tuo-pul tinjaa ta, di Sitaani si wuo magiseba di ba nja wu-bon. Ba bira dagela nii Wia si jan nja a dogise ni-bonɗon maa a kaa mu yi tapulii-la u si jan dii dunia niaa sariya. <sup>10</sup> Ba tuon, Wia jan faasa dogise nialin sii nja wu-liilin ari nialin si bi che di ba jon ba titia a he Wia nisin le.

Wu-nyari kerichi deenba bi nuu-kala ka fa, an pe ken nyu-duon maa a njaa ba tuotore wiaa. Nii ne tii ba yie tuuse Wia tinɗaara-la si ken yirin a he Wia-jan le. <sup>11</sup> Wia tinɗaara-la ne ken dolun a kii wu-nyari kerichi deenba. Ama Wia tinɗaara-la biba ka tuuse, a bi cheerin ma jonɗo pi niaa deenba Wia sipaan. <sup>12</sup> Wu-nyari kerichi deenba yie njaa wiaa ari pusun si bi wu-jimin kene

sii nja nii ne. Ba yie nage pusun niaa si yie diese di ba kese a kpu ne. Ba yie bubul wu-bonɗon ne a titige wialin ba si bi jin le. Ba si jon cheerin pi niaa donsun nii, nii titia ne Wia jan jon cheerin piba di ba suu. <sup>13</sup> Wu-bomɔ-la ba sii nja niaa le nii, nii titia ne Wia jan jon wu-bomɔ-la a tinba. Ba si cho di baa nii sima, ba paala golle wiheye ne a njaa wu-liilin deenba. Ba sii nja nii, niaa yie chichei ma yirin a jon hiisin hema le. Ba yie guoli ma tuon ne ma kala didii kiaa, ama ba yie lii ma harin a njaa ba wu-liilin. <sup>14</sup> Bua-na kala le di ba ne na haal, ba yie cheu ne ba tuon le. Ba-na bi lol ari wu-bonɗon naanin. Ba yie nyinyise nialin si bi Wia wiaa le china kpan kpan di ba nja haache. Ba nja tuolun timma ne. Wia kaliba heba le ne. <sup>15</sup> Njaa deenba via Wia wonɓiin ne a yenji. Baa to bunɓun baal kubala harin ne baa yire Beelam. U nyimma yirin ne fa Bio. A tin moribiee wiaa Beelam fa via Wia wiaa an tuto wu-bonɗon harin. <sup>16</sup> U si via nii, Wia dagu a len Beelam kakumbo bul wiaa a nage nuhuobiine, a pugu duu si wu-yaayasin nja.

<sup>17</sup> Wu-nyaraa kerichi deenba nage lii-bulo si hila ne. Ba bira nage duonun si tina, an ka pelin nja kiri u bi nia ne. Njaa deenba, Wia jan jonba he birin-la si bi dere tuon. <sup>18</sup> Ba yie

faasa njɪŋaa goŋ a bubul ba-bii-bal wiaa si bi bubuɔŋ kɛnɛ. Ba yie kɛŋ nii-sima a nyinyise nialɪŋ si bumo liise ba titia nialɪŋ si bi wutitii jɪŋ lɛ. Ba yie chɛ di ba nyise niaa deenba di baa ŋaa wu-liili-la kala ba sɪi ŋaa. <sup>19</sup> Ba yie nyinyiseba a bul di ba nɛ to ba hariŋ, ba jaŋ tii ba titia. Ama wu-nyiaraa deenba paala bi ba titia tii. Ba nɛ wu-bɔŋŋɔɔ yosun, bɛɛ wiaa di nuu-kala nɛ leŋe di wii malu, di u nɛ bi wii-la wuo leŋ, u yie ku ŋaa wii-la yoŋ nɛ. <sup>20</sup> Di niaa nɛ ku jɪŋ ari la Tiina Yesu Kirisito nɛ laaba ta ba haacheba lɛ, di ba nɛ liise ba titia dunia kialɪŋ si yie leŋ baa ŋaa haache lɛ, di ba nɛ bira leŋ di wiaa deenba malba a kɛŋ dolun ba lɛ, niaa deenba diderɪŋ nɛ jaŋ bɔmɔ kii bua-la lɛ ba ha si bi wutitii-la jɪŋ. <sup>21</sup> Wiɪŋ deen jaŋ ŋaaba lɛ, bɛɛ wiaa ba joŋ hariŋ yia wialɪŋ Wia fa si si di ba tuto a kɛŋ tuo-pula u teenj. U fa jaŋ kpia di ba nɛ fa bi wutitii-la wonbiɪŋ jɪŋ, ama ba jimɔ nɛ aŋ joŋ hariŋ yia wialɪŋ Wia fa si bula piba di baa ŋaa. Wiaa deenba bi disinnɪŋ kɛnɛ. <sup>22</sup> Wiɪŋ deen si ŋaa niaa deenba lɛ daga ari namaga-la niaa sɪi magu ŋaa wutitii nɛ. Ba si, “Vaha yie tuɔsɛ nɛ aŋ gura paa dii. Ba yie fo toonj ma liɪŋ, ka u bira mu ŋmoo vichɔɔŋ.”

### 3

*Tapulii-la la Tiina Yesu si*

*jaŋ miira kɔ*

<sup>1</sup> Mi nanɔɔŋ-kpianaba, mi teŋ-liamiŋ nɛ ŋla mi si ŋmuŋsa pipima. Mi tenni-la baliamiŋ tuɔŋ, mi bul wiaa liliisima di ma wuo to Wia ari tuɔbiɪŋ-zɔŋŋɔɔ. <sup>2</sup> Mi bul wiaa deenba di mi liisima wialɪŋ nialɪŋ fa sɪi bul wiaa, Wia Diŋ-zɔŋ-la dolun lɛ si bula faafaa ari ba jaŋ ku bal, di ma sɪba yu. Má pɛ liliisi wialɪŋ la Tiina Yesu fa si to ma nanzɔɔba lɛ a bula pima. U nɛ la Laataara. <sup>3</sup> Mii chɛ di ma laa sipaan jɪŋ ari bua-la lɛ dunia si jaŋ ku kpaga diderɪŋ, ni-sieree jaŋ to ba tuɔtɔre wu-ŋaalaa lɛ a sisierima lɛ. <sup>4</sup> Yesu fa si dage ari u jaŋ miira kɔ, ba jaŋ piesela di “Nii nɛ u hɛ? Chɛ bɛɛ nɛ saa u jaŋ bira kɔ?” Ba jaŋ bira bul di bua-la lɛ nialɪŋ si laa sipaan laa Yesu wiaa dii si suba a kaa kukɔ bua deen lɛ, kuŋ-kuŋ-kala bi birima, ba kala ha nage ari Wia si ŋaaba ŋii dunia di-suomun. <sup>5</sup> Nialɪŋ sɪi bul wiaa deenba chaasa jɪŋ kialɪŋ kala Wia si ŋaa nɛ, ama ba bi chɛ di ba sɛi ari faafaa kala dunia fa tuo a kaa mu yi bua-la lɛ Wia si bul wiaa, ka wia nyun ari tiŋteenj kala-na ku hɛ dime. Tiŋteenj fa hɛ liɪŋ tuɔŋ nɛ, ka Wia kaa pɔrɛ u piŋ u dunɔɔŋa, ka liɪŋ ma piŋ u dunɔɔŋa. <sup>6</sup> Lii-la titia nɛ Wia joŋo tɔ bunɔɔŋ dunia-la, u kala chei. <sup>7</sup> Wia bira bula ari u jaŋ leŋ di nyiniŋ dii tiŋteenj ari wia nyun kala si hɛ dime lɛlɛ ŋla. Ama ba

jan he dime halii, di tapulii-la Wia si jan dii dunia niaa sariya ku yi. Nialin si bi u niin wiaa ka to, Wia jan jon cheerin piba di ba suu.

<sup>8</sup> Ama mi nanbii-chooloo, ma si wiin deen yu, ari Wia teen tapul-bala nage jisij bui ne, ka jisij bui ma nage tapul-bala. <sup>9</sup> Niaa dongsun biina ari Wia fiela ne ari wialin u si si u jan naa le. U bi fiela, ama u ken kenyiri ne a tin ma wiaa, bee wiaa u bi che di ma kun-kala lel. Uu che di nuu-kala birima lii u haacheba le ne. <sup>10</sup> Ama tapulii kubala la Tiina Yesu jan ko. Tapulii-la u jan guu ko a di niaa le, ari gaara si yie ko a di niaa le nii. Bua-la le nuu-kala jan nii huuri-bal kubala wia nyun. Duu ne naa, wia nyun jan lel, ka kun-kala si he wia nyun ma jan nmier nyinin tuon a nyige, ka di tinteen kun-kala ma dii nyinin.

<sup>11</sup> Ma si jima ari dunia kala jan lel nii, ee ne ma biina ari u maga di ma mele nage? U maga di ma jon ma titia kala a pi Wia ne, a si disin kala ken, a tuto u wonbii-la. <sup>12</sup> Ma sii gberde tapulii-la la Tiina Yesu si jan ko nii, ma pe pipesi, di ma naa wii-na kala ma si jan wuo naa di tapulii-la yima lima. Tapulii-la ne wia nyun jan nmier nyinin tuon a nyige. Ka kun-kala si he wia nyun ma jan nmier nyinin a lel. <sup>13</sup> Faafaa-la Wia bula ari u jan naa wia nyu-falii ari tintee-falii. Lee-la u niaa jan

niinaa tuo-pul wiaa. Wiaa deenba ne laa gberde.

<sup>14</sup> Nii wiaa mi naanbiirin, ma sii gberde di ma na wiaa deenba, ma fiere siin a len di ma mele zon, di tapulii-la ne yie, di Wia si cheerin kala jon pima, ka di ma di Wia sin. <sup>15</sup> Mi naanbiirin, u maga di ma jin ari la Tiina Yesu ken kenyiri ne. U naa nii duu wuo laama ta ne. Wiaa deenba titia ne la naanbii-choolun Pool ma bul tenni-la kala le u si nmunsa pima. Wia ne pu wu-jimin deen u kaa bul wialin. <sup>16</sup> Wialin u si bula u tenni-la le, ba dongsun heye. Niaa bi ba bubusa jin. Nialin ma si bi wiaa jin ari nialin si bi wialin ba si laa dii le china kpan kpan yie ken wialin kaa birime wuwogusu, ari ba si yie ken Wia tenin wiaa seme dongsun kaa birime nii. Ba sii naa nii, Wia jan dogiseba ba suu. <sup>17</sup> Ma-na mi naanbii-kpianaba, ma paala jin ari wu-nyiaraa deenba jan ko. Nii wiaa, ma po ma titia le di nialin si bi Wia niin ka to si wuo nyisema di ma to ba wu-nyiar-la harin, an jon wialin ma si laa dii a chin ba nyun ta. <sup>18</sup> Ma to la Tiina Yesu Kirisito a kaa mu, nii-la si naa la Laataara. Di ma ne naa nii, u jan pema le worun a len di ma wasa jimu. U yirin ne niaa jan yire leele a kaa mu wuu. Ami.

## TEN-BUNBUN-LA JOON SI NMONSA

*Wii-la si ku nna nuhuobi-  
ine*

<sup>1</sup> Mi-na Joon nmunse tenin deen pipima a tige wii kubala le ne. Wii-la fa he dime bunbun kala ne a ken miisinj. La nii u yikoro a ken la siaa ma nau a chaasa benu, a ken la nisaa ma digu. <sup>2</sup> Wii-la si ku nna nuhuobiine, la nau ne a nna u dansia, a bul u wiaa pipima. Wii-la ne nla: Miisila si bi dere. U fa he la Nyimma teenj ne a ku lii la teenj la nau. Yesu Kirisito ne nii. <sup>3</sup> U fa si he la teenj nii, la na wialinj u si nna a nii wialinj maa u si bula. Wialinj la si na anj nii maa, ba ne la bulaa pima, di ma wuo juu la tuonj di la kala ken niibala. La di la Nyimma Wia ari u Bie Yesu Kirisito ken niibala ne. Laa che di ma ma ken niibala nii ne. <sup>4</sup> Laa che di ma tuonj faasa tere ne worun, nii ne tii la nmunse wiinj deen pipima.

*Wia ne ken pulumun*

<sup>5</sup> Wialinj Wia Bie si dagela a tige Wia le, ba ne nla: Wia ne ken pulumun. Biriminj tuo Wia le. <sup>6</sup> Di la ne si la duu ken niibala anj ka laa nna biriminj tuonj wiaa, laa nyia ne. La wu-naalaa ari la wu-bulaa kala bi wutitii kene. <sup>7</sup> Ama di la ne nna

pulumun tuonj wiaa a he pulumun tuonj, ari Wia si he pulumun tuonj nii, nii-na la di la dansun tinnaa kala ken niibala ne. Di la ne nna nii, Wia Bie Yesu chalinj ma jan chese la wu-bonjoo kala ta. <sup>8</sup> Di la ne si la bi wu-bonjoo nna, laa nyise la titia ne. La bi wutitii kene. <sup>9</sup> Ama di la ne seye ari laa nna wu-bonjoo a dage la wu-bomola a pi Wia, u jan wuo jonj la haacheba a chela a chese la wu-bonjoo kala ta. Wia ken wutitii. Nii ne tii u jan wuo nna nii. <sup>10</sup> Ama di la ne si la bi wu-bonjoo nna, la ken Wia yire wu-nyiaru ne. La bi u niinj wiaa laa he la tuonj.

## 2

*Kirisito chinj la harinj a  
pipela le*

<sup>1</sup> Mi biirin, mi nmunse wiinj deen pipima di ma bira si wu-bonjoo nna, ama di la ku-kala haa nna wu-bonjoo, la ken nuu si chinj la harinj. U jan sula laala u Nyimma teenj. Tu-pul Tiina Yesu Kirisito ne nii. <sup>2</sup> U ne jonj u miisinj a yoo suunj la wu-bonjoo wiaa, di Wia jonj u baaninj ta u fa si kene a tinj la wu-bonjoo wiaa, anj jonj la wu-bonjoo a chela. La dunjuna wu-bonjoo wiaa dee, dunia kala wu-bonjoo wiaa ne. <sup>3</sup> Nla ne la jan wuo to jinj worun ari la jinj Wia: Di la ne to wialinj kala Wia si dage niaa di baa to, nii daga ari la sene jinj Wia ne. <sup>4</sup> Di nuu ne si u jimu, ka u

via wialin̄ u si dage niaa di baa to, tiina ŋaa wu-nyiaru ne, u bi wutitii kene. <sup>5</sup> Ama nii-la kala sii to u niin̄ wiaa, u ne nii-la si sene cho Wia kin̄ken̄. Di la ne to u niin̄ wiaa ŋii, la jan̄ wuo to jin̄ ari la di Wia sene ŋaa kubala ne. <sup>6</sup> Nii-la kala si si ba di Wia ŋaa kubala, u maga di u tiina wu-ŋaalaa nage Yesu Kirisito wu-ŋaalaa ne.

*Nialin̄ sii ven̄ pulumun̄ tuon̄ si nage ŋii*

<sup>7</sup> Mi bii-chooloo, wii-la mi sii che mi ŋmun̄sa pima leele, u bi wu-falii kala ŋaa Wia si dagema di maa to, u ŋaa wu-binii-la ma fa si nii bun̄bun̄ kala ne. Wu-binii-la ne Wia niin̄ wialin̄ ba si dagema. <sup>8</sup> Ama u saa naga ari wu-falii ne mi si ŋmun̄sa pipima, bee wiaa wiin̄ deen̄ ku ŋaa wutitii Kirisito miisin̄ le ari ma ma miisin̄ le. Bua deen̄ le birimin̄ ka lel ne, an̄ ka pulumun̄ ha faasa chaane pir. <sup>9</sup> Nii-la kala si si uu ven̄ pulumun̄ tuon̄ an̄ bere u don̄o tiina, u ha he birimin̄ tuon̄ ne. <sup>10</sup> Ama nii-la kala si cho u don̄o tiina, uu ven̄ pulumun̄ tuon̄ ne. Wii-kala bira tuo si jan̄ ŋaa u siera tel. <sup>11</sup> Ka nii-la kala si bere u don̄o tiina, u tiina ven̄ birimin̄ tuon̄ ne. U bi jin̄ leela kala u sii mu. Birimin̄ ŋaa u siaa bi na.

<sup>12</sup> Mi biirin̄, a tin̄ Yesu wiaa ne Wia jon̄ ma wu-bon̄on̄oo a chema. Nii ne tii mi ŋmun̄sa pipima. <sup>13</sup> Mi nyimmaba maa, ma jin̄ Nii-la fa si he dime bun̄bun̄ kala

ne. Nii ne tii mi ŋmun̄sa pipima maa. Ma bapuoosaa maa, ma leele yuo dii Sitaani ne, ŋii ne tii mi ŋmun̄sa pipima maa. Mi biirin̄, ma ma jin̄ la Nyimma Wia ne, ŋii ne tii mi ŋmun̄sa pipima maa. <sup>14</sup> Mi kuhiasin̄ maa, ma jin̄ Nii-la fa si he dime bun̄bun̄ kala ne, ŋii ne tii mi ŋmun̄sa pipima. Ma bapuoosaa maa, ma ma ken̄ dolun̄, Wia niin̄ wiaa ma he ma tuon̄ le. Ma leele yuo dii Sitaani ne, ŋii ne tii mi ŋmun̄sa pipima.

<sup>15</sup> Ma si dunia kiaa cho. Nii-la kala si cho dunia kiaa, u bi la Nyimma Wia cho. <sup>16</sup> N̄ tuotore wu-ŋaalaa ari ŋ siin̄ wu-chooloo ari kialin̄ si ŋaa niaa bibigisi ba titia le, ba kala bi la Nyimma Wia teen̄ lia. Ba ŋaa dunia kiaa ne. <sup>17</sup> Dunia ari kialin̄ kala si he dime nuhuobiine cho, ba kala jan̄ dere. Ama nii-la si ŋaa wialin̄ Wia si cho, u jan̄ ken̄ miisi-la si bi dere.

*Kirisito din̄don̄-balin̄*

<sup>18</sup> Mi biirin̄, dunia diderin̄ kpaga ne. Ma nia ari Kirisito din̄don̄-balin̄ jan̄ ko. Bua deen̄ le Kirisito din̄don̄on̄oo paala yuge ne a ko. Nii wiaa, la jima ari dunia diderin̄ kpaga ne. <sup>19</sup> Ba lii la tuon̄ ne, ama la di ba fa bi kubala ŋaa. Di la di ba ne fa ŋaa kubala, ba ma fa ha jan̄ he la tuon̄. Ama ba lii la tuon̄ ne di la jin̄ ari la di ba bi kubala ŋaa. <sup>20</sup> Ama ma-na jin̄ wutitii, bee wiaa Kirisito jon̄ u Din̄-zon̄-la hema le ne. <sup>21</sup> U bi naga di mi



ŋmuŋsa pipima a tiŋ ma si bi wutitii-la jin. Ama mi ŋmuŋsa pipima a tiŋ ma si jin wutitii-la nɛ. Ma ma jima ari wu-nyiari tiina bi wutitii kɛnɛ. <sup>22</sup> Kubɛɛ nɛ saa ŋaa wu-nyiari tiina? Nii-la si si Yesu dee bi Kirisito ŋaa, nii-la Wia si liisa, u dee bi wu-nyiari tiina ŋaa? Nii-la kala saa si via la Tiina Wia ari u Bie, u tiina nɛ ŋaa Kirisito diŋdɔŋ-baliŋ. <sup>23</sup> Nii-la kala si via Wia Bie, u bi u Nyimma ma jin. Nii-la ma kala si sei Wia Bie, u ma jin u Nyimma nɛ. <sup>24</sup> Má leŋ di wialiŋ kala ma si nia buŋbuŋ hɛ ma tuɔŋ a kaa mu. Di wiaa deenba nɛ hɛ ma tuɔŋ a kaa mu, ma di Wia Bie jan ŋaa kubala a kaa mu. Ma di u Nyimma ma jan ŋaa kubala a kaa mu. <sup>25</sup> Wii-la Kirisito titia si bula duu jan ŋaa pila nɛ ŋla: U si u jan joŋ miisi-la si bi dɛrɛ a pila.

<sup>26</sup> Mi ŋmuŋsɛ wiin deen pipima a mu tige nialiŋ sii che di ba nyisema lɛ nɛ. <sup>27</sup> Ama Kirisito joŋ u Diŋ-zɔŋ-la hɛma lɛ nɛ. Diŋ-zɔŋ-la si hɛma lɛ nii a kaa mu, ma bira bi nialiŋ dɔŋsuŋ naga, nialiŋ sii che di niaa didageba. U Diŋ-zɔŋ-la hɛma lɛ a dagema wii-kala nɛ. Wialiŋ kala u sii dagema ŋaa wutitiiba nɛ, wu-nyiari dee. Má saa leŋ di ma di Kirisito ŋaa kubala a kaa mu, ari u Diŋ-zɔŋ-la si dagema nii.

<sup>28</sup> Mi biirin, di ma ŋaa nii a kaa mu, la jan kɛŋ nyu-duoŋ chɛɛ-la Kirisito si jan miira

kɔ. Hiisin bi jan kɛŋla di la faa. <sup>29</sup> Ma si jima ari Kirisito nɛ kɛŋ wutitii, ma saa jan jin ari nuu-kala si kɛŋ wutitii, u tiina ŋaa Kirisito bii nɛ.

### 3

#### *Wia biirin si nage nii*

<sup>1</sup> Ma na nii la Nyimma Wia si chola. U chola kieli, nii nɛ tii u kɛŋla yiyirɛ u biirin. Wutitii, la sɛnɛ ŋaa u biirin nɛ. Dunia niaa bi Wia jin, nii nɛ tii ba bila ma jin nii. <sup>2</sup> Mi bii-chooloo, lɛɛlɛ la ŋaa Wia biirin nɛ. Ama Wia ha bi chaasa daga pulle nii la si jan nage. Ama wii-la la si jima nɛ ŋla: Bua-la lɛ Kirisito si jan kɔ, la ma jan nage u si nage nii, bɛɛ wiaa la jan nau u si nage nii kala. <sup>3</sup> Nii-la kala sii yielɛ wiin deen lɛ, u jan liise u titia wu-bɔŋ wu-ŋaalaa lɛ, aŋ kɛŋ u titia pulle duu kɛŋ tuɔ-pula, ari Kirisito si kɛŋ tuɔ-pula nii.

<sup>4</sup> Nii-la kala si ŋaa wu-bɔmuŋ, u chei wialiŋ Wia si leŋɛ ba ŋmuŋsa bil nɛ di niaa tuto. Di nuu nɛ ŋaa wu-bɔŋ, u chei wialiŋ nɛ. <sup>5</sup> Ma kala jima ari Kirisito kɔ duu laa la wu-bɔŋŋɔ ta nɛ. U-na bi wu-bɔŋ kala ŋaa. <sup>6</sup> Di nuu ari Kirisito nɛ ŋaa kubala, u tiina bi wu-bɔŋŋɔ ŋaa. Ama nii-la kala ha sii ŋaa wu-bɔŋŋɔ, u tiina bi Kirisito jin. U siaa ma ha bi u nyuŋ pollo. <sup>7</sup> Mi biirin, ma sí leŋɛ di nuu-kala nyisema wiaa deenba lɛ. Nii-la kala si ŋaa wutitiiba, u tiina ŋaa tuɔ-pul tiina nɛ, ari

Kirisito si ŋaa Tuo-pul Tiina ŋii. <sup>8</sup> Ama nii-la kala ha sii ŋaa wu-bonŋoo, u ŋaa Sitaani tiina ne. Sitaani ŋaa wu-bonŋoo bunbun kala ne a kaa ko ari jiniŋ kala. Wii-la si tii Wia Bie ko dunia ne ŋla: U ko duu chei Sitaani tinŋina ne. <sup>9</sup> Nii-la kala si ŋaa Wia bii-lulii, u tiina bi wu-bonŋoo ŋaa, bee wiaa u laa u wu-ŋaalaa kala ne a kaa mu. Wia si ŋaa u Nyimma ŋii, u bi wu-bon wuo ŋiŋaa. <sup>10</sup> Ŋla le ne ma jaŋ wuo a to jin Wia biirin ari Sitaani biirin. Nii-la kala si bi wutitiiba ŋaa, koo nii-la kala si bi u donŋo tiina cho, u tiina bi Wia bii ŋaa.

### *Má cho donŋo*

<sup>11</sup> Wii-la ma si nia bunbun kala ne ŋla: U maga di ma cho donŋo. <sup>12</sup> U bi maga di la nage Keen. U fa ŋaa Sitaani tiina ne a kpu u ŋaana. Bee ne tii u kpuu? Keen faa ŋaa wu-bonŋoo ne, aŋ ka u ŋaana fa ŋiŋaa wu-zonŋoo. Ŋii ne tii u kpuu. <sup>13</sup> Mi naanbiirin, ma sí leŋe duu ŋaa wu-kpunŋpere ma le di dunia niaa ne berema. <sup>14</sup> Lana cho la donsun tinŋaa ne. Ŋii ne tii la jin ari la lii suun bua le ne a ken miisi-la si bi derɛ. Nii-la kala si bi niaa cho ha he suun bua le ne. <sup>15</sup> Nii-la kala si bere u donŋo tiina, u ŋaa ni-kpuuru ne. Miisi-la si bi diderin kene, ma jima ari ni-kpuura buu kene. <sup>16</sup> Kirisito jon u miisin yoo suun la wiaa, a dagela ŋii u si chola kinŋen. La

ma saa maga di la ma cho la donsun tinŋaa ŋii ne a jon la miisin a yoo suun ba wiaa. <sup>17</sup> Di nuu ne ken kiaa worun aŋ na u donŋo tiina u juu wii a chiche kiaa, ka u ken tuo-heen a bi u nennige fá, ee ne u jaŋ wuo bul duu cho Wia ne? <sup>18</sup> Mi biirin, ma sí leŋe di la ken niin dunŋun cho donŋo. Má leŋ di la to wutitii wonbiin a ŋiŋaa wu-zonŋoo, di la wu-ŋaalaa-la dage ari la sene cho donŋo ne.

<sup>19</sup> Di la ní ŋaa ŋii, la jaŋ wuo to ŋii le jin ari laa to wutitii wonbiin ne a wuo na wiese Wia teen. <sup>20</sup> Di la tuobiinaa ne ha wuo dage ari la cheye ne, la jima ari Wia ne yuga kii la tuobiinaa a jin wii-kala. <sup>21</sup> Mi naanbiirin, di la tuobiinaa ne bi daga ari la cheye ne, la jaŋ ken nyu-duon Wia sipaŋ a wuo na wiese. <sup>22</sup> Ŋii wiaa, di la ne sul kun-na kala u teen, u jaŋ jonŋo pila, bee wiaa laa to wialin u si leŋe ba ŋmunŋsa bil di niaa tuto ne aa ŋaa wialin sii toŋe u tuon. <sup>23</sup> U bira dagela di la ŋiŋaa ŋla ne: Di la laa u Bie Yesu Kirisito wiaa dii a cho donŋo, ari u si dagela ŋii. <sup>24</sup> Nuuna kala sii to wialin Wia si dagela di laa to, u tiina he Wia teen ne a kaa mu. Wia ma he u teen a kaa mu. Ŋla le ne la jaŋ to jin ari Wia he la teen ne: U jon u Din-zon-la hela le ne.

## 4

*Wia Din-zon-la dolun si*

*nage nii*

<sup>1</sup> Mi bii-chooloo, di niaa ne si di ba kenj dolunj a wuo bul wiaa, Wia Diŋ-zoŋ-la dolunj le, ma si guu laa dii ari baa bul wutitii ne. Má laa sipaanj magiseba na ari ba sene kenj Wia Diŋ-zoŋ-la dolunj ne aa bul wiaa. Bee wiaa nialinj si nyia wiaa a bul di baa bul wiaa, Wia Diŋ-zoŋ-la dolunj le, ba yuga ne a he dunia le. <sup>2</sup> Nla le ne ma janj to a wuo jinj di nuu ne kenj Wia Diŋ-zoŋ-la dolunj: Nii-la kala si laa Yesu wiaa dii a sei duu ne ŋaa Kirisito, nii-la Wia si liisa, a bira sei duu ku ŋaa nuhuobiinj ne a ku tuu dunia, u tiina ne sene kenj Wia Diŋ-zoŋ-la dolunj. <sup>3</sup> Nii-la kala si bi nii bula a tige Yesu le, u bi Wia Diŋ-zoŋ-la dolunj kene. Dol-la u tiina si kene ŋaa Kirisito diŋdoŋ-balinj dolunj ne. Ma nia ari Kirisito diŋdoŋ-balinj deenj janj ko dunia. U dolunj ne saa paala he dunia le leele. <sup>4</sup> Mi biirinj, ma ne ŋaa nialinj Wia si tii. Ma ne leele kenj dolunj a kii nialinj si nyia wiaa a bul di baa bul wiaa, Wia Diŋ-zoŋ-la dolunj le ne, bee wiaa Wia Diŋ-zoŋ-la si hema le ne kenj dolunj a kii dol-la dunia niaa si kene. <sup>5</sup> Nialinj si nyia wiaa a bul di baa bul wiaa, Wia Diŋ-zoŋ-la dolunj le, ba he dunia nisinj le ne a bubul dunia wiaa. Nii ne tii dunia niaa jegilee nii ba teenj. <sup>6</sup> Ama la-na ŋaa nialinj Wia si tii ne. Nii-la kala si jinj Wia, u tiina ma jegilee nii la teenj ne. Nialinj

ma si bi Wia jinj, ba bi la teenj jegili. Nla le ne la janj wuo to jinj wutitii tinŋaa ari wu-nyiaraa.

*Wia si cho niaa nii*

<sup>7</sup> Mi bii-chooloo, má leŋ di la cho doŋo. Di la ne cho doŋo, u lii Wia teenj ne. Nii-la kala si cho niaa ŋaa Wia bii-lulii ne a jinj Wia. <sup>8</sup> Nii-la ma kala si bi niaa cho, u bi Wia jinj, bee wiaa chonunj ŋaa Wia kunj ne. <sup>9</sup> Nla ne Wia dagela ari u si chola: U jonj u Bii-bala duu ku tuu dunia, di la tou le a kenj miisi-la si bi dere. <sup>10</sup> Nla ne chonunj nage: U bi naga la ne laa sipaanj cho Wia, ama Wia ne laa sipaanj chola. U tinj u Bie u ku tuu suu la wiaa, di Wia jonj u baaninj ta u fa si kene a tinj la haacheba wiaa, a jonj la haacheba chela. <sup>11</sup> Mi bii-chooloo, Wia si chola nii, u maga di la ma cho doŋo. <sup>12</sup> Nuukala ha bi Wia naa. Di la ne cho doŋo, Wia he la teenj ne a kaa mu. Di u ne he la teenj nii, la janj cho Wia ari la doŋsunj tinŋaa kinjenj.

<sup>13</sup> U jonj u Diŋ-zoŋ-la hela le duu didagela. Nii le ne la to jinj ari la he Wia teenj ne, Wia ma he la teenj ne a kaa mu. <sup>14</sup> La titia na a ŋaa siada di Wia ta u Bie duu ku tuu ŋaa dunia niaa Laataara. <sup>15</sup> Nuukala si wuo bul ari Yesu ne ŋaa Wia Bie, Wia he tiina teenj ne a kaa mu. U tiina ma he Wia teenj ne a kaa mu. <sup>16</sup> Nii ne la titia jinj a laa dii ari Wia si chola nii. Chonunj ŋaa Wia kunj ne. Nii-la kala si cho Wia

ari niaa a kaa mu, u tiina he Wia teen ne a kaa mu. Wia ma he u tiina teen a kaa mu. <sup>17</sup> Di la ne cho Wia ari niaa kinkeŋ, la jaŋ nageŋ nii u fa si naga dunia le. Di la ne ŋaa nii, la jaŋ keŋ nyu-duoŋ tapulii-la Kirisito si jaŋ dii dunia niaa sariya. <sup>18</sup> Nii-la si cho Wia ari niaa, u tiina bi fawulluŋ ka fá. Di la ne cho Wia ari niaa kinkeŋ, chonula kiri fawulluŋ ta ne. Di la ne haa fá fawulluŋ ari Wia jaŋ doŋisela, la ha bi Wia ari niaa cho kinkeŋ. <sup>19</sup> Wia ne laa sipaan chola. Nii ne tii la ma wuo cho Wia ari niaa. <sup>20</sup> Di nuu ne si u cho Wia ne aŋ bere u doŋo tiina, u ŋaa wu-nyiaru ne. U si wuo na u doŋo tiina aŋ buu cho, nii-na u bi Wia u si bi wuo na ma cho. <sup>21</sup> Wia bula pila ari niila kala si chou, u maga duu cho u doŋo tiina ma ne.

## 5

*Wia biirin jaŋ keŋ doluŋ a wuo dunia*

<sup>1</sup> Nii-la kala si laa dii ari Yesu ne ŋaa Kirisito, nii-la Wia si liisa, u ŋaa Wia bii ne. Nii-la kala ma si cho nuu, u cho nii-la bie ma ne. <sup>2</sup> Di la ne cho Wia a tuto wialin u si dagela di la ŋiŋaa, la jaŋ wuo jin ari la ma cho Wia biirin ne. <sup>3</sup> Di la ní to wialin u si dagela di la ŋiŋaa, nii jaŋ dage ari la cho Wia ne. U bi hei a pila di la to wiaa deenba, <sup>4</sup> bee wiaa Wia biilulii kala jaŋ keŋ doluŋ a wuo dunia ari u kiasa kala. La si ŋaa Wia yarida-la ne pila doluŋ deen. <sup>5</sup> Kubee

ne saa keŋ doluŋ duu wuo dunia ari u kiasa? See nii-la kala si laa dii ari Yesu ne ŋaa Wia Bie.

*Kialaa batori si ŋaa Yesu danjsia*

<sup>6</sup> U-na Yesu Kirisito ne ko dunia. U si he dunia le, u to liin ari chalin kala le ne a lii. Liin dunduŋa le dee u to. U to chalin ma le ne, bee wiaa ba keŋ liin a fou Wii-chuole liin. U bira suu, u chalin ma jaase. <sup>7</sup> Wia Diŋ-zoŋ-la ŋaa wiaa deenba danjsia. U-na keŋ wutitii. <sup>8</sup> Kiasa batori ne saa ŋaa u danjsia tinŋaa. Wia Diŋ-zoŋ-la ari lii-la ari u chal-la. Ba kala keŋ niibala ne. <sup>9</sup> Di nuu ne ŋaa wii siada tiina, la yie sei wii-la ne. Ama di Wia ne ŋaa wii siada tiina, u ne ŋaa siifian wiin a kii nuhuobiine si si wii-la ŋaa wutitii ne. Wia saa ŋaa u Bie siada tiina ne. Wialin kala u si bula a tige u le ŋaa wutitii ne. <sup>10</sup> Nii-la kala si laa Wia Bie wiaa dii, u tiina jima u tuoŋ le ari wialin Wia si bula a tige u le ŋaa wutitii ne, a ŋaa wiaa deenba danjsia. Ama nii-la kala si bi Wia laa dii, u keŋ Wia yiyire wu-nyiaru ne, bee wiaa u bi wii-la u si bula a tige u Bie le laa dii. <sup>11</sup> Wii-la Wia si bula ne ŋla: duu pila miisi-la si bi dere ne. Miisi-la he u Bie teen ne. <sup>12</sup> Nii-la kala si he Wia Bie teen keŋ miisi-la ne. Nii-la kala ma si bi Wia bile teen he, u ma bi miisi-la kene.

*La jaŋ wuo jin ari la keŋ miisi-la si bi dere*

13 Mi ηmυησε wiinj deen pipima di ma nialinj si laa Wia Bie wiaa dii ma wuo jinj ari ma keŋ miisi-la si bi dεre ne. 14 La ma jima ari la ne sul kuŋ-kala Wia teenj, la janj wuo keŋ nyu-duonj a sul, beε wiaa la jima ari ku-la u si cho duu joŋo pila, u janj jegile nii la teenj. 15 Di la ne saa jima ari la ne sul kuŋ-kala u teenj, u ne yie jegile nii la teenj, ηiina la ma jima ari u yie joŋ ku-la la sii che pila ne.

16 Di nuu-kala ne na u doŋo tiina duu ηaa wu-bonjoo, u maga di tiina sul Wia puu ne di Wia joŋ u miisinj cheu. Mi bul ηla a tige nialinj si ηaa wu-bomola le si bi maga di ba suu le ne a tinj ba wu-bomola wiaa. Wu-bonjoo doŋsun he dime. Di nuu ne ηaaba, u tiina janj suu. Di nuu ne saa ηaa wu-bonjoo deenba, mi bi si di ma sul Wia duu joŋ u miisinj cheu. 17 Wu-bonjoo kala η si ηaa, ηaa haache ne. Ama wu-bonjoo ηaa daban daban ne. Di η ne ηaa ba doŋsun, η bi janj suu a tinj ba wiaa.

18 La jima ari Wia bii-lulii kala bi wu-bonjoo ηaa. Wia Bie ne yie bibenu. Sitaani buu wii-kala wuo ηaa.

19 La ma jima ari la ηaa Wia bii-lulia ne. Ni-kaana-la-na kala si he dunia le he Sitaani nisinj le ne.

20 La bira jima ari Wia Bie ne ko a suri la siaa di la wuo jinj Wii-titii-la. La di Wii-titii-la ηaa kubala ne. La di u Bie ma ηaa kubala, beε

wiaa Wia Bie ari Wia ma ηaa kubala ne. U ne ηaa Wia titia. U ne joŋ miisi-la si bi dεre pila. 21 Mi biirinj, ma liise ma titia wuiaa le.

## TEN-LIA-LA JCOŃ SI NŃMUNSA

<sup>1</sup> Mi-na nihian nē Ńmunse teniŃ deen aa pi Ń-na haalla Wia si liisa, ari Ń biiriŃ, nialiŃ mi si senē cho woruŃ. Mi duŃduŃa dee nē choma Ńii, la di nialiŃ kala si ku jiŃ wutitii-la nē choma. <sup>2</sup> La choma Ńii a tiŃ wutitii-la si hela lē. U saa jaŃ hela lē a kaa mu.

<sup>3</sup> La Nyimma Wia ari u Bie Yesu Kirisito laħorimō lē, ba jaŃ fála nennige, a leŃ di la ĥoŃ ari yarifielaa, a pela lē di la senē to wutitii lē a cho dōŃo.

### *U maga di la cho dōŃo*

<sup>4</sup> Mi tuōŃ tōrō kiŃken mi si na ari Ń biiriŃ dōŃsuŃ to wutitii-la lē, ari la Nyimma Wia si si laa to Ńii. <sup>5</sup> Haal, mii suluŃ di Ń to wii-la dōŃo Wia fa si bula pila buŃbuŃ kala. U bi wu-falii kala Ńaa. U nē Ńla: U maga di la cho dōŃo. <sup>6</sup> Di la ní to wialiŃ ba si Ńmunsa bil di niaa tuto, Ńii jaŃ dage ari la senē cho Wia ari niaa nē. Wii-la Wia fa si bula pila buŃbuŃ kala nē Ńla: di la cho dōŃo.

<sup>7</sup> Niaa yuga a ĥē lee-kala dunia lē di ba nyise niaa. Niaa deenba bi seye ari Yesu Kirisito ku Ńaa nuħobiŃ nē a ku tuu dunia. Nuukala si nage niaa deenba Ńaa ni-nyiseru nē a Ńaa Kirisito diŃdōŃ-bal maa. <sup>8</sup> Má pō ma

titia lē a sí leŃ di tiŃtimii-la ma si tima, duu ĥei. Ama má tiŃ Ńii di Wia wuo joŃ ma time kala a pima. <sup>9</sup> Nii-la kala si bi wialiŃ Kirisito duŃduŃa si daga ka to aŃ dage wiaa dōŃsuŃ pipe wialiŃ lē, u tiina bi Wia teen ĥē. Ama nii-la kala sí to wialiŃ Kirisito si daga duŃduŃ, u tiina ĥē Wia ari u Bie kala teen nē. <sup>10</sup> Di nuu-kala nē kō ma teen a bi wiaa deenba dage, ma sí leŃe di tiina bira juu ma dia. Ma paala síu ĥuolu. <sup>11</sup> Di nuu-kala nē ĥuolu a kenu woruŃ, u ma Ńaa u dōŃo tiina nē a peu lē a ŃiŃaa wu-bōŃoŃo.

### *Wu-kaanaa*

<sup>12</sup> Mi keŃ wiaa yuge nē mi síi ĥē di mi bula pima. Ama mi bi ĥē di mi Ńmunse ba kala teniŃ tuōŃ. Mii ĥē di mi titia ku yi ma teen nē a bula pima. Bua-la mi tuōŃ jaŃ faasa tōre.

<sup>13</sup> Ń dihaala Wia si liisa, u biiriŃ ka ĥuoluŃ woruŃ.

## TEN-TORI-LA JCOJ SI NMUNSA

<sup>1</sup> Mi-na nihian ne nmunse tenin deen pipi n-na Gayas, mi nanḁon-la mi si sene cho woruḁ.

<sup>2</sup> Mi nanḁon-choolii, mi jima ari ma di Wia honuḁ zomɔ. Nii titia ne mi yie chuɔle Wia pipin di n ken doluḁ n yaraa ma le. <sup>3</sup> La naanbiirin lii wonbiin ku bula pimi nii n sii to wutitii. Ba bula ari n wu-ḁaalaa ne dage nii. U nii ḁaa mi tuon tore kinken. <sup>4</sup> Wii-kala bi lenje mi tuon tore kinken a mage mi si nia ari mi biirin ka to wutitii wonbii-la.

### *JCOJ bese Gayas le*

<sup>5</sup> Mi nanḁon-choolii, n ḁaa woruḁ n si yie pipe n ḁonsuḁ tinḁaa le si laa Yesu wiaa dii a kenba woruḁ, di ba ne ḁaa nuhuɔraa maa. Nn to wonbiin woruḁ ne. <sup>6</sup> Ba bul n wiaa a pi la nialin si laa Yesu wiaa dii aa hilimi. Ba bul nii n si cho niaa. U maga di n ma he doluḁ a pipeba le ari kuḁ-kala ba sii che di ba kaa ven wonbiin. ḁaa nii si jan len di Wia tuon tore, <sup>7</sup> bee wiaa ba lii ba diisin le di ba tin Kirisito tinḁinḁaa ne. Ba via di ba laa kuḁ-kala nialin si bi Wia wiaa laa dii teen ne. <sup>8</sup> U maga di la nialin si laa Wia wiaa dii ne pe niaa deenba le. Di la ne ḁaa nii, la jan

wuo ḁaa ba ḁonsuḁ tinḁaa a peba le wutitii tinḁinḁaa le.

### *Dayotifs bi woruḁ ḁaa*

<sup>9</sup> Mi laa sipaan nmunse tenin a pi ma nialin si laa Yesu wiaa dii aa hilimi. Ama baal kubala ba sii yire Dayotifs he ma tuon a faa cho duu ḁaa ma kuhian. U jon harin yia wii-la mi si bula ne. <sup>10</sup> Di mi ne ko, mi jan bula pima wialin kala u sii ḁaa. U yie gaa mi harin a chichei mi yirin. Nii ma dunḁuḁa dee. La naanbiiri-la si ḁaa nuhuɔraa, di ba ne ko, u biba woruḁ ken, an bira po nialin ma sii che di ba kenba woruḁ, di ba si nii ḁaa. U yie kiriba dia-la le, lee-la nialin si laa Yesu wiaa dii si yie hilimi.

<sup>11</sup> Mi nanḁon-choolii, si nialin sii ḁaa wu-bonḁoo chesu. Ama chichesii nialin sii ḁaa wu-zonḁoo. Nii-la kala sii ḁaa wu-zonḁoo ḁaa Wia bii-lulii ne. Nii-la ma kala sii ḁaa wu-bonḁoo, u tiina bi Wia jin. <sup>12</sup> Baal-la ma ba sii yire Demitias ḁaa ni-zon ne. Nu-kala bubul u wiaa woruḁ. U wu-ḁaalaa ma titia dage nii u sii to wutitii le nii. Mi maa bul u wiaa woruḁ. Ma jima ari wialin kala mi sii bul ḁaa wutitii ne.

### *Chuɔlaa*

<sup>13</sup> Mi ken wiaa yuge ne mi sii che di mi bula pin. Ama mi bi che di mi nmunse ba kala tenin tuon. <sup>14</sup> Mii che di mi titia ku yi-n ne leele, di la hono bul wiaa.

<sup>15</sup> N jaŃ hŃŃ ari yarifielaa.  
N naŃdŃŃsuŃ kala si he daha  
ka chuŃluŃ. N ma chuŃle la  
naŃdŃŃsuŃ kala si he dime  
pila.



## TEN-LA JUUD SI N̄MUNSA

<sup>1</sup> Mi-na Juud n̄ n̄mun̄se teniñ deen̄. Mi n̄aa Yesu Kirisito t̄nt̄innu n̄e a n̄aa Jeems n̄aana maa. Mi n̄mun̄se teniñ deen̄ a pipi nialin̄ Wia si yira, nialin̄ la Nyimma Wia si cho, nialin̄ Yesu Kirisito s̄ii ben̄ di ba h̄on̄ som.

<sup>2</sup> Wia jan̄ fáma nennige woruñ a len̄ di ma na yarifielaa kin̄ken̄, a na n̄ii u si choma kin̄ken̄ kin̄ken̄.

*Juud bul wiaa a tige nialin̄ si bi wutitii ken̄e an̄ dage niaa.*

<sup>3</sup> Mi nan̄d̄on̄-chooloo, mi fa cho di mi n̄mun̄se teniñ pima n̄e, a bul wiaa a tige n̄ii Wia si laa la di ma kala ta le. N̄ii n̄e mi na di u maga di mi n̄mun̄se teniñ deen̄ a sulma di ma kala luloo woruñ a tin̄ wialin̄ la si laa dii wiaa. Wia jon̄ wialin̄ h̄e u niaa nisin̄ le bala n̄e. <sup>4</sup> Mi bul wiin̄ deen̄ pipima, b̄e wiaa niaa d̄on̄suñ luora juu ma tuon̄ n̄e. Ba bi Wia won̄biin̄ ka to, n̄ii wiaa Wia jan̄ d̄ogiseba a len̄ di ba suu. Wia teniñ tuon̄ ba bul faafaa kala n̄e di Wia jan̄ n̄aa n̄ii pi nialin̄ si b̄om̄o. Ba n̄aa ni-b̄om̄o n̄e aa bul ni-pipili wiaa. Wia si fála nennige a laala ta, ba to n̄ii a ken̄ Wia wu-z̄om̄o-la kaa birime ba ku n̄aa wu-liili wiaa. Ba yie bul ari ba bi la

Tiina Yesu Kirisito jin̄, nii-la si n̄aa la kala kala Kuhian̄.

<sup>5</sup> Ma jin̄ wiaa deen̄ba kala mi s̄ii che di mi bula pima n̄e, ama mii che di mi lili-isima n̄e, di ma jin̄ ari bua-la le Wia si ken̄ u niaa kaa lii Ijipiti tin̄teen̄ le, nialin̄ d̄on̄suñ bira bi u wiaa laa dii, n̄ii n̄e u kpuba. <sup>6</sup> Ma sí yu ari Wia d̄ogise u tin̄daaraa ma n̄e. Ba n̄e fa ken̄ doluñ a biben̄ leree n̄e, ka ba lii lee-la ba si h̄on̄o a bi dime h̄on̄o. N̄ii n̄e Wia ken̄ba h̄e ch̄orum̄o a bil birimin̄ tuon̄ lim. Ba jan̄ h̄e dime a kaa mu wuu, see di tapulii-la Wia si jan̄ dii niaa sariya ku yi. <sup>7</sup> Bira Wia d̄ogise tasi-la ba s̄ii yire S̄od̄om̄ ari Ḡom̄ora ari ta-bala-la kala si golli lee-la. Nialin̄ fa si h̄e tasi-la tuon̄ faa n̄aa wu-liilin̄ ari disinnila nuhuobiinee paala si bi maga di ba n̄aa. Wia jon̄ba h̄e nyin̄-la le s̄ii dii deen̄ deen̄, u bi dis̄e. Wia che di la na n̄ii a sí wu-b̄on̄h̄o n̄aa n̄e.

<sup>8</sup> Nialin̄ si luora ku h̄e ma tuon̄, ba wu-n̄aalaa nage bun̄buñ nialin̄ Wia si d̄ogisa n̄e. Ba n̄e yie bibiine wu-b̄on̄h̄o ba tuon̄ le, a to n̄ii le a n̄in̄aa wu-liilin̄. Ba via Wia doluñ kala an̄ tu-tuuse Wia tin̄daaraa jon̄h̄oo. <sup>9</sup> Bua kubala Wia tin̄daaraa kuhian̄ ba s̄ii yire Maakil, ari Sitaani fa ken̄ Moosis kusuon̄ wiaa yuyuo d̄on̄o. Ba si n̄aa n̄ii, Maakil bi wii-kala bula chei Sitaani tuon̄, ama u ta bul n̄e ari la Tiina Wia jan̄ d̄ogisu. <sup>10</sup> Ama niaa

deenba si juu ma tuon, ba yie tutuuse nialin ba si bi ba wiaa jin. Ba wu-ɲaalaa nage pusun si bi wu-jimin kene sii ɲaa ɲii ne. Wialin ba sii ɲaa jan len di Wia dogiseba di ba suu. <sup>11</sup> U jan loro piba. Wialin Keen fa sii ɲaa, ba ne ba maa ɲaa ɲii. Baal kubala fa he dime, baa yire Beelam. U via wonbii-titii-la an ɲiɲaa wu-bonɲoo a laa moribee. ɲii titia ne niaa deenba ma ɲiɲaa. Baal kubala ba fa sii yire Kora ma fa via Moosis niin an suu, ɲii titia ne nialin wiaa la si bula ma via Wia niin. Ba ma jan suu. <sup>12</sup> Di ma nialin si cho donɔ ne hilime di ma dii kiaa, niaa deenba yie guoli ma tuon ne. Ba nage nanɲhuosun ne aa chei ma kudiile-la. Di ba nii dii kiaa, ba dunɲunja wiaa ne ba yie chil. Ba nage duonun si yie tin duu nii, ka pelin ɲaa kiri u bi nia. Ba bira nage tiisi-la si maga di ba nen bua-la si yie di ba nen, ka ba bi nene ne. Ba ta he dime pei ne, ba jan huro churiba di ba suu. <sup>13</sup> Niaa deenba nage lii-pelin si dolie ne, u yie ɲmoo liin u gugulimi a ɲmoo disinnin kaa mu liin niin. Ba bira nage chenwulaa si yie churi a mu juu seme donɔ biminin tuon lim. Ba jan he dime a kaa mu wuu.

<sup>14</sup> Baal kubala ne ba fa sii yire Inok fa bul niaa deenba wiaa, Wia Din-zon-la dolun le, faafaa kala ne. U fa ɲaa Adam nihilere-liere balipe ne. U si, "Má bee na, la Tiina

Wia ko ne a ken u tinɲaaraa bui fii fiiba kaa ko. Ba-na bi disinnin kene. <sup>15</sup> Wia ko duu dii nuu-kala sariya, a jon cheerin pi ni-bomɔ-la kala a tin wu-bomɔ-la ba si ɲaa, ari wu-bomɔ-la kala ni-bonɲoo deenba si bula a tige Wia le." <sup>16</sup> Niaa deenba yie gugurime wiaa, ba tuon bi kun-kala nyun tore, baa to ba tuotore wu-ɲaalaa harin a ken ba-bii-balin a ken niisima a nyise niaa lilaa ba kiaa.

*Juud si chagile niaa ɲii*

<sup>17</sup> Ama mi nanɲon-chooloo, má liliisi wialin la Tiina Yesu Kirisito nanɲoo ba si bula pima ari ba jan ku ɲaa. <sup>18</sup> Ba bula pima ari dunia diderin, ni-sieree jan ko. Ba yie tuto ba tuotore wu-ɲaalaa harin a ɲiɲaa wu-bonɲoo. <sup>19</sup> Ni-yiri deenba jan kenma pore donɔ le a ɲiɲaa wiaa ari dunia niaa sii ɲaa ɲii. Wia Din-zon-la tuo ba le. <sup>20</sup> Ama ma-na, mi nanɲon-chooloo, wialin ma si laa dii lii Wia teen ne. ɲii wiaa, má kenba worun a waaba le, a to Wia Din-zon-la le a chuchuele Wia. <sup>21</sup> Wia si choma ɲii, má chin ɲii le kpan kpan, a gberɛ la Tiina Yesu Kirisito duu ko, nii-la si jan fáma nennige a pima miisi-la si bi dere. <sup>22</sup> Nialin si ken tuosaa balia, má bul Wia wiaa piba di ba laa dii. <sup>23</sup> Nialin si yenɲe di ba juu Wia nyinin, má lere liiseba nyin-la tuon. Má fába nennige, ama má

chichel a keŋ ma titia di wu-  
bomɔ-la ba sii ŋaa ba yaraa  
le sí ma chol.

<sup>24</sup> Má leŋ la zizil Wia. U ne  
keŋ doluŋ, u jaŋ wuo pema  
le di ma sí wu-bɔŋŋɔɔ ŋaa, a  
sí wii-kala chei u sipaan, di  
ma wuo na u zomuŋ a wuo  
chin u sipaan a jujuɔse. <sup>25</sup> U  
dunɔɔŋa ne ŋaa Wia, u ne  
to la Tiina Yesu Kirisito le  
a laala ta. Má dennu a pu  
yirin, u ne keŋ doluŋ a tii  
kuŋ-kala aa beŋba maa, a lii  
di-suomuŋ kuko lelele a kaa  
mu deen deen. Ami.

## WIALIN WIA SI JONO DAGE JONJ A MU TIGE YESU KIRISITO LE

<sup>1</sup> Wiin deen ne Wia jono pi Yesu Kirisito duu jono dage u tintinnaa, di ba jin wialin si jan naa leele. Wia tin u tin daara u ko u tintinna Jonj teen a bul wialin pu. <sup>2</sup> Nii ne Jonj sei Wia wialin ari wialin kala Yesu Kirisito si bula, ari wialin kala u si na, a naa wiaa deenba siada tiina. <sup>3</sup> Nialin si karime wiaa deenba di niaa nii ari nialin si jegile nii wiaa deenba a laa he ba tuosaa le a tutoba, Wia jan peba ma le, bee wiaa bua-la wiaa deenba si jan naa kpaga ne.

*Jonj chuole nialin si laa Yesu wiaa dii a he Esia le*

<sup>4</sup> Mi-na Jonj ne nmunse tenin deen a pipi nialin si laa Yesu wiaa dii aa hilimi tasin balipe-la si he Esia tin teen le. Wia lahormo le, u jan len di ma hon ari yarifielaa. U ne naa nii-la si he dime, nii-la fa si he dime faa faa kala ari nii-la si jan ko. Wiaa deenba ma lii Wia Dinjin balipe-la si chin Wia kuorikpasa-la sipaan ne. <sup>5</sup> Ba lii Yesu Kirisito teen ne. U ne naa ba siada tiina a ken wutitii. U ne suba. U ne bira naa nii-la si laa sipaan sii suun le. U ne ken dunia kuoro kala dolun. Ma len di la dennu u si chola nii

a jon u chalin a jaase, a liisela haacheba le. <sup>6</sup> U ne len la duu kala dii kuoron a timaa pi Wia, nii-la si naa u Nyimma. U ne ken yirin ari dolun a kaa mu wuu. Ami. <sup>7</sup> Ma bee na, u jan to duonbilingbaanaa tuon kuko. Nuukala jan nau. Nuukala si jon kua tobu jan nau. Ni-yiriba kala si he dunia le jan yel a tin u wiaa. Wiin deen naa wutitii ne. Ami.

<sup>8</sup> La Tiina Wia si, "Mi ne naa Alifa ari Omega. Mi-na Wii-jaribako, mi ne naa nii-la si he dime ari nii-la fa si he dime faafaa kala ari nii-la si jan ko."

*Wialin Jonj si na ari duosoo tuon*

<sup>9</sup> Ma naanbie Jonj ne nmunse tenin deen a pipi-ima. A tin Yesu Kirisito wiaa ne ba to naasin dogisela. Ama la nialin si na hee-la nii a tin u wiaa, la ma jan juu Wia kuorii-la tuon. Heela kala le la ken kenyiri ari nyalima. Mi fa bul Wia wiaa ne an pe naa Yesu Kirisito siada tiina. Nii wiaa ne tii ba kenmi kaa mu tin tee kubala baa yire Patimos. Liin gollo chu tin tee-la kala. <sup>10</sup> La Tiina Wia tapulii kubala ne Wia Din-zon-la dolun ku hemi le worun. Nii ne mi nii nuu yikori-bal mi harin a nage ba sii nmuu nyillin nii. <sup>11</sup> Nii ne yikori-la bula pimi a bul, "Nmunse wialin kala n sii na, a jono tin di ba kaa mu pi nialin si laa Yesu wiaa dii aa hilimi tasin balipe-la si he Esia tin teen le.

Ba ne ņla: Efesis ari Simiina, Pēgamom, Taataya, Saadis, Filadēlifia ari Laadisiya.”

12 Nii ne mi miira daase hariņ di mi na nii-la sīi bul wiaa mi teen. Mi si daasa, mi na korunuņ ba si yie joņ chaanaa a didaņ ba kiaa balipe, a kala ņaa selime. 13 Ka nuu chin ba tutuobaaniņ a nage Nuhuobiine Bie, a laale geriduduon, ka u ken selime damere a kaa voo u boye.

14 U nyuņ ari u nyu-punaa kala pulle a nage kuņkunun. U siaa kala nage nyin-geliņ. 15 U naasiņ ma nage ba si joņ hooņ he nyiniņ le u fiēse ņii. U yiikoro ma nage lii-baliņ sīi pelli gbul gbul. 16 Ka u kori cheņwulaa balipe u nadiiņ nisiņ le, tokobiin lii u niin le a ku lii. U niiriņ balia kala didii nyagaga. Ka u siaa kala tutul a nage wii-posun si faasa pose ņii.

17 Mi si nau ņii, mi tuu tel u sipaāņ a piņ dime chim a nage di mi suba. Nii ne u joņ u na-diin nisiņ daņmi le aņ bula pimi, “Sī fawulluņ fá, mi ne ņaa nii-la fa si he dime buņbuņ ari nii-la si jaņ he dime dunia dideriņ. 18 Mi ne ņaa nii-la si weye. Mi fa suba ne, ama leele mi weye ne a kaa mu wuu, mi bira bi jaņ suu. Mi ken suuņ ari lelee doluņ maa. 19 Leele ņmunse wialiņ ņ si na, wialiņ si he dime ari wialiņ si jaņ ņaa hariņ. 20 Wialiņ ņ si na ņaa wu-faalaa ne. Cheņwula-

la balipe ņ si na mi nadiiņ le ari korunu-la ba si yie joņ chaanaa a didaņ ba kiaa balipe ken bubuon ne. Cheņwulaa balipe-la ne ņaa Wia tinđaraa sīi beņ nialiņ si laa Yesu wiaa dii aa hilimi a he tasi-la balipe-la si he Esia tinteen le. Korunu-la ba si yie joņ chaanaa a didaņ ma ne ņaa nialiņ si laa Yesu wiaa dii aa hilimi tasiņ balipe-la si he Esia tinteen le.

## 2

*Wialiņ ba si ņmunsa pi Efesis niaa*

1 Mi-na nii-la si kori cheņwula-la balipe mi nadiiņ nisiņ le aa ven korunu-la ba si yie joņ chaanaa a didaņ balipe tuon, mi ne tin tinđariņ deen di ba kaa mu pi Wia tinđari-la sīi beņ nialiņ si laa Yesu wiaa dii aa hilimi Efesis le.

2 Mi jin ma wu-ņaalaa ne. Mi jin tinđimii-la ma sīi tin ne. Wii-kala le ma dii kenyiri ne a nyalime woruņ. Mi jima ma di ni-bonņoo bi dono le wuo. Niaa donsun nyia wiaa ari ba ņaa Wia nanzoba ne. Ma yie magise niaa deenba a na di baa nyia ne. 3 Mi jima ari ma ken kenyiri ne aa nyalime. Ma na heen a tin mi wiaa aņ ha bi lolo. 4 Ama wii ne mi ken arima. Ma fa si chomi ņii buņbuņ-la, ma bira bimi ņii cho. 5 Nii wiaa, mii che di ma jin wii-la le ma si tele ne. Má birime a ņināa wialiņ ma fa sīi ņaa buņbuņ-la ne. Di ņii dee, mi jaņ ku paa

ma koru-la, see di ma bir-  
ima lii ma wu-ŋaalaa ɛ aa  
ŋaa buŋbuŋ wialin. <sup>6</sup> Ama  
ma bere Nikolaata niaa wu-  
ŋaalaa nɛ. Mi ma bere  
niaa deenba wu-ŋaalaa ɛ.  
<sup>7</sup> Digilaa tinŋaa, má wuoli  
ma digilaa a nii wialin Wia  
Diŋ-zoŋ-la si bula pi nialin  
si laa Yesu wiaa dii aa hilimi  
lee-kala Esia ɛ. Nii-la kala si  
wuo yuo dii Sitaani, mi jaŋ  
leŋ duu dii tia-la nɛnɛɛ sii pi  
niaa miisin a he Wia-jaŋ ɛ.

### *Wialin ba si ŋmunsa pi Simiina niaa*

<sup>8</sup> Mi bira bula pin di ŋ  
ŋmunse wiaa deenba a pi  
Wia tinŋaari-la sii beŋ nialin  
si laa Yesu wiaa dii aa hilimi  
Simiina ɛ. Wiaa deenba lii  
mi-na nii-la fa si he dime  
buŋbuŋ nɛ. Mi jaŋ he dime  
a kaa mu dunia diderin. Mi  
nɛ suba aŋ bira sii suuŋ ɛ.

<sup>9</sup> Bula pi nialin si laa Yesu  
wiaa dii aa hilimi Simiina ɛ  
di mi jin wialin sii walimeba  
nɛ, a jin ari ba ŋaa summoo  
nɛ (ama Wia teen, ba ŋaa  
kuoroo nɛ). Niaa doŋsun he  
dime aa chei ma yirin. Niaa  
deenba keŋ ba titia ari ba  
ŋaa Juu timma nɛ aŋ bi Juu  
timma ŋaa. Baa to Sitaani  
hariŋ nɛ. <sup>10</sup> Muasuaa ma  
nialin si he Simiina ɛ jaŋ  
na heeŋ woruŋ, ama ma si  
fawulluŋ fá a tin hee-la wiaa.  
Má bee na, Sitaani ŋaa siri  
nɛ duu keŋ ma doŋsun to  
dia a magisema. Hee-la jaŋ  
yi tapulaa fii. Di ba níi che  
di ba kpuma maa, ma-na há  
chin ma yarida naaŋ ɛ. Di  
ma nɛ ŋaa nii, mi jaŋ joŋ

mii-zomun pima Wia-jaŋ ɛ.  
<sup>11</sup> Digilaa tinŋaa, má wuoli  
ma digilaa a nii wialin Wia  
Diŋ-zoŋ-la si bula pi nialin si  
laa Yesu wiaa dii aa hilimi  
lee-na kala Esia ɛ. Nii-la  
kala si wuo yuo dii Sitaani,  
duu nɛ suba, u bira bi jaŋ  
suu liamin.

### *Wialin ba si ŋmunsa pi Pegamom niaa*

<sup>12</sup> Mi bira bula pin di  
ŋ ŋmunse wialin pi Wia  
tinŋaari-la sii beŋ nialin si  
laa Yesu wiaa dii aa hilimi  
taŋ-la ba sii yire Pegamom  
ɛ. Mi nɛ nii-la si kori toko-  
biin, u niirin balia kala didii  
nyagaga. Bula piba di mi nɛ  
bul wiaa deenba.

<sup>13</sup> Mi jin lee-la ma si he nɛ.  
Dime nɛ Sitaani dii kuoruŋ.  
Ma ha keŋ mi yirin woruŋ a  
ŋaa mi yarida. Ma doŋo ti-  
ina Antipas faa bul mi wiaa  
aa pi niaa. U fa ŋaa mi  
siada tiina titii nɛ. Nii nɛ ba  
kpua. Ba kpua lee-la Sitaani  
si he nɛ. <sup>14</sup> Ma ŋaa kukeri  
nɛ, ama wiaa banmene nɛ  
ma ŋaa chei. Niaa doŋsun  
he ma tuoŋ a tuto wialin  
baal-la ba sii yire Beelam fa  
sii dagu. U nɛ dage kuoru  
kubala baa yire Balak duu  
nyise Iziral tinŋaa di ba didii  
vuiaa kiaa aŋ pe ŋinŋaa wu-  
liilin. <sup>15</sup> Niaa doŋsun he ma  
tuoŋ a ma tuto wu-bomo-la  
Nikolaata timma-la sii dagu.  
<sup>16</sup> Nii wiaa, má birima lii  
wialin ɛ, di nii dee mi jaŋ kɔ  
leeɛ a keŋ mi niin wu-bulaa  
si nage tokobiin, a keŋma  
yuo laalin. <sup>17</sup> Digilaa tinŋaa,  
má wuoli ma digilaa a nii

wialin Wia DiŃ-zóŃ-la si bula pi nialin si laa Yesu wiaa dii aa hilimi Esia tinŃeen ɛ. Nii-la kala si yuo dii Sitaani, mi jaŃ joŃ kudiile-la si he Wia-jaŃ a pu, a joŃ tabii-pula ma a pu. Mi jaŃ ŃmuŃse yiri-falin a he tabii-la ɛ. Yiri-la nuu-kala bi jaŃ jimu, see nii-la si laa tabii-la duŃduŃa.”

*Wialin ba si ŃmuŃsa pi Taataya niaa*

<sup>18</sup> Mi bira bula pin di ŃmuŃse tenin deen a pi Wia tinŃdaari-la sii beŃ nialin si laa Yesu wiaa dii aa hilimi taŃ-la ba sii yire Taataya ɛ. Mi-na Wia Bie ne bul wiaa deenba. Mi siaa nage nyin-gelin ne, ka mi naasin ma nage hoŃŃ ba si cheŃe u faasa tutul.

<sup>19</sup> Bula piba a bul di mi jin ba tinŃinŃaa ne. Mi jin nii ma nialin si he Taataya ɛ si cho niaa, ari nii ma si keŃ yarida, ari nii ma sii pe niaa ɛ. Mi jin nii ma si keŃ kenyiri aa nyalime wii-kala ɛ. Mi jima ari tinŃinŃa-la ma sii tin harin ne kpia buŃbuŃ tinŃimii-la ma fa si tima. <sup>20</sup> Ma Ńaa kukeri, ama wiaa banmene ne ma Ńaa chei. Haal kubala ne he ma tuŃŃ aa dage wu-bonŃŃŃŃ, ka ma buu kire. Haal-la ba sii yire Jezebel ne nii. Haala deen keŃ u titia ari uu bul Wia wiaa, Wia DiŃ-zóŃ-la dolun ɛ. Uu nyia ne. Uu dage mi niaa di ba ŃinŃaa wu-liilin aŃ pe didii vuuiaa kiaa ne. <sup>21</sup> Mi pi haala deen wonŃbiin duu birima lii u haacheba ɛ ne, ka u via aŃ

ŃinŃaa wu-liilin. <sup>22</sup> Nii wiaa, má bee na, mi jaŃ len duu wiile worun a pin. Nialin ma kala sii tou a ŃinŃaa wu-bomŃ-la, mi jaŃ len di ba ma faasa na heen, see di ba birima lii ba wu-Ńaala-la ɛ. <sup>23</sup> Mi saa jaŃ Ńmoo nialin sii to u harin kpu. Di mi ne Ńaa nii, nialin kala si laa Yesu wiaa dii aa hilimi jaŃ jin ari mi jin nuu-kala tuŃbiinaa ne. Nuu-kala si tima mage nii, nii ne mi jaŃ timu. <sup>24</sup> Ama niaa doŃsun he ma tuŃŃ Taataya ɛ a bi wialin haala deen sii dagu ka to. Niaa doŃsun keŃba kaa yire Sitaani wu-luore bulaa ne. Ma biba to. Mi bi jaŃ voo chugi-yunoo chunma. Wiin deen duŃduŃ ne mii che di mi bula pima: <sup>25</sup> Wutitii-la ma si kene, má kenu worun a mu yi tapulii-la mi si jaŃ ko. <sup>26</sup> Nii-la kala si wuo yuo dii Sitaani aŃ pe keŃ mi wu-dagaa, a titin mi tinŃinŃaa a kaa mu yi u miisin diderin, mi jaŃ pu dolun duu biben dunia niaa kala. <sup>27</sup> Tiina jaŃ biben dunia niaa ari kpaasa. U jaŃ viviireba ari ba si yie Ńmoo pupoin nii u yere muno muno. Dol-la titia mi Nyimma si joŃo pimi, u titia ne mi jaŃ joŃo pu. <sup>28</sup> Mi jaŃ len di tiina tutul a nage nanyualun sii tul nii. <sup>29</sup> Digilaa tinŃaa, má wuoli ma digilaa a nii wialin Wia DiŃ-zóŃ-la si bula pi nialin si laa Yesu wiaa di aa hilimi Esia tinŃeen ɛ.

*Wialij ba si űmunűsa pi Saadis niaa*

<sup>1</sup> Mi bira bula piű di ű űmunűse wiaa deenba a kaa mu pi Wia tinĉaari-la sĭ beű nialij si laa Yesu wiaa dii aa hilimi Saadis le. Bula piba a bul di mi-na Tiina si keű Wia Diűsiű balipe-la aű pe keű cheűwulaa balipe-la ne bul wiaa deenba piba.

Mi jin ma Saadis niaa tinĉinĉaa kala ne. Ma laa yiriű ari ma weye ne, ama ma suba ne. <sup>2</sup> M sĭi doű le aű pȳ di ni-kaanaa si ka, di ba keű doluű a sĭ suu. M űaa űii, bee wiaa tinĉimii-la ma sĭi tinĉ bi Wia kpaga. <sup>3</sup> M liise yi wialij ma si nia aű laa maa. M keűba woruű aű birima lii ma haacheba le. Di ma ne bi doű le sie, mi jaű luȳra kȳ ari gaara. Ma bi jaű wuo jin bua-la mi si jaű kȳ ma teenĉ. <sup>4</sup> Ari űii kala ni-titiiba banmene ne ha he Saadis le. Niaa deenba bi disinniű kene. Ba ne jaű laale geri-pulluű a to mi hariű, bee wiaa ba mage űii ne. <sup>5</sup> Nii-la kala si wuo yuo dii Sitaani, u tiina jaű laale geri-pulluű. Mi bi jaű kpu u yiriű ta miisiű ten-la tuȳ. Mi jaű suri mi niin a yire u yiriű mi Nyimma Wia ari u tinĉaaraa sipaanĉ. <sup>6</sup> Digilaa tinĉaa, m wuoli ma digilaa a nii wialij Wia Diű-zȳű-la si bula pi nialij si laa Yesu wiaa dii aa hilimi Esia tinĉeenĉ le.

*Wialij ba si űmunűsa pi Filadelfia niaa*

<sup>7</sup> űmunűse wiaa deenba kaa mu pi Wia tinĉaari-la sĭi beű nialij si laa Yesu wiaa dii aa hilimi Filadelfia le. Mi ne űaa Tuȳ-pul Tiina ari Nitii ma, mi ne kori Devit taű-la boribiinĉ. Duu ne suro, nuu-kala bi wuo kaa tȳ, duu ne bira kaa tȳ ma, nuu-kala bi wuo suri.

<sup>8</sup> Mi jin ma tinĉinĉaa ne. M bee na, mi keű boro kaa suri ne a pima. Nuu-kala bi wuo kaa tȳ. Mi jima ari ma doluű bi yuge, ama ma haa to mi niin wiaa a bi mi yiriű kaa faa. <sup>9</sup> M bee na, mi jaű len di nialij sĭi to Sitaani a nyia wiaa bul ari ba űaa Juu tinĉaa aű bi Juu timma űaa, mi jaű len di ba ku tuu kpirimi ma sipaanĉ, di ba jin ari mi choma ne. <sup>10</sup> Muapilii mi jaű len di dunia niaa kala na heeű. Ba jaű magiseba woruű. Ama mi bi jaű len di ma juu hee-la le, bee wiaa ma to mi niin wiaa ne a keű kenyiri ari nyalima maa. <sup>11</sup> Mii kȳ ne leele. M faasa keű ku-la ma si kene, di nuu-kala sĭ ma time kaa laa ma teenĉ. <sup>12</sup> Nii-la kala si wuo yuo dii Sitaani, mi jaű len duu birime jebiin a he Wia-dia tuȳ. U-na bi jaű kȳ duu lii Wia-dia-la tuȳ. Mi jaű űmunűse Wia yiriű a heu le, a űmunűse Wia-jaű yiriű ma heu le. Jaű-la ne űaa Jerusalem falii-la si lii Wia-jaű ku tuu. Mi ma jaű űmunűse mi titia yiri-faliű a heu le. <sup>13</sup> Digilaa tinĉaa, m wuoli ma digilaa a nii wialij Wia Diű-zȳű-la si bula



pi nialin si laa Yesu wiaa dii aa hilimi Esia tinteen le.

*Wialin ba si nmuṅsa pi Laadisiya niaa*

<sup>14</sup> Mi bira bula pin di n muṅse wiaa deenba kaa mu pi Wia tinḍaari-la sii beṅ nialin si laa Yesu wiaa dii aa hilimi Laadisiya taṅ-la le. Mi ne ḡaa nii-la ba sii yire “Ami”, a ḡaa siadatiitii maa, nii-la le Wia si to a ḡaa dunia, mi nii bul wiaa deenba.

<sup>15-16</sup> Mi jin tinṭimia-la ma si tin ne. Ma ḡaa tolo tolo ne. Ma bi fiela, ma bira bi lin maa. Mi fa cho di ma fiela koo di ma lin. Ama ma ḡaa tolo tolo ne. Ma bi fiela, ma bira bi lin maa. Nii wiaa mi jaṅ puusema ta. <sup>17</sup> Ma yie bigisi ma titia le a bul di ma keṅ kiaa ne, ma bira bi kuṅ-kala che kika. Ama ma bi jin ari ma ḡaa summoo a ḡaa nisusu timma a ḡaa nyulima aṅ keṅ yaribiree maa. <sup>18</sup> Nii wiaa mi bula pima di ma yoo selime-la ba si chese di ma wuo kuori a yoo geripulluṅ maa a laale a to ma yaribiree di hiisin sīma keṅ niaa tuoṅ. Má yoo nuuṅ ma a he ma siaa a wuo nina. <sup>19</sup> Di nialin mi si cho ne ḡaa wii chei, mi yie dageba ne a keṅba bil wonḡbiin le. Nii wiaa, má fiese siin a birima lii ma haacheba le. <sup>20</sup> Má bee-na, mi chin boinḡniin ne aa ḡmoo. Nii-la kala si nii mi yiikoro a keṅ boro suri, mi jaṅ ku juu u teen, di la duu kala dii kiaa. <sup>21</sup> Nii-la si wuo yuo dii Sitaani, mi

jaṅ puu wonḡbiin duu pe hoṅ mi kuori-kpasa nyuṅ ari mi ma si wuo yuo dii Sitaani ḡii a pe hoṅ mi Nyimma kuori-kpasa nyuṅ ḡii. <sup>22</sup> Digilaa tinḡaa, má wuoli ma digilaa a nii wialin Wia Din-zoṅ-la si bula pi nialin si laa Yesu wiaa dii aa hilimi lee-kala Esia tinteen le.

## 4

*Baa denne Wia Wia-jaṅ le*

<sup>1</sup> Wiaa deenba kala si ḡaa hariṅ, mi beṅ wia nyuṅ a na di Wia-jaṅ boro suro. Nii ne mi nii yiikori-la fa sii bul wiaa mi teen bunḡbun-la a nage nyile. U bira bula pimi a bul, “Ko daha di mi dagin wialin si jaṅ ḡaa wiaa deenba hariṅ.” <sup>2</sup> Bua-la le di Wia Din-zoṅ-la ku hemi le, ḡii ne mi beṅ a na Wia-jaṅ a na Wia kuori-kpasa-la duu chin dime, ka nuu hoṅ u nyuṅ. <sup>3</sup> Nii-la fa si hoṅ kuori-kpasa-la nyuṅ tutul a nage tabiin sii tul a nage jinalia, ari tabiin si fiesa a nage chalin. Ka duoṅsia golli kuori-kpasa-la chu. Duoṅsia-la fa nage tabiin si nage joḡo-liin ne. <sup>4</sup> Nii ne mi na kuori-biisin kpasinnin mara ari banese di ba golli kuori-kpasa-la. Nihiasin mara ari banese hoṅ ba nyuṅ a laale geripulluṅ, a chu selime kuorinyuṅ-chuuluṅ. <sup>5</sup> Nii ne ka kpasa-la lerin liligise a nage duonuṅ sii ligise ḡii, ka yiikoro ma doṅ, a nage duonuṅ sii kpia a lii kpasa-la

lerin. Nii ne ka nyin-daasin balipe ma didii nyinin kuori-kpasa-la sipaan. Nyin daasila ne n̄aa Wia Din-zomɔ-la balipe. <sup>6</sup> Ka kuori-kpasa-la sipaan kuɲ pin a nage mugibalin si tul nii pal pal, a pulla nage duon-tabiin.

Ka kiaa banese si weye golli kuori-kpasa-la chu a ken sii-kenɛ, sipaan ari harin kala. <sup>7</sup> Kialin banese-la donɔ nage naachigin, donɔ ma nage ne-bele, donɔ ma siaa a nage nuhuobiine, donɔ ma nage kachuun sii fil. <sup>8</sup> Kialin kuɲ-kala ken kin̄kesin balidu balidu ne. Ba bira ken siaa sipaan ari harin kala. Titanin ari wiihɛye kala ba yie yiyii yiilaa, ba bi tɔre. Yiila-la ba sii yii ne n̄la:

“Wii-jaribako, n̄ n̄aa Tuɔ-pul Tiina ne,  
n̄ ne nii-la fa si he dime faafaa kala, ari nii-la si he dime, ari nii-la si jan ko.”

<sup>9</sup> Kialin si weye yii yiilaa a denne nii-la si hɔn kuori-kpasa-la nyun. Ba yie lollu a yiyire u yirin maa. Nii-la si hɔn kuori-kpasa-la nyun jan he dime a kaa mu wuu. <sup>10</sup> Bua-na kala kialin banese-la si weye ne yii yiilaa, nihiasin mara ari banese-la ma yie tuu kpirimi a chuɔle nii-la si hɔn kuori-kpasa-la nyun a he dime a kaa mu wuu. Ba yie suri ba kuorinyun-chuulun a bil kpasa-la sipaan an yiyii yiilaa a bul, <sup>11</sup> “La Tiina Wia, u maga di la chuɔlun,

u maga di la dennin a yiyire n̄ yirin,  
n̄ ne Dolun Tiina. N̄ ne ta kuɲ-kala,  
n̄ tuɔtorun ɛ ne n̄ taba ba he dime.”

## 5

*Ba jon ten-chuolun a pi Pie-bie*

<sup>1</sup> Nii ne ka mi na di nii-la si hɔn kuori-kpasa-la nyun, duu kori ten-chuolun u nadiin nisin ɛ. Ba n̄munse ten-la tuɔn ari harin kala a mere, an ken kiaa balipe kaa magile. <sup>2</sup> Nii ne mi na Wia tin̄daari-duo kubala duu faasa heeli a bul, “Kubee ne jan wuo lere kialin ba si kaa mere ten-la an ben ten-la?” <sup>3</sup> Ama mi bi nuu-kala na si jan wuo lere ten-la. Nuukala tuo Wia-jan ɛ, nuu-kala tuo tin̄teen ma ɛ, nuu-kala tuo lelee-jan ma si wuo lere ten-la ben. <sup>4</sup> Mi si bi nuu-kala na si wuo lere ten-la ben, mi faasa yel. <sup>5</sup> Nii ne nihiasi-la mara ari banese-la donɔ bula pimi a bul di mi si yel, di mi bee na nii-la ba sii yire “Juda niaa tuɔn Naachigin”, u lii Devit doho niaa tuɔn ne, u ne wuo yuo dii Sitaani. Nii wiaa u jan wuo suri ten-la a lere kialin balipe-la ba si kaa mere.

<sup>6</sup> Nii ne mi ben a na Pie-bie duu chin kuori-kpasa-la ari kialin banese-la si weye ari nihiasi-la tutuɔbaanin. U si chin lee-la, u nage di ba fa kpua ne. U fa ken nyillin balipe ari siaa ma balipe. Sia-la balipe ne n̄aa

Wia Dinşin balipe Wia si ta ba ku tuu dunia semena kala. <sup>7</sup> Nii ne Pie-bie-la mu laa ten-la, nii-la si hon kuori-kpasa-la nyun na-diin nisin le. <sup>8</sup> U si laa ten-la, kialin banese-la si weye ari nihiasin mara ari banese-la, ba kala tuu kpirimi Pie-bie-la sipaan a chuolu. Nihiasi-la kala kori chennin ari selime gbanşin maa. Gbanşin-la su ari suoru-si-la ba si nyiga pi Wia. Wia niaa Wii-chuolun ne naa suoru-si-la. <sup>9</sup> Nii ne nihiasi-la ari kialin si weye ta ba yiili-falin aa yii,

“N ne wuo laa ten-la ba si mere,  
a lere kialin ba si kaa magile,

bee wiaa ba kpun ne. Ba si kpun nii, n jon n chalin a yoo nuhuobine miisin a pi Wia.

Nialin n si yobo lii niyiriba kala tuon ne aa bul yikori-yiriba, a he ta-yiriba ari tintee-yiriba kala le.

<sup>10</sup> N leje nialin n si yobo, dii kuoron ne a laa niaa nyun a tima pipi Wia. Ba jan ben tinteen kala.”

<sup>11</sup> Nii ne mi ben a na di Wia tinđaraa bui buiba bui ku golli kuori-kpasa-la ari kialin si weye ari nihiasi-la. Mi nia di ba faa bul wii ne. <sup>12</sup> Wii-la ba fa sii bul ari yikori-balin ne nla:

“Pie-bie-la ba si kpua ne maga duu ken dolun a biben niaa.

U ne maga duu ken kiaa, ari wu-jimin, ari dolun kun-kala le.

U ne maga duu ken yirin, di niaa denu a chuolu.”

<sup>13</sup> Nii ne ka mi nii kialin kala si he Wia-jan, ari kialin kala si he dunia le, ari kialin si he lele-jan, ari kialin kala si sage mug-balin nyun, ari kun-na kala si he dime di baa bul wiaa. Ba si,

“Nii-la si hon kuori-kpasa-la nyun ari Pie-bie-la,  
ba ne wuo chuoleba a piba yirin a denneba.  
Ba ne maga di ba ken dolun kun-kala le a kaa mu wuu.”

<sup>14</sup> Nii ne kialin banese-la si weye bul di Ami. Nii ne nihiasi-la tuu kpirimi a chuole Wia.

## 6

*Pie-bie-la ken kialin ba si kaa magile suri*

<sup>1</sup> Nii ne mi na di Pie-bie-la suri kialin ba fa sii kaa magile ten-la donjo. Nla ne mi nii kialin si weye banese-la donjo duu bul wiaa. U yikoro nage duonun sii kpia ne. U yiremi a bul di mi ko. <sup>2</sup> Nii ne mi bee na japula di nuu hon u nyun a kori ton. Ba jon kuori-nyunchuolu pu. U lii a yuo lalin dii lee-na kala.

<sup>3</sup> Nii ne Pie-bie-la bira ken kialin ba si kaa magile ten-la ku-liamin kaa suri. Nii ne mi bira nii di kialin banese-la si weye liamin tiina bira yiremi a bul di mi ko. <sup>4</sup> Nii

ne mi bee a na jaaba donjo di u ku lii. Joo-la n̄aa ja-fian̄ ne a faasa fiɛɛ, ka nuu hon̄ u nyun̄. Nii ne ba pi ti-na won̄biin̄ duu ken̄ yuosun̄ kaa kɔ dunia, di n̄iaa yuyuo donjo a kpukpu donjo. Ba jon̄ tokobii-bal ne a he u nisin̄ le.

<sup>5</sup> Pie-bie-la bira ken̄ kialin̄ ba si kaa magile ten̄-la kutorimun̄ kaa suri. Nii ne kialin̄ si weye, tori tiina yiremi a bul di mi kɔ. Nii ne mi na ja-bine di nuu hon̄ u nyun̄ a kori saniya u nisin̄ le. <sup>6</sup> Nii ne mi nii yiikoro si nage nuu yiikoro. Yiikori-la lii kialin̄ banese-la si weye tutuobaanin̄ ne. Nii ne tiina bul, “Ba jan̄ yalle folimiaa gban̄a kubala, a yi che-bala tintinna si yie laa u time mage nii, ka di miaa gban̄sin̄ batori ma yi che-bala tintinna time. Ama nuun̄ ari sinin̄, ba-na wii tuo.”

<sup>7</sup> Nii ne Pie-bie-la bira ken̄ kialin̄ ba si kaa magile ten̄-la nesemin̄ kaa suri. Nii ne kialin̄ banese-la si weye nesemin̄ tiina yiremi a bul di mi kɔ. <sup>8</sup> Nii ne mi ben̄ a na jaaba di nuu hon̄ u nyun̄. Joo-la n̄aginin̄ lii. Nii-la si jila yirin̄ ne suun̄, ka leleɛ-jan̄ tuto u harin̄. Nii ne Wia piba dolun̄ di ba kpu nuhuobiinee kala si he dunia sesi-la banese donjo. Ba jan̄ ken̄ tokobii-la a kpu donsun̄, di losun̄ ma kpu donsun̄. Nyanyalaa ari бага kiasa ma kpu donsun̄.

<sup>9</sup> Pie-bie-la si ken̄ kialin̄ ba si kaa magile ten̄-non̄-la kaa

suri, nii ne mi bee na nialin̄ ba si kpua din̄sin̄ di ba he Wia-dia koru-la bubuon̄, lee-la ba si yie nyige ku-suo-sin̄ a pipi Wia. Nialin̄ ba si kpua faa bul Wia wiaa ne a fa n̄aa la Tiina Kirisito siada tin̄n̄aa maa, nii ne tii ba kpuba.

<sup>10</sup> Nii ne ba nmoo nin̄ vil vil aa bul, “La Tiina Wii-jaribako, n̄ n̄aa Tuɔ-pul Tiina ne a ken̄ wutitii maa, bua beɛ le ne n̄ jan̄ dii nialin̄ si kpula sariya a dogise nialin̄ si he dunia le a tin̄ la wiaa?”

<sup>11</sup> Nii ne Wia jon̄ geri-pula a pi ba kun̄-kala an̄ bula piba di ba gbere a wiesi muapilii, see di ba kpu ba tintinni donsun̄ ari ba naan̄biiri-la donsun̄ a mage nii u sii che.

<sup>12</sup> Pie-bie-la si ken̄ kialin̄ ba si kaa magile ten̄-du-la kaa suri, mi bee na di tinten̄ faasa zigili. Nii ne wii-pɔsun̄ kala biri lim ari chen̄-birimin̄, chen̄-pula ma fiɛɛ a nage chalin̄. <sup>13</sup> Ka chen̄wulaa lii wia nyun̄ a ku tuu tinten̄, ari ta-faan̄ pelin̄ si yie n̄aa tutogo yuori nii.

<sup>14</sup> Nii ne wia nyun̄ kala lel a nage ba si yie ken̄ bosɔ chuoli nii. Peel-na kala ari lee-na kala liin̄ si gollo chu, ba kala sii ba leree. <sup>15</sup> Nii ne dunia kuoroo, ari nibalaa, ari laali-yuori-hiasin̄, ari nialin̄ si ken̄ kiasa, ari nialin̄ si ken̄ dolun̄, ari nuu-kala, yosun̄ ari nialin̄ kala si tii ba titia, ba kala fá juu faa bu-buɔsun̄ ari peeli-pegisin̄ le.

<sup>16</sup> Nii ne ba yiyire peele-la ari busu-la a bul di ba tele toba le, di Pie-bie-la ari nii-

la si hoŋ kuori-kpasa-la nyun siaa síba na. Baa fá Pie-bie-la si na baaniŋ ne. <sup>17</sup> Ba bul ŋii, beɛ wiaa tapulii-la Wia si jaŋ na baaniŋ dunia niaa nyun yie ne. Nuu-kala bi Wia sipaan wuo chinŋ.

## 7

*Iziral tinŋaa tuoŋ nialin ba si magila*

<sup>1</sup> Wiaa deenba kala hariŋ, mi na Wia tinŋaaraa banese di ba chinŋ tinŋeen langorunuŋ banese-la le. Ba fa keŋ dunia langorunu-la banese kala, di pelin sí lu dunia le. Tinŋeen ari mugibalin ari tiisin kala bi jaŋ na pelin. <sup>2</sup> Ŋii ne ka mi na Wia tinŋaara doŋo duu to wii-posuŋ le aa jil wia nyun, a kori ku-la Wia-la si weye si kaa magile u niaa. Ŋii ne u faasa yire Wia tinŋaara-la banese Wia fa si piba dolun di ba chei tinŋeen ari mugibalin. <sup>3</sup> Ŋii ne u bula pi Wia tinŋaaraa banese-la a bul, “Ma sí tinŋeen koo mugibalin koo tiisin chei, see di la magile la Tiina Wia tinŋinnaa ba tillin le.” <sup>4</sup> Ŋii ne ba dage nialin Wia si magile ba niin pimi. Ba ŋaa bui bui zolo ari mahin balia ari banese ne. Niaa deenba lii Iziral ni-yiriba tuoŋ ne. <sup>5</sup> Niaa bui fii ari balia ne u magile Juda doho niaa tuoŋ. Niaa bui fii ari balia ma lii Rubin doho niaa tuoŋ. Niaa bui fii ari balia ma lii Gad doho niaa tuoŋ. <sup>6</sup> Niaa bui fii ari balia ma lii Asa doho niaa tuoŋ, Nafitali doho niaa tuoŋ

maa, niaa bui fii ari balia. Niaa bui fii ari balia ma lii Manaasi doho niaa tuoŋ. <sup>7</sup> Niaa bui fii ari balia ma lii Simian doho niaa tuoŋ. Niaa bui fii ari balia ma lii Liivai doho niaa tuoŋ. Niaa bui fii ari balia ma lii Izakai doho niaa tuoŋ. <sup>8</sup> Niaa bui fii ari balia ma lii Zebulun doho niaa tuoŋ. Niaa bui fii ari balia ma lii Josef doho niaa tuoŋ. U magile niaa bui fii ari balia ma Benjamin doho niaa tuoŋ.

*Ni-dan-la si denne Wia*

<sup>9</sup> U ŋii hariŋ ne mi beŋ a na ni-dan-dan, nuu bi ba wuo diise. Ba lii dunia seme-na kala a lii tinŋee-yiriba, ari ni-yiriba, ari ta-yiriba, aa bul yiikori-yiriba. Mi na di ba chinŋ kuori-kpasa-la ari Pie-bie-la sipaan a laale geripul-duduosuŋ, a kori abee pipaarin ba nisin le. <sup>10</sup> Ni-dan-la faasa ŋaa goŋ aa bul, “La Tiina Wia si hoŋ kuori-kpasa-la nyun ari Pie-bie-la, ba ne keŋ dolun di ba wuo laala ta.” <sup>11</sup> Ka Wia tinŋaaraa kala china golli kuori-kpasa-la ari nihiasila ari kialin banese-la si weye. Ŋii ne Wia tinŋaara-la tuu kpirimi kuori-kpasa-la sipaan a chuole Wia <sup>12</sup> a bul, “Ami. La jaŋ chuole la Tiina Wia a dennu aa lolu, beɛ wiaa u ne keŋ dolun ari wujimin a kaa mu wuu. Ami.”

<sup>13</sup> Ŋii ne nihiasila doŋo piesemi a bul, “Kubeɛba ne laale geripul-duduosuŋ ŋii, nii ne ba lii?” <sup>14</sup> Ŋii ne mi bula pu a bul, “Ŋ ne jima,

mi kuhian.” Nii ne u bula pimi a bul, “Niaa deenba ne Wia liise hee-bal-la tuon. Ba chese ba gennin Pie-bie-la chalin le, ba lii a pulla. <sup>15</sup> Nii ne tii ba chin Wia kuori-kpasa-la sipaan a tima pupu wiiheye ari titanin kala Wia-dia le. Nii-la si hon kuori-kpasa-la le ne jan kiese toba le. <sup>16</sup> Losun bira bi jan kenba, lii-nyuasun ma bi jan kenba, wii-posun bi jan kpuba, wulimin ma bi jan kenba. <sup>17</sup> Wii-kala bi jan naaba, bee wiaa Pie-bie-la si chin Wia kuori-kpasa-la sipaan ne jan biben ba nyun, ari pie-daara si yie ben u piesee nyun nii. U ne jan kenba kaa mu lii-bulo lerin, lii-la sii pi niaa miisin. Wia ma jan fiise ba sii-liirin ta.”

## 8

*Pie-bie-la ken ten-kaanin suri*

<sup>1</sup> Nii ne Pie-bie-la suri kialin ba si kaa magile ten-la balipe-la ku-kaanin. U si suro dere, Wia-jan kala naa fui a yi magina kubala. <sup>2</sup> Nii ne an ka mi na Wia tindaaraa balipe-la si yie chin Wia sipaan. Ba piba nyillin balipe. <sup>3</sup> Wia tindaara donjo ma ku chin koru-la seme a kori selime gbanala ba si yie jon ku-suo-sin he, a nyiga pi Wia. Nii ne ba pu ku-suo-zonjo yuge, duu kaa guoli Wia niaa Wii-chuolun le a nyige a pi Wia. U jan nyigu selime koru-la nyun, ku-la si chin

kuori-kpasa-la sipaan. <sup>4</sup> Nii ne ku-suo-si-la nyuosun ari Wia niaa Wii-chuolun lii Wia tindaara-la nisin le a mu Wia teen. <sup>5</sup> Nii ne Wia tindaari-la jon selime gbanala a chaane nyinin korun nyun, a he gbanala tuon, a jonjo yuo u ku tuu tinteen. Nii ne duonun kpikpia gon an liligise, ka tinteen zizigili.

*Wia tindaara-la nmuu nyillin*

<sup>6</sup> Nii ne Wia tindaaraa balipe-la si ken nyillin balipe-la naa siri di ba nmuu.

<sup>7</sup> Wia tindaari-la bunbun kua nmuu u nyile. Nii ne duon-tabiaa ari nyinin guoli chalin le ku tuu tel tinteen. Ba si tele nii, tinteen ari tiisin ari yan sen-tori-la kubala dii nyinin.

<sup>8</sup> Nii ne Wia tindaari-la liamin tiina ma nmuu u nyile. U si naa nii, ba jon kun a nage peel-balin sii dii nyinin a yuo ta u tuu mugi-balin tuon. <sup>9</sup> U si ku tuu nii, mugi-balin sen-tori-la kubala fiise a nage chalin. Kialin kala si ken miisin a he lii-la sen-tori-la kubala tuon suu. Liin daborusu-la si he lee-la ma chei.

<sup>10</sup> Nii ne Wia tindaari-tori-la ma nmuu u nyile. U si nmuu nii, chenwul-bal kubala lii wia nyun, a chaane a nage nyin-daan, a ku tuu tel fuonun ari lii-bullun sen-tori-la kubala le.

11 Chenwul-la yirin ne kuhaan. U si heye nii, lii-la tuon u si tele ma hei. Lii-la si heye nii, ni-dan-la si nyua lii-haa-la, ba suu.

12 Nii ne Wia tinjaari-nese-la ma nmuu u nyile. U si nmuu nii, wiposun sen-tori-la kubala cheye, chene ma sen-tori-la kubala chei, chenwulaa sen-tori-la kubala ma chei. Ba pulumun kala lel lerin kala biri. Lee-la pulun tuo wiiheye ari titanin kala.

13 Nii ne mi ben a na kachuun duu fil di-bolii wia nyun le aa nmoo niin vil vil. U sii fil nii, u yel a bul, "Nialin si he tinteen le, ba jan na heen. Bua-la le Wia tinjaari-kaana-la batori si jan nmuu ba nyillin, nialin jan na hee-la."

## 9

1 Nii ne Wia tinjaari-non-la ma nmuu u nyile. U si nmuu nii, mi na chenwulun duu lii wia nyun a ku tuu tel tinteen. Ba jon buotuo-lunun boribin pu. 2 Nii ne u suri buotuo-lunii-la boro. U si suro dere, nyuosun lii buotuo-lunii-la tuon a nage nyin-balin nyuosun, a to pulumun ari wii-posun kala ba biri. 3 Nii ne hobosun to nyuosu-la tuon ku lii a tuu tinteen. Wia piba dolun dunia le ba wuo len niaa na heen, a nage nuomaa si yie din niaa ba nina heen nii. 4 Wia biba wonbin pa di ba dii yan koo tiisin koo kialin si nyu tinteen le. Ama u piba

wonbin di ba dogise nii-la kala Wia magilin si tuo u tile le. 5 Wia bi hobosu-la wonbin pa di ba kpu niaa deenba, ama di ba dogiseba chensin banon. Nii ne u dogiseba a nage nuomun si yie din niaa u wiwii nii. 6 Bua-la le niaa jan chiche di ba suu, ama ba bi wuo suu.

7 Hobosu-la fa nage janin ne ba si kpiera di ba kaa mu laalin. Ba chu kias si nage selime nyun-chuulun ne. Ba sias ma nage nuhobiinee sias. 8 Ba ken nyu-punaa ma ne. Ba duomo a nage haala nyu-punaa. Ba nyilaa ma nage naachigee nyilaa ne. 9 Ba yaraa horun nage hoon ba si yie jon to boye a kaa yuo laalin. Ba kinnesin ma ninna gon, ari janin si yuga aa lere torukoba a fa mumu laalin. 10 Ba bubu-dosun nage nuomun fila. Dol-la kala ba fa si kene di ba kaa dogise niaa chensin banon-la kala fa he ba bubu-dosula le ne. 11 Wia tinjaari-la fa si kori buotuo-lunii-la boribin ne fa nna ba kuoro. Juu tinnaa yikoro le baa yiru Abadon ne. Giriik tinnaa ma yikoro le baa yiru Apolion ne.

12 Bunbun hee-la ba si jan na ne nii. Ama kias balia ne ha ka.

13 Nii ne Wia tinjaari-du-la nmuu u nyile. U si nmuu nii, mi nii nuu yikoro duu lii koru-la si chin Wia sipaan seme. 14 Nii ne yikori-la bula pi Wia tinjaari-du-la si kori nyile-la a bul, "Len





ari tinteen ari kialin kala si he dime, ari mugi-balin, ari kialin kala si he u tuon. U nmiesa a bul, "Bua-la le la sii jegilu, u yie ne." <sup>7</sup> Ama tapulii-la Wia tindaari-pe-la si jan ku nmuu u nyile, Wia wu-faalia-la u fa si dage u tintinnaa, nialin sii bul wiaa, Wia Din-zon-la dolun le, ba kala jan naa.

<sup>8</sup> Nii ne mi bira nii yikori-la titia si lii wia nyun a bul wiaa pimi. U si, "Mu a laa ten-bie-la ba si suro, Wia tindaari-la nisin le, nii-la naan dono si chin mugibalin nyun, ka dono ma chin tinteen le." <sup>9</sup> Nii ne mi mu Wia tindaari-la teen a sulu duu jon ten-bie-la pimi. Nii ne u jon ten-bie-la pimi an bula pimi di mi jono chan, di u jan sin mi niin le a nage tuun, ama mi luorun le u jan hei. <sup>10</sup> Nii ne mi laa ten-bie-la Wia tindaari-la nisin le a jono chan. U sima a nage tuun ne mi niin le, ama u si tuu mi luorun, mi luorun kala hey ne. <sup>11</sup> Nii ne ba bula pimi a bul, "N jan bira bul wiaa, Wia Din-zon-la dolun le a tige tayiriba le, ari tintee-yiriba, ari nialin sii bul yikori-yiriba, ari kuori-yiriba yuge ma le."

## 11

*Wia siada tinnaa balia-la*

<sup>1</sup> Nii ne ba jon daa-magisin a nage daantiga a pimi, an bula pimi di mi sii a magise Wia-dia ari koru-la si he u

tuon, an diise nialin kala sii chuole Wia dime, <sup>2</sup> ama di mi si Wia-dia-la kaala-na magisu, bee wiaa ba jon leela pi nialin si bi juu tinnaa naa, di ba nmoo u jebii-la lo, a nuose Wia lee-la chensin mahin balia ari balia. <sup>3</sup> Nii ne ka Wia si u jan pi u siada tinnaa balia-la dolun di ba wuo bul wiaa u Din-zon-la dolun le, tapulaa bui ari zo-balia ari mahin batori, an baage tuo-cheri geribosunun.

<sup>4</sup> Niaa deenba balia nage tia-la ba sii yire Oliv ne. Ba ne bira nage korunun ba si yie jon chaanaa a didan balia-la si chin la Tiina Wia sipaan, nii-la si tii tinteen. <sup>5</sup> Nyinin jan lii ba niin a dii nuu-kala sii che duu dogiseba. Di nuu-kala nii che duu walimeba, nyinin jan dii. <sup>6</sup> Wia piba dolun di ba wuo kiri duonun, duu si nii tapulia-la ba sii che di ba bul wiaa, Wia Din-zon-la dolun le. Wia bira piba dolun di ba wuo naa di liin kala birime chalin. Ba jan wuo len di nyanyalaa juu dunia niaa le, mage nii kala le ba si cho. <sup>7</sup> Di ba ne dii Wia dansia dere, baga kun jan lii buotuo-lunii-la tuon ku lii. Ku-la jan yuo kpuba. <sup>8</sup> Ba ku-suunun jan pin tabal-la wonbiin le. Tabal-la bomo nage Sodom koo Ijipiti tinteen ne. Tabal-la le ne ba kpaase la Tiina daa-gese nyun. <sup>9</sup> Ni-yiriba a lii tayiriba, ari nialin sii bul yikori-yiriba a lii tintee-

yiriba kala jaŋ beŋ ba ku-suunuŋ tapulaa batori ari lebi. Ba bi jaŋ sei di ba paaba hugi. <sup>10</sup> Dunia niaa, tuoŋ jaŋ toŋ ari ba si kpu niaa baliala. Ba jaŋ gbigbieli a sisieri doŋo ɛ a didii zile doŋo ɛ, beɛ wiaa wialiŋ niaa deenba balia fa sii bul, Wia Diŋ-zoŋ-la doluŋ ɛ, ba fa keŋ dunia niaa baŋŋa ɛ ne. <sup>11</sup> Ama tapulaa batori ari lebi cheeŋ Wia pi niaa deenba balia misin, ba sii chin ba naasin ɛ. Nialiŋ kala si naba, fawulluŋ keŋba woruŋ. <sup>12</sup> Nii ne ba nii nuu yiikoro duu lii Wia-jaŋ a bula pi niaa baliala a bul, “Má ku jil daha.” U si bul nii deŋe, ba juu duoŋbilingbaanin tuoŋ a jil Wia-jaŋ. Ba diŋdoŋŋo bibenba, ka ba jijil. <sup>13</sup> Bualitia ɛ tinteen faasa zigili. Taŋ-la semɛ doŋo kala tel, ba niaa bui balipe suu. Leree fii fii sesi-la kubala ne nii. Fawulluŋ keŋ ni-kaanaa, ba denne Wia, nii-la si he Wia-jaŋ ɛ.

<sup>14</sup> Heɛ-lia-la diderin ne nii, ama torimuŋ jaŋ ko ɛɛɛɛ.

*Wia tinđadari-pe-la ŋmuu u nyile*

<sup>15</sup> Nii ne Wia tinđadari-pe-la ŋmuu u nyile. U si ŋmuu nii, mi nii yiikori-balaa di baa bul wiaa, Wia-jaŋ ɛ. Ba si, “Dunia kuorii-la ɛɛɛɛ ŋaa la Tiina Wia ari Kirisito kuorii-la ne. La Tiina Wia jaŋ dii kuoruŋ a kaa mu wuu.” <sup>16</sup> Nii ne nihiasin mara ari banese-la si hoŋ ba kuori-kpasinnin nyuŋ Wia

sipaan, ba kala tuu kpirimi a chuɔɛ Wia a bul,

<sup>17</sup> “Laa ɔlluŋ la Tiina Wia, Wii-jaribako, nii-la fa si he dime faafaa ari nii-la ha si he dime.

Lɛɛɛ-na ŋ joŋ ŋ dol-bal-la, a suomi a biben dunia ne.

<sup>18</sup> Dunia niaa fa hoso ne ŋ nyuŋ.

Ama bua-la ŋ baanin si jaŋ sii ba nyuŋ yie ne, ka bua-la titia ŋ si jaŋ dii nialiŋ si suba sariya ma yie ne,

bua-la ɛ ŋ si jaŋ joŋ time a tin ŋ tininnaa ma yie ne.

Nialiŋ sii bul wiaa, ŋ Diŋ-zoŋ-la doluŋ ɛ, ari ŋ niaa kala,

nialiŋ sii fá ŋ yirin, nihiasin ari hanbiisin kala,

ŋ jaŋ time piba.

Lɛɛɛ ŋ jaŋ dogise nialiŋ si chei dunia, di ba mu suu.”

<sup>19</sup> Nii ne ba keŋ Wia-diala si he Wia-jaŋ, boro kaa suri a na dagá kubala u tuoŋ. Wialiŋ Moosis fa si ŋmuŋsa bil di Iziral tinŋaa tuto, ba he daga deen tuoŋ ne. Nii ne duonuŋ liligise lerin kala, ba ninii yiikorusuŋ, ka duonuŋ kpikpia ŋmana ŋmana. Tinteen zigili, ka duoŋ-tabiaa faasa tuu titel.

## 12

*Dimin ari haala yuo doŋo*

1 Nii ne ku-kpunkpere kubala ku lii wia nyun. Ku-kpunkpere-la nage haal ne a jon wii-posun a laale, ari niaa sii laale gennin nii. Ka chene ma he u naasin bubun, an ka u chu kuorinyun-chuulo. Nyun-chuulo-la, chenwulaa fii ari balia ne ba kaa naa. 2 Haal-la fa ken luorun ne. U luorun wiwii, u faasa yiyel a wiwalime duu lul. 3 Nii ne ku-kpunkpere donjo ma ku lii wia nyun. Ku-kpunkpere deen fa nage dimin si yuga kieli ne a kala fiесе ari chalin. Din-la fa ken nyusun balipe ne ari nyillin fii, a chu nyun-chuulun balipe. 4 U bubudoho yigi chenwulaa sesi-la batori donjo lo ba ku tuu tel tinteen. An ka din-la mu chin haal-la fa sii walime duu lul sipaan a gberе, di haal-la ne lula, duu jon bile lin. 5 Nii ne haal-la lul hanbolibie, nii-la si jan ben dunia niaa kala ari kpaasa. Nii ne Wia jon bile kaa mu u teen a len u hon u kuorikpasa nyun, 6 an ka haal-la fa juu girin, lee-la Wia si wasa bilu le. U si he dime nii, Wia pu kudiilee tapulaa bui ari zo-balia ari mahin batori.

7 Bua deen le laalin sii Wia-jan le. Wia tin-daariahian baa yire Maakil ari tin-daaraa donsun suomi a yuyuo din-la. Nii ne din-la ari u haritooro maa yuo. 8 Ama Maakil niaa yuo dii din-la ari u haritooro. Nii ne din-la ari u haritooro

bira bi di-honun kala kene Wia-jan le. 9 Nii ne ba jon din-la ari u haritooro a yuo ta ba lii Wia-jan a ku tuu tinteen. U ne baa yire Sitaani, nii-la sii nyise dunia niaa kala. Din-la fa he dime faafaa kala ne a lii dunia disuomun.

10 Nii ne ka mi nii yiikori-bal kubala a lii Wia-jan a bul, "Bua-la Wia si jan laa niaa ta yie ne. Bua deen le ne Wia laa u dolun ari u kuorun. Kirisito, nii-la Wia si liisa, ma laa u dolun ne, bee wiaa nii-la si jon cheerin pi la naanbiirin, ba jonu yuo ta ne. U fa jon cheerin piba Wia sipaan wiiheye ari titanin kala. 11 Ba yuo dii Sitaani a tin Pie-bie-la chalin wiaa, ari Wia nin wialin ba fa si bula pipi niaa. Ba fa naa siri di ba kpuba a tin Wia wialin le ne. 12 Ma nialin si he Wia-jan, ma len di ma tun ton. Ama ma nialin si he tinteen le ari nialin si he mugibalin le, ma jan na heen. Sitaani ku tuu ma teen ne a faasa ken baanin, bee wiaa u jima ari u bira bi dieni, ka di ba laa u dolun."

13 Din-la si na di ba jonu yuo ta, u ku tuu tinteen, nii ne u kire to haal-la si lul hanbolibie-la harin. 14 Nii ne Wia jon kachuun kinkesin pi haal-la, duu wuo fil a juu girin tun a kage din-la le. Nii ne u mu lee-la Wia si wasa bilu le. Dime ne, u jon kudiilee pu jisin batori ari lebi. 15 Nii ne lin lii din-la nin le a nage fun, a kire

to haal-la harin duu pelle jonu. <sup>16</sup> Ama tintee-hilin ku pe haal-la le a jon fuo-la si lii din-la niin le kala a nyua. <sup>17</sup> Nii ne din-la na baanin haal-la nyun a mu duu ken haal-la biirin donsun a yuo laalin. Haal-la biirin ne naa nialin si nii Wia niin wiaa a tutoba, a didii Yesu danzia, a bul u wiaa a pipi niaa. Nii ne din-la mu chin mugibalin niin.

### 13

*Ku-la si nage din-la ari бага кua*

<sup>1</sup> Nii ne mi na бага kua dono duu lii mugibalin tuon a ku lii. U fa ken nyusun balipe ne, u nyillin ma fa naa fii. U fa chu kuori-nyun-chuulun fii u nyillin fii-la le. Yiri-la u fa si kene u nyusu-la le faa tuuse Wia jonno ne. <sup>2</sup> Baga ku-la mi si na fa nage kpeye ne, an ka u naasin nage lugumun kiaa, u niin ma nage naachigin kua. Nii ne ku-la si nage din-la jon u dolun kala ari u kuori-kpasala a pi бага ku-la. <sup>3</sup> Baga ku-la nyusun balipe-la dono fa ken naawiil-bal ne si maga duu suu, ka u bi suba. Ba si na naawiil-la duu fiela, u naa dunia niaa kala wukpunkpere. Nii ne ba sii to u harin. <sup>4</sup> Nii ne niaa tuu kpirimi din-la sipaan a chuolu, bee wiaa u fa jon u dolun a pi бага ku-la ne. Niaa bira chuole бага ku-la. Nla ne ba piесе dono a mu tige u le, "Kubee ne ken

dolun a nage nla? Kubee ne jan wuo kenu yuo yuosun?"

<sup>5</sup> Nii ne ba pi бага ku-la wonbiin u bul babii-bal wiaa a tutuuse Wia jonno. Nii ne ba lenu u dii dolun chensin mahin balia ari balia. <sup>6</sup> U yie tutuuse Wia ari u jan-niaa jonno. <sup>7</sup> Nii ne ba puu wonbiin ma u ken Wia niaa a yuo laalin, a yuo diiba. Ba fa puu dolun u wuo niyiriba a lii ta-yiriba kala, ari nialin sii bul yiikori-yiriba a lii tintee-yiriba kala. <sup>8</sup> Nii-la kala si tuo miisin ten-la le a lii dunia di-suomun, u ma jan tuu kpirimi u sipaan a chuolu. Pie-bie-la ba si kpua ne tii ten-la. <sup>9</sup> Digilaa tinnaa, ma wuoli ma digilaa a jegile nii wiin deen. <sup>10</sup> Di ba ne yuo laalin dii nuu a kenu kaa mu yosun lerin, u maga duu mu naa yon ne. Di ba ne jon tokobii a kpu nuu, ba jan sene jon tokobii a kpu tiina maa. Nialin si laa Wia wiaa dii maga di ba nyalime ne a chin wialin ba si laa dii le.

<sup>11</sup> Nii ne mi bira na бага kua dono duu lii tinteen a kuu lii. U fa nage piесе ne an ken nyillin balia. Uu bul wiaa a nage ku-la si nage din-la ne. <sup>12</sup> U ma ken dol-la bunbun бага ku-la si kene ne a wuo didii dolun u sipaan. U len dunia niaa kala tuu kpirimi a chuole bunbun бага ku-la, ku-la fa si ken naawiil-bal-la, ka u fiela. <sup>13</sup> U naa wu-magilaa a yuge. U paala len nyinin lii wia nyun ku tuu tinteen,

nuu-kala na. <sup>14</sup> A tiŅ wu-magila-la ba si leŅe u Ņaa buŅbuŅ бага ku-la sipaan, бага ku-la doŅo nyise dunia niaa a he, di ba joŅ kiasa me, kuŅ si nage buŅbuŅ бага ku-la, ku-la ba si keŅ tokobiin keri, ka u wei. <sup>15</sup> Ņii ne ba wuo leŅ бага ku-lia-la pi ku-la ba si me wiese duu wuo wiaa bubul. Ņii ne u wuo leŅ ba kpu nialin si bi бага ku-la ba si me ka chuole, <sup>16</sup> a bira leŅ ba magile nuu-kala, nihiasin ari hanbiisin, kuoroo ari summoo, nii-la kala si tii u titia ari nii-la kala si Ņaa yon. Ba magile ba na-diin nisaa le koo ba tillin le. <sup>17</sup> Nuukala bi kuŅ wuo yoo a bi kuŅ-kala ma wuo yalle, see di ba joŅ бага ku-la magilin, koo u yirin, koo u yiri-la si mage Ņii a he u tiina le. <sup>18</sup> Nuukala bi jaŅ wuo jin wiin deen bubuon, see duu keŅ wu-jimin. Má leŅ di nii-la si keŅ wu-jimin liisi a mu yi бага kuŅ niin si mage Ņii. Di Ņ diiseba, u nage nuhuobiine kialin ne. U kiasa niin Ņaa zo-balidu ari mahin batori ari balidu ne.

## 14

### *Nialin sí yi yiili-falin*

<sup>1</sup> Ņii ne mi beŅ a na Pie-bie-la duu chin peel kubala nyun. Peel-la yirin ne Zaayon. Ba di niaa buiba zolo ari mahin balia ari banese ne fa chin peel-la nyun. Ba Ņmunse Pie-bie-la yirin ari u Nyimma yirin ne a he niaa deenba tillin le. <sup>2</sup> Ņii ne ka mi nii nuu yiikoro

duu lii Wia-jaŅ. Yiikori-la fa nage fuonun sii pelu ne gbul gbul, koo duonun sii kpia. Yiikori-la mi si nia ma fa naga ari niaa sii du cheŅ ne. <sup>3</sup> Niaa deenba chin kuori-kpasa-la ari nihiasi-la, ari kialin banese-la si weye sipaan ne aa yii yiili-falii kubala. Nuukala bi yiil-la wuo gunne, see nialin bui buiba zolo ari mahin balia ari banese-la dunduŅa. Niaa deenba ne Wia tuose dunia le a laaba ta. <sup>4</sup> Ba ne bi ha-chorumun harin to, aŅ bi disinnin ma kene. Ba nii to Pie-bie-la harin lee-na kala u sii mu. Ba ne Wia laa sipaan liise nuhuobiinee tuon, di ba Ņaa Wia ari Pie-bie-la tuopul tinŅaa <sup>5</sup> a bi wiaa ka nyia.

### *Wia tinđaraa batori bul wiaa*

<sup>6</sup> Ņii ne mi bira na Wia tinđaraa doŅo duu fil wia nyun di-bolii. U fa kori Wia Wu-zomo-la ne, Wu-zomo-la si jaŅ he dime a kaa mu wuu. U kaa mu bula pi nuu-kala si he dunia le tintee kala le, ari taŅ kala le, ari nialin sii bul yiikori-yiriba kala, ari ni-yiriba kala le. <sup>7</sup> Ņii ne Wia tinđari-la bul ari yiikori-balin a bul, "Má fá Wia a denne u yiri-balin, beŅ wiaa bua-la u si jaŅ dii dunia niaa sariya yie ne. Má dennu, u ne ta wia nyun ari tinteen ari mugi-balin ari lii-bullun kala."

<sup>8</sup> Ka Wia tinđari-lia-la ma tuto a bul, "Babilon tele, Babilon tele, ta-bal-la ba sii

yire Babilon, u tele. U ne jon u wu-bonhoo a dage tntee kala ba njaa wu-bonhoo. Wu-bomola nage sinij si ken huon ne.”

<sup>9</sup> Nii ne Wia tinjaari-torila ma tuto ba harin, a ma bul wiaa ari yikori-balin. U si, “Di nuu-kala ne chuole бага ku-la ari u nagisi-la ba si me bil, a laa magil-la u tile le koo u nisaa le, <sup>10</sup> Wia jan na baani kinken u tiina nyun. Wia baani nage sin-la si ken huon ne. Di niaa ne nyua, ba yie susuu ne. Ba jan jon nyini ari jiribiin a dogise tiina. Ba jan naa nii Wia tinjaara-la si bi disinnin kene ari Piebie-la sipaan. <sup>11</sup> Nyini ari jiribiin jan diiba deen deen, nyin-la bi jan ko duu disa. Niaa deenba bi jan ko di ba na wiese wiihaye ari titanin kala. Niaa deenba si chuole бага ku-la ari u nagisi-la ba si me bil a laa u yirin magil-la, ba bi jan na wiese.”

<sup>12</sup> Bua deen le ne Wia nialin sii to Wia niin a laa Yesu Kirisito wiaa dii, u maga di ba nyalime ne. <sup>13</sup> Ka mi nii yikoro kubala duu lii Wia-jan aa bul, “Nmunse wiin deen: Nialin si laa la Tiina Yesu wiaa dii an suu, Wia jan peba le.” Nii ne Wia Din-zon-la ma bul, “Wia sene jan pe niaa deenba le di ba wuo na wiese worun. Ba bira bi jan tin, bee wiaa tintimii-la ba si tima ka to ba hariin ne.”

*Ba ken siikoro a kaa kun*

*kiaa*

<sup>14</sup> Nii ne mi bira ben a na duonbilingbaan-pula, di nuu nage nuhuobiine bie a hon duonbilingbaan-la nyun. U tiina chu selime kuori-nyunchuulo ne an kori siikoro si ken niin worun. <sup>15</sup> Nii ne Wia tinjaari-la donjo ma lii Wia-dia tuon ku lii, a faasa yire ari yikori-balin nii-la si hon duonbilingbaan-la nyun a bul, “Ken n siikoro-la a kaa kun kiaa. Bua-la si maga di la kun kiaa yie ne. Kialin kala si he dunia le si maga di ba kun, ba kala bia ne.” <sup>16</sup> Nii ne nii-la si hon duonbilingbaan-la nyun ken u siikoro-la viisi tinteen a kun tinteen kun-kala.

<sup>17</sup> Nii ne Wia tinjaara donjo ma lii Wia-dia si he Wia-jan a ku lii, a ma kori siikoro. Siikoro-la ma ken niin ne worun. <sup>18</sup> Nii ne Wia tinjaara donjo ma lii Wia-dia koru-la seme a ku lii. U ne naa Wia tinjaari-la si ken nyiniin dolun. Nii ne u yire nii-la si kori siikoro-la a bul ari yikori-balin, “Ken n siikoro-la a kaa keri ti-la ba sii yire vain-la jagisin, bee wiaa u nene-la bia ne.” <sup>19-20</sup> Nii ne Wia tinjaari-la ken u siikoro-la kaa viisi tinteen a keri vain jagisi-la kala. Nii ne ba paa ba kala kaa mu he bua-la ba si luo, aa chage tii-nene-la liin ba si kaa naa sinin. Ta-bal-la jeen hariin ne ba chage tii-nene-la. Ba si chageba, li-la kala lii a birime chalin, a tuu pipelle tinteen a nage

fuonj. Namaga deenj dage  
 nii Wia si na baaniŋ tinŋteen  
 niaa nyuŋ. Nii ne chal-la  
 peŋle a mage meel-daasiŋ zɔ-  
 balia, aŋ pe jila yi a mage  
 nuhuobiine boye.

## 15

*Wia tinŋdaara-la kori  
 nyanyal-boŋŋɔɔ balipe*

<sup>1</sup> Nii ne mi bira na ku-  
 kpunŋkperere doŋɔ wia nyuŋ.  
 U keŋmi fawulluŋ. Mi  
 na Wia tinŋdaaraa balipe di  
 ba kori nyanyal-boŋ-yiriba  
 balipe. Di ba ne yuoba he  
 tinŋteen le dere, Wia baaniŋ  
 jaŋ fiele.

<sup>2</sup> Nii ne mi na kuŋ, u yuga  
 a nage mugi-baliŋ sii tul nii  
 pal pal a chuchol nyiniŋ. Ka  
 nialiŋ si yuo dii бага ku-la  
 ari u nagisi-la ba si me bil,  
 ari u yiriŋ magiliŋ, mi naba  
 di ba chinŋ mugi-bal-la sii tul  
 pal pal seme a kori chenniŋ  
 Wia si jono piba. <sup>3</sup> Nii ne  
 ba yiyii yiilaa. Yiil-la doŋɔ,  
 Moosis Wia tinŋtinni-la ne laa  
 sipaanŋ yii, ka yiil-la doŋɔ  
 ba yiyii a didenne Pie-bie-la.  
 Yiila-la ba si yii ne ŋla:

“La Tiina Wia Wii-jaribako,  
 wu-kpunŋkperisiŋ ari  
 tinŋtinŋ-balaa ne ŋ titiŋ.  
 Nj keŋ wutitii ne aa ŋaa  
 wutitiiba.  
 Nj ne jaŋ dii kuoruŋ a kaa mu  
 wuu.

<sup>4</sup> La Tiina Wia, kubee ne bi  
 jaŋ faŋ?  
 Nu-kala jaŋ faŋ aŋ  
 didenne ŋ yiri-baliŋ.  
 Nj dunɔɔna ne keŋ tuɔ-  
 pula.

Dunia niaa kala jaŋ ku  
 chuolunŋ,

bee wiaa nuu-kala na ari  
 ŋ dii dunia niaa sariya  
 ari wutitii ne.”

<sup>5</sup> Mi si nii yiila-la dere, mi  
 na Wia-dia-la tutuobaaniŋ  
 ba sii yire lee-la si bi disinniŋ  
 kene, di ba suro. <sup>6</sup> Nii ne Wia  
 tinŋdaaraa balipe-la si kori  
 nyanyal-boŋŋɔɔ balipe-la lii  
 dime ku lii. Ba laale geri-  
 yuoli-zoŋŋɔɔ sii tul ne, kuŋ-  
 kala tuo u le, a joŋ selime  
 damerisiŋ a voo ba boisiŋ  
 le. <sup>7</sup> Nii ne kialinŋ banese-  
 la si weye doŋɔ joŋ selime  
 gbaŋsiŋ balipe a pi Wia  
 tinŋdaaraa balipe-la. Wia  
 baaniŋ fa su selime gbaŋsi-  
 la ne. U ne jaŋ he dime a kaa  
 mu wuu. <sup>8</sup> Nii ne nyuɔsuŋ  
 to Wia-dia-la kala. Wia tula  
 ari u doluŋ ne ŋaa nyuɔsu-  
 la he dime nii. Nu-kala  
 bi Wia-dia-la wuo juu, see  
 Wia tinŋdaaraa balipe-la si  
 joŋ nyanyal-boŋŋɔɔ balipe-  
 la kala yuo he tinŋteen le a  
 dere.

## 16

*Gbaŋsiŋ balipe-la si keŋ  
 Wia baaniŋ*

<sup>1</sup> Nii ne mi nii nuu yi-  
 ikoro duu lii Wia-dia-la tuɔŋ.  
 U bula pi Wia tinŋdaara-la  
 balipe ari yikori-baliŋ a bul,  
 “Ma keŋ gbaŋsiŋ balipe-la si  
 keŋ Wia baaniŋ kaa mu bisa  
 he dunia le.”

<sup>2</sup> Nii ne Wia tinŋdaari-la  
 bunɔɔnŋ tiina joŋ u gbaŋa-  
 la Wia baaniŋ si he u tuɔŋ,  
 a kaa mu bisa he dunia le.  
 U si bisa he dere, nii ne

naawiil-bonjoo sii suora ken nialin kala si ken бага кула magilin, an pe chuole u nagsin ba si me a bil.

<sup>3</sup> Nii ne Wia tinjaari-liamin jon u gbanja ari Wia baani a kaa mu bisa he mugi-balin le. Nii ne mugi-bal-la birime a nage nuhuobiine si suba chalin. U si njaanji, kialin kala si ken miisin a he mugi-bal-la tuon suu.

<sup>4</sup> Nii ne Wia tinjaari-torila ma ken u gbanja kaa mu a bisa he fuo-biisin ari fuobuloo le. Ba kala birime chalin. <sup>5</sup> Nii ne Wia tinjaarila si ken liin dolun ma bul wiaa. U si, "La Tiina Wia, n kaaa sima ne di n dogise dunia niaa. N ne Tuopul Tiina, n ne nii-la fa si he dime faafaa kala ari nii-la si he dime leele.

<sup>6</sup> Dunia niaa kpu n niaa ari nialin fa sii bul wiaa, n Dinzon-la dolun le. Ba si njaanji ne tii n njaanji chalin piba di ba nyua. U maga di ba nyua ne."

<sup>7</sup> Nii ne mi nii nuu yiikoro duu bul wiaa. Yiikori-la lii koru-la nyun ba fa si yie kpu pusun a nyige a pi Wia ne. U tiina si, "Wutitii, la Tiina Wia Wii-jaribako, n ken wutitii, wutitii wonbiin ne n to a didii niaa sariya nii."

<sup>8</sup> Nii ne Wia tinjaari-nesela jon u gbanja a bisa he wii-pusun le. Nii ne wia faasa pose a nage nyinin, a nyinyige niaa. <sup>9</sup> Wii-pusun si faasa pose a nyige niaa nii, ba na baani Wia nyun a tutuuse u jonjoo, bee wiaa ba

jima u ne ken dolun nyanyalyiri deenba kala le. Ama ba bi birima lii ba haacheba le di ba chuole Wia.

<sup>10</sup> Nii ne Wia tinjaari-nonla jon u gbanja a bisa u tuon kaaa a he бага кула le, lee-la u fa sii dii kuorun. Nii ne birimin to lee-la kala, ka nialin kala si he dime ma yaraa bibieri, ba didin ba nendelimee. <sup>11</sup> A tin ba yara-la sii wii, ari ba naawiila-la wiaa, ba tutuuse Wia jonjoo, nii-la si he Wiajan. Ama ba bi birima lii ba haacheba le di ba chuole Wia.

<sup>12</sup> Nii ne Wia tinjaaridu-la jon u gbanja ari Wia baani a bisa he fuo-bal kubala baa yire Yufiretis le. Nii ne fuo-la kala hu. Fuola si hua, kuoro-la si lii tan seme wuo na wonbiin a to fuo-naa-la tuon a kuko. <sup>13</sup> Nii ne mi na jin-bonjoo batori di ba nage yinjaa. Donjo lii din-la le, donjo ma lii бага кула le, donjo ma lii nii-la si nyia wiaa duu bul wiaa, Wia Dinzon-la dolun le. Ba lii ba niirin le a ku lii. <sup>14</sup> Jinbonjoo deenba batori lii Sitaani le ne a yie njaa wukpunjkerisin. Ba ne golle dunia kuoroo kala teen, a kenba he donjo le baa njaanji siri di ba yuo laalin. Tapul-bal-la Wii-jaribako si liisa di wiaa deenba kala njaanji, ba jan yuo laal-la. <sup>15</sup> (Ma bee na, mi jan ko ari gaara si yie ko nii. Wia jan pe nii-la kala si bi donj pina an po le, nii-la kala si laale u gerin, di



niaa si u yaribiree na.) <sup>16</sup> Nii ne Wia keŋ dunia kuoro-la a kaa mu hilimi lee kubala di ba yuo laaliŋ. Hiiburu tiŋŋaa yiikoro le baa yire lee-la Amagedoŋ.

<sup>17</sup> Nii ne Wia tiŋdaari-pe-la joŋ u gbaŋa, a joŋ u tuoŋ kiaa bisa he peliŋ le. Nii ne yiikori-bal kubala lii lee-la kuori-kpasa-la si china Wia-dia-la tuoŋ a bul, "Wialiŋ dideriŋ yie ne."

<sup>18</sup> Nii ne duonuŋ liligiŋe a kpikpia. Leriŋ kala ŋiŋaa goŋ, ka tiŋteen ma faasa zigili. Dunia si suomo, u ha bi nii zigile aŋ ka. <sup>19</sup> Tiŋteen si zigili nii, u keŋ ta-balla kaa kpaa leree batori, ka tiŋtee kala ta-balaa ma titel. Nii ne Wia liise mu yi Babiloŋ le. U doŋisu ne woruŋ a mu yi nii u si na baaniŋ u nyuŋ le. <sup>20</sup> Nii ne tiŋteye-la liiŋ fa si gollo chu, ba kala lel. Peelee ma kala lel. <sup>21</sup> Ka duoŋ-tabii-balaa si faasa yuŋ kiŋkeŋ a nage noŋmuŋ-tabiaa, ba lii wia nyuŋ ku tuu tel niaa nyuŋ ba susuu. Wii-la fa ŋaa wu-loru ne. Nii ne ni-kaana-la tuuse Wia joŋŋoo a tiŋ duoŋ-tabia-la wiaa.

## 17

*Haala si hoŋ бага kun nyuŋ*

<sup>1</sup> Nii ne Wia tiŋdaaraa balipe-la si kori gbaŋsiŋ balipe-la, ba tuoŋ kubala yiremi a bul, "Ko di mi dagiŋ nii Wia si jaŋ dii ha-chorumuŋ deen si ŋaa wu-liiliŋ woruŋ sariya. U ne

hoŋ lee-la liiŋ si he a yuge.

<sup>2</sup> Dunia kuoroo ari dunia niaa kala kenu ŋaa wu-liiliŋ a kala bugi, a nage ba si nyua siniŋ."

<sup>3</sup> Nii ne Wia Diŋ-zoŋ-la hemi le, ka Wia tiŋdaari-la joŋmi kaa juu giri kubala tuoŋ. Nii ne mi na haal kubala dime duu hoŋ бага kun kubala nyuŋ. Baga kula kala fiŋsa ne. U yiraa fa yuga ne, yira-la tutuuse la Tiina Wia. U fa keŋ nyusuŋ balipe ne, ka u nyilliŋ ma fa ŋaa fii ne. <sup>4</sup> Haal-la laale geri-fiaŋ ari muoluŋ, a he selime ari tabii-tulaa. U fa kori selime nyunyuala ne. Wu-boŋŋoo ari wu-liili-la u sii ŋaa su nyunyuala-la, <sup>5</sup> ka ba ŋmuŋse yiri-kpuŋkpere a he u tile le. Yiri-la ba si ŋmuŋsa he u tile le ne ŋla, "Babiloŋ ŋaa ta-bal ne. Nialiŋ kala si he dunia le aa ŋaa wu-boŋŋoo, ari ha-chorumoo kala, u ne ŋaa ba naaŋ." <sup>6</sup> Nii ne ka mi na haal-la duu nyua Wia niaa ari nialiŋ ba si kpua a tiŋ Yesu wiaa ba chaliŋ. Haal-la si nyua chal-la yuga nii, u bugi. Mi si nau nii, u ŋaami wu-kpuŋkpere kiŋkeŋ kiŋkeŋ.

<sup>7</sup> Nii ne Wia tiŋdaari-la piesemi a bul, "Beŋe kun ne tii wiŋ deen ŋaa wu-kpuŋkpere ŋ le? Haal-la si jiŋ бага ku-la si keŋ nyusuŋ balipe ari nyilliŋ fii-la ŋaa ha-kpuŋkpere ne. Mi jaŋ dagiŋ u bubuoŋ. <sup>8</sup> Baga ku-la ŋ si na ne fa he dime bunbun aŋ bira tuo. U jaŋ lii buotuo-

lunji-la tuon ku lii a mu suu. Di dunia niaa donsun ne na baga ku-la, u jan naaba wukpukpere, bee wiaa u fa he dime bunbun an bira tuo, an saa jan bira ko. Wiin deen jan naa nialin si he dunia le, ka ba yiraa tuo miisin ten-la Wia si nmunsa a chin dunia di-suomun le. <sup>9</sup> Nii-la si ken wu-jimin ne jan wuo jin wiin deen bubuon. Nyusun balipe-la naa peelee balipe ne. Ba nyun ne haal-la hon. Nyusun balipe-la ma naa kuoroo balipe ne. <sup>10</sup> Kuoroo balipe-la tuon banon ne suba, dono ne dii kuoron leele, an ka dono-lana ha bi kuoron die. Di u ma ne ku dii kuoron, u bi jan he dime a dieni. <sup>11</sup> Baga ku-la-na fa si he dime an bira ku tuo, u ma naa kuoro ne. U pe balipe-la le ba naa chori, ama u fa he kuoriele balipe tuon ne. U ma jan suu. <sup>12</sup> Nyilli-la fii n si na naa kuoroo fii ne, ama bana ha bi kuoron die. Ba di baga ku-la jan dii kuoron, ama ba bi jan dii kuoron a dieni. <sup>13</sup> Kuoroo deenba kala ken nii-bala ne, a jon dol-la ba si kaa biben niaa a pi baga ku-la. <sup>14</sup> Ba di Pie-bie-la jan yuo dono, ama Pie-bie-la jan yuo diiba, bee wiaa u ne naa nialin kala si ben niaa kuhian, a ken kuoroo kala ma dolun. Ba di u haritooro ne jan yuo diiba. Niaa deenba ne naa nialin Wia si yira an liise, ba naa ni-tiiba.”

<sup>15</sup> Nii ne Wia tinjaari-la bira dagemi lii-la ha-choron-la fa si hon u nyun bubuon. U bula di lii-la mi si na naa nuhobiinee ari ni-dan si lii ta-yiriba ari tinteeyiriba kala aa bul yikoriyiriba kala. <sup>16</sup> Nyilli-la fii ma mi si na, ba di baga ku-la jan bere ha-choron-la. Ba jan wuri ha-choron-la kiaa ta duu ken yaribiree. Ba jan chan u namia an len di nyinin dii u hangbelee. <sup>17</sup> Wia naa ba ken nii-bala ne a njaa wii-la u si cho. Nii ne tii ba naa nii. Ba jon dol-la ba si kene a biben niaa a pipi baga ku-la. Ba jan biben kula, see di walin kala Wia si bula naa dere. <sup>18</sup> Nii ne Wia tinjaari-la bira bul di haal-la mi si na naa ta-bal ne. Tabalin deen ken dolun a biben kuoro-la si he dunia le.

## 18

### *Babilon tele*

<sup>1</sup> Wiaa deenba kala si naa bal, mi bira na Wia tinjaara dono duu lii Wia-jan a ku tuu tinteen. U faasa ken dolun, ka u pulumun len dunia kala pulle. <sup>2</sup> Nii ne u faasa yire a bul, “Babilon tele, ta-bal-la tele. Dime ne jin-bonono ari diibiisin ba si kise kala he. <sup>3</sup> Babilon niaa naa wu-bonono a yuge ne. Ba dage dunia niaa, ba ma njaa wu-bonono. Dunia kuoroo ma kenba njaa wuliilin. Dunia bayalaa ma to ba harij a njaa wu-bonono a nina moribiee worun.”

4 Wia tinđadari-la si bul wiaa deenba dεε, mi bira nii nuu yikoro duu lii Wia-jaŃ aa bul,

“Mi niaa, má sii Babilon Ƽ, di nii dee ma jaŃ pε nija wu-bomɔ-la ba sí ɲaa.

Di ma ne ɲaa nii, mi jaŃ pε dɔgisema ari mi síi che di mi dɔgise Babilon niaa nii.

5 Ba wu-bonɲoo yuga ne Wia sipaan, nii ne tii Wia ha bi ba wiaa yua.

6 Wialin ba si ɲaama Ƽ, má ma joŃo ɲaaba Ƽ, a tin ma chimin naansiin bulia.

GbaŃa-la ba si kaa ɲaa sinin pima ma nyua, má ma ken u titia a ɲaa sinin naansiin bulia piba di ba nyua.

7 Ba yie ken ba titia yuge ne, a nii sima, a bibese ba titia Ƽ,

nii wiaa má dɔgiseba worun, di ba na heen a yiyel, di hee-la mage nii ba fa síi nii sima.

Ba yie biine di ba nage kuoroo ne, tuo-cheen bi jaŃ kenba a nage yo-haala.

Ba bul ba bi jaŃ kɔ di ba yele da.

8 Nii wiaa ne tii nyanyal-bonɲoo jaŃ kenba che-bala len len.

Ba jaŃ yel ba niaa yoho, di losun ma kenba, ka nyinin ma diiba.

Wiaa deenba kala jaŃ ɲaa,

bεε wiaa la Tiina Wia ken dolun.

U jaŃ dii ba sariya.”

9 Nii ne dunia kuoro-la si to ba harin a nija ba-chorun ari ha-chorun wunjaalaa a pε ninii sima, ba tuon jaŃ chei. Di ba ne na di nyinin ka diiba, ba jaŃ ɲmoo niin vil vil. 10 Di ba ne beŃ hee-la taŃ-la niaa síi na, fawullun jaŃ kenba. Ba jaŃ chin di-bolii a bibenu a bul, “Ou, ou ta-balin deen, ta-bal-la ba síi yire Babilon, u bi diene ka ba dɔgise u niaa ba suu.”

11 Dunia bayalaa yiyel Babilon niaa wiaa, bεε wiaa nuu-kala tuo a biraa yoo ba kiaa. 12 Kialin ba síi yalle ne ɲla: Selime, hooŃ, tabii-tulaa, geri-yuolizooŃ, muɔlaa, geripe-fula-fula biisin, geripe-fiesin, ari daasi-la kala yallin si heyε, ari kialin kala ba si ken batun nyilaa ɲaa, ari kialin kala ba si ken daa-la yallin si heyε saa, ari kolin, ari kialin ba si ken hooŃ ɲaa, ari lokunbuiaa.

13 Ku-suɔ-sin ba si joŃo guoli kudiilee tuon u sin, tulaaliba, tii-kelin suɔra si sima, si-duoron, nuun, mun-zomun, folimiaa, nesin, ari piesee, ari janin, ari janin torukoba, ari yosun. 14 Nii ne ba bira bul a tige taŃ-la niaa Ƽ, “Ku-zomɔ-la kala ma fa síi hienu, ma telba kala Ƽ, ma ku-zon-zon-na kala ari ma sima-la kala ma fa síi nii, ba bira tuo. Ma bira bi jaŃ kɔ di ma naba.”

<sup>15</sup> Bayalia-la kala fa si yalle kiasa pi Babilon niaa a na moribiee, ba jan fa fawullun a tin hεε-la wiaa Babilon niaa sii na. Ba kala jan chin di-bolii a faasa nmoo niin a yele bubul, <sup>16</sup> "Ou, ou, ta-balin deen fa zomɔ a ken ku-zonɔɔ maa. U niaa fa lilaale geri-yuoli-zonɔɔ, ari muɔlaa, ari geri-fiesin, a lilaale selime ari tabii-tulaa. <sup>17</sup> U bi diene ka kiasa deenba kala chei η teen." Nii ne nialin sii duori liin dabori-bala-la sii ven mugi-balin tuon kuhiasin, ari nialin sii tin daboro-la tuon, ari nialin sii juu liin daborusun aa mu leree, ari nialin kala si che kiasa mugi-balin tuon di ba na moribiee, <sup>18</sup> niaa deenba kala chin di-bolii ne a biben. Ba na Babilon duu dii nyinin. Nii ne ba nmoo niin a yel a bul, "Ta bee ne fa nage ta-balin deen?" <sup>19</sup> Nii ne ba yel a naa hagila hihe ba nyusun le a bul, "Ou, ou, ta-balin deen le ne nialin kala fa si ken liin daborusun to a jigi. Má bee na, u bi diene ka kialin kala u fa si kene chei. <sup>20</sup> Ma nialin si he Wia-jaŋ le, má jujuɔse Babilon wiaa. Ma Wia niaa ari Wia nanzooba ari nialin fa sii bul wiaa, Wia Din-zon-la dolun le, má jujuɔse. Wia jon ma chimin a jonɔ tin Babilon ne."

<sup>21</sup> Nii ne Wia tinɔara donɔ, u dolie ne worun, u jon tabii-bal a jonɔ yuo he mugi-balin le. Tabii-la fa yuga a nage nomun ne. U

si jon tabii-bal-la a yuo nii, u bul, "Nii titia ne ba jan naa Babilon. Ba jan jon Babilon, ta-bal-la a yuo ta ari dolun. U jan lel dunia le. <sup>22</sup> Ba bira bi jan nii chen-duduuroo di baa du, nmulun nmiiraa ma bira bi jan nmunmuu. Saaraa ari geripe-yuoroo ma jan bira tuo u le. Niaa bira bi jan nunon munun u le. <sup>23</sup> Chaanaa ma bira bi jan chaane u tuon. Baalaa ari haalaa bira bi jan jaa donɔ. Babilon bayalaa ne fa naa nibalaa dunia deen le, an ka ba ken daalusun aa naa wubonɔɔ aa nyise dunia niaa kala. <sup>24</sup> Babilon le ne ba kpu nialin fa sii bul wiaa, Wia Din-zon-la dolun le, a kpu Wia niaa maa, a bira kpu nialin donsun si he dunia le."

## 19

### *Pie-bie-la ha-jaari gbiele*

<sup>1</sup> Wiaa deenba kala si naa harin, nii ne mi nii gon Wia-jaŋ le. Gon-la nage ni-dan yiikoro ne aa bul wiaa. Ba si, "Haleluya, la Tiina Wia ken dolun duu laala ta. U ne ken yirin ari dolun. <sup>2</sup> Má len di la dennu, bee wiaa u ken wutitii ne a kaa dii niaa sariya. U dii ha-chorun-bal-la sariya. Ha-chorun-bal-la ne faa naa wu-liilin, a chei dunia niaa kala. U si kpu Wia tintinnaa nii, nii titia ne Wia ma dogisu."

<sup>3</sup> Nii ne ba bira heele bul, "Haleluya, nyin-la sii dii haal-la, u nyuɔsun ne jil wia

nyuŋ a kaa mu wuu.” <sup>4</sup> Nii ne nihasiŋ mara ari banese-la ari kialiŋ banese si weye tuu kpirimi a chuole Wia. U fa hoŋ u kuori-kpasa nyuŋ ne. Nii ne ba bul, “Ami, Haleluya!” <sup>5</sup> Nii ne nuu yiikoro lii Wia kuori-kpasa-la seme a heele bul, “Ma Wia tiŋtinnaa kala ari ma nialiŋ kala sii fáu, nihasiŋ ari hanbiisiŋ kala, má leŋ di la denne Wia. U ne tiila.” <sup>6</sup> Nii ne mi bira nii ni-dan yiikoro. Yiikori-la fa nage fuo-balaa sii pelli ne gbul gbul. U bira nage duonuŋ sii kpia ŋmana ŋmana aŋ pe liligise. Nii ne yiikori-la heele bul, “Haleluya, la Tiina Wia Wii-jaribako dii u kuoruŋ ne. <sup>7</sup> Má leŋ di la jujuose a yire u yiri-baliŋ a denu woruŋ. Bua-la Pie-bie-la si jaŋ jaa haala yie ne. Haal-la ma si jaŋ jaau ŋaa siri ne. <sup>8</sup> Ba joŋ geri-yuoliz-ŋ a laale haal-la. Geri-la tula zomo. Kuŋ-kala tuo u le. Geri-yuoli-z-ŋ-la haal-la si laala ŋaa Wia niaa tuo-pul wu-ŋaalaa ne.”

<sup>9</sup> Nii ne Wia tiŋdaari-la bula pimi a bul, “Ŋmunse wiin deen, ari Wia jaŋ pe nialiŋ ba si yira di ba ku gbieli Pie-bie-la ha-jaari gbiele a dii kudiilee dime.” Nii ne Wia tiŋdaari-la bula pimi a bul di Wia niin wu-tenŋe ne nii. <sup>10</sup> Nii ne mi tuu kpirimi di mi chuolu, ama u bula pimi di mi sí nii ŋaa, di la kala ŋaa tiŋtinnaa a tima pipi Wia, la di nialiŋ kala sii to wialiŋ Yesu si bula. Nii

ne u bula pimi di mi chuole Wia. Di nialiŋ kala sii bul wiaa, Wia Diŋ-z-ŋ-la doluŋ le, wialiŋ titia ne Yesu dage.

### *Ja-pula jijilli-la*

<sup>11</sup> Nii ne mi na Wia-jaŋ duu suro. Mi beŋ a na ja-pula di nuu jila. Nii-la si jila yiriŋ ne Ni-tenŋe ari Wutitii Tiina. U dii niaa sariya ari wutitii, a keŋ wutitii ma yuo laaliŋ. <sup>12</sup> U siaa kala chuchol a nage nyin-geliŋ, aŋ ka u chu kuori-nyuŋ-chuuluŋ a yuge. Ba ŋmunse u yiriŋ he nyuŋ-chuulu-la le. Nuukala bi yiri-la jin see u titia. <sup>13</sup> U laale geri-la chaliŋ si misa ne. Ba keŋ nii-la kaa yire Wia Niin Wiaa. <sup>14</sup> Wia-jaŋ laali-yuoroo ma laale gerifula-fula biisiŋ ne. Ba ma jil ja-pulluŋ a tuto u hariŋ ne. <sup>15</sup> Nii ne tokobiin lii niila si jil jaaba niin le a ku lii, a keŋ niin woruŋ nyagaga. Tokobii-la ne u jaŋ kaa ta dunia niaa kala kpu. U jaŋ keŋ kpaasa a kaa beŋ dunia niaa. La Tiina Wia Wii-jaribako keŋ baaniŋ ne dunia niaa nyuŋ. U baaniŋ jaŋ sii ba nyuŋ woruŋ. Niaa chaliŋ jaŋ lii ari ba si yie chage tii-nenee liin nii. <sup>16</sup> Ba ŋmunse u yiriŋ ne a he geriduduŋ-la u si laala le ari u naapuŋ le. U yiriŋ ne ŋla: “Kuoroo kala Kuoro ari la tiinaba kala Tiina.”

<sup>17</sup> Nii ne aŋ ka mi na Wia tiŋdaaru kubala duu chin wii-posuŋ le. Nii ne u faasa yire diibiisi-la kala sii fil wia nyuŋ di-bolii di ba ku pe

dɔŋɔ ɛ a dii kudiile-la Wia si jaŋ joŋo piba. Kudiile-la jaŋ yuge lee-la. <sup>18</sup> U yireba di ba ku dii kuoroo namia, ari laali-yuori-hiasin namia, ari ni-duorun namia, ari janin namia, ari nialin si jila namia, ari nuhuobiine namia, nialin si tii ba titia ari nialin si ŋaa yosun, ari nihiasin ari hanbiisin kala. <sup>19</sup> Nii ne mi na бага ку-ла ари дуня куорoo ари ба лаали-уорoo ди ба хилеме ди ба уюо нии-ла си јил јoo-ла ари у лаали-уорoo. <sup>20</sup> Nii-la si јил јoo-ла ари у лаали-уорoo уюо диі бага ку-ла а кену. Ба бира кенј нии-ла си нџа вџаа ари уу бул вџаа, Вџа Диј-зoŋ-ла долун ɛ. У ne fa ŋaa wu-magilaa бага ку-ла sipaan a wuo nyise nialin ba si кенј бага ку-ла yirin magileba, ари nialin sii чуoɛ бага ку-ла nagingin ba si me bil. Ба јоŋ niaa deenba baliamin a уюо та ба ку туу јуу Вџа nyinin, nyin-la sii dii a nage јiribin. <sup>21</sup> Ka nii-la si јил јoo-ла кенј tokobii-la si lii u niin ɛ kaa kpu nikaanaa. Diibiisin loriki ba nanpilin kala.

## 20

*Nialin si beŋ dunia niaa јisin bui*

<sup>1</sup> Nii ne mi na Wia tinɔara duu lii Wia-jaŋ a ku tuu tinteen, a kori buotuo-lunii-la boribin ari chorun-bal kubala. <sup>2</sup> Nii ne u кенј диј-ла, диј-ла fa si he dime bunbun, a vɔbu bil јisin bui.

Diŋ-la ne ŋaa Sitaani. <sup>3</sup> Nii ne Wia tinɔari-la јоŋ diŋ-la a уюо he buotuo-la ɛ a kaa to, a magile buotuo-la niin, di nuu si wuo kaa suri. Ба кенј диј-ла kaa to duu bira si dunia niaa nyisu, see di јisin bui-la bala. Ди јисин буи-ла ne bala, ба јаŋ кену puri muapilii.

<sup>4</sup> Nii ne mi na kuorikpasinin di niaa hoŋ ba nyun. Niaa deenba ne Wia piba dolun di ba dii dunia niaa sariya. Nii ne an ka mi na niaa dinjin. Niaa deenba ne faa bul wutitii-la Yesu fa si daga a pi niaa, an pee bul Wia niin wiaa. Nii ne ba kpuba a keru ba nyusun. Niaa deenba-na fa bi бага ку-ла ka чуoɛ ne. Ба би ку-ла ба си me u nagu maa чуoɛ. Ба би бага ку-ла magilin kene ba tillin ɛ koo ba nisaa ɛ. Niaa deenba suba, ama ba sii suun ɛ di ba di Kirisito dii kuorun a beŋ dunia niaa јisin bui. <sup>5</sup> Nialin si laa sipaan sii suun ɛ ne ŋla. Nialin si suba, nikaanaa bi jaŋ sii suun ɛ, see di јisin bui-la yie. <sup>6</sup> Nialin si laa sipaan sii suun ɛ, ба би disinin kene. Wia jaŋ peba ɛ. Niaa deenba suu bala ne. Ба бира би јаŋ suu. Suu-liala ma bi jaŋ wuoba. Ба јаŋ chin Wia ari Kirisito sipaan a laa niaa nyun a tima piba. Ба ди Kirisito јаŋ beŋ dunia niaa јisin bui.

*Ba јоŋ Sitaani he nyinin ɛ*

<sup>7</sup> Di јisin bui-la ne kiele, ба јаŋ liise Sitaani sarika-la ɛ.

<sup>8</sup> U jaŋ ku lii a nyise dunia niaa si he tiŋteen seme-na kala le di ba yuo laalin. Gog ari Magog niaa ne nii. Ba yuga a mage fuon niŋ hagiibunbuguloo ne memε. <sup>9</sup> Gog ari Magog niaa jaŋ duure dunia kala a mu golli leela Wia niaa si he, ari taŋ-la Wia si cho. Nii ne nyiniŋ lii wia nyuŋ a ku tuu dii ba kala. <sup>10</sup> Sitaani ne nyise Gog ari Magog niaa he di ba yuo Wia niaa. Nii ne ba jonu a yuo he nyiniŋ sii dii a nage jiribiŋ le. Baga ku-la ari niila si nyia wiaa ari uu bul wiaa, Wia Diŋ-zon-la doluŋ le, ma he dime. Ba jaŋ na heeŋ wiheye ari titaŋiŋ kala a kaa mu wuu.

### *Ba dii dunia niaa sariya*

<sup>11</sup> Nii ne ka mi na kuorikpasi-bal ku-pula duu china. Nu u ne hoŋ u nyuŋ. Nii ne mi na di tiŋteen ari wia nyuŋ kala lele nii-la siŋ le. Ba bira bi lee keŋε. <sup>12</sup> Nii ne ka mi na nialiŋ si suba, nihiasiŋ ari haŋbiisiŋ kala, di ba chiŋ kuori-kpasa-la sipaan. Nii ne ba suri tenniŋ yuge, a bira suri teniŋ doŋo. Miisiŋ teniŋ ne nii. Nialiŋ si keŋ miisiŋ Wia teen yiraa ne he u tuon. Tenni-la doŋsuŋ le ne ba ŋmuŋse nuu-kala si he dunia le wu-ŋaalaa he. Nuukala si ŋaa wiaa mage nii ne, ba jaŋ beŋ a timu. <sup>13</sup> Nii ne mugi-baliŋ keŋ nialiŋ kala si suu u tuon ku lii. Nialiŋ kala ma si he leleε-jaŋ ari Wia nyiniŋ tuon, ba kala ku lii. Nii ne ba beŋ tenni-la tuon

a na wialiŋ kala ba si ŋaa dunia le a dii ba sariya. <sup>14</sup> Nii ne ba jon suuŋ ari leleε-jaŋ a yuo he nyiŋ-bal-la le. Nii-la kala si jaŋ juu nyiŋ-bal-la tuon, u suu-liamiŋ ne nii. <sup>15</sup> Di nuu-kala yiriŋ ne tuo miisiŋ teŋ-la tuon, ba yie jonu yuo he nyiŋ-bal-la tuon ne.

## 21

### *Wia-jaŋ falii-la ari tiŋtee-falii-la*

<sup>1</sup> Nii ne mi na Wia-jaŋ ku-falii ari tiŋtee-falii. Bunbun kialaa kala dere ne. Mugi-baliŋ kala tuo tiŋtee-falii-la le. <sup>2</sup> Nii ne mi na ta-falii-la Wia si ŋaa di u lii Wia-jaŋ a ku tuu tiŋteen. Taŋ-la baa yiru Jerusalem ne. U bi disinniŋ keŋε. Wia kpieru ari ba si yie kpierε haala nii a kaa mu pi u bala. <sup>3</sup> Nii ne aŋ ka mi nii nuu yiikoro duu lii kuori-kpasa-la seme a faasa bul di ma bee na, leleε Wia ko nuhuobiine teen ne. U jaŋ hoŋ ba tuon. Ba ne jaŋ ŋaa u niaa. U titia jaŋ hoŋ ba teen a ŋŋaa ba Wia. <sup>4</sup> U jaŋ fiise ba sii-liiriŋ kala ta. Ba bira bi jaŋ suu, ba tuon bira bi jaŋ chei. Ba bira bi jaŋ yel a bira bi jaŋ na heeŋ, bee wiaa wu-binia-la kala bala ne.

<sup>5</sup> Nii ne nii-la si hoŋ kuorikpasa-la nyuŋ bul di ma bee na, mi ŋaa kuŋ-kala birime ku-falii ne. Nii ne u bira bula pimi di mi ŋmuŋse wiaa deenba u si bula, bee wiaa ba kala ŋaa wutitii ne. Niaa jaŋ wuo laaba dii. <sup>6</sup> Nii

ne u bula pimi a bul, "Wii-kala dere ne. Mi ne nja Alifa ari Omega. Mi ne nja nii-la fa si he dime bunbun ari nii-la si jan he dime dunia diderin. Nii-la kala lii-nyuasun si kene, mi jan nja lii-la si pi niaa miisin pu pei. <sup>7</sup> Nii-la kala si wuo yuo dii Sitaani jan na kiaa deenba kala. Mi jan nja u Wia, u ma jan nja mi bii. <sup>8</sup> Ama nialin si nja fawuluba, ari nialin si bi yarida kene, ari disin njaaraa, ari ni-kpuuraa, ari nialin sii nja wu-liilin, ari nialin si ken daalusun aa nja wu-bonjoo, ari vui-kpaaraa, ari nialin kala sii nyia wiaa, ba jan jonba he nyinin sii dii a nage jiribin. Ba jan suu suuliamin nyin-la tuon."

### *Jerusalem falii-la*

<sup>9</sup> Nii ne Wia tinjaaraa balipe-la si kori gbansin balipe-la si suo ari nyanyal-bom-la balipe ku bula pimi di mi ko, duu dagemi haalla Pie-bie-la si jan jaa. <sup>10</sup> Nii ne Wia Din-zon-la ku hemi le, ka u jonmi kaa jil peelbal kubala nyun. U lenje ne worun. Nii ne u dagemi tan-la si bi disinin kene baa yire Jerusalem. Wia lenj u lii Wia-jan kuu tuu tinteen. <sup>11</sup> Tan-la pulle ari Wia si pulle nii, a tutul ari nanjpachil-zonjoo n si bi na tete, a bira tutul ari tabiin si nage beenantire. <sup>12</sup> Tan-la ken kere-bal kubala. U lenje ne worun a ken boinniirin fii ari balia a gollu. Wia

tinjaaraa fii ari balia chin boye-la le, ka ba nmunse Iziral naabalimaba fii ari balia-la yiraa he boye-la le. <sup>13</sup> Tan-bubuon ari tan-nyun ken boyee batori batori, tasesin ma ken batori batori. <sup>14</sup> Kere-la gentine ba bil tabiaa fii ari balia ne. Tabiala le ba nmunse Pie-bie-la nanzoba fii ari balia-la yiraa ne heba le.

<sup>15</sup> Wia tinjaari-la si bul wiaa mi teenj kori selime daan ne duu kaa magise tabal-la ari u boinniiri-la ari u keresin. <sup>16</sup> Tan-la jalin ari u duomun kala mage don ne. Nii ne u magise tan-la ari selime daa-la duu nja meel-daasin bui ari zabanon. U duomun ari u jalin ari u lenjin kala mage don ne. <sup>17</sup> Wia tinjaari-la magise tan-la kere-la ma ne. U lenjin nja naakielin mahin batori ari fii ari balia ne. Nuhuobiine sii magise kiaa, nii titia ne Wia tinjaari-la ma magise. <sup>18</sup> Ba ken tabii-pullun ne saa kere-la, an ka tan-la kala nja selime, a kala chaane a nage beenantire. Kun-kala tuo u le. <sup>19</sup> Tan-la kere-la gentine-la tabiaa kala nja tabiizom ne a tutul. Bunbun kua yirin ne jasipa, liamin kua ma yirin ne saafaya, torimun kua ma yirin ne aget, nesemin kua ma yirin ne emeralidi, <sup>20</sup> non kua yirin ne onis, dumun kua yirin ne kaanelian, pemin kua yirin ne kirasolati, chorimun kua ma nja beril,



nibimin kua ma yirin ne topas, fiimin kua yirin ne kirasopilis, fi ari kun kua yirin ne jasinis, ka fi ari baliamin kua ne yirin ne ametis. <sup>21</sup> Boye-la fi ari balia kala n̄aa tabii-tulaa ne. Boi-kala n̄aa tabii-tulii kubala ne. Tan-la wonbiin n̄aa selime ne, kun-kala tuo u le a kala tutul ari beenantire.

<sup>22</sup> Nii ne mi ben tan-la tuon a bi Wia-dia kala na dime. Tan-la n̄aa n̄i chuole la Tiina Wia Wii-jaribako ari Pie-bie-la lee-kala. Ba Wia-dia ne nii. <sup>23</sup> Tan-la bira bi wii-posun ari chene ka che, bee wiaa Wia tula ne n̄aa ba pulumun. Pie-bie-la ne n̄aa ba chaanin. <sup>24</sup> U pulumun le ne dunia n̄aa kala jan ven. Ka dunia kuoroo kala jan ken ba ku-zonhon kaa juu dime. <sup>25</sup> Ba bi jan ken tan-la boyee kaa to wiiheye. Titanin paala tuo dime. <sup>26</sup> Tintheyee n̄aa kala jan ken ba ku-zonhon ari ba kuori kiaa kaa juu dime, <sup>27</sup> ama kun-kala si ken disinnin, koo nii-la kala si n̄aa ni-bon, koo wu-nyiaru kala bi jan juu tan-la, see nialin Pie-bie-la si n̄munse ba yiraa he miisin ten-la le ne jan juu dime.

## 22

<sup>1</sup> Nii ne Wia tindaari-la bira dagemi fuo kubala. Fuo-la liin n̄i pi n̄aa miisin. Lii-la kala pulla chila chila a nage beenantire. Lii-la pelle lii Wia ari Pie-bie-la kuorikpasa-la teen ne, <sup>2</sup> a pelle

to ta-bal-la tutuobaanin, ka tiisi-la si ken nenee sii pi n̄aa miisin chin fuo-la chol-lun balia-la kala. Tiisi-la yie nen nen-yiriba, baa tore chene kala. Tiisi-la pipaarin ne ba kaa vivaare tintheye-la n̄aa. <sup>3</sup> Kun-na kala Wia sii nmiesa heu le tuo ta-bal-la tuon. Ama Wia kuori-kpasa ari Pie-bie-la kpasa jan he lee-la, ka u tintinnaa chuolu. <sup>4</sup> Ba jan na u siaa, ka u yirin he ba tillin le. <sup>5</sup> Tan bi jan biri dime. Ba bi chaanin koo wii-posun pulumun che dime. La Tiina Wia ne jan n̄aa ba pulumun. Ba ne jan ben dunia a kaa mu wuu.

*Yesu si duu jan ko leele*

<sup>6</sup> Nii ne Wia tindaari-la bira bula pimi di wiaa deenba n̄aa wutitii ne, di n̄aa jan wuo laaba dii. Di la Tiina Wia, nii-la si jon u Din-zon-la a pi nialin sii bul wiaa, Wia Din-zon-la dolun le ne timu duu ku bul wialin si jan n̄aa leele a pi u tintinnaa. <sup>7</sup> Yesu si, "Ma bee na, mi jan ko leele." Nialin sii to wialin ba si bula Wia Din-zon-la dolun le a he tenin deen tuon, Wia jan peba le.

<sup>8</sup> Mi-na Jon, mi ne nii-la si n̄a an pe na wiaa deenba kala. Mi si n̄a an naba nii, mi tuu kpirimi Wia tindaari-la sipaan, nii-la si dagemi wiaa deenba kala, a chuolu. <sup>9</sup> Nii ne u bula pimi di mi si nii n̄aa, di la kala n̄aa tintinnaa a tima pipi Wia, la di nialaa kala sii bul wiaa,

Wia DiŃ-zoŃ-la doluŃ Ƽ, ari nialin kala sii to wialin si he tenin deen tuoŃ. U bula pimi di mi chuolƼ Wia.

<sup>10</sup> Nii ne u bira bula pimi di mi si wiaa deenba ba si bula Wia DiŃ-zoŃ-la doluŃ Ƽ a he tenin deen Ƽ kaa faa. U bi jan dieni, ka wialin ba si bula Ńaa. <sup>11</sup> Nii wiaa ma len di ni-boŃŃoŃ ken nii naan Ƽ a ŃŃaa wu-boŃŃoŃ, di nialin si ken disinnin ma ken nii naan Ƽ a ŃŃaa disinnin, di ni-zoŃŃoŃ ma ken nii naan Ƽ a ŃŃaa wu-zoŃŃoŃ, di tuo-pul tinŃaa ma ken nii naan Ƽ a ŃŃaa tuo-pul wiaa.

<sup>12</sup> Yesu si, "Ma bee na, mi jan ko leele, mi jan ku tin nuu-kala. Nu-u-kala si tima mage nii, nii titia ne u jan laa u time. <sup>13</sup> Mi ne Ńaa Alifa ari Omega, mi ne Ńaa nii-la fa si he dime bunbun ari nii-la si jan he dime dunia diderin. Mi ne Ńaa di-suomuŃ, mi ne Ńaa di-derin maa."

<sup>14</sup> Nialin sii to Wia wiaa, Wia jan peba Ƽ di ba wuo na wonbiin a to ta-bal-la boinŃiiree juu, a wuo dii tia-la sii pi niaa miisin nenƼƼ.

<sup>15</sup> Ama ni-boŃŃoŃ jan chin tan-la jeen harin. Nialin wu-Ńaalaa si nage vahin, ari nialin si ken daalusun a ŃŃaa wu-boŃŃoŃ, ari nialin sii Ńaa wu-liilin, ari nialin sii kpu niaa, ari vui-kpaaraa, ari nialin kala si cho wu-nyiarin aa nyia wiaa, ba kala jan chin tan-la jeen harin.

<sup>16</sup> Nii ne Yesu si, "Mi ne tin mi tin daara duu ko ma teen a bul wiaa deenba pi nialin si laa Yesu wiaa dii a hihilimi lee-na kala. Mi Ńaa Devit dia niaa gentine ne an pe Ńaa Devit doho nuu. Mi ne Ńaa nanyualun."

<sup>17</sup> Nii ne Wia DiŃ-zoŃ-la ari haal-la Pie-bie-la sii che duu jaa bula pi niaa a bul, "Ma ko. Nu-u-kala si nia, ma len duu ko. Nu-u-na kala lii-nyuasun si kenƼ, uu ko. Nii-la kala si cho duu nyua lii-la sii pi niaa miisin an si kun-kala tin, uu ko a nyua lii-la."

#### *Wu-kaanaa*

<sup>18</sup> Mi-na JcoŃ che di nuu-kala si nii wiaa deenba ba si bula he tenin deen tuoŃ, di ba ken ba titia worun ari wiaa deenba Ƽ. Di nuu-kala ne ken wii pe wiaa deenba Ƽ, Wia ma jan jon nyanyal-boŃo-la ba si daga tenin deen tuoŃ a doŃise u tiina.

<sup>19</sup> Di nuu-kala ma ne liise wiaa deenba kun ta, Wia ma jan liise u tiina ta. U bi jan puu wonbiin duu na kialin ba si ŃmuŃsa he tenin deen tuoŃ. U tiina bi jan wuo dii tia-la sii pi niaa miisin nenƼƼ. U bira bi jan juu tan-la Wia si liisa tuoŃ maa.

<sup>20</sup> Nii-la sii dage wiaa deenba Wia si dagu bul duu ko ne leele. La Tiina Yesu, ko. Ami.

<sup>21</sup> La Tiina Yesu lahorimo Ƽ, Wia niaa kala jan hon ari yarifielaa. Ami.